

Wakità Zəzagəla Wakitə Aṅa Makəs Vok Slawda

Mawga (Cameroun)



Matal: Wakitə Zəzagəla Wakitə Aṅa Makəs Vok Slawda Mawga
(Cameroun) (New Testament)

Wakità Zəzagəla Wakitə Aṇa Makəs Vok Slawda Mawga (Cameroun)

Matal: Wakitə Zəzagəla Wakitə Aṇa Makəs Vok Slawda Mawga (Cameroun) (New Testament)

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source files dated 29 Jan 2022

03efbf2f-98ca-5534-8610-0be3a8c4b974

Contents

Mata	1
Mark	54
Luka	86
Yuhana	142
Sləray	179
Rom	226
1Korintiya	252
2Korintiya	275
Galatiya	290
Efedəya	298
Filipiya	307
Kolosəya	313
1Tesaloniki	319
2Tesaloniki	324
1Timotawus	327
2Timotawus	334
Titus	339
Filemon	342
Ibəranənkowen	344
Yakuba	364
1Piyer	371
2Piyer	378
1Yuhana	383
2Yuhana	389
3Yuhana	390
Yahuda	391
Mafətəla	393

GAY MARABƏJ UWANA MATA ATSETSÈR Evangile selon Matthieu

*Sləm aña azlababa madzidziga aña Yesu Kristu
(Luka 3.23-38)*

¹ Aganay sləm aña azlababa madzidziga aña Yesu Kristu, bəzi aña David, bəzi aña Abərahəm. ² Abərahəm ayyà Isak; Isak ayyà Yakuba; Yakuba ayyà Yahuda la azladedə aña; ³ Yahuda ayyà Farəs atà la Zara, (Sləm aña iyà aña Tamar); Farəs ayyà Esərom; Esərom ayyà Aram; ⁴ Aram ayyà Aminadab; Aminadab ayyà Naheson; Naheson ayyà Salmon; ⁵ Salmon ayyà Bowas, (Iyà aña kà Rahab); Bowas ayyà Obed, (Iyà aña kà Rut); Obed ayyà Isay; ⁶ Isay ayyà sufəl David.

David ayyà Salomon, (Iyà aña kà mis aña Uriya); ⁷ Salomon ayyà Rehəbehəm; Rehəbehəm ayyà Abiya; Abiya ayyà Asa; ⁸ Asa ayyà Yosafat; Yosafat ayyà Yoram; Yoram ayyà Ozəya; ⁹ Ozəya ayyà Yotam; Yotam ayyà Ahaz; Ahaz ayyà Hesəkiya; ¹⁰ Hesəkiya ayyà Manase; Manase ayyà Amon; Amon ayyà Yosəya; ¹¹ Yosəya ayyà Yekoniya atà la azladedə aña, la mok uwana tahəl azlabəza Isərayel à Babila.

¹² Mok uwana tadàla atà bokuba azlamayà à Babila kà, Yekoniya ayyà Salatiyel; Salatiyel ayyà Zorobabel; ¹³ Zorobabel ayyà Abiyud; Abiyud ayyà Eliyakim; Eliyakim ayyà Azor; ¹⁴ Azor ayyà Sadok; Sadok ayyà Akim; Akim ayyà Eliyud; ¹⁵ Eliyud ayyà Eleyazar; Eleyazar ayyà Matan; Matan ayyà Yakuba; ¹⁶ Yakuba ayyà Yusufu, zil aña Mariyama uwana ayyà Yesu, uwana Kristu tagodal.

¹⁷ Kiya uwaga kà dagay Abərahəm tsərəh à David mayyi à tsəh ala kulo gəl aña ufad, ngaha kulo gəl aña ufad dagay David tsərəh à uwana tadàla atà à Babila, ngaha aya kulo gəl aña ufad tsərəh à mayyi Yesu uwana Kristu.

*Mayyi Yesu Kristu
(Luka 2.1-7)*

¹⁸ Kiya uwaga apakà vok aña mayyi Yesu Kristu. Iyà aña, Mariyama agà mawda aña Yusufu, ama dagay uwana tagagamay dadəñ aw kà, Mariyama agà la bəzi la hudf, uwaga kà Masasədok Zəzagəla la uwana adàllà à hudf. ¹⁹ Ama Yusufu mawda aña kà dza dziriga, asal masəla à uda la dazuwaya la huma à azladza aw, adzəgw masak à mawda aña la səbàh. ²⁰ Mok uwana adzəgw uwaga kà masakal kà, malika aña Zəzagəla apəhalla vok la masesinay agodal: “Yusufu, mayyi à tsəh ala aña David, guba akəs ka kà mazəb Mariyama mawda aña aw, kà uwana la ndzəda aña Masasədok Zəzagəla la uwana akud bəzi uwaga la hudf aña. ²¹ Masla adəyyi bəzi zilga, uwana kadàvəl sləm Yesu, uwana adəbəl tsəhay aña la tsakana aña atà la abə gesina.”

²² Tatak uwaga gesina apakà vok kà magədf à afik bokuba uwana Sufəl Zəzagəla apəh à ahəl aña azlaməna mapəh à atà gay à ahəl kà mapəh à azladza:

²³ 'Dahalay uwana asəl zil aw, adəzəb bəzi à hudf, adəyyi bəzi zilga, tadàvəl sləm Emanuyel.' (Uwana asal magədfay: Zəzagəla la ahən la anu) ✧

²⁴ Mok uwana Yusufu adatsən ala kà, adəhəñ bokuba uwana malika aña Sufəl Zəzagəla apəhal la masesinay, ngaha azəb Mariyama mawda aña kà mis. ²⁵ Ama

Yusufu ahənà à ahəŋ la masla tsəràh à mayyi kona aŋha, uwana Yusufu avəl sləm Yesu, aw.

2

Azlaməna masəl tatak tasa à afik la mas à afik afats

¹ Kiya uwaga tayyà Yesu la gudəŋ Betelehem, la kutso aŋa Yahudiya la abà la zamana aŋa sufəl Herod. Uwana tayyay kà, azlaməna masəl tatak uwana tanə̀rə̀zàh azlatsetsiliŋ tasa à afik la mas à afik afats, tasa à Urusalima. ² Tanàv: “Aŋala bəzi uwanay tayyà la ahəl à ahəl à uwana adàgay Sufəl aŋa azla Yahudiya la? Mə̀nə̀ŋə̀ŋ tsetsiliŋ aŋha apə̀hla vok ala la mas à afik afats, maslà gə̀ la uwaga mə̀sa à afik kà makədə̀fal à ahəŋ.”

³ Kay, mok uwana sufəl Herod atsən uwaga, guba akəs, gəl akədə̀fal à vok la azlaməna madz à ahəŋ la Urusalima gesina. ⁴ Ahamà gay azlaməŋga aŋa azlaməna mav tatak à Zəzagəla à vok la azlaməna matapla wakità aŋa Musa à azladza, anav à atà gay ala naka tayyi Kristu ma à uwala asla tak la? ⁵ Tagodfal: “La Betelehem, la kutso Yahudiya la abà.” Kà uwana aganay azlaməna mapə̀h à atà gay à ahəl tatsetsèr:

⁶ 'Kak Betelehem la kutso Yahudiya la abà,

Katsə̀h azlagudəŋ aŋa Yahudiya à tsə̀h aw,

Kà uwana la kak la abà

La uwana masla humà uwana adə̀guw tsə̀hay gulo Isə̀rayel à huma adàs à uda.'

☆

Zəzagəla agod. ⁷ Kiya uwaga Herod azəl azlaməna masəl tatak uwaga la gəl à gəl, ŋgaha anàvə̀ à atà kaslà mapə̀hla vok ala aŋa tsetsiliŋ uwatà la gay ala. ⁸ La lig la ahəŋ aslèlla atà à Betelehem: “Dàw, kayhaw bəzi uwatà, baŋa kadabə̀zawwal kà, kadə̀pə̀haw à gi ala babay, kà gi aŋa maday aŋa makədə̀fal à ahəŋ suwaŋ”, agod à atà.

⁹ Mok uwana tatsə̀b sləm à mapə̀hay aŋa sufəl uwaga kà, tahəd, tanə̀ŋə̀ŋ tsetsiliŋ uwana tanə̀ŋə̀ŋ la mas à afik afats, aga la huma aŋatà, ama mok uwana adabə̀z à slaka uwana bəzi la ahəŋ kà, tsetsiliŋ atsizl à ahəŋ. ¹⁰ Uwana tanə̀ŋə̀ŋ kiya uwaga kà, tahən ala la marabay mə̀ŋga. ¹¹ Tadà à gə̀y, tanə̀ŋə̀ŋ bəzi vərna la iyà aŋha Mariyama. Takədə̀də̀h à ahəŋ, tazlè̀bà bəzi, tapàlla kazlaŋa aŋatà ala, ŋgaha tavə̀hal azlatatak: Luwə̀luwà, matə̀rsin, ŋgaha la mir. ¹² La lig la ahəŋ Zəzagəla apə̀h à atà vok à abà la masesiŋay kà atà aŋa maguway la slaka sufəl Herod aya aw. Kiya uwaga tanə̀fà tetə̀vi anik kà mawul à gudəŋ aŋatà.

Mahoy à gudəŋ Misəra

¹³ Mok uwana azlaməna masəl tatak tadiy aŋatà, malika aŋa Sufəl Zəzagəla apə̀hla vok à Yusufu la masesiŋay, agodfal: “Sà à afik, zə̀b bəzi la iyà aŋha, ŋgaha hòy à gudəŋ Misəra, kadə̀dz à ahəŋ la abatà tsəràh à uwana: ‘Wùlla à waŋ’, gədə̀agod à ka, kà uwana Herod adə̀yah makəd bəzi.”

¹⁴ Hadzak, Yusufu atsizlla ala, azə̀b bəzi la iyà aŋha, ŋgaha ahòy la atà la vəd à kutso Misəra. ¹⁵ Adzà à ahəŋ la abatà tsəràh à mamə̀tsay aŋa Herod, uwaga apakà vok kà magəd uwana à afik Sufəl Zəzagəla apə̀h la paŋaw aŋa azlaməna mapə̀h à atà gay à ahəl kà mapə̀h à azladza:

'Gə̀zəl à bəzi gulo à uda la kutso Misəra.' ☆

Makad bəza

¹⁶ Mok uwana Herod asəl kà azlaməna masəl tatak tavavàrə̀ŋ kà, apək ləv kaykay, avà tetə̀vi kà makad azlabeza zilga la gudəŋ Betelehem gesina dagay la azlavə̀rnaga tsəràh à mavay səla. Dagay la matsən gay mapə̀hla vok ala aŋa tsetsiliŋ, uwana

atsənàŋ la slaka azlamasəl tatak uwaga. ¹⁷ Kiya uwaga agəd à afik, uwana masla mapəhal gay à ahəl Yereimiya agəd:

¹⁸ 'Hulolo atsən la Rama, matuway la mawiyay mənğa.

Uwaga kà Rahilu la uwana atùw azlabəza aŋha,
Asal matasla ala gay à ahəŋ aw, kà uwana tamatsay.' ✧

Mawul à waŋ la kutso Misəra

¹⁹ Mok uwana Herod adamətsay, malika aŋa Sufəl Zəzagəla apəhla vok à Yusufu la masesiŋay la Misəra. ²⁰ Agəd: "Lagwa kà, sà à afik, zəb bəzi la iyà aŋha, wùlàw à kutso Isərayel, kà uwana azladza uwana tayàh makəd bəzi kà tadamətsay."

²¹ Kiya uwaga Yusufu atsizilla ala, azəb bəzi la iyà aŋha, ŋgaha tawùl à Isərayel.

²² Ama atsənàŋ kà Arkelawus la uwana, azùw sufəl aŋa baba aŋha la Yahudiya kà, guba akəs kà mawul à kutso uwatà à abà. Ama uwana adatsən Zəzagəla apəhal la masesiŋay la abà aya kà, ahəd, abək vok à makoray aŋa Galili à abà, ²³ ŋgaha aŋal gày aŋha à bəzi gudəŋ uwana à abà, sləm aŋha Nazaret. Adəhəŋ kiya uwanay kà, kà magəd à afik gay uwana azlaməna mapəh à atà gay à ahəl tapàh, tagəd kà: 'Tadàzalalla zil Nazaret.'

3

Gay aŋa Yuhana masla madəh batem

(Mark 1.1-8; Luka 3.1-18; Yuhana 1.19-28)

¹ La zamana uwatà kà, Yuhana masla madəh batem apəhla vok ala la fəta aŋa Yahudiya la abà, ŋgaha adzəkà mazàh sayda. ² "Pəhàw gay la ləv ala, kà uwana makoray Sufəl Zəzagəla kà nekwa atsa à waŋ", agəd à atà. ³ Yuhana kà dza uwana masla mapəhal gay à ahəl Yesayya apəh lakəl aŋha agəd:

'Uwaga kuda aŋa dza la uwana awiyay la fəta la abà:

'Slədàw tetəvi aŋa Sufəl Zəzagəla,

Tsìzllàw azlatetəvi manalabahayga ala gesina'', ✧

agəd. ⁴ Lukut aŋa Yuhana kà madəhəŋga la aŋidz aŋa zlugumi, ŋgaha awəd parapara aŋa zlap à tsəh, tatak may aŋha kà hayyaw, la zuway mazuway la fəta.

⁵ Azlaməna madz à ahəŋ la Urusalima, la azlauwana la kutso Yahudiya ŋgaha la azlauwana la makəla aŋa mukwà Urdun gesina tasà à waŋ à slaka aŋha. ⁶ Tapàh tsakana aŋatà à uda la dazuwaya, ŋgaha adəhà à atà batem la mukwà Urdun la abà.

⁷ Ama mok uwana Yuhana anəŋà azla Farisəya la azla Sadukiya aŋuvaw tatsà à waŋ à slaka aŋha kà madəhatəŋ batem kà, agəd à atà: "Maham à ahəŋ aŋa matsapa: uwa apəh à akul kà kadətəfaw à seriya aŋa Zəzagəla uwana la gay ala, adàsa à waŋ aw uwa? ⁸ Lagwa kapəhawla sləray aŋkul uwana ala, apəhla ala kà kadasakaw à sləray aŋkul uwana uwarà kadəhəhəwəŋ. ⁹ ŋgaha kà kadzugwaw kà mats zlapay la gəl aŋkul: 'Abəraham kà baba gami madzidziga', kagodaw aw. Hadəy, gəpəh à akul kà, Zəzagəla aslala vok apak azlaakur ala kà mayyi à tsəh ala aŋa Abəraham.

¹⁰ Lagwa kà, goslka kà madəhəŋ à ahəŋ gə nekwa kà mahərats la tsəh à ahəf à afik. Kəla ahəf uwana av mayyay delga aw, agay manats à ahəŋ gə ŋgaha maduw à akəl à tsəh. ¹¹ Gi kà, gəfəhakulla batem kà la iyaw, kà mapəhla ala kà kadəpəhaw gay la ləv ala pəra. Ama dza uwana adàs à waŋ la lig gulo la ahəŋ kà adəfəhakulla batem kà la Masəsədok Zəzagəla, ŋgaha la akəl. Masla kà, aduwa gi la maslay ndzer, gi kà, gəsəla kà mapaləŋ ala amiyaka bə zuwid kwimik aŋha babay aw. ¹² Kətsaw maduw hi aŋha la ahəl kà maduwla hi kà mavəh hi ala la tafàr. Hi kà atsək à vədə aŋha à abà, ama tafàr kà aduwal à akəl uwana à tsəh adəmətsila la abà aw."

*Madàh batem aña Yesu
(Mark 1.9-11; Luka 3.21-22)*

¹³ Kiya uwaga Yesu atsizilla ala la gudəŋ Galili asà à Urdun à slaka Yuhana kà madàhalla batem. ¹⁴ Ama gəl akàd à Yuhana à vok, agòdàl: “Gi la uwana gənuəkuɗa aña batem la slaka aŋak aya kà pəra, katsà à slaka gulo kà madàh à ka batem aya ay?” ¹⁵ Ama Yesu awulàlla: “Kès, apakà vok kiya uwanay dadàŋ, kà uwana kiya uwanay la uwana məhənaw uwana ala Zəzagəla apèh à anu ala la uwana anàv anu gesina.” ¹⁶ La lig la ahəŋ adàhàlla batem. Uwana Yesu adasa à uda la iyaw la abà kà, zagəla apèzlla à ama ala, anəŋà Masasəɗok aña Zəzagəla atsà à ahəŋ, adzà à gəl aŋha bokuba habakoku. ¹⁷ Nŋaha kiya uwaga aya, kuda atsən à ahəŋ la zagəla la afik: “Dza uwanay kà bəzi gay ləv gulo, gəf marabay gulo la madzugway gulo kà à masla à afik”, agòd. ✧

4

*Seteni apapat Yesu
(Mark 1.12-13; Luka 4.1-13)*

¹ Kiya uwaga Masasəɗok Zəzagəla adàla Yesu à fəta à abà kà seteni aña mapapatay. ² Mok uwana Yesu adadàh mavakay dzik ufaɗ, la mahəŋay dzik ufaɗ kà, may akès masla. ³ Kiya uwaga seteni azà vok à slaka aŋha la magòdàl: “Baŋa kak Kona aña Zəzagəla ndzer kà, ‘Pàk kaf!’, gòd à akur uwanay.” ⁴ Yesu awùlla à uda: “Uwaga kà matsetserayga:

‘Dza adzadzàr vok kà la kaf pəra aw, ama la kəla gay gesina uwana atsa à waŋ la paŋaw aña Zəzagəla la awtày.’” ✧

⁵ Kiya uwaga seteni adàla masla à Urusalima, à gudəŋ tsidəŋaga à abà, adàla à gəl aña məŋ gəy Zəzagəla à afik, ⁶ agòdàl: “Baŋa kak Kona aña Zəzagəla ndzer kà: Vəl à ahəŋ la abanay, kà uwana uwaga kà matsetserayga:

‘Dàw!’, Zəzagəla adàgòd à azlamalika aŋha lakəl aŋak kà mazlak ka

Nŋaha tadəkəs ka la matsaw ka kà, kà akur aña mazləl ka asik aw.’” ✧

⁷ Yesu awulàlla: “Tatsetsèr à wakità à abà la slaka anik babay kà:

‘Kapapata Sufəl Zəzagəla aŋak aw.’” ✧

⁸ La lig la ahəŋ seteni adàla à gəl gudəŋ matsəkakafayga à afik aya, apèhalla makoray aña gudəŋ à vok gesina la mazləbay aŋha. ⁹ “Gədàvà à ka uwaga gesina, à baŋa kakəɗeɗ à gi à ahəŋ kasləkaw gi”, agòdàl.

¹⁰ Yesu agòdàl: “Zà vok, kak seteni! Haɗay, tatsetsèr à wakità Zəzagəla à abà kà: ‘Zlèbà Sufəl Zəzagəla aŋak, nŋaha dàhalla sləray kà masla kokudà gəl aŋha pəra.’” ✧

¹¹ La abatà seteni asàkal à ahəŋ. Azlamalika tasà à waŋ à slaka Yesu kà mazlakəŋ.

*Yesu adzəka sləray aŋha la kutso Galili
(Mark 1.14-15; Luka 4.14-15)*

¹² Mok uwana Yesu atsənəŋ tadùw Yuhana à daŋay kà, atsizilla ala, adà aŋha à Galili. ¹³ Asàk à madz à ahəŋ la Nazaret, ahəd kà madz à ahəŋ la Kapernahum, gudəŋ uwana la gay dərəv aña Galili, la makoray aña Zabulon la Neftali la abà. ¹⁴ Apakà vok kiya uwaga kà, kà gay aña masla mapəhal gay à ahəl Yesayya aña magòd à afik:

¹⁵ ‘Kutso aña Zabulon la aña Neftali,

Uwana la gay mukwà, la kutso uwana la dərəv à uda anik aña mukwà Urdun,

Nŋaha la Galili uwana azladza uwana azla Yahudiya aw, tadz à ahəŋ la abà.

¹⁶ Tsəhay uwana adz à ahəŋ la mələs la abà,

Adənəŋ magol uɗaka.

✧ 3:17 3.17 2Musa 22.2; Mahabay 2.7; Yesayya 42.1 ✧ 4:4 4.4 5Musa 8.3 ✧ 4:6 4.6 Mahabay 91.11-12 ✧ 4:7 4.7 5Musa 6.16 ✧ 4:10 4.10 5Musa 6.13

Azlauwana tadz à ahəŋ la dzəgay aŋa mamətsay la abà bay,
Udfaka adàpəhatàla vok.*

¹⁷ Dagay la kaslà uwatà, Yesu adzəkà mapəh gay Zəzagəla, agòd à atà: “Pèhàw gay la ləv ala kà uwana makoray aŋha kà nekwa.”

Yesu azal azlaməna matapla matera la slaka aŋha
(Mark 1.16-20; Luka 5.1-11)

¹⁸ Mok uwana Yesu auguzahay la gay mukwà aŋa Galili kà, anəŋà Səmon uwana tazallala Piyer atà la deda aŋha Andəre, uwana tadaw dzarawa aŋatà à iyaw à abà; kà uwana atà azlaməna makas kilfi. ¹⁹ Yesu agòd à atà: “Nəfàw gi, ŋgaha gədàpakakulla kà azlaməna makas azladza.” ²⁰ Katskats tasàk à dzarawa aŋatà à ahəŋ ŋgaha tanəfà masla.

²¹ Adà à huma à gay kərkər zwek, tanəŋà Yakuba atà la Yuhana deda aŋha, azlakona aŋa Zebede. Tagà la kəslah iyaw aŋatà la afik la baba aŋatà Zebede, tadəh dzarawa aŋatà, Yesu azàl atà. ²² La katskats tasàk à kəslah iyaw aŋatà à ahəŋ la baba aŋatà gà, tanəfà Yesu.

²³ Yesu auguzàh la kutso Galili gesina, atapàhla azladza la azlagày madəv kuɖa la aku, azahà à ata gay marabəŋ lakəl aŋa makoray Zəzagəla, ŋgaha awarà azladza ala la azlatsəhay dʊvats anik anik, la azladeri gesina. ²⁴ Azladza tatsənəŋ tapəhay lakəl aŋha la makoray aŋa Səriya gesina, ŋgaha tasàhla azlaməna dʊvats anik anik à waŋ gesina uwana tas ŋgərpa, la azlamasasəɖok mawisiga, la azladeri ŋgaha awarà atà ala. ²⁵ Maham à ahəŋ dza aŋuvaw anəfà masla, tasà à waŋ la kutso Galili, la makoray aŋa gudəŋ kulo, la Urusalima, la Yahudiya ŋgaha la gay makwi aŋa dərəv à uda aŋa mukwà Urdun.

5

Mapəh gay Zəzagəla la gudəŋ la afik

¹ Mok uwana Yesu anəŋà maham à ahəŋ dza uwaga, ahàd à gudəŋ à afik adzà madzay la abatà, azlaməna matapla aŋha tasà à waŋ à slaka aŋha. ² ŋgaha Yesu adzəkà matapatàla la kiya uwanay:

Barka
(Luka 6.20-23)

³ “Marabay agay la azladza uwana tasəl la gəl aŋatà kà azlaməna kuɖa, kà uwana makoray Zəzagəla kà aŋatà!

⁴ Marabay agay la azlauwana atà la mazaw la gəl la abà, kà uwana Zəzagəla adàtasl à atà gay à ahəŋ!*

⁵ Marabay agay la azlauwana azlatələmma, kà uwana tadàbəz kutso uwana Zəzagəla apəhà ahəŋ!*

⁶ Marabay agay la azlauwana tawoya madz à ahəŋ bokuba uwana asa à Zəzagəla, kà uwana Zəzagəla adàhatəŋ lela!*

⁷ Marabay agay la azlauwana vok aham à atà kà azladza anik, kà uwana vok adàham à Zəzagəla kà atà suwaŋ!

⁸ Marabay agay la azlauwana azlasətaka la ləv aŋatà la tsəh, kà uwana tadənəŋ Zəzagəla!*

⁹ Marabay agay la azlauwana tatsala lapiya à tataka aŋatà à abà, kà uwana Zəzagəla adàzal atà ala azlabəza aŋha!

¹⁰ Marabay agay la azlauwana tatərəb atà, kà uwana tafəhəŋ kà uwana asà à Zəzagəla, makoray Zəzagəla kà adàgay kà aŋatà ndzer!

* 4:16 4.16 Yesayya 8.23; 9.1-2 * 5:4 5.4 Yesayya 61.2 * 5:5 5.5 Mahabay 37.11 * 5:6 5.6 Yesayya 55.1-2

* 5:8 5.8 Mahabay 24.3-4

- 11 Marabay agay la akul, à baŋa azladza tatsək à akul magodahay à gəl, takal akul gay à vok, tapəh à akul azlamawisiga à vok gesina babay, kà uwana akul azlaməna matapla la slaka gulo.
- 12 Vələhàw à zagəla, rəbàw kà uwana masik mənğa akud akul la zagəla. La kità bay tatərəbàhàŋ azlaməna mapəh à atà gay à ahəl kà mapàh à azladza, uwana tadzà à ahəŋ uwarà.”

Gay lakəl aŋa slugul la uƒaka
(Mark 9.50; Luka 14.34-35)

13 “Akul la uwana akul azlaslugul aŋa gudəŋ à vok. Ama baŋa slugul azladƒay aya aw ma, la mana tazladəŋ ala aya ma? Akəsà vok aya aw, say mafətəkw ala pəra, ŋgaha azladza tamələŋ à tsəh.”

14 “Akul la uwana akul azlaudƒaka aŋa gudəŋ à vok. Hud gudəŋ uwana maŋal à gəl gudəŋ à afik gə, kà ahəd vok à ahəŋ aw. 15 Tavàts fənəs aŋa maf à tsəh tasà aw, ama tafay kà à slaka masərət fənəs à ahəŋ, kà mav uƒaka à azladza gesina, uwana la kay uwaga. 16 Kiya uwaga la uwana uƒaka aŋkul audƒay la huma aŋa azladza gudəŋ à vok kəla suwaŋ, kà azladza gudəŋ à vok aŋa manəŋ sləray aŋkul kà delga, ŋgaha atà tadəzləb Baba aŋkul uwana la zagəla la afik.”

Mahən mapəhay ala

17 “Kadzugwaw kà gəsà à waŋ kà masläh mapəhay aŋa Musa ala, ŋgaha la mapàhla ala aŋa azlaməna mapəh à atà gay à ahəl kagodaw aw, ama gəsà à waŋ kà, kà masəla godega aŋha à uda pəra ndzer. 18 Hadƒay, gəpəh à akul la dziriga: Tsəràh à uwana zagəla la kutso adədəv à gay, amiyaka bə bəzi manəhay aŋa mapəhay uwanay adəkəf vok aw, ŋgaha tsəràh à makəf gəl à ahəŋ aŋa tatak gesina. 19 Kà uwaga kəla dza uwana apəsew bəzi manəhay aŋa mapəhay uwaga, ŋgaha atapla azladza anik kà madəhəŋ kiya aŋha kà, masla kà adəgay bəzi gə la makoray Zəzagəla. Ama dza uwana akəs mapəhay uwaga, ŋgaha atapla azladza kà madəhəŋ kiya aŋha kà, masla kà adəgay mənğa la makoray Zəzagəla. 20 Ndzer, gəgod à akul: Baŋa dziriga aŋkul aduw aŋa azlaməna mapàhla wakitə seriya ala, ŋgaha la azla Farisəya aw kà, kadaw à makoray Zəzagəla aw.”

Matapla lakəl aŋa mapak ləv

21 “Katsənàw uwana tapàh à azlababa aŋkul madzidziga: ‘Kakəf dza aw, dza uwana akəf dza kà tadala à huma seriya.’[☆] 22 Ama gi gəgod à akul kà: Kəla uwabeyuwi uwana apək ləv lakəl aŋa deda aŋha kà, ad à huma seriya. Dza uwana: ‘Kak bada’, agod à deda aŋha kà, tadala à huma seriya aŋa azlamasiga. Dza uwana: ‘Kak kusoŋu’, agod à deda aŋha kà, azlayla vok ad à akəl à abà. 23 Lagwa kà, baŋa kadzəka makəf tatak à Zəzagəla, ŋgaha awul à ka à gəl kà gay la ahəŋ la tataka aŋkul la abà la deda aŋak kà, 24 sàk à tatak aŋak à ahəŋ la abatà, həd, katsənà vok gay la deda aŋak dadəŋ, ŋgaha baŋa gay adadəv à gay kà, wul à waŋ, kakəf tatak aŋak à Zəzagəla adagay zla!”

25 “Baŋa dza apuwà à ka gudzi à gəl, pəra kahamàw à tetəvi à ama kà mad à seriya kà, mərə vok kà akul aŋa matsən vok gay la mok uwana akul la tetəvi la ama dadəŋ, kà masla aŋa maf ka à ahəl aŋa masla seriya aw, ŋgaha babay kà masla seriya aŋa maf ka à azlaslodzi à ahəl, ŋgaha atà aŋa maduw ka à danay aw. 26 La dziriga gəgod à ka, tetuwa kadàsa à uda la abatà aw say baŋa kadətsetsekwah azlakalamay aŋak à waŋ gesina dadəŋ.”

Matapla lakəl aŋa à gəl gaw

27 “Katsənàwwàŋ bokuba uwana apəhà vok kà: ‘Kada à gəl gaw aw.’[☆] 28 Ama gi

☆ 5:21 5.21 2Musa 20.13; 5Musa 5.17 ☆ 5:27 5.27 2Musa 20.14; 5Musa 5.18

kà, gəgodf à akul kà: Kəla dza uwana anəŋ à mis aŋa dza anik à adi la makəfal à adi vok la ləv aŋha la tsəh kà, adadà à gəl gaw. ²⁹ Baŋa kà yewdi ahəl kaf aŋak la uwana katəf à tsakana à abà kà, bədf à adi ala, məl ala kərkər, kà uwana ŋuləm kà manəbay vok aŋak tekula azà ala, kà kak aŋa mad à gày akəl à abà la vok aŋak gesina. ³⁰ Iyay, baŋa ahəl kaf aŋak la uwana apapat ka à tsakana à abà kà, nàts à vok ala, ŋuləm kà aŋak kà manəbay vok aŋak tekula azà ala, à kà vok aŋak gesina aŋa mad à gày akəl à abà.”

Matapla lakəl aŋa makudək mis
(Mark 10.11-12; Luka 16.18)

³¹ “Apəhà vok aya babay kà: ‘Dza uwana akudək mis aŋha kà, say avəl wakità aŋa mavəh vok ala à ahəl dadəŋ.’[✧] ³² Ama gi kà, gəgodf à akul kà: Kəla uwabeyuwi uwana akudək mis aŋha, uwala abəzal à gəl la mazaḅ zil la tsəh aw kà, masla à zil uwaga kà adada à gəl gaw, à baŋa azəḅ mis anik, ŋgaha dza uwana azəḅ mis makudəkay gə babay kà, adàda à gel gaw, suwaŋ.”

Matapla lakəl aŋa mawadəy

³³ “Bà gotənaŋ katsənəwwəŋ tapəh à azlababa gami madzidziga babay kà: ‘Kazuw mawadəy la fida aw, ama hənà mawadəy aŋak ala kà la Sufəl Zəzagəla la afik pəra.’ ³⁴ Ama gi kà, gəgodf à akul kà: Kazuwaw mawadəy aw! Kazuwaw mawadəy baməraka la zagəla aw, kà uwana uwaga kà kursi aŋa Sufəl Zəzagəla. ³⁵ Baməraka la kutso aw, kà uwana uwaga kà slaka maf asik à ahəŋ aŋha, adagay la Urusalima bay aw, kà uwana uwaga kà məŋ gudəŋ aŋa Sufəl.[✧] ³⁶ Kazuw mawadəy la gəl aŋak aw, kà uwana kaslala vok, kà mapak aŋidz gəl aŋak tekula ala kà medfekuga, baŋaw kà marsiga aw. ³⁷ Ama gədfəw pəra kà: ‘Iyay’, baŋaw ‘Awaŋ’, kà uwana kəla tatak uwana dza aziŋ à uwaga à gəl kà, aguwa à uda kà la slaka masla mawisiga.”

Matapla lakəl aŋa mawal ala kà vok mawisiga
(Luka 6.29-30)

³⁸ “Katsənəwwəŋ bokuba uwana apəhà vok kà: ‘Yewdi mapəlay la yewdi, slidf bay mapəlay la slidf.’[✧] ³⁹ Ama gi kà, gəgodf à akul kà: Kawulawla mawisiga à dza uwana asal madfahakulla mawisiga à vok aw. Baŋa dza abək à ka ahəl à paŋaw ahəl kaf kà, gəlla paŋaw ahəl gudzay à awtəy aya. ⁴⁰ Baŋa dza akəl à ka gay à vok, kà mazəḅ tsempe aŋak kà, sàkal azəḅ dawara gə aya babay. ⁴¹ Baŋa dza afa à ka gasa à gəl kà mazəḅal tatak mahanayga, kà mazəḅalaŋ dahoy pəlis tekula kà, dälla mahoy pəlis səla. ⁴² Və à dza uwana anav à ka tatak; kagola lig à dza uwana à gay asal makəl goder la slaka aŋak aw!”

Mawoy azlaməna məzam
(Luka 6.27-28,32-36)

⁴³ “Katsənəwwəŋ bokuba uwana apəhà vok kà: ‘Wòyà masla magay aŋak ŋgaha pəsəw masla məzam aŋak.’[✧] ⁴⁴ Ama gi kà, gəgodf à akul kà: Wòyəwwəŋ azlaməna məzam aŋkul, dèwəw kudfa kà aŋa azladza uwana tatəḅ akul. ⁴⁵ Kà akul aŋa magay azlabəza aŋa Baba aŋkul uwana la zagəla la afik. Kà uwana avədf afats à azlaməna tsakana, kiya aŋa azladza dziriga babay. ŋgaha asuw iyaw à azladza dziriga, asuw à azlaməna tsakana babay. ⁴⁶ Iyay, baŋa kawoyawwaŋ kà azlauwana tawoyà akul pəra ma, kà mana kakudaw maḅəz tatak la slaka Zəzagəla aya ma? Amiyaka azlaməna mazəḅ hadama babay kà, kiya uwaga tafəhəŋ aw takay? ⁴⁷ ŋgaha baŋa kadfahawwaŋ ‘Ayyi’ kà azladedə aŋkul pəra ma ‘Delga mədafəhəŋ’, kagodaw takay?

✧ 5:31 5.31 5Musa 24.1-4 ✧ 5:35 5.35 3Musa 19.2; Mahabay 48.2; Yesayya 61.1 ✧ 5:38 5.38 2Musa 21.24; 3Musa 24.20 ✧ 5:43 5.43 3Musa 19.18

Bà azladza uwana tasəl Zəzagəla aw babay kà, kiya uwaga la uwana tafəhəj. ⁴⁸ Kità kà, gàw sətaka, bokuba Baba ankul uwana la zagəla la afik sətaka, suwan.”[☆]

6

Matapla lakəl aña mazlak à azlaməna kuɖa

¹ “Baña kaɖahaw dziriga kà, kaɖahawwan kà huma yewdi aña azladza aw. Baña kiya uwaga kaɖahawwan kà, kaɖəbəzaw masik la slaka Baba ankul uwana la zagəla aw.”

² “Baña asa à ka mav sili à masla kuɖa anik kà, kahama kà dza à ahəj dən kà mavəl aw, bokuba uwana azlaməna magolla dza tafəhəj la azlagəy madəv kuɖa la aku, ŋgaha la azlamakalapa tetəvi la ama aw. Tafəhəj kiya uwaga kà, kà azladza aña mazləb atà. La dziriga gəpəh à akul, atà kà tabəz masik anətà tsewwa adagay.

³ Ama kak kà, baña kav sili à masla kuɖa kà, ɖahà uwaga la kiya uwanay: Amiyaka bà slawda anək nekwa gə babay kà, asəl uwaga aw, ⁴ kà mavəy anək aña magay masəlay gə aw. Say Baba anək, uwana la zagəla la afik, la uwana asəl tatak uwaga pəra, ŋgaha masla adəwulla à ka ala mənğa aya.”

Matapla lakəl aña madəv kuɖa

(Luka 11.2-4)

⁵ “Baña kaɖəvaw kuɖa kà, kaɖahawwan bokuba aña azlaməna magolla dza aw: Kà uwana atà kà, asa à atà madəv kuɖa kà la slaka matsizlla ala la azlagəy madəv kuɖa la aku, ŋgaha la azlamakalapa tetəvi la ama kà azladza gesina aña manəj atà. La dziriga gəpəh à akul: Atà kà, tabəz masik anətà, tsewwa adagay. ⁶ Ama kak kà, baña asa à ka madəv kuɖa kà, həd à gəy, tsək à vok à ama, ŋgaha dən kuɖa à Baba anək, uwana la zagəla la afik, ŋgaha Baba anək uwana asəl uwana kaɖəhəj la ləv anək la tsəh, adav à ka masik anək.”

⁷ “Baña kaɖəvaw kuɖa kà, katsalahaw azlagay deydayga à gay pəra, bokuba aña azladza uwana tasəl Zəzagəla aw, aw, tadzugw kà la mavats gay wadza wadzaga uwaga kà, ‘Zəzagəla adətsəb à anu sləm’, tagodf. ⁸ Kaɖahawwan kiya uwaga aw, kà uwana Baba ankul uwana la zagəla la afik asəl tatak uwana kanavaw kuɖa anha dagay uwarà, à mok uwana kadanavawal dadən aw. ⁹ Aganay tetəvi aña madəv kuɖa:

Baba gami uwana la zagəla la afik.

Dahən kà azladza gesina tazləbə sləm anək tsikaslağa.

¹⁰ Makoray anək atsà à wan.

Mawoyən anək apaka vok la vəɖah,

Bokuba uwana la zagəla.

¹¹ Və à anu tatak may, uwana asla à anu lakana.

¹² Bəs à anu mawisiga uwana məɖəhəj gesina,

Bokuba uwana məbasan à azladza uwana tafəhà à anu mawisiga à vok babay suwan.

¹³ Təfà à anu kà seteni aña mapapat anu, kà anu aña masak à maɖiŋal gel à vok aw, Ama təfà à anu la ahəl aña seteni.” ((Kà uwana makoray, maslay ŋgaha la mazləbay kà la ahəl anək aña tsərəh à awtəy. Amen!))

¹⁴ “Baña kabasawwan à azladza anik uwana tafəhəkulla mawisiga à vok, Baba ankul uwana la zagəla la afik adəbasakulan suwan. ¹⁵ Ama baña kabasawwan à azladza anik uwana tafəhəkulla mawisiga à vok aw kà, Baba ankul uwana la zagəla adəbasakulla mawisiga ankul uwana kaɖahəwwən suwan aw.”

Matapla lakəl aña makəs nəlay

[☆] 5:48 5.48 3Musa 19.2; 5Musa 18.13

16 “Baŋa kakəsaw nəlay kà, pèhàwla huɸ adi aŋkul ala, ùzləɸaw kà kiya aŋa azlaməna magolla dza uwanay tafəhəŋ aw: Atà kà, tabəɸla huɸ adi, kà azladza gesina aŋa masəlay kà atà la nəlay la abà. 17 Ama kak kà, baŋa kakəs nəlay kà, pəl adi aŋak lela, wàz gel aŋak à uda, 18 kà azladza aŋa masəlay kà kak la nəlay la abà aw. Say pəra kà Baba aŋak uwana la slaka mahad vok à ahəŋ gà la zagəla, la uwana asəlay pəra, ŋgaha Baba aŋak uwana anəŋa uwana kadəhəŋ adàvə à ka masik aŋak.”

Ləmana dziriga la zagəla

(Luka 12.33-34)

19 “Kahamaw ləmana à gudəŋ uwanay la vok aw, kà uwana mamən akəsay, marzaw akəsay, azlaməna à gəl bay tazləlay, tazəbay. 20 Ama hāmàw ləmana aŋkul kà à zagəla à afik, la abatà mamən la marzaw akəsay aw, azlaməna à gel bay taslala vok aŋa mazləlay kà mazəbay aw. 21 Kà uwana la slaka uwana ləmana aŋak la abatà, la abatà ləv aŋak la abatà, suwaŋ.”

Uɸaka aŋa vok

(Luka 11.34-36)

22 “Yewdi kà uɸaka aŋa vok: Baŋa yewdi aŋak kà wurwur kà, vok aŋak gesina kà uɸaka; 23 ama baŋa yewdi aŋak la ɸuvats kà, vok aŋak gesina la mələs la abà. Baŋa uɸaka uwana la kak la abà mələs gà, mələs uwaga adàgay tabadamma kaykay.”

Zəzagəla ŋgaha sili

(Luka 16.13)

24 “Dza aslala kà atsəp à azlaməŋga à huma à gay səla aw: Adəpəseway anik, ŋgaha adakəs gay aŋa anik, adah dziriga à anik, ŋgaha adəkweska anik. Kaslawwalla vok kà matsəp Zəzagəla à huma la sili aw.”

Maf madzugway à Zəzagəla à afik

(Luka 12.22-31)

25 “Kà uwaga à uwana gəpəh à akul: Kafàw gəl à ahəŋ kà tatak may la tatak masay uwana kanawkuɸa aŋha, kà madzadzarlà kà vok aw, bamərika lakəl aŋa lukut uwana asa à akul kà aŋa matsokw à vok aŋkul, sifa kà aduwa tatak may, ŋgaha ma vok babay kà aduwa lukut aw takay? 26 Nə̀r̀ə̀z̀à̀w azladfiyan uwana tahoyay la zagəla tsi: Tasləkay ŋgaha tatsəɸay tatak babay aw, taham tatak à vəɸa à abà babay aw, ama Baba aŋkul uwana la zagəla la afik adzadzarlà atà. Iyay zla, akul ma kaduwwaŋ azladfiyan aw takay? 27 Uwa la tataka aŋkul la abà aslala vok aŋa maziŋ à mavay aŋa sifa aŋha à adi amiya ŋuv la aslasl à gəl aŋha uwa?”

28 “Ŋgaha ma, kà mana kafaw gel à ahəŋ kà lukut zlà ma? Akul nə̀r̀ə̀z̀à̀w madz à ahəŋ aŋa azlamawuratatay tsi: Tadàh sləray aw, ŋgaha tavavəɸ lukut babay aw.

29 Tsa bamərika Salomon la mazləbay aŋha gesina kà, abəzà à lukut delga kiya mawuratatay uwaga aw. 30 Zəzagəla adàw lukut à azlakəsaf uwana à vok la fəta bay lakana, tekeɸika lebəŋ kà tadàyakats à akəl à abà: ŋgaha ma azlayla kà vok aduwa à akul à vok ɸaduwa aŋatà babay aw takay? Akul kà madiŋal gel à vok à tsəh kà akul ala. 31 Kiya uwaga kà, kafàwla kà gəl à ahəŋ la magoɸay: ‘Mana mədəzuway lebəŋ mi? Mana mədəsay mi? La mana mədəduw à vok mi?’, kagoɸaw aw! 32 Uwaga kà, azlauwana tasəl Zəzagəla aw, la uwana tayàh tatak uwaga koksikoksi. Ama Baba aŋkul uwana la zagəla kà, asəl tatak uwana kanawkuɸa aŋha. 33 Fàw gəl à ahəŋ dadəŋ teraŋa kà la makoray Zəzagəla, ŋgaha la madz à ahəŋ la sifa dziriga uwana la abanay anavay, ŋgaha Zəzagəla adəkəs akul à ahəl ala gesina uwana kayahaw.

34 Kiya uwaga kà kafàwla kà gəl à ahəŋ kà aŋa lebəŋ aw: Kà uwana lebəŋ uwaga

kà, masla la uwana adàf gəl à ahəŋ kà akul, kà uwana ŋgərpa uwana apəhla vok ala kəla mavakay kà aŋa mavakay uwaga pəra.”

7

Maɗàh seriya à azladza anik à gəl aw

(Luka 6.37-38,41-42)

¹ “Kadafahaw seriya à azladza anik à gəl aw, ŋgaha Zəzagəla aŋa maɗahakulla seriya à gəl suwaŋ aw. ² Kà uwana Zəzagəla adàfahakulla seriya à gəl, kalkal bokuba uwana kadafahàwwàŋ à azladza anik, adàzəbay daram uwana kazəbaw kagurawla azladza anik bay! ³ Kà mana kanərazay kəsaf uwana la yewdi aŋa deda aŋak la awtày, ama kak kanəŋa magol tsakuɗ tsakuɗ uwana la aŋak la awtày aw ma? ⁴ Kakay kagodiya à deda aŋak: Sàk à gi, gəzəb à ka kəsaf uwaga la adi ala, tsa kak la magol tsakuɗ tsakuɗ la yewdi ma? ⁵ Kak masla magolla dza, zəb tsakuɗ tsakuɗ uwaga la adi ala dadàŋ, ŋgaha kadàŋəŋla lela kà aŋa mazəb aŋa deda aŋak!”

⁶ “Kavàw tatak tsidəŋaga à azlakəda aw, kà aŋa magolla à akul ala afad à gəl kà makohàh akul ala aw, kafàw slərkodzka aŋkul à azlanamzi aw à huma à gay aŋa mahabəŋ ala aw.”

Nàvàw ŋgaha tadàv akul

(Luka 11.9-13)

⁷ “Nàvàw ŋgaha kadàbəzawwal; yàhàw ŋgaha kadàbəzawwal, zàlàhàwwàŋ ŋgaha tadəpəzl akul gamagày. ⁸ Kəla dza uwana anavay abəzal, dza uwana ayahay abəzal, ŋgaha dza apəzl gamagày à dza uwana azalahay. ⁹ Dza la ahəŋ la tataka aŋkul av akur à bəzi aŋha à baŋa anaval kà kaf takay? ¹⁰ Awma avàl ma bebi à baŋa anaval kà kilfi ay? ¹¹ Iyay, akul azlamawisiga nəma, ama kasəlaw mavày tatak delga à azlabəza aŋkul, ŋgaha ma asa à məraka Baba aŋkul uwana la zagəla ay? Aduwa à akul la mav tatak delga à azladza uwana tanaval tatak!”

¹² “Uwana asa à akul azladza anik tadafahakulaŋ kà, akul babay kà fahàwwàŋ kiya uwaga à azladza bay suwaŋ, kiya uwaga à uwana mapəhay aŋa Musa apəhay la azlawakitə aŋa azlaməna mapəh à atà gay à ahəl là abà kà mapahay à azladza.”

Gamagày slərkuts kutsga

(Luka 13.24)

¹³ “Gàw à gay la gamagày slərkutskutsga! Kà uwana baŋŋaga uwanay kà, gamagày butu gà, ama adala dza kà à mazila, azladza aŋuvaw la tetəvi uwatà la tsəh. ¹⁴ Ama slərkutskutsga uwanay kà gamagày zlazladfaga, ama masla la uwana adala dza à sifa à abà, ama azladza kà dəŋ la tetəvi uwatà la ama aw!”

Masəl ahàf kà la mayyay aŋha la vok

(Luka 6.43-44)

¹⁵ “Dahàw haŋkəli kà azlaməna mapəh à atà gay à ahəl fida gà. Kà uwana tatsa à waŋ à slaka aŋkul la mapəhla vok aŋatà ala bokuba azlatuwaŋ, ama la huɗ gà kà azlakəda fəta. ¹⁶ Kadəsəlaw atà kà la maɗəhəŋ aŋatà la vok. Tadəzl mayyay matavəruk la atək la vok aw, ŋgaha babay tadəzl gudəv la mazləb la vok aw. ¹⁷ Ahàf delga avày mayyay delga, ahàf mawisiga avày mayyay mawisiga babay. ¹⁸ Ahàf delga aslala vok aŋa mayyi mawisiga aw, ŋgaha ahàf mawisiga aslala vok aŋa mayyi delga aw. ¹⁹ Kəla ahàf uwana ayyi delga aw kà, tahərats à ahəŋ, taduwal à akəl à tsəh. ²⁰ La kitə babay kà, kadəsəlaw azlaməna mapəh à atà gay à ahəl figa gà la maɗəhəŋ aŋatà la abà gesina.”

Gəsəl akul bà kà tetuwa aw

(Luka 13.25-27)

²¹ “Azlauwana, ‘Sufəl, Sufəl!’, tagodf à gi, la uwana tadàda à makoray anja Zəzagəla gesin pəra aw, ama azlauwana tadehəŋ tatak uwana asa à Baba gulo uwana la zagəla. ²² Mok uwana mavakay anja seriya adəzlanəlay, anjvaw tadəgodf à gi ‘Sufəl, Sufəl, la sləm anjak la uwana məzahà gay Zəzagəla à azladza, la sləm anjak la uwana məkudəkàh azlamasəđok mawisiga, la sləm anjak la uwana məđahàhà azlanadzipo anjvaw aw uwa?’ ²³ Kiya uwaga gədəgodf à atà: Tetuwa gəsəl akul aw, zàw vok la slaka gulo, akul uwana kadahàw tsakana!”✧

Azlagày səla
(Luka 6.47-49)

²⁴ “Dza uwana atsəna gay uwana gəpəh, ŋgaha af uwaga à ahəŋ, masla kà kalkal la dza hanəkəli gə, uwana anjal gəy anja à təhus à afik. ²⁵ Iyaw adzəkà masuway, ahənà à mukwà à afik, afadf adəđf la ndzəda, ama gəy akalàh à ahəŋ aw, kà uwana matatukway anja kà aga kà la təhus la afik. ²⁶ Ama kəla dza uwana atsəb sləm à gay uwanay gədapəhay la abanay, ŋgaha atsəna uwaga aw kà, gəgagazləla kà la dza kusoŋu gə, uwana anjal gəy anja kà à wuyyan à afik. ²⁷ Iyaw adzəkà masuway, ahənà à mukwà à afik, afadf adəđf la ndzəda, ŋgaha gəy atəđf à ahəŋ gərim, matəđf à ahəŋ anja kà panàhhà.”

Maslay anja Yesu

²⁸ Mok uwana Yesu adakəđf gəl à matapla gay anja à azladza kà, maham à ahəŋ dza gesina kà ləv aval à atà à gay, kà tsəhay matapla anja uwana atapàtəla. ²⁹ Kà uwana masla kà atapàtəla kà bokuba azlaməna mapàhla wakità seriya anjatà ala aw, ama apəhàtəla kà la maslay anja.

8

Yesu awurà masla akəl zagəla ala
(Mark 1.40-45; Luka 5.12-16)

¹ Mok uwana Yesu adasa à ahəŋ la gudəŋ la afik, maham à ahəŋ dza anjvaw tanəfà masla. ² Kiya uwaga masla akəl zagəla anik, azà vok à slaka anja, akəđəđf à huma anja la magodfay: “Məŋga, banja asa à ka, kaslala vok mawur gi ala.” ³ Yesu abiyà ahəl ala, adəbanì, ŋgaha agòđf: “Asa à gi, wùr ala.” Katskats dza uwaga awur ala la akəl zagəla anja la abà. ⁴ Kiya uwaga Yesu agòđfal: “Tsənəŋ lela, kapəh uwaga à dza anik aw. Ama kəla kà, həđ kadəpəhla vok anjak à masla mav tatak à Zəzagəla, ŋgaha babay kavà tatak uwana Musa apəh kà masəlay anja azladza gesina kà kawur ala!”

Yesu awurà magamza anja məŋga anja azlaslodzi ala
(Luka 7.1-10)

⁵ Mok uwana Yesu adada à Kapernahum à abà, məŋga anja azlaslodzi dzim anja azla Rom la abà, azà vok à slaka anja la magodfay: ⁶ “Məŋga, magamza gulo la slaka mahən à ahəŋ la mtəga, masla maməts à afik gə sanjə, ŋgaha as ŋgərpa məŋga məŋga.” ⁷ Yesu agòđfal: “Gəda à awtəy, gədəwureŋ ala.” ⁸ Ama məŋga anja azlaslodzi uwaga awulàlla, agòđf: “Məŋga, gəsla kà kak anja mad à gəy gulo aw. Ama pəh gay tekula la tsəh ala pəra kà, magamza gulo adəwur ala. ⁹ Gi bay kà, azlaməŋga la ahəŋ lakəl gulo, ŋgaha gi babay, gi lakəl anja azlaslodzi anik suwan. Gəslala vok anja magodfay à tekula anjatà: ‘Həđ kà’, aday. Gəgodf à anik aya: ‘Sà à wan kà’, atsa à wan; ŋgaha gəgodf à magamza: ‘Dahà uwanay kà’, adəhəŋ.” ¹⁰ Mok uwana Yesu atsən gay uwaga, akəsəl à gəl kaykay, ŋgaha agòđf à azlauwana tanəfay la tsəh: “Hadfay la dziriga gəgodf à akul kà: Didi gədanəŋ madinjal gəl à vok uwanay la tataka

azla Isərayel la abà aw. ¹¹ Gəpəh à akul la dziriga kà, azladza aņuvaw tadàsa à waņ la mas à afik afats la matəd à ahəj afats, ŋgaha tadədzah madzay la tatak may lakəl la azla Abəraham, Isak, Yakuba la makoray Zəzagəla. ¹² Ama azlauwana naka tagay azlaaņa makoray uwaga kà tadàuts atà à mələs à abà la uda, la abatà kà mapad slid la matuway adəgay la ahəj aņa koksikoksi.” ¹³ Kiya uwaga Yesu agòd à mənğa aņa azlaslodzi: “Dà aņak à mtəga, uwana kanav la madiņal gəl à vok adəpaka à ka vok!” Ŋgaha magamza aņa mənğa aņa azlaslodzi awùr ala la kaslà uwana: ‘Dà aņak’, Yesu agòfal.

*Yesu awar azlaməna dıvats ala aņuvaw
(Mark 1.29-34; Luka 4.38-41)*

¹⁴ La abatà Yesu ahəd à mtəga Səmon Piyer. Abəz à mənğay aņa Piyer à gəl, la slaka mahən à ahəj, akəl la vok. ¹⁵ Yesu adəbani la ahəl, ŋgaha akəl vok asəl à vok ala; asà à afik, adzəkà mazlak à atà.

¹⁶ Mok uwana mokokhu adasa à waņ tasəhla azlaməna zagəla zagəla aņuvaw à Yesu à waņ. La gay aņa uwana apəh, Yesu akudəkəh azlazagəla zagəla gesina, ŋgaha la mawar azlaməna dıvats anik anik gesina ala. ¹⁷ Adahəj kà aņa magəd gay uwana à afik, masla mapəhal gay à ahəl Yesayya agod:

‘Masla azəb maru vok à ahəj gami la dıvats gami gesina à gəl aņa.’[✧]

*Azlauwana tayəh manəf Yesu
(Luka 9.57-62)*

¹⁸ Uwana Yesu anəhəj kà maham à ahəj dza adahamal à adi, agòd à azlaməna matapla la slaka aņa kà: “Məhəd à gay dərəv à uda anik.” ¹⁹ Masla mapahla mapəhay ala anik, azà vok à slaka aņa, agòdal: “Mənğa, à kəla slaka uwana kadàday kà, gədənəf ka.” ²⁰ Yesu awulàlla: “Azlamayaka kà, afək aņatà la ahəj, azladiyaņ babay gəy aņatà la ahəj, ama Kona aņa dza kà, bə slaka mahən gəl à ahəj aņa la ahəj kà maduw ləv aw.” ²¹ Dza anik la tataka azlaməna matapla aņa la abà, agòdal aya: “Mənğa, və à gi tetəvi kà gi aņa mal baba gulo dadəj.” ²² Ama Yesu agòdal: “Nəfà à gi, ŋgaha sək azlamazimnekid taləh vok aņatà.”

*Yesu atsizl kular à ahəj
(Mark 4.35-41; Luka 8.22-25)*

²³ Yesu ahəd à kəslah iyaw à afik, azlaməna matapla la slaka aņa tanəfəh. ²⁴ Katskats, magol kular mənğa atsizlla ala la gəl dərəv tsərah à uwana magantsay aņa iyaw azà kəslah ala. Ama Yesu kà, adatəd à madzəhal à abà la godega kəslah iyaw. ²⁵ Azlaməna matapla la slaka aņa tazà à vok à slaka aņa, tatsənəj ala la magodfal: “Sufəl, təfà anu, maslà la uwaga məməts à gay!” ²⁶ Yesu awùlla à atà ala: “Kà mana guba azà akul ma? Madiņal gel à vok aņkul kà matsihila gə.” Ŋgaha atsizlla ala, asləl məl à kular à gəl, ŋgaha tsiriya, iyaw atsà à ahəj titi. ²⁷ Ləv avələh atà à gay gesina aņatà, ŋgaha tagod: “Tsəhay dza mana à uwanay à amiyaka kular la iyaw lakəl babay kà atsəna gay aņa la?”

*Yesu awara azladza səla uwana ala atà la masasəfok mawisiga
(Mark 5.1-20; Luka 8.26-39)*

²⁸ Mok uwana Yesu adabəz à gay dərəv à uda anik, la kutso aņa azla Gadareniya la abà kà, azladza səla tasà à waņ kà magagamay la masla, azladza uwatà kà tasà à lag kà la zəvay la aku, atà la azlamasasəfok zagəla zagəla lakəl, azlamaksafər, bə dza bay kà aslala vok aņa maguw à awtəy la tetəvi uwatà aw. ²⁹ Tadzəka mawiyay: “Kona aņa Zəzagəla, ma kawoyaņ la slaka gami ma? Kasà à abanay kà mazəh anu ala, tsa kaslà adəsly dadəj aw takay?” ³⁰ Maham à ahəj namzi la ahəj la abatà

✧ 8:17 8.17 Yesayya 53.4

la gay anik, tayàh huɔf aɲatà à gay. ³¹ Azlamasasəɔok mawisiga tadəv kuɔa à Yesu la kiya uwanay, tagòɔal: “Baɲa asa à ka makuɔɔək anu kà, sləl anu à azlanamzi à awtày à gəl zla!” ³² “Dàw!”, Yesu agòɔf à atà. Kiya uwaga tasà à azladza səla uwaga lakəl ala, ɲgaha tahàd à azlanamzi uwatà à gəl. Katskats maham à ahəɲ namzi ahòy à ahəɲ la madəguruh la afik, tatsàh gəl à iyaw à abà, tasùfàh à abà. ³³ Azlaməna manəɲla azlanamzi tahòy aɲatà à huɔf gudəɲ à abà, ɲgaha tadzəkà mapàh à azladza à gay aɲa tatak uwaga apakà vok gesina, lakəl aɲa azladza səla uwaga la masasəɔok mawisiga. ³⁴ Kiya uwaga azlaməna gudəɲ uwatà gesina tasà à uda kà mad à slaka Yesu. Mok uwana tanəɲaɲ kà, tadəval kuɔa kà maz à vok la kutso aɲatà la abà.

9

Yesu awurà dza makalàh à vəɔfah gà ala (Mark 2.1-12; Luka 5.17-26)

¹ La lig aɲa uwaga la ahəɲ kà, Yesu ahàd à kəslah iyaw à afik, aguwà à uda la dərəv la abà, ɲgaha ahàd à huɔf gudəɲ aɲha à abà. ² La abatà tasàlla à waɲ dza makalàh à vəɔfah gà la kəslah. Mok uwana Yesu anəɲà maɲɲal gəl à vok aɲatà, agòɔf à dza makalàh à vəɔfah gà uwaga: “Wàɔf vok à uda bəzi gulo! Tsakana aɲak adamatsila!” ³ Kiya uwana azlaməna mapàhla wakità seriya ala taɲoɲuz la tataka aɲatà la abà, tagòɔf: “Dza uwanay kà, apèh mawisiga lakəl aɲa Zəzagəla, ndzer.” ⁴ Yesu asəl madzugway aɲatà, ɲgaha agòɔf à atà: “Kà mana akul la madzugway mawisiga kiya uwanay ma? ⁵ Tak ma ɲuləm magoɔɔay: Tsakana aɲak adamatsila, awma: Sà à afik, hàd aɲak takay?! ⁶ Ama asa à gi kasəlaw, kà Kona aɲa dza la maslay la gudəɲ uwanay la vok kà mamats tsakana aɲa azladza ala.” Kiya uwaga agòɔf à dza makalàh à vəɔfah gà uwaga: “Sà à afik, zəb kəslah aɲak, kadà aɲak à mtəga!” ⁷ Zil uwaga asà à afik ahàd aɲha à mtəga. ⁸ Mok uwana maham à ahəɲ dza adanəɲ uwaga kà, ləv avàl atà à gay kayak, ɲgaha tazləbà Zəzagəla kà ndzəɔa uwaga avà à azladza.

Yesu azal Mata (Mark 2.13-17; Luka 5.27-32)

⁹ Yesu atsizlla ala la abatà, mok uwana aday kərkərkə kà anəɲà dza anik uwana sləm aɲha Mata la gày mazəb hadama la aku, agòɔɔal: “Nəfà à gi!”. Mata asà à afik anəfà masla.

¹⁰ Mok uwana Yesu adadza à tatak may à adi la mtəga Mata la azlaməna matapla la slaka aɲha kà, azlaməna mazəb hadama, la azladza uwana tetəvi aɲatà delga aw, la azlaməna tsakana tasà à waɲ, tadzàh à tatak may à gəl atà nna. ¹¹ Uwana azla Farisəya tanəɲ uwaga, tagòɔf à azlaməna matapla la slaka aɲha: “Kà mana məɲga aɲkul azuw tatak may la azlaməna mazəb hadama la azladza uwana tetəvi aɲatà kà delga aw ma?” ¹² Uwana Yesu atsənà uwaga kà, agòɔf à atà: “Azladza uwana ɔuvats az atà aw kà, tayàh dokwtar aw, say azlaməna ɔuvats la uwana tayahay pəra. ¹³ Dàw, katapawla uwana matsetseray gà la wakità la abà: ‘Gəwoyaɲ kà dziriga, awkà makaf à gi tatak aw’[✧] kà uwana gəsà à waɲ kà mayahay kà azladza uwana: ‘Anu azladziriga’ tagoɔf aw, ama azlauwana: ‘Anu azlaməna tsakana’, tagoɔf.”

Manavay lakəl aɲa makəs nəlay (Mark 2.18-22; Luka 5.33-39)

¹⁴ Azlaməna matapla la slaka Yuhana masla maɔfàh batem tazà à vok à slaka Yesu, ɲgaha tagòɔɔal: “Kà mana anu la azla Farisəya kà məkàsàh nəlay, tsa azlaməna matapla la slaka aɲak kà takasàh nəlay aw ma?” ¹⁵ Yesu awùlla atà ala: “Kadzugwaw

✧ 9:13 9.13 Hosəya 6.6

ma azladza uwana tazàla atà à mazəb vok à abà, takəs nəlay, la kaslà uwana masla mazəb mis la tataka aṇatà la abà takay? Awaṇ! Ama kaslà adàsa à waṇ à uwana masla mazəb mis adàgay la tataka aṇatà la abà aya aw kà, la mok uwaga la uwana tadəkəs nəlay suwaṇ.”

¹⁶ “Dza aslala vok aṇa matsap à lukut maviyaga à lukut mawga à vok aw, kà uwana lukut mawga uwaga adəkwoh maviyaga uwaga à tsəh kaykay aya. ¹⁷ Ngaha babay kà, taḍfaw iyaw matavəruk mawga à kiwa iyaw maviyaga à agu aw, kà uwana iyaw matavəruk mawga adəsləh kiwa iyaw maviyaga ala, say taḍfaw iyaw matavəruk mawga kà à kiwa iyaw mawga à agu suwaṇ, ngaha kiwa iyaw aṇa makəs iyaw matavəruk uwaga lela.”

*Dugu aṇa Yayrus atà la mis uwana adəbani lukut aṇa Yesu
(Mark 5.21-43; Luka 8.40-56)*

¹⁸ Mok uwana Yesu apəh à atà gay uwaga, mənḡa anik la tataka azla Yahudiya la abà asà à wan, akədèḍ à Yesu à huma la magoḍal: “Dugu gulo adamətsay bà lagonay, sà à waṇ, bəkal ahəl aṇak à vok, ngaha adàdza à ahəṇ la sifa aya!” ¹⁹ Yesu asà à afik tanəfà atà la azlaməna matapla la slaka aṇha.

²⁰ Mis anik la ahəṇ aṇiz akəlal à tsəh ala, dagay mavay kulo gel aṇha səla, agoḍà à awtəy la lig aṇa Yesu adəbani gay lukut aṇha. ²¹ Kà uwana agòḍ la gəl aṇha kà: ‘Baṇa gədəbani bà gay lukut aṇha pəra kà, gədəwur ala.’ ²² Yesu agolà vok anəṇal à adi, agòḍal: “Wəḍf vok à uda dugu gulo, kà uwana madiṇal gəl à vok aṇak awùr ka ala”, bà la kaslà uwatà, mis uwaga awùr ala.

²³ Uwana Yesu abəz à mtəga ana mənḡa uwatà, anəṇà azlaməna mats segəla, la azlaməna mataway gesina ²⁴ ngaha agòḍ à atà: “Dàw à uda, dugu kà adamətsay aw, adzəhal pəra.” “Uwàà...”, takəḍəslal. ²⁵ Uwana takuḍəkàh maham à ahəṇ dza à uda kà, Yesu ahəd à gəy uwatà à agu, akəs bəzi dugu la ahəl, atsənəṇ ala ngaha asà à afik. ²⁶ Gay uwatà atsən la kutso uwatà la abà gesina.

Yesu awara azlaguləf səla ala

²⁷ Yesu atsizlla ala la abatà adà aṇha, uwana adà aṇha kà, azlaguləf səla tanəfà la tsəh la mawiyay: “Kona aṇa David, Kona aṇa David, vok ahama ka kà anu!” ²⁸ Mok uwana Yesu adabəz à mtəga kà, azlaguləf səla uwaga tazà à vok à slaka aṇha, ngaha agòḍ à atà: “Kadiṇawwal gəl à vok kà gəslala vok gəḍəh uwaga ay?” “Iyay, mənḡa gami, mədiṇal gəl à vok kà kak la ndzəḍa.” ²⁹ Kiya uwaga Yesu adəbani yewdi aṇatà la magoḍ à atà: “Delga, uwaga akəs akul à vok bokuba uwana kadiṇawal gəl à vok.” ³⁰ Ngaha yewdi aṇatà apəzlla à ama ala adagay. Yesu afàhà à atà akur à lig, agòḍ à atà: “Tsənəwwəṇ lela, kapəhaw uwaga à dza anik aw.” ³¹ Ama tahəd, tazàhà tatak uwana Yesu adəhətəṇ la kutso uwatà la abà gesina.

Yesu awura bada uwana ala zagəla zagəla lakəl

³² Mok uwana Yesu adatsizlla ala adiy aṇha kà, tasəlla dza anik uwana à waṇ, aslala vok kà mabadma aw, ngaha aya kà, aga la masasəḍok mawisiga. ³³ Uwana Yesu adakudək masasəḍok uwaga kà, dza badaga uwaga adzəkà mabadma. Ləv avàläh à maham à ahəṇ dza à gay gesina, ngaha tagòḍ: “Didi, didi mədanəṇ dzəba gə uwanay la Isərayel aw!” ³⁴ Ama azla Farisəya tagòḍ kà: “Sufəl aṇa azlamasasəḍok mawisiga la uwana avəl maslay kà makudəkàh azlamasasəḍok mawisiga uwaga!”

Vok aham à Yesu kà maham à ahəṇ dza

³⁵ Yesu auguzàhàh la azlahuḍ gudəṇ la abà, la azlabəza gudəṇ gesina, atapàhətàla la azlagəy madəv kuḍa aṇatà la aku, azà gay marabəṇ aṇa makoray Zəzagəla, la mawar azlaməna ḍuvats ala gesina, amiyaka tsəhay gə uwala beyli, ngaha la azlaməna takàläh à vəḍfah gesina. ³⁶ Vok ahamà à Yesu kà maham à ahəṇ dza uwana

tayahay, kà uwana azladza uwatà tayàh vok adagay, ngaha bokuba azlatuwan uwana masla manəŋla atà la ahəŋ aw. ³⁷ Kiya uwaga agòd à azlaməna matapla la slaka aŋha: “Matsəf tatak la ahəŋ mənŋa, ama azlaməna sləray kà atà dən aw. ³⁸ Kiya uwaga kà: Dəvəw kudfa à dza aŋa tatak, kà masla aŋa masləl azlaməna sləray à wan kà matsəfal tatak aŋha!”

10

Azlaməna matapla kulo gəl aŋha səla (Mark 3.13-19; Luka 6.12-16)

¹ Yesu azəl azlaməna matapla la slaka aŋha kulo gəl aŋha səla uwatà, ngaha avà à atà ndzəda à ahəl kà makudəkàh azlamasəsəfok mawisiga la mawar azlatsəhay dūvats anik anik ala, ngaha la azlauwana takàläh à vəfah gesina. ² Aganay sləm aŋa azlaməna matapla kulo gəl aŋha səla uwatà la slaka Yesu. Teraŋa dadən kà Səmon uwana tazəllala Piyer, atà la deda aŋha Andəre; Yakuba bəzi aŋa Zebede atà la deda aŋha Yuhana; ³ Filip atà la Bartelemi; Tomas atà la Mata, masla mazəb hadama; Yakuba, kona aŋa Alfe atà la Tade; ⁴ Səmon uwana tazəlal ala Zəlot atà la Yudas Iskariyot, masla uwana adàta kaf à Yesu à gəl.

Yesu asləl azlaməna matapla kulo gəl aŋha səla uwaga (Mark 6.7-13; Luka 9.1-6)

⁵ Yesu asləl azlaməna matapla kulo gəl aŋha səla uwaga la mapəh à atà gay uwanay à vok à abà: “Gudən uwana azla Yahudiya tadza à ahəŋ la abà aw kà, kadaw à abà aw, kadaw à gudən aŋa Samariya à abà babay aw. ⁶ Ama dāw kà à tataka azlatuwan mazehlaga à abà la tsəhay Isərayel pəra. ⁷ La tetəvi aŋkul la ama kà, zəw sayda, gòdāw kà: ‘Makoray Zəzagəla kà nekwa atsa à wan.’ ⁸ Wàràw azlaməna dūvats ala, wələwla azlamazimnekid à uda, wàràw azlaməna akəl zagəla ala, kudəkàhàw azlamasəsəfok mawisiga. Kabəzaw à uwaga kà deyday, vāw à atà deyday suwan. ⁹ Kazəbaw luwəluwà à ahəl baŋaw gursu, baŋaw sili la zliba la aku aw. ¹⁰ Amiyaka kiwa, amiyaka matsəp lukut, amiyaka kwimik, bə amiyaka agəla kà aŋa mauguzahay aŋkul aw. Kà uwana azlayla kà vok, kà masla sləray kà azlayla vok azuw tatak may!”

¹¹ “Mok uwana kadəbəzaw azlamən gudən à abà baŋaw azlabəza gudən à abà, yàhəw kà dza uwana akəs akul la ahəl səla, ngaha dzəw à ahəŋ la mtəga aŋha tsəràh à uwana katsaw à uda la gudən uwatà la abà. ¹² Mok uwana kadaw à gəy, gòdāw dadən teraŋa kà: ‘Lapiya agay la aku.’ ¹³ Baŋa azlaməna huɸ gəy uwatà takəs akul la ahəl səla kà, ‘Ayyi’ aŋa lapiya aŋkul uwana kadahəwwətən kà, adza à ahəŋ lakəl aŋatà, ama baŋa takəs akul aw kà, wəlləw ‘Ayyi’ aŋa lapiya aŋkul à tsəh la slaka aŋatà. ¹⁴ Baŋa la huɸ gəy anik baŋaw la gudən anik la abà, takweska akul aŋa makəs akul baŋaw aŋa matsəb akul sləm kà, dāw aŋkul la abatà, dèdāw à atà à adi burburu aŋa kutso aŋa gudən aŋatà uwana agəf à aku à asik. ¹⁵ La dziriga gəpəh à aku: La vuɸ seriya kà ŋuləm kà aŋa azlaməna gudən Sodom la Gomor kà azlaməna gudən uwaga.”

Azlamatərabəy uwana tadəsa à wan la huma à gay (Mark 13.9-13; Luka 21.12-17)

¹⁶ “Lagwa kà, aganay gəsləl aku bokuba aku azlatuwan, à tataka azlakəda fəta à abà. Kiya uwaga kà, gəw mahanay gə bokuba azlabəbi, gəgod à aku, ngaha gəw tələmna bokuba aku azlahabakoku. ¹⁷ Dahəw haŋkəli kà uwana azladza tadəfahla aku à huma seriya, ngaha tadəzlabəh aku la kurpi la gəy madəv kudfa aŋatà la aku. ¹⁸ Tadəpahla aku ala la huma aŋa azlaməna makoray ngaha la huma aŋa azlasufəl, kà uwana kawoyəw gi, kà aku aŋa maz sayda gulo la huma aŋatà, ngaha la huma aŋa azlauwana azla Yahudiya aw. ¹⁹ Mok uwana tadədala aku à huma seriya kà,

kadàdzugwaw lakəl aṅa uwana kadàpəhaw aw, la uwana kadàwulawla à uda, gay uwana kadàwulawla à uda kà, adàda à paṅaw aṅkul à awtày la kaslà uwatà. ²⁰ Gay uwaga kà adàgay kà madzugway aṅkul aw, ama Masasəḍok aṅa Baba aṅkul Zəzagəla la uwana adàguway la akul la abà la kaslà uwatà.”

²¹ “Deda adàvə deda aṅa aslasl gəl aṅha kà makəḍay, baba bay adàḍehəṅ kiya uwaga la bəzi aṅha; azlabəza babay tadàgola afad à azlababa aṅatà à gəl kà makəḍ atà. ²² Azladza gesina tadàpəsew akul kà uwana kawoyaw gi. Ama dza uwana adàgəḍ dziriga à afik tsərah à makəḍ gəl à ahəṅ kà adàbəlay. ²³ Baṅa tatəreḅ akul la gudəṅ anik la abà, hòyàw à huḍ gudəṅ anik à abà. La dziriga gəpəh à akul: Kadàḍəvwaw mauguzahay à gay la gudəṅ Isərayel gesina dadàṅ kà mas à waṅ aṅa Kona aṅa Zəzagəla aw.”

²⁴ “Masla asik aḍuw məṅga aṅha tetuwa aw, magamza aḍuw dza uwana aḍahalla sləray aw. ²⁵ Say aslay kà masla asik apakay bokuba məṅga aṅha la masəlay dāṅ, ṅgaha magamza agay bokuba məṅga aṅha dāṅ. Baṅa tazàla à zil gày Belzəbul kà, sləm uwana tadàv à azlaməna huḍ gày kà adàgay delga aw aḍaḍuwa à gay aṅa zil gày la mawisiga.”

Dza uwana azlayla vok məhoy guba aṅha
(Luka 12.2-7)

²⁶ “Guba akəs akul kà azladza asik zlà ma aw. Tatak mahad à ahəṅ gə gesina adàgay mapəhla vok ala gə, ṅgaha tatak nasiri gə gesina adàgay masəlay gə la dazuwaya. ²⁷ Kəla tatak uwana gəpəhakulla la mələs la abà, pəhàw uwaga la uḍaka ala; ṅgaha tatak uwana katsənawwaṅ la à gəl à gəl kà, dāw kà wiyawla la gay zaṅ. ²⁸ Guba akəs akul kà azlauwana takəḍ sləḅ vok aw, kà uwana taslala vok aṅa makəḍ dokvadzi aṅa sifa aw, guba akəs akul kà, kà Zəzagəla uwana aslala vok aṅa maduw dokvadzi la sifa la sləḅ vok gesina à gày akəl à abà. ²⁹ Taslala vok aṅa maduw dəgtsetsek səla ala kà aṅa sili tekula aw takay? Amiyaka tekula aṅatà azila la masəlay aṅa Baba aw kà aga la ahəṅ aw. ³⁰ Amiyaka aṅidz takasagəl aṅkul gesina kà, Zəzagəla asəl la tekula tekula gesina aṅha. ³¹ Tsa kità kà, guba akəs akul aw, kà uwana akul kaḍuwaw azladəgtsetsek uwaga gesina la manəṅ akul à adi.”

Mapəhla Yesu ala
(Luka 12.8-9)

³² “Baṅa dza apəhla gi ala la huma azladza la dazuwaya kà, gi babay gəḍapəhla masla ala la huma aṅa Baba gulo, uwana la zagəla la afik: Masla kà aṅulo, gəḍagəḍay. ³³ Ama baṅa dza agəḍəṅ à afik kà asəl gi aw la dazuwaya la huma azladza kà, gi babay gəḍagəḍəṅ à afik la dazuwaya la huma Baba gulo kà: Gəsəl masla aw, gəḍagəḍay bay, suwaṅ.”

Lapiya aw ama mavəhla
(Luka 12.51-53)

³⁴ “Iyay, kadzugwaw kà lapiya la uwana gəsəlla à gudəṅ à vok, kagəḍaw aw: Gəsəlla lapiya à waṅ aw ama mavəhla. ³⁵ Gəsà à waṅ kà masəh gəl à azlabəza zil gə à vok la azlababa aṅatà, azladəgam à vok la azlaiyà aṅatà, ṅgaha azlamis à vok la azladzedzi aṅatà. ³⁶ Mazan vok à gəl adàgay la tataka azlaməna huḍ gày la abà.”

³⁷ “Dza uwana awoya baba aṅha baṅaw iyà aṅha kà gi kaykay kà, akəs gi vok aw, dza uwana awoya bəzi aṅha zilga baṅaw dugu aṅha gə kaykay kà gi kà, akəs gi vok aw. ³⁸ Dza uwana akəs maməts à ahəf à adi aṅha, ṅgaha anəf gi aw kà, masla akəs gi vok aw. ³⁹ Kəla dza uwana asal matuw sifa aṅha, adàziṅ ala; ama dza uwana atuw sifa aṅha aw kà gi kà, adàbəzal.”

Dza uwana akəs akul kà, akəs gi
(Mark 9.41)

⁴⁰ “Dza uwana akəs akul kà, akəs gi babay, ngaha dza uwana akəs gi, akəs dza uwana aslèl gi à waŋ babay. ⁴¹ Dza uwana akəs masla mapəhal gay à ahàl aŋa Zəzagəla, à kà uwana masla mapəhal gay à ahàl aŋha kà, adàbəz masik uwana maf à ahəŋ gà kà aŋa azlaməna mapəh à atà gay à ahàl, ngaha dza uwana akəs dza dziriga la huma aŋa Zəzagəla, kà uwana masla dziriga la huma aŋha, adàbəz masik uwana maf à ahəŋ gà kà aŋa azladza dziriga. ⁴² Haday, gəpəh à akul la dziriga: Kela dza uwana atəf iyaw mataslay gà à tekula la tataka azlabəza uwanay la abà, à kà uwana masla matapla la slaka gulo kà, adàbəz masik aŋha.”

11

Manavay aŋa Yuhana masla madàh batem
(Luka 7.18-35)

¹ Mok uwana Yesu adadəv mapàhla à tatak azlaməna matapla la slaka aŋha kulo gəl aŋha sèla uwaga, atsizilla ala la slaka uwatà kà mad matapla tatak à azladza la azlahuf gudəŋ la kutso uwatà la abà.

² Mok uwatà kà Yuhana masla madàh batem kà, agà la danay. Uwana atsənà gay aŋa sləray aŋa Yesu Kristu, aslèl azlaməna matapla azlaanik aŋha à slaka Yesu ³ kà manaval à gay ala: “Kak dza uwana məkuday awma kak dza anik kəla ay?” ⁴ Yesu agòf à atà: “Dàw, kadəpəhaw Yuhana à tatak uwana katsənàwwàŋ la uwana kanəŋàwwàŋ gesina: ⁵ Azlaguləf tanəŋla, azladeri taday, azlaməna akàl zagəla tawarla, azlamadagazlam bay tatsən sləm, azlamazimnekid tawal à uda, azlaməna kudfa babay tatsən gay marabay.✧ ⁶ Marabay agay la azladza uwana tasak à madiŋ gi gəl à vok aw.”

Sayda lakəl aŋa Yuhana masla madàh batem

⁷ Mok uwana azlaməna matapla aŋa Yuhana tadiy aŋatà, Yesu adzəkà mapəhay à maham à ahəŋ dza lakəl aŋa Yuhana la magoday: “Mana à uwana kadàw kà mayahay la kəsaf la abà ma, mazuwa uwana afad abəlakəŋ ay? Awaŋ, uwaga aw. ⁸ Kətà zla, mana kadàw kà aŋa manəŋəŋ ma? Awma dza uwana atsàkw à lukut mahədayga à abà kəla ay? Ama azlauwana tatsəkwàh à lukut mahədayga à abà kà, atà kà la huf gày sufəl. ⁹ Mana kadàw kà aŋa manəŋəŋ ma? Masla mapəhal gay à ahàl aŋa Zəzagəla kəla ay? La kità kà, gəgodf à akul kà, Yuhana aduwa masla mapəhal gay à ahàl, ¹⁰ kà uwana tatsətsèr lakəl aŋha:

'Aganay, gəsləl à awtày masləlay gulo à huma aŋak'

Zəzagəla agòf,

'Kà madàh tetəvi à ahəŋ.'✧

¹¹ La dziriga gəpəh à akul: La tataka azladza asik la abà kà, dza mayyayga la ahəŋ aduw Yuhana masla madàh batem uwanay aw, tekedika, dza uwana mabəziga bəziga la makoray Zəzagəla kà, aduwa Yuhana uwaga. ¹² Dagay la mok uwana Yuhana masla madàh batem azà sayda tsərəh à lakana, kà tadàh gasa à makoray Zəzagəla à gəl, ngaha azlaməna məzam tayahay kà mazəbay lakana. ¹³ Azlaməna mapəh à atà gay à ahàl gesina la mapəhay aŋa Musa tapàh gay lakəl aŋa makoray Zəzagəla tsərəh à mas à waŋ aŋa Yuhana, masla madàh batem. ¹⁴ Baŋa asa à akul kà madiŋ gi gəl à vok kà, Yuhana kà Eliya uwana wakità apəhla mas à waŋ aŋha ala dagay uwarà. ¹⁵ Dza uwana sləm lakəl kà, atsəbal sləm lela!”

¹⁶ Yesu agòf aya: “Ma la mana lagwa gəgagazləla azladza aŋa zamana uwanay lakana ma? Gəgagazləla atà la azlabəza uwana tadzàh madzay la vadavaday kasukwa

la afik, tazalàh vok kà atà kà atà, ¹⁷ la magodfay, anu mètàsà à akul talakway, ama akul kahàbàwwal à tsəh aw, məhàb à akul dəs kufà, ama katàwàw la mats hulolo aw. ¹⁸ La kità Yuhana asà à waŋ, azùw aw, asà aw, ŋgaha azladza tagòd kà: ‘Masla la masasəfok mawisiga.’ ¹⁹ Kità aya babay kà, Kona aŋa dza asà à waŋ, azuway, asay, ŋgaha azladza tagod kà: ‘Nərèzàw dza uwanay tsi, masla hud. Afa sləm à kà à mazuway la masay aŋha pəra’, tagòd. ‘Kafaw masla kà à tataka aŋa azlaməna mazəb hadama à abà, la azlaməna tsakana, ŋgaha la azladza uwana madz à ahəŋ aŋatà kà lela aw.’ Ama tekefika matsihila aŋa Zəzagəla apəhla vok ala la sləray aŋha la abà.”

*Gudəŋ uwana akweska makəs Yesu
(Luka 10.13-15)*

²⁰ Kiya uwaga Yesu adzəkà masläh məl à azlagudəŋ uwana à gəl, adfahàhà azlanadzipo kaykay gə la abà, kà uwana azlaməna madz à ahəŋ la abà kà tapəh gay la ləv ala aw. ²¹ Agòd: “Ŋgərpa lakəl aŋak à kak Korazən! Ŋgərpa lakəl aŋak à kak Betsayda! Kà uwana agay nadzipo uwana adfahà à ahəŋ la tataka aŋkul la abà, agay kà la gudəŋ Tir la Sədon kà, naka dagay uwarà azlaməna madz à ahəŋ la abà kà, tatsàh kutso akəl à vok ŋgaha la madaw abuh à vok, kà mapəhla ala kà atà tapəh gay la ləv ala.✧ ²² Kà uwaga à uwana gəgod à akul kà: La vud seriya kà, seriya uwana adàbəz azlaməna gudəŋ Tir, la azlaməna gudəŋ Sədon kà ŋuləm kà aŋatà à kà aŋa gudəŋ aŋkul. ²³ Ŋgaha kak Kapernahum kadzugw kà: ‘Gədàzigəŋay tsərəh à zagəla,’ kagòd takay? Awaŋ, tadàdukwa ka à vəcfah à gày akəl à abà, kà uwana azlanadzipo uwana adfahàhəŋ la kak la abà, agay la Sodom kà, naka gudəŋ uwatà kà agay la ahəŋ tsərəh à lakana. ²⁴ Kiya uwaga kà, gəpəh à akul kà la vud seriya kà, azlaməna Sodom tadəgay ŋuləm kà kak.”

*Sàw à waŋ à slaka gulo, kà akul aŋa mabəz maduw ləv
(Luka 10.21-22)*

²⁵ La mok uwatà Yesu agòd: “Iyay Baba, Sufəl ana zagəla ŋgaha aŋa vəcfah, ‘Kikay’, gəgod à ka, kà uwana kafatəla à azlabezaga la à ama ala tatak nasiri gə uwana kahàd à azlaməna masəl tatak uwana à adi, ‘Mədawur gəl’, tagòd. ²⁶ Iyay, Baba gəzləb ka kà uwaga.”

²⁷ “Baba gulo abək à gi tatak gesina. Dza la ahəŋ asəl Kona aw, say Baba pəra asəl gi, dza la ahəŋ asəl Baba aw, say gi Kona aŋha pəra, ŋgaha la azlauwana Kona apəhatàla Baba aŋha pəra.”

Mazalay aŋa Yesu

²⁸ “Sàw à waŋ à slaka gulo akul gesina, akul uwana kayàw vok la mazəb mahanay, gədàvə à akul maduw ləv. ²⁹ Zəbàw zeləŋ zukw kuda gulo, ŋgaha kəsàw matapla gulo, kà uwana gi kà gi dzaŋdzaŋ aw, gi tələmna, ŋgaha kadàbəzaw maduw ləv aŋa ləv aŋkul.✧ ³⁰ Kà uwana zukw kuda uwana asa à gi mav à akul kà zlazladfa kà mazəbaw aw, mahanay uwana gədàfa à akul à gəl babay kà tsaftsaf.”

12

*Gay lakəl aŋa vud maduw ləv
(Mark 2.23-28; Luka 6.1-5)*

¹ Mok uwana uwaga adadà à lig kà, Yesu la azlaməna matapla la slaka aŋha tagùw à uda la guf nalkama la abà, (uwana bokuba hi), la vud maduw ləv. Azlaməna matapla la slaka aŋha uwaga kà may akəs atà, tadzəka makalay kà mazuway. ² Uwana azla Farisəya tanəŋà uwaga kà, tagòd à Yesu: “Nərèz, azlaməna matapla la slaka aŋak tadàh tatak uwana mapəhay gami avərə gay kà madəhəŋ la vud maduw ləv tsi!”

✧ 11:21 11.21 Yesayya 23.1-18; Hezəkiyel 26.1-28.26 ✧ 11:29 11.29 Yeremiya 6.16

³ Yesu awùlla atà ala: “Kadzèngàw à tatak uwana David adfahàn vèrdi anik la mok uwana may akès la azlamèna anha aw uwà? ⁴ Ahàd à gày Zèzagèla à agu, kà mazèb tatak may tsikasliga uwana maf à ahèng gà. Tekedfika tetèvi la ahèng kà mazuway anha aw, bamèraka azlamanalay anha babay aw, say à azlamèna mav tatak à Zèzagèla pèra, la uwana tetèvi la ahèng. ⁵ Awma kadzèngàw la mapèhay anja Musa la abà kà, azlamèna mav tatak à Zèzagèla tadàh slèray la gày Zèzagèla la aku amiyaka la vud maduw lèw, ngaha tatugw mawisiga lakèl anjàt à aw kà, kasèlaw aw takay? ⁶ La dziriga gèpèh à akul kà, dza uwana aduwa mèn gày Zèzagèla uwaga kà aga la abanay. ⁷ Agayna kasèlaw, uwana matsetseray uwanay asal magodfay kà: 'Vok mahamay la uwana asa à agi, awkà tatak makadfay gà aw', ⁸ naka kadükwàw seriya à azladza uwana à gèl, atà kokudfa tsakana aw. ⁸ Kà uwana Kona anja dza kà masla la uwana mènnga anja vud maduw lèw.”

*Dza la ahàl mamètsay gà
(Mark 3.1-6; Luka 6.6-11)*

⁹ Yesu atsizilla ala la abatà, azà à vok, ahàd à gày madèw kudfa anjàt à agu. ¹⁰ Dza anik la ahèng la abatà, uwana agà la ahàl mamètsayga. Azladza uwana la gày uwatà la aku tanàv à Yesu: “Mapèhay gami ma avà tetèvi kà mawur dza ala, la vud maduw lèw takay?”, kà atà anja mabèzal à tsèh kà mapuwal gudzi à gèl. ¹¹ Ama Yesu awùlla atà ala: “Banja dza la ahèng la tataka ankul la abà la tuwan tekula pèra, ngaha tuwan uwaga atèd à suwa à abà la vud maduw lèw, ma aday kà mazèb à uda la abà aw takay? ¹² Ngaha dza ndzer, ma aduwa tuwan aw takay? Kà uwaga à uwana mapèhay gami avà tetèvi à dza kà madàh delga la vud maduw lèw.” ¹³ Kiya uwaga Yesu agòd à dza uwatà: “Biyà ahàl ala!” Abiyà ahàl ala, ngaha ahàl anha adawurla bokuba anik uwahà. ¹⁴ Azla Farisèya tadà anjàt, takès sawaray kà mabèz tetèvi kà makèdla Yesu.

Masla slèray uwana Zèzagèla akèsanì

¹⁵ Mok uwana Yesu atsènà uwaga kà, asà à uda la slaka uwatà la abà, ngaha maham à ahèng dza anuvaw tanèfà. Awarà azlamèna dufvats ala gesina. ¹⁶ Ama afàh à atà akur à lig la ndzèdà kà atà anja mapèh uwana apakà vok aw. ¹⁷ Adfahàn kiya uwanay kà, kà gay anja masla mapèhal gay à ahàl Yesayya anja magèd à afik. ¹⁸ Zèzagèla agòd:

'A aganay masla slèray gulo uwana gèkèsànì,

Uwana gèwoyàn ngaha marabay gulo lakèl anha.

Gèdàslèl Masasèdòk gulo à gèl anha,

Ngaha adàz gay seriya gulo à azlatsèhay gudèn à vok gesina.

¹⁹ Masla adàgazlay la dza aw, adàwiyyay aw,

Ngaha dza adàtsèn mawiyay anha la azlatetèvi la ama aw.

²⁰ Adàdavla à gay à mazuwa manèlfahayga à vok aw,

Ngaha akàl fènès uwana atèm à ahèng njuliza bay kà, adàdèvla à gay à vok aw.

Masla adàdz à ahèng kiya uwanay tsèràh à madàh dziriga à gudèn à vok gesina.

²¹ Azlatsèhay gudèn à vok gesina tadàf manèwèn anjàt à masla à afik', ²² agòd aya.

*Mapèh mawisiga lakèl anja Masasèdòk tsikasliga
(Mark 3.22-30; Luka 11.14-23)*

²² Kiya uwaga la abatà tasèlè dza à Yesu à wan, gulèf badaga, la masasèdòk mawisiga lakèl. Yesu awurà dza uwatà ala tsèràh à uwana dza aslala vok anja mabadma, ngaha la manèngla. ²³ Lèw avàlàh à maham à ahèng dza à gay gesina, ngaha tagòd: “Masla kà Kona anja David tèga aw ay?” ²⁴ Ama uwana azla Farisèya tatsènà uwaga

kà, tagòd: “Kona uwaga akudèkahay azlamasasèdòk mawisiga kà, kà uwana Belzèbul, sufèl aña seteni avàl ndzèdà kà makudèkàhla.” ²⁵ Ama Yesu asèl madzugway aňatà ñgaha agòd à atà: “Baña azladza gudèñ tekula tatsàkla, ñgaha guvèl la tataka aňatà la abà, makoray aña gudèñ uwatà kà azila. Huf gudèñ, baňaw huf gày, uwana tap guvèl la tataka aňatà la abà, aslala vok aña madz à ahèñ aw. ²⁶ Baña seteni akudèk seteni, masla la gèl aña adatsakla, ma kakay à makoray aña adàdza à ahèñ ma? ²⁷ Iyay, akul kadzugwaw kà Belzèbul la uwana avà à gi ndzèdà kà makudèkàh azlamasasèdòk mawisiga uwaga, kagodaw. Kità ma, uwa adav ndzèdà à azlabèza aňkul kà makudèkahay uwa? Kà uwaga à uwana tadàgah azlamèna seriya aňkul. ²⁸ Ama tsa baña la Masasèdòk Zèzagèla la uwana gèkudèkàh azlamasasèdòk mawisiga uwanay kà, tsa kètà kà, gòdàw kà makoray aña Zèzagèla kà adabèz akul à vok lakana, gòdàw zla.”

²⁹ “Dza la ahèñ ad à gày la mtèga aña dza ndzèdà-ndzèdàgaga kà mad à gèl aw, say atsà à vok à abà, akès dza uwaga, awadèñ dàñ, ñgaha la lig la ahèñ aslala vok aña mazuw gày aña à gay.”

³⁰ “Dza uwana anu sèla aw kà, masla mèzam gulo. Ñgaha babay kà dza uwana azlak gi kà maham ala gay à vok aw kà, masla kà masla madàdasiñ ala. ³¹ Kà uwaga gègod à akul haday kà: Maham à ahèñ tsakana la azlagay mawisiga aña azladza gesina kà agay mamatsila gà, ama kèla kà, dza uwana apèh mawisiga la matsèk magodahay à Masasèdòk Zèzagèla à gèl kà, masla kà, abèz mamatsila aña tsakana aw. ³² Kèla dza uwana apèh mawisiga lakèl aña Kona aña dza adàmatsalañ ala, ama kèla dza uwana agodàh à Masasèdòk Zèzagèla kà, masla adàbèzal mamatsila tsakana aña la zamana uwanay, ñgaha la mèlo uwana adàsa à wañ babay aw.”

Ahàf la mayyay aña *(Luka 6.43-45)*

³³ “Baña ahàf delga kà, mayyay aña bay kà delga. Ahàf mawisiga bay kà, mayyay aña kà mawisiga. Kà uwana tasèl ahàf kà la mayyay aña uwana la vok ayyay. ³⁴ Akul azlabèza aña matsapa, kakay kapèhaw azlatatak delga, tsa akul azlamawisiga ma? Uwana gay apèhay kà uwana adahèn lèv ala. ³⁵ Dza delga atsalla tatak delga à uda la lèmana delga aña la abà; dza mawisiga bay atsalla tatak mawisiga à uda la lèmana aña mawisiga la abà babay. ³⁶ Iyay, gègod à akul kà: La vud seriya kà, azladza tadàwulla à uda la gèl aňatà lakèl aña azlagay deyday gà uwana tapàh gesina. ³⁷ Kà uwana la afađ gay aňak la uwana seriya adàpèh à vok, ñgaha adàpèhla ala kà kak dziriga baňaw azlayla ka aw.”

Masèlay aña masla mapèhal gay à ahàl Yonas *(Mark 8.11-12; Luka 11.29-32)*

³⁸ Kiya uwaga azlaanik la tataka aña azlamèna mapàhla mapèhay ala la azla Farisèya tagòd à Yesu: “Mènga, asa à anu kà kadehèñ nadzipo tekula mènèñèñ.” ³⁹ Kiya uwaga Yesu awùlla atà ala, agòd: “Azladza aña zamana uwanay azlamaksafèr, tadàh mabila, tanàv nadzipo, ama nadzipo la ahèñ tanèñèñ aw, say aña masla mapèhal gay à ahàl Yonas uwatà pèra. ⁴⁰ Bokuba uwana Yonas adahà mavakay makèr la mahènay makèr la huf aña kilfi babay kà, kiya uwaga adàpaka vok la Kona aña dza uwana adàdàh mahènay makèr la mavakay makèr la zèvay la aku babay. ⁴¹ La vud seriya kà, azladza aña gudèñ Niniv tadàgola afađ à azladza aña zamana uwanay à gèl, ñgaha tadàpuwa à atà gudzi à gèl, à kà uwana azlamèna madz à ahèñ la Niniv tapèh gay la lèv ala, à mok uwana tatsèn sayda aña Yonas. Uwana aduwa Yonas aganay la abanay. ⁴² La vud seriya kà, sufèl mis gà uwana la gèl la aku adàgola afađ à azladza aña zamana uwanay à gèl, ñgaha adàpuwa à atà

gudzi à gəl, kà uwana asà à afik la tsəh la ahəŋ la makəf gəl à ahəŋ gudəŋ à vok, kà matsəb sləm à hanjkəli aŋa Salomon. Uwana aduwa Salomon kà aganay la abanay.”

Mawul à waŋ aŋa masasəfok mawisiga
(Luka 11.24-26)

⁴³ “La mok uwana masasəfok mawisiga adasa à uda la dza la abà kà, aday auguzahay la azlaslaka deydayga gesina, ayàh slaka maduw ləv. Ama baŋa abəzal aw kà, ⁴⁴ agoday la gəl aŋha kà: ‘Lagwa kà, gəday, gədàwul à slaka gulo uwana à abà gəsà à uda la abà. Nŋaha awulay abəzal à gəl kà maslafayga lela, mafəhəŋ à ahəŋ gə dzəba aŋha səla aw.’ ⁴⁵ La abatà kà aday, ayahay azlamasasəfok mawisiga anik à tsəh məfəf, azlauwana taduwa masla la dzaŋdzaŋ, tatsa à waŋ atà nna, tadza à ahəŋ la abatà. Kiya uwaga kà, madz à ahəŋ aŋa dza uwaga agay mawisiga daduwa uwana uwarà. Kiya uwaga adəgay la azladza mawisiga aŋa zamana uwanay.”

Iyà la azladedə aŋa Yesu
(Mark 3.31-35; Luka 8.19-21)

⁴⁶ La mok uwana iyà la azladedə aŋa Yesu tasà à waŋ kà, Yesu abadmə à maham à ahəŋ dza. Tatsəzl à uda, asà à atà mabəfalma. ((⁴⁷ Dza anik agòf à Yesu: “Iyà la azladedə aŋak la uda, asà à atà mabəfakama!”)) ⁴⁸ Yesu awùlla à dza uwatà: “Uwa à iyà gulo la azladedə gulo uwa?” ⁴⁹ Nŋaha apəhla azlaməna matapla la slaka aŋha ala la magoday: “Atà nnay azlaiyà la azladedə gulo. ⁵⁰ Kəla dza uwana adəh uwana asa à Baba gulo uwana la zagəla la afik kà, masla kà deda gulo, baŋaw iyà gulo.”

13

Gay la gay la abà aŋa masla maslək tatak
(Mark 4.1-9; Luka 8.4-8)

¹ La mavakay uwatà Yesu asà à uda la kay, nŋaha ahəd adzà madzay la gay dərəv kà matapla tatak à azladza. ² Magol maham à ahəŋ dza ahəmal à adi. Masla ahəd à kəslah iyaw à afik, adzà madzay la afik, maham à ahəŋ dza babay tatsəzlla à gay dərəv. ³ Apəhàtəla azlatatak aŋuvaw la azlagay la gay la abà, nŋaha agòf à atà:

“Masla maslək tatak asa à uda kà mad à maslək tatak. ⁴ La mok uwana aslək hi la guf aŋha la abà, azlafofulo anik tanis à tetəvi à ama, azladiyan tasa à waŋ tazuw à gay. ⁵ Azlaanik aya tanis à pala akur afik, bokuba uwana kutso la pala akur lakəl mənŋa aw kà, hi as à uda katskats, kà uwana kutso aga la ahəŋ mənŋa aw. ⁶ Nŋaha uwana afats adədzəka mavəday la ndzəfa, agulla fofulo tsatsafəda ala, kà uwana abək slilih kà à pala akur à afik. ⁷ Bə gotənaŋ azlafofulo anik tanis à atək à abà, uwana atək azigənaŋ, akəf mas uda aŋa fofulo à tsəh. ⁸ Bə gotənaŋ azlafofulo anik tanis à kutso delga gə à abà, nŋaha tavə mayyay lela: Azlaanik tayya à adi zazun səla, azlaanik aya zun, nŋaha azlaanik huməts.” ⁹ Yesu azətələnŋ à gəl agòf: “Tsəbàwwal sləm lela à baŋa sləm aga à akul lakəl.”

Kà mana Yesu apəhay kà la gay la gay la abà ma?
(Mark 4.10-12; Luka 8.9-10)

¹⁰ Kiya uwaga azlaməna matapla la slaka aŋha tazə vok à slaka aŋha: “Kà mana kapəhatəla gay la gay la abà ma?”, tagəfal. ¹¹ Yesu agòf à atà: “Akul kà, kabəzaw masəl nasiri aŋa makoray Zəzagəla, ama atà kà tabəzal aw. ¹² Kà uwana dza uwana la tatak tadəvəlla à gəl aya, nŋaha adəsəg gəl ala. Ama kà aŋa dza uwana la tatak ŋuv kà, kà tadədəvəlla à ahəl ala. ¹³ Kà uwaga à uwana gəpəhatəla gay la gay la abà, kà uwana tanənaŋ ama tanərezaŋ ala aw, nŋaha tatsənaŋ ama bokuba tatsəbal sləm la matsənəŋ aw, ¹⁴ kà gay aŋa masla mapəhal gay à ahəl Yesayya aŋa magəf à afik: ‘Akul la matsəbal sləm, ama katsənawwan aw;

kanəŋawwan la matsəkəl yewdi à gay, ama kanəŋawwan aw.

15 Kà uwana tsəhay uwanay kà adàdzadza gəl aṅha ala,
 Danakàh à sləm à ama.
 Tatsakàh à yewdi aṅatà à ama
 Kà yewdi aṅatà aṅa manəṅ aw
 Kà sləm aṅatà aṅa matsənəṅ aw,
 Nḡaha kà atà aṅa masəl tatak la ləv aṅatà la tsəh aw,
 Kà atà aṅa mawul à waṅ à slaka gulo, kà gi aṅa mawuratàla aya aw, Zəzagəla agòd'.[☆]

16 Ama akul kà, marabay agay la akul, kà uwana yewdi aṅkul kà anəṅla, ṅgaha sləm aṅkul atsənà tatak. 17 La dziriga gəpəh à akul: Aṅuvaw azlaməna mapəh à atà gay à ahàl kà mapàhla à azladza, la azladza dziriga aṅa Zəzagəla, tayàh kà manəṅəṅ uwana kanəṅàwwàṅ, ama tanəṅàṅ aw, kà matsən uwana katsənàwwàṅ, ama tatsənàṅ aw.”

Yesu apəh godega aṅa gay la gay la abà

aṅa maslək tatak uwatà à uda

(Mark 4.13-20; Luka 8.11-15)

18 “Iyay, tsənàwwàṅ godega aṅa gay la gay la abà aṅa masla maslək tatak, uwana asal magòd'ay zla. 19 Azlauwana tatsəna gay marabəṅ lakəl aṅa makoray Zəzagəla ṅgaha takəsəṅ aw, atà kà kalkal la gay tetəvi uwana azlafofulo tanis ala à ama: Nḡaha mawisiga atsa à waṅ, atsatsam uwana à uda tasləka à ləv aṅatà à tsəh. 20 Azlaanik kalkal la pala akur, uwana azlafofulo tanis à afik, tatsəb sləm à gay, takəs la marabay katskats, 21 ama tadala slilih la atà la abà aw. Takəs kà aṅa kaslà ṅuv pəra. Mok uwana matərəb'ay, la mas ṅgərpa adàtsizlla ala kà gay Zəzagəla kà, katskats tasak madiṅal gəl à vok aṅatà la tsəh ala. 22 Azlaanik kalkal la gày atək uwana azlafofulo tanis à abà: Tatsəna gay Zəzagəla, ama madzugway la adi aṅa gudəṅ à vok uwanay, la matsid'ay aṅha, la mapapatay aṅha lakəl aṅa ləmana asufa gay uwana ala la ləv aṅatà la tsəh, ṅgaha ahən aw. 23 Azlaanik kalkal la kutso delga uwana azlafofulo tanis à abà: Tatsəb sləm à gay, ṅgaha tatsənəṅ. Nḡaha tahən lela, azlaanik tayya à adi zazun səla, azlaanik zun, azlaanik aya huməts.”

Gay la gay la abà lakəl aṅa maṅaviya la guf la abà

24 Yesu apəh à atà gay la gay la abà anik, agòd' à atà: “Aganay tatak uwana məga-gazləla la makoray Zəzagəla. Dza anik asləkà fofulo delga à guf aṅha à abà. 25 La vəd' la abà vərđi anik, à mok uwana azladza gesina la madzəhal la abà, masla məzam aṅa dza uwatà asà à waṅ, akokos maṅaviya à guf hi uwatà à abà, ṅgaha adà aṅha. 26 Mok uwana hi adazigəṅay, adzəkà matsa à gəl ahənay kà, maṅaviya apàhla vok ala babay. 27 Azlamagamza aṅa dza aṅa guf tasà à waṅ tagòd'al: ‘Məṅga, kasləkà kà fofulo delga à guf aṅak à abà mi ya, maṅaviya uwanay ma asà à waṅ ma lala aya la?’ 28 Agòd' à atà: ‘Uwaga kà masla məzam gulo la uwana adfahà kiya uwaga’. Kiya uwaga azlamagamza tanəval, tagòd'al: ‘Lagwa ma, asa à ka məd'ay məd'atsəd' à ahəṅ ay?’ 29 ‘Awaṅ’, agòd' à atà: ‘Baṅa la katsəd'aw maṅaviya à ahəṅ kà, zlahaw kà, kadàtsəd'awla hi gà, 30 sàkàwwal, tahən la slaka gə tsəràh à matsəd' tatak. La kaslà uwatà kà, gəd'agòd' à azlaməna matsəd' tatak: Tsəd'aw kà maṅaviya dadəṅ, wədfahàwàṅ təmtatəm kà matəl à gay, ṅgaha la lig la ahəṅ kà, dāwgəla hi gulo à mtəga, gəd'agòd' à azlaməna matsəd' tatak’.”

Gay la gay la abà aṅa tsəhay hamadz

(Mark 4.30-32; Luka 13.18-19)

31 Yesu apəh à atà gay la gay la abà anik aya, agòd' à atà: “Makoray Zəzagəla kà, məgagazləla kà la tsəhay hamadz uwana atsa à uda la lig gày aṅa dza. 32 Masla la

☆ 13:15 13.15 Yesayya 6.9-10

uwana à tsəh azlatsəhay anik anik à tsəh gesina, ama baŋa adazigənay kà, masla la uwana aduwa azlaahàf anik, apak magol ahàf tsərəh à uwana azladīyaŋ tasaha à waŋ kà maŋalàh gày aŋatà à afik.”

Gay la gay la abà aŋa tatak maməsl tatak ala
(Luka 13.20-21)

³³ Yesu apəh à atà gay la gay la abà anik aya, agòf à atà: “La mana gəgagazləla makoray Zəzagəla ma? Makoray Zəzagəla kà kalkal la tatak maməsl tatak ala, uwana mis akotsiŋ à pəhàw dogum zlo à tsəh uwana adàh kilo dzik səla gəl aŋha səla, tsərəh à uwana aməsl magol pəhàw uwaga ala gesina.”

Kà mana Yesu apəhay kà la gay la gay la abà ma?
(Mark 4.33-34)

³⁴ Yesu apəh uwaga gesina à maham à ahəŋ dza kà la gay la gay la abà. Apəh à atà gay la kokudà la gay la gay la abà aw, ³⁵ kà gay aŋa masla mapəhal gay à ahəl aŋa mapəhla à azladza aŋa magəf à afik:

'Gədàpaha à atà kà la gay la gay la abà,

Gədàpəhatàla tatak mahad'vok à ahəŋ gà uwana agà dagay madzəka vok aŋa gudəŋ à vok.*

Yesu apəhla godega aŋa gay la gay la abà

aŋa maŋaviya uwatà ala

³⁶ La lig la ahəŋ Yesu asàk à maham à ahəŋ dza à ahəŋ, awùl à mtəga. Azlaməna matapla la slaka aŋha tazà vok à slaka aŋha kà manaval godega aŋa gay la gay la abà uwatà: “Pəhanula gay la gay la abà aŋa maŋaviya uwana la guf hi la abà!”

³⁷ Yesu awùlla atà ala la kiya uwanay: “Iyay, dza uwana aslək fofulo delga kà, uwaga kà Kona aŋa dza, ³⁸ guf kà, uwaga kà gudəŋ à vok, fofulo delga kà, azladza uwana azlaaŋa makoray Zəzagəla, ŋgaha maŋaviya bay kà, azlaaŋa masla mawisiga.

³⁹ Masla məzam uwana akokos maŋaviya uwaga kà seteni; təla matsəf tatak uwaga, kà madəv à gay gudəŋ à vok, azlaməna matsəf tatak kà azlamalika. ⁴⁰ Bokuba uwana tawəfàh maŋaviya à akəl à gay kà, kiya uwaga adəpaka vok la madəv à gay gudəŋ à vok babay. ⁴¹ Kona aŋa dza adəsləl azlamalika aŋha à ahəŋ, ŋgaha tadətsatsam à uda la makoray aŋha la abà azladza uwana tasokw dza à tsakana à abà gesina, la azladza uwana tadəh mawisiga. ⁴² Tadəwuts atà à gudəh akəl uwana à abà, matuway la mapəf slid' la tsəh ala terawawa la abà. ⁴³ Ama azlauwana takəs gay aŋa Zəzagəla kà, atà kà tadəufay bokuba afats la makoray aŋa Baba Zəzagəla la abà. Tsəbàwwal sləm lela, à baŋa sləm aga akul lakəl.”

Gay la gay la abà aŋa ləmana mahadəŋ à ahəŋ gà

⁴⁴ “Makoray Zəzagəla kà kalkal la ləmana uwana mahadəŋ à ahəŋ gà la guf la abà. Dza anik abəz à ləmana uwaga, ŋgaha ahadəŋ à ahəŋ aya. Masla arab, ahad madawla uwana akoray gesina, ŋgaha asukwla guf uwatà.”

Gay la gay la abà aŋa tatak bədə

⁴⁵ “Makoray Zəzagəla kà, kalkal la masla matsakalay uwana ayəh azlatatak bədə delga delga gà. ⁴⁶ Mok uwana adabəz tatak bədə uwana delga gà, tsakalay aŋha zlazladà kà, aday, adawul tatak uwana akoray gesina, ŋgaha asukw la tatak bədə uwatà.”

Gay la gay la abà aŋa dzarawa

⁴⁷ “Makoray Zəzagəla kà kalkal la dzarawa uwana aduway à iyaw à abà uwana ahəl tsəhay tatak anik anik gesina. ⁴⁸ Mok uwana adahən ala, azlaməna makas kilfi

tabiyan à uda, ngaha tadzàh madzay kà makəs kilfi delga delga à takosà à abà, ama uwana delga aw kà, tafətukw ala. ⁴⁹ Kiya uwanay à uwana adàpak à vok la makəf gəl à ahəŋ gudəŋ à vok: Azlamalika tadàsa à ahəŋ kà mavàh azlamawisiga ala la azladelga, ⁵⁰ ngaha tadàfətukw azlamawisiga à gudùh akàl à abà. Tadàtaway la mapəfàh slid la tsəh ala, la abatà.”

Ləmana mawga la ləmana maviyaga

⁵¹ “Katsenaw uwaga gesina nəma ay?”, Yesu agòf à atà. “Iyay”, tagòfal. ⁵² Ngaha agòf à atà: “Kiya uwanay zla, kəla masla mapàhla wakità mapəhay uwana ala apək masla asik aŋa makoray Zəzagəla kà, masla kà bokuba zil gày uwana ahəl à uda la ləmana aŋha la abà azlatatak mawga la azlamaviyaga.”

Azlaməna gudəŋ Nazaret tadin gəl à Yesu à vok aw (Mark 6.1-6; Luka 4.16-30)

⁵³ Mok uwana Yesu adadəv azlagay la gay la abà uwaga à gay kà, adà aŋha la abatà. ⁵⁴ Ngaha awùl à gudəŋ uwana à abà azigəŋ la abà, adzəkà matapatàla azlatatak la gày madəv kudfa anatà la aku, ngaha azladza gesina kà ləv avàlàh à atà à gay gesina, tagòf: “Haŋkəli uwanay ma abəzal ma lala? Kakay asla kà madəhəŋ azlanadzipo uwanay ma? ⁵⁵ Masla kà bəzi aŋa masla mapəf ahàf təga aw uwà? Mariyama la uwana iyà aŋha aw takay? Yakuba, Yusufu, Səmon, ngaha Yahuda la uwana azladedə aŋha təga aw takay? ⁵⁶ Azladedə aŋha dəgam gə bay kà, atà la abanay kəla mavakay aw takay? Ngaha ma lala abəzal ndzəfa uwaga zlam la?” ⁵⁷ Kà uwaga à uwana tadin gəl à masla à vok aw. Ama Yesu agòf à atà: “Masla mapəhal gay à ahəl kà lala beyli kà takəs gay aŋha, ama la gudəŋ aŋha uwana tayyà à abà banaw la huɸ gày aŋha kà, takəs gay aŋha aw.” ⁵⁸ La abatà kà Yesu adəhà azlanadzipo ŋuv pəra kà uwana tadin gəl à masla à vok aw.

14

Madzugway aŋa Herod lakəl aŋa Yesu (Mark 6.14-29; Luka 9.7-9)

¹ La zamana uwatà, Herod sufəl aŋa Galili avərə gay kà mapəhay lakəl aŋa Yesu. ² Agòf à azlaməna magamza aŋha: “Yuhana masla madəfàh batem kà, adawul à uda la mamətsay, kà uwaga à uwana aga la maslay kà madəfàh azlanadzipo kiya uwanay.”

Makəf Yuhana masla madəfàh batem

³ Tekedik kà, Herod la uwana avà tetəvi kà makəs Yuhana, awàdàŋ, ngaha adùw à daŋay kà lakəl aŋa mis aŋa deda aŋha Filip, uwana sləm aŋha Herodiya. ⁴ Kà uwana Yuhana agòf à Herod: “Azlayla kà, kà kak aŋa mazəb Herodiya kà aŋa mis aw.”* ⁵ Herod asəl makəf Yuhana, ama guba akəs kà azla Yahudiya, kà uwana gesina anatà tanəŋà Yuhana kà bokuba masla mapəhal gay à ahəl aŋa Zəzagəla kà mapàhla azladza.

⁶ Mok uwana mavakay uwana tayyà Herod adadəbà, tahəb madəvaday la mavakay uwatà. Dugu aŋa Herodiya ahəb dəs la huma aŋa azladza uwana tazàlàh atà. Dəs uwatà, adà à ləv aŋa Herod à tsəh, aràbàŋ, ⁷ tsərəh à uwana azùw mawadəy kà mav tatak à dugu uwaga kəla tatak uwana anavay gesina. ⁸ La mapəhal aŋa iyà aŋha, agòf à sufəl: “Nàts gi gəl aŋa Yuhana à tasà à abà, kavà à gi.” ⁹ Kay, uwaga azà à sufəl məŋga, ama kà mazuw mawadəy aŋha, ngaha la azladza uwana azàlàh atà kà, avà tetəvi kà madəfàh uwaga. ¹⁰ Asləl dza kà mad manats gəl aŋa Yuhana masla madəfàh batem à waŋ la daŋay. ¹¹ Tasələ gəl uwatà à waŋ la tasà la abà, tavà à dahalay, masla bay adàla à iyà aŋha. ¹² La lig la ahəŋ azlaməna matapla la slaka

* 14:4 14.4 3Musa 18.6; 20.21

Yuhana masla madfàh batem, tasà à waŋ, tazèb vok aŋha kà mad malay. La lig la ahəŋ, tahàd kà mapəh tatak uwana apakà vok à Yesu.

Yesu avà tatak may à zil dəbow zlo

(Mark 6.30-44; Luka 9.10-17; Yuhana 6.1-14)

¹³ Mok uwana Yesu atsənà uwaga, atsizlla ala la abatà la kəslah iyaw, kà mad aŋha à kəsaf à abà kokudà gəl aŋha. Ama uwana maham à ahəŋ dza atsən uwaga kà, tasà à uda la gudəŋ la abà, ŋgaha tanəfà Yesu la maguway la gay gərdza. ¹⁴ Mok uwana Yesu adasa à ahəŋ la kəslah iyaw la afik, anəŋà maham à ahəŋ dza aŋuvaw. Vok ahàmal kaykay kà azladza uwaga, ŋgaha adzəkà mawar atà ala la dʒuvats aŋatà la abà gesina.

¹⁵ Uwana mokokhu adasa à waŋ kà, azlaməna matapla la slaka aŋha tazà vok à slaka aŋha, tagòdal: “Vəđ adagay, ŋgaha slaka uwanay kà fəta aya. Sàk à maham à ahəŋ dza tadà aŋatà à huđ gudəŋ, kà atà aŋa mayàh huđ aŋatà à gay.” ¹⁶ Yesu awùlla atà ala: “Akəsa vok kà atà aŋa madiy aŋatà aw, akul la gəl aŋkul, vaw à atà tatak may.” ¹⁷ Ama tagòdal: “La abanay kà kaf gay bərsəw zlo la kilfi səla pəra aga anu la ahàl.” ¹⁸ Yesu agòđ à atà: “Sàwgəla à waŋ à abanay dadəŋ.” ¹⁹ Yesu agòđ à maham à ahəŋ dza: “Dzàw madzay la kəsaf la afik!” ŋgaha masla ahəl kaf gay bərsəw zlo la kilfi səla uwatà, anəŋà à zagəla, “Kikay”, agòđ à Zəzagəla. Atsəkà kaf ala, avà à azlaməna matapla la slaka aŋha, ŋgaha azlaməna matapla uwaga tavàh à maham à ahəŋ dza uwatà bay. ²⁰ Kiya uwaga kəla uwabeyuwi azùw, kəla aŋa may aŋha. Azlaməna matapla tahamà à gay à matəm à atà à ahàl gə à vok, takosà kulo gəl aŋha səla à uwana atəmal à atà à ahàl la kaf zlo la kilfi səla uwaga la abà. ²¹ Matugway aŋa azlazil uwana tazùw kaf kà, aslay dəbow zlo kokudà matugw azlamis la azlabəza.

Yesu aday la gəl dərəv

(Mark 6.45-52; Yuhana 6.15-21)

²² Kiya uwaga Yesu agòđ à azlaməna matapla la slaka aŋha kà: “Dàw à kəslah iyaw à afik, katsəvokaw à gay dərəv à uda anik kà gi, gi kà: ‘Mada aŋulo zlà’, gəgòđ à maham à ahəŋ dza.” ²³ Uwana tavàh vok ala, ahàd à gudəŋ anik à afik kokudà gəl aŋha kà madəv kudà. Vəđ abəzal à gəl la abatà. ²⁴ Kəslah iyaw babay kà adaday kà kərkər. Afad atərəbà atà, kà uwana tagolà à huma à gay. ²⁵ Zwek la huma la gay la matuway gotsak teraŋa, Yesu adà à awtày à slaka azlaməna matapla aŋha la maday lakəl iyaw. ²⁶ Ama mok uwana tanəŋəŋ aday la gəl iyaw kà, tasəkùläh à tsəh ala kà guba, “Uwaga kà tatak mavavat dza”, tagòđ, ŋgaha tadzəkà mawiyay guba. ²⁷ Ama katskats Yesu abadatàmà: “Karuwaw vok à ahəŋ aw, gi ŋwà, guba akəs akul aw!”, agòđ à atà. ²⁸ Piyer abadəlmà, agòdal: “Sufəl, baŋa kak dziri kà: ‘Sà à waŋ’, gòđ à gi, gəda à awtày la gəl iyaw!” ²⁹ “Sà à waŋ”, Yesu agòdal. Piyer asà à ahəŋ la kəslah iyaw la afik, adzəkà maday la gəl iyaw kà mad à slaka Yesu. ³⁰ Ama uwana anəŋəŋ afad adzəkà madəfəy kà, adzəkà masəkulay la mad à iyaw à abà, adzəkà mawiyay: “Sufəl, bəlla gi!” ³¹ Katskats Yesu abiyà ahàl ala, akəs la ahàl, ŋgaha agòdal: “Kayyà, madiŋal gəl à vok aŋak kà à tsəh ala, kà mana kadzurkway la ləv aŋak la tsəh ma?” ³² Tadà à kəslah iyaw à afik atà səla, ŋgaha afad adəđ aya aw, adzà à ahəŋ titi. ³³ Kiya uwaga azlaməna matapla uwana la kəslah iyaw la afik takədèđ à ahəŋ la huma aŋa Yesu, tagòdal: “Ndzer, kak Kona aŋa Zəzagəla.”

Yesu awar azlaməna dʒuvats ala la kutso Genesaret

(Mark 6.53-56)

³⁴ Mok uwana tadà à uda la dərəv la abà kà, tabəz à makoray aŋa Genesaret à abà. ³⁵ Bokuba uwana azladza la gudəŋ uwatà tasəl Yesu kà, tazàhà gay aŋa mas à waŋ aŋha la huđ gudəŋ gesina, ŋgaha tahamàhla azlaməna dʒuvats à waŋ gesina. ³⁶ Tadəv kudà à Yesu kà azlaməna dʒuvats tabəz tetəvi kà madəbani amiyaka gay

aŋa lukut aŋha përa, ŋgaha dza gesina uwana adəbani kà awur ala la dɔvats aŋha la abà.

15

Matapla uwana asa à waŋ la slaka azlababa madzidziga (Mark 7.1-13)

¹ Azla Farisəya la azlaməna matapla mapəhay aŋa Zəzagəla tasà à waŋ la Uru-salima, tasà à slaka Yesu la magoɔal: ² “Kà mana azlaməna matapla la slaka aŋak kà takəs mapəhay aŋa azlababa madzidziga aw ma? Kà mana tapalàh ahàl bokuba uwana matapla gami apəhay kà mazuw tatak may aw ma?” ³ Yesu awùlla atà ala, agoɔf à atà: “Akul ma, kà mana kakəsaw mapəhay aŋa Zəzagəla aw, kanəfaw kà matapla aŋa gəl aŋkul ma? ⁴ Tekedik kà Zəzagəla agoɔf kà:

'Zləbà baba aŋak la iyà aŋak'

ŋgaha

'Dza uwana apəh mawisiga lakəl aŋa baba aŋha baŋaw aŋa iyà aŋha kà azlayla mamətsay.'[☆]

⁵ Ama akul kà kagoɔfaw kà: 'Baŋa dza agoɔf à baba aŋha baŋaw à iyà aŋha: Humà tatak gulo, uwana gəɔfàhla sləray kà, annaka gəslala vok aŋa mav à ka mazlak ka, uwaga kà tatak maf à ahəŋ gə kà aŋa Zəzagəla.' ⁶ Kiya uwaga kà, dza uwaga anəkudà kà mazlakay baba aŋha baŋaw iyà aŋha aya aw. Kiya uwaga à uwana kakəlaw mapəhay aŋa Zəzagəla ala, kà akul aŋa manəf matapla aŋa gəl aŋkul. ⁷ Akul azlaməna magolla dza, azlawla Yesayya masla mapəhal gay à ahàl apəh lakəl aŋkul, agoɔf:

⁸ 'Azladza uwanay kà tazləb gi la paŋaw deyday përa.

Ama ləv aŋatà kà kərkər la gi.

⁹ Makədedf à ahəŋ uwana azladza uwanay takədedf à gi à ahəŋ kà deyday,

Kà uwana atà tapàhla ala kà masəlay aŋa gəl aŋatà, uwana mapəhay aŋa dza përa.'[☆]

Uwana adəh àlèh à dza à vok (Mark 7.14-23)

¹⁰ La lig la ahəŋ Yesu azàl à maham à ahəŋ dza agoɔf à atà: “Tsənàwwàŋ, fəwwal sləm lela: ¹¹ Tatak mazuway uwana ada à gay à awtày, la uwana adəh àlèh à dza aw, ama uwana atsa à waŋ la gay la awtày, la uwana adəh àlèh à dza.”

¹² Azlaməna matapla aŋa Yesu tazà à vok à slaka aŋha, tagoɔal: “Kasəl kà gay aŋak uwanay kà azin azla Farisəya à gəl kayak aw takay?” ¹³ Awùlla à atà la magoɔday: “Kela fofulo uwana Baba gulo uwana la zagəla la afik asləkà aw kà, adəgay mabəɔf à ahəŋ gə. ¹⁴ Sàkàw atà, atà azlaməna makas azlaguləf à ahàl. Ama baŋa akəs guləf anik à ahàl kà, atà səla nna tadəsokw à afək à abà.” ¹⁵ Piyer atsəval gay aŋha à gay, agoɔf: “Sànula à uda à gay la gay la abà uwaga!” ¹⁶ Yesu agoɔf à atà: “Akul babay kà kaslaw matsən uwanay aw takay? ¹⁷ Kasəlaw kà kəla tatak uwana ad à huɔf aŋa dza kà aguwa à uda la godega aw takay? ¹⁸ ŋgaha babay kəla tatak uwana aguwa la gay aŋa dza kà asà à uda kà la ləv la tsəh, uwaga la uwana adəh àlèh à dza à vok. ¹⁹ Kà uwana la ləv la tsəh la uwana madzugway mawisiga atsa à uda adàla dza à makəɔf dza à abà, à gəl gaw à abà, à mabila à abà, à limlim à abà, à gəl à abà, à fida à abà, ŋgaha à mapəh mawisiga lakəl aŋa azladza anik à abà babay. ²⁰ Uwaga la uwana adəh àlèh à dza à vok, ama mazuw tatak la kokudà mapal ahàl bokuba uwana manəbay aŋkul agoɔf kà, adəh àlèh à dza à vok aw.”

[☆] 15:4 15.4 2Musa 20.12; 21.17 [☆] 15:9 15.9 Yesayya 29.13

*Yesu atà la mis uwana asəl Zəzagəla aw
(Mark 7.24-30)*

²¹ Yesu atsizlla ala la abatà, ahàd à kutso uwana à abà nekwa la gudəŋ Tir la Sədon. ²² Mis Kananiya uwana adzà à ahəŋ la gudəŋ uwatà, asà à waŋ à slaka aŋha, adəval kudfa: “Məŋga, Kona aŋa David, vok aham à ka kà gi. Dugu gulo la zagəla zagəla lakəl məŋga, uwana atərəbəŋ kaykay.” ²³ Ama Yesu apakwà gay məslək aw. Kiya uwaga azlaməna matapla la slaka aŋha tasà à waŋ, tagòd à Yesu: “ ‘Dà aŋak’, gòd à mis uwaga, anəf anu la tsəh la gay.” ²⁴ Yesu awùlla à uda: “Gi kà gəga masləl gi à waŋ kà, kà aŋa azlatuwaŋ mazàhla gà Isərayel pəra.” ²⁵ Ama mis asà à waŋ, akədèd à ahəŋ la huma aŋha la magòfal: “Məŋga, kamkam zlək à gi.” ²⁶ Yesu awùlla à uda, agòfal: “Delga kà mazəb kaf aŋa azlabəza kà maməl à azlakəda à ahəŋ aw.” ²⁷ “Iyay nəma, Məŋga”, mis agòfal. “La kità babay kà, azlakəda kà tatsatsəm mapətsəh pətsəhga uwana atəd kà azlaməŋga à vəfah.” ²⁸ Kiya uwaga Yesu awulàlla, agòfal: “Hay, mis, madiŋal gəl à vok aŋak kà məŋga, tatak uwana kayahay kadàbəzal.” Nğaha dugu aŋha awür ala la kaslà uwatà.

Yesu awar azlaməna dıvats ala aŋuvaw

²⁹ Yesu adà aŋha la abatà, ahàd à gay dərəv aŋa Galili, à gudəŋ à afik, adzà madzay la abatà. ³⁰ Maham à ahəŋ dza aŋuvaw tasà à waŋ à slaka aŋha, tasàhla azlaməna dıvats à waŋ: Azladeri, azlaguləf, azlamakalàh gà, azlabada, nğaha azlatsəhay anik anik gesina babay. Tahamà atà à huma aŋa Yesu, nğaha awaràtəla. ³¹ Ləv avàläh à azladza à gay məŋga, kà uwana tanəŋà kà azlabada tavats gay, azlamakalàh gà tawàrla, azladeri tadəy, nğaha azlaguləf bay tanəŋla. Tadzəka mazləb Zəzagəla aŋa Isərayel.

*Yesu avà tatak may à zil dəbow ufad
(Mark 8.1-10)*

³² Yesu azəl azlaməna matapla la slaka aŋha nğaha agòd à atà: “Kay, vok aham à gi kà azladza uwanay, kà uwana mahənay makər atà la slaka gulo, nğaha tatak may adadàv kà atà à gay, asa à gi maduw atà à gəl la may gà aw, kà uwana may adàkad atà asik à gəl, tadətəd à ahəŋ la tetəvi la ama.” ³³ Azlaməna matapla la slaka aŋha tanəval à gay ala: “Lala məbəz tatak may məŋga kà aŋa azladza kat uwanay la kəsaf uwanay la abà la?” ³⁴ Yesu anəv à atà gay ala, agòd à atà: “Kaf gay bərsew nna aga à akul la ahəl ma?” Tagòfal: “Gay bərsew mədəf, la azlabəza kilfi ŋuv ŋuv.” ³⁵ “Kiya uwaga dzàhàw madzay”, agòd à maham à ahəŋ dza. Maham à ahəŋ dza tadzàhà à madzay. ³⁶ La lig la ahəŋ ahəl kaf mədəf la azlabəza kilfi uwatà, “Kikay”, agòd à Zəzagəla, akàlähəŋ ala, nğaha avà à azlaməna matapla la slaka aŋha, kà atà aŋa mavàh à maham à ahəŋ dza. ³⁷ Kəla uwabeyuwi aŋatà azùw kəla may aŋha. Matam à atà à ahəl gà kà, azlaməna matapla tahàmalla à gay à vok takosà mədəf aya. ³⁸ Azlaməna mazuw tatak uwaga kà zil dəbow ufad kokudfa matugw azlamis la azlabəza. ³⁹ Mok uwana “Dàw wurwur”, Yesu adagodıya à maham à ahəŋ dza kà, ahàd à kəslah iyaw à afik kà maday à kutso aŋa Magadan à abà.

16

*Azla Farisəya la azla Sadukiya tanav nadzipo
(Mark 8.11-13; Luka 12.54-56)*

¹ Azla Farisəya la azla Sadukiya tazà à vok à slaka Yesu, kà mavavarəŋ, tanəv à Yesu kà mapəhatəla la nadzipo la abà kà ndzəda aŋha kà atsa à ahəŋ kà la Zəzagəla. ² Ama Yesu awùlla atà ala: “La matəd à ahəŋ afats kagodaw kà: ‘Baŋa mələ, atəv à tsəh la matəd à ahəŋ afats kà, lebəŋ kà məl adàhədfay’, kagodaw. ³ Ama la gay bebəŋ gà kà kagodaw: ‘Iyaw adəsuyaw lakana, kà uwana zagəla atəv à tsəh’. Akul kà, kasəlaw

mavàh mèlo aña zagèla ala, ama kà mana kasèlaw mavàh masèlay aña zamana uwanay ala aw ma? ⁴ Azladza aña zamana uwanay kà azlamaksafèr, azlamabila la huma Zèzagèla aw, tanavay azlanadzipo, ama nadzipo la ahènj aw, say masèlay aña Yonas pèra”. La lig la ahènj asàk atà à ahènj, adà anha.

Tatak may avika à azlamèna matapla kà mazèb à ahàl
(Mark 8.14-21)

⁵ Mok uwana azlamèna matapla taguway la gay dèrèv à uda kà avikà à atà kà mazèb tatak may à ahàl. ⁶ Kiya uwaga Yesu agòd à atà kà: “Dahàw hanjëli, nènjàwla gèl ankul kà tatak mamèsl tatak ala aña azla Farisèya la azla Sadukiya.” ⁷ Azlamèna matapla tadzèka magòday kà atà kà atà: “Iyay, apèh kiya uwanay kà, kà uwana mèzèb tatak may à ahàl aw”, tagòd. ⁸ Yesu atsènà madzugway anjàt, agòd à atà: “Kà mana kavàtsàw gay la tsèh ala kà akul à akul ma? Kà uwana tatak may aga à akul la ahàl aw takay? Madijal gel à vok ankul kà à tsèh ala. ⁹ Tsèràh à lakana babay kà, katsènawwan aw takay? Dzùgwàw lakèl aña kaf gay bèrsew zlo uwana gètsàkàn aña kà aña azlazil dèbow zlo tsi. Kasèlaw ma takosà nna atèmal à tsèh ala ma? ¹⁰ Dzùgwàw lakèl aña kaf mèdèf uwana gètsàkàn aña kà aña azlazil dèbow ufa aya tsi. Ngaha ma takosà nna atèmal à tsèh ala babay aya ma? ¹¹ Kà mana katsènawwan kà gèpèh à akul kà lakèl aña tatak may aw ma? Nènjàwla gèl ankul kà tatak mamèsl tatak ala aña azla Farisèya la azla Sadukiya.” ¹² Kiya uwaga kà, azlamèna matapla tatsènàn kà apèh à atà kà lakèl aña manèjla vok kà tatak mamèsl tatak ala aw, ama kà mapàhla ala aña azla Farisèya la azla Sadukiya.

Piyer apèhla ala kà: Yesu kà Kristu
(Mark 8.27-30; Luka 9.18-21)

¹³ Yesu ahàd à kutso uwana à abà nekwa la Zèsare aña Filip, anèv azlamèna matapla la slaka anha la gay ala: “Mana azladza tapèhay lakèl aña Kona aña dza ma?” ¹⁴ Tawulàlla: “Azladza anik tagòd kà: ‘Kak Yuhana masla madàh batem’, azlaanik tagòd kà: ‘Kak Eliya’, ngaha azlaanik aya tagòd kà: ‘Kak Yèremiya, banaw masla mapèhal gay à ahàl anik’ ”, tagòd. ¹⁵ “Iyay zla, akul ma gi uwa kagòdaw tak uwa?”, Yesu agòd à atà. ¹⁶ Sèmon Piyer awùlla à uda agòdal: “Kak Kristu, Kona aña Zèzagèla uwana la sifa aña tsèràh à awtày.” ¹⁷ Kiya uwaga Yesu agòdal: “Kak la marabay, Sèmon kona aña Yuhana, kà uwana dza asik à uwana apèhakala dziriga uwaga aw, ama Baba gulo uwana la zagèla la afik la uwana apèhakala uwaga. ¹⁸ Ngaha gi, gègòd à ka: Kak Piyer, uwana asal magòday kà: Dzègla, ngaha la dzègla uwanay la afik la uwana gèdànjal maham à ahènj mèna gay Zèzagèla gulo, bà mamètsay bay kà, adàslal à vok aw. ¹⁹ Gèdàv à ka tsèkurèm aña makoray Zèzagèla à ahàl: Uwana kawadènj la vèfah adàgay mawadènjga la zagèla, uwana kapèlènj ala la vèfah adàgay mapèlènj ala gè la zagèla la afik babay.” ²⁰ La lig la ahènj Yesu afàh akur à azlamèna matapla à lig la slaka anha, kà atà aña mapèhay à dza anik kà masla Kristu aw.

Yesu apèh gay mamètsay anha à ahènj

la mawul à uda anha la mamètsay
(Mark 8.31-9.1; Luka 9.22-27)

²¹ Dagay la kaslà uwatà Yesu adzèkà matapla azlamèna matapla à slaka anha la dazwaya la magòday: “Azlayla kà vok kà, gèda à Urusalima, ngaha kà gi aña mas ngèrpa mènja la abatà la ahàl aña azlamasiga, la azlamadzahaga aña azlamèna mav tatak à Zèzagèla, ngaha aya la azlamèna mapàhla mapèhay ala. Tadàkèd gi, ngaha la mahènay mamakèr gèdàwul à uda la mamètsay.” ²² Kiya uwaga Piyer akès à fèta à awtày ngaha adàl à gèl, agòdal: “Zèzagèla anèjla ka Sufèl, uwaga adàbèz à ka aw!” ²³ Ama Yesu agolà vok, agòd à Piyer: “Zà à gi vok kèrkèr, kak seteni, kak masla

matsalla à gi matekwid la tetèvi gulo la ama, kà uwana madzugway anjak kà anja azladza vèdàh awkà uwana asà à Zəzagəla aw.”²⁴ Ngaha la lig anja uwaga la ahəŋ Yesu agòd à azlaməna matapla la slaka anja: “Baŋa dza asal manəf gi kà, asak à maf sləm à gəl anja, ngaha azəb ahəf mamətsay anja, ngaha anəf gi.”²⁵ Dza uwana asal matəf gəl anja, adàziŋ ala, ama dza uwana az gəl anja ala kà gi, adàbəl gəl anja.²⁶ Mana akəs vok à dza, uwana akor gudəŋ à vok gesina, ngaha masla adàz gəl ala la huma la gay bawbaw ma? Tatak la ahəŋ dza avəy kà masukwla sifa anja takay?²⁷ Kona anja dza adàsa à waŋ la mazləbay anja Baba anja la abà la azlamalika anja, ngaha adəpəlay à kəla dza la tsəhay madfehəŋ anja uwana adahàhəŋ.²⁸ Haday, gəpəh à akul la dziriga: Azladza anik la tataka ankul la abà la abanay kà, tadəmətsay dàŋ aw, say baŋa tanəŋ Kona anja dza atsa à waŋ la makoray anja.”

17

Mabədfa vok anja Yesu la gudəŋ la afik (Mark 9.2-13; Luka 9.28-36)

¹ Mahənay mukwa la lig anja la ahəŋ, Yesu azəb Piyer, Yakuba ngaha Yuhana, deda anja Yakuba, ngaha adàla atà à gəl gudəŋ kərkər gə à afik, kokudə gəl anjatà.² Abədfa vok la huma yewdi anjatà, huđ adi anja anərazlla atà à adi bokuba afats, ngaha lukut anja aùd təlla.³ Ngaha azlaməna matapla makər uwaga tanəŋà Musa atà la Eliya, tavəts gay la Yesu.⁴ Kiya uwaga Piyer agòd à Yesu: “Sufəl delga à uwana məga la abanay zla. Baŋa asa à ka gəts safsaf makər à abanay, tekula anjak, tekula anja Musa, tekula anja Eliya.”⁵ La mok uwana Piyer abadmə, habaga akəl atà, mələs magol magodugodu à adi tabadamma, la habaga uwatà la abà kà kuda atsən la magoday: “Uwanay kà bəzi gay ləv gulo, gərabay mənğa, mənğa kà masla. Tsəbàw sləm à masla lela.”⁶ Mok uwana azlaməna matapla tatsən kuda uwaga kà, guba akəs atà, takədéd à ahəŋ la huma anja Yesu.⁷ Yesu azà à vok à slaka anjatà, ngaha abək atà à ahəl à gəl: “Tsizləwla guba akəs akul aw”, agòd à atà.⁸ Tawəlla gel à afik, ama tanəŋà dza anik aw say Yesu kokudə gel anja pəra.

⁹ Mok uwana tatsəh à ahəŋ la gudəŋ la afik, Yesu afahà à atà akur à lig: “Kapəhaw à dza lakəl anja tatak uwana kanəŋəwwəŋ tsəràh à mok uwana Kona anja dza adəwul à uda la mamətsay aw.”

¹⁰ Ngaha kiya uwaga azlaməna matapla tanəv à Yesu: “Kà mana azlaməna mapəhla mapəhay ala tagod kà: ‘Eliya adàtsa à vok à waŋ ma?’”¹¹ Awəlla à atà ala: “La dziriga Eliya atsa à waŋ kà madəh tatak à ahəŋ la tetèvi anja.”¹² Ama gəgod à akul kà, Eliya kà adasa à waŋ dagay uwarə, ama azladza tasəl kà masla aw, tadəhələŋ à vok bokuba uwana asà à atà. Kiya uwaga babay tadəfehəŋ à Kona anja dza la gel anja.”

¹³ Kiya uwaga à uwana azlaməna matapla tatsənəŋ à uwana apəh à atà gay lakəl anja Yuhana masla madəh batem.

Yesu awur bəzi uwana ala la masasəfok mawisiga lakəl (Mark 9.14-29; Luka 9.37-43)

¹⁴ Mok uwana tabəzay à slaka uwana maham à ahəŋ dza la ahəŋ, dza anik azà à vok à slaka Yesu akədédal à huma,¹⁵ agòdal: “Mənğa, vok aham à ka, kà bəzi gulo uwana la dʻuvats tatagə akasay, atərəb à ahəŋ kaykay, ngaha babay atadəh à akəl à abà, à iyaw à abà aya babay.”¹⁶ Gəsəlla à azlaməna matapla la slaka anjak à waŋ, ama taslələ vok anja mawurəŋ ala aw.”¹⁷ Yesu agòd à atà: “Kayyà, akul azladza dzandzəŋga, ngaha mawisiga, dagay mbà mədədz à ahəŋ anina ma? Tsəràh mbà, gədəbasahakulaŋ ma? Lagwa səwgəla bəzi uwatà à abanay!”¹⁸ La abatà Yesu aslèh

✧ 17:5 17.5 1Musa 22.2; Mahabay 2.7; Yesayya 42.1

məl à masasəḏok mawisiga à gəl, ɲgaha masasəḏok mawisiga uwaga asà à uda la bəzi uwaga la abà, awùr ala la mok uwatà.

¹⁹ La lig la ahəɲ, azlaməna matapla la slaka aɲha tazà à vok à slaka aɲha, tanàval à gay ala: “Kà mana məslalla vok, kà masəlla masasəḏok mawisiga uwaga à uda aw ma?” ²⁰ Yesu agòḏf à atà: “Kà uwana madiɲal gəl à vok aɲkul asla aw! Haḏay, la dziriga: Agay madiɲal gel à vok aɲkul à gay la ahəɲ bà kat tsəhay hamadz kà, naka kaslawwalla vok aɲa magoḏf à dadəgwal uwanay: ‘Zà à vok la abanay!’, ɲgaha masla aslala vok aɲa maz à vok. Tatak la ahəɲ aḏəḏf à akul gay à ahəɲ aw. ((²¹ Ama say la madəv kudfa la makəs nələy la uwana, dza aslala vok aɲa masəla à tsəhay masasəḏok mawisiga uwanay à uda!))”

Yesu apəh gay mamətsay aɲha la mawul à uda aɲha kà masəla
(Mark 9.30-32; Luka 9.43-45)

²² Vuḏ tekula, mok uwana azlaməna matapla la slaka aɲha tagà la kutso Galili, Yesu agòḏf à atà: “Kona aɲa dza kà tadàvày à ahəl aɲa azladza. ²³ Tadəkəḏay, ama la mahənay mamakər adàwul à uda la mamətsay.” Azlaməna matapla tadzà à ahəɲ la mazaw la gel la abà məɲga, kà gay uwaga.

Mapəl hadama aɲa məɲ gày Zəzagəla

²⁴ Mok uwana Yesu la azlaməna matapla la slaka aɲha tabèz à Kapernahum, azlaməna mazəḅ hadama aɲa məɲ gày Zəzagəla tazà à vok à slaka Piyer, kà manaval à gay ala: “Piyer, məɲga aɲkul ma apəl hadama aɲa məɲ gày Zəzagəla aw takay?” ²⁵ “Iyay, apələy”, Piyer agòḏfal. Mok uwana Piyer adà à gày la kay, Yesu adzəkà gay teraɲa, agòḏfal: “Mana kadzugway ma Səmon? Azlauwana tapələy hadama baɲaw tapəl gəl à azlasufəl aɲa gudəɲ à vok uwanay uwà? Azlaməna gudəɲ takay awma azlaməlok dza takay?” ²⁶ “Azlaməlok dza”, Piyer agòḏfal. Yesu agòḏfal: “Tsa kiya uwaga kà, azlaməna gudəɲ tapələy aw. ²⁷ Ama kà mazin à atà à gəl aw kà, həḏ à dərəv à abà, ḏadùw kodzar aɲak à iyaw à abà, kilfi uwana kadàtsa à vok à makəsay kà, kadàpakw à gay aɲha kadàbəzal gursu la paɲaw aɲha la awtày kà, kadàhələy, ɲgaha kadàbək à atà kà aɲami anu səla.”

18

Uwa məɲga gày uwa?

(Mark 9.33-37; Luka 9.46-48)

¹ La kaslà uwatà azlaməna matapla tazà à vok à slaka Yesu ɲgaha tanàval: “Uwa, məɲga gày la makoray Zəzagəla uwa?” ² Yesu azàla bəzi ɲuv gày, atsizllatəɲ à huma à gay, ³ agòḏf à atà: “Gəpəh à akul la dziriga: Baɲa kapakaw bokuba bəzi ɲuv gày uwanay aw kà, kadàḏaw à makoray Zəzagəla aw. ⁴ Dza uwana tələmmaga bokuba bəzi uwanay kà, masla la uwana dza məɲga gày la makoray Zəzagəla. ⁵ ɲgaha: Dza uwana akəs bəzi ɲuv gày uwanay kà sləm gulo kà, akəs gi babay.”

Madukw mabəziga bəziga à tsakana à abà

(Mark 9.42-48; Luka 17.1-2)

⁶ “Dza uwana adukw mabəziga bəziga uwanay adiɲ gi gəl à vok, à tsakana à abà kà, ɲuləm kà aɲha kà tawadfal magol dzəgla à kuda, ɲgaha taduw à dərəv à abà. ⁷ Kayyà ɲgərpa kà aɲa gudəɲ à vok uwanay, kà uwana aga la azlatatak uwana adala dza à tsakana à abà. Dza aslala vok kà maḏəḏf gay à uwaga à ahəɲ aw, ama ɲgərpa agay la dza uwana abiy uwaga à waɲ.”

⁸ “Baɲa ahəl aɲak baɲaw asik aɲak la uwana adala ka à tsakana à abà kà, nàtsàh à tsəh ala, wùtsla kərəkər la kak, ɲuləm kahàḏ à sifa dziriga à abà la ahəl tekula baɲaw la asik tekula, à kà kak aɲa mad à gày akəl uwana à abà amatsila aw la azlaahəl aɲak

la azlaasik aṅak gesina aṅa koksikoksi. ⁹ Baṅa kà yewdi aṅak la uwana adala ka à tsakana à abà kà, b̀èd̄f̄ à adi ala, m̀èlla k̀èrk̀èr, ṅuləm kahàd̄ à sifa à abà ṅizliṅa ṅizliṅ la yewdi, kà kak aṅa mad̄ à g̀ay ak̀al uwana à abà amatsila aw aṅa koksikoksi la yewdi s̀èla nna.”

¹⁰ “Dah̀aw haṅk̀eli kà maṗəseway tekula aṅa azlabəza uwanay, kà uwana g̀əpəh̄ à akul à vok à abà kà, la zag̀èla kà azlamalika aṅat̀à tatsizl̄ à ah̀əṅ koksikoksi la huma aṅa Baba gulo, kà aṅat̀à.” ((¹¹ Kà uwana Kona aṅa dza asa à waṅ kà maỳah̄ maḃəl azlauwana tazahla.))

Gay la gay la abà aṅa tuwaṅ mazila g̀à ṅgaha la uwana tabəzal
(Luka 15.3-7)

¹² “Mana kadzugwaw à baṅa dza akor tuwaṅ dzim, ṅgaha tekula aṅat̀à azil̀à, as̀ak azladzik ladəga g̀əl aṅha ladəga g̀à uwanay la gudəṅ la afik, kà mad̄ maỳah̄ uwana azal̀à aw takay? ¹³ G̀əgod̄f̄ à akul baṅa adabəzal kà, arabay m̀əṅga kaykay à kà azladzik ladəga g̀əl aṅha ladəga uwanay taz̀ah̄ ala aw. ¹⁴ Kiya uwaga babay, Baba aṅkul uwana la zag̀èla la afik kà, asal amiyaka tekula la tataka azlabəza g̀à uwaga la abà azila aw.”

Maday la maham gay à vok la abà

¹⁵ “Baṅa deda aṅak adah̀à à ka tsakana à vok, h̀ad̄ à slaka aṅha, p̀èh̄ alla mawisiga aṅha, ama g̀aw kà akul s̀èla s̀èla p̀əra. Baṅa atsəḃ à ka sləm kà, kabəz deda aṅak aya. ¹⁶ Ama baṅa akwes kà matsəḃ à ka sləm kà, z̀al̄ à dza tekula à tsəh̄ baṅaw s̀èla, kà maṗəhay lak̀əl aṅa gay uwaga gesina, kà magay la sayda aṅa azladza s̀èla la afik baṅaw aṅa azladza mak̀ər bokuba uwana matsəḃeray apəhay. ¹⁷ Ama baṅa akweska matsəḃ à at̀à sləm kà, p̀èh̄ uwaga à azlaməna madiṅal g̀əl à vok gesina; ṅgaha baṅa atsəna à at̀à aw kà, p̀ak̀aw dza uwaga ala bokuba dza uwana as̀əl Zəzag̀èla aw, baṅaw kiya masla mazəḃ had̄ama.”

Makweska baṅaw makəsay

¹⁸ “La dziriga g̀əpəh̄ à akul uwana kawadawwaṅ la vəḃah, adàgay mawadəṅga la zag̀èla, uwana kapəlawwaṅ ala la vəḃah, adàgay maṗələṅ ala g̀à la zag̀èla la afik babay.”

Madəv kud̄a la maham gay à vok la abà

¹⁹ “Iyay, g̀əpəh̄ à akul babay aya kà, baṅa azladza s̀èla la tataka aṅkul la abà, tatsən vok gay kà manavay amiyaka b̀à mana beymi la madəv kud̄a la abà kà, Baba gulo uwana la zag̀èla la afik ad̀av̀à à at̀à. ²⁰ Kà uwana la slaka uwana azladza s̀èla baṅaw mak̀ər taham gay à vok la sləm gulo kà, gi la tataka aṅat̀à la abà”, Yesu ag̀od̄f̄.

Gay la gay la abà aṅa

magamza uwana akweska mamatsiṅ à dza anik ala

²¹ Kiya uwaga Piyer az̀à à vok à slaka Yesu, aǹav̀alla gay ala: “Sufəl, asik nna g̀əd̀amatsiṅ à deda gulo ala à baṅa as̀ak̀iỳà à madehgəṅ mawisiga à vok aw ma? Tsəràh̄ à asik m̀əd̄əḃf̄ ay?” ²² “Awaṅ”, Yesu ag̀od̄fal: “Asik m̀əd̄əḃf̄ g̀əgod̄f̄ à ka aw, ama tsəràh̄ à asik dzik m̀əd̄əḃf̄ asik m̀əd̄əḃf̄. ²³ Kiya uwaga à uwana m̀əgagazl̀əla makoray Zəzag̀èla la Sufəl anik uwana asal mas̀əl madz à ah̀əṅ aṅa tatak aṅha la slaka magamza aṅha. ²⁴ Mok uwana tadz̀ah̄ madzay kà matugway kà, tas̀alla dza uwana à waṅ anəfay la sili ləfu g̀à, azlamillion aṅuvaw la vok. ²⁵ Dza uwat̀à ag̀à la tatak kà maṗəlla sili uwat̀à aw. Məṅga aṅha ag̀od̄f̄: Məduw masla ala bokuba maỳà, ṅgaha maduw mis aṅha ala la azlabəza aṅha gesina, ṅgaha k̀èla tatak uwana akoray gesina, kà maṗəlla goder uwana la vok gesina. ²⁶ Magamza uwaga akəḃəd̄f̄ à ah̀əṅ la huma aṅa m̀əṅga aṅha: ‘Kamkam, b̀as̀əgəṅ, g̀əd̀apəla à ka gesina’, ag̀od̄fal. ²⁷ Kiya

uwaga vok aham à mənğa aŋha: Asàkalla goder aŋha uwaga la vok gesina, adùwal gəl, adà aŋha.”

²⁸ “Magamza maduwal gəl gà uwaga, asà à uda anəŋà dza uwana tadfahàhà sləray atà səla, uwana goder aŋha la vok aŋa sili akur akurga dzim. Uwana adanəŋəŋ kà, akəs la kuda agòfal: ‘Pəl à gi goder gulo uwana aga à ka la vok.’ ²⁹ ‘Kamkam, kamkam’, manalay aŋha akədfəfal à ahəŋ la magòfal: ‘Bàsəgəŋ, gədàpəla à ka goder aŋak gesina’, agòfal. ³⁰ Ama akəs aw, adùw à daŋay tsərəh à uwana apəl goder aŋha dàŋ. ³¹ Mok uwana azlamagamza anik tanəŋà uwaga apakà vok, tapàkàh ləv mənğa kà uwaga, ŋgaha tahàd, tapəh uwaga à mənğa aŋatà. ³² Kiya uwaga mənğa aŋatà azàla magamza uwaga. ‘Kak magamza makəsafər gà, gi gəsàk à ka ala goder gulo uwana agà à ka la vok gesina, kà uwana kadəv à gi kuda aw takay? ³³ Naka vok aham à ka kà manalay aŋak suwaŋ, bokuba uwana vok ahamà à gi kà kak aw takay?’ ³⁴ Mənğa uwaga apak ləv mənğa lakəl aŋha, adùw magamza uwaga à daŋay tsərəh à uwana apəlal goder aŋha gesina suwaŋ.” ³⁵ Kiya uwaga Yesu azàlànŋ à gəl: “Baba gulo uwana la zagəla la afik adəfahakulaŋ kiya uwaga babay, à baŋa tekula aŋkul amatsəŋ à deda aŋha ala la ləv aŋha gesina aw zla!”

19

Yesu apahla gay lakəl aŋa makudək mis ala (Mark 10.1-12)

¹ Mok uwana Yesu adakədf gəl à gay uwaga, asà à uda la Galili kà mad à makoray aŋa Yahudiya uwana à abà la gay dərəv uda anik aŋa mukwà Urdun. ² Maham à ahəŋ dza aŋuvaw tanəfà, ŋgaha awarà azlaməna dʻuvats aŋatà ala gesina.

³ Azla Farisəya anik tazà à vok à slaka Yesu kà matap masla, tanəval: “Hadfay, ma mapəhay gami avà tetəvi à dza kà makudək mis la kəla gay uwala beyli takay?” ⁴ Yesu awùlla à uda, agòd: “Kadzəŋəw uwana matsetseray apəhay aw takay? La madzəka Zəzagəla aŋəl zil atà la mis. ⁵ Kà uwaga à uwana zil adəsak à baba aŋha à ahəŋ, ŋgaha à iyà aŋha à ahəŋ kà madz à ahəŋ atà la mis aŋha, atà səla nna tadəgay vok tekula pəra. ⁶ Kiya uwaga kà, atà səla aya aw, atà tekula pəra, kità kà, dza avəh tatak uwana ala Zəzagəla adahamalla à atà ala gay à vok aw.” ⁷ Azla Farisəya tanəv: “Kà mana zla ma Musa agòd kà, zil av wakità mavəh vok ala à ahəl aŋa mis kà atà aŋa mavəhla, agòd zla ma?” ⁸ Yesu awùlla à uda: “Musa avà à akul tetəvi kà, kà uwana akul azladzaŋdzaŋ. Awkà dagay la madzəka kà, agà kiya uwanay aw. ⁹ Gəpəh à akul la dziriga: Baŋa dza akudək mis aŋha, tsa la mazaḅ zil la tsəh aw kà, masla kà adàda à gəl gaw, à baŋa azəḅ mis anik.”

¹⁰ Azlaməna matapla la slaka aŋha tagòfal: “Iyay, baŋa gay aŋa zil atà la mis adagay kiya uwanay kà, ŋuləm mazəḅ mis aw pəra.” ¹¹ Yesu awùlla à atà ala: “Azladza gesina taslala vok aŋa makəs mapəhay uwanay aw, say azlauwana Zəzagəla avà à atà maslay pəra. ¹² Tatak anik anik la ahəŋ à uwana adədf gay à dza à ahəŋ, kà mazəḅ mis dagay la mayyay. Azladza anik kà azladza la uwana tadəhatəŋ à vok, tadadəslàh atà, kà aŋa azladza anik babay kà tapak kiya uwanay kà makoray Zəzagəla. Dza uwana asla kà makəsay matapla uwanay kà, akəs!”

Azladza tasəhla azlabəza à slaka Yesu (Mark 10.13-16; Luka 18.15-17)

¹³ Azladza tasəhla azlabəza à slaka Yesu kà masla aŋa mabak à atà ahəl à gəl, ŋgaha kà madəv kudə lakəl aŋatà. Ama azlaməna matapla la slaka Yesu tavərə atà gay. ¹⁴ Yesu agòd à atà: “Sàkàw azlabəza ŋuv ŋuvga tasa à waŋ à slaka gulo, kavəraw atà gay aw, kà uwana makoray Zəzagəla kà aŋa azlatsəhay gà uwaga”, agòd à atà. ¹⁵ Masla abək à atà ahəl à gəl ŋgaha adà aŋha la abatà.

Bèzi kohana galepi gà
(*Mark 10.17-31; Luka 18.18-30*)

¹⁶ Dza anik azà à vok à slaka Yesu, anàv: “Məŋga, mana à delga gədehəŋ, kà gi aŋa maβəz sifa adəv à gay aw ma?” ¹⁷ Yesu agòdɔl: “Kà mana kanàv à gi lakəl aŋa delga ma? Dza tekula pəra, delga. Baŋa asa à ka, kà maβəz sifa adəv à gay aw kà, say kakəs mapəhay gesina.” ¹⁸ “Tsəhay gà uwala?”, agòd à Yesu. Yesu agòdɔl: “Kakəf dza aw, kada à gəl gaw aw, kad à gəl aw, kapəh mawisiga lakəl aŋa dza aw, ¹⁹ sləkàw baba aŋak la iyà aŋak, wòyà masla magay aŋak bokuba uwana kawoya gəl aŋak.”^{*} ²⁰ Bèzi kohana agòdɔl: “Uwaga kà, dagay la bèziga la uwana gəkəs uwaga gesina. Mana gà à uwana gədehəŋ aya ma?” ²¹ Yesu agòdɔl: “Baŋa asa à ka aŋa magay sətaka kà, hād, dāw tatak uwana ala kakoray gesina, ŋgaha vāh sili gà à azlaməna kudfa, kiya uwaga kadàβəz ləmana la zagəla, ŋgaha sà à waŋ kanəf gi!” ²² Ama mok uwana bèzi kohana atsənà gay uwaga kà, adà aŋha la mazaw la gəl gà, kà uwana galepi gà kaykay.

²³ Kiya uwaga Yesu agòd à azlaməna matapla la slaka aŋha: “Gəpəh à akul la dziriga, zlazladfa kà aŋa galepi kà mad à makoray Zəzagəla. ²⁴ Ŋgaha gəpəh à akul uwanay aya: Nuləm zlugumi aguw à uda la afək lepiri, à kà galepi aŋa mad à makoray Zəzagəla.” ²⁵ Mok uwana azlaməna matapla la slaka aŋha tatsən gay uwaga kà, ləv avàlāh atà à gay kaykay la magòday: “Tsa kiya uwanay zlà ma, uwa aslala vok aŋa maβəlay uwa?” ²⁶ Yesu anə̀rəz atà la magòd à atà: “Zlazladfa la slaka azladza, ama zlazladfa la slaka Zəzagəla aw.”

Masik aŋa masla asik aŋa Yesu
(*Mark 10.28-31; Luka 18.28-30*)

²⁷ Kiya uwaga Piyer agòdɔl: “Tsənàŋ, anu mədasa k à tatak à uwana ahəŋ məkòr gesina, ŋgaha kà manəf ka. Mana adəpaka vok kà aŋami ma?” ²⁸ Yesu agòd à atà: “Gəpəh à akul la dziriga kà: Mok uwana Kona aŋa dza adàdza madzay la kursi aŋa mazləbay aŋha la afik kà, akul kulo gəl aŋha səla uwana kanəfaw gi, akul babay kà, kadàdzaw madzay la kursi la afik, kà madhəh seriya à tsəhay kulo gəl aŋha səla aŋa Isərayel à gəl. ²⁹ Ŋgaha azlauwana gesina tasək azlagəy aŋatà à ahəŋ banaw azladedə aŋatà à ahəŋ, à azladedə aŋatà dəgam gà à ahəŋ, à azlababa aŋatà à ahəŋ, à azlaiyà aŋatà à ahəŋ, à azlabəza aŋatà à ahəŋ, à azlaalək aŋatà à ahəŋ kà gi, tadəβəzal aŋuvaw asik dzim aya, ŋgaha la huma aya sifa uwana adəv à gay aw. ³⁰ Ama aŋuvaw azlaməna huma lagonay, tadəgay azlaməna lig gà, ŋgaha aŋuvaw azlaməna lig gà lagonay, tadəgay azlaməna huma.”

20

Azlaməna sləray guf matavəruk

¹ “Aŋanay, gəgagazləla makoray Zəzagəla la dza uwana asà à uda la gay bebəŋ bəŋ, kà mahəl azlaməna sləray à guf aŋha à abà. ² Akəs kà mapəl à atà sili aŋa mavakay: Gursu tekula, ŋgaha asləl atà à guf à abà. ³ Asà à uda la zil gosila aya, anə̀ŋà azladza anik tatsàzl à ahəŋ la vadavaday la afik kokudfa sləray. ⁴ Agòd à atà: ‘Akul babay, dāw à guf gulo à abà, gədəpəl akul bokuba uwana akəs à vok’. ⁵ Ŋgaha tahād. Kona uwaga asà à uda la tataka afats, ŋgaha la afats dat magovagova gərewni delga aya, ŋgaha adahəŋ kiya uwana adahəŋ aya. ⁶ Ŋgaha asà à uda afats dfaβək agər à abà, abəz azladza anik à gəl uwana tatsàzl à ahəŋ la vadavaday la afik deyday aya. Anàv à atà à gay ala: ‘Kà mana kavakaw à abanay kokudfa madhəh sləray ma?’ ⁷ ‘Dza la ahəŋ ahəl anu aw’, tagòdɔl. Agòd à atà: ‘Akul bay, dāw à guf gulo à abà!’ ”

^{*} 19:19 19.19 2Musa 20.12-16; 5Musa 5.16-20

8 “Mok uwana mokokhu adasa à waŋ, dza aŋa guf agòd à kohana aŋha: ‘Zàl azlaməna sləray kà, pəl à atà sili aŋatà, dzəkà la azlaməna ligga, tsəràh à azlauwana tasà à waŋ gay bebəŋ’. 9 Azlauwana tadzəkà sləray la afats dəbək agər à abà tasà à waŋ, kəla uwabeyuwi aŋatà tabàz à gursu tekula tekula. 10 Mok uwana tazàl azlaməna mahəl atà teraŋa, tasà à waŋ, tadzùgw kà tadàbəzal kà aduwaŋ à azladza anik, tagòd. Ama kəla uwabeyuwi aŋatà tabàzà gursu tekula tekula pəra. 11 La mok uwana takasay kà takokòtəhà gəl lakəl aŋa dza aŋa guf. 12 Ngaha tagòd: ‘Azlaməna sləray uwana tadəhà sləray kà sa tekula pəra kà, kapəl atà kà kalkal la aŋami uwana məbàs may vok aŋa mavakay lis à marabak ala ma?’ 13 Ama dza aŋa guf awùlla à tekula aŋatà: ‘Slawda gulo, gəvavarà ka aw. ‘Aya’, kagòd, kà madəh sləray aŋa mavakay lakəl aŋa gursu tekula aw takay?’ 14 Kəs sili aŋak ŋgaha kà, dà aŋak. Asa à gi mav à dza uwana gəzəb la lig aŋak la ahəŋ bokuba aŋak suwaŋ. 15 Kagòd ma, gəslala vok aŋa madəhəŋ la sili gulo bokuba uwana asa à gi aw takay? A uwana kadəh à adi ma, kà uwana gədəhà delga takay?’ 16 Kiya uwanay azlauwana azlaməna ligga tadəgay azlaməna huma, ŋgaha azlaməna huma tadəgay azlaməna ligga”, Yesu agòd à atà.

Yesu awulla gay aŋa mamətsay aŋha à tsəh

la mawul à uda aŋha kà maməkər

(Mark 10.32-34; Luka 18.31-34)

17 Yesu adà à Urusalima à afik. Ahəl azlaməna matapla aŋha kulo gəl aŋha səla uwaga à fəta à awtəy, ŋgaha apəh à atà gay la asik lakəl: 18 “Tsənàwwəŋ, məda à Uru-salima lagwa, ŋgaha tadəv Kona aŋa dza à ahəl aŋa azlamadzahaga aŋa azlaməna makad tatak à Zəzagəla la ahəl aŋa azlaməna mapəhla mapəhay ala. Tadədukwa ala mamətsay à gəl. 19 Ngaha tadəvəy à ahəl aŋa azladza uwana azla Yahudiya aw, atà tadəkədasal, tadəzlabəy la kurpi ŋgaha tadətataslay à ahəl à adi. Ama la mahəŋay makər kà, adəwul à uda la mamətsay.”

Manavay aŋa iyà aŋa Yakuba la Yuhana

(Mark 10.35-45)

20 Kiya uwaga iyà aŋa azlabəza aŋa Zebede azà à vok à slaka Yesu la azlabəza aŋha, akədèd à huma aŋha kà manaval tatak. 21 “Mana asa à ka ma?”, Yesu agòdal. Agòd: “Và à gi tetəvi, kà azlabəza gulo səla uwanay kà, tadədzah madzay tekula la ahəl kaf aŋak ŋgaha anik la ahəl gudzay aŋak lakəl la makoray aŋak!” 22 “Kasəlaw tatak uwana kanavaw aw”, Yesu agòd, “Kaslawwalla vok kà mas tatak à uda la kətsaw ŋgərpa uwana la abà gədəsəy ay?” “Məslala vok”, tagòdal. 23 “Ndzər kadəsaw la kətsaw ŋgərpa gulo”, Yesu agòd à atà. “Ama la ahəl gulo kà magòfay lakəl aŋa madz madzay la slaka gulo, anik la ahəl kaf, anik la ahəl gudzay aw. Slaka uwatà kà, kà aŋa azlauwana Baba gulo adəhatəŋ à ahəŋ pəra.”

24 Uwana azlaməna matapla kulo anik uwanay tatsənà uwaga kà, taŋəŋuz lakəl aŋa azladedə səla uwanay. 25 Kiya uwaga Yesu azàla atà gesina, agòd: “Kasəlaw kà azlasufəl aŋa gudəŋ à vok tadəh gasa à azladza à gəl, ŋgaha azlaməŋga tapəh la ndzəda aŋatà ala. 26 Ama uwaga kà apaka vok kiya uwaga la tataka aŋkul la abà aw, baŋa tekula la tataka aŋkul asal magay məŋga kà, say agay masla mazəb dagum à azladza anik, 27 ŋgaha baŋa tekula la tataka aŋkul asal magay masla huma, say agay mayà aŋkul. 28 Amiyaka gi Kona aŋa dza kà, gəsà à waŋ kà azladza aŋa mazlək gi aw, ama gəsà à waŋ kà mazlək azladza, la mav sifa gulo bokuba tatak mapəlla gəl à ahəŋ aŋa azladza aŋuvaw.”

Yesu awar azlaguləf səla ala

(Mark 10.46-52; Luka 18.35-43)

²⁹ Mok uwana tasà à uda la gudəŋ Yeriko la abà, maham à ahəŋ dza aŋuvaw tanəfà Yesu. ³⁰ Azlaguləf səla la ahəŋ tadzàh madzay la gay tetəvi tatsənəŋ kà Yesu adà à awtəy la abatà, tadzəkà mawiyay: “Məŋga, Kona aŋa David, vok aham à ka kà anu!” ³¹ Maham à ahəŋ dza tasläh à atà məl à gəl la magoɗay: “Dzàw à ahəŋ titi!”, ama tazà kuda à zagəla la mawiyay aya kaykay: “Məŋga, Kona aŋa David, vok aham à ka kà anu!” ³² Yesu atsizilla à ahəŋ, azəl atà, ŋgaha anəv à atà gay ala: “Mana asa à akul, kà gəɗfahakulaŋ ma?” ³³ Tagòɗal: “Məŋga, kà yewdi gami aŋa manəŋla.” ³⁴ Vok ahamà à Yesu, adəbanì yewdi aŋatà; katskats azladza səla uwaga tanəŋ ala, ŋgaha tanəfà Yesu.

21

*Yesu ada à Urusalima à abà
(Mark 11.1-11; Luka 19.28-40; Yuhana 12.12-19)*

¹ Kiya uwaga mok uwana tazlèbèz kà Urusalima la gudəŋ Betfaze, la gudəŋ kuvu la afik, Yesu aslèl azlaməna matapla la slaka aŋha səla à huma à gay. ² Agòɗ à atà: “Dàw à gudəŋ uwatəy à abà la huma aŋkul, kadàbèzaw à ziwŋŋu à gəl mawadəŋ à ahəŋ gà la bəzi aŋha, pèlāw masla, ŋgaha sàwgəla à waŋ à abanay. ³ Baŋa dza apəh à akul gay ‘Kà mana mi kà’, gòɗàwwal kà, Sufəl awoyəŋ, ŋgaha tadəsak à akul aŋa masəlla à waŋ.”

⁴ Uwaga apakà vok kà aŋa magəɗ à afik aŋa gay aŋa masla mapəhal gay à ahəl aŋa mapəh à azladza uwana agòɗ:

⁵ ‘Gòɗaw à azlaməna madz à ahəŋ la Səyon kà:
Nəŋəŋ Sufəl aŋak atsa à waŋ à slaka aŋak
La masləkaway məŋga la ziwŋŋu la afik,
Ŋgaha la bəzi ziwŋŋu la afik.’✧

⁶ Azlaməna matapla tadəhəŋ bokuba uwana apəh à atà. ⁷ Tas1əlla ziwŋŋu à waŋ la bəzi aŋha, ŋgaha tadawal azladebdebi aŋatà à lig. La lig la ahəŋ Yesu adzà à afik. ⁸ Maham à ahəŋ dza aŋuvaw tadawal azladebdebi aŋatà à tetəvi à ama, ŋgaha azlaanik tasläh babasl aŋa azlaahəf, à tetəvi à ama kà mazləb masla. ⁹ Azladza uwana taguwà à huma aŋa Yesu tawiyà la marabay: “Mazləbay agay la Kona aŋa David, ŋgaha Zəzagəla apis gay à dza uwana à vok, atsa à waŋ la sləm aŋa Sufəl Zəzagəla. Mazləbay agay la Zəzagəla uwana kərkər la zagəla la afik!”✧

¹⁰ Mok uwana adabèz à Urusalima à abà, azladza gudəŋ uwaga gesina tavədzàh ala. Tanəv à vok: “Uwa à dza uwaga uwa?” ¹¹ “Masla mapəhal gay à ahəl Yesu, zil Nazaret, uwana la Galili”, maham à ahəŋ dza agòɗ.

*Yesu la məŋ gày Zəzagəla la aku
(Mark 11.15-19; Luka 19.45-48; Yuhana 2.13-22)*

¹² Uwana tabèz à Urusalima, Yesu ahəd à məŋ gày Zəzagəla à agu, ŋgaha akudəkàh azlaməna madaw tatak ala la azlaməna masukw tatak à lag la məŋ gày Zəzagəla uwatà la aku. Adakwà table aŋa azlaməna maɓad sili à ahəŋ, ŋgaha la azlakursi aŋa azlaməna madaw habakoku ala, ¹³ agòɗ à atà: “Tatsətsèr à wakità Zəzagəla à abà kà:

‘Gày gulo kà tazallala kà gày madəv kufa. Ama akul kà, kadapakawwaŋ ala kà katsakur aŋa azlaməna à gəl’.”✧

¹⁴ Kiya uwaga azlaguləf la azladeri tazà à vok à slaka aŋha la məŋ gày Zəzagəla la aku, ŋgaha awarà atà ala. ¹⁵ Azlamadzahaga aŋa azlaməna mav tatak à Zəzagəla, la azlaməna mapəhla mapəhay ala kà, gəl akəd atà à vok à mok uwana tanəŋà tatak uwana adəhəŋ kà, la mawiyay aŋa azlabəza uwana la məŋ gày Zəzagəla la aku:

*Gay la gay la abà aṇa azlaməna sləray guf makəsafər gà
(Mark 12.1-12; Luka 20.9-19)*

³³ “Tsəbàw sləm à gay la gay la abà anik. Zil gày anik la ahəṇ, atsəb guf matavərək, akəsəl zlagam à adi, ṅgaha alà afək, kà makudīts iyaw aṇa mayyay ahàf aṇha à abà, ṅgaha aṇəl gày mad à afik maday, kà aṇa masla manəṅla guf, asàkla guf uwatà à azlaməna sləray la ahəl. ṅgaha adà aṇha à mauguzahay kərkər.”³⁴ Mok uwana təla mahəṇay tatak adaslay, asləl azlamagamza aṇha à slaka azlaməna sləray guf kà mazəbəl humà mahəṇay aṇa tatak aṇha.³⁵ Ama azlaməna sləray takàs à atà, tazləb anik, takədf anik, tatsàh anik la akur.³⁶ Ama masla guf asləl azlamagamza anik aya, uwana atà dəṅ kà azlauwana uwarà, ama azlaməna sləray guf tadfàhà à atà à vok bokuba uwana tadfahəṇ azlamatera à vok.³⁷ La lig aṇa uwaga la ahəṇ, asləl bəzi aṇa huđ aṇha, agòdf kà: ‘Tadàsləkaw masla’.³⁸ Ama mok uwana azlaməna sləray guf tanəṅ bəzi aṇha, tagòdf kà atà kà atà: ‘Yewwa, masla la uwana adàgay dza aṇa tatak bawbaw. Məkədf masla, ṅgaha mədàbədfal à gəl!’³⁹ Takəs, tadùw à uda la guf la abà, takədf.”

⁴⁰ Yesu anàv: “Iyay zla, baṇa dza aṇa guf adàsa à waṇ, ma mana adədfəhəṇ la azlaməna sləray uwaga ma?”⁴¹ Tagòdfal: “Adàkad azlaməna sləray mawisiga uwaga à gay, ṅgaha adàvə guf à ahəl aṇa azlaməna sləray anik, uwana tadàvəhal mahəṇay aṇa tatak aṇha la mok uwana asəl.”⁴² “Iyay”, Yesu agòdf à atà: “Kadzəṅàw didi à uwana matsetseray apəhay aw takay?”

'Akur uwana azlaməna maṇəl gày taməl ala kà,

Masla la uwana adapak akur mawadf gày,

Kiya uwaga la uwana Sufəl adəfəhəṇ,

ṅgaha uwaga kà akəsa à vok kà aṇami kà manəṅ uwaga!”⁴³

⁴³ Kà uwaga Yesu azàlən à gəl: “Hadfay, la dziriga, gəpəh à akul, makoray Zəzagəla adàgay mazəbakullanə ala gà, kà mav à tsəhay anik uwana adàvə mayyay à mənṅa aṇha. ((⁴⁴ Kəla dza uwana atədf à akur uwanay à afik kà, adàkalahla. Ama baṇa akur la uwana atədf à dza à gəl kà aslərədfəṅ ala kədənna.))”⁴⁵

⁴⁵ Azlamadzahaga aṇa azlaməna mav tatak à Zəzagəla la azla Farisəya tatsənà gay la gay la abà uwaga kà Yesu kà apəhay kà lakəl aṇatà.⁴⁶ Kiya uwaga tayàh dabaray kà makəsay, ama guba akəs atà kà maham à ahəṇ dza, uwana tapakà Yesu ala kà masla mapəhal gay à ahəl kà mapəhla à azladza.

22

*Gay la gay la abà aṇa mən tatak may kà mazəb mis
(Luka 14.15-24)*

¹ Yesu apəhatàla la gay la gay la abà, agòdf à atà: ² “Aganay tatak uwana məgagazləla la makoray aṇa Zəzagəla: Sufəl anik atà magol tatak may kà mazəb mis aṇa bəzi aṇha. ³ Asləl azlamagamza aṇha kà mazalləh azladza uwana azàlləh atà kà aṇa tatak may uwaga, ama asà à atà mas à waṇ aw. ⁴ Asləl azlaanik aya, la mapəhay uwanay la ahəl: ‘Gòdfaw à azladza uwana gəzàlləh atà kà: Tatak may gulo kà adahəṇay adagay, azlakokur gulo, la azlatatak gulo magag seyga gədakadfay gesina, adahəṇay. Sàw à waṇ à tatak may mazəb mis à gəl!’ ⁵ Ama azlaməna mazala atà kà, tafəl sləm aw, tadfahəṇ à atà à azlaudəra aṇatà anik anik. Anik ahəd à guf aṇha à abà, anik bay à matsakalay aṇha. ⁶ Azlaanik takàs azlamagamza, tatərbəhà atà, ṅgaha takədf azlaanik. ⁷ Kiya uwaga Sufəl apək ləv mənṅa, asləl azlaslodzi aṇha kà makədf atà la mabəbəh gudəṅ aṇatà à gay la akəl. ⁸ ṅgaha agòdf à azlamagamza aṇha: ‘Tatak may aṇa mazəb mis kà adagay nekwa, ama azlaməna mazala atà gà kà tadəbəzal aw.’

⁹ Lagwa kà, dàw à azlabèza tetèvi à ama gesina, uguzàhàw, sàwla à wan̄ kèla dza uwana kabèzawwal à tatak may à gəl.' ¹⁰ Azlamagamza tahàd à azlabèza tetèvi à ama, ngaha tahamà gay azlauwana à vok tabèzal gesina, azlamawisiga, la azladelga ngaha kiya uwaga à uwana gày madèvaday ahènà ala la dza."

¹¹ "La lig la ahèj Sufèl asà à gày kà manèrèz azladza uwana tazallàh atà, ngaha anèj à dza uwana lukut mazèb mis la vok aw. ¹² Sufèl agòdàl: 'Slawda gulo, kakay kaslà kà mas à gày uwanay à agu, kokudà lukut mazèb mis la vok ma?' Ama dza uwaga aslala vok kà mabàdma aya aw. ¹³ Ngaha Sufèl agòd à azlamagamza an̄ha: 'Tsèrèkàw azlaahàl an̄ha la azlaasik an̄ha ngaha dùwàw à mèles à abà la uda, la abatà la uwana mawiyay la mapad̄ slid̄ la tsèh ala la ahèj, ¹⁴ kà à uwana azlamèna mazal atà gè an̄jvaw, ama azlamèna matsatsamani atà gè kà dèj aw'."

Mapèl hadama à mèn̄j sufèl
(Mark 12.13-17; Luka 20.20-26)

¹⁵ Azla Farisèya tahàd, takès sawaray kà atà an̄a masèlayla: "Kakay à uwana mèsalala vok an̄a mabèzal à tsèh la manavay mi?", tagòd. ¹⁶ Taslèl azlakohana an̄atà la azlaanik la tataka maham à ahèj matsèn vok gay an̄a Herod la abà, tahàd kà magòd à Yesu: "Mèn̄ga, mèsèl kà dziriga la uwana katapla à azladza an̄a madz à ahèj uwana asà à Zèzagèla, kurit yewdi agòd à ka, kà madèhèj an̄a azladza uwana tadzugway aw, kà uwana kadàh tatak la mahoy adi uwana dza adèhèj aw. ¹⁷ Lagwa kà: Pèh à anu uwana kadzugw lakèl an̄a uwanay zla: Mapèhay gami ma, avà à anu tetèvi kà mapèl hadama à mèn̄j sufèl an̄a azla Rom takay, awma kakay ma?" ¹⁸ Ama Yesu asèl madzugway mawisiga an̄atà, agòd à atà: "Azlamèna magolla dza, kà mana asa à akul an̄a mabèz gi à tsèh ma? ¹⁹ Pèhàw gi ala sili uwaga kapèlawla hadama tsi!" Tapèhalla akur sili. ²⁰ Ngaha Yesu anàv à atà: "Gəl la slèm uwanay ma an̄a uwa la sili uwanay la afik uwa?" ²¹ "An̄a mèn̄j sufèl", tagòdàl. Kiya uwaga Yesu agòd à atà: "Kità kà, pèlàw à mèn̄j sufèl Zèsar tatak uwana an̄ha, ngaha pèlàw à Zèzagèla uwana an̄ha suwan̄j!"

²² Mok uwana tatsèn mawulla à uda an̄a Yesu kiya uwaga, lèv avàlàh à atà à gay kaykay, tasàkal, tadà an̄atà.

Manavay lakèl an̄a mawul à uda la mamètsay
(Mark 12.18-27; Luka 20.27-40)

²³ La mavakay uwatà, azla Sadukiya, atà uwana mawul à uda la mamètsay la ahèj aw tagòd, tasà à wan̄ à slaka Yesu, kà manaval. ²⁴ Tanàval: "Mèn̄ga, à aganay uwana Musa apèh: Baña dza amèts an̄a mis ala kokudà mabèz bèzi kà, say deda an̄ha azèb à uda la gày kudà ngaha atsilla tsèhay an̄ha ala. ²⁵ Azladza la ahèj, atà mèdèf, la azladedà an̄atà la tataka gami la abà la abanay. Magolga azèb mis, amètsal à kèl ala kokudà mabèzal bèzi, ngaha asàkla mis kudà à deda an̄ha. ²⁶ Apakà vok kalkal la uwaga la deda masèla bay, ngaha kiya uwaga la mamakèr aya, ngaha kà mèdèf nna gesina apakà vok kiya uwaga. ²⁷ La lig an̄atà la ahèj gesina kà, mis amèts. ²⁸ La vud̄ uwana azlamèna mazimnekid̄ tadàwul à uda ma, atà mèdèf uwaga ma mis adàgay ma an̄a uwa? Kà uwana gesina an̄atà kà, tazàb?" ²⁹ Yesu agòd à atà: "Kazawla, haday zla, kà uwana kasèlaw b̄ amiyaka matsetserayga, b̄ amiyaka ndzèdà an̄a Zèzagèla aw. ³⁰ Kà uwana mok uwana azladza tadàwul à uda la mamètsay kà, mazèb vok adàgay la ahèj aya aw. Tadàdza à ahèj kà bokuba azlamalika uwana la zagèla. ³¹ Lakèl an̄a azlamazimnekid̄ uwana tadàwul à uda la mamètsay kà kadzen̄aw à uwana Zèzagèla apèh lakèl an̄ha aw ay? Agòd:

³² 'Gi Zèzagèla an̄a Abèraham, gi Zèzagèla an̄a Isak, gi Zèzagèla an̄a Yakuba'✠

Zəzagəla azələn gəl Zəzagəla kà aña azladza uwana la sifa, kà aña azlamazimnekiđ aw.”

³³ Maham à ahəŋ dza uwana tatsənà uwaga kà, ləv avələh à atà à gay mənğa kà matapla aŋha.

Mapəhay uwana aduwa azlaanik gesina

(Mark 12.28-34; Luka 10.25-28)

³⁴ Mok uwana azla Farisəya tatsənən Yesu adaməl gəl à azla Sadukiya à ahəŋ la gay kà, tahamà gay à vok. ³⁵ Nğaha tekula aŋatà uwana atapla mapəhay à azladza asəl kà makəsəl asik la tsəh ala, anəval à gay ala: ³⁶ “Mənğa, mapəhay gami ma uwala à uwana aduwa azlaanik gesina ala?” ³⁷ Yesu agòđal: “Wòyà Sufəl Zəzagəla aŋak la ləv aŋak gesina, la sifa aŋak gesina, la haŋkəli aŋak gesina, nğaha la masasəđok aŋak gesina bay. ³⁸ Uwaga la uwana mapəhay uwana aduwa azlaanik. ³⁹ Nğaha aganay masəla aŋha uwana tazlā à gay kalakal: Wòyà masla magay aŋak bokuba gəl aŋak. ⁴⁰ Mapəhay aŋa Musa la azlamatapla aŋa azlaməna mapəh à atà gay à ahəl gesina tapəh kà lakəl aŋa mapəhay səla uwaga.”

Kristu atà la David

(Mark 12.35-37; Luka 20.41-44)

⁴¹ Uwana azla Farisəya tahamà gay à vok kà, Yesu anavà à atà gay uwanay: ⁴² “Mana kadzugwaw lakəl aŋa Kristu ma? Aga ma mayyi à tsəh ala ma aŋa uwa?” “Mayyi à tsəh ala aŋa David!”, tagòđal. ⁴³ Yesu agòđ à atà: “Kakay zlà ma, David uwana masasəđok Zəzagəla aguwà la masla la abà, aslāla vok azəlal Sufəl ma? Kà uwana David agòđ:

⁴⁴ 'Sufəl Zəzagəla agòđ à Sufəl gulo:

Dzà madzay la ahəl kaf gulo lakəl,

Tsərəh à uwana gəbək à ka azlaməna məzam aŋak à tsəh asik.'*

⁴⁵ Iyay zla, baŋa David azəlal ala Sufəl gulo ma, kakay Kristu apək kona aŋha ma?”

⁴⁶ Dza la ahəŋ aslāla vok kà mawulla gay uwaga à uda amiyaka tekula aw, nğaha dagay la mavakay uwatà, dza aslāla vok kà manaval manavay aya aw.

23

Yesu agòđ: “Dahàw haŋkəli kà azla Farisəya la azlaməna mapahla mapəhay ala”

(Mark 12.38-39; Luka 11.43,46; 20.45-46)

¹ La lig la ahəŋ, Yesu agolà à huma à slaka maham à ahəŋ dza la azlaməna matapla la slaka aŋha ² agòđ à atà: “Azlaməna mapəhla mapəhay ala la azla Farisəya, sləray aŋatà kà mapəhla mapəhay aŋa Musa à azladza. ³ Kiya uwaga kà, kəsaw gay aŋatà, nğaha hənəw uwana ala tapəh à akul gesina, ama kadfahawwəŋ bokuba madəhəŋ aŋatà aw, kà uwana atà takəs uwana tatapla à azladza anik aw. ⁴ Tawəđəh tatak mahanayga kà mafəh à azladza anik à gəl, ama atà kà takəs aw, amiyaka bə gay gəl ahəl aŋatà babay kà tadəbəlani aw. ⁵ Ama tadəh sləray aŋatà gesina kà la huma yewdi aŋa azladza pəra. Tawəđəhla azlalaya à vok la azlagabaga bəzləh bəzləhga à vok, uwana matsetser à ahəl azlamapəhay anik anik aŋa wakità Zəzagəla à adi, nğaha la azlagwazazuv duksuffa la azlalukut aŋatà la gay. ⁶ Asa à atà kà azlaslaka teraŋa la azlagəy madəv kuđa la aku, la azlatatak may lakəl kà manəŋ à atà aŋa azladza. ⁷ Asa à atà bay kà azladza tadəhaha à atà ‘Ayyi’ la azlavadavaday la afik, la mazaləhatəla azlamənğa. ⁸ Ama akul kà, kayahaw mazalakulla azlamənğa aw, kà uwana akul gesina kà akul azladedə, nğaha mənğa aŋkul kà tekula ahəl pəra. ⁹ Kazalawla Baba à dza asik babay aw, kà uwana akul kà Baba aŋkul kà tekula à ahəl pəra, masla uwana la zagəla la afik. ¹⁰ Nğaha aya kayahaw mazalakulla sufəl babay

* 22:44 22.44 Mahabay 110.1

aw, kà uwana Sufəl ankul kà tekula à ahəl pəra, uwaga kà Kristu. ¹¹ Mazəb gəl gə ankul kà, agə kà bokuba masla mazəb à akul dogum. ¹² Dza uwana azigəŋ gəl kà tadawulla à vəfah, ŋgaha dza uwana awulla gəl à vəfah kà, tazigəŋəŋ.”

*Yesu asləh vok à azlaməna matapla mapəhay la azla Farisəya
(Mark 12.40; Luka 11.39-42,44,52; 20.47)*

¹³ “Ŋgərpa agay la akul, akul azlaməna matapla mapəhay, la akul azla Farisəya. Akul azlaməna magolla dza. Katsakaw à gamagəy anja makoray Zəzagəla à ama kà azladza. Tekedik kà, akul la gəl ankul kà asa à akul mad à gəy aw, azlauwana tayəh mad à gəy bay kavəw à atə tetəvi aw.”

((¹⁴ “Ŋgərpa agay la akul, akul azlaməna matapla mapəhay la akul azla Farisəya, akul azlaməna magolla dza. Kazawaw azlamis kufa à uda gesina, ŋgaha aya kavakaw à madəv kufa à abà kà mapəhla gəl ankul ala la huma azladza. Kà uwaga à uwana kadəbəzaw seriya uwana aduwa anja azladza anik.”))

¹⁵ “Ŋgərpa agay la akul, akul azlaməna matapla mapəhay la akul azla Farisəya, akul azlaməna magolla dza. Kauguzahaw dawali dawali gesina la gudəŋ la vok, amiyaka la kəslah iyaw babay, kà akul anja məbəz masla mapəh gay la ləv ala tekula. Ŋgaha baŋa kabəzəwəw aya kà, kapakəwəwəŋ ala kà bəzi anja gəy akəl dafuwa à gay akul asik səla.”

¹⁶ “Ŋgərpa agay la akul, akul azlaməna maguwəh azlaguləf à huma. Kagodəw kà: ‘Baŋa dza azuw mawadəy la mənə gəy Zəzagəla kà, uwaga kà deyday’, kagodəw. ‘Ama baŋa azuw mawadəy kà la luwəluwə uwana la gəy Zəzagəla la aku kà, mawadəy adənəfay’, kagodəw. ¹⁷ Akul azlakusəŋu, akul azlaguləf! Uwa la à uwana mənəga gə la? Luwəluwə ay awma mənə gəy Zəzagəla uwana masla la uwana agəŋ luwəluwə uwaga sətaka takay? ¹⁸ Kagodəw aya kà: ‘Baŋa dza azuw mawadəy la slaka makəd tatak kà, uwaga kà deyday’, kagodəw, ‘Ama dza uwana azuw mawadəy la tatak makədəyga uwana la afik kà, mawadəy adənəfay’, kagodəw. ¹⁹ Akul azlaguləf, uwa la à uwana mənəga gə la? Tatak makədəyga ay awma slaka makəd tatak uwana agəŋ tatak makədəyga sətaka takay? ²⁰ Kà uwaga kà, dza uwana azuw mawadəy la slaka makəd tatak kà azuw mawadəy la tatak makədəyga uwana la afik babay. ²¹ Dza uwana azuw mawadəy la mənə gəy Zəzagəla kà, azuw mawadəy la mənə gəy Zəzagəla ŋgaha la Zəzagəla uwana adz à ahəŋ la aku babay. ²² Dza uwana azuw mawadəy la zagəla kà, azuw mawadəy la kursi Sufəl anja zagəla, ŋgaha la masla uwana adz à ahəŋ la afik babay.”

²³ “Ŋgərpa agay la akul, akul azlaməna matapla mapəhay, ŋgaha la akul azla Farisəya, akul azlaməna magolla dza, kavəw makulo anja tatak ankul, baməraka la azlatsəhay aləl anik anik gesina, ama kapəsewaw uwana aduwa à vok la mapəhay la abà, bokuba madəhəŋ delga la tələmma, ŋgaha la madinjal gəl à vok. Uwaga la uwana akəsà à vok kà makəsəy la kokufa mapəsewaw azlaanik uwanay. ²⁴ Akul azlaməna maguwəh azlaguləf à huma, kazabaw slaslam à uda la tataka masay ankul la abà, ama zlugumi kà kadəguwa à gay.”

²⁵ “Ŋgərpa agay la akul, akul azlaməna matapla mapəhay, la akul azla Farisəya, akul azlaməna magolla dza, kapalaw lig anja kətsaw la azlakəsəlad ankul, ama la huđ ankul kà kahənawla la makəsəfər dzəbaŋŋa, ŋgaha la gəl la adi gesina. ²⁶ Kak zil Farisəya guləf gə, pəl huđ kətsaw dadəŋ, ŋgaha lig gə adəgay kuzekaka babay.”

²⁷ “Ŋgərpa agay la akul, akul azlaməna matapla mapəhay, la akul azla Farisəya, akul azlaməna magolla dza. Akul kà bokuba akul azlazəvay uwana tawodəŋla, ahəd la lig gə, ama la huđ gə kà, mahənlaga la azlatatak mazinga vanjvavəŋ. ²⁸ Akul babay kà la lig gə kà, kapəhawla vok ala kà kiya uwaga: ‘Anu azladza delga’, kagodəw, ama la huđ kà kahənawla la magolla dza ŋgaha la mawisiga”, Yesu agodəf à atə.

*Seriya uwana lakel anja azlamona magolla dza
(Luka 11.47-51)*

²⁹ Yesu ahàd à humà à gay la magoday: “Ngörpa agay la akul, akul azlamona matapla mapəhay, la akul azla Farisəya, akul azlamona magolla dza, kaŋalàhàw zəvay anja azlamona mapəh à atà gay à ahàl kà mapàhla à azladza ala kà lela. Kadàhàw azlatatak bədfà à azlazəvay anja azlauwana à vok tadzà à ahəŋ la dziriga la abà. ³⁰ ‘Aganay məgay la ahəŋ la zamana anja azlababa gami madzidziga kà naka mədfàh sləray anina kà makad azlamona mapəh à atà gay à ahàl kà mapəh à azladza aw’, kagodəw aya. ³¹ La gəl ankul kà, kasəlaw kà akul azlamayyi à tsəh ala anja azladza uwana takədfàh azlamona mapəh à atà gay à ahàl uwaga. ³² Kətà zlà kà, dàw à humà à gay kadəvawla sləray uwana à gay azlababa ankul tadzəkà madəhəŋ zla! ³³ Akul azlabəza matsapa: ‘Kakay mədətəf seriya anja gəy akàl la gay ala?’, kagodəw ma!”

Gay makədf gəl à ahəŋ

³⁴ Ngaha agòdf aya: “Kà uwaga katsənàwwəŋ lela, gədàsləl akul à azlamona mapəh à atà gay à ahàl à wəŋ, la azlamona haŋkəliga, ngaha la azlauwana tasəl mapəhay. Kadàkadaw azlaanik, azlaanik aya kà, kadàtataslaw atà à ahàf à adi, azlaanik kadàzlabahaw atà la kurpi la gəy madəv kuɖa la aku, ngaha aya kadənəfahaw la gudəŋ la gudəŋ kà makad atà. ³⁵ Kiya uwaga à uwana aniz anja azladza dziriga uwana takədfàhàh atà dadzəka à vok la Abel, dza dziriga uwana takədf, tsərəh à makad Zakari, kona anja Baraki uwana kakədfaw la tataka anja azlagəy tsidəŋaga à abà la slaka makad tatak. ³⁶ Hadəy, gəpəh à akul la dziriga kà, kà uwaga gesina adətədfay kà à gəl anja azladza anja zamana uwanay lakana.”

*Yesu atà la Urusalima
(Luka 13.34-35)*

³⁷ “Urusalima, Urusalima, kak la uwana kakədf azlamona mapəh à atà gay à ahàl uwana à gay, ngaha katsəh azlauwana Zəzagəla aslala kà atà à wəŋ la akur. Gəday vok kà məŋga, kà maham gay à vok anja azladza anjak la slaka gulo, bokuba gotsak uwana aham gay azlabəza anja à vok la tsəh gogozläh anja, ama kakəsaw aw. ³⁸ Ngaha zla, lagwa kà, gəy ankul adəgay nvağay. ³⁹ La kità gəpəh à akul kà: Dagay lakana kadənəŋaw gi aya tsərəh à uwana: ‘Məpis gay à vok à gay la dza uwana atsa à wəŋ la sləm anja Sufəl’,^{*} kadəgodəw”, Yesu agòdf.

24

*Gay lakel anja madəv à gay gudəŋ à vok
(Mark 13.1-3; Luka 21.5-6)*

¹ Kiya uwaga Yesu asà à lag la məŋ gəy Zəzagəla la aku. Uwana adiy anja kà, azlamona matapla la slaka anja tazà à vok à slaka anja kà mapəhalla maŋalay anja məŋ gəy Zəzagəla uwatà. ² Kiya uwaga Yesu awùlla à uda, agòdf à atà: “Kaŋəŋaw uwaga gesina takay? Hadəy gəpəh à akul la dziriga kà, amiyaka akur tekula babay kà adəgəɖal à gay aw, tadəkalah à ahəŋ gesina.”

Azlaŋgərpa uwana tadàtsa à vok à wəŋ

*kà madəv à gay gudəŋ à vok
(Mark 13.3-13; Luka 21.7-19)*

³ Yesu adzà madzay la gudəŋ kuvu la afik, la abatà azlamona matapla la slaka anja tazà à vok à slaka anja, tanàval à gay ala: “Pəhanula: Mbà uwaga adəpaka vok ma,

^{*} 23:39 23.39 Mahabay 118.26

masəlay ma uwala adəpəhanula kaslà mas à wanj anjak la makəf gəl à ahəj gudəj à vok la?”

⁴ Yesu awùlla à atà ala: “Dahàw hanjkəli kà anja mapapatakulla aw. ⁵ Kà uwana azladza anjvaw tadàsa à wanj la sləm gulo, ngaha: ‘Gi Kristu!’, tadəgoday, ngaha tadəvavarah azladza anjvaw à bada à abà. ⁶ Kadətsənaw azlamawiyay anja guvəl, ngaha azlagay lakəl anja guvəl. Guba adəkəs akul aw, uwaga kà, say leri apaka vok, ama uwaga kà makəf gəl à ahəj gudəj à vok dadəj aw. ⁷ Azladza tsəhay anik tadəp guvəl la azlatsəhay anik, ngaha makoray anik adəp guvəl la makoray anik, azlamay tadəgahay la ahəj, ngaha azlamaβəlakàh vok anja kutso tadəgahay la ahəj la azlaslaka anik anik. ⁸ Ama azlatatak uwaga gesina adəpaka vok kà bokuba madzəka mazay anja hudf bəzi.”

⁹ “Azladza tadəvəh akul à ahəl anja azladza anik kà matərəbàh akul, ngaha tadəkəf akul. Azlatsəhay gudəj à vok gesina tadəpəsew akul kà uwana kawoyaw gi. ¹⁰ La kaslà uwatà, azladza anjvaw tadəsak à madinjal gəl à vok la tsəh ala, ngaha tadətah à vok kaf à gəl, ngaha tadəzin vok à vok ala kà atà à àtə. ¹¹ Azlaməna mapəh à atə gay à ahəl fida gə tadəpahla vok ala la tataka ankul la abà, tadəvavarah azladza anik ankul anjvaw. ¹² Mawisiga la uwana adəsləh gəl à ahəj à kà delga, azladza gay mənğa tadəwadəfəh vok à uda la uwaga la abà à kà delga. ¹³ Ama dza uwana adəbasinj tsərəh à makəf gəl à ahəj la tetəvi anja Zəzagəla à ama kà, adəbəlay. ¹⁴ Gay marabəj anja makoray Zəzagəla adəgay mapəhayga la gudəj la vok gesina, kà mazin gə à azlatsəhay gudəj à vok gesina. Baņa adatsanay kiya uwaga kà, madəv à gay gudəj à vok adəzlanjalay.”

*Məzam anja dza uwana Zəzagəla afəl dzakwa à gəl
(Mark 13.14-23; Luka 21.20-24)*

¹⁵ “Mok uwana kadənəjəw masla məzam anja Kristu, uwana masla mapəhal gay à ahəl Daniyel apəh, à uwana atsizl à slaka tsikasla gə à abà kà, (kəla dza uwana adzəj uwaga kà, adəfaha hanjkəli lela!) ¹⁶ Kiya uwaga kà azlauwana la kutso Yahudiya kà, tadəhoy à gudəj à afik. ¹⁷ Dza uwana la gəl gəy babay, adəsa à ahəj kà mad ə gəy kà mahəl azlatatak uwana la hudf gəy anja aya aw. ¹⁸ Ngaha dza uwana la fəta, adəwul à mtəga kà mahəl dəbdəbi anja la mtəga anja aw. ¹⁹ Kay, ngərpa mənğa adəgay la azlamis uwana la bəza la hudf, ngaha la azlauwana bəza vərna aga la atə la ahəl la mavakay uwatà! ²⁰ Dəvəw kufə à Zəzagəla kà mavakay mawisiga uwaga anja matəf à təla anasl à abà banjaw à vuf maduw ləv à abà aw. ²¹ La kaslà uwatà kà, ngərpa mənğa adəgay la ahəj uwana adapakə vok dagay uwana Zəzagəla adəhə gudəj à vok tsərəh à lakana aw, uwana adəpaka vok bokuba uwaga aya diki diki aw. ²² Agayna Zəzagəla atətuwə mavakay uwaga aw kà, naka dza la ahəj abəlay aw, ama Zəzagəla atətuwə mavakay uwaga kà, kà azlaanja uwana atsatsəmənì atə.”

²³ “Baņa ‘Kristu kà à aganay, la abanay, à agatəy la abatəy’, tagof à akul kà, kakəsaw gay anjatə aw. ²⁴ Kà uwana azlakristu fidaga, la azlaməna mapəh à atə gay à ahəl fida gə tadəpahahla vok ala. Tadəkəf azlamagol nadzipo kà mavavarla azladza amiyaka bə azlauwana Zəzagəla atsatsəmənì atə. ²⁵ Tsəbəwwal sləm kà uwana gədapəh à akul à vok à abà.”

²⁶ “Kità kà, baņa: ‘A agatəy la kəsaf la abà, la abatəy’, tagof à akul kà, kadaw aw! Banjaw dza agof à akul: ‘Aganay adada à gəy à abà la abanay’, tagof à akul kà, kakəsaw gay anja aw. ²⁷ Bokuba habaga uwana awutsəf à uda la ləv zagəla la abà dagay la tsəh la ahəj tsərəh à gəl à agu kà, kiya uwaga à mas à wanj anja Kona anja dza babay. ²⁸ La slaka uwana tatak mamətsayga la ahəj la uwana azlakwatsamu tahəm gay à vok la abatə.”

Mas à waŋ aŋa Kona aŋa dza
(Mark 13.24-27; Luka 21.25-28)

²⁹ “La katskats la lig mapak vok aŋa ŋgərpa uwaga la ahəŋ kà, afats adàufay aya aw, tɛla bay adàv uƒaka aŋha aya aw, azlatsetsiliŋ tadàsokw à ahəŋ la zagəla, ŋgaha ndzɛƒa aŋa zagəla adàbəlaka vok. ³⁰ Ŋgaha masəlay aŋa Kona aŋa dza adàpəhla vok ala la zagəla la afik. Kiya uwaga azladza à vɛƒah gesina tadàtaway, tadànəŋ Kona aŋa dza atsa à ahəŋ la habaga la abà la ndzɛƒa mazləbaya mənŋa la zagəla. ³¹ Magol mapara mənŋa adàtsənay, ŋgaha tadànəŋ azlamalika la gay tər gudəŋ uƒaƒ aŋa kutso, tadàham gay azlauwana à vok atsatsàmàni atà la azlagay tər gudəŋ à vok uwaga.”

Uwana gudəv apəhla ala
(Mark 13.28-31; Luka 21.29-33)

³² “Tsənàw uwana gudəv apəhakulla: Mok uwana gudəv agagəray babasl aŋha aday kà, sèlàw kà madara kà nekwa. ³³ Kiya uwaga kà, baŋa kadànəŋaw uwaga gesina kà, sèlàw kà, kaslà mas à ahəŋ aŋa Sufəl kà adaslay. ³⁴ Haƒay, gəpəh à akul la dziriga kà: Kà azladza aŋa zamana uwanay tadàməts à gay dadəŋ gesina, kà mas à waŋ aŋa makoray Zəzagəla aw. ³⁵ Zagəla la kutso kà adàdəv à gay, ama gay gulo kà, adàdəv à gay aw!”

Zəzagəla kokudà gəl aŋha la uwana asəl madəv à gay gudəŋ à vok pəra
(Mark 13.32-37; Luka 17.26-27,34-36)

³⁶ “Dza la ahəŋ asəl kaslà la mavakay, baŋaw sa aŋa mapaka vok aŋa tatak uwaga aw, amiyaka azlamalika uwana la zagəla, amiyaka Kona aŋha babay aw, say Baba kokudà gəl aŋha pəra la uwana asəl. ³⁷ Tatak uwana apakà vok la zamana aŋa Nuhu kà, adàpaka vok kalkal la uwaga aya à mok uwana Kona aŋa dza adàsa à waŋ. ³⁸ La kità, à mok uwana mavakay aŋa iyaw, uwana azà dza ala, aləg à waŋ kà, azladza tazùw, tasàh tatak, tazàb mis, tadàh à zil tsəràh à mavakay uwana Nuhu adà à kəslah iyaw à abà. ³⁹ Tadzùgw tatak ƒikidiki tsəràh à uwana iyaw asà à waŋ, azàtala gesina aw. Kiya uwaga adàpakay la vuƒ mas à waŋ aŋa Kona aŋa dza babay. ⁴⁰ La kità, azladza sɛla tadəgay la fəta, tekula adəgay mazəbay gə, anik adəgay masakal gə. ⁴¹ Azlamis sɛla tadədzam vəl, tekula adəgay mazəbay gə, anik adəgay masakal gə. ⁴² Dzàw à ahəŋ la adi, kà uwana kasəl aw mavakay uwana Kona aŋa dza adàsa à waŋ aw. ⁴³ Tsəbàw sləm à uwanay lela: Aŋa zil gày asəl kaslà uwana masla à gəl atsa à waŋ kà mazləl gày aŋha la vɛƒ kà, adzəhal aw, ahən à ahəŋ la adi kà masla gəl aŋa mad à gày aŋha aw. ⁴⁴ Kà uwaga: Dahàw vok à ahəŋ, akul babay, kà uwana Kona aŋa dza adàsa à waŋ kà la kaslà uwana manəwəŋ aŋkul lakəl aw.”

Gay la gay la abà lakəl aŋa azlamagamza sɛla
(Luka 12.41-48)

⁴⁵ “Uwa à magamza dziriga uwana la haŋkəli gə uwa? Uwaga kà dza uwana mənŋa aŋha afà à gəl aŋa azlaməna sləray anik, kà masla aŋa mavàha à atà tatak may la sa uwana asà à atà. ⁴⁶ Marabay agay la magamza uwana mənŋa aŋha awul à waŋ, abəzal à gəl la sləray aŋha la abà. ⁴⁷ Haƒay, gəpəh à akul la dziriga: Zil gày adàv ləmana à magamza aŋha uwanay à ahəl gesina. ⁴⁸ Ama baŋa magamza uwaga mawisiga kà, agodəy la gəl aŋha kà: Mənŋa gulo kà adàsafay, ⁴⁹ adzəka mazləbàh azlamanalzay aŋa sləray, ŋgaha azuway la azlaməna guzu, ⁵⁰ kiya uwaga zil gày adàzlaŋalay la vuƒ uwana magamza uwaga la makuday la abà aya amiyaka aŋa sa tekula aw. ⁵¹ Zil gày adàdàhla seriya zlazlɛƒaga à gəl, ŋgaha adàvəl masik aŋha kà la tataka aŋa azlaməna magolla dza la abà, la abatà la uwana adātuway, la mapaf slid la tsəh ala tərrowawa”, Yesu agòƒ.

25

Gay la gay la abà lakèl aña azladəgam kulo

¹ “Kiya uwaga makoray Zəzagəla kà kalkal la gay aña azladəgam kulo uwana tasà à uda, tahèl fənəs aņatà, tahàd kà magagamay la masla mazəb mis. ² Azladəgam zlo la tataka aņatà la abà kà, azlakusoņu gà. Azlazlo anik uwanay kà, azlaməna masèl gəl gà. ³ Azlakusoņuga uwaga tahèl fənəs aņatà kokudfa matədfani amàl à koloba à agu kà madla la ahàl. ⁴ Ama azlamasèl gəl gà uwanay kà tadatədfani amàl à koloba à agu, tadàla la ahàl gesina la fənəs aņatà. ⁵ Hay, masla mazəb mis asàf kà mas à waņ, azladəgam kulo uwaga tadzehàl.”

⁶ “La tataka vədf mawiyay atsən: ‘Masla mazəb mis vok adazlanjalay, sàw à afik, mөгàgàm la masla zla!’ ⁷ Kiya uwaga azladəgam kulo uwaga tatsànla, ŋgaha tavàtsàhà fənəs aņatà. ⁸ Azlakusoņuga uwanay tagòdf à azlamasèl gəl gà uwanay: ‘Kamkam, dzèslàhàw à anu amàl aņkul, kà uwana fənəs gami adàmatsahla, sèlewkw sesèlewkw tsi!’ ⁹ Azlamasèl gəl gà tagòdf à atà: ‘Awaņ, adàsla anu aw, dàw à kanti à agu, kadàsukwaw!’ ¹⁰ Kiya uwaga azlakusoņuga uwaga tahàd kà masukw amàl la kanti, ama la sa uwaga masla mazəb mis asà à waņ, azladəgam zlo masèl gəl gà uwatà tadà à gày la slaka gà, à gày mazəb vok à agu, kà uwana tagà nekwa, ŋgaha tatsàk à gamagày à ama la tsəkurəm tərrezl. ¹¹ Zewk, la huma la gay, azladəgam anik uwanay tasà à waņ, tadzəkà mazalahay: ‘Məņga, pèzl à anu gamagày!’ ¹² Ama masla mazəb mis agòdf à atà: ‘Hadfay, gəgòdf à akul la dziriga: Tetuwa gəsəl akul aw!’”

¹³ Yesu azàlàn à gəl, agòdf à atà: “Dzàw à ahəņ la adi, kà uwana kasəlaw mavakay, amiyaka sa uwatà aw!”

Gay la gay la abà lakèl azlamagamza makər (Luka 19.11-27)

¹⁴ “Adagay kalkal la dza uwana ad à mauguzahay. Azàlành azlamagamza aņha, abək à atà à gəl aña tatak aņha gesina. ¹⁵ Anik aņatà avàl gursu dəbow, à anik aya gursu dadərmokw ufad, à mamakər gà avàl gursu dadərmokw səla. Avà à atà la kəla ndzədfa aña dza suwaņ, ŋgaha la lig la ahəņ adà aņha à mauguzahay. ¹⁶ Magamza uwana abəzà gursu dəbow, ahàd, atsàkàlla, ŋgaha abəzal riba aña gursu dəbow anik aya. ¹⁷ Masla aña mabəzal gursu dadərmokw ufad adahàņ kiya uwaga babay suwaņ, ŋgaha abəz riba aña gursu dadərmokw ufad anik aya. ¹⁸ Ama dza uwana abəzà gursu dadərmokw səla, ahàd, alà à afək à uda, ŋgaha ahàd à sili uwatà à agu məņga aņha avàl.”

¹⁹ “Uwana adasafay məņga kà, məņga aņatà awùl à waņ la mauguzahay, ŋgaha adzà madzay, kà matugway lakèl aña sili aņha. ²⁰ Magamza uwana abəzà gursu dəbow atsà à vok à waņ à slaka məņga aņha, apəhal gursu dəbow anik uwana ayyà à tsəh. ‘Məņga, kavà à gi kà gursu dəbow tekula, təga aw uwà ay? Nəņàņ tsi, aganay gursu dəbow uwaga ayyà à tsəh ala gursu dəbow anik aya.’ ²¹ Məņga aņha agòdfal: ‘Delga, kak magamza dziriga, kagà dziriga la azlabəza tatak deyday gà la abà, gədàfa à ka à gəl aña azlatatak uwana aga la ndzədfa, sà à waņ à marabay gulo à abà.’ ²² Magamza uwana abəzà gursu dadərmokw ufad, azà à vok à awtày babay, agòdf: ‘Məņga, kavà à gi gursu dadərmokw ufad aw uwà ay? Nəņàņ, aganay dadərmokw ufad anik uwana ayyà à tsəh.’ ²³ Məņga aņha agòdfal: ‘Delga, kak magamza dziriga, kagà dziriga la azlabəza tatak deydayga la abà, gədàfa à ka à gəl aña azlatatak məņga gà. Sà à waņ à marabay gulo à abà.’ ²⁴ La lig la ahəņ magamza uwana abəzà à gursu dadərmokw səla azà à vok à awtày, agòdf: ‘Məņga gulo, gəsəl kà kak dza dzaņdzanğa. La guf uwana la abà kasləkà tatak à abà babay aw kà, katsədfay, ŋgaha la guf uwana la abà kasləkà aw kà, kalay. ²⁵ Guba akəs à gi kà uwaga à uwana, gəhàd, gəlà sili aņak

uwaga à afək à agu. Nèhàh, aganay à tatak anjak!’ ²⁶ Məhga anha awulàlla: ‘Kak magamza mawisiga, ngaha masaga, kasəl kà gətsəfay ngaha gəlay la guf uwana la abà gəsləkà aw, kagod, ààà?! ²⁷ Kà mana kafà sili gulo à gày makal goder aw, naka mok uwana gədawul à wan kà naka gəday, gəhəl sili la iyaw la tsəh la abatà aw ma? ²⁸ Həlàwla gursu dadərmokw səla gə uwaga ala, ngaha bəkàw à dza anja gursu dəbow à vok. ²⁹ Kà uwana kəla dza uwana akoray kà, tadàvəlla à vok, ama dza uwana akoray aw kà, bə bəzi gə uwatà agà la ahəl kà, tadədəval à ahəl ala aya. ³⁰ Ama magamza mawisiga uwaga kà dūwàw à uda à mələs à abà, la abatà matuway la mapad slid adəpaka vok!’ ”

Seriya makəf gəl à ahəh

³¹ “Mok uwana Kona anja dza adàsa à ahəh mas Sufəl Sufəl, la azlamalika anha gesina kà, adàdza à kursi mazləbay anha à afik. ³² Azlatsəhay gudəh à vok gesina tadəham gay à vok la huma anha, ngaha adàvəh azladza ala, bokuba uwana masla manəhla azlatatak avəh azlatuwan ala la azlaawək. ³³ Adəbək azlatuwan à ahəl kaf anha à gəl, ngaha azlaawək à ahəl gudzay anha à gəl. ³⁴ Kiya uwaga Sufəl adəgoday à azlauwana la ahəl kaf anha lakəl: ‘Sàw à wan akul uwana Baba gulo adapis akul gay à vok, ngaha bəzàw à makoray uwana aga madəhakullan à ahəh gə dagay madzəka gudəh à vok. ³⁵ Kà uwana may azà à gi, kavàw à gi tatak may, nəlay akəs à gi, katədfaw gi iyaw gəsà, gəgà mələk gə, kakəsàw gi la ahəl səla. ³⁶ Gəgà la godega deyday, kadūwàw à gi lukut à vok, gəgà la dufats gə, kasàw à wan kà manəh gi à gəy la à gi sləm, gəgà la danay, kasàw wan kà manəh gi à gəy.’ ³⁷ Kiya uwaga azladza uwana azladziriga taulàlla: ‘Sufəl, mbà mənəhà ka la may gə, ngaha məvə à ka tatak may banaw la nəlay gə ngaha mətəf à ka iyaw masay ma? ³⁸ Mbà mənəhà ka kak mələk gə, ngaha məkəs kà la ahəl səla, banaw mənəhà ka la godega deyday ngaha məduwà à ka lukut à vok ma? ³⁹ Mbà mənəhà ka dufats azà ka, mbà la danay maslə mədà à awtəy kà manəhà ka à gəy la?’ ⁴⁰ Sufəl awulla à atà ala: ‘Hadəy, la dziriga gəpəh à akul: Uwana kadəhəhəwəh à tekula la tataka azlabəza uwanay la abà gesina kà, uwaga kà, kadəhəwəh kà gi!’ ”

⁴¹ “Ngaha la lig la ahəh Sufəl adəgodəf à azlauwana la ahəl gudzay anha: ‘Zàw gi à vok, akul uwana Zəzagəla adətsafla akul! Dəw à akəl uwana à abà adəmatə ala aw uwana madəhəh à ahəh gə, kà anja seteni la azlamalika anha gesina! ⁴² Kà uwana may azà à gi, kavàw à gi tatak may aw, nəlay akəs à gi, katədfaw à gi iyaw gəsà aw, ⁴³ gəgà mələk gə, ama kakəsàw gi aw, gəgà la dufats ngaha gəgà la danay kafaw gi sləm babay aw.’ ⁴⁴ Kiya uwaga taulàlla: ‘Sufəl, mbà mənəhà ka la may gə banaw la nəlay gə, banaw kəgə mələk gə, banaw la godega deyday, banaw la danay ngaha maslə məzlakə ka aw la?’ ⁴⁵ Sufəl awulla à atà ala: ‘Hadəy, gəpəh à akul la dziriga: Kəla tatak uwana kadəhəhəwəh à azlabəzaga uwanay gesina kiya uwaga aw kà, bə kadəhəhəwəh à gi babay aw.’ ⁴⁶ Kiya uwaga tadədala atà à seriya uwana à abà adədəv à gay aw. Ama azladza dziriga kà tadəbəz sifa uwana adəv à gay aw”, Yesu agòf zlà.

26

Azlaməhga takəs sawaray kà makəs Yesu (Mark 14.1-2; Luka 22.1-2; Yuhana 11.45-53)

¹ Hadəy, mok uwana Yesu adədəvəla gay anha à gay kà, agòf à azlaməna matapla la slaka anha: ² “Sələw kà madəvadəy uwana sləm anha Paska adəgay la ahəh la mahənay səla la abà, ngaha tadəv Kona anja dza à ahəl anja azladza kà matatasl à ahəf à adi.”

³ Kiya uwana azlamadzahaga aña azlaməna mav tatak à Zəzagəla, la azlamasiga aña azla Yahudiya tahamà gay à vok la mtəga aña Kayyif, mənə madzahaga aña azlaməna mav tatak à Zəzagəla. ⁴ Takəs matsən vok gay la gəl la gəl, kà makəs Yesu, ŋgaha kà makəday. ⁵ Tagod: “Məslala vok kà makəsay la madəvaday la abà aw, kà uwana maham à ahən dza adəvədzahla”, tagod.

Mis adzadzab aməl matərsin à Yesu à gəl

(Mark 14.3-9; Yuhana 12.1-8)

⁶ Mok uwana Yesu la Betaniya, la mtəga aña Səmon masla akəl zagəla uwatà kà, ⁷ mis anik asà à waŋ à slaka aña la dərəw aməl la ahəl mahənlaga la aməl matərsin zlazladəga. Adzadzab aməl matərsin uwatà à Yesu à gəl la mok uwana tazùw kaf. ⁸ Uwana azlaməna matapla la slaka aña tanənə uwaga kà, gəl akəd à atà à vok, tagod: “Kà mana awis tatak ala kiya uwanay ma? ⁹ Agayña avà à anu aməl matərsin uwaga tsakalay aña zlazladə: məduw ala, kà mav sili gə à azlaməna kuɗa, kà ŋuləm.” ¹⁰ Yesu kà asəl uwana tapəhay, agod à atà: “Kà mana katərebaw mis uwaga ma? Kà uwana adəhəgəŋ kà dzəba aña səla aw? ¹¹ Kà uwana azlaməna kuɗa tadəgay la ahən koksikoksi, ama gi kà mədəgay la ahən anina koksikoksi aw. ¹² Kà uwana aməl uwanay adzadzab à gi à vok kà, madəh aməl à mazimnekid uwana à vok kà mazəb à uda. ¹³ Haday, gəpəh à akul la dziriga: Kəla slaka, uwana dza adəpəh gay matsidəyga uwanay la gudəŋ la vok gesina kà, tadəpahay lakəl aña uwana mis uwanay adəhəŋ, kà mis uwanay aña mawul à atà à gəl.”

Yudas asal mav Yesu à ahəl aña azlaməna mav tatak à Zəzagəla

(Mark 14.10-11; Luka 22.3-6)

¹⁴ Mok uwana uwaga adada à lig kà, tekula la tataka azlaməna matapla kulo gəl aña səla uwaga la abà, uwana sləm aña Yudas Iskariyot, ahəd kà mabəz à azlamadzahaga aña azlaməna mav tatak à Zəzagəla à vok, ¹⁵ agod à atà: “Mana kadəvəw à gi, à baŋa gəfa à akul Yesu à ahəl ma?” Ngaha tatəgwəl gursu dzik makər à ahəl. ¹⁶ Dagay la mok uwatà Yudas ayəh tetəvi kà maf à atà Yesu à ahəl.

Yesu azuw tatak may aña Paska

la azlaməna matapla aña kulo gəl aña səla

(Mark 14.12-21; Luka 22.7-14; Yuhana 13.21-30)

¹⁷ La mavakay terəŋa aña madəvaday pain uwana kokudə tatak makəsliŋ, azlaməna matapla tasà à waŋ, tanəv à Yesu: “Lala asa à ka məday kà madəh tatak madəvaday Paska à ahən la?” ¹⁸ Kiya uwaga Yesu agod à atà: “Dəw à huɗ gudəŋ à abà à slaka dza uwahà: Məŋga agod à ka, ‘Kaslà gulo adaslay kà gi aña mazuw tatak may aña Paska la azlaməna matapla gulo la mtəga aña k’, agod, gəɗəwwal.” ¹⁹ Azlaməna matapla tahəd, tadəhə uwana Yesu apəh à atà à ahəl, ŋgaha tadəhə tatak may aña madəvaday Paska à ahən.

²⁰ Mok uwana mokokhu adasa à waŋ kà, Yesu adzà à tatak may à adi la azlaməna matapla la slaka aña kulo gəl aña səla uwatà. ²¹ Mok uwana tazùw tatak may, Yesu agod à atà: “Haday, gəpəh à akul la dziriga, tekula aŋkul adətə à gi kaf à gəl.” ²² Uwaga abək mazawla à gəl à azlaməna matapla məŋga, tadzəkə manavahal la tekula, tekula: “Sufəl, gi zlak uwà, gi zlak uwà?”, tagodə. ²³ Yesu awùlla à uda, agod à atà: “Dza uwana mədəb ahəl à kaf à gəl anu səla la kəsład la abà, la uwana adətə à gi kaf à gəl. ²⁴ Haday, Kona aña dza adəmətsay la tsəhay gə uwana matsetseray, apəhay la wakitə la abə lakəl aña, ama ŋgəpə adəgay la dza uwana adətə kaf à Kona aña dza à gəl! Agayña tayyay aw kà, naka ŋuləm kà aña.” ²⁵ Yudas masla matal kaf à gəl, uwaga agod la manavay: “Məŋga, gi la magay zlak uwà?” Yesu awulàlla, agodə: “Kak Yudas, kapəh!”

Tatak may tsikasla gà

(Mark 14.22-26; Luka 22.15-20; 1 Korintiya 11.23-25)

²⁶ La mok uwana tazùw tatak may, Yesu azèb kaf, “Kikay”, agòd à Zèzagèla, atsakàn ala, avà à azlamèna matapla la slaka anha la magodfay: “Uwanay kà vok gulo, zèbàw, kazùwwàw!” ²⁷ Ngaha azèb kètsaw mahènla gà la tatak masay gà, “Kikay”, agòd à Zèzagèla, avà à atà la magodfay: “Sàw uwaga gesina ankul, ²⁸ kà uwana uwaga kà aniz gulo, aniz makès vok slawda, uwana masokw à vèdàh gà, kà anja azladza anuvaw, kà mabèz mamatsila tsakana. ²⁹ Gèpèh à akul uwaga la dzahhà: Dagay lakana gèdàsay iyaw mayyay ahàf uwanay aw, tsèràh à uwana mèdàsay anina la makoray anja Baba gulo aya.” ³⁰ La lig anja mahab mahabay mazlèbay à gay, tadà anjàt à gudèj kuvu à afik.

Yesu atà la Piyer

(Mark 14.27-31; Luka 22.31-34; Yuhana 13.36-38)

³¹ Kiya uwaga Yesu agòd à azlamèna matapla la slaka anha: “La huf anja vèd uwanay lakana kà, kadàsakaw gi à ahèj gesina ankul, bokuba uwana mèdzenay la matsetseray la abà:

'Gèdàkèd masla manènla azlatuwan, ngaha maham à ahèj tuwan gesina adàslèh gèl à ahèj.'[☆]

³² Ama mok uwana gèdàwul à uda kà, gèdàtsèvokay kà akul à Galili.” ³³ Piyer agòdàl: “Amiyaka azladza anik gesina tasàk à kak à ahèj kà, gi kà, gèdàsak à ka à ahèj tetuwa aw!” ³⁴ Yesu awulàlla: “Hadfay, gèpèh à ka la dziriga: Bà la vèd uwanay kà, gurayna mewgdzagalan awiyay kà, kadàgodfay asik makèr, kà kasèl gi aw, kà uwaga Piyer.” ³⁵ Piyer agòdàl: “Dikidiki: Gèsèl kak aw, gèdàgodfay aw, amiyaka bà makits aga à gi la kuda bay!” Azlamèna matapla uwana la slaka anha tapèh bokuba anja Piyer uwaga babay.

Yesu adèw kufà la Getsemane

(Mark 14.32-42; Luka 22.39-46)

³⁶ Kiya uwaga Yesu abèz à slaka anik à abà uwana slèm anha Getsemane, ngaha agòd à azlamèna matapla anha: “Aga, gèday, gèdàdèw kufà la abatày kà, dzàhàw madzay la abanay.” ³⁷ Adàla Piyer, ngaha azlabèza anja Zebede sèla la tsèh, adzèkà maskulay la mazaw la gèl. ³⁸ Agòd à atà: “Lèw gulo adahènla la mazaw la gèl anja mamètsay, dzàw à ahèj la abanay, dzàw à ahèj la adi kiya gi.” ³⁹ Masla adàni kèrkèr zèwk, atsèj gèl à ahèj, ngaha adèw kufà la kiya uwanay: “Baba gulo, agayna uwanay abèz à vok kà naka, kazèbgèj kètsaw ngèrpa uwanay ala, amiyaka bà la uwaga babay kadahan bokuba uwana asa à ka, awkà bokuba uwana asa à gi aw!”

⁴⁰ La lig la ahèj awul à wan à slaka azlamèna anha makèr uwaga, abèz atà à gèl kà tadzèhal. Agòd à Piyer: “Kaslawwalla vok kà madz à ahèj la adi la gi, amiyaka sa tekula aw uwà? ⁴¹ Dzàw à ahèj la adi, dèvaw kufà kà akul anja matèd à mapapatay à abà aw. Masasèdòk anja dza asal manèfay nèma, ama vok kà gubgub.”

⁴² Azà à atà vok la vok ala kà masèla, ngaha adèw kufà kiya uwanay: “Baba gulo, banja akès à vok kà kètsaw uwanay azèb vok à uda kiya uwanay aw, sàk à gi kà gi anja mas à uda la abà, ngaha masal anjak apaka vok zla.”

⁴³ Masla awul à wan aya à slaka azlamèna matapla anha uwaga, abèz atà à gèl kà tadzèhàl aya, taslalla vok anja madz à ahèj la adi aw. ⁴⁴ Yesu azà à atà vok la vok ala aya kà mamakèr, adèw kufà la kiya uwana uwarà. ⁴⁵ La lig la ahèj, awul à wan à slaka anjàt, agòd à atà: “Kadzèwhal gotènan, kaduwaw lèw ankul pèra ay? Nèjàwwàn sa kà adaslay adagay, ngaha Kona anja dza adagay mavàyga à ahàl anja

☆ 26:31 26.31 Zakari 13.7

azlaməna tsakana. ⁴⁶ Sàw à afik, mēhàd! Dza uwana adata à gi kaf à gəl kà aganay la abanay!”

Makəs Yesu

(Mark 14.43-50; Luka 22.47-53; Yuhana 18.3-12)

⁴⁷ Ngaha bokuba uwana Yesu à lig la mabafma la abà, à mok uwana Yudas, tekula la tataka azlaməna matapla kulo gəl aṅha sèla la abà, asà à waṅ la maham à ahəṅ dza aṅuvaw la tsəh, katsakar la azlaazəva agà à atà la ahàl. Azlamadzahaga aṅa azlaməna mav tatak à Zəzagəla, la azlamasiga aṅa azla Yahudiya la uwana taslèl atà à waṅ. ⁴⁸ Yudas, uwana adata kaf à Yesu à gəl apèh à atà uwana à vok à abà, adàdehəṅ kà mapəhatàla Yesu: “Lagwa kà, dza uwana gədəkəs vok kà, masla gà la uwaga à uwana kayahaw, kadàvalahawka pəra”, agòd à atà. ⁴⁹ Yudas azà à vok à slaka Yesu la katskats: “Ayyi, məṅga gulo”, agòdal, la makəs à vok. ⁵⁰ Yesu agòdal: “Slawda, uwana kasà à waṅ kà madehəṅ kà, dʒahəṅ katskats!” Kiya uwaga azladza anik tasà à waṅ, tavàlàhàka Yesu, takəs. ⁵¹ Tekula uwana agà la Yesu abəd katsakar aṅha à uda, ngaha adədla magamza aṅa məṅ madzahaga, anàtsal sləm lakəl ala. ⁵² Yesu agòdal: “Kay, wùlla katsakar aṅak à gày aṅha à agu, kà uwana azladza uwana tahəl katsakar kà, tadàkad atà la katsakar babay. ⁵³ Kasəl kà aṅa asa à gi kà gəzal à Baba gulo kà mazlak gi aw takay, ngaha asləl gi azlamalika à ahəṅ manəlanəṅ kulo gəl aṅha sèla aw takay? ⁵⁴ Ama baṅa kiya uwaga ma kakay à uwana tatsetsèr à wakità à abà, agòd à afik ma? Kà uwana wakità agòd kà: Say uwanay adàpaka vok kiya uwanay, agòd.”

⁵⁵ Ngaha Yesu agòd à maham à ahəṅ dza: “Kasàw à waṅ kà makəs gi la azlaka-tsakar, la azlaazəva la ahàl bokuba gi masla nabəra takay? Kəla mavakay gədzàhà madzay la məṅ gày Zəzagəla la aku kà matapla tatak à azladza, uwala kakəsàw gi aw! ⁵⁶ Ama uwaga gesina apakà vok kà gay aṅa masla mapəhal gay à ahàl uwana la wakità la abà aṅa magòd à afik.”

Ngaha azlaməna matapla tasàkal à ahəṅ, tahòy aṅatà gesina.

Yesu la huma à azlamasiga aṅa gay zil

(Mark 14.53-65; Luka 22.54-55,63-71; Yuhana 18.13-14,19-24)

⁵⁷ Azladza uwana takəs Yesu, tadàla masla à huma aṅa Kayyif, məṅ madzahaga aṅa azlaməna mav tatak à Zəzagəla, la azlaməna mapəhla mapəhay ala, la azlamasiga uwana tahamà gay à vok la abatà. ⁵⁸ Piyer anəfà Yesu la tsəh makəda kəda. Tsəràh à gəl akàl aṅa məṅ madzahaga, adà à gày, adzà madzay la slaka aṅa azlamanəṅla, kà manərez tatak uwana apaka vok la Yesu.

⁵⁹ Azlamadzahaga aṅa azlaməna mav tatak à Zəzagəla, la azlamasiga aṅa gudəṅ tayàh mapuw gudzi à Yesu à gəl, amiyaka bà la fida uwala beyli, kà mabəzal à tsəh kà makəday. ⁶⁰ Ama tabəzal aw, amiyaka bà la uwala beyli, bà la abatà azladza tasàhla azlagay deyday gà à waṅ lakəl aṅha. Bà la kità babay azladza sèla tapəhla vok ala. ⁶¹ Tagòd: “Dza uwanay agòd kà: ‘Gəslala vok, gəkalàh məṅ gày Zəzagəla uwanay à ahəṅ, ngaha gəwulla à afik la mahənay makər la abà’, agòd.”

⁶² Məṅ madzahaga asà à afik, agòd à Yesu: “Kawulla gay à uda aw takay? Mana à uwanay azladza uwanay tapəhay lakəl aṅak tak ma?” ⁶³ Ama Yesu adzà à ahəṅ titi. Məṅ madzahaga uwaga agòdal aya: “La sləm aṅa Zəzagəla uwana la sifa, kamkam wùlla gay à uda: Ma kak, Kristu Kona aṅa Zəzagəla takay?” ⁶⁴ Yesu awulàlla: “Iyay, bokuba uwana kapèh. Ngaha aya gəpəh à akul la dziriga: Dagay lakana kadànəṅaw Kona aṅa dza adàdza madzay la ahàl kaf aṅa Zəzagəla lakəl la ndzəda, kadànəṅawwaṅ adàsa à ahəṅ la habaga la abà babay.” ⁶⁵ Kiya uwaga məṅ madzahaga akwàhà lukut aṅha à vok agòd: “Apèh mawisiga à Zəzagəla à vok, asà à anu azlaməna sayda anik aya aw, katsənàw uwana adapəhay lakəl aṅa Zəzagəla

təga aw way? Mana kadzugwaw aya ma?”, agòf. ⁶⁶ “Azlayla kà, say makəɗfay pəra!”, azlaməna matsəbal sləm tagòf.

⁶⁷ Nḡaha tadzəkà matafal sleslib à adi, azlāb la mamits à ahàl, azlaanik tazlāb à paṅaw à abà, ⁶⁸ tagòfal: “Pəhanula dza uwana aɗəɗ ka, à baṅa kak Kristu zla!”

Gəsəl Yesu aw, Piyer agod

(Mark 14.66-72; Luka 22.56-60; Yuhana 18.15-25,27)

⁶⁹ Piyer adzà madzay la uda la gəl akàl. Magamza misga aṅa mən madzahaga azà à vok à slaka aṅha, agòfal: “Kak babay kà, kadzàw à ahən la Yesu zil Galili uwaga.” ⁷⁰ Ama Piyer aɗahà fida la huma aṅa azladza gesina la magoɗay: “Gi kà, gəsəl uwana asa à ka mapəhay aw!” ⁷¹ Kiya uwaga asà à afik la abatà, azà à vok à gay gamagày. Magamza misga anik, anənən aya, nḡaha agòf à azlaməna madz à ahən la abatà: “Iyay, dza uwanay kà adzà à ahən la Yesu zil Nazaret.” ⁷² Ama Piyer aɗahà fida kà masəla la magoɗay aya: “Zagəla, gəsəl dza uwaga kapəhaw aw!” ⁷³ Mok uwana tasàfàni aya, azladza uwana la abatà la slaka Piyer, tazà à vok à slaka aṅha, tagòfal: “Ndzer kà, kak tekula aṅatà, məsəl ka la kuda aṅak la abà, à slaka uwana kasà à waṅ la abà.” ⁷⁴ Kiya uwaga Piyer adzəkà magoɗay: “Baṅa fida gəpəhay kà, Zəzagəla aɗahà à gi seriya à gəl. Gəɗàzuwa à akul mawadəy kà, gəsəl dza uwaga aw, gəgòf à akul, aw takay?” Apəh uwatà la gay ala, tsatsokw yokwyokw mewgdzagalaṅ adawiyay. ⁷⁵ Nḡaha awul à Piyer à gəl à gay uwana Yesu apəhal: “Gurayṅa mewgdzagalaṅ adawiyay asik makər kà, kasəl gi aw, kadəgəɗfay Piyer!”, Piyer asà à uda, atùw la iyaw tugwi.

27

Tadala Yesu à huma Pilatus

(Mark 15.1; Luka 23.1-2; Yuhana 18.28-32)

¹ Mok uwana uwaga adada à lig kà, bən la zay la tsəh, azlamadzahaga, la azlamasiga takəs sawaray la slaka gə kà makəɗf Yesu. ² Tawadəṅ, tadàla, tavà à Pilatus gumna aṅa azla Rom à ahàl.

Mamətsay aṅa Yudas

(Sləray 1.18-19)

³ Mok uwana Yudas masla mat kaf à Yesu à gəl anənən kà, seriya adətəɗ à Yesu à gəl kà, awulla sili gursu dzik makər uwaga à slaka azlamadzahaga, la azlamasiga. ⁴ Agòf à atà: “Gəɗahà tsakana, kà uwana gətà kaf à dza uwana à gəl kokudə tsakana”, agòf. Ama tagòfal: “Anu kà, gay gami la abà aya aw. Uwaga adagay kà abəz ka à kak pəra!” ⁵ Yudas adùw sili uwaga à mən gày Zəzagəla à agu. La lig la ahən, ahàd, akəɗf vok aṅha la madəb vok aṅha à zagəla.

⁶ Azlamadzahaga tazəb sili uwaga, tagòf: “Makoray gami avà tetəvi kà mazəbay sili uwanay kà maf à sahar aṅa gày Zəzagəla à agu aw, kà uwana uwanay kà sili aṅa aṅiz.” ⁷ Mok uwana tatsən vok gay la tataka aṅatà la abà lakəl aṅha kà, tasùkw guf aṅa masla maṅalàh tatak la sili uwatà, kà atà aṅa malàh azlaməlok dza à abà la abatà. ⁸ Kà uwaga à uwana tsərəh à lakana kà tazallala: Guf aṅiz, à guf uwatà. ⁹ Kiya uwanay à uwana gay aṅa masla mapəhal gay à ahàl Yeremiya agod: 'Tahəl gursu dzik makər uwaga. (Sili uwaga azla Isərayel tatsəna vok gay lakəl aṅha kà masukwla)

¹⁰ Tasukwla guf aṅa masla maṅalàh tatak, bokuba uwana Sufəl Zəzagəla apəh. [☆]

Pilatus anav gay à Yesu la gay ala

(Mark 15.2-5; Luka 23.3-5; Yuhana 18.33-38)

¹¹ Yesu la huma aña gumna kà manaval gay la gay ala: “Kak la uwana kak Sufël aña azla Yahudiya ay?” “Iyay, bokuba uwana kapèh”, Yesu agòfal. ¹² Uwana azlamadzahaga, la azlamasiga tapùwla gudzi à gël kà, awùlla gay à uda aw. ¹³ Kiya uwaga Pilatus agòfal: “Kak katsənà azlagay uwaga gesina tatugway lakël anjak aw, takay?” ¹⁴ Ama Yesu awulàlla gay amiyaka tekula aw, tsèràh à uwana lèw avàl à gumna à gay.

Seriya mamətsay atəd à Yesu à gəl

(Mark 15.6-15; Luka 23.13-25; Yuhana 18.39-19.16)

¹⁵ Bà kəla madəvaday Paska kà, gumna adawah gəl à masla danay tekula uwana asà à maham à ahəŋ dza kà uwana adagay zagəla anha. ¹⁶ La mok uwatà kà, dza anik la ahəŋ la danay, masla mawisiga kaykay, sləm anha kà Barabas. ¹⁷ Kiya uwaga Pilatus anəv à maham à ahəŋ dza la gay ala: “Uwa à uwana asa à akul gəduw à akul ala à gəl uwa: Barabas ay awma Yesu uwana Kristu ay?”, agòf à atà. ¹⁸ Kà uwana Pilatus asəl ndzer kà tafəl Yesu à ahəl kà, kà maŋor.

¹⁹ Uwana gəl akəf à Pilatus à vok kà gay aña seriya, kà mis anha asləl dza à slaka anha agòfal: “Katapa à ahəl à dza uwaga à vok tetuwa aw, kà uwana masla kà adahà tsakana aw, gəsəy ŋgərpa mənŋa la masesiŋay la wədfà lakël aña gay anha.”

²⁰ Məŋ madzahaga la azlamasiga tagòf à azladza kà: Say tanav à masakay kà Barabas, ŋgaha takəf Yesu. ²¹ Gumna anəv à atà à gay ala aya: “Uwa la tataka aña azladza səla uwanay la abà asa à akul kà gəduw à akul la gəl ala?” Tagòfal: “Dùw à anu gəl à Barabas!” ²² Anəv à atà: “Mana gədehəŋ la Yesu, uwana Kristu tagòfal zlà ma?” Gesina anətà tagòf: “Zləl à ahəf à adi!” ²³ Pilatus anəv à atà aya: “Sləray mawisiga ma uwala adahəŋ là?” Ama tazà kuda à zagəla la ndzəfa, tagòf: “Zləl à ahəf à adi!” ²⁴ Uwana Pilatus anəŋəŋ kà asləla vok adəh tatak anik aw say mawiyay pəra taziŋ à zagəla kà, atəfənì iyaw, apəl ahəl anha la huma aña azladza gesina, agòf: “Tsakana aña makəf kona uwanay kà, abəz kà gi aw, uwaga kà say gay lakël ankul pəra.” ²⁵ Azladza gesina tagòf: “Tsakana makəf masla kà awulla à anu à gəl la azlabəza gami!” ²⁶ Ŋgaha Pilatus adùw gəl à Barabas, aslahà Yesu ala la kurpi, avà à atà à ahəl kà mazləl à ahəf à adi.

Azlaslodzi takəfasl à Yesu

(Mark 15.16-20; Yuhana 19.2-3)

²⁷ Azlaslodzi aña Pilatus tadàla Yesu à mtəga aña gumna, ŋgaha maham à ahəŋ slodzi gesina ahəmal à adi. ²⁸ Tasərətalla la ahəl lukut anha la vok ala, tadùwal diri mativga à vok. ²⁹ Tasləsləp gabaga aña atək, tafəl à gəl, tafəl azəva gulakay à ahəl kaf, ŋgaha takədédal à huma à gay, takəfəslal la magodəy: “Ayyi, Sufël aña azla Yahudiya!” ³⁰ Tatəfal slesliḃ à vok, tazəḃ azəva uwatà la ahəl anha, tazləḃla à gəl. ³¹ Mok uwana takəfəslal tsewwa kà, tasərətal diri mativga uwatà la vok ala, tadùwal lukut anha à vok, tadàla masla kà mazləl à ahəf à adi.

Mazləl Yesu à ahəf à adi

(Mark 15.21-32; Luka 22.26-43; Yuhana 19.17-27)

³² La mok uwana tadùw à uda la gudəŋ à abà kà tagagəm la dza anik sləm anha Səmon, zil Səren. Azlaslodzi tafəl leri à gəl kà mazəḃ ahəf uwana tadəzləl Yesu à adi. ³³ Tabəz à slaka anik uwana sləm anha *Golgota*, bokuba magodəy: Slaka hərəŋ gəl. ³⁴ La abatà la uwana tatəf à tatak masay hamhamga à Yesu, atapəŋ ŋiz yewdi kà, akweskà.

³⁵ Tazləl Yesu à ahəf à adi, ŋgaha tavəhà lukut anha la tataka anətà la abà la matsal tsatsa lakəl. ³⁶ Ŋgaha tadzəh madzay la abatà kà manəŋla. ³⁷ Tafà matsetseray à gəl anha à afik à abatà kà mapəhla godega aña makəfəy anha ala: DZA UWANAY KÀ, YESU SUFƏL ANJA AZLA YAHUDIYA. ³⁸ Tatatəsləh azlaməna nabəra səla à ahəf à adi babay, anik la ahəl kaf, anik la ahəl gudzay.

³⁹ Azladza uwana tauguwàh à awtày la abatà takokòtànhà gəl, tatsàk atà magodahay à gəl, ⁴⁰ tagòfal: “Kak uwana kayàh makal mənə gày Zəzagəla à ahən, ngaha kà mawulla à afik la mahənay makər kà, bəl gəl anək à baŋa kak Kona aŋa Zəzagəla, sà à ahən la ahàf uwaga la adi zla!” ⁴¹ Kiya uwaga babay azlamadzahaga aŋa azlaməna mav tatak, la azlaməna mapàhla mapəhay ala, la azlamasiga takədàsl à masla, tagòf: ⁴² “Masla kà abàlànhà azladza anik, ama aslàla vok aŋa mabəl gəl aŋha aw takay? A tsa masla kà Sufəl aŋa azla Isərayel ay? Lagwa kà, sà à ahən la ahàf la adi zlà pəra, anu bay mədīŋ à ka gəl à vok. ⁴³ Masla afà madzugway aŋha à Zəzagəla à afik, ngaha apəhla lela: ‘Gi Kona aŋa Zəzagəla’, agòd! Iyay zla, mənənənəŋ à baŋa Zəzagəla abələnəŋ lagonay zla!”, tagòf. ⁴⁴ Azlaməna nabəra uwana tazlālal à makəla aŋha tatsəkəkal magodahay à gəl kiya uwaga babay.

Mamətsay aŋa Yesu

(Mark 15.33-41; Luka 23.44-49; Yuhana 19.28-30)

⁴⁵ La tataka afats, mələs apakà vok la kutso la abà gesina, tsərəh afats dat magovagova gərewni delga. ⁴⁶ La afats dat magovagova gərewni delga uwatà, Yesu awiyà la ndzəda, agòd: “*Eli, Eli lema sabachthani?*”[✠] (Bokuba magodəy: Zəzagəla gulo, Zəzagəla gulo, kà mana kasàk gi ma?) ⁴⁷ Azlaanik uwana tadzà à ahən la abatà tatsənənəŋ uwaga, tawiyà: “Azalay kà à Eliya!”, tagòf. ⁴⁸ Katskats tekula aŋatà ahòy, azəb sawsaw, adùw à iyaw hamhamga à abà, afà à gulakay à gay, adziyla à Yesu, kà masla aŋa makokuzay. ⁴⁹ Ama azlaanik tagòd: “Məkuda, à baŋa Eliya atsa à waŋ kà mabələnəŋ kà mənənənəŋ tak zlà!” ⁵⁰ La lig la ahən Yesu awiyà la ndzəda aya, ngaha aməts.

⁵¹ La sa uwatà bafta uwana tanəlla mənə gày Zəzagəla ala akohàla tsərəd tsərəh à afik tsərəh à vədah. Kutso abələkà à vok, ngaha azladzəgla tapəslàkàh ala. ⁵² Azlazəvay tapəzlla à ama ala ngaha aŋuvaw azlaməna madīŋal gəl à Zəzagəla à vok tawàlla à uda la mamətsay. ⁵³ Tasàhà à lag la zəvay la aku, ngaha la lig mawul à uda aŋa Yesu la ahən, tahàd à huɖ gudənəŋ tsidəŋaga à abà, azladza aŋuvaw tanaŋə atà.

⁵⁴ Azlaslodzi aŋa azla Rom, la mənəga aŋatà tanənəŋla Yesu. Uwana tanənəŋə mabələk à vok aŋa kutso la tatak uwana apakà vok gesina kà, guba mənəga akəs atà, tagòd: “Ndzer masla kà, Kona aŋa Zəzagəla!” ⁵⁵ Azlamis aŋuvaw tagà la abatà, tatsàzl à ahən kərəkər, tanərəzay atà. Tanəfà Yesu à waŋ dagay la Galili, kà atà aŋa mazlak masla à sləray à abà. ⁵⁶ Mariyama uwana dəg zla Magdala, Mariyama iyà aŋa Yakuba atà la Yusufu, la iyà aŋa azlabəza aŋa Zebede tagà la tataka azlamis uwaga la abà.

Mazəb Yesu à uda

(Mark 15.42-47; Luka 23.50-56; Yuhana 19.38-42)

⁵⁷ Uwana mokokhu adasa à waŋ kà, dza galepi anik uwana la Arimate asà à waŋ, sləm aŋha kà Yusufu, masla bay kà masla asik aŋa Yesu. ⁵⁸ Ahàd, abəz à Pilatus à vok kà manaval vok aŋa Yesu. Kiya uwaga Pilatus avà tetəvi à Yusufu kà mazəb vok aŋa Yesu. ⁵⁹ Yusufu asà à waŋ, azəb vok aŋa Yesu à ahən, afafədal à bafta mawga à adi. ⁶⁰ Ngaha afà à zəvay aŋa aslasl gəl aŋha uwana à agu, alà à təhus à afik, atakòslal magol bəlam à gay, kà matsakal à ama, ngaha adà aŋha. ⁶¹ Mariyama dəg zla Magdala atà la Mariyama anik uwanay tadzàhà madzay la abatà la magohla à huma à zəvay à adi.

Azlaməna manənəŋla zəvay

⁶² La vuɖ maduw ləv aŋa azla Yahudiya bənə azlamadzahaga aŋa azlaməna mav tatak à Zəzagəla, la azla Farisəya tahàd à slaka aŋa Pilatus, ⁶³ tagòfal: “Arveri, awùlla à anu à gəl kà, masla fida uwanay kà, uwana aləg mamətsay kà, agòd kà: La mahənay

✠ 27:46 27.46 Mahabay 22.1

makër kà, gèdàwul à uda, agòd. ⁶⁴ Njùlèm kà, gòd, kà tanəŋla zəvay aŋha mahənay makër, kà azlaməna matapla aŋha aŋa mas à waŋ kà mazəb à lag la aku aw, ŋgaha kà atà magòfay à azladza kà adawul à uda la mamətsay aw. Kà uwana fida uwaga adàd̄uw fida aŋa uwarà.” ⁶⁵ Pilatus agòd à atà: “Azlaslodzi kà atà la uwanay, d̄aw, kanəŋawla zəvay bokuba uwana kaslawwalla vok gesina.” ⁶⁶ Tahàd tabək azlaməna manəŋla zəvay à ahəŋ, tafà masəlay à akur uwana à vok tatsakla zəvay à ama, ŋgaha tabək azlaslodzi à ahəŋ kà manəŋla.

28

Mawul à uda aŋa Yesu

(Mark 16.1-10; Luka 24.1-12; Yuhana 20.1-10)

¹ La lig aŋa vuđ maduw ləv aŋa azla Yahudiya la ahəŋ, à vuđ ladu la bəŋ gà, Mariyama dəg zla Magdala, atà la Mariyama anik uwatà, tahàd kà manəŋ à gəl zəvay. ² La katskats kutso abəlākà à vok la ndzəda, malika aŋa Sufəl Zəzagəla asà à ahəŋ la zagəla, atakòslla à bəlam uwana ala tatsakla à zəvay à ama, ŋgaha adz à afik la abatà. ³ Masla awutsəday bokuba mawutsəday habaga, lukut aŋha babay təlla bokuba slewzi. ⁴ Mok uwana azlaməna manəŋla zəvay tanəŋəŋ kà, guba akəs atà kaykay, atà tasəkùläh, tapàkàh iyaw. ⁵ Malika agòd à azlamis uwatà: “Akul kà, guba akəs akul aw, kà uwana gəsəl kà kayhaw kà Yesu uwana tazləl à ahàf à adi. ⁶ Aga la abanay aw, adawulla à uda la mamətsay, bokuba uwana apəh à akul uwarà. Sàw à waŋ, kagovàl̄aw slaka uwana tahən à ahəŋ tsi. ⁷ D̄aw katskats kadəpəhaw à azlaməna matapla la slaka aŋha kà masla adawulla à uda la mamətsay. Lagwa adətsəvokay kà akul à kutso Galili. Kadənəŋawwaŋ kà la abatà, uwaga la uwana gəpəh à akul zla.”

⁸ Katskats azlamis uwaga tatsizlla ala la gəl zəvay la guba la vok, ama la marabay məŋga babay. Tahàd la mahoyay kà madla gay uwaga à azlaməna matapla aŋa Yesu. ⁹ Katskats Yesu asà à waŋ agagam à atà nna, agòd à atà: “Ayyi, gəgòd à akul”. Azlamis uwaga tazà à vok à slaka aŋha, takàs à asik aŋha à ahəl, takədal à ahəŋ, ŋgaha tasləkàw masla. ¹⁰ Kiya uwaga Yesu agòd à atà: “Guba akəs akul aw. D̄aw, kadəgòdaw à azladedə gulo kà, tahàd à kutso Galili, la abatà la uwana tadənəŋ gi”, agòd à atà.

Azlaməna manəŋla

¹¹ Mok uwana azlamis uwanay tadà aŋatà kà, azlaanik la tataka aŋa azlaslodzi uwana la abà tanəŋla zəvay uwaga, tahàd à huđ gudəŋ à abà. Tapəh tatak uwana apakà vok à azlamadzahaga aŋa azlaməna mav tatak gesina. ¹² Azlamadzahaga takəs sawaray la azlamasiga. Mok uwana tatsən vok gay, tavà sili à azlaslodzi uwatà məŋga. ¹³ Tagòd à atà: “Kadəgòdaw kà azlaməna matapla la slaka aŋha tasà à waŋ la vəd, tazəb vok aŋa Yesu la gəl à gəl, la mok uwana mədətəd à madzəhal à abà. ¹⁴ Kiya uwaga baŋa atsən à gumna, məsəl dabaray uwana mədàbəzal à tsəh, ŋgaha akul kadàsaw à uda la gay la abà gesina.” ¹⁵ Azlamanəŋla tahəl sili, ŋgaha tadahəŋ bokuba uwana tatəp à atà ala kà madəhəŋ gesina. Kiya uwaga gay uwaga azahà vok la tataka azla Yahudiya la abà tsərəh à lakana.

Yesu apəhla vok à azlaməna matapla la slaka aŋha

(Mark 16.14-18; Luka 24.36-49; Yuhana 20.19-23; Sləray 1.6-8)

¹⁶ Kiya uwaga azlaməna matapla kulo gəl aŋha tekula uwaga, tawul à gudəŋ Galili à dadəgwal uwana à afik, Yesu apəhatàla. ¹⁷ Mok uwana tanəŋəŋ kà, tasləkàw masla, azlaanik la tataka aŋatà la abà tabək gəl à ahəŋ səla. ¹⁸ Yesu azà à vok à slaka aŋatà, agòd à atà: “Lagwa kà ndzəda uwana la zagəla, ŋgaha la uwana la vədah kà agay mav à gi gà. ¹⁹ D̄aw à slaka azladza gudəŋ à vok gesina, kapakahawatàla kà azlaməna

matapla gulo, kadàfahaw à atà batem la sləm aṅa Baba, la sləm ana Kona, ṅgaha la sləm aṅa Masasəfok tsikasla. ²⁰ Tapawatàla kà atà aṅa manəf uwana gətàpàkulla gesina. Sèlàw kà, gədàgay la ahəṅ la akul koksikoksi, tsərəh à makəf gəl à ahəṅ gudəṅ à vok.”

GAY MARABƏIJ UWANA MARK ATSETSÈR Evangile selon Marc

Mapəhay anja Yuhana masla maɖàh batem.

(Mata 3.1-12; Luka 3.1-18; Yuhana 1.19-28)

¹ Aganay gay delga uwana adzəka à vok lakəl anja Yesu, Kona anja Zəzagəla, uwana mafal dzakwa à gəl gə. ² La wakità uwana la abà Yesayya atsetsèr, Zəzagəla agòɖ:

“Aganay gəsləl à awtəy masləlay gulo, la huma anjak kà maɖahkanj tetəvi à ahəj.”[✠]

³ Uwaga kà kuda anja dza uwana awiyay la fəta la abà:

“Dahàwla azlatetəvi à Sufəl Zəzagəla à ahəj tərta.”[✠]

⁴ Kiya uwaga Yuhana apəhla vok ala la fəta la abà. Az gay Zəzagəla, anavà azladza uwana tasà à waɲ à slaka anja: “Kəsàw batem, uwana apəhla ala kà kadapəhaw gay la ləv ala, nɣaha Zəzagəla adàmamatsakula tsakana ala.” ⁵ Azladza la makoray masla Yahudiya, la azladza la Urusalima gesina, tasà à waɲ à slaka anja, uwana tasəlla tsakana anjata à uda. Yuhana aɖahà à atà batem la mukwà Urdun la abà.

⁶ Yuhana adùw lukut maɖehənɣa à vok la anjiz anja zlugumi, rəts awadà vok ala la parapara zlap, tatak may anja kà hayyaw la zuway mazuway. ⁷ Apəh à azladza, agòɖ à atà: “Dza uwana atsa à waɲ la lig gulo la ahəj kà, aɖuwa gi la mənɣa, gəsla gay kà makəl gəl à ahəj anja mapəl zuwid kwimik anja ala aw. ⁸ Gi kà, gəɖahakulla batem kà la iyaw, ama masla kà aɖahakullanj kà la Masasəɖok Zəzagəla.”

Yuhana aɖàh batem à Yesu

(Mata 3.13-17; Luka 3.21-22)

⁹ La abatà Yesu asà à waɲ la gudən Nazaret la kutso Galili. Yuhana aɖahalla batem la mukwà Urdun la abà. ¹⁰ Mok uwana Yesu asà à uda la iyaw la abà, anənà à zagəla kà, zagəla mapəzl à ama ala gə. Anənà Masasəɖok Zəzagəla atsa à ahəj à gəl anja bokuba habakoku. ¹¹ Nɣaha tatsənà kuda uwana atsən à ahəj la zagəla: “Kak bəzi gay ləv gulo, gərabay mənɣa kà kak.”[✠]

Sufəl anja mawisiga apapat Yesu

(Mata 4.1-11; Luka 4.1-13)

¹² La lig la ahəj, katskats Masasəɖok Zəzagəla adala Yesu à fəta à abà. ¹³ Adzà à ahəj la abatà mavakay dzik ufad, nɣaha seteni apapat masla. Yesu adzà à ahəj la tataka azlatatak fəta la abà, nɣaha azlamalika tazlak masla bay.

Yesu azal azlaməna makas kilfi ufad

(Mata 4.12-22; Luka 4.14-15; 5.1-11)

¹⁴ Tadùw Yuhana à danay, kiya uwaga Yesu ahàd à kutso Galili, kà maz gay matsiɖayga anja Zəzagəla. ¹⁵ Agòɖ: “Kaslà adaslay à dagay kà Zəzagəla adzəka makoray anja. Pəhàw gay la ləv ala, diɲàw gəl à gay matsiɖayga anja Zəzagəla à vok!”

¹⁶ Mok uwana Yesu anəf à gay dərəv anja Galili, anənà azlaməna makas kilfi səla, Səmon la deda anja Andəre. Tadàw dzarawa à iyaw abà kà makasla kilfi. ¹⁷ Yesu agòɖ à atà: “Sàw à waɲ, nəfàw gi, gəɖapakakulla kà azlaməna makas azladza.”

¹⁸ Katskats tasàk à dzarawa anjata, tanəfà masla.

¹⁹ Uwana adada à huma à gay njuv, anənà azlabəza anja Zebede, Yakuba atà la Yuhana, atà la kəslah iyaw la abà tadàh dzarawa anjata. ²⁰ Katskats Yesu azàla atà,

tasàk à baba aṅatà à ahəŋ la azlaməna sləray aṅha la kəslah iyaw la afik, ŋgaha tanəfà Yesu.

*Dza la masasəḍok mawisiga
(Luka 4.31-37)*

²¹ Yesu la azlaməna matapla la slaka aṅha tahàd à Kapernahum. La vuḍ maduw ləv aṅa azla Yahudiya, Yesu adà à gày madəv kuḍa aṅatà à agu kà matapatàla. ²² Azladza uwana tatsənà gay aṅha kà, ləv avàl atà à gay, kà uwana atapàtala kà bokuba azlaməŋga aṅa azlaməna madzeŋ wakità Zəzagəla aw, ama bokuba dza uwana akor ndzəḍa.

²³ Mok uwatà, dza la masasəḍok mawisiga apəhla vok ala la gày madəv kuḍa uwatà la aku, awiyà: ²⁴ “Mana à gay aṅak la anu ma? Yesu, kak zil Nazaret! Kasà à waŋ kà mazanula ay? Gəsəl kà, kà kak Tsikaslaga uwana Zəzagəla asləl kak à waŋ.” ²⁵ Yesu aslèh məlo à masasəḍok uwatà à gəl: “Dzà à ahəŋ titi! Sà dza uwaga lakəl ala!”

²⁶ Ŋgaha masasəḍok mawisiga abəllakà dza uwatà la ndzəḍa, awiyà la kuḍa məŋga, ŋgaha asàlla à kəl ala. ²⁷ Ləv avàl atà à gay gesina. Tanàvəhà à vok: “Mana gay mawga uwanay asal magoḍay ma? Mana uwaga ma, akor azlamasasəḍok mawisiga la ndzəḍa, ŋgaha azlamasasəḍok mawisiga bay tafa à gəl à gay aṅha?” ²⁸ Katskats azladza tazàhà gay lakəl aṅa Yesu la kutso Galili gesina.

*Yesu awar azlaməna ḍuvats ala aṅuvaw
(Mata 8.14-17; Luka 4.38-41)*

²⁹ Uwana tasà à uda la gày madəv kuḍa la aku kà, katskats Yesu ahàd atà la Yakuba ŋgaha la Yuhana à mtəga aṅa Səmon la Andəre. ³⁰ Məŋay aṅa Səmon la akəl la vok la slaka mahən à ahəŋ. Mok uwana Yesu abəz atà à vok kà, tapəhal gay lakəl aṅha. ³¹ Yesu ahàd à slaka aṅha, akəs la ahəl, atsizlləŋ ala, ŋgaha akəl vok asàlla vok ala. La lig la ahəŋ mis uwatà azlək atà.

³² La mokokhu, mok uwana afats adatəḍ à ahəŋ, azladza tasəhla azlaməna ḍuvats aṅuvaw à waŋ à slaka Yesu, la azlauwana la masasəḍok mawisiga. ³³ Azladza gudəŋ uwatà tahamà gay à vok la gay gamagày aṅha. ³⁴ Yesu awarəŋ ala azladza aṅuvaw uwana tas ŋgərpə la azlaḍuvats anik anik gesina, la makuḍəkəh azlamasasəḍok mawisiga, afəhà à atà akur à lig kà mapəhlaŋ ala aw, kà uwana atà: “Məsəl Yesu”, tagòḍ.

*Yesu auguzahay la kutso Galili
(Luka 4.42-44)*

³⁵ Lebəŋ gə bəŋ, afats à lig mas à afik, Yesu atsizlla ala, ŋgaha asà à uda la kay, ahàd aṅha à fəta à abà ŋgaha adəv kuḍa la abatà. ³⁶ Səmon atà la azlamanalay aṅha tahàd kà mayəh masla. ³⁷ Uwana tabəzal à vok, “Azladza gesina tayəh kà!”, tagòḍal. ³⁸ Ama Yesu agòḍ à atà: “Məhàd à azlagudəŋ anik anik, gəḍapəhay gay Zəzagəla la abatà babay, kà uwana gəsà à waŋ kà maḍəh sləray uwaga.” ³⁹ Kiya uwaga auguzəhəh la kutso Galili gesina. Apəh gay matsiḍayga la azlagay madəv kuḍa aṅatà la aku, ŋgaha akuḍəkəh azlamasasəḍok mawisiga à uda.

*Yesu awura masla akəl zagəla ala
(Mata 8.1-4; Luka 5.12-16)*

⁴⁰ Masla akəl zagəla asà à waŋ à slaka Yesu, akədəḍal à huma à gay, anəval: “Kamkam, baŋa asa à ka kà, kaslala vok kà mawur gi ala!” ⁴¹ Vok ahəm à Yesu, abiyà ahəl ala, adəbani, ŋgaha agòḍal: “Asa à gi, wùr ala!” ⁴² Katskats akəl zagəla asàl à vok ala, awùr ala. ⁴³ La lig la ahəŋ, Yesu awùl à masla la mafahal akur à lig, agòḍal: ⁴⁴ “Tsənəŋ lela, kapəh uwaga à dza anik aw, ama həd kadəpəhla vok à masla mav tatak à Zəzagəla, kà kadawurla, ŋgaha və tatak uwana Musa apəh à ahəŋ kà

masəlay kà kawùr ala.”[☆] 45 Ama dza uwatà ahàd, adzəkà mapəhay à azladza gesina lakəl aṅa mawurla aṅha. Gay gà la uwaga à uwana Yesu aslala vok kà mad gudəṅ à abà la dazuwaya aw. Kà uwaga à uwana Yesu adzà à ahəṅ la uda la fəta la abà, la abatà bay, azladza tadàh à awtày à slaka aṅha la kəla slaka gesina.

2

Yesu awur dza makalàh à vədah gà ala (Mata 9.1-8; Luka 5.17-26)

¹ La lig mahəṅay ṅuv Yesu ahàd à Kapernahum aya. Uwana tatsənəṅ Yesu la kay kà, ² azladza aṅuvaw tahamà ahəṅ tsərəh à uwana slaka atəm à ahəṅ baməraka la gəl akəl aw, apəh à atà gay Zəzagəla. ³ Ṅgaha azladza anik tasà à waṅ à slaka aṅha, tasəlla dza makalàh à vədah gà à waṅ, azladza ufaɗ la tsəh tazəbay. ⁴ Ama tabəz à tetəvi kà madla à slaka Yesu aw, kà uwana maham à ahəṅ dza aṅuvaw la ahəṅ, tadala à gəl gày à afik, tapokwà gəl gày uwana Yesu la kay la afik, uwana tapokwəṅ tadzilà dza makalàh à vədah gà uwatà à gày la kəslah gà. ⁵ Uwana Yesu anəṅəṅ madiṅal gəl à vok aṅatà mənṅa, agòɗ à dza makalàh à vədah gà uwaga: “Bəzi gulo, tsakana aṅak adàmatsila!” ⁶ Ama azladza anik la tataka azlaməna mapəhla wakità seriya la abà la slaka madzàh madzay la abatà, tadzùgw la gəl aṅatà: ⁷ “Kà mana dza uwanay apəhay mawisiga lakəl aṅa Zəzagəla kiya uwaga ma? Dza aslala vok aṅa mamats tsakana à dza ala aw, say Zəzagəla pəra!” ⁸ Katskats Yesu asəl uwana tadzugway la ləv aṅatà la tsəh, agòɗ à atà: “Kà mana kadzugwaw kiya uwanay la ləv aṅkul la tsəh ma? ⁹ Butu mala zlazladfa magoɗay: gədàmats à ka tsakana aṅak ala takay? Awma: Sà à afik, zəb kəslah aṅak, hàd aṅak takay? ¹⁰ Ama asa à gi kasəlaw, kà gi kona aṅa dza, ṅgaha kà gi la masəlay aṅa mamats tsakana aṅa azladza gudəṅ à vok ala: ¹¹ Sà à afik, zəb kəslah aṅak, hàd mtəga aṅak! Gəgoɗ à kak”, Yesu agòɗ à dza makalàh à vədah gà. ¹² Katskat asà à afik, azəb kəslah aṅha. Uwana azladza gesina tanəṅəṅ adiṅ aṅha, ləv avàl à atà à gay gesina, tazləbà Zəzagəla, tagòɗ: “Mədanəṅəṅ dīkidīki kiya uwanay aw!”

Yesu azala Levi (Mata 9.9-13; Luka 5.27-32)

¹³ Yesu awùlla à gay dərəv aya, sləm aṅha kà dərəv Galili. Azladza aṅuvaw tahamà à waṅ à slaka aṅha, ṅgaha atəpatàla. ¹⁴ Uwana adà à awtày, anəṅəṅ Levi, kona aṅa Alfe, adadza madzay la gày mazəb hadama la aku. Yesu agòɗal: “Sà à afik, nəfà à gi!” Levi asà à afik, anəfà.

¹⁵ La lig la ahəṅ Yesu la azlaməna matapla aṅha tahàd à mtəga Levi kà mazuw tatak may. Azlaməna mazəb hadama aṅuvaw la azlaməna tsakana aṅuvaw, tadzàhà madzay atà nna, kà uwana azladza tsəhay gà uwaga aṅuvaw tanəfà atà aya. ¹⁶ Azlaanik la tataka azlamadzahaga aṅa wakità seriya aṅa Zəzagəla la abà, uwana la tataka aṅa azla Farisəya la abà, tanəṅəṅ kà Yesu azùw tatak may la slaka gà la azlaməna mazəb hadama la azladza tsakana, tagòɗ à azlaməna matapla la slaka aṅha: “Kà mana azuw tatak may la azlaməna mazəb hadama la azlaməna tsakana ma?” ¹⁷ Uwana Yesu atsənà uwaga, agòɗ à atà: “Azladza uwana dūvats aza à ata aw, kà tayàh mad dokwtar aw, say azlaməna dūvats pəra. Gi, gəsà à waṅ kà mazalay azladza uwana tadzugw kà azladziriga aw, ama gəsà à waṅ kà, kà mazal azlaməna tsakana.”

Manavay lakəl aṅa makəs nəlay (Mata 9.14-17; Luka 5.33-39)

[☆] 1:44 1.44 3Musa 14.1-32

¹⁸ Azlaməna matapla aña Yuhana, masla madàh batem la azla Farisəya takasàh nəlay la azlakaslà anik anik. Azladza anik tasà à wañ à slaka Yesu, tanàval: “Kà mana azlaməna matapla aña Yuhana, masla madàh batem, la azla Farisəya kà takas nəlay, ama kà mana azlaməna matapla la slaka aňak kà takas nəlay aw ma?” ¹⁹ Yesu agòd à atà: “Baña dza azəb mis azàlāh azlaslawda aňha kà mazuw tatak may, ma tasàk tatak may la mavakay uwatà aña makəs nəlay takay? Awañ, tasàkal aw, tazuway. ²⁰ Ama mok uwana zil mis adàdiñ aňha la slaka aňatà, la uwana tadàkas nəlay adàgay la mok uwatà.”

²¹ Yesu agagàzlla atà ala la matapatla mawga aňha uwanay: “Dza atsap lukut mawga à maviyaga à vok aw. Baña adəhəñ kità kà, lukut mawga akwàh maviyaga à tsəh, ñgaha makwàhla aňha azàh à tsəh aya. ²² Dza adəw iyaw aña mayyay ahàf mawga à kiwa iyaw maviyaga à agu aw, kà uwana à baña amsəlila kà, akwàh kiwa ala. Ñgaha iyaw aña mayyay ahàf la kiwa iyaw tadəuwisila. Ama adəwa à vok kà tadəw iyaw aña mayyay ahàf mawga à kiwa mawga à agu, suwañ.”

Manavay lakəl aña vud maduw ləv
(Mata 12.1-8; Luka 6.1-5)

²³ Vərdi anik la vud maduw ləv, Yesu aguwà à awtəy la gay guf nalkama. Azlaməna matapla la slaka aňha tadzəkà mabəradəhay nalkama la tetəvi la ama. ²⁴ Azla Farisəya tagòd à Yesu: “Kà mana azlaməna matapla la slaka aňak tadàh tatak uwana azlayla kà à vok aw ma? Kà uwana wakità seriya gami avəra gay kà tatak uwaga la vud maduw ləv.” ²⁵ Yesu awùlla à atà ala: “Kadzəñàw diki diki aw uwana David adəhəñ la mok uwana may akəs la azladza uwana la slaka aňha aw uwà? ²⁶ Ahàd à gày Zəzagəla à agu, azəb kaf uwana tafàh à huma aña Zəzagəla, azùw. Mok uwatà kà, Abiyatar la uwana məngə aña azlaməna mav tatak à Zəzagəla. Wakità seriya gami kà, avà tetəvi kà azlaməna mav tatak à Zəzagəla kà mazuway pəra. Ama David azəb, azùw, ñgaha avàh à azlaməna aňha bay.” ²⁷ Yesu agòd à atà aya: “Zəzagəla adəhə vud maduw ləv kà, kà madz à ahəñ delga aña dza, awkà Zəzagəla adəhə dza kà aña vud maduw ləv aw. ²⁸ Gay gə la uwaga gi Kona aña dza la uwana Sufəl aña vud maduw ləv.”

3

Yesu awur dza uwana ala la ahəl mamətsayga
(Mata 12.9-14; Luka 6.6-11)

¹ La vərđi anik, Yesu ahàd à gày madəv kufə à agu aya. La gày uwatà la aku kà, dza la ahəñ uwana ahəl aňha mamətsayga. ² Azladza la ahəñ la gày madəv kufə la aku, tanəřəz Yesu à baña awur dza ala la vud maduw ləv, kà atà mabəzal à tsəh la gay la abà, kà uwana akəs mapəhay lakəl aña vud maduw ləv aw. ³ Yesu agòd à dza uwana ahəl aňha mamətsayga: “Sà à afik, sà à wañ à huma azladza gesina!” ⁴ Ñgaha anəv azladza uwana tatsəkəkal yewđi à gay: “Mana wakità seriya gami apəh à anu ma? Tetəvi la ahəñ kà madàh delga la vud maduw ləv takay? Awma madàh mawisiga takay?” Asà à atà mawulla gay à uda aw. Takwès. ⁵ Yesu atsəkà à atà yewđi à gay la mazinal à gəl. Ama apək ləv məngə kà madzugway mawisiga aňatà. Kiya uwaga agòd à dza uwatà: “Biyà ahəl ala!” La kirim yewđi awùr ala. ⁶ Batsàrà, uwana azla Farisəya tanəñ uwaga kà, tasà à uda la gày Zəzagəla la aku, tahàd, tahamà gay à vok la azladza maham à ahəñ gə uwana tatsən vok gay la Herod kà aña magəđ uwana à afik azlayla makəđla Yesu.

Maham à ahəñ dza asa à wañ à slaka Yesu

⁷ Yesu la azlaməna matapla aṅha tazà vok. Tahàd à gay dərəv aṅa Galili, maham à ahəṅ dza aṅuvaw tanəfà atà. Azladza tasàhà à waṅ la makoray Galili, la Yahudiya, ⁸ la Urusalima dagay la gay dzika makoray aṅa Idumiya tsəràh à gay dzika aṅa dərəv uda aṅa mukwà Urdun, la azladza uwana tadzà à ahəṅ nekwa la gudəṅ Tir la Sədon. Magol maham à ahəṅ dza tasàhà à waṅ à slaka Yesu kà uwana tatsənəṅ lakəl aṅa tatak uwana adfahàhəṅ. ⁹ Yesu agòd à azlaməna matapla la slaka aṅha: “Yàhàw à gi bəzi kəslah iyaw, kà maham à ahəṅ dza aṅa maṅisl gi aw.” ¹⁰ Yesu awurà azladza ala aṅuvaw, gay gà la uwaga azladza uwana tasà ṅərpa la azladuvats anik anik tavàhà vok kà madəbani masla. ¹¹ La mok uwana azladza uwana la azlamasasəđok mawisiga tanəṅà masla, tatəđal à huma la mawiyay, tagòđal: “Kak, Kona aṅa Zəzagəla!” ¹² Ama Yesu aslèhà atà məl à gəl la ndzəđa, kà mapəhla masla ala aw.

Yesu akasani azlaməna matapla kulo gəl aṅha səla
(Mata 10.1-4; Luka 6.12-16)

¹³ Yesu ahàd à dadəgwal à afik, ṅgaha azàl azladza uwana asàl, kà tatsà à waṅ à slaka aṅha. ¹⁴ Yesu akàsàni azladza kulo gəl aṅha səla, ṅgaha azàla atà ala azlaməna matapla la slaka aṅha, agòd à atà: “Gəkàsàni akul kà madz à ahəṅ la slaka gulo, ṅgaha gədàslal akul kà mapàh gay Zəzagəla. ¹⁵ Gəvə à akul maslay kà makudəkàh azlamasasəđok mawisiga.” ¹⁶ Aganay azladza kulo gəl aṅha səla uwana akàsàni atà: Səmon uwana Yesu avàl sləm Piyer; ¹⁷ Yakuba la deda aṅha Yuhana, azlabəza aṅa Zebede. (Yesu avà à atà sləm Bowanergəs, asal magođay: maslèh məl aṅa habaga, kà uwana tasaf à mapak ləv aw) ¹⁸ La Andəre; Filip; Bartelemi; Mata; Tomas; Yakuba, bəzi aṅa Alfe; Tade; Səmon zil Kananan ¹⁹ ṅgaha Yudas Iskariyot, uwana adàda kà məzam à Yesu à gəl.

Azlaməna huđ gày aṅa Yesu asa à atà aṅa madla Yesu à mtəga

²⁰ Yesu ahàd à mtəga aṅa dza anik. Maham à ahəṅ dza tahamà gay à vok aya, kà uwaga à uwana Yesu la azlaməna matapla la slaka aṅha tabəzà tetəvi kà mazuw tatak may aw. ²¹ Mok uwana azlaməna huđ gày aṅha tatsən uwaga, tahàd kà masəla à mtəga, kà uwana azladza tagòd kà: “Gəl adakəđal à vok!”

Azladza tatsəđ gay à Yesu à tsəh ṅgaha awulla atà ala
(Mata 12.22-32; Luka 11.14-23; 12.10)

²² Azlamadzahaga aṅa wakità seriya tasà à ahəṅ la Urusalima tagòd: “Masla la Belzəbul, sufəl aṅa zagəla zagəla!”, asal magođay sufəl aṅa azlamasəđok mawisiga. Azlaanik tagòd: “Sufəl aṅa azlamasasəđok mawisiga avàl maslay kà makudək azlamasasəđok mawisiga.” ²³ Yesu azàl azladza à slaka aṅha, agòd à atà: “Kakay sufəl aṅa masasəđok mawisiga aslala vok aṅa makudək seteni à uda aya ma? Akəsà vok aw. ²⁴ Baṅa azladza la makoray tekula tatsak ala kà, makoray sufəl uwatà kà aslala vok madz à ahəṅ aw. ²⁵ Baṅa azladza la huđ gày tatsak ala kà, huđ gày uwatà aslala vok madz à ahəṅ aw. ²⁶ Baṅa seteni ap guvəl à vok aṅha à adi kà, makoray aṅha adavahla, aslala vok aṅa madz à ahəṅ aw, ama makoray uwaga adədəv à gay. ²⁷ Dza aslala vok aṅa mad à gày aṅa masla ndzəđa kà mazəb tatak aṅha aw, say atsərkwiṅ dadəṅ, ṅgaha aslala vok kà mahəl tatak aṅha gesina. ²⁸ Gəpəh à akul la dziriga: Tsakana gesina la gay mawisiga gesina uwana azladza tapəhay, Zəzagəla adàmatsataṅ ala. ²⁹ Ama dza uwana apəh mawisiga lakəl aṅa Masasəđok Zəzagəla kà, tsakana uwaga adàmatsila đikidiki aw, ama tsakana uwaga adədzà à ahəṅ aṅa koksikoksi.” ³⁰ Yesu apəh kiya uwaga kà, kà uwana azlaanik tagòd kà: “Masla la masasəđok mawisiga”, tagòd.

Iyà la azladedə aṅa Yesu
(Mata 12.46-50; Luka 8.19-21)

³¹ Iyà la azladede aṅa Yesu tasà à waṅ, taslèl dza kà mazal à atà la uda. ³² Azladza aṅuvaw tadzàhà madzay la makèla aṅa Yesu, tagòfal: “Iyà la azladede aṅak la uda, tazala ka!” ³³ Yesu awùl à atà ala: “Uwa iyà gulo la azladede gulo uwa?” ³⁴ Nḡaha Yesu anèrèz azladza uwana la makèla aṅha lakèl, agòf à atà: “Aganay azlaiyà la azladede gulo la abanay. ³⁵ Kà uwana kèla uwabeyuwi uwana adàh mawoyèṅ aṅa Zèzagèla la uwana azladede gulo la azlaiyà gulo.”

4

Gay la gay la abà aṅa masla maslèk hi (Mata 13.1-9; Luka 8.4-8)

¹ Yesu atàpla à maham à ahèṅ dza la gay dèrèw aṅa Galili aya. Aṅuvaw tahamà gay à vok la slaka aṅha. Kà maham à ahèṅ dza, Yesu adà à kèsleh iyaw à afik, adzà madzay. Ama maham à ahèṅ dza la gay dèrèw. ² Yesu apèhatàla azlatatak aṅuvaw la gay la gay la abà, ḡaha agòf à atà la matapla aṅha la abà: ³ “Tsèbàwwal slèm!”, Yesu agòf à atà, “Dza anik asà à uda kà mad maslèk hi. ⁴ Mok uwana adadzèka maslèk hi à guf aṅha à abà, fofulo anik tanis à gay tetèvi, azladfiyan tasà à waṅ, tazùw à gay. ⁵ Azlaanik aya tanis à pala akur à afik uwana kutso lakèl mèṅga aw, katskats asà à uda, kà uwana kutso la pala akur lakèl mèṅga aw. ⁶ Mok uwana afats adadzèka mavèday la ndzèfa agulà hi ala kà uwana abèk slilih kà à pala à akur à afik. ⁷ Gotènaṅ fofulo anik tanis à atàk à abà. Uwana atàk azigènaṅ akèf à tsèh, atsà à gèl aw. ⁸ Bà gotènaṅ fofulo anik tanis à kutso delga gà à abà. Asà à uda lela azigèṅ lela, ḡaha atsà gèl lela. Anik abèk à adi humèts, anik abèk à adi zuṅ, ḡaha anik aya bay zazūṅ sèla.” ⁹ Yesu agòf à atà: “Tsèbàwwal slèm lela, wàdàw vok à uda kà mafal slèm!”

Kà mana Yesu apèhay la gay la gay la abà ma? (Mata 13.10-17; Luka 8.9-10)

¹⁰ Mok uwana Yesu kokuḡa aṅha, azladza uwana tatsèbal slèm, la azlamèna matapla la slaka aṅha kulo gèl aṅha sèla, tasà à waṅ à slaka aṅha, ḡaha tanèw godega aṅa gay la gay la abà uwatà. ¹¹ Yesu agòf à atà: “Akul kà, Zèzagèla avà à akul nasiri aṅa makoray aṅha, ama azladza anik tatsèn tatak gesina kà say la gay la gay la abà pèra. ¹² Kà uwaga à uwana: ‘Tanèrzay la yewdi aṅatà babay, ama tanèṅaṅ la dziriga aw, Tatsèbal slèm la slèm aṅatà babay, ama tatsènaṅ la dziriga aw, Kiya uwaga kà atà aṅa mawul à slaka Zèzagèla aw, ḡaha Zèzagèla aṅa amatsa à atà tsakana aṅatà ala aw!’”[☆]

Yesu apèh godega aṅa gay la gay la abà uwaga à uda (Mata 13.18-23; Luka 8.11-15)

¹³ Nḡaha Yesu anèw à atà gay ala: “Katsènaṅ gay la gay la gay la abà uwanay aw takay? Kakay kadatsènaṅ gay la gay la abà anik zla ma? ¹⁴ Masla maslèkay kà masla mapèh gay Zèzagèla. ¹⁵ Azladza anik kà bokuba gay tetèvi uwana fofulo anis ala ama: Mok uwana tatsènaṅ, katskats seteni asa à waṅ, abàf atà à lèw ala gay uwana taslèkà à lèw à tsèh. ¹⁶ Kiya uwaga bay la azladza anik tadèbani slaka pala akur gà, à uwana gay anis à afik, katskats uwana tatsèn gay kà takès la marabay. ¹⁷ Ama tasàkal adàla slilih la lèw aṅatà la tsèh aw, tafàl slèm la lela aw, takès kà aṅa kaslà ḡuv pèra. La mok uwana ḡèrpa la matèrèbay adabèz atà kà gay Zèzagèla kà, katskats tasàk madiṅ gèl à vok aṅatà la tsèh ala. ¹⁸ Azladza anik aya kà tadèbani à vok la gày atàk uwana fofulo anis à abà. Tatsèb slèm à gay. ¹⁹ Ama adi aṅa gudèṅ à vok uwanay la matsidèy aṅha uwana apapàt azladza, adà à lèw aṅatà à tsèh, akèf gay maslèkayga

☆ 4:12 4.12 Yesayya 6.9-10

uwaga à tsəh, ɲgaha azladza uwaga tav mayyay aw. ²⁰ Azladza anik aya gotənanj kà tadəbani à vok la kutso uwana fofulo anis à abà. Atà tatsəb sləm à gay lela, tafəl sləm lela, tavà mayyay, anik abək à adi huməts, azlaanik zunj, azlaanik aya gotənanj zazunj səla.”

Gay la gay la abà aɲa fənəs la tsəh gogozläh
(Luka 8.16-18)

²¹ Yesu agòd à atà aya: “Dza af fənəs à tsəh tasà takay, awma à tsəh gogozläh ay? Awanj, aduwa vok kà dza af fənəs à slaka dzəgamma gà. ²² Bokuba magodəy, tatak mahadəɲ à ahəɲ gà ada à gay mapəhla à vok ala gà. ɲgaha nasiri gesina, azladza tadəsəlay. ²³ Tsəbàwwal sləm lela à baɲa sləm aga akul lakəl.”

²⁴ Yesu agòd à atà aya: “Dahàw hanjəli lakəl aɲa tatak uwana katsənawwanj la uwana kadəhawwanj. La daram uwana kagoraw la azladza, Zəzagəla adəgor akul la uwaga la mazakullanj à gəl suwanj. ²⁵ Kà uwana dza uwana af sləm à uwana Zəzagəla avəl, adəbəzal mənɲa aya. Ama dza uwana af sləm à tatak aw, tadədəvalla à ahəl ala ɲuv gà uwatà Zəzagəla avəl aya babay.”

Gay la gay la abà aɲa fofulo uwana atsa à uda

²⁶ Yesu agòd à atà aya: “Məslala vok magagazləla makoray Zəzagəla kà la dza uwana asləkà fofulo à guf aɲha à abà. ²⁷ La lig la ahəɲ kà say madzəhal aɲha kəla mahənay pəra. La kaslā uwana fofulo adas à uda azigən la kokudə masəlay aɲha. ²⁸ Kutso azigəna makəl gay aɲa tatak: Teraɲa kavak gà, ɲgaha masəh gəl à uda, la mabək bəza adi. ²⁹ Mok uwana tatak adahənay, dza adzəka sləray la mavaw aɲha, kà uwana matsəd tatak adasa à wanj.”

Gay la gay la abà aɲa tsəhay fofulo uwana bəziga gà la tataka azlafofulo anik anik la abà

(Mata 13.31-32,34; Luka 13.18-19)

³⁰ Yesu anəv à azladza la gay la: “La mana makoray Zəzagəla adəbani vok ma? La gay la gay la abà ma uwala məgagazləla makoray aɲha la? ³¹ Adəbani vok kà la tsəhay uwana bəziga gà la tataka azlatsəhay fofulo anik la abà gesina bokuba tsəhay hamadz. ³² Ama baɲa azigənay kà, aduwa azlababasl anik anik gesina. Azigənay mənɲa, aduwa azlaahəf anik, azləl ahəl mənɲa, ɲgaha azladfiyanj tadza à ahəɲ la dzəgay aɲha la abà.”

³³ Kiya uwaga Yesu apəh à atà gay Zəzagəla la azlagay la gay la abà aɲuvaw bokuba uwanay. Apəh à atà kà bokuba uwana azladza taslala vok aɲa matsənəɲ. ³⁴ Apəh à atà kà bə la gay la gay la abà pəra. Ama uwana masla la azlaməna matapla la slaka aɲha kokudə gəl aɲatà kà, apəh à atà ala tatak gesina la paraka.

Yesu atsizlla kular à ahəɲ
(Mata 8.23-27; Luka 8.22-25)

³⁵ La mokokhu vud uwatà, Yesu agòd à azlaməna matapla la slaka aɲha: “Məhəd à gay dərəv uda anik.” ³⁶ Kiya uwaga tasək à maham à ahəɲ dza à ahəɲ, azlaməna matapla la slaka aɲha tadà à kəslah iyaw uwana à afik, Yesu atsà à vok à afik. Azlakəslah iyaw anik la ahəɲ la abatà bay aw. ³⁷ Magol kular adzəkà madədəy. Magaɲtsay aɲa iyaw adàh à kəslah iyaw à abà, kiya uwaga kà ahənəɲ ala. ³⁸ Yesu agà la godega kəslah iyaw la madzəhal gà, afà gəl à tatak maf gəl à afik à afik. Azlaməna matapla la slaka aɲha tatsənəɲ ala la magodəf: “Mənɲa, məzləmətsay, kafa à anu gəl aya aw, takay?” ³⁹ Yesu atsənà ala, aslèh mələ à kular à gəl. Apəh la ndzədə à magaɲtsay aɲa iyaw: “Dzà à ahəɲ titi!” Kular atsizl à ahəɲ, iyaw adzà à ahəɲ titi, magaɲtsay aɲa iyaw la ahəɲ aya aw, tsiriya. ⁴⁰ La lig la ahəɲ agòd à azlaməna matapla la slaka aɲha: “Kà mana guba akəs à akul ma? Kadiɲaw gi gəl

à vok aw ay?" ⁴¹ Guba akès atà mənğa tagòd kà atà kà atà: "Uwa à dza uwanay, amiyaka afad la iyaw bay kà takəs gay aᅇha uwa?"

5

Yesu akudək masasəđok mawisiga à dza lakəl ala (Mata 8.28-34; Luka 8.26-39)

¹ La lig la ahəᅇ tabəzà à gay dərəv uda aᅇa gay dərəv aᅇa Galili uwana la kutso Gerasəniya la abà. ² Uwana Yesu adasa à ahəᅇ la kəslah iyaw la afik, batsàrà dza anik anəᅇà Yesu kərkər, asà à waᅇ kà magagamay səla. Dza uwaga asà à waᅇ kà la gày zəvay la abà, dza uwatà kà zagəla zagəla lakəl. ³ Adzà à ahəᅇ kà la mabuwaᅇ zəvay la aku. Dza aslàla vok aᅇa mawadəᅇ à ahəᅇ ba amiyaka la mazakazak aw. ⁴ Aᅇuvaw tawəđàhalla ahəl à ahəᅇ la azlamatatasla ahəl, la sasala asik la azlamazakazak aᅇa ada. Ama aslähàhàᅇ ala la azlamanal sasala ala. Dza aslàla vok kà makəsiᅇ à ahəᅇ aw. ⁵ Koksikoksi kəla mahəᅇay la mavakay auguzahahay la azlagəl zəvay la azlamatəkukurùh la afik la mawiyay la masàh vok aᅇha la akur.

⁶ Dza uwatà anəᅇà Yesu kərkər ᅇgaha ahəd la mahoyay à huma aᅇha, atəd à Yesu à huma. ⁷ Awiyà la ndzəđa: "Masak à ama Yesu, Kona aᅇa Zəzagəla uwana la afik. Kamkam gəᅇnava à ka, kà la sləm aᅇa Zəzagəla: Sàk à gi, bəsak, kavà à gi ᅇgərpa aw." ⁸ Apəᅇh uwaga kà, kà uwana Yesu afəl gay à gəl: "Kak zagəla zagəla: Sà à dza uwaga la kəl ala." ⁹ La abatà Yesu anəval: "Uwa sləm aᅇak uwa?" Masla zagəla zagəla agòđal: "Sləm gulo kà maham à ahəᅇ, kà uwana anu aᅇuvaw. ¹⁰ Kamkam mədəv à ka kudə, kakudək anu la gudəᅇ uwanay aw!"

¹¹ Maham à ahəᅇ namzi la ahəᅇ la abatà uwana tadzadzàr à vok nekwa la matəkukurùh la afik. ¹² Azlamasasəđok mawisiga tanəv à Yesu, tagòđal: "Sləl anu à maham à ahəᅇ namzi à abà pəra, và à anu tetəvi, məda à atà à gəl." ¹³ "Aya, dàw!" Yesu agòđ à atà. La kità azlazagəla zagəla tasà à dza uwatà lakəl ala, ᅇgaha tahəd à azlanamzi à gəl gesina. Batsàrà, tahòy à ahəᅇ, tavàlàh à iyaw à abà, ᅇgaha tasùfàh à abà. Azlanamzi uwaga gesina kà taslà dəbow səla.

¹⁴ Azlaməna manəᅇla azlanamzi tahòy aᅇatà, tadàla gay uwaga kà maziᅇ azladza bəza gudəᅇ la azlahud gudəᅇ gesina la makoray uwatà. Azladza tasàhà à uda, tasà à waᅇ kà manəᅇ tatak uwana adəhà vok. ¹⁵ Uwana tabəz à slaka Yesu tanəᅇà dza uwana agà la maham à ahəᅇ zagəla zagəla lakəl, madza madzayga la lukut la vok, haᅇkəli adawulla à gəl. Ləv avàl à azladza à gay. Guba akès atà. ¹⁶ Azlaməna manəᅇ uwana apakà vok gesina kà, tazàhà gay aᅇa dza uwana la zagəla zagəla lakəl uwarà la aᅇa azlanamzi gesina bay. ¹⁷ La abatà tagòđ à Yesu: "Kamkam, sà à uda la makoray gami." Yesu asà à afik, ahəd à slaka kəslah iyaw.

¹⁸ Mok uwana adà à kəslah iyaw à afik, dza uwana agà la azlazagəla zagəla lakəl uwarà, agòđ à Yesu: "Kamkam, asa à gi mədaw səla." ¹⁹ Ama Yesu avàl tetəvi aw: "Wùl à hud gày aᅇak, zàhàtəᅇ uwana Sufəl Zəzagəla adəhàkəᅇ gesina lakəl aᅇa uwana vok ahàmàl kà kak!", agòđal. ²⁰ Dza uwaga adà aᅇha zla, ᅇgaha adzəkà mapahay la makoray uwana sləm aᅇha gudəᅇ kulo, à tatak uwana Yesu adəhàləᅇ gesina. Azladza gesina uwana tatsəb sləm à gay uwaga, gesina aᅇatà, ləv avàl atà gay.

Dugu aᅇa Yayrus atà la mis uwana adəbani lukut aᅇa Yesu (Mata 9.18-26; Luka 8.40-56)

²¹ Yesu awùl à waᅇ la gay dərəv uda anik la kəslah iyaw. La mok uwana adatsizl à ahəᅇ la gay mukwà, maham à ahəᅇ dza aᅇuvaw ahamàl à adi. ²² Məᅇᅇa aᅇa gày Zəzagəla asà à waᅇ, sləm aᅇha Yayrus. Uwana anəᅇàᅇ Yesu akəđəd ə makəla asik aᅇha. ²³ Anəval, agòđal: "Bəzi dugu gulo azlāmətsay. Kamkam, sà à waᅇ, kabək

ahàl à bəzi à vok kà masla mawur ala ngaha kà masla abəz sifa anha aya.” ²⁴ Yesu asà à afik, tahàd atà sèla, maham à ahəŋ dza anjuvaw taŋisl Yesu.

²⁵ Mis anik la ahəŋ la abatà, aniz akəllal à tsəh ala dagay mavakay kulo gəl anha sèla. ²⁶ Aday vok mənŋa la madàh à slaka azlaməna mavàh yohof, az ləmana anha ala kà anjuvaw. Ama aga n̄uləm aw: say mavədzhəŋ ala pəra. ²⁷ Vərđi anik atsənəŋ tapəhay lakəl anja Yesu, kiya uwaga afà à vok à maham à ahəŋ dza à abà. ²⁸ Adzùgw la gəl anha: “Baŋa gədəbani lukut anha pəra kà, gədàwurla”, agòđ. Aguwà la lig anja Yesu, adəbani lukut anha. ²⁹ Batsàrà makəlay aniz anha atsizl à ahəŋ, atapà vok anha kà adawur ala la đuvats anha la abà. ³⁰ La mok uwatà Yesu atapà kà ndzəđa asà à uda la vok anha. Agolà vok à maham à ahəŋ dza à abà la magòđay: “Uwa à uwana adəbani lukut gulo uwa?” ³¹ Azlaməna matapla la slaka anha tagòđal: “Nəŋà maham à ahəŋ dza taŋisl ka tsi, pəra kanav madəbiŋ ka aya ay?”

³² Yesu anəŋà à makəla gəl kà masəl dza uwana adfahà uwaga. ³³ Anasl adadiya à mis à vok kà uwana asəl uwana adfahà vok la masla. Asà à waŋ, atəđ à makəla asik anja Yesu, apəhal dziriga anha gesina. ³⁴ Yesu agòđal: “Dugu gulo, madiŋal gəl à vok anjak awurà ka ala. Hàd la wurwur, kadawurla la ngərpa anjak la abà!”

³⁵ Mok uwana Yesu apəh gay uwaga kà, azlaməna masləlay tasà à waŋ la mtəga anja Yayrus, mənŋa anja gày madəv kuđa, tagòđal: “Dugu anjak kà adamətsay, kà mana katərəb Sufəl aya ma?” ³⁶ Ama Yesu afà sləm à gay anjatà aw, agòđ à Yayrus: “Ləv aval à kak à gay, kasak à madiŋal gəl à vok aw!” ³⁷ Avà tetəvi à dza kà malakəŋ aw, say Piyer, Yakuba la deda anha Yuhana pəra. ³⁸ Mok uwana abəz à mtəga anja mənŋa anja gày madəv kuđa, Yesu atsənà hulolo anja azladza, la mataway, la mawiyay mənŋa. ³⁹ Yesu adà à gày, agòđ à atà: “Kà mana kadzudəđəkaw la mataway ma? Dugu uwanay kà, adamətsay aw, ama adzəhal pəra!” ⁴⁰ Uwana azladza tatsənà uwaga: “Uwàà...”, tasakwà à ahəŋ, takəđàslal. Kà uwaga: “Dàw à uda gesina!”, agòđ à atà. Say Baba la iyà anja dugu la azlaməna matapla la slaka anha makər uwatà pəra tagəđ à gày. Uwana tahàd la gày uwana la aku tahənà dugu à agu. ⁴¹ Yesu akəs bəzi dugu la ahàl, agòđal: “*Talitha kour*” (Bokuba magòđay: Bəzi dugu sà à afik, gəgòđ à ka) ⁴² Katskats bəzi dugu asà à afik, adzəkà maday. (Mavay anha kà kulo gəl anha sèla) La mok uwana tanəŋà uwaga kà, ləv avàl à atà à gay kayakay. ⁴³ Ama Yesu afàhà à atà akur à lig kà anjuvaw, kà atà mapəh à dza anik aw. Ngaha agòđ à atà: “Vàwwal tatak may!”

6

Azlaməna gudəŋ Nazaret tadiŋ gəl à Yesu à vok aw (Mata 13.53-58; Luka 4.16-30)

¹ Yesu azà vok la slaka uwatà, awùl à gudəŋ anha, uwana azigəŋ la abà. Azlaməna matapla la slaka anha tanəfà. ² Uwana vuđ maduw ləv adasa à waŋ, adzəkà matapla tatak à azladza la gày madəv kuđa la aku. Maham à ahəŋ dza anjuvaw la abatà. Uwana tatsəbal sləm gesina kà, ləv avàl à atà à gay, tagòđ: “Lala abəzà tsəhay gay uwanay la? Dzəba matsihila mana gà à uwanay abəzal ma? Kakay adəhəŋ à tsəhay tatak dzəba anha sèla aw gà uwanay ma? ³ Dza uwanay kà masla mapəđ kəslah aw takay? Kona anja Mariyama, ngaha deda anja Yakuba, la Yosəs, la Yəhuda, la azla Səmon aw ay? Azladedà anha degagamga bay atà la uwanay anina la abanay aw takay?” Kà uwaga à uwana tadiŋal gəl à vok aw. ⁴ Yesu agòđ à atà: “Tazləb masla mapəhal gay à ahàl anja Zəzagəla baməraka la mali, ama la gudəŋ anha kà tazləb masla aw, la tataka azlayaga anha la abà, azlaməna gày anha kà tazləbay aw!” ⁵ Yesu aslala vok kà madəh nadzipo la abatà dəŋ aw, say abək ahàl à azlaməna đuvats anik

à gəl ɲgaha awàr atà ala. ⁶ Ləv avàlal à gay kà uwana madɲal gəl à vok aɲatà la ahəɲ aw.

Yesu asləl azlaməna matapla la slaka aɲha kulo gəl aɲha səla,

la səla səla

(Mata 10.5-15; Luka 9.1-6)

La lig la ahəɲ Yesu auguzàh la gudəɲ la abà gesina kà matapla gay Zəzagəla à azladza.

⁷ Yesu azàl azlaməna matapla la slaka aɲha kulo gəl aɲha səla, adzəkà masləl atà la səla səla, avà à atà maslay kà makor azlamasasəfok mawisiga. ⁸ Afàh à atà akur à lig, agòd à atà: “Kazəbaw tatak à ahəl kà aɲa tetəvi aw, tatak may aw, kiwa aw, sili la zliba la aku aw, say azəva pəra. ⁹ Bəkàw kwimik à asik, ama katsəpaw lukut səla à vok aw!” ¹⁰ Agòd à atà bay: “Baɲa kadaw à gudəɲ à abà kà, dzàw à ahəɲ la mtəga aɲa dza uwana akəs akul lela tsəràh à uwana kadaw aɲkul la abatà. ¹¹ Azladza gudəɲ uwana takəs akul aw, ɲgaha tatsən akul aw kà, kadaw aɲkul la abatà, dèdàw burburu la asik ala kà mapəh à atà ala kà tadàh mawisiga.” ¹² Azlaməna matapla la slaka aɲha tahəd mapəh gay Zəzagəla, kà à azladza aɲa mapəh gay ləv ala, kà atà tasak à tsakana aɲatà. ¹³ Takudəkàh azlamasasəfok mawisiga aɲuvaw, tadahàɲ aməl à azlaməna dɹvats à gəl, aɲuvaw tawàr ala.

Mamətsay aɲa Yuhana masla madàh batem

(Mata 14.1-12; Luka 9.7-9)

¹⁴ Sufəl Herod atsənà gay aɲa Yesu, kà uwana azladza tasəl sləm aɲha baməraka la mali, tagòd: “Yuhana masla madàh batem adawul à uda, gay gə la uwaga aslala vok aɲa madàh nadzipo”, tagòd. ¹⁵ Azlaanik tagòd aya: “Uwaga kà Eliya”, azlaanik bay: “Uwaga masla masləl à waɲ aɲa Zəzagəla bokuba tekula la tataka aɲa azlaməna mapəh à atà gay à ahəl uwana la abà uwarà”, tagòd.

¹⁶ Uwana Herod atsənà gay uwaga, agòd: “Uwaga Yuhana masla madàh batem uwana gəsləl dza kà manats gəl aɲha, masla la uwana adawul à uda la mamətsay.” ¹⁷ Kà uwana Herod la gəl aɲha apəh gay makəs Yuhana dagay uwarà, kà aɲa mawodəɲ à gày daɲay à agu. Adahàɲ kiya uwaga kà gay aɲa Herodiya, mis aɲa deda aɲha Filip, uwana Herod azəb. ¹⁸ Ama Yuhana agòd à Herod: “Uwaga kà delga aw, kà aɲa mazəb mis deda aɲak aw!” ¹⁹ Kà uwaga Herodiya apək ləv lakəl aɲa Yuhana, ayàh kà makəd masla. Ama abəzà à tetəvi aw kà Herod. ²⁰ Kà uwana guba azà Herod kà Yuhana, asəl kà masla dza dziriga ɲgaha sətaka gə, anəɲla masla lela, asəl matsən gay aɲa Yuhana, ama uwana adatsen gay aɲa gesina kà, haɲkəli aɲha awisa ala.

²¹ Mavakay delga aɲa Herodiya adasa à waɲ, uwaga mavakay aɲa mayyi Herod. Masla atà kaf à uda kà aɲa azlaməna aɲha, kà azlamənga aɲa azlaslodzi la azlamənga aɲa kutso Galili. ²² Bəzi dugu aɲa Herodiya adà à gày, ahàb dəs, arabà ləv aɲa Herod la azladza uwana tadzàh madzay atà nna. Sufəl Herod agòd à dahalay: “Mana asa à ka gəvə à ka ma? Nàv uwana asa à ka gesina, gəvə à ka”, agòd. ²³ Azùwal mawadəy: “Uwana kanav à gi gesina gəvə à ka, amiyaka tenma aɲa makoray gulo bay.” ²⁴ Dahalay asà à uda, agòd à iyà aɲha: “Mana gənavay ma?” Agòd: “Nàval gəl aɲa Yuhana masla madàh batem.” ²⁵ Katskats amərəà vok kà mad à slaka sufəl, anàv la magodəy: “Asa à gi kanəl gi gəl aɲa Yuhana masla madàh batem à tasà à abà.” ²⁶ Uwaga kà azà à sufəl la ləv mənga, ama kà mazuw mawadəy aɲha uwana azùw la huma aɲa azladza kà, aslala vok kà makosal aw. ²⁷ Katskats sufəl asləl slodzi kà manəl gəl aɲa Yuhana, kà aɲa masəlla à waɲ. Slodzi ahəd à gày daɲay à agu, anəl gəl aɲa Yuhana. ²⁸ Asəlla gəl aɲa Yuhana à waɲ la tasà la abà, avà

à dahalay. Dahalay bay adàla à iyà aṅha. ²⁹ Mok uwana azlaməna asik aṅa Yuhana tatsən uwaga, tasà à waṅ kà mazəb vok aṅha, kà malay.

Yesu avà tatak may à azladza dəbow zlo
(Mata 14.13-21; Luka 9.10-17; Yuhana 6.1-14)

³⁰ Azlaməna matapla la slaka aṅha tawùl à waṅ à slaka Yesu. Tapəhal uwana tadəhəṅ, la uwana tatəpla à azladza. ³¹ Azladza aṅuvaw tasà à waṅ, aṅuvaw tadəṅ atà, kiya uwaga Yesu la azlaməna matapla la slaka aṅha tabəzà à tetəvi kà mazuw tatak may aw. Gay gà la uwaga Yesu agòd à atà: “Məhəd kokudə gami à fəta a abà, kà anu aṅa maduw ləv ṅuv.” ³² Tahəd la kəslah iyaw kokudə gəl aṅatà à fəta à abà. ³³ Ama azladza aṅuvaw tanəṅà atà à uwana tadəy, aṅuvaw tasəl atà. Tasəhà à uda la gudəṅ la abà gesina tamərà vok la asik ṅgaha tatsà vok à huma kà Yesu la azlaməna matapla la slaka aṅha.

³⁴ Uwana Yesu adasa à ahəṅ la kəslah iyaw la afik kà, anəṅà azladza aṅuvaw. Vok ahəmal kà atà, kà uwana anəṅà atà kà bokuba azlatuwaṅ uwana masla manəṅla atà la ahəṅ aw. Adzəkà matapatàla tatak aṅuvaw. ³⁵ Uwana afats adatəd à ahəṅ, azlaməna matapla aṅha tasà à waṅ à slaka aṅha tagòdal: “Afats adatəd à ahəṅ ṅgaha uwanay bay kà anu la fəta. ³⁶ Wùlla azladza kà tadəy à bəza gudəṅ à abà la azlahud gudəṅ kà tasukw tatak may aṅatà.” ³⁷ Yesu awùlla à uda, agòd à atà: “Akul vāv à atà tatak may tazuw!” Tagòdal: “Lala məbəz tatak may kà madzadzarla azladza kət uwanay la?” ³⁸ Yesu anəv atà: “Kaf ma katay aga la akul la ahəl ma? Dāv, kanəṅàwwəṅ!”

Uwana tanəṅəṅ uwaga: “Kaf gay bərsəw zlo la kilfi səla.” tagòdal.

³⁹ Yesu agòd à azlaməna matapla la slaka aṅha, kà azladza tadzəhà madzay la dzibokw dzibokw la kəsaf biyaga la afik. ⁴⁰ Tadzəhà madzay la dzibokw dzibokw, azlaanik dzim, azlaanik bay dzik zlo, dzik zlo. ⁴¹ Yesu ahəl kaf zlo la kilfi səla uwatà, anəṅà à zagəla, “Kikay”, agòd à Zəzagəla, ṅgaha atsəkà kaf ala, avà à azlaməna matapla la slaka aṅha kà mavəh à azladza. Kiya uwaga ahəlla kilfi səla uwatà ala bay, tavəh à maham à ahəṅ dza gesina. ⁴² Atà gesina tazùw, aslāh atà. ⁴³ La lig la ahəṅ azlaməna matapla la slaka aṅha tahamà gay mapətsəh pətsəh aṅa kaf uwana à vok atəmal à tsəh ala la kilfi səla uwatà, kà adəhà takosà kulo gəl aṅha səla. ⁴⁴ Matugway aṅa azladza uwana tazùw kaf kà taslā zil dəbow zlo.

Yesu aday lakəl dərəv məṅga
(Mata 14.22-33; Yuhana 6.15-21)

⁴⁵ Yesu afà à gay à azlaməna matapla aṅha à gəl kà tadiyà à kəslah iyaw à afik kà matsəvokay kà masla à gay dərəv uda anik, nekwa la Betsayda, mok uwana: ‘Dāv aṅkul!’, agodiyà à maham à ahəṅ dza. ⁴⁶ La mok uwana tavəhla atà nna kà, Yesu adà aṅha à gudəṅ à afik kà madəv kudə. ⁴⁷ Uwana vəd adasa à waṅ, mok uwaga kəslah iyaw bay adabəzay à tataka iyaw à abà, ama Yesu aləg la vədəh kokudə gəl aṅha. ⁴⁸ Anəṅəṅ azlaməna matapla la slaka aṅha kà atà la ṅgərpa la abà kà madla kəslah iyaw, kà uwana afad awùl à atà à adi. Uwana azlagay matuway gotsak, Yesu adà à awtày à slaka aṅatà lakəl iyaw. Asal matsəvkay kà atà. ⁴⁹ Uwana tanəṅəṅ aday lakəl iyaw kà, atà tadzùgw kà tatak mavavat dza, tadzəkà mawiyay, ⁵⁰ kà uwana atà gesina tanəṅəṅ, ṅgaha guba akəs atà. Ama katskats Yesu abadətāmà, agòd à atà: “Wədāv vok à uda, uwaga kà gi ṅwà!”

⁵¹ Ahəd à kəslah iyaw à afik la slaka aṅatà, afad akəsà à asik. Azlaməna matapla la slaka aṅha tahən ala la madzugway məṅga, ləv avəl à atà à gay. ⁵² Kà uwana tasəl godega aṅa nadzipo aṅa kaf uwatà aw, kà uwana hanəkəli aṅatà aslā kà aṅa matsən godega aṅa tatak uwatà aw.

*Yesu awar azlaməna dʒuvats ala la Genesaret
(Mata 14.34-36)*

⁵³ Uwana tadùw à uda à gay dərəv anik kà, tawàdà kəslah iyaw aṅatà à gay gərdza, tabèz à kutso aṅa Genesaret à abà. ⁵⁴ Mok uwana tasà à ahəṅ la kəslah iyaw la afik kà, katskats azladza tasəl Yesu. ⁵⁵ Tadàh à gudəṅ à abà la mahoyay, tadzəkà masàhla à waṅ azlaməna dʒuvats la kəslah la slaka gesina. ⁵⁶ Bà kəla slaka uwana Yesu adà à abà, baməraka la azlaməṅ gudəṅ la abà, la azlabəza gudəṅ la abà gesina azladza tasàhla azlaməna dʒuvats aṅatà à waṅ à vadavaday kasukwa à afik, ṅgaha azlauwana tadèvəhal kuḍa kà madəbani amiyaka gay aṅa lukut aṅha, tawàr ala.

7

*Matapla aṅa azlababa madzidzi gà
(Mata 15.1-9)*

¹ Azla Farisəya la azlaanik la tataka aṅa azlamadzahaga aṅa wakità seriya aṅa Zəzagəla la abà tasà à waṅ à gudəṅ Urusalima, tahamà gay à vok la slaka Yesu. ² Tanəṅəṅ azlaanik la tataka azlaməna matapla aṅa Yesu la abà tazùw tatak may la kokuḍa matsuf manəfay aṅatà.

³ Kà uwana azà à azla Farisəya la azla Yahudiya gesina takəs lakəl aṅa matapla aṅa azlababa aṅatà madzidziga, tazùw tatak may kokuḍa mapal ahəl aw. ⁴ Baṅa tawùl à waṅ la kasukwa tazùw tatak may dàṅ aw, say baṅa tapəl vok lela. Takəs gay aṅa azlababa madzidziga kà məṅga. Uwana azlababa madzidziga tadəhàhəṅ delga bokuba mapalal azlakətsaw, la azlamasik, la azlatasà vərzegani ṅgaha la kəslah mahən à afik aṅuvaw.

⁵ Azla Farisəya la azlamadzahaga aṅa wakità seriya aṅa Zəzagəla tanàv à Yesu: “Kà mana azlaməna matapla la slaka aṅak tatsuf gay aṅa azlababa gami madzidziga aw ma? Tazùw tatak la ahəl àlàhga ma?” ⁶ Yesu awùlla à atà ala: “Hay! Azlayla masla mapəhal gay à ahəl aṅa Zəzagəla Yesayya asəl madzugway aṅkul lela. Akul azlaməna magolla dza, bokuba uwana tatsetsèr à wakità Zəzagəla à abà, Zəzagəla agòḍ:

'Azladza uwanay tazləb gi la gay pəra, ama ləv aṅatà kà kərkər la gi!

⁷ Tagòḍ kà, tawoya gi, ama gay aṅatà kà deyday pəra, kà uwana tapəh mapəhay aṅa azlababa aṅatà kà bokuba mapəhay aṅa Zəzagəla.”[✧]

⁸ Yesu agòḍ à atà: “Kasakaw à mapəhay aṅa Zəzagəla, ṅgaha kanəfaw matapla aṅa azladza!”

⁹ ṅgaha Yesu agòḍ à atà aya: “Hay, kasəlaw makweska gay makoray aṅa Zəzagəla kà makəs mapəhla ala aṅkul. ¹⁰ Musa agòḍ:

'Zlèbà baba aṅak la iyà aṅak. Dza uwana adəfaha à atà mawisiga à vok, say makəḍfay.’[✧]

¹¹ Ama akul kagòḍaw kà: Baṅa dza agòḍ à baba aṅha baṅaw à iyà aṅha: ‘Tenma aṅa tatak gulo uwana asa à gi mav à ka kà mazlak kà, kà uwaga kà *Korban*.’ (Bokuba magòḍay, tatak maviyàga à Zəzagəla) ¹² La lig la ahəṅ kasakaw dza uwana azlak baba baṅaw iyà aṅha dikiḍiki aya aw. ¹³ Kiya uwaga kawisèwwəṅ gay Zəzagəla ala la gay matapla aṅkul. Uwana kazàhàwwəṅ vok gesina, ṅgaha kapàkàw aṅkul ala kà gay Zəzagəla.”

*Azlatatak uwana tadàla àlàh à dza à vok
(Mata 15.10-20)*

¹⁴ La abatà Yesu azàla à maham à ahəṅ dza aya, agòḍ à atà: “Tsèbàw gi sləm gesina aṅkul, tsənàw gay uwanay”, agòḍ à atà, ¹⁵ “Tatak uwana dza azuway kà adəh àlàh

✧ 7:7 7.7 Yesayya 29.13 ✧ 7:10 7.10 2Musa 20.12; 21.17; 5Musa 5.16

à dza à vok aw, say uwana atsa à uda la lèw aṅa dza la tsəh la uwana adfàh àlàh. ¹⁶ Tsenàwwàṅ lela, baṅa sləm aga à akul lakəl aṅa matsənəṅ!”

¹⁷ Mok uwana Yesu adasak à maham à ahəṅ, adà à gày, azlaməna matapla la slaka aṅha tanàval gay lakəl aṅa gay la gay la abà uwatà. ¹⁸ Ngaha Yesu agòd à atà: “Akul babay, kaslawwal à vok aṅa matsənəṅ aw ay? Tatak uwana adiya à hudf aṅa dza atsa à uda aslala vok madfàh àlàh à dza à vok aw, ¹⁹ kà uwana adiya à lèw à tsəh aw, ad à hudf, atsa à uda!” (La gay uwaga la abà Yesu apəh kà dèwdèw tatak may gesina kà, azuw vok) ²⁰ Ngaha agòd à atà aya: “Uwana atsa à uda la lèw aṅa dza la tsəh la uwana adfàhla àlàh. ²¹ Kà uwana la lèw aṅa dza la uwana madzugway mawisiga atsa à uda uwana adala dza à mabila à abà, mad gəl, makədf dza, ²² à gəl gaw, adi, maksafər, demdem, maṅor, mapəh mawisiga lakəl aṅa dza anik, zlapay, masəl gəl aw. ²³ Dèwdèw tatak mawisiga uwanay gesina atsa à uda la lèw aṅa dza la tsəh, uwaga la uwana adahla tsakana.”

*Yesu atà la mis uwana asəl Zəzagəla aw
(Mata 15.21-28)*

²⁴ Ngaha Yesu atsizilla ala la abatà, ahəd à gay makwi aṅa gudəṅ Tir. Adà à gày anik à abà, asəl kà azladza tasəl slaka uwana masla la abà aw, ama aslala vok aṅa mahadf vok à ahəṅ aw. ²⁵ Mis anik uwana dugu aṅha la masasədfok mawisiga lakəl atsənà gay lakəl aṅa Yesu. Katskats asà à waṅ à slaka aṅha, akədèdfal à makəla asik aṅha. ²⁶ Mis uwaga kà mələk gə, tayyà à gudəṅ Fenesəya uwana la kutso Səriya la abà. Adəv kuḍa à Yesu kà makudək masasədfok mawisiga à dugu aṅha lakəl ala. ²⁷ Ama Yesu agòd: “Sək azlabəza tahanla dadàṅ, mazəb tatak may aṅa azlabəza aṅa maməl à azlakəda à ahəṅ kà delga aw.” ²⁸ Mis awùlla à uda: “Sufəl gulo, azlakəda kà uwana la makəla kəsədf atədf kà azlabəza à vədfah, la uwana tatsatsamay!” ²⁹ Yesu awulàlla: “Kà gay aṅak uwanay kà, dà aṅak à mtəga, masasədfok mawisiga adasiya à dugu aṅak lakəl ala!” ³⁰ Awùl aṅha à mtəga, abəz à bəzi aṅha à gəl mahən à ahəṅ gə la azlav la afik, masasədfok mawisiga adasal à kəl ala.

Yesu awura dza bada gə ala, ngaha madagazlam aya

³¹ Ngaha Yesu asà à uda la kutso aṅa Tir. Aguwa la Sədon, ngaha awùl à gay dərəv Galili, aguwa la makoray aṅa azlagudəṅ kulo la abà. ³² Tasàlla dza madagazlamga uwana à waṅ, aslala vok mabədfma aw, tadəval kuḍa kà mabəkəl ahəl à gəl kà mawuriṅ ala. ³³ Yesu adàla à uda la tataka maham à ahəṅ dza la abà, atsizilləṅ à ahəṅ kokudə aṅha, adùwal gay gəl ahəl à sləm à abà, atəf sleslib à ahəl, adəbanì aləh aṅha. ³⁴ Anəṅà à zagəla, abàs vok la tsəh ala, agòd à dza: “*Ephphatha!*” (Bokuba magodəy: Pèzlla à ama ala!) ³⁵ La kirim yewdi sləm aṅha aslāh ala. Katskats tatak uwana awədfəla aləh à ahəṅ, apəzlla, abədfmə lela. ³⁶ Yesu afahà à atà akur à lig, kà tapəh à dza aw. Ama bə la mafāh à atà akur à lig, uwaga tapəh gesina. ³⁷ Ləw avəl à azladza à gay məṅga, tagòd: “Adfahan kà dzəba aṅha səla aw, adfahan kà azlamadagazlam aṅa matsən sləm, azlauwana taslāla vok aṅa mabədfma aw bay tabədfma adagay!”

8

*Yesu avà tatak may à zil dəbow ufad
(Mata 15.32-39)*

¹ La vudf uwatà maham à ahəṅ dza aṅuvaw tahamə gay à vok aya la slaka Yesu. Uwana tatak may aṅatà la ahəṅ aw, Yesu azàla azlaməna matapla à slaka aṅha, agòd à atà: ² “Kay, vok aham à gi kà azladza uwanay, kà uwana anina dagay mahəney makər lagwa, tatak may aṅatà bay adadəv kà atà à gay. ³ Baṅa gəwulla atà à mtəga

anatà la may gà kà, tadàtaf à ahəŋ la tetəvi la ama, kà uwana azlaanik kà tasà à waŋ kà kərkər.”⁴ Azlaməna matapla la slaka aŋha tagòfal: “Lala məbəz tatak may kà aŋa azladza gesina uwanay la kəsaf la abà la?”⁵ Yesu anəv à atà gay ala: “Kaf gay bərsew nna aga à akul la ahəl ma?” “Gay bərsew mədəf”, tagòfal.

⁶ Yesu agòf à azladza: “Dzàhàw madzay!” Nŋaha ahəl kaf gay bərsew mədəf uwatà, “Kikay”, agòf à Zəzagəla, atsakà kaf ala, avà à azlaməna matapla la slaka aŋha, nŋaha azlaməna matapla aŋha tavàhà à atà.⁷ Kilfi bəziga la ahəl aŋatà aya, Yesu ahəl, “Kikay”, agòf à Zəzagəla, avà à azlaməna matapla la slaka aŋha kà mavàh à azladza.⁸ Gesina aŋatà tazùw, asläh à atà. Azlaməna matapla la slaka aŋha tahàm à gay mapətsəh pətsəhga à vok takosà mədəf à uwana atəm à atà à ahəl.⁹ Azladza uwana tazùw kaf uwaga taslà dəbow ufađ. Nŋaha adəgay kà: “Dàw à mtəga aŋkul!”, Yesu agòf à atà.¹⁰ Katskats ahəd à kəslah iyaw à afik la azlaməna matapla la slaka aŋha, tahəd à kutso Dalmanuta.

Azla Farisəya tanav nadzipo (Mata 16.5-12)

¹¹ Azla Farisəya anik tadà à awtəy, tadzəkà mabay vok gay la Yesu. Asà à atà makəsay, gay gà la uwaga tanəv nadzipo la slaka aŋha, kà mapəhatàla, nŋaha atà aŋa masəlay kà ndzəfa aŋha asà à waŋ kà la slaka Zəzagəla.¹² Yesu abàs vok la ndzəfa, nŋaha agòf: “Kà mana azladza aŋa lakana tanav à gi nadzipo ma? Gəpəh à akul la dziriga: Gədəpəhakulla nadzipo đikidiki aw.”¹³ Nŋaha asək atà à ahəŋ, ahəd à kəslah iyaw à afik aya, ahəd à gay mən dərəv anik.

Tatak makəsl tatak ala aŋa azla Farisəya la aŋa Herod (Mata 16.5-12)

¹⁴ Avika azlaməna matapla aŋa Yesu kà mahəl kaf à ahəl. Tatak may la ahəŋ la slaka aŋatà la kəslah iyaw la afik aw, say kaf gay bərsew tekula pəra.¹⁵ Yesu afahà à atà akur à lig, agòf à atà: “Dàw haŋkəli kà tatak makəsl tatak ala aŋa azla Farisəya la aŋa Herod.”¹⁶ Azlaməna matapla la slaka aŋha tavàts gay la tsəh ala kà atà kà atà la tataka aŋatà la abà, tagòf: “Apəh uwaga kà, kà uwana kaf aga anu la ahəl aw.”¹⁷ Yesu asəl uwana tadzugway, anəv atà gay ala: “Kà mana kavatsaw gay la tsəh ala ma? Kà uwana kaf aga akul la ahəl aw ay? Kasəlaw tatak uwanay gotənaŋ aw uwà? Katsənaŋ godega aŋha aw, bə gotənaŋ ay? Matsihila aŋkul ma matsak à ama à gay ay?¹⁸ Yewdi aga à akul la vok, ama kanəŋawla aw ay? Sləm aga à akul lakəl, ama katsənaŋawla aw? Awul akul à gəl gotənaŋ aw ay?”¹⁹ Kaf gay bərsew zlo uwana gətsəkəŋ ala kà aŋa azladza dəbow zlo, ma takosà nna à mapətsəh pətsəhga à uwana kahamàwla gay à vok ma?” “Kulo gəl aŋha səla”, tagòfal.²⁰ Nŋaha Yesu anəv à atà gay ala aya: “Kaf gay bərsew mədəf uwana gətsəkəŋ ala kà aŋa azladza dəbow ufađ bay, ma takosà nna à mapətsəh pətsəhga à uwana kahamàwla gay à vok ma?” “Mədəf”, tagòfal.²¹ “La kità”, Yesu agòf à atà: “Kakay katsənaŋ godega aŋha aw gotənaŋ zlà ma?”

Yesu awur guləf ala la Betsayda

²² Uwana tabəz à gudəŋ Betsayda, tasàlla guləf à waŋ. Tadəval kufa kà aŋa madəbani guləf, kà masla mawur ala.²³ Yesu akəs guləf à ahəl, adàla à uda la gudəŋ la abà, nŋaha adəbal slesliβ à yewdi, abəkəkal ahəl à gəl, nŋaha anəv à dza uwaga: “Kanəŋa tatak ay?”²⁴ Guləf anəŋ à zagəla, agòfal: “Gənaŋa azladza, ama gənaŋa atà kà bokuba azlaahəf uwana taday.”²⁵ Bə gotənaŋ, Yesu adəbani yewdi aŋa guləf aya. Masla atsək yewdi à uda la ndzəfa, anəŋla, anəŋa azlatatak gesina la

✧ 8:18 8.18 Yeremiya 5.21; Hezəkiyel 12.2

paraka. ²⁶ Ngaha la lig la ahəŋ, Yesu agòdɔl kà: “Hàd à mtəga aŋak, kada à gudəŋ à abà aw!”

Piyer apəhla kà Yesu ala,

kà dza uwana Zəzagəla afəl dzakwa à gəl

(Mata 16.13-20; Luka 9.18-21)

²⁷ La lig la ahəŋ, Yesu ahàd à azlabəza gudəŋ uwana à abà la kutso Zəsare, uwana la makoray aŋa Filip la azlaməna matapla la slaka aŋha. Yesu anàv à atà gay ala la tetəvi la ama: “Azladza ma uwa tagòd kà gi ma?” ²⁸ Tawùlla à uda: “Azadza anik tagòd, kà kak Yuhana masla maɔh batem, azlaanik tagòd, kà kak Eliya, azlaanik aya tagòd, kà kak tekula la tataka azladza uwana la abà, Zəzagəla asləl atà à waŋ uwarà.” ²⁹ “Iyay zla! Ama akul ma, gi uwa kagòdɔw uwi?”, Yesu anàv à atà. Piyer awùl à uda, agòdɔl: “Kak, dza uwana Zəzagəla afà à ka dzakwa à gəl.” ³⁰ Yesu afahà à atà akur à lig la magòd à atà: “Kapəhawla gi ala la slaka azladza aw!”

Yesu apəh gay mamətsay aŋha à ahəŋ la mawul à uda aŋha

(Mata 16.21-28; Luka 9.22-27)

³¹ La lig la ahəŋ, Yesu adzəkà matapla azlaməna matapla la slaka aŋha: “Say Kona aŋa dza as ŋərpə məŋga. Azlaməŋga, azlamasiga, la azlaməna mav tatak à Zəzagəla, la azlamadzahaga aŋa wakità seriya aŋa Zəzagəla tadəkweska, ŋgaha tadəkəɔa. La lig aŋa mahəŋay makər adàwul à uda la mamətsay.” ³² Apəh à atà gay uwaga la paraka. Piyer akəs Yesu à ahəŋ kokudɔa aŋha, adzəkà mafahal akur à lig la magòdɔy: “Kapəh kiya uwaga aw!” ³³ Ama Yesu agolà à vok, anəŋà azlaməna matapla anik à adi, ŋgaha adzəkà masläh məl à Piyer à gəl, agòdɔl: “Zà à vok la slaka gulo, kak seteni, kà uwana madzugway aŋak kà bokuba aŋa Zəzagəla aw, ama kiya aŋa azladza.”

³⁴ Ngaha Yesu azəl à maham à ahəŋ dza, la azlaməna matapla la slaka aŋha, agòd à atà: “Baŋa dza asal manəf gi kà, say asak maf gəl à azlatatak aŋha à tsəh, azəb ahəf mamətsay aŋha, ŋgaha anəf gi, bokuba uwana gədàzəbɔy suwaŋ. ³⁵ Kà uwana uwabeyuwi, uwana asal maɔl sifa aŋha la ahəl aŋha, az gəl aŋha ala. Ama uwa-beyuwi, uwana az sifa aŋha ala kà gi, ŋgaha kà gay matsidayga aŋa Zəzagəla kà, masla adəbəl sifa aŋha. ³⁶ Mana akəsa vok à dza uwana abəza tatak aŋa gudəŋ à vok gesina, ama az sifa aŋha ala ma? ³⁷ Tatak la ahəŋ, dza avày kà masukwla sifa aŋha takay? ³⁸ Gay gà la uwaga, baŋa ziruwu az dza kà gi, ŋgaha kà gay gulo lakana la tataka azladza uwana takəs gay aŋa Zəzagəla aw la abà, ŋgaha tadəhəŋ mawisiga, kiya uwaga kà Kona aŋa dza ziruwu adəkəsɔy kà masla suwaŋ, la mok uwana adàwul à waŋ la mazləbɔy aŋa Baba aŋha la abà la azlamalika aŋha.”

9

¹ Yesu agòd à atà aya: “Haɔy, gəgòd à akul, azladza anik uwana la abanay kà, tadəmətsay dikiɔfiki aw, say baŋa tanəŋ makoray Zəzagəla atsa à waŋ la ndzəɔa.”

Mabəɔla vok à ahəŋ aŋa Yesu uwana la gəl gudəŋ la afik

(Mata 17.1-13; Luka 9.28-36)

² Uwana mahəŋay mukwa adada à lig, Yesu ahəl azla Piyer, Yakuba, Yuhana ŋgaha tahàd à matsəkəkəɔay gudəŋ à afik kokudɔa gəl aŋatà. La abatà abəɔla vok à ahəŋ la huma yewdi aŋatà. ³ Lukut aŋha apək medekuga mawutsəɔdayga təlla. Dza la ahəŋ la gudəŋ la vok awud lukut ala kiya uwatà aw. ⁴ Ngaha azlaməna matapla la slaka aŋha makər uwatà tanəŋà Eliya la Musa tabaɔmà la Yesu. ⁵ Piyer agòd à Yesu: “Sufəl gulo, delga kà anu la abanay. Sàk anu məɔh safsaf makər, tekula aŋak, tekula aŋa Musa, tekula aŋa Eliya.” ⁶ Piyer asəl tatak uwana anakà apəhay aw, kà uwana guba

akès masla la azlamèna matapla anik sèla uwanay. ⁷ Habaga asà à waṅ, akèl atà mөлès à adi. La habaga uwatà la abà kà tatsènà dza aḃadma la abà: “Uwaga kà bəzi gay ləv gulo uwana gəwoyaṅ, tsəbàwal sləm!” ⁸ Katskats azlamèna matapla makər uwatà tanəṅla, ama tanəṅà dza aw, say Yesu kokuḃa gəl aṅha la slaka aṅatà pəra.

⁹ Uwana tatsà à ahəṅ la gudəṅ la afik, Yesu afàh à atà akur à lig kà atà aṅa mapəh tatak uwana tanəṅəṅ à dza aw, say baṅa Kona aṅa dza adàwul à uda la mamətsay dadəṅ. ¹⁰ Takès gay uwatà, ama tanəvəhà vok kà atà kà atà: “Mana asal magoḃay mawul à uda la mamətsay ma?” ¹¹ Gay gà la uwaga tanəv la slaka Yesu: “Kà mana à azlamadzahaga aṅa wakità seriya Zəzagəla tagoḃ kà, say Eliya atsa à vok à waṅ dàṅ ma?”[☆] ¹² Agòḃ à atà: “La dziriga, say Eliya atsa à vok à waṅ, adəḃah tatak à ahəṅ gesina. Ama kà mana zlà ma tatsetsèr à wakità Zəzagəla à abà bay kà, say Kona aṅa dza as ṅgərpa məṅga ma, ṅgaha azladza tanərez kà bokuba dza delga aw ma?” ¹³ Ama gəgòḃ à akul: Eliya asà à waṅ, ṅgaha azladza tadəhəlləṅ à vok uwana asà à atà gesina, bokuba uwana tatsetsèr à wakità Zəzagəla à abà lakəl aṅha.”

*Yesu awur bəzi uwana ala la masasəḃok mawisiga
(Mata 17.14-21; Luka 9.37-43)*

¹⁴ Mok uwana tabəziyà à azlamèna matapla anik à vok, tanəṅà maham à ahəṅ dza aṅuvaw uwana takès atà gay à adi. Azlamadzahaga aṅa wakità seriya aṅa Zəzagəla tabəy vok à gay la azlamèna matapla aṅha. ¹⁵ Uwana azladza tanəṅà Yesu kà, tadzà à ahəṅ titi. Katskats tadà à awtəy à slaka aṅha la mahoyay kà maskuwiṅ. ¹⁶ Yesu anəv à azlamèna matapla la slaka aṅha la gay ala: “Kà mana kabayaw vok gay akul nna ma?” ¹⁷ Dza tekula la tataka maham à ahəṅ dza la abà awulalla: “Məṅga, gəsàla bəzi gulo zilga à waṅ, kà uwana masla la masasəḃok uwana avəl tetəvi aṅa mabəḃma aw.” ¹⁸ Baməraka la mali beli masasəḃok akəsàh, amàlal gəl à ahəṅ, huzləv asàhal à gay ala la mapəḃ slid la tsəh ala. Vok aṅha apakahay dzaṅdzaṅ. Gədəv kuḃa à azlamèna matapla la slaka aṅak kà makuḃək masasəḃok mawisiga uwaga, ama taslala vok aw.” ¹⁹ Yesu agòḃ à atà: “Kay, madiṅal gəl à vok aṅkul la ahəṅ aw takay? Dagay mbà gədadza à ahəṅ la akul ma? Dəgay mbà gədəbasakulaṅ ma? Səwgəla bəzi à waṅ!” ²⁰ Tasəlla bəzi à slaka Yesu, mok uwana bəzi adanəṅ Yesu, katskats masasəḃok abiyà bəzi, atəḃ à vəḃah, abàbal, huzləv asəl à gay ala. ²¹ Yesu anəv à baba aṅa bəzi: “Dagay mbà tatak uwanay azəṅ ma?” Baba agòḃal: “Dagay la vərnaga. ²² Aṅuvaw masasəḃok mawisiga uwaga amàlāhal à gəl akəl à abà, à iyaw à abà kà makəḃay. Ama kamkam, baṅa kaslala vok mazlak anu, kà vok aham à ka, kà anu!” ²³ Yesu agòḃal: “Kà mana kagoḃ kà: Baṅa kaslala vok ma? Dza uwana adiṅal gəl à vok aslala vok kà madəh tatak gesina.” ²⁴ Katskats baba aṅa bəzi awiyà: “Gədiṅal gəl à vok, ama zlak à gi, kà uwana madiṅal gəl à vok gulo kà à tsəh ala!”

²⁵ Yesu anəṅà maham à ahəṅ dza tatsà à waṅ à slaka aṅatà, aslèh məl à masasəḃok uwana à gəl, adəḃ gay à dza à ahəṅ aṅa mabəḃma la matsən sləm: “Kak, masasəḃok madagazlamga, sà à dza uwanay lakəl ala, gəgòḃ à ka, kadàdal à gəl ḃikiḃiki aya aw!”

²⁶ Masasəḃok awiyà, agodzàlla bəzi, asà à uda la masla la abà. Bəzi apək bokuba mamətsayga. Kiya uwaga azladza aṅuvaw uwana la abatà tagoḃ kà adamətsay.

²⁷ Ama Yesu akès bəzi la ahəl, atsizlèṅ ala, dzawwa bəzi agəḃ à zagəla à tsəh.

²⁸ La lig la ahəṅ, mok uwana Yesu adawul à gəy, azlamèna matapla la slaka aṅha tanəvla gəl à gəl: “Kà mana anu kà, məslàla vok aṅa makuḃəkay aw ma?” ²⁹ Yesu agòḃ à atà: “Makuḃək tsəhay masasəḃok uwanay kà, say la madəv kuḃa. Ndzəḃa anik la ahəṅ aw.”

Yesu apəh à atà gay mamətsay aṅha

[☆] 9:11 9.11 Malaki 4.5

la mawul à uda aṅha kà masèla
(Mata 17.22-23; Luka 9.43-45)

³⁰ Tadà aṅatà la abatà, taguwà à uda la kutso Galili la abà. Yesu kà asàl kà dza asèl slaka madz à ahəṅ aṅha aw, ³¹ kà uwana atapèl à azlaməna matapla la slaka aṅha, agòd à atà: “Kona aṅa dza tadàviya à ahəl aṅa azladza. Atà tadəkəḏay, ama la lig la ahəṅ gədàwul à uda la mamətsay la mahəṅay makər.” ³² Azlaməna matapla la slaka aṅha tatsənà godega aṅa gay uwatà aw, ṅgaha guba akəs atà bay kà manaval.

Məṅga la tataka gami la abà, ma zlà uwa?
(Mata 17.22-23; Luka 9.46-48)

³³ Tabèz à gudəṅ Kapernahum. Uwana tadà à gày, Yesu anəv à azlaməna matapla la slaka aṅha: “Kà mana kabàyàw vok gay la tetəvi la ama ma?” ³⁴ Ama tadzà à ahəṅ titi, kà uwana la tetəvi la ama kà, tabayà à vok à gay haḏay, tagòd: “Uwa məṅga la tataka gami la abà uwa?” ³⁵ Yesu adzà madzay, azàl azlaməna matapla la slaka aṅha kulo gəl aṅha sèla, agòd à atà: “Baṅa dza asal mapak mazəb gəl gà kà, say apak mabəziga bəziga aṅa azladza gesina, apak masla mazəb à atà kiwa.” ³⁶ Yesu azèb bəzi ṅuvga à ahəl, atsizilla atà à huma à gay. Akəs bəzi la ahəl, agòd à azlaməna matapla la slaka aṅha: ³⁷ “Uwabeyuwi uwana akəs bəzi ṅuvga uwanay kà sləm gulo kà, akəs gi. Ṅgaha uwabeyuwi uwana akəs gi kà, akəs gi pəra aw, ama akəs masla masləl gi à waṅ.”

Dza uwana masla məzam gami aw kà masla slawda gami
(Luka 9.49-50)

³⁸ Yuhana agòd à Yesu: “Sufəl gulo, mənəṅà dza anik uwana akudək masasəḏok mawisiga la sləm aṅak, ama mədèḏal gay à ahəṅ, kà uwana anəfà anu aw.” ³⁹ Ama Yesu agòd à atà: “Kadèḏawwal gay à ahəṅ aw, kà uwana dza la ahəṅ adàh nadzipo la sləm gulo pəra, la lig la ahəṅ kà, atugw à gi gay à vok aw. ⁴⁰ Kà uwana uwabeyuwi uwana masla məzam gami aw, kà slawda gami. ⁴¹ Sèlàw kà, dza uwana adàvə à akul kətsaw iyaw, kà uwana akul aṅa dza uwana Zəzagəla afəl dzakwa à gəl kà, adàbəz à masik aṅha.”

Gay lakəl aṅa zlazlafa aṅa tsakana
(Mata 18.6-9; Luka 17.1-2)

⁴² “Dza uwana adukw tekula aṅa azlabəza uwanay à ahəṅ à tsakana à abà, tadinṅ gi gəl à vok kà, masla kà ṅuləm tawadəl nəvol akur à kuda, taməla à dərəv à abà. ⁴³ Baṅa kà ahəl aṅak la uwana katəḏ à tsakana à abà, nàts à tsəh ala, ṅuləm kà kabəz à sifa la ahəl tekula, kà magay la ahəl sèla nna, uwana adàdala kà à gày akəl uwana à abà adàməts ala aw. ((⁴⁴ La abatà maduwari uwana azuw vok amətsay aw, ṅgaha akəl bay amats ala aw.)) ⁴⁵ Baṅa kà asik aṅak la uwana katəḏiya à tsakana à abà kà, nàts à tsəh ala. Ṅuləm kabəz à sifa la asik tekula, kà mad à gudùh akəl à abà la asik sèla nna, uwana amats ala dikiḏiki aw. ((⁴⁶ La abatà maduwari uwana azuw vok adàmətsay aw, ṅgaha akəl amats ala aw.)) ⁴⁷ Baṅa kà yewdi aṅak la uwana adala ka à tsakana à abà, bəḏ à waṅ, ṅuləm kabəz à sifa la yewdi tekula gà à ka magay la yewdi sèla kà madiya à gudùh akəl à abà. ⁴⁸ La abatà maduwari uwana azuw vok adàmətsay aw, ṅgaha akəl la abà kà madzad atà ala adàmats ala aw.✱ ⁴⁹ Kà uwana dza gesina tadətəka atà slugul à adi la akəl, bokuba uwana tatək slugul à tatak à adi kà matsəḏəṅ.”

⁵⁰ “Kà uwana slugul kà tatak delga, ama baṅa slugul azladay aw, ma kakay kazladawwaṅ ala ma? Gàw la slugul la ləv aṅkul la tsəh, dzàw à ahəṅ la wurwur, kadahawa à magazlay la tataka aṅkul la abà aw!”

✱ 9:48 9.48 Yesayya 66.24

10

*Yesu apahla gay ala lakəl aṅa makudək mis
(Mata 19.1-12; Luka 16.18)*

¹ Yesu asà à afik la abatà, ahàd à gay makwi aṅa kutso Yahudiya la gay dərəv uda anik aṅa Urdun. Bà gotənaṅ maham à ahəṅ dza tahamà gay à vok la slaka aṅha aya. Ngaha atəpatàla bokuba uwana adahàhàṅ koksikoksi. ² Azla Farisəya anik tasà à waṅ à slaka Yesu, asà à atà kà makəsəl maləkaw à ahəṅ kà gay aṅha: “Wakità seriya gami ma avà tetəvi à dza kà makudək mis aṅha takay?” ³ Yesu awùlla à atà ala la magoday: “Mana Musa agod à akul ma?” ⁴ Tagòdal: “Musa avà tetəvi à dza kà matsetser wakità makudək mis, ngaha məsakiya à mis uwatà.”^{*} ⁵ Ama Yesu agòd à atà: “Musa apəh à akul kiya uwatà kà, kà dzaṅdzaṅ aṅa ləv aṅkul. ⁶ Ama dagay madzəka gudəṅ à vok, mok uwana Zəzagəla adahà tatak gesina kà, aṅəl zil la mis pəra.^{*} ⁷ Gay gə la uwaga zil asàkiya à baba aṅha à ahəṅ la iyà aṅha, kà madz à ahəṅ la mis aṅha. ⁸ Atà səla nna tapək vok tekula. Kiya uwaga atà səla aya aw, ama tagay kà vok tekula pəra.^{*} ⁹ Dza avahàṅ ala uwana Zəzagəla ahamàla gay à vok aw.”

¹⁰ Mok uwana atà la kay, azlaməna matapla la slaka aṅha tanàvə Yesu lakəl aṅa gay uwatà aya. ¹¹ Masla agòd à atà: “Baṅa dza akudək mis aṅha, azəb anik, adàh à gəl gaw la mis teraṅa gə uwatà. ¹² La kità babay kà, baṅa mis akweska zil aṅha teraṅa, ngaha adiya à zil anik, adàzab zil.”

*Yesu apis gay à azlabəza à vok
(Mata 19.13-15; Luka 18.15-17)*

¹³ Azladza tasàhla azlabəza ṅuv ṅguvga à Yesu à waṅ, kà madəbani atà la mapis à atà gay à vok. Azlaməna matapla la slaka aṅha taslāh məl à azladza à gəl. ¹⁴ Uwana Yesu anəṅà uwaga, azinal à gəl, agòd à azlaməna matapla la slaka aṅha: “Sàkàw azlabəza ṅuv ṅuvga tasa à waṅ à slaka gulo. Kadəfaw atà gay à ahəṅ aw, kà uwana makoray Zəzagəla kà aṅa azladza uwana bokuba atà uwaga. ¹⁵ Haday, gəgod à akul: Uwabeyuwi uwana akəs makoray Zəzagəla bokuba bəzi ṅuvga aw, adàda à abatà dikiḍiki aw.” ¹⁶ Ngaha azàb azlabəza à ahəl, afahà à atà ahəl aṅha à gəl, la tekula tekula aṅatà gesina, apis à atà gay à vok.

*Bəzi kohana galepi gə
(Mata 19.16-30; Luka 18.18-30)*

¹⁷ Uwana Yesu adatsizilla kà maday aṅha, dza anik asà à waṅ la mahoyay, akədèdal à ahəṅ, agòdal: “Kak Sufəl, kak delga, mana gədehəṅ kà gi aṅa maḃəz sifa adəv à gay aw ma?” ¹⁸ Yesu agòdal: “Kà mana kagod, kà gi delga ma? Dza delga la ahəṅ aw, say Zəzagəla pəra. ¹⁹ Kasəl mapəhay aṅa Zəzagəla bay: Kakəf dza aw, kəs gay aṅa azlababa aṅak la aṅa iyà aṅak.”^{*} ²⁰ Masla agòd: “Məṅga, gədakəs mapəhay uwaga dagay la bəzi gə.” ²¹ Yesu anəṅəz masla la mawoyəṅ, agòdal: “Tatak tekula aləg kà ka: Həd, kadaw azlatatak aṅak ala gesina, vāh sili gə à azlaməna kuḍa, kadàbəz ləmana la zagəla la afik. Ngaha kà, sà à waṅ, kà nəfà à gi!” ²² Ama uwana atsənà uwaga, ləv azəṅ kà gay uwatà, ngaha adà aṅha la mapak ləv gə, kà uwana tatak aṅha aṅuvaw.

²³ Yesu anəṅà azlaməna matapla la slaka aṅha à adi, agòd à atà: “Zlazladfa kà aṅa dza galepi kà mad à makoray Zəzagəla!” ²⁴ Ləv avəl à atà à gay kà gay uwaga. Ama Yesu agòd à atà aya: “Azlabəza gulo, madiya à makoray Zəzagəla kà zlazladfa! ²⁵ Nuləm zlugumi agwu à uda la afik lepiri, kà galepi aṅa mad à makoray Zəzagəla.” ²⁶ Ləv avəl à azlaməna matapla aṅha à gay kayak aya kà gay uwaga, tagòd kà atà kà atà: “Tsa baṅa kiya uwaga ma: Uwa aslala vok aṅa maḃəlay uwa?” ²⁷ Yesu anəṅà

^{*} **10:4** 10.4 5Musa 24.1-4 ^{*} **10:6** 10.6 1Musa 1.27; 5.2 ^{*} **10:8** 10.8 1Musa 2.24 ^{*} **10:19** 10.19 2Musa 10.12-16; 5Musa 5.16-20

à atà à adi, agòd: “Zlazladfa la slaka azladza, ama la slaka Zəzagəla kà zlazladfa aw, kà uwana masla aslala vok kà madfàh tatak gesina.”

²⁸ Piyer agòd: “Nèṅàṅ, mēdasak à tatak gesina à ahəṅ, mēdanəfa ka.” ²⁹ Yesu agòd: “Dziriga, gi bay gəgod à akul: Uwabeyuwi uwana asakiya gày aṅha à ahəṅ, baṅaw azladedə aṅha, la azlaiyà aṅha, la azlababa aṅha, baṅaw azlabəza aṅha à ahəṅ, amiyaka guf aṅha kà gi, ṅgaha kà gay matsidəyga kà, ³⁰ Zəzagəla adàvəl, adàbəz tatak aṅha asik dzim aya, la mok aṅa madz à ahəṅ la gudəṅ la vok: azlagà, azladedə, azlaiyà, azlabəza, azlaguf, azlamatərabəy bay, kà la huma la gay, adàbəzal sifa adəv à gay aw la zagəla la afik aya. ³¹ Ama aṅuvaw uwana tatsà vok à huma, tadəpakah azlaməna à lig, ṅgaha azlaməna à lig bay tadəpakah azlaməna à huma.”

Yesu awulla gay mamətsay aṅha à tsəh kà mamakər

la mawul à uda aṅha

(Mata 20.17-19; Luka 18.31-34)

³² Uwana atà la tetəvi la ama kà mad à Urusalima, Yesu aguwa à huma, guba akəs azlaməna matapla la slaka aṅha, azladza uwana tanəfà atà guba akəs atà babay. ṅgaha Yesu ahəl azlaməna matapla kulo gəl aṅha səla uwatà aya, kokudə aṅatà, adzəkà mapəh à atà gay uwana adàbəzal. ³³ Agòd à atà: “Tsənàwwàṅ, mēda à Urusalima. La abatà tadàvə Kona aṅa dza à ahəl aṅa azlaməṅga aṅa azlaməna mav tatak à Zəzagəla, la azlamadzahaga aṅa wakità seriya aṅa Zəzagəla. Tadàdukwa seriya mamətsay à gəl, tadàməliya à ahəl aṅa azladza uwana tasəl Zəzagəla aw. ³⁴ Tadətsəkəl magodəhay à gəl, tadətafal sleslib à vok, tadəzlabəy la golba, tadəkəday. Ama la mahəṅay mamakər adəwul à uda la mamətsay.”

Manavay aṅa Yakuba la Yuhana

(Mata 20.20-28)

³⁵ La lig la ahəṅ Yakuba la Yuhana, azlabəza aṅa Zebede, tazə vok à slaka Yesu, tagòd: “Məṅga gami, tatak la ahəṅ à uwana mənava à gay ala.” ³⁶ Yesu agòd à atà: “Mana asa à akul gəđahakullanə ma?” ³⁷ Tawulàlla: “Baṅa kadàdza madzay la kursi mazləbəy aṅak la afik kà, vè à anu tetəvi kà madza madzay tekula la ahəl kaf aṅak ṅgaha tekula la ahəl gudzay aṅak!” ³⁸ Yesu agòd à atà: “Kasəlaw tatak uwana kanavaw aw, kaslawwal à vok kà mas tatak à uda la kətsaw ṅgərpa uwana la abà gədəsəy ay? Kadàbəzaw batem aṅa ṅgərpa uwana tadəđah gi à ahəṅ ay?” ³⁹ ṅgaha tawulàlla: “Iyay, məslala vok.” Yesu agòd à atà: “Hadəy, kadəsaw tatak à uda la kətsaw ṅgərpa uwana la abà bokuba gi, kadàbəzaw batem uwana tadəđahgəṅ bay. ⁴⁰ Ama slaka madza madzay la ahəl kaf gulo ṅgaha la ahəl gudzay gulo kà, gay gulo aw. Slaka uwaga kà, Zəzagəla la uwana adəhaṅ à ahəṅ kà aṅa azladza uwana atsatsəmàni à atà.”

⁴¹ Uwana azlaməna matapla anik kulo tatsən gay uwaga kà, taṅəṅuz lakəl aṅa Yakuba atà la Yuhana. ⁴² Gay gə la uwaga Yesu azəl à atà gesina à slaka aṅha, agòd à atà: “Kasəlaw kà azlauwana tanəṅla à atà bokuba azlasufəl aṅa kutso kà takor azladza, ṅgaha azlaməṅ dza aṅatà, tadəfaha à atà ndzəđa à gəl. ⁴³ Ama uwaga apaka vok la tataka aṅkul la abà aw. Ama baṅa tekula la tataka aṅkul la abà asal mapak məṅga kà, say agay masla mazəb kiwa à azlaanik. ⁴⁴ Dza uwana asal mapak dza teraṅa gə la tataka aṅkul la abà kà, say apak mayà aṅa azlaanik aṅkul gesina. ⁴⁵ Amiyaka Kona aṅa dza kà, asà à waṅ kà mazlakəṅ aṅa azladza aw, ama asà à waṅ kà mazlak azladza, ṅgaha kà mav sifa aṅha bokuba tatak mapəlla gəl à azladza aṅuvaw à ahəṅ.”

Yesu awur Bartime guləf ala

(Mata 20.29-34; Luka 18.35-43)

⁴⁶ Uwana tabèz à gudəŋ Yeriko, Yesu la azlaməna matapla aŋha la maham à ahəŋ dza aŋuvaw tasà à uda la gudəŋ uwatà la abà. Dza guləfga la slaka madza madzay la gay tetəvi atsàtsàh tatak. Sləm aŋha Bartime, kona aŋa Time. ⁴⁷ Uwana atsənəŋ kà Yesu zil Nazaret la uwana adà à awtày kà, adzəkà mawiyay: “Yesu, Kona aŋa David, vok aham à kak kà gi!” ⁴⁸ Azladza aŋuvaw taslàhal məl à gəl kà madz à ahəŋ titi, ama masla awiyà la ndzəfa aya: “Kona aŋa David, vok aham à kak kà gi!” ⁴⁹ Yesu atsizilla à ahəŋ, agòd: “Zàlàwwal!” Tazàlalla, tagòdal: “Wàd vok à uda, sà à afik, azàla ka!” ⁵⁰ Nŋaha guləf awits peteli ala, avàl à afik, asà à waŋ à slaka Yesu. ⁵¹ Yesu anàval la gay ala: “Mana asa à ka gəfahakan ma?” Guləf agòdal: “Məŋga, asa à gi gəbèz yewdi gulo.” ⁵² Nŋaha Yesu agòdal: “Hàd, madiŋal gəl à vok aŋak adawur kak ala!” Katskats abəzà à yewdi aŋha, anəfà Yesu.

11

Yesu adiya à gudəŋ Urusalima à abà
(Mata 21.1-11; Luka 19.28-40; Yuhana 12.12-19)

¹ Mok uwana atà nekwa la Urusalima, bokuba la bəza gudəŋ Betfaze la Betaniya, tabəzà à gudəŋ kuvu à afik. (Uwana tazalalla la gay nasara gudəŋ Oliviye) Yesu asləl azlaməna matapla aŋha səla à huma, agòd à atà: ² “Dàw à gudəŋ uwaga à abà la huma aŋkul. Kadàbəzaw à ziwŋŋu ŋuvga mawadəŋ à ahəŋ gə uwana dza adadza à afik diki diki aw. Pèlèw, kasawgəla à waŋ! ³ Baŋa dza agòd à akul: ‘Mana kadəhawlan mi?’, kagodəfawal: ‘Asa à Sufəl gami, adàullàlla à waŋ katskats’.”

⁴ Tahàd, tabəzà à ziwŋŋu mawadəŋ à ahəŋ gə à gəl la gay gamagay, la gay tetəvi. Uwana tapəl ziwŋŋu uwatà kà, ⁵ azladza anik uwana la abatà, tanàv à atà gay ala: “Mana kadəhawlan ma? Kà aŋa ma kapəlaw bəzi ziwŋŋu uwaga ma?” ⁶ Tawul ala bokuba uwana Yesu apəh à atà, ŋgaha azladza tasək atà. ⁷ Tasəlla bəzi ziwŋŋu uwatà à Yesu à waŋ, tabəkəlukut aŋatà à lig, ŋgaha Yesu adà à afik. ⁸ Azladza aŋuvaw tadàw lukut aŋatà à tetəvi à ama, azlaanik tatsəd babasl biyaga uwana la guf la abà, taslàh à tetəvi à ama kà masləkaway. ⁹ Azlauwana la huma aŋa Yesu, la azlauwana tanəfay la tsəh, tawiyà la magodəfay: “Delga kà azladza tazləb Zəzagəla, mapis gay à vok agay la dza uwana atsà à waŋ la sləm aŋa Sufəl.” ¹⁰ Zəzagəla apis gay à makoray aŋa baba gami David à vok, uwana adadzəka vok lagwa. Məzləbà Zəzagəla uwana la zagəla la afik kərkər!”

¹¹ Kiya uwaga Yesu ahàd à gudəŋ Urusalima, kà mad à gày Zəzagəla à agu, anəŋà azlatatak gesina lela. Uwana gay mokokhu adagay, ahàd à gudəŋ Betaniya la azlaməna matapla aŋha kulo gəl aŋha səla uwatà.

Yesu atsafla gudəv
(Mata 21.18-19)

¹² Lebəŋ gə, uwana tasà à uda la gudəŋ Betaniya, may akəs Yesu. ¹³ Anəŋà gudəv la babasl la vok, ŋgaha ahàd kà mayàh mayyay la vok aŋha. Ama uwana adabəziya à tsəh aŋha kà, abəzà mayyay la vok aŋha aw, say babasl pəra, kà uwana kaslà aŋa gudəv dadəŋ aw. ¹⁴ Yesu agòd à gudəv: “Dza adəzuw mayyay la vok aŋak aŋa tetuwa aya aw!”

Azlaməna matapla la slaka aŋha tatsənà gay uwaga.

Yesu akudəkàh azlaməna tsakalay à lag la gày Zəzagəla la aku
(Mata 21.12-17; Luka 19.45-48; Yuhana 2.13-22)

¹⁵ Uwana tabèz à Urusalima, Yesu ahàd à mən gày Zəzagəla à agu. Adzəkà makudəkàh azlaməna tsakalay à uda, la azlaməna masukw tatak la gày Zəzagəla la aku. Adakwà azlatable aŋa azlaməna mabəfəla sili à ahəŋ la azlaslaka madza

madzay aña azlaməna madaw habakoku ala. ¹⁶ Asà kà dza baməraka tekula aña mad à gày Zəzagəla à agu la tatak lakəl aw. ¹⁷ Atapla tatak à azladza, agòd: “Aganay uwana tatsetsèr à wakità à abà, Zəzagəla agòd:

'Sləm aña gày gulo kà uwaga gày madəv kuɗa aña azladza gudəŋ à vok gesina. Ama akul kà, kadapakawwan̄ ala kà bokuba tsakur aña azlaməna gəl.'”[☆]

¹⁸ Azlaməŋga aña azlaməna mav tatak à Zəzagəla, la azlamadzahaga aña wakità seriya aña Zəzagəla tatsənà gay uwatà. Gay gə la uwaga tayàh Yesu kà maziŋ ala. Ama guba akəs atà kà masla, kà uwana ləv avəl à azladza à gay gesina kà gay aŋha.

¹⁹ Uwana mokokhu adasa à wan̄, Yesu la azlaməna matapla la slaka aŋha, tasà à uda la gudəŋ la abà.

*Gay lakəl aña gudəv uwana agul afik
(Mata 21.20-22)*

²⁰ La gay bebəŋ bəŋ uwana tadùw à awtày la abatà, tanəŋà gudəv uwatà aya, adagul à afik la slilih gə gesina. ²¹ Awùl à Piyer à gəl, agòd à Yesu: “Məŋga gulo, nəŋà gudəv uwana katsàfla, kà adagul à afik tsi!” ²² Yesu awùlla à atà ala: “Haday, gəgod̄ à akul, baŋa kadiŋaw gəl à Zəzagəla à vok kà, ²³ kaslawwal à vok aña magod̄fay à gudəŋ uwanay: Zà vok la abanay, tsà gəl à dərəv à abà. Baŋa kadzurkaw la ləv aŋkul la tsəh aw, kadiŋawwal gəl à vok la ləv aŋkul la tsəh kà, uwaga adàpakakulla vok haday. ²⁴ Gay gə la uwaga gəgod̄ à akul, baŋa kadəvwaw kuɗa kà manav tatak anik la sləm gulo kà, diŋàwwal gəl à vok kà kadabəzawwal, ŋgaha tadàvəkulla. ²⁵ Mok uwana katsizlāwla kà madəv kuɗa kà, baŋa gay la ahəŋ la ləv aŋkul la tsəh la dza anik kà, matsalan̄ mawisiga aŋha ala ŋgaha Baba aŋkul, uwana la zagəla la afik amatsakulan̄ ala bay. ((²⁶ Ama baŋa kamatsawwan̄ azladza anik ala aw kà, Baba aŋkul uwana la zagəla la afik adàmatsakulan̄ ala bay aw.))”

*Uwa avà maslay à Yesu uwà?
(Mata 21.23-27; Luka 20.1-8)*

²⁷ Tawùl à Urusalima aya. Mok uwana Yesu auguzahay la gày Zəzagəla la aku kà, azlaməŋga aña azlaməna mav tatak à Zəzagəla, la azlamadzahaga aña wakità seriya aña Zəzagəla, la azlamasiga tasà à wan̄ à slaka Yesu. ²⁸ Tanəv à Yesu la gay ala: “La maslay ma uwala kadàh sləray uwanay la? Uwa avà à ka tetəvi kà madàh sləray uwanay uwa?” ²⁹ Yesu awùlla à atà ala: “Gi bay, gənav à akul manavay tekula. Baŋa kawulawgəla, gi bay gədəpəhakulla maslay uwana gədàhla sləray. ³⁰ Uwa avà tetəvi à Yuhana kà madàh batem uwa? Zəzagəla ay? Awma azladza takay? Wùlāwgəla!” ³¹ Ama takəs sawaray kà atà kà atà, tagòd: “Baŋa məgod̄ kà: Zəzagəla la uwana avəl tetəvi kà, adəgod̄ à anu: Ka mana kadiŋawwal gəl à vok aw zlà ma? ³² Ama baŋa məgod̄ kà, azladza tavəl tetəvi tsa kità aw kà...” (Guba akəs atà kà azladza, kà uwana azladza gesina tanəŋà Yuhana kà masla kà dza uwana Zəzagəla asləl à wan̄ la dziriga) ³³ Kà uwaga tagòd̄ à Yesu: “Məsəl aw.” Yesu agòd̄ à atà: “Ayyà, gi bay, gəpəhakulla dza uwana avà à gi tetəvi aña madàh tatak uwanay suwan̄ aw.”

12

*Gay la gay la abà aña azlamagamza makəsafər gə
(Mata 21.33-46; Luka 20.9-19)*

¹ Yesu apəh à atà gay la gay la abà, agòd: “Dza anik atsəb matavərək à guf aŋha à abà, akəsəl zlagam à adi; adàhà slaka à ahəŋ kà makudits iyaw mayyay matavərək uwatà à abà, aŋəl gày kà aña masla manəŋla guf. Asàkla à azlamagamza aŋha la ahəl, adà aŋha à mauguzahay anik kərkər.”[☆] ² Uwana təla mahəny tatak adasa

[☆] 11:17 11.17 Yesayya 56.7; Yeremiya 7.11 [☆] 12:1 12.1 Yesayya 5.1-2

à wan, aslèl kohana anha à slaka azlamagamza uwatà kà, mavàl humà tatak anja guf anha suwan. ³ Ama atà takès magamza uwatà, tazlàb, takudèk la ahàl deyday. ⁴ Dza anja guf aslèl kohana anik à slaka anjatà aya. Azlamagamza tatsàh à gəl, ngaha tatsèkal magodahay à gəl. ⁵ Dza anja guf aslèl magamza anik aya. Masla kà takèd. Tadfaahànɲ azlamagamza anik à vok anjvaw kalkal kiya uwaga, tazlàbàh azlaanik, ngaha azlaanik bay takèd atà. ⁶ Atèm kà dza anja guf à ahəɲ kà dza tekula pəra, bəzi gay ləv anha uwana awoyàn mənɲa. La madəvla à gay, aslèl à slaka anjatà, adzùgw kà: 'Tadàzləb kona gulo haday aw ay', agòd. ⁷ Ama atà tagòd kà atà kà atà: 'Aganay dza uwana adàzuw gày. Sàw à wan, məkəf ngaha guf adàgəf à anu!' ⁸ Takàs masla, takèd masla, tamèl à uda la guf la abà."

⁹ Yesu agòd: "Iyay zla, mana dza anja guf adàdehəɲ ma? Adàsa à wan, adàkad azlamagamza makəsafərga uwatà, adàvə guf uwatà à azlaanik. ¹⁰ Haday, kadzənàw gay uwanay la wakità Zəzagəla la abà: 'Akur uwana azlaməna maɲal gày tamèlla kà, masla la uwana adapak akur mawad gày.

¹¹ Aganay uwana Sufəl Zəzagəla adfaànɲ uwaga kà nadzipo la huma yewdi gami'!"*

¹² Azlamadzahaga anja azla Yahudiya tayàh kà makəs Yesu, kà uwana atà tasəl, kà Yesu apèh gay la gay la abà uwaga kà lakəl anjatà. Ama guba akès atà, kà maham à ahəɲ dza, kà uwaga à uwana tasàkal, tadà anjatà.

Mapəl hadama à mənɲ sufəl

(Mata 22.15-22; Luka 20.20-26)

¹³ Ama katskats azlaməna mav tatak à Zəzagəla, la azlamadzahaga anja wakità seriya anja Zəzagəla, la azlamasiga taslèl azla Farisəya anik, la azlaanik la tataka anja maham à ahəɲ matsən vok gay la sufəl Herod kà magəf uwana à afik, azlayla kà vok kà makəsla. ¹⁴ Tasà à wan, tagòd à Yesu: "Mənɲa, məsəl kà kapəhay kà say dziriga pəra, la madz à ahəɲ bokuba uwana asà à Zəzagəla, pèh à anu wakità seriya gami, ma avà à anu tetəvi anja mapəl hadama à mənɲ sufəl Zəsar takay? Awma məpəlal aw takay?" ¹⁵ Ama Yesu asəl kà madzugway anjatà kà mawisiga, agòd à atà: "Kà mana kavavaraw gi kiya uwaga ma? Sàwgəla sili uwaga à wan gənəɲəɲ." ¹⁶ Tasàlla sili à wan. Agòd à atà: "Gəl la sləm uwanay la sili la afik ma anja uwa?" Tagòdal: "Anja Zəsar." ¹⁷ Yesu awùlla à atà ala: "Delga, vaw à mənɲ sufəl Zəsar tatak uwana anha, vaw à Zəzagəla bay tatak uwana anja Zəzagəla." Ləv avàl à atà à gay kà gay anha, məslək la ahəɲ aw.

Manavay lakəl anja mawul à uda la mamətsay

(Mata 22.23-33; Luka 20.27-40)

¹⁸ Azlaanik la tataka anja azla Sadukiya la abà, tasà à wan à slaka Yesu. (Atà kà, mawul à uda la mamətsay la ahəɲ aw, tagòd) ¹⁹ Tagòd à Yesu: "Mənɲa, Musa atsetsèr à anu mapəhay uwanay: 'Baɲa dza anik amətsay, asàkiyà à mis anha à ahəɲ kokudfa bəzi, say deda anha azəb mis à uda la gay kudfa la abà. Ngaha abəziya azlabəza la mis uwatà kà à huma anja deda anha uwana aməts.'* ²⁰ Azladeda zilga mədəf la ahəɲ. Magolga anjatà azəb mis, ngaha aməts kokudfa mayyay bəzi. ²¹ Masəla azəb à uda la gày kudfa la abà, amətsàlànɲ ala kokudfa mayyi bəzi aya. Kiya uwaga apakà vok la maməkər anjatà bay. ²² Kiya uwaga atà mədəf nna mis atsetsèr à atà à gay, taməts kokudfa mayyi bəzi la masla. La lig la ahəɲ, mis aməts suwan. ²³ Ngaha tak ma, la mok uwana azladza tadawul à uda la mamətsay ma, mis ma adàgay ma anja uwa tak uwa? Kà uwana agà mis anjatà mədəf nna!" ²⁴ Yesu awùlla à atà ala: "Kazawla haday zla! Kasəlaw wakità Zəzagəla aw, kasəlaw maslay anha babay aw.

* 12:11 12.11 Mahabay 118.22-23 * 12:19 12.19 5Musa 25.5

²⁵ Kà uwana la vudf uwana azlamazimnekidf tadàwul à uda la mamòtsay kà, azlamis la azlazil tadàzab vok aya aw, ama tadàpakahay kà bokuba azlamalika, uwana la zagèla la afik pèra. ²⁶ Lakèl anja azlamazimnekidf, uwana tawul à uda la mamòtsay kà, kadzènjàw dikidiki la wakità la abà aw uwà? Pañaw ma uwala aɓadlamà à Musa la alàl anja akàl la abà, la gay kuswekuswe la abà ala? Agòɗal: 'Gi Zèzagèla anja Abèraham, gi Zèzagèla anja Isak, ngaha gi Zèzagèla anja Yakuba bay.'[☆] ²⁷ Uwaga bokuba magoɗay kà Masla kà Zèzagèla anja azlamazimnekidf aw, ama anja azlauwana la sifa. Gay gà la uwaga kazahawla la dziriga."

*Mapèhay anja Zèzagèla uwana aduwa à vok
(Mata 22.34-40; Luka 10.25-28)*

²⁸ La kaslà uwatà madzahaga anja wakità seriya anja Zèzagèla la ahèj la abatà, atsèbà à atà slèm kà tabày vok à gay. Atsènanj kà Yesu awùlla à azla Sadukiya kà lela. Azà vok à awtày, anàval à gay ala: "Mapèhay ma uwala à uwana aduwa vok ala?" ²⁹ Yesu awulàlla: "Aganay uwana aduwa azlaanik gesina: 'Tsènàwwàn akul azladza Isèrayel! Sufèl Zèzagèla gami kà, masla Sufèl kokudfa gèl anja. ³⁰ Wòyà Sufèl Zèzagèla anjak la lèw anjak gesina, la sifa anjak gesina, la hanjèli anjak gesina, ngaha la ndzèɗa anjak gesina.' ³¹ Aganay mapèhay masèla: 'Wòyà masla magay anjak bokuba gèl anjak!' Mapèhay uwanay la uwana aduwa azlaanik gesina." ³² Mèj dza uwatà agòɗal: "Delga Sufèl, kapèh dziriga, Zèzagèla tekula, anik la ahèj aw, say azladza takès gay anja. ³³ Say dza awoy Zèzagèla la lèw anja, la hanjèli anja, la ndzèɗa anja gesina, ngaha bay awoy masla magay anja babay bokuba gèl anja. Manèf mapèhay sèla uwaga la uwana aduwa tatak gesina uwana mèdawal à akàl à tsèh kà anja Zèzagèla, la uwana mèvèl gesina."[☆] ³⁴ Yesu anèjanj kà madzahaga anja wakità seriya uwatà awùlla à uda la hanjèli, ngaha agòɗal: "Kak kà, kèrkèr la makoray Zèzagèla aw."

La lig la ahèj guba akès atà gesina kà manaval gay anik.

*Dza uwana Zèzagèla afàl dzakwa à gèl ma Kona ma anja uwa?
(Mata 22.41-46; Luka 20.41-44)*

³⁵ Mok uwana Yesu atàpatàla la gày Zèzagèla la aku, anàvè à atà gay uwanay: "Kakay azlamadzahaga anja wakità seriya tagoɗay kà: Dza uwana tafàl dzakwa à gèl, kà mayyi à tsèh ala anja David ma? ³⁶ Kà uwana Masasèɗok Zèzagèla la uwana aguwà la David la abà, à uwana apèh la gèl anja:

'Sufèl agòɗf à Sufèl gulo:

'Dzà madzay la ahàl kaf gulo lakèl, ngaha gèdàbèk azlamèna mèzam anjak à tsèh asik anjak.'[☆]

³⁷ David la gèl anja azàlèl Sufèl, ngaha ma kakay Kristu kà agay mayyi à tsèh ala anja David ma?"

*Dahàw hanjèli kà azlamèna wakità seriya anja Zèzagèla
(Mata 23.1-36; Luka 20.45-46)*

Maham à ahèj dza anjvaw tatsèna gay anja Yesu la marabay. ³⁸ Agòɗf à atà la matapla anja la abà: "Dahàw hanjèli kà azlamadzahaga anja wakità seriya! Asa à atà mauguzahay la dawarawa mènja la vok, asa à atà kà azladza tasokw à atà la slaka maham gay à vok. ³⁹ Tayahay kà slaka madza madzay delga la gày mazuw tatak may la aku. ⁴⁰ Tazàb tatak à azlamis kudfa ala, ngaha la madèw kudfa zinjinga kà azladza anja magoɗay kà atà azladza dziriga. Atà tadàbèzal seriya dzanjanzanga."

[☆] 12:26 12.26 2Musa 3.6 [☆] 12:33 12.33 3Musa 19.18; 5Musa 4.35; 6.4-5; Hosèya 6.6 [☆] 12:36 12.36 Mahabay 110.1

Mav tatak à Zəzagəla aña mis kudfa
(Luka 21.1-4)

⁴¹ Yesu adzà madzay nekwa la sahar sili, la gày Zəzagəla la aku, ngaha anəñà uwana azladza tabàk sili à sahar à agu. Azlagalepi anik aņuvaw tavàh məņga. ⁴² Mis kudfa gà asà à waņ, awits nini səla à agu. ⁴³ Yesu azàl azlaməna matapla la slaka aņha, agòd à atà: “Gəgòd à akul: mis kudfa uwanay kà, avà sili uwana aduwa à azladza anik gesina, ⁴⁴ kà uwana atà kà, tavà sili aña ləmana aņatà məņga, ama mis kudfa uwanay avà gesina, anik aņha la ahəñ kà mazuway aw.”

13

Makal gày Zəzagəla à ahəñ
(Mata 24.1-2; Luka 21.5-6)

¹ Uwana Yesu adasa à uda la gày Zəzagəla la aku, tekula la tataka aña azlaməna matapla la slaka aņha agòdal: “Məņga gulo, nərəz azlaakur aña gày uwanay tsi, atà dzəba aņha səla aw!” ² Yesu awulàlla: “Kanəña gày məņga uwanay ay? Amiyaka akur tekula kà, adəgòdal à gay aw. Azlaməna məzam tadəbazlah à ahəñ gesina.”

Madzəka vok aña ngərpa
(Mata 24.3-14; Luka 21.7-19)

³ Yesu ahàd à gudəñ à afik, adzà madzay la gudəñ kuvu la afik, la huma magol gày Zəzagəla. Azla Piyer, Yakuba, Yuhana la Andəre uwana kokudfa gəl aņatà, tanàval: ⁴ “Pəhanula, mbà tatak uwanay adəpaka vok ma? La mana mədànəñəñ madəv à gay aña tatak uwaga adàsa à waņ ma?” ⁵ La abatà Yesu adzəkà mapəhla ala la magodfay: “Dahàw haņkəli, dza avavar akul aw! ⁶ Kà uwana azladza aņuvaw tadàsa à waņ la sləm gulo, tadəgòdofay: ‘Gi la uwana, gi dza uwana Zəzagəla afàl dzakwa à gəl.’ Tadəzah azladza ala aņuvaw. ⁷ Baña kadətsənaŋ gay guvəl la slaka nekwa gà, ngaha uwana la slaka kərkər gà kà, guba akəs akul aw. Say uwaga adapaka vok leri, ama uwaga kà makəf gəl aņha dadəñ aw. ⁸ Kà uwana azladza kutso anik tadəp guvəl la azladza kutso anik, makoray aña sufəl anik tadəp guvəl la makoray aña sufəl anik. Kutso adəbəlaka vok la slaka anik anik, ngaha may məņga adàsa à waņ. Uwaga madzəka vok aña ngərpa bokuba mazay aña hudf bəzi pəra.”

⁹ “Ama akul kà, dfaħàw haņkəli kà gəl aņkul, kà uwana tadəkasaħ akul, ngaha tadədfahla akul à huma seriya. Tadəzlabah akul la gày madəv kudfa la aku. Tadətsazlah akul à huma azlaməņga, la azlasufəl kà gay gulo, ngaha kadəpahaw gay gulo la huma aņatà. ¹⁰ Say dza gesina la gudəñ la vok tadətsənaŋ gay Zəzagəla dadəñ. ¹¹ Baña takas akul, tadala akul à huma seriya, guba adəkasaħ akul dadəñ, kà gay uwana kadəpəhaw à atà à adi aw. Ama baña kaslā adàsa à waņ, gay uwana kadəpəhaw kà kadəbəzawwal la ləv aņkul la tsəh, kà uwana gay uwanay kà, gay aña gəl aņkul aw, ama Masasəfok Zəzagəla adəvə à akul! ¹² Azladza tadəvah azladedə aņatà la ahàl aņatà kà makəf atà. Baba bay adəva bəzi aņha kà aña makədfay, azlabəza bay tadəgohla afəf à azlababa aņatà à gəl, ngaha tadəkəf atà. ¹³ Azladza gesina tadəpəsewah akul lakəl aña gay gulo. Ama dza uwana adəbasin tsərah à awtəy la tetəvi Zəzagəla la ama kà, masla kà adəbəlay.”

Masla məzam aña dza uwana Zəzagəla afàl dzakwa à gəl
(Mata 24.15-28; 21.20-24)

¹⁴ Yesu agòd bay: “Kadənəñaw dza uwana tazala: Məzam aña Zəzagəla adədza madzay la slaka uwana azlayla aw, (Dza uwana adzeñ uwaga kà atsənañ lela!), azla-uwana la Yahudiya tadəhoy à gudəñ à afik. ¹⁵ Dza uwana la gəl gày, adàsa à vədfah, ama adədə à gày kà mahəl tatak aņha aya aw. ¹⁶ Dza uwana la guf la abà, adəwul à mtəga kà mahəl lukut aņha bay aw. ¹⁷ Ngərpa kà aña azlamis uwana la bəza la hudf,

ngaha azlamis uwana bəza vərna aga à atà la ahàl, la mavakay uwatà. ¹⁸ Dènvàw kufà à Zəzagəla kà tatak uwaga aṅa mapak vok la təla anasl aw. ¹⁹ La kaslà uwatà kà, ngərpa mənğa adəgay la ahəṅ, uwana adapak vok dagay uwana Zəzagəla adəhà gudəṅ à vok tsəràh à lakana aw, adəpaka vok bokuba uwaga aya d̄ikid̄iki aw. ²⁰ Ama Zəzagəla adag azlamavakay uwatà desl kà azladza aṅha uwana adatsatsamani à atà. Baṅa kiya uwaga aw, kà dza adàbəlay d̄ikid̄iki aw.”

²¹ “Kiya uwaga, baṅa dza anik agod à akul: ‘Aganay dza uwana Zəzagəla afàl dzakwa à gəl la abanay, à agatà, la abatà’, kadiṅawwal gəl à vok aw! ²² Kà uwana azlaməna mapəh à atà gay à ahàl fidaga tadəsaha à waṅ, tadəpahla azlanadzipo anik anik ala, kà maz azladza uwana ala Zəzagəla adatsatsamni atà, à baṅa taslala vok. ²³ Akul zlà kà, d̄ahàw haṅkəli! Gədapəh à akul tatak uwaga à vok à abà dagay uwarà.”

Mawul à waṅ aṅa Kona aṅa dza
(Mata 24.29-31; Luka 21.25-28)

²⁴ “La mavakay uwatà, la lig aṅa ngərpa la ahəṅ, afats adətəf à zagəla, təla adàudəy aya aw. ²⁵ Azlatsetsiliṅ tadəsokw à ahəṅ la zagəla, azlamaslay uwana la zagəla la afik tadàbəlaka vok. ²⁶ Ngaha azladza gesina tadənəṅ Kona aṅa dza atsa à ahəṅ la habaga la abà, la ndzəfa ngaha la mazləbəy mənğa. ²⁷ Adəsləl azlamalika aṅha à slaka gesina, kà maham à gay azladza uwana à vok Zəzagəla atsatsàmàni atà, dagay la gay tər gudəṅ à vok ufad.”

Uwana gudəv apəhla ala
(Mata 24.32-35; Luka 21.29-33)

²⁸ “Tapawla gay la gay la abà aṅa gudəv: Baṅa azləl ahàl mawga babasl adəy, kasəlaw kà təla madara kà nekwa. ²⁹ Kiya uwaga babay, baṅa kanəṅaw tatak uwaga apakà vok gesina, səlāw kà, Kona aṅa dza kà nekwa la gay gamagày kà mas à waṅ. ³⁰ Hadəy, gəgod à akul: Azladza aṅa zamana uwanay tadədəv à gay dadəṅ aw, say baṅa tatak uwanay adəpaka vok gesina dadəṅ. ³¹ Zagəla la kutso tadədəv à gay, ama gay gulo kà, adədəv à gay d̄ikid̄iki aw.”

Zəzagəla pəra asəl kaslà madəv à gay
(Mata 24.36-44)

³² “Ama dza asəl mavakay uwatà, baṅaw kaslà uwatà aw, azlamalika uwana la zagəla la afik tasəl aw, Kona aṅa dza bay asəl aw, say Baba kokufà gəl aṅha pəra. ³³ Dahàw haṅkəli, kadzewhal aw, kà uwana kasəlaw mok uwana tatak uwaga adəpaka vok aw. ³⁴ Adəpakay kà bokuba dza uwana ad à mauguzahay, asàkiyà à gày aṅha à ahəṅ, aviyà à ahàl aṅa azlamagamza aṅha, avàhà à atà sləray ala, ngaha agod à masla manəṅla gamagày: ‘Say kanəṅla lela, kadzəhal aw!’ ³⁵ Kà uwaga dzàw à ahəṅ la adi, kà uwana kasəlaw mok uwana zil gày adəwul à waṅ aw, bi la mokokhu, bi la tataka vəd̄, bi la mawiyay gotsak, bi məl palaha. ³⁶ Baṅa atsa à waṅ katskats, abəza akul à gəl la madzəhal la abà aw. ³⁷ Tatak uwana gəgod à akul, gəgod à azladza gesina babay: Dzàw à ahəṅ la adi!”

14

Azlaməṅga tadəha dabaray kà makəs Yesu
(Mata 26.1-5; Luka 22.1-2; Yuhana 11.45-53)

¹ A lig mavakay səla kà aṅa madzəka madəvadəy Paska uwana azladza tazuw Pain kokufà tatak makəslin, azlaməṅga aṅa azlaməna mav tatak à Zəzagəla, la azlama-dzahaga aṅa wakità seriya aṅa Zəzagəla tayàh tetəvi la vuđ uwatà, kà makəs Yesu la

✧ 13:26 13.26 Yesayya 13.10; Yoyel 2.10,31; Daniyel 7.13

demdem, ngaha aña makəday. ² Tagodf: “Mədəkəs la vudf madəvaday aw, kà azladza aña madzəka magazlay aw.”

Mis adzadzab aməl matərsin à Yesu à gəl

³ Uwana Yesu la gudəŋ Betaniya, la kay aña Səmon, masla akəl zagəla, mok uwana adadza madzay kà mazuw tatak may kà, mis anik asà à waŋ la aməl matərsin la ahəl la koloba gə, sləm aña aməl uwatà kà nar. Tsakalay aŋha kà zlazladfa. Mis uwatà apəzl koloba, adzadzab matərsin uwatà à Yesu à gəl. ⁴ Azladza anik uwana la abatà kà, aziŋ atà à gəl, tagòd: “Kà mana awis aməl matərsin aŋha ala deyday ma? ⁵ Agayña aduw matərsin gə ala aña sili dadərmokw makər, ngaha avàh sili gə azlaməna kudfa la uwana aduwa à vok.” Kiya uwaga taŋoŋüz à tsəh ala lakəl aŋha. ⁶ Ama Yesu agòd à atà: “Sàkàwwal! Kà mana kavərawla gay ma? Adəh à gi sləray delga gə. ⁷ Azlaməna kudfa kà, atà la slaka aŋkul koksikoksi, kaslawwala vok aña madaha à atà delga koksikoksi bokuba uwana asa à akul. Ama gi gədàdza à ahəŋ la akul koksikoksi aw. ⁸ Mis uwanay adfahà uwana aslala vok. Masla adəh gi aməl matərsin à vok kà, kà madəh gi à ahəŋ aña maf gi à zəvay à agu. ⁹ Hadfay, gəgodf à akul: La gudəŋ la vok gesina, uwana tadəpah gay marabəŋ, tadəpəhay bay tatak uwana mis uwanay adfahəŋ, ngaha mis uwanay adəwul à atà à gəl.”

*Yudas asal mat kaf à Yesu à gəl
(Mata 26.11-16; Luka 22.3-6)*

¹⁰ La lig la ahəŋ, Yudas Iskariyot, tekula la tataka aña azlaməna matapla kulo gəl aŋha səla la abà, ahəd à slaka azlamadzahaga aña azlaməna mav tatak à Zəzagəla kà mat kaf à Yesu à gəl. ¹¹ Uwana tatsənà uwaga kà, tarəb, tagòd: “Mədàvə à ka sili.” Dagay kaslā uwatà, Yudas ayəh tetəvi kà mapəhla Yesu ala.

Yesu azuw tatak may aña Paska

*la azlaməna matapla la slaka aŋha kulo gəl aŋha səla
(Mata 26.17-25; Luka 22.7-14; Yuhana 13.21-30)*

¹² La mavakay teraŋa aña madəvaday Pain kokudfa tatak makəsliŋ, vudf makadf magadzaw aña Paska, azlaməna matapla aŋha tanəval à gay la: “Lala asa à ka kà məday kà madəh à ka tatak may aña madəvaday Paska à ahəŋ la?” ¹³ Yesu asləl azladza səla la tataka aŋatà la abà, agòd à atà: “Dəw à gudəŋ à abà, dza la ahəŋ la tuguzl lakəl, la iyaw gə, kadəgagamaw akul nna. ¹⁴ Nəfəw à gəy uwana à abà adàda à agu, gòdəw à zil gəy uwatà kà: Məŋga gami agodf à ka: ‘Lala à gəy gulo, uwana gədəzuw tatak may aña Paska la aku la azlaməna matapla gulo li? agodf’, gòdəwwal. ¹⁵ Masla adəpəhakulla gəy məŋga uwana la afik gə, slaka madəhəŋ à ahəŋ gə gesina. La abatà la uwana kadədfahaw vok à ahəŋ gesina kà aŋami.” ¹⁶ Azlaməna matapla la slaka aŋha tahəd, tahəd à huđ gudəŋ à abà, tabəzà tatak à gəl bokuba uwana Yesu apəhatàla. Uwana tadəh tatak may Paska à ahəŋ kà, tawul à slaka Yesu.

¹⁷ Uwana mokokhu adasa à waŋ kà, Yesu abəz à abatà la azlaməna matapla aŋha kulo gəl aŋha səla. ¹⁸ Mok uwana tadzà madzay, tazuw tatak may, Yesu agòd à atà: “Hadfay, gəgodf à akul, tekula la tataka aŋkul la abà uwana məzuw tatak may səla adàta à gi kaf à gəl.”✧ ¹⁹ Azlaməna matapla la slaka aŋha tadzəkà mazawla à gəl, tagòd: “Gi zlak uwə? Gi zlak uwə?”

²⁰ Yesu agòd à atà: “Dza tekula la tataka aŋkul la abà, uwana mədəb aləl à kaf à gəl anu səla, la uwana adàta à gi kaf à gəl. ²¹ Ndzer gi, gi Kona aña dza gədəmətsay bokuba uwana tatsətsèr à wakitə à abà lakəl gulo. Ama ngərpə adəgay la dza uwana adətəg kaf à gəl aña Kona aña dza agay, tayyi dza uwaga aw kà ŋuləm kà masla.”

✧ 14:18 14.18 Mahabay 41.9

Tatak may tsikasлага

(Mata 26.26-30; Luka 22.15-20; 1 Korintiya 11.23-25)

²² La mok uwana tazùw tatak may, Yesu azèb kaf, atsàkàn̄ ala, 'Kikay' agòd à Zəzagəla, ngaha avà à azlaməna matapla la slaka an̄ha, agòd à atà: "Zùwàw uwaga kà vok gulo!" ²³ Ngaha azèb kətsaw la iyaw mayyay ahàf gà, 'Kikay', agòd à Zəzagəla, avà à atà, atà gesina tasà à uda la abà, ²⁴ ngaha agòd à atà: "Uwaga kà an̄iz gulo, an̄iz makəs vok slawda la Zəzagəla, uwana asokw à vəcfah kà an̄a azladza an̄uvaw. ²⁵ Haday, gəgòd à akul, gədàsa iyaw mayyay ahàf uwanay aya aw, tsərah à uwana mədàsəy anina aya la makoray Zəzagəla." ²⁶ Tazləbà Zəzagəla la mahabay, ngaha tasà à uda, tadà an̄atà à gudəŋ kuvu à afik.

Yesu atà la Piyer

(Mata 26.31-35; Luka 22.31-34; Yuhana 13.36-38)

²⁷ Yesu agòd à azlaməna matapla la slaka an̄ha: "Akul gesina kadàsakaw gi à ahəŋ, kadəhoy à waŋ akul, kà uwana uwaga kà matsetserayga la wakitə Zəzagəla la abà: 'Gədəkəf masla manəŋla azlatuwaŋ, azlatuwaŋ tadəvah gəl à ahəŋ.' ✧ ²⁸ Ama la lig la ahəŋ, gədəwul à uda la mamətsay, gədətsəvokay kà akul kà mad à Galili." ²⁹ Piyer agòd al: "Amiyaka azladza gesina tasak à kak à ahəŋ kà, gi kà, gədəsak à kak à ahəŋ aw." ³⁰ Ngaha Yesu awùllal ala: "Haday, gəpəh à ka, la vuç uwanay lakana, gurayŋa mewgdzagalaŋ awiyay asik səla kà, kà kak Piyer kadəgoday kà, kà kasəl gi aw, asik makər." ³¹ Ama Piyer agòd la ndzəda aya: "Gədəpəh tsəhay gay uwaga aw, gəmətsay ndzer la kak!" Atà gesina tagòd kiya uwaga babay.

Yesu adəv kuçla la Getseməne

(Mata 26.36-46; Luka 22.39-46)

³² Tabəz à slaka anik uwana sləm an̄ha Getseməne. Yesu agòd à azlaməna matapla la slaka an̄ha: "Dzàw à abanay, gəda à madəv kuçla!" ³³ Yesu ahəl azla Piyer, Yakuba la Yuhana kà maday atà nna. Adzəkà maskulay la mazaw la gəl. ³⁴ Agòd à atà: "Mazaw la gəl akəf gi. Ama dzàw la abanay, dzəwhəl aw!" ³⁵ Azà à atà vok la vok ala ŋuv, atəf à vəcfah, adəv kuçla à Zəzagəla: "Baŋa kaslala vok, və à gi tetəvi, kà kaslà an̄a ŋgərpa ada an̄ha la slaka gulo. ³⁶ Iyay Baba gulo, kaslala vok kà madəh tatak gesina. Zəbagəŋ kətsaw ŋgərpa uwanay ala la slaka gulo. Ama bokuba uwana asa à gi aw, say bokuba uwana asa à ka."

³⁷ Ngaha awùl à waŋ, abəzà azlaməna matapla an̄ha makər uwatà à gəl, atà la madzəhal gə. Agòd à Piyer: "Səmon, kadzəhal ay? Kaslala vok an̄a madz à ahəŋ la adi sa tekula aw ay? ³⁸ Akul gesina dzàw à ahəŋ la adi, dəvəw kuçla kà matədiya à mavavaray à abà aw. Haday, masasəfok an̄a dza asal makəs gay, ama vok an̄ha la nzdəda aw!"

³⁹ Ngaha adà an̄ha aya. Adəv kuçla kalkal uwana uwarà. ⁴⁰ Uwana awùl à waŋ, abəzà atà à gəl la madzəhal gə. Taslələ vok an̄a madz à ahəŋ la adi aw. Tasəl uwana tawùllal ala aw.

⁴¹ Uwana awùl à waŋ à slaka an̄atà an̄a mamakər an̄ha, agòd à atà: "Kadzəwhal, kaduwaw ləv ay? Diga adagay, sa kà adaslay. Lagwa azlaməna tsakana takəs Kona an̄a dza. ⁴² Sàw à afik, məhəd adagay, aganay dza uwana atəg à gi kaf à gəl kà adazlan̄ay", Yesu agòd à atà.

Makəs Yesu

(Mata 26.47-56; Luka 22.47-53; Yuhana 18.3-12)

⁴³ Mok uwana Yesu avəts gay dadəŋ, Yudas, tekula la tataka an̄a azlakulo gəl an̄ha səla la abà, asà à waŋ. Maham à ahəŋ dza an̄uvaw tanəfà à waŋ la katsakar, la zəva. Məŋ madzahaga an̄a azlaməna mav tatak à Zəzagəla, la azlamadzahaga an̄a

wakità seriya aña Zəzagəla, la azlamasiga la uwana taslèlla atà. ⁴⁴ Yudas uwana atàl kaf à gəl apèhla dabaray à maham à ahəj dza kà makəs Yesu. Agòd: “Dza uwana gədàsəkwiñ maslawda slawda kà, masla la uwana kayahaw, kadà, kèsàw, dawùlla nènàwla.” ⁴⁵ Uwana adabəz à abatà, katskats ahàd à slaka Yesu, agòd: “Məŋga gulo!”, akəsà vok. ⁴⁶ Azladza takəs Yesu, tawàslàhàn à ahəj. ⁴⁷ Ama tekula la tataka azlaməna matapla la abà, atsizilla ala, abèd katsakar aña à lag, adèd magamza aña məŋga aña azlaməna mav tatak à Zəzagəla, anàtsal sləm lakəl ala. ⁴⁸ Yesu agòd à maham à ahəj dza: “Kà mana katsàw à wəj la katsakar ŋgaha la zəva la ahəl kà aña makəs gi ma? Gi masla nabəra ay? ⁴⁹ Kəla mavakay gədzà à ahəj la akul la məj gəy Zəzagəla la aku, gətəpakulla tatak, akul bay kakəsàw gi aw. Ama uwaga apaka vok kà madəvəj à gay tatak uwana azlaməna mapəh à atà gay à ahəl tapəh dagay uwarà.” ⁵⁰ Ŋgaha azlaməna matapla la slaka aña gesina tasàkal à ahəj. Tahòy añaatà.

⁵¹ Kohana anik la ahəj, anəfà Yesu la peteli la vok pəra. Tayàh kà makəsay. ⁵² Ama asàkatàla peteli à ahəj, ahòy aña ala diga.

Yesu la huma seriya

(Mata 26.57-68; Luka 22.54-55; Yuhana 18.13-14,19-24)

⁵³ Maham à ahəj dza tadàla Yesu à slaka məŋga aña azlaməna mav tatak à Zəzagəla, la azlamagol dza la azlamadzahaga aña wakità seriya aña Zəzagəla. Gesina tahamà gay à vok. ⁵⁴ Piyer anəfà atà la lig kərkəj, adà à kodal aña məŋga aña azlaməna mav tatak à Zəzagəla à abà, adzà madzay la azlaslodzi à vəda akəl à vok.

⁵⁵ Azlaməŋga aña azlaməna mav tatak la azlamadzahaga gesina tayàh dabaray aña makəsalla fida à gəl aña madukwla seriya mamətsay à gəl, ama tabəzà à mawisiga aña aw. ⁵⁶ Kà uwana uwabeyuwi atəgw gay fida lakəl aña, ama fida añaatà akəsà vok aw. ⁵⁷ Azlanik añaatà tasà à afik ŋgaha tatsədal azlafida anik anik à gəl gesina. ⁵⁸ “Mətsənəj agòd kà: ‘Gədàkal magol gəy Zəzagəla uwanay à ahəj, uwana azladza tanəl la ahəl la mahənay makəj, gədàhənəj ala kokufa maf ahəl à abà aña azladza’, agòd.” ⁵⁹ Bamərika la madàh fida uwatà, gay añaatà akəs à vok aw.

⁶⁰ Məŋga aña azlaməna mav tatak asà à afik, atsizilla ala la tataka azladza la abà gesina, anavà Yesu la gay ala: “Kawulla gay à uda aw takay? Mana à uwana tatəgw kà gəl tak ma?” ⁶¹ Ama Yesu adzà à ahəj titi. Awùlla gay à uda aw. Məŋga aña azlaməna mav tatak anavà Yesu aya: “Kak Kristu, Kona aña Zəzagəla uwana tazləbay ay?” ⁶² Yesu agòdal: “Bà kiya uwaga, kadənəjaw Kona aña dza madza madzayga la ahəl kaf aña Zəzagəla lakəl la maslay, la mazləbay məŋga, ŋgaha atsa à ahəj la habaga zagəla la abà.” ⁶³ Məŋga aña azlaməna mav tatak akwàhà lukut aña ala, agòd: “Məwoya sayda anik lakəl aña aya aw! ⁶⁴ Katsənàw uwana apəh mawisiga lakəl aña Zəzagəla. Mana kadzəgwaw ma?” Gesina añaatà tadəkula seriya mamətsay à gəl.

⁶⁵ Azladza anik la tataka añaatà la abà tadzəkà mataf sleslib à Yesu à adi. Tatsàkal à yewdi à ama, tazləb la mamits ahəl, ŋgaha tagòdal: “Pəhanula, uwa à uwana adèd à ka uwa?” Azlaslodzi takəs Yesu, ŋgaha tabakàlla ahəl à sləm à abà.

“Gəsəl Yesu aw”, Piyer agòd

(Mata 26.69-75; Luka 22.56-62; Yuhana 18.15-18,25-27)

⁶⁶ Piyer la gəl akəl dadəj, à uwana dugu madzadzaray aña məŋga aña azlaməna mav tatak asà à wəj. ⁶⁷ Uwana anəjə Piyer à vəda akəl à vok kà, anəvəz, agòd: “Kak bay, kadzà à ahəj la Yesu, zil Nazaret.” ⁶⁸ Ama Piyer adahà fida, agòd: “Gəsəl aw, gətsəna gay uwaga asa à ka magòday aw!” Ŋgaha asà à uda, adà aña à dzogdzog à abà. Mok uwatà mewgdzagalan awiyà. ⁶⁹ Dugu madzadzaray anəjə Piyer aya, agòd

à azladza uwana la abatà aya: “Dza uwanay kà tekula anjätä bay!” ⁷⁰ Ama Piyer agòf aya: “Awan, gi tekula anjätä aw.” La lig la ahəŋ ɲuv, azladza uwana la abatà tagòf à Piyer: “Hadfay, kak bay, kak tekula anjätä, kà uwana kak zil Galili.” ⁷¹ Piyer adzəkà magòfay: “Banja gəďäh fida, say Zəzagəla avà à gi ɲərpa zagəla. Gəsəl dza uwaga kapəhaw gay anja đikidiki aw!” ⁷² La mok uwatà mewgdzagalan awiyà kà masəla. Gay uwana Yesu apəh, awul à Piyer à gəl: ‘Mok uwana mewgdzagalan awiyay asik səla dadən aw, kadəgofay asik makər kà, kasəl gi aw.’ Piyer adzəkà matuway.

15

Yesu la huma Pilatus

(Mata 27.1-2; 11-14; Luka 23.1-5; Yuhana 18.28-38)

¹ Bəŋ la zay la tsəh, azlaməŋga anja azlaməna mav tatak takəs sawaray la azlamadzahaga anja wakità seriya anja Zəzagəla gesina, tatsurkà Yesu, tadàlla, tavà à Pilatus à ahəl à afik. ² Pilatus anavà Yesu la gay ala: “Kak Sufəl anja azla Yahudiya ay?” Yesu awulàlla: “Iyay, bokuba uwana kagòf.” ³ Azlaməŋga anja azlaməna mav tatak, takəl gay à Yesu à vok anjəwaw. ⁴ Pilatus anavà Yesu aya: “Kawulla à gay à uda aw uwà? Tsənà makəl à ka gay à vok anjätä tsi.” ⁵ Ama Yesu awùlla à gay à uda aw. Ləv avàl à Pilatus à gay kà uwaga.

Seriya mamətsay atəd à Yesu à gəl

(Mata 27.15-26; Luka 23.13-25; Yuhana 18.39-19.16)

⁶ Kəla madəvaday Paska, Pilatus aduwatàla gəl à masla danay tekula, uwana maham à ahəŋ awoyən. ⁷ La mok uwatà, dza tekula la ahəŋ la danay la aku, sləm anja Barabas. Masla tekula anja azlaməna mazləl guvəl à gumna à adi, takəf dza la magazlay la abà. ⁸ Maham à ahəŋ dza ahəd à mtəga Pilatus kà anja manav uwana Pilatus adahàhàtən viya viya. ⁹ Pilatus anavà atà à gay ala: “Asa à akul kà gəduwakulla gəl Sufəl anja azla Yahudiya ay?” ¹⁰ Kà uwana asəl kà azlaməŋga anja azlaməna mav tatak tadàla Yesu à slaka anja kà maŋor pəra. ¹¹ Ama azlaməŋga anja azlaməna mav tatak tavədzàhà à tsəh azladza à afik kà Pilatus aduwatàla gəl kà Barabas. ¹² Pilatus agòf à maham à ahəŋ dza aya: “Mana asa à akul gədehəŋ à dza uwanay à vok kazalawla ala Sufəl anja azla Yahudiya ma?” ¹³ Tawulàlla la mawiyay: “Zlèl masla à ahəf à adi!” ¹⁴ Pilatus anavà atà: “Mana mawisiga anja uwana adahən ma?” Ama tazàla mawiyay à gəl aya: “Zlèl masla à ahəf à adi!” ¹⁵ Pilatus awoyà marab ləv anja azladza. Kà uwaga à uwana aduwà à atà gəl à Barabas. Nğaha agòf à azlaslodzi kà tasläh Yesu ala la kurpi, avà à atà masla à ahəl kà mazləliya à ahəf à adi.

Azlaslodzi takəfasl à Yesu

(Mata 27.27-31; Yuhana 19.2-3)

¹⁶ Azlaslodzi tadàla Yesu à gəl akəl anja Pilatus, tazalàhà azlaslodzi gesina. ¹⁷ Tadùwal dawara mativga à vok, tasləsləp atək, tatsefəďal à gəl magabaga gabaga anja sufəl kà makədaslal. ¹⁸ Nğaha tasukwà masla: “Ayyi, Sufəl anja azla Yahudiya!” ¹⁹ Tadəď à gəl la kavak, tatəfal slesliḃ à vok, takədeď à ahəŋ la huma anja bokuba sufəl kà madzedzinay. ²⁰ Uwana tadəv makəfaslal à gay, tasəreḃtal dawara mativga uwatà la vok ala, tawùllal lukut anja à vok, nğaha tadàla à uda kà anja mazləl à ahəf à adi.

Tazləl Yesu à ahəf à adi

(Mata 27.32-44; Luka 23.26-43; Yuhana 19.17-27)

²¹ La tetəvi la ama, tagagàm la dza, uwana zil gudəŋ Səren, sləm anja Səmon baba anja Alekəsander atà la Rufus. Masla atsà à wəŋ la guf anja la abà. Azlaslodzi tafəl ndzəda à gəl anja mazəb ahəf anja Yesu. ²² Tadàla Yesu à slaka uwana sləm

aŋha *Golgota*. (Bokuba magoɗay: slaka aslasl takasa à gəl) ²³ La abatà asà à atà aŋa maval iyaw hamhamga uwana tatèɗfalla mir à tsəh, kà mataslala maziŋ ala, ama Yesu akweska kà masay. ²⁴ Ŋgaha tatatàsl Yesu à ahàf à adi. Tavàhà lukut aŋha la tataka aŋatà la abà, tatsal tsatsa lakəl, kà uwana asà à atà masəl tatak uwana uwabeyuwi aŋatà abèzal.✧ ²⁵ Mok uwana tatàsl Yesu à ahàf à adi kà zil gosela. ²⁶ Tatsetsèr à gəl aŋha gay seriya tapèhla ala la magoɗay gay uwana takèɗ ala: **SUFƏL AŊA AZLA YAHUDIYA**. ²⁷ Tatatàsl azlaməna nabəra səla à ahàf à adi la Yesu, tekula la ahəl kaf aŋha, tekula bay la ahəl gudzay aŋha. ((²⁸ Kiya uwaga agay bokuba uwana tatsetsèr à wakità Zəzagəla à abà:

Tatugw masla à tataka aŋa azlaməna haypa à abà.))✧

²⁹ Azladza uwana taguwàhà à awtày la abatà takəɗàslal, takokòtəhà gəl, tagòɗal: “Nəhàŋ zla! Kak uwana kagòɗ kà, asa à ka makal magol gày Zəzagəla à ahəŋ, aŋa maŋalay anik la mavakay makəɗ, kagòɗ.✧ ³⁰ Sà à ahəŋ la ahàf la adi, bəlla gəl aŋak tak zla!” ³¹ Kiya uwaga babay azlaməŋga aŋa azlaməna mav tatak takəɗàslal la azlamadzahaga aŋa wakità seriya aŋa Zəzagəla la slaka gə, tagòɗ kà atà kà atà: “Abəla azladza anik, ama aslala vok aŋa mabəl gəl aŋha aw uwà? ³² Say mənəŋəŋ Mesi, Sufəl aŋa Isərayel atsa à ahəŋ la ahàf la adi dadəŋ, ŋgaha mədiŋal gəl à vok.” Azladza uwana tatatàsl à ahàf à adi tatsəkəkal magoɗahay à gəl babay.

Mamətsay aŋa Yesu

(Mata 27.45-56; Luka 23.44-49; Yuhana 19.28-30)

³³ La tataka afats, mələs apakà vok la kutso la abà gesina, tsəràh afats dat mogova gova gərewni delga. ³⁴ La afats dat magova gova gərewni delga uwatà, Yesu awiyà la ndzəɗa, agòɗ: “*Eloyyi, Eloyyi, lema sabachthani?*”.✧ (Bokuba magoɗay: Zəzagəla gulo, Zəzagəla gulo, kà mana kasak gi ma?) ³⁵ Azlaanik uwana tadzà à ahəŋ la abatà tatsənà uwaga, tagòɗ kà: “Aganay azalay à dza uwana Zəzagəla apəhal gay à ahəl à uwana sləm aŋha Eliya.” ³⁶ Dza tekula ahòy à awtày la abatà, ahənà sawsaw ala la iyaw hamhamga, afà sawsaw à gay kavak, avəl kà makokuzay, agòɗ: “Tsetsi mədzà à ahəŋ titi, mənəɗəz à baŋa Eliya atsa à waŋ kà aŋa mazəb à ahəŋ la ahàf la adi!”✧ ³⁷ Ama Yesu awiyà la ndzəɗa, ŋgaha aməts.

³⁸ Ama bafta məŋga uwana la gày Zəzagəla la aku, akohàla tsəɗàɗ, tsəràh à afik, tsəràh à vəɗah.✧ ³⁹ Məŋga aŋa azlaslodzi dzim, uwana atsizl à huma aŋa Yesu, anəŋà mamətsay aŋha, à uwana adawiyay, agòɗ: “Haday, dza uwanay kà Kona aŋa Zəzagəla!”

⁴⁰ Azlamis uwana tanəŋà à awtày kərkər la ahəŋ, la abatà la tataka aŋatà la abà, Mariyama dəg zla Magdala, la Mariyama iyà aŋa Yakuba uwana bəziga la Yosəs, la Salome. ⁴¹ Tauguzàhàh la azla Yesu, à mok uwana agà la gudəŋ Galili. La abatà bay azlamis anik aŋuvaw tahəɗ la azla Yesu la slaka gə à Urusalima à afik.

Maf Yesu à zəvay à agu

(Mata 27.57-61; Luka 23.50-56; Yuhana 19.38-42)

⁴² Lagwa kà mokokhu adagay, uwaga mavakay maɗàh vok à ahəŋ bokuba magoɗay vud maɗàh vok aŋa vud madu w ləv. ⁴³ La gay mokokhu, Yusufu zil Arimate asà à waŋ, masla tekula la tataka aŋa azlamasiga la abà. Masla kà akud makoray Zəzagəla babay. Kurit yewdi agòɗal kà madiya à slaka Pilatus aw. Anəv vok aŋa Yesu. ⁴⁴ Ama ləv avəl à Pilatus à gay, kà uwana atsənəŋ kà Yesu adamətsay katskats. Azàla məŋga aŋa azlaslodzi dzim, anəv la slaka aŋha: “Aməts ma uwarà ay?” ⁴⁵ Uwana adatsən dziriga la slaka məŋga aŋa azlaslodzi dzim, avà tetəvi à Yusufu kà mazəb vok aŋa Yesu. ⁴⁶ Yusufu asukw bafta, azəb vok aŋa Yesu à ahəŋ la ahàf la adi, afafəɗ à bafta

✧ 15:24 15.24 Mahabay 22.18 ✧ 15:28 15.28 Yesayya 53.12 ✧ 15:29 15.29 Mahabay 22.7 ✧ 15:34 15.34 Mahabay 22.1 ✧ 15:36 15.36 Mahabay 69.21 ✧ 15:38 15.38 2Musa 26.31-33

uwatà à abà, afà à zəvay à agu, zəvay kà tàlla kà à tsakur à abà. Ngaha atakòslal mənə abəlam à ama. ⁴⁷ Mariyama dəg zla Magdala, la Mariyama iyà aŋa Yosəs tanəŋà zəvay uwana tafà Yesu à agu

16

*Mawul à uda la mamətsay aŋa Yesu
(Mata 28.1-8; Luka 24.1-12; Yuhana 20.1-10)*

¹ Uwana mavakay maduw ləv adada à lig, Mariyama dəg zla Magdala, la Mariyama iyà aŋa Yakuba, la Salome tasùkw aməl matərsin kà aŋa madla aŋa madahiya à Yesu à vok. ² Bəŋ la zay la tsəh, vuɸ ladu uwana afats à lig mas à afik, tahàd à gəl zəvay. ³ Tagòɸ kà atà kà atà: “Uwa adàtakosl anu à bəlam à zəvay la ama ala uwa?” ⁴ Kà uwana bəlam uwatà kà mənəga. Ama tanəŋà à awtày kà, tanəŋà bəlam matakoslal à ama ala gà tsewwa. ⁵ Tahàd à zəvay à agu. Tanəŋà bəzi kohana uwana adzà madzay la abatà la ahəl kaf lakəl, la lukut medəkuga la vok. Guba akəs atà. ⁶ Agòɸ à atà: “Guba akəs akul aw! Kayahaw Yesu zil Nazaret, uwana tatatàsl à ahəf à adi. Aga la abanay aw, awul à uda la mamətsay. Aganay slaka aŋha uwana tahənəŋ à ahəŋ. ⁷ Lagwa kà, dàw, kadəgòɸaw à azlaməna matapla aŋha, kaykay gà kà à Piyer à gay uwanay: Yesu atsavokkay kà akul kà mad à Galili. La abatà kadənəŋawwanə bokuba uwana agòɸ à akul.”

⁸ Azlamis tasà à uda la zəvay la aku, tahòy. Ləv avəl atà à gay la guba mənəga. Tabadmə à dza aw kà uwana guba akəs atà.

*Yesu apəhla vok à Mariyama dəg zla Magdala
(Mata 28.9-10; Yuhana 20.11-18)*

⁹ Uwana Yesu adawul à uda la mamətsay, bəŋ vuɸ ladu apəhla vok à Mariyama dəg zla Magdala dadəŋ. (Mis uwana akudəkəl azlamasasəɸok mawisiga məɸəf lakəl ala) ¹⁰ Mariyama ahəd kà mapəh uwaga à azladza uwana tadzàhà à ahəŋ la Yesu, tazàwla gəl, ŋgaha tatàw. ¹¹ Ama mok uwana tatsənà uwana apəh à atà kà, Yesu aga la ahəŋ la sifa kà, ŋgaha kà masla anəŋəŋ kà, atà tadɪŋal gəl à vok aw.

*Yesu apəhla vok à azlaməna matapla aŋha səla
(Luka 24.13-35)*

¹² La lig la ahəŋ, Yesu apəhla vok à azlaməna matapla aŋha səla. La mok uwana atà tahàd à mauguzahay à bəzi gudəŋ anik à abà. ¹³ Tawul à Urusalima à abà, tapəh à azladza anik, ama atà bay kà, tadɪŋal gəl à vok aw.

*Yesu apəhla vok à azlaməna matapla aŋha kulo gəl aŋha tekula
(Mata 28.16-20; Luka 24.36-49; Yuhana 20.19-23; Sləray 1.6-8)*

¹⁴ La lig la ahəŋ, Yesu apəhla vok à azlaməna matapla la slaka aŋha kulo gəl aŋha tekula, la mok uwana atà la tatak may lakəl. Agòɸ à atà kà, atà la madiŋal gəl à vok aw, atà la ləv dzaŋdzaŋga. Kà uwana tadɪŋ gəl à azladza uwana à vok, tagòɸ à atà kà tadanəŋ la sifa aw. ¹⁵ Yesu agòɸ à atà: “Dàw à gudəŋ à vok gesina, zàwəŋ, pəhàw gay Zəzagəla à azladza gesina! ¹⁶ Dza uwana adiŋal gəl à vok adàhalla batem, adəbəlay. Dza uwana adiŋal gəl à vok aw Zəzagəla adəfahalla seriya à gəl. ¹⁷ Aganay azlanadzipo la maslay uwana azlaməna madiŋal gəl à vok tadəfah à ahəŋ la sləm gulo: Tadàslala vok makudəkəh azlamasasəɸok mawisiga, tadəvatsah azlagay mələk gə, ¹⁸ tadəkəs azlabebi la ahəl amiyaka tadàsa magur bay kà, aza à atà aw. Tadəbak ahəl à azlaməna ɸuvats à gəl, ŋgaha tadəwur ala.”

*Yesu awul à slaka Zəzagəla
(Luka 24.50-53; Sləray 1.9-11)*

¹⁹ La mok uwana Sufəl Yesu adadəv gay aḅha à gay, adà aḅha à zagəla, adzà madzay la ahàl kaf aḅa Zəzagəla lakəl. ²⁰ Azlaməna asik aḅha, tahàd à gudəḅ à vok gesina aḅa maz gay matsidəyga aḅa Sufəl Zəzagəla. Sufəl Yesu adəhà sləray la atà aya gotənaḅ, apəhla dziriga aḅa gay aḅatà ala la madəh nadzipo aḅuvaw.

GAY MARABƏJ UWANA LUKA ATSETSÈR Evangile selon Luc

¹ Deda Tewofil.

Azladza aņuvaw tawəf vok à uda, kà matsetser gay uwana apakahà vok la tataka gami la abà. ² Tatsetserəh azlatatak uwana tatsənəŋ la slaka azladza uwana tanəŋəŋ la yewdi aņatà, dagay la madzəka, ŋgaha tafà à atà kà mapəhay gay uwaga à ahəl. ³ Gi babay gəkəs tetəvi aņa manərəz tatak uwaga gesina, dagay la madzəka, kà gi aņa mapəhla uwaga ala, la tekula tekula à kak məŋga Tewofil. ⁴ Uwana gəđahà uwaga kà, kà kak aņa matsən dziriga aņa matapla uwana kabəzal gesina.

Malika apəhla gay aņa mayyi Yuhana masla madəh batem ala

⁵ La mok uwana Herod agà Sufəl aņa Yahudiya kà, masla mav tatak à Zəzagəla anik la ahəŋ, uwana sləm aņa kà Zakari; masla kà tsəhay aņa azlaməna mav tatak à Zəzagəla, la huđ gəy aņa Abiya. Sləm aņa mis aņa kà Elisabet, masla kà mayyi à tsəh ala aņa Haruna, məŋ madzahaga aņa azlaməna mav tatak à Zəzagəla uwarà.

⁶ Atà səla nna kà, azladza dziriga la huma aņa Zəzagəla, ŋgaha takəs gay aņa Sufəl Zəzagəla la ləv tekula, tanəfà mapəhay aņa la dziriga bay. ⁷ Ama bəzi aņatà la ahəŋ aw, Elisabet aslala vok aņa maβəz bəzi aw, kà uwana tadapak makoz.

⁸ Vərdi anik, Zakari adəh sləray aņa makad tatak à Zəzagəla, kà uwana à ahəl iyaw aņa kà madəhəŋ. ⁹ Bokuba uwana zagələ aņatà aņa mazəbani vok la ahəl iyaw la ahəl iyaw, kà masəl dza uwana adəh sləray la mavakay uwatà la tsəh, ŋgaha atəđ à Zakari à gəl kà maβək kidzidzi la gəy Sufəl Zəzagəla la aku. ¹⁰ La mok uwana aβək kidzidzi kà, maham à ahəŋ dza tadəv kuđa. ¹¹ La abatà malika aņa Sufəl Zəzagəla apəhla vok à Zakari, atsizl à ahəl kaf aņa slaka maβək kidzidzi à gəl. ¹² Guba akəs Zakari à mok uwana anəŋəŋ askulla à tsəh ala kaykay. ¹³ Ama malika agòđal: “Zakari, guba akəs ka aw, kà uwana Zəzagəla adatsən madəv kuđa aņak. Elisabet mis aņak adəyya à ka bəzi, kadəvəl sləm Yuhana. ¹⁴ Kak kadəhənlə la marabay, ŋgaha azladza aņuvaw tadərabay lakəl aņa mayyi masla. ¹⁵ Kà uwana adəgay məŋ dza la huma yewdi aņa Sufəl Zəzagəla. Tetuwa adəsa guzu aw, amiyaka bə mana beymi uwana maməslga bay kà adəsay aw. Adəgay mahənlə à la Masasəđok Zəzagəla dagay la huđ aņa iyə aņa.✧ ¹⁶ Adəwulla azla Isərayel aņuvaw à huma Sufəl Zəzagəla. ¹⁷ Masla la gəl aņa adətsa vok à awtəy à huma Zəzagəla la ndzəđa aņa Masasəđok, ŋgaha la ndzəđa aņa masla mapəhal gay à ahəl Eliya uwana uwarà, kà matsən vok gay azlababa la azlabəza aņatà, adəwulla azlaməna makəs gay aw à haŋkəli aņa azladza dziriga à abà, adəđah tsəhay à ahəŋ kà mas à waŋ aņa Sufəl Zəzagəla.”✧ ¹⁸ Ama Zakari agòđ à malika: “Kakay gədəsəlay kà uwaga kà dziriga ma? Tsa məđapakah makoz la mis gulo mi”, agòđal. ¹⁹ Kiya uwaga malika agòđal: “Gi kà sləm gulo kà Gabəriyel. Gi la uwana Zəzagəla afà à gi à huma aņa à gay, kà gi aņa mazlakəŋ, masla asləl gi à waŋ kà mapəh à ka gay uwaga. ²⁰ Ama kadəŋ gəl à gay gulo uwana à vok gəpəh à ka, adəpaka vok gəgòđ à ka aw kà, kà uwaga kapakay bada, kabađma aya aw, tsərəh à uwana tatak uwana gəpəh à ka adəpaka vok dandan la uwana kadəbađma.”

²¹ La kaslā uwatà, azlaməna madiŋal gəl à vok takud Zakari la uda, ŋgaha ləv avəl atà à gay məŋga, kà uwana asəf məŋga la gəy maβək kidzidzi la aku. ²² Ama mok uwana adasa à uda kà, aslala vok aņa maβađatəma aya aw, azladza tadzəgw

✧ 1:15 1.15 4Musa 6.3 ✧ 1:17 1.17 Malaki 4.5-6

kà: Anə̀nà nadzipo anik la gày la aku, tagòd. Abadfatàmà kà la ahàl pə̀ra, kà uwana aslàla vok kà mabə̀dma aya aw.

²³ Mok uwana Zakari adadə̀v kaslà anha à gay kà mabək kidzidzi la mənə̀ gày Zə̀zagə̀la la aku kà, awùl à mtə̀ga anha. ²⁴ Zweek la huma la gay kà, bə̀zi adà à Elisabet, mis anha, à huđ, ngaha masla Elisabet ahadə̀ bə̀zi la huđ tsə̀ràh à tə̀la zlo. Agòd la gəl anha: ²⁵ “Iyay, aganay tatak uwana Sufəl Zə̀zagə̀la adə̀hə̀n kà anulo, Zə̀zagə̀la asàl anə̀ mahə̀lla gi ziruwi lakəl ala la huma azladza gesina.”

Malika apə̀hla gay mayyi Yesu ala

²⁶ La tə̀la mukwa, Zə̀zagə̀la asləl malika Gabəriyel à gudə̀n Galili, uwana sləm anha Nazaret, ²⁷ à slaka dahalay anik, uwana mawđa anə̀ Yusufu, masla kà la mayyi à tsə̀h ala anə̀ sufəl David la abà. Sləm anə̀ dahalay uwatà bay kà Mariyama. ²⁸ Malika adagay à slaka anha agòd: “Ràb, kà uwana Zə̀zagə̀la adə̀hə̀nkala la vok mahamay anha, Sufəl Zə̀zagə̀la la ahə̀n la kak.” ²⁹ Mariyama kà gəl akə̀d: “Vok kà gay uwaga. Anavà gəl anha agòd: ‘Mana asal magodə̀y ayyi marabay gə̀ uwanay ma?’” ³⁰ Kiya uwaga malika agòd: “Mariyama, guba akəs ka aw, kà uwana kada bə̀z vok mahamay anə̀ Zə̀zagə̀la. ³¹ Kadə̀gay la bə̀zi la huđ ngaha kadə̀yyi bə̀zi zilga, uwana kadə̀vəl sləm Yesu. ³² Masla adə̀gay mənə̀ dza, ngaha tadə̀zallalla Kona anə̀ Zə̀zagə̀la, uwana kə̀rkə̀r la afik. Sufəl Zə̀zagə̀la adə̀pakə̀n ala kà mənə̀ sufəl, bokuba uwana adə̀hə̀n à David, baba anha madzidziga. ³³ Ngaha adə̀kor tsə̀hay Isə̀rayel anə̀ koksikoksi; makoray anha adə̀kə̀d gəl à ahə̀n aw.”*

³⁴ Mariyama agòd à malika: “Kakay uwaga adə̀paka vok, tsa gi la zil dadə̀n aw ma?”

³⁵ Malika agòd: “Masasə̀dok tsikasla adə̀sa à ahə̀n à gəl anə̀k, ngaha ndzə̀d anə̀ Zə̀zagə̀la uwana kə̀rkə̀r la afik, adə̀sa à ka à gəl, bokuba dzə̀gay, kà uwaga à uwana bə̀zi uwana kadə̀yyi kà, tadə̀zallalla: Tsikasla, Kona anə̀ Zə̀zagə̀la uwana la zagə̀la la afik. ³⁶ Elisabet də̀g tsinə̀ anə̀k babay kà, bə̀zi la huđ, tekeđika adagay makoz babay, azladza kà ‘Də̀gə̀r’, tagòd, ama lagonay kà bə̀zi la huđ anə̀ tə̀la mukwa. ³⁷ Kà uwana tatak la ahə̀n adə̀w kà Zə̀zagə̀la à gəl aw.”* ³⁸ Kiya uwaga Mariyama agòd: “Gi kà, gi mayà anə̀ Sufəl Zə̀zagə̀la; apakà à gi vok, bokuba uwana kapə̀h lagwa zlà.” Kiya uwaga malika asàkal à ahə̀n.

Mariyama aday kà anə̀ manə̀n à Elisabet à gay

³⁹ La kaslà uwatà, Mariyama atsizilla ala, amə̀rà vok, kà mad à gudə̀n anik à abà, la gudə̀n la afik la kutso Yahudiya. ⁴⁰ Ahə̀d à gày anə̀ Zakari, “Ayyi”, agòd à Elisabet. ⁴¹ La mok uwana Elisabet atsənà madə̀h ‘Ayyi’ anə̀ Mariyama kà, bə̀zi abə̀lakà vok la huđ anha. Elisabet adə̀hə̀nla la Masasə̀dok Zə̀zagə̀la, ⁴² awiyà la ndzə̀d: “Zə̀zagə̀la apis à ka gay à vok kaykay la tataka azlamis anik la abà gesina, ngaha mapis gay à vok anha adə̀dza à ahə̀n lakəl anə̀ bə̀zi, uwana kadə̀bə̀zal. ⁴³ Gi ma gi uwa, à uwana iyà anə̀ Sufəl gulo atsa à wə̀n à mtə̀ga gulo uwa? ⁴⁴ Kà uwana mok uwana gə̀tsənə̀ ‘Ayyi’ anə̀k kà, bə̀zi abə̀lakà vok la huđ gulo la marabay. ⁴⁵ Lapiya agay la kak, kà uwana kadinə̀ gəl à tatak uwana à vok, Sufəl Zə̀zagə̀la apə̀h à ka uwaga apaka vok.”

*Mahabay marabay anə̀ Mariyama**

⁴⁶ Kiya uwaga Mariyama agòd: “Masasə̀dok gulo azlə̀b mənə̀ga anə̀ Sufəl Zə̀zagə̀la, ⁴⁷ Lə̀v gulo adə̀hə̀nla la marabay à kà Zə̀zagə̀la masla mabəl gi. ⁴⁸ Kà uwana vok ahaməl kà gi à uwana anə̀n gi kà kiya gi mayà anə̀ tələ̀mmaga. Iyay, dagay lakana azladza tagodə̀y kà, gi kà gi mapis gay à vok gə̀.

* 1:33 1.33 2 Samuyel 7.12-13,16; Yesayya 9.7 * 1:37 1.37 1Musa 18.14 * 1:45 1.45 Dzə̀n 1 Samuyel 2.1-10 bay

- 49 Kà uwana Zəzagəla, uwana tsikasla, adahà tatak gesina dzəba anha səla aw kà anjulo.
Sləm anja Zəzagəla kà tsikasla.
- 50 Mawoyəŋ anha adəgay la ahəŋ
Lakəl anja azladza gesina, uwana tahoy yewdi anha koksikoksi.
- 51 Ahənà azlasləray mənğa mənğa ala, la ndzəda anja ahəl anha.
Awits azlaməna zlapay gə ala.
- 52 Adakwà azlasufəl à ahəŋ la kursi anətà la afik, adawalla atà à vədah;
Ama azigənàhà azlaməna tələmmaga.*
- 53 Ahanà azlaməna may ala la azlatatak delga, delga gə,
Akudəkàh azlagorobu la ahəl deyday.
- 54 Asà à wan, azlāk tsəhay anja Isərayel, masla sləray anja
Avikəŋ kà mapəhla delga anja ala aw,
- 55 La slaka Abəraham, ŋgaha la mayyi à tsəh ala anja kà anja koksikoksi,
Bokuba uwana apəh à azlababa gami madzidziga.”*
56 Mariyama adzà à ahəŋ la Elisabet nekwa nekwa təla makər, la lig la ahəŋ, awùl à mtəga anja.

Mayyi Yuhana masla madəh batem

- 57 Kiya uwaga mok uwana kaslā masewk à ahəŋ anja Elisabet adaslay kà, ayyà bəzi zilga. 58 Azlaməna magay anja la azlatsəhay anja tatsənəŋ kà Sufəl Zəzagəla adadəhalla delga, ŋgaha atà tarəb la slaka gə. 59 Mok uwana bəzi adadəh kasukwa tekula kà, tadala kà makədəv à uda, atà kà, asà à atà kà mavəl sləm anja baba anja, Zakari.* 60 Ama, “Awan”, iyà anja agòd; “Sləm anja kà mavəl kà Yuhana.” 61 “Awan, dza la ahəŋ la tsəhay anjak la abà, à uwana tavəl tsəhay sləm uwanay”, tagòdal. 62 Kiya uwaga tanavà baba anja mabada bada, kà masəl sləm uwana asəl mav à bəzi. 63 Zakari anəv tatak kà manəhal à adi, ŋgaha kiya uwanay à uwana anəh: ‘Yuhana, la uwana sləm anja.’ Ləv avəl atà à gay gesina anətà. 64 Katskats la abatà Zakari adzəkà mapokw gay kà mabəda, adzəkà mazləb Zəzagəla la kuda zləkkà. 65 Kiya uwaga guba akəs azlaməna magay anja gesina, ŋgaha azlaməna madz à ahəŋ la gudəŋ uwatà la afik gesina tapəh tatak uwana apakà vok. 66 Azladza gesina uwana tatsənà uwana tapəhay kà, awùl atà à gəl, ŋgaha tanəvəh à vok: “Tsa bəzi uwanay ma adəgay ma uwa tak uwa? Ndzer, maslay anja Sufəl Zəzagəla la ahəŋ lakəl anja, hadəy!”

Mahabay anja Zakari:

masla mapəhal gay à ahəl anja mapəh à azladza

- 67 Zakari, baba anja bəzi uwaga, agə mahənlaga la Masasəfok Zəzagəla, adzəkà maziŋ kiya uwanay:
- 68 “Mazləbay agay kà la Sufəl, uwana Zəzagəla anja azla Isərayel
Kà uwana afà sləm à azladza anja, abəlla atà.
- 69 Masla apəhanula maslay la mav à anu masla mabələŋ dziriga,
Uwana la mayyi à tsəh ala anja Sufəl David la abà, uwana magamza anja.
- 70 Uwaga la uwana apəh uwarà la paŋaw anja azlaməna mapəh à atà gay à ahəl kà mapəh à azladza:
- 71 ‘Gədətəf akul la ahəl anja azlaməna məzam ankul agòd,
Ŋgaha la ahəl anja azlauwana tapəsew anu gesina.’
- 72 Masla adəpəhla mawoyəŋ anja à azlababa gami madzidziga ala,
Ŋgaha gay makəs vok slawda anja tsikaslaga uwatà adəwulal à gəl.

- ⁷³ Kà uwana Sufël Zëzagëla azùw mawadafay à baba gami madzidziga Abëraham.
- ⁷⁴ Kà masla aña mapëlanula la ahàl aña azlamëna mëzam gami, Ngaha kà anu aña madafahala slëray la kokudfa kurit yewdi.
- ⁷⁵ Kà anu aña magay sëtaka, ngaha la dziriga la huma aña koksikoksi.
- ⁷⁶ Ngaha kak, bëzi gulo kadàgay masla mapëhal gay à ahàl aña dza uwana kërkër la afik aña koksikoksi.
Kà uwana kak la uwana kadàguway la huma aña Sufël kà madafhallan tetëvi à ahëj.*
- ⁷⁷ Ngaha kà mapëhla à azladza aña ala kà, adàbël atà la mamats atà tsakana aña atà ala.
- ⁷⁸ Hadafay, Sufël Zëzagëla gami kà, adahënla la vok mahamay, ngaha la lapiya, Adaslël à anu udfaka à ahëj à gël gami gesina, bokuba udfaka aña afats uwana atsa à afik.
- ⁷⁹ Kà masla aña manëj azladza uwana ala, atà la mëlës la abà, ngaha la azladza uwana la dzëgay aña mamëtsay la abà,
Ngaha masla aña manëjla asik gami la tetëvi aña lapiya la tsëh.”*
⁸⁰ Bëzi azigën, ngaha hanjëli aña bay azàla vok à gël. Adzà à ahëj la fëta la abà, tsëräh à mavakay uwana apëhla vok ala la huma tsëhay Isërayel.

2

Mayyi Yesu (Mata 1.18-25)

¹ La zamana uwatà Awgustus, mëj sufël aña azla Rom agòd kà: ‘Say tatugw dza la makoray gulo gesina’, agòd. ² Uwaga kà matugw dza matera, uwana apakà vok la zamana aña Kwiriniyus gumna aña kutso Sëriya. ³ Azladza gesina tadàh kà matsetser atà, këla uwabeyuwi adà à gudëj aña.

⁴ Yusufu babay atsizilla ala la Nazaret la kutso Galili, kà madafay à kutso Yahudiya, à hudf gudëj uwana à abà, Betelehem tagòdäl, à slaka uwana tayyà sufël David à abà. Kà uwana masla kà mayyi à tsëh ala aña David. ⁵ Tahàd kà matsetser slëm aña atà, la mawdä aña, Mariyama, uwana akùd kaslà masewk à ahëj. ⁶ Kiya uwaga, mok uwana tabëzay, kaslà masewk à ahëj aña adaslay. ⁷ Ngaha ayyà bëzi zilga, malkwoy aña, afafädäl lukut à adi, ngaha ahënänj à danjor à abà, kà uwana slaka la ahëj kà aña atà la gày mëlok dza la aku aw.

Malika apëhla vok à azlamëna manëjla azlatatak

⁸ La gudëj uwatà, azlamëna manëjla azlatatak la ahëj uwana tahanay la fëta kà manëjla azlatatak aña atà. ⁹ Malika aña Sufël Zëzagëla apëhatàla vok, ngaha mazlëbay aña Sufël Zëzagëla awüdfä slaka aña atà. Guba akës atà gesina aña atà. ¹⁰ Ama malika agòd à atà: “Guba akës akul aw, kà uwana gësà à akul à wanj kà gay matsidayga, uwana adàrab azlatsëhay gesina. ¹¹ La hudf aña wëd uwanay la abà, la hudf gudëj aña David la abà kà, tayyà à akul masla maßël akul: Masla Kristu, Sufël. ¹² Aganay tatak uwana adapëhakulla: Kadänëjaw bëzi vërna mafafädäl lukut à adi gä, mahënëj à ahëj gä la danjor la abà.”

¹³ Katskats, maham à ahëj malika la zagëla tahamà gay à vok la malika uwatà, taslëkàw Zëzagëla tagòd:

¹⁴ “Mazlëbay aga la Zëzagëla uwana la zagëla,
Lapiya aga la gudëj la vok la slaka azladza uwana Zëzagëla awoya atà, ngaha azlauwana tawoya masla babay!”

Azlamëna manëjla azlatatak tahàd à gudëj Betelehem

* 1:76 1.76 Malaki 3.1 * 1:79 1.79 Yesayya 9.2

¹⁵ Mok uwana azlamalika tasàk atà à ahəŋ, tawùl aŋatà à zagəla kà, azlaməna manəŋla azlatatak tagòf à vok kà atà à atà: “Məhàd tsəràh à Betelehem zlà, delga kà mənəŋ tatak uwana apakà vok, mədənəŋ Sufəl Zəzagəla apəhanula zlà”, tagòf. ¹⁶ Ngaha atà tamərəà vok kà maday, tabəz à Mariyama à vok atà la Yusufu, ngaha la bəzi vərna, uwana mahənəŋ à ahəŋ gə la daŋor la abà. ¹⁷ Mok uwana tanəŋəŋ, tatùgw gay uwana tanəŋəŋ, la uwana tatsənà la slaka aŋa malika lakəl aŋa bəzi. ¹⁸ Azladza uwana tatsəb sləm à azlaməna manəŋla azlatatak uwaga kà, ləv avəl atà à gay gesina, kà uwana tatsənà uwaga. ¹⁹ Ama Mariyama kà, abək uwaga gesina à gəl aŋha à afik, adzùgw uwaga la lela. ²⁰ La lig la ahəŋ, azlaməna manəŋla azlatatak takəs tetəvi kà mawul aŋatà la mazləb Zəzagəla. Tazləbà masla kà azlatatak uwana tatsənəŋ, la uwana tanəŋəŋ, kà uwana uwaga gesina kà, apakà vok bokuba uwana malika apəh à atà.

Mapəhla Yesu ala la mənəŋ gəy Zəzagəla la aku

²¹ Mok uwana kasukwa tekula adadà à lig kà, mahənəy adaslay kà makədəv Yesu à uda, tavəl sləm Yesu, sləm uwana malika apəhla ala à mok uwana iyà aŋha aləg mazəb à huɖ dadəŋ.✧

²² Ngaha bokuba uwana gay aŋa maɖàh mavələh adadəv à gay kà, bokuba uwana mapəhay aŋa Musa agodf, tadàla Yesu à Urusalima kà mapəhla masla ala la huma aŋa Sufəl Zəzagəla, ²³ bokuba uwana tatsətsər à mapəhay aŋa Sufəl à abà: 'Kəla malkwoy zilga kà, uwaga tatak matsufay gə aŋa Sufəl Zəzagəla la fəta la awtəy tsikasla.'

²⁴ Takadàh azlatatak uwana kadàw, wakità mapəhay agòf:

'Azlahabakoku fəta səla baŋaw azlazlabara habakoku mtəga səla.'✧

Mahabay aŋa Səmeyyon

²⁵ Dza anik la ahəŋ la Urusalima uwana sləm aŋha Səmeyyon. Zil uwatà kà dza dziriga, akəs gay aŋa Zəzagəla, ngaha akudà dza uwana naka atsa à waŋ, kà mabəl azladza Isərayel. Masla kà agə la Masasəɖok Zəzagəla. ²⁶ Ngaha Masasəɖok Zəzagəla apəhla à vok à abà kà, adəmətsay dadəŋ aw, say baŋa adənəŋ huɖ adi aŋa Kristu, uwana Sufəl Zəzagəla adàsləl à ahəŋ dadəŋ. ²⁷ Masasəɖok Zəzagəla adàla masla à mənəŋ gəy Zəzagəla à agu, la mok uwana azlababa tasəlla Yesu à waŋ, kà maɖahallaŋ bokuba uwana: 'Dahàwwəŋ', wakità seriya agòf. ²⁸ Səmeyyon azəb bəzi à ahəl, ngaha 'Kikay', agòf à Zəzagəla la magodfay:

²⁹ “Sufəl, lagonay kà mapəh à ahəŋ aŋak kà adagəɖ à afik,

Sàk à mayà aŋak aməts aŋha la lapiya adagay zlà,

³⁰ Kà uwana lagwa kà, gədanəŋ mabəlay aŋak la yewdi gulo,

³¹ Uwana kadahəŋ à ahəŋ kà aŋa tsəhay gesina.

³² Uwaga la uwana uɖaka uwana adapəhla ka ala la huma azladza gudəŋ à vok gesina, Uwaga la uwana adavà mazləbay à tsəhay aŋak Isərayel.”✧

Mapəh à ahəŋ aŋa Səmeyyon

³³ Baba la iyà aŋha atà səla nna ləv avəl atà à gay kà gay uwana Səmeyyon apəh lakəl aŋha. ³⁴ Səmeyyon apis à atà gay à vok, ngaha agòf à Mariyama iyà aŋa Yesu: “Zəzagəla akəsàni bəzi uwanay kà, kà matsalla matekwidf, ngaha kà aŋa matsizilla azladza aŋuvaw ala la tataka azla Isərayel la abà. Adagay tatak manəŋal adi aŋa Zəzagəla, uwana azladza tadəkweska. ³⁵ Ngaha adapəhla madzugway aŋa azladza gesina ala la uɖaka la abà la dazuwaya, ngaha kak babay kà, katsakar adàzləl madzugway aŋak ala kà madzugway aŋa tsəh ləv aŋak mas à uda la dazuwaya.”

Mahabay aña Hana, masla mapəhal gay ahəl misga

³⁶ Agà la ahəŋ babay masla mapəhal gay ahəl misga uwana sləm aŋha kà Hana, dugu aña Fanuyel uwana la tsəhay aña Asər. Masla adagay makoz, zil dahalay aña uwana ahəd kà, tadahà mavay mədəf atà səla, ³⁷ adzà à ahəŋ bokuba mis kuɗa tsəràh à mavay dzik mtəgis gəl aña ufaɗ. Masla azàhà vok la gày Zəzagəla la aku aw, la mavakay la mahanay gesina, azlàkàh Zəzagəla, ŋgaha akàs nəlay la madəv kuɗa babay. ³⁸ Asà à waŋ la kaslà uwatà, “Kikay”, agòɗ à Zəzagəla, ŋgaha apəh gay aña bəzi à azladza gesina uwana atà takudà kà Zəzagəla aña maβəl Urusalima.

Mawul à gudəŋ Nazaret

³⁹ Mok uwana azlababa aña Yesu tadàva tatak uwana à gay: ‘Dahəwwàŋ’, wakità mapəhay aña Sufəl Zəzagəla agòɗ kà, tawùl aŋatà la masla à Galili à gudəŋ Nazaret. ⁴⁰ Bəzi adà à huma à gay la mazigəŋay, azàla ndzəɗa à gəl aya, ahənla la matsihila. ŋgaha vok mahamay aña Sufəl Zəzagəla agà lakəl aña.

Yesu la məŋ gày Zəzagəla la aku

mavay aña kulo gəl aña səla

⁴¹ Kəla mavay azlababa aña tadàhah à Urusalima kà aña madəvaday Paska.✧ ⁴² La mok uwana adadah mavay kulo gəl aña səla kà, tasəl à waŋ la tsəh, kà uwana zagələ aŋatà. ⁴³ Mok uwana madəvaday adadəv à gay kà, tawùl aŋatà, la kokudà masəlay aña azlababa, kà Yesu agòɗ à Urusalima. ⁴⁴ Madzugway aŋatà kà: ‘Yesu kà aga la tataka aña azlamanalay aña la abà’, tagòɗ, ŋgaha la mok uwana lis tavək asik à gəl kà, tadzəkà mayahay la tataka aña dugum tsiŋ aña la abà, ŋgaha la azlamanalay aña la abà babay. ⁴⁵ Ama tabəzal aw, kà uwaga à uwana azlababa aña tawùl à Urusalima kà mayahay. ⁴⁶ La mavakay mamakər tabəzal à gəl la məŋ gày Zəzagəla la aku. Masla adadza madzay la tataka aña azlaməna matapla tatak à azladza la abà, atsəb à atà sləm, la manavàh atà tatak. ⁴⁷ Azladza gesina uwana tasəbal sləm, ləv avəl atà à gay kà haŋkəli aña, ŋgaha kà azlamawul à uda aña aya. ⁴⁸ Mok uwana azlababa aña tanəŋ kà, takəs gəl la ahəl səla, ŋgaha iyà aña agòɗal: “Bəzi gulo, kà mana madfàh à anu a ahəŋ kiya uwanay ma? Nəŋàŋ tsi, anu la baba aŋak kà, mədayàh ka kà məŋga, la iyaw tugwi la adi.” ⁴⁹ Agòɗ à atà: “Kà mana kayàhàw gi ma? Kasələw kà, azlayla gi, aña madz à ahəŋ la gày aña baba gulo la aku, kà madfàh sləray aña aw takay?” ⁵⁰ Ama atà kà tatsənà tatak uwana apəh à atà aw. ⁵¹ Kiya uwaga Yesu awùl à mtəga atà nna à gudəŋ Nazaret, akəs atà gay la ahəl ala. Ama iyà aña kà akəsàn lakəl à mad vok aña azlatatak gesina uwana apakà vok. ⁵² Yesu azigəŋ, maslay aña adà à huma à gay, masla ahəɗ à Zəzagəla à adi, ŋgaha à azladza gesina à adi babay.

3

Sayda aña Yuhana masla madfàh batem

(Mata 3.1-12; Mark 1.1-8; Yuhana 1.6-8,19-28)

¹ La mavay makulo gəl aña zlo aña makoray aña məŋ sufəl aña azla Rom, uwana sləm aña Tiber Zəsar, Pontsəyus Pilatus agà gumna aña Yahudiya, Herod bay akòr Galili, ŋgaha deda aña Filip akòr Ituriya la Tərakoniya, ŋgaha Lisaniyas akòr Abilen. ² La kaslà uwatà kà, Hanas atà la Kayyif atà tagà azlaməŋ madzahaga aña azlaməna mav tatak à Zəzagəla. La mok uwaga gay aña Zəzagəla atsənà à Yuhana, kona aña Zakari la kəsaf la abà. ³ Yuhana augüzàh la kutso uwana la abatà la makəla aña Urdun gesina. Azatàŋ, agòɗ: “Pəhàw gay la ləv ala, ɗahàw batem ŋgaha Zəzagəla

✧ 2:41 2.41 2Musa 12.1-27; 5Musa 16.1-8

adàmatsakulla tsakana ankul ala.” ⁴ Uwaga kà bokuba uwana tatsetsèr à wakità anja masla mapəhal gay à ahàl Yesayya à abà:

'Uwaga kà kuda anja dza uwana awiyay la fəta la abà:

Slàdāw tetəvi à Sufəl à ahəŋ,

Tsàzlàw azlatetəvi manalabahayga ala gesina!

⁵ Azlazzələk gesina adāhàbà,

Azlagudəŋ la azladadəgwal tapakàh vadavaday,

Azlamanalabay anja barama tatsazl ala,

azlatetəvi uwana malàh à uda gà, tadāhàbà takakarra.

⁶ Kiya uwaga azladza gesina tadənəŋ maβəl anu anja Zəzagəla.'✠

⁷ Maham à ahəŋ dza anjvaw asà à waŋ à slaka Yuhana, kà atà anja maβəz batem. Masla agòd à atà kà: “Akul azlabəza anja matsapa, uwa à uwana agòd à akul kà kadətəfaw à mapak ləv anja Zəzagəla la gay la à uwana adàsa à waŋ bawbaw uwa?

⁸ Lagwa kà, dāhāwwəŋ sləray uwana apəhla ala kà kadàβədfawla kà vok, kà kapəhaw gay la ləv ala zlà, kadzugwaw la ləv ankul la tsəh kà: ‘Abəraham baba gami madzidziga’, kagodəw aw. Kà uwana haday gəpəh à akul kà, Zəzagəla aslala vok anja mapak azlaakur uwanay ala, kà magay azlabəza anja Abəraham. ⁹ Lagwa kà goslka kà madəhəŋ à ahəŋ gà, kà mahərats la tsəh à ahàf à afik. Kəla ahàf uwana av mayyay delga aw kà, tanats à ahəŋ, ŋgaha taduwa à akàl à tsəh.”

¹⁰ Kiya uwaga maham à ahəŋ dza anàv: “Mana ma à uwana mədəhəŋ zlà ma?”

¹¹ Masla awùlatàla, agòd: “Dza uwana akor lukut səla tavàhəŋ la dza uwana anja la ahəŋ aw, ŋgaha dza uwana la tatak may babay tatsàkəŋ la dza uwana anja la ahəŋ aw.” ¹² Azlaməna mazəb hadama tasà à waŋ anja madāhatəŋ batem suwaŋ, ŋgaha tanavà Yuhana: “Məŋga, mana ma à uwana mədəhəŋ ma?”

¹³ Kiya uwaga agòd à atà: “Kafàw à azladza à gəl kà mapəlay məŋga dūwà uwana pələw, tagòd aw.”

¹⁴ Kiya uwaga azlaslodzi tanəv suwaŋ: “Anu ma, kakay anu babay zlà ma?” Agòd à atà: “Kahalaw sili azladza ala la gasa aw, baŋaw la tetəvi fida gà aw, ama kùdàw kà masik ankul uwana kadàβəzawwal.”

¹⁵ Ama uwana maham à ahəŋ dza gesina tagà la manəwəŋ la abà lakəl anja Yuhana kà, ‘Zlahaw kà, masla la uwana Kristu’ tagòd. ¹⁶ “Gi”, Yuhana agòd à atà gesina kà, “Gədfahakulla batem kà la iyaw. Ama dza anik la ahəŋ atsa à waŋ la lig gulo la ahəŋ kà, bə gi babay kà gəsla mapəzl zuwid kwimik anja ala babay aw. Masla kà adādfahakulla batem kà la Masasədfok tsikasla, ŋgaha la akàl. ¹⁷ Kətsaw madula hi anja la ahàl, kà masəhla hi, kà mavàh à atà ala la tafarga. Hi anja kà adàtsak à vəfa anja à abà, ama tafarga kà, aduwal à akàl uwana à tsəh adàmats ala dfikidiki aw!”

¹⁸ La mapəh à atà azlagay anik anik anjvaw aya, la uwana Yuhana azà gay matsidəyga à azlatsəhay uwaga. ¹⁹ Yuhana asləhà vok à Herod à kà uwana azəb Herodiya, mis anja deda anja, ŋgaha kà uwana adāhà azlamawisiga anik anik anjvaw aya.

²⁰ Kiya uwaga Herod azàla mawisiga anja à gəl aya la maduw Yuhana à danja.

Madāh batem anja Yesu

(Mata 3.13-17; Mark 1.9-11; Yuhana 1.32-34)

²¹ Kiya uwaga Yesu asà à waŋ, à mok uwana azladza gesina tabəz batem, abəzà à batem anja suwaŋ. La kaslā uwana adəv kufə, zagəla apəzl à ama ala, ²² ŋgaha Masasədfok Zəzagəla asà à ahəŋ à gəl anja bokuba habakoku. ŋgaha bay kufə atsən à ahəŋ la zagəla la magodəy: “Kak bəzi gay ləv gulo; marabay gulo gesina kà la kak la afik.”✠

✠ 3:6 3.6 Yesayya 40.3-5 ✠ 3:22 3.22 Yesayya 42.1; Mahabay 2.7

*Azlamadzidziga aña Yesu
(Mata 1.1-17)*

²³ La mok uwana Yesu adzəkà sləray aña, kà adafah mavay dzik makər. La madzugway aña azladza kà: ‘Kona aña Yusufu’ tagòd, à uwana agà kona aña Heli. Aganay madzəka vok mayyi à tsəh ala aña azlababa madzidziga uwana adà à huma à gay.

²⁴ Heli kona aña Matat, kona aña Levi, kona aña Melki, kona aña Yanay, kona aña Yusufu,

²⁵ kona aña Matatiyas, kona aña Amos, kona aña Nahum, kona aña Esəli, kona aña Nagay,

²⁶ kona aña Mat, kona aña Matatiyas, kona aña Səmeyyi, kona aña Yosək, kona aña Yoda,

²⁷ kona aña Yohanan, kona aña Resa, kona aña Zorobabel, kona aña Salatiyel, kona aña Neri,

²⁸ kona aña Melki, kona aña Adi, kona aña Kosam, kona aña Elmadam, kona aña Er,

²⁹ kona aña Yesu, kona aña Eliyezər, kona aña Yorim, kona aña Matat, kona aña Levi,

³⁰ kona aña Səmeyyon, kona aña Yahuda, kona aña Yusufu, kona aña Yonam, kona ana Eliyakim,

³¹ kona ana Meleyya, kona aña Mena, kona aña Matata, kona aña Natan, kona aña David,

³² kona aña Yese, kona aña Yobed, kona aña Boz, kona aña Sala, kona aña Naheson,

³³ kona aña Aminadab, kona aña Adəmin, kona aña Arəni, kona aña Esərom, kona aña Farəs, kona aña Yahuda,

³⁴ kona aña Yakuba, kona aña Isak, kona aña Abəraham, kona aña Tara, kona aña Nakor,

³⁵ kona aña Səruk, kona aña Ragaw, kona aña Falek, kona aña Eber, kona aña Sala,

³⁶ kona aña Kaynam, kona aña Arəfakəsad, kona aña Səm, kona aña Nuhu, kona aña Lamek,

³⁷ kona aña Matusala, kona aña Enok, kona aña Yared, kona aña Maleleyel, kona aña Kaynan,

³⁸ kona aña Enos, kona aña Sət, kona aña Adama, uwana agà la gəl aña kona aña Zəzagəla.

4

*Mapapat Yesu
(Mata 4.1-11; Mark 1.12-13)*

¹ Yesu ahənla la Masasədok Zəzagəla, awùlla à wan la gay mukwà Urdun. Ngaha Masasədok Zəzagəla adàlla à fəta à abà. ² La abatà adahən mavakay dzik ufac, azùw tatak aw, la mok uwaga seteni apapət masla kà, uwana masla la may gà.

³ Kiya uwaga seteni agòdal: “Baña kak bəzi aña Zəzagəla kà, pakà akur uwanay ala kà kaf.” ⁴ Yesu awulàlla: “Iyay, uwaga kà matsetseray gà: ‘Ama dza adzadzar vok kà la kaf pəra aw.’”[☆]

⁵ Seteni adàlla à afik kərkər aya, apəhla azlamakoray aña gudəñ à vok. ⁶ Ngaha agòdal: “Gədàvə à ka maslay uwana la abà la tatak uwana la gudəñ uwanay la vok gesina, kà uwana uwaga kà anulo, ngaha gi babay kà gəslala vok aña mav à dza uwana asa à gi. ⁷ A baña kak kasləkaw gi, la makəf à gi à ahen, kà uwaga gesina kà adàgay kà aña.”

⁸ Yesu agòdal: “Wakità agod kà:

☆ 4:4 4.4 5Musa 8.3

'Sufəl Zəzagəla anək la uwana kanəfay pəra, ngaha masla kokudfa gəl anha la uwana kazlakəŋ pəra.'*☆

⁹ Kiya uwaga seteni adàla masla à Urusalima, adàla masla à gəl mənə gày Zəzagəla à afik, agòdɔl: “Baŋa kak bəzi anə Zəzagəla kà, vəl à ahənə la abanay! ¹⁰ Kà uwana uwaga kà matsəseray gà:

'Dàw, Zəzagəla adàgodɔ à azlamalika anha, kà manənəla ka!'

Ngaha aya kà: ¹¹ 'Atà kà, tadəkəs kà ahəl, kà kak anə mazləl asik à akur la adi aw.'*☆

¹² Yesu agòdɔl: “Wakità Zəzagəla agòdɔ kà:

'Katapa Sufəl Zəzagəla anək aw.'*☆

¹³ Mok uwana seteni adàv mapapat Yesu à gay la azladabaray anik anik gesina kà, asàkal à ahənə, adà anha, say kà afats anik.

Yesu adzəka sləray anha la kutso Galili

(Mata 4.12-17; Mark 1.14-15)

¹⁴ Yesu awùlla à Galili mahənlaga la ndzəɔfa ana Masasəɔok Zəzagəla. Tadzəkà mavats gay lakəl anha la makoray uwatà la abà gesina. ¹⁵ Atàpla tatak à azladza la azlagày madəv kudfa la aku. Azladza gesina tatsəbəl sləm, tazləbà masla.

Azlaməna gudəŋ Nazaret takweska Yesu

(Mata 13.53-58; Mark 6.1-6)

¹⁶ Yesu awùlla à gudəŋ Nazaret à slaka uwana à abà azigən. La vudɔ maduw ləv anə azla Yahudiya, ahəd à gày Zəzagəla à agu bokuba uwana adagay zagələ anha. Atsizilla ala kà madzənə wakità. ¹⁷ Tavəl à ahəl wakità anə Yesayya, masla mapəhal gay à ahəl, à ahəl, apapàs wakità uwatà à uda ngaha abəz à slaka anik uwana tatsətsər kà:

¹⁸ 'Masasəɔok ana Sufəl Zəzagəla lakəl gulo,

Akəsàni gi, kà gi anə madla gay matsidəyga à azlaməna kudfa.

Asləl gi à wəŋ kà, kà gi anə mapəh gay mapəlla à azlaməna danəy,

Kà mavàh yewdi à azlaguləf,

Ngaha kà mataf azlauwana tas ngərpa.

¹⁹ Kà mapəhla ala mavày uwana vok mahamay anə Sufəl Zəzagəla adàpəhla vok ala.*☆

²⁰ Ngaha kiya uwaga Yesu akəl wakità à abà, awùlla à ahənə, adzà anha madzay. Dəwdəw dza uwana la gày uwatà la aku tatsəkəl yewdi à gay gesina. ²¹ La lig la ahənə, adzəkà magòdɔ à atà: “Lakana kà, matsəseray uwanay kà, adagòdɔ à afik à uwana mədzənə la abanay la sləm ankul.” ²² Atà gesina takəs gay anha, ləv avəl atà à gay, kà gay anha dzəbà anha səla aw gə uwaga apəh à atà. Tagòdɔ: “Masla kà kona anə Yusufu aw takay?” ²³ Yesu agòdɔ à atà: “Dzer, asa à gi kapəhaw gi gay la gay la abà uwanay: 'Dokwtar wurà gəl anək ala!' kadàgodɔfaw gi babay: 'Anu mətəsnà uwana kadəhənə la Kapernahum gesina, dəhənə uwaga la hudɔ gudəŋ anək babay zlà!' ” ²⁴ Ngaha aya agòdɔ à atà: “La dziriga gəpəh à akul, diki diki masla mapəhal gay à ahəl la ahənə tawoyənə, la hudɔ gudəŋ anha uwana tayyà abà aw. ²⁵ Iyay la dziriga gəpəh à akul: La zamana anə Eliya, azlamis kudfa la ahənə anjuvaw la gudəŋ Isərayel, la mok uwana iyaw anəɔf à ahənə la zagəla aw mavay makər la təla mukwa. Ngaha magol məl may mənəga apakà vok la gudəŋ uwatà gesina.* ²⁶ Ama Zəzagəla asləl Eliya à mtəga anə tekula anə azlamis uwaga aw, say à slaka anə mis kudfa uwana la Sarepəta, la makoray anə Sədon la abà pəra. ²⁷ Agà la ahənə babay azlaməna akəl zagəla anjuvaw la gudəŋ Isərayel la zamana anə Elise, masla mapəhal gay à ahəl, amiyaka bə tekula anətà kà awùr ala aw, say Naman zil Səriya pəra.” ²⁸ Mok uwana

* 4:8 4.8 5Musa 6.13 ☆ 4:11 4.11 Mahabay 91.11-12 ☆ 4:12 4.12 5Musa 6.16 ☆ 4:19 4.19 Yesayya 61.1-2

* 4:25 4.25 1 Sufəl 17.1

tatsənà gay uwaga, azladza gesina la gày madəv kudfa la aku tapakàh à ləv. ²⁹ Tasà à afik, takàs masla, tabàyàn à uda la gudəŋ aŋatà la abà, tadàlla à dadəgwal uwana à afik taŋàlàhal gày aŋatà à makəla, ŋgaha kà atà aŋa maməl à ahəŋ la afik la abatà. ³⁰ Ama masla, kussàh, asà à uda la tataka aŋatà la abà, adà aŋha.

*Dza uwana atərəbɔy la ahàl aŋa masasəfok mawisiga
(Mata 4.13-16; Mark 1.21-28)*

³¹ Yesu ahàd à gudəŋ Kapernahum, uwana la kutso Galili la abà. Ŋgaha adzəkà matapla tatak à azladza la vudf maduw ləv. ³² Ləv avàl atà à gay mənɔga kà mapàhla ala aŋha, kà uwana atàpatàla kà lela, ŋgaha la maslay. ³³ La gày madəv kudfa uwatà la aku kà, dza anik la ahəŋ uwana masasəfok mawisiga atərəbəhəŋ, adzəkà mawiyay la ndzəfa. ³⁴ “Kayyà, kak Yesu, zil Nazaret, mana gay aŋak la anu ma? Kasà à waŋ ma, kà mazàh anu ala takay? Gəsəl la dziriga kà, kak tsikaslaga uwana Zəzagəla asləl kà à waŋ!” ³⁵ Yesu aslèh məl à masasəfok mawisiga uwaga à gəl la ndzəfa, agòfal: “Dzà à ahəŋ titi, sà à dza uwaga lakəl ala!”, masasəfok mawisiga aməl gəl à dza uwaga à ahəŋ la huma aŋa azladza gesina, ŋgaha asàl à kəl ala, kokudfa madəfahal amik à vok. ³⁶ Azladza gesina kà, ləv avàl à atà à gay, tavàts gay la tsəh ala kà atà kà atà: “Kakay, à tsəhay gay uwanay ma? Masla akor azlamasasəfok mawisiga la ndzəfa, ŋgaha azlamasasəfok takəs gay aŋha, tasàh azladza lakəl ala ma?” ³⁷ Ŋgaha azladza tadzəkà mapəhay lakəl aŋa Yesu la makoray uwatà la abà gesina.

*Yesu awar azlaməna dɔvats ala aŋuvaw
(Mata 8.14-17; Mark 1.29-34)*

³⁸ Yesu asà à lag la gày madəv kudfa la aku, ŋgaha ahàd à mtəga aŋa Səmon. Məŋay aŋa Səmon la akàl à vok mənɔga, mənɔga. La abatà tanavà Yesu kà mawurəŋ ala. ³⁹ Yesu atsəŋ à masla dɔvats à gəl, apəh gay la tsəh ala la ndzəfa, “Sàkal!”, agòd à dɔvats. Duvats asàk à mis uwaga, katskats asà à afik kà mazlak atà à sləray à abà.

⁴⁰ La mok uwana afats adatəf à ahəŋ, tasàhla azlaməna dɔvats à waŋ, la azladɔvats anik anik gesina, kà mabak à atà ahàl à gəl la tekula, tekula aŋatà gesina, awarà atà ala. ⁴¹ Azlazagəla zagəla la azlamasasəfok mawisiga tasàh à azlaməna dɔvats lakəl ala aŋuvaw la mawiyay: “Kak la uwana kak Kona aŋa Zəzagəla!” Ama Yesu apəh à atà gay la ndzəfa, ŋgaha adəf à atà gay à ahəŋ kà mavats gay la ndzəfa, kà uwana tasəl kà, masla kà Kristu.

*Yesu apəh gay Zəzagəla la kutso Galili
(Mark 1.35-39)*

⁴² Mok uwana məl adawulla, Yesu asà à uda la gudəŋ la abà, adà aŋha à fəta à abà kokudfa gəl aŋha. Maham à ahəŋ dza aŋuvaw tadzəkà mayàh masla. Mok uwana tabəzal à vok kà, asà à atà asàk atà à ahəŋ aya aw. ⁴³ Ama Yesu agòd à atà: “Say gəz gay matsidəyga aŋa makoray Zəzagəla à azlagudəŋ anik gesina bay, kà aŋa uwaga à uwana Zəzagəla asləl gi à waŋ.” ⁴⁴ Ŋgaha apàh gay Zəzagəla la azlagəy madəv kudfa la aku la kutso Galili gesina.

5

*Yesu azal azlaməna matapla la slaka aŋha teraŋa
(Mata 4.18-22; Mark 1.16-20)*

¹ Vərdi anik Yesu atsizilla à gay dərəv aŋa dərəv Genesaret, ŋgaha magol maham à ahəŋ dza tahamà à slaka aŋha kà matsəb sləm à gay Zəzagəla. ² Yesu anəŋà azlakəslah iyaw səla la gay gərdza, azlaməna makas kilfi tasà à ahəŋ la afik, tapalàh dzarawa aŋatà. ³ Yesu ahàd à kəslah iyaw à afik, uwana agà aŋa Səmon, agòfal:

“Zà à gi à gəl iyaw ηuv.” Ngaha adzà madzay la kəslah iyaw la afik, adzəkà matapla tatak à maham à ahəŋ dza uwaga.

⁴ Mok uwana adadəv matapatàla à gay kà, agòd à Səmon: “Zàw vok à gəl dərəv lela, ngaha kak la azlamanalay anjak kadawaw dzarawa ankul à iyaw à abà, kà makas kilfi.” ⁵ Səmon agòdɔf: “Məŋga, huyip, mədahənal à gəl kà madaw à abà, ama mədakəs tatak aw. Ama bokuba uwana kapəh kà, gəkweska gay anjak aw, gəduw à abà aya kità.”

⁶ Kiya uwaga atà tadùw dzarawa anjatà à abà, ahəl kilfi à agu anjvaw tsərəh à uwana dzarawa anjatà awòy maslahàhla, kà magay məŋga anja kilfi uwana la aku. ⁷ La abatà atà tafatakàhà azlamanalay anjatà, uwana la kəslah iyaw anik la afik, kà atà anja mas à waŋ anja mazlak atà, tadà à awtày tazlak atà, tahanà kəslah iyaw ala səla nna la kilfi tsərəh à uwana azlakəslah iyaw uwaga tawòy madàh à hud iyaw, kà mahanay anja azlakilfi uwaga. ⁸ Uwana Səmon Piyer anəŋà uwaga kà, akədéd à huma anja Yesu la magòdɔf: “Sufəl, zà à gi vok la vok ala, kà uwana gi kà gi masla tsakana!” ⁹ Guba akəs masla, la azladza uwana atà nna gesina, kà magol kilfi uwana takàs. ¹⁰ Azla Yakuba la Yuhana, azlabəza anja Zebede, uwana sləray anjatà tekula la Səmon, ləv avəl atà à gay babay. Ama Yesu agòd à Səmon: “Guba akəs ka aw, dagay lakana gədəpaka ka ala kà masla makas azladza.” ¹¹ Mok uwana tadàla azlakəslah iyaw anjatà à gay gərdza kà, tasək à tatak gesina à ahəŋ, tanəfà Yesu.

*Yesu awura masla akəl zagəla ala
(Mata 8.1-4; Mark 1.40-45)*

¹² Yesu agà la gudəŋ anik la abà, à uwana masla akəl zagəla asà à waŋ kà magamay la masla, uwana adanəŋəŋ atəd à huma asik anja la magòdɔf: “Məŋga, baŋa asa à ka kà, kaslala vok mawur gi ala!” ¹³ Yesu abiyà ahəl ala, adəbani masla la magòdɔf: “Asa à gi, kawur ala!” Akəl zagəla asà à dza uwatà la vok ala katskats. ¹⁴ Aganay mafahal akur à lig, uwana Yesu afàhal à lig: “Kapəh gay uwanay à dza aw. Ama həd, kadəpəhla vok anjak à məŋga anja azlaməna mav tatak à Zəzagəla, ngaha kavà tatak uwana Musa apəh la wakità seriya la abà, kà azladza gesina anja masəlay kà kawùrla!”[☆] ¹⁵ Amiyaka bà la uwaga gesina kà, gay anja Yesu atsənlà la slaka azladza gesina. Maham à ahəŋ dza anjvaw tasàhàw à waŋ à slaka anja kà matsəbal sləm, ngaha tawàràh ala la azladɔvats anjatà la abà gesina. ¹⁶ Ama Yesu asà à uda la tataka anjatà la abà, adà anja à fəta à abà kokufa gəl anja, kà madəv kufa.

*Yesu awura dza uwana makalàh à vədah gà ala
(Mata 9.1-8; Mark 2.1-12)*

¹⁷ Iyay, vərđi anik aya, Yesu adzəkà mapàhla tatak ala. Azla Farisəya la azlaməna mapàhla wakità seriya ala tadzàhà madzay nekwa la slaka anja. Tasà à waŋ la gudəŋ anja Galili, la anja Yahudiya ngaha babay la Urusalima. Ndzəɔfa anja Sufəl Zəzagəla agà la Yesu la abà kà mawar azlaməna dɔvats ala. ¹⁸ Ngaha tasəlla masla dɔvats à waŋ la kəslah, kà uwana makalàh à vədah gà, tayàh tetəvi kà madalla à gày kà maf à huma anja Yesu. ¹⁹ Ama tasəl slaka uwana tagòla à awtày la abà aw, kà uwana maham à ahəŋ dza kà anjvaw. Kiya uwaga tagòla la gəl gày, tazləlla gəl gày ala, tawəɔhəh zuwid à kəslah à gay, tadzilà à gày la abatà la kəslah gà, à tataka maham à ahəŋ dza à abà la huma anja Yesu. ²⁰ Mok uwana Yesu anəŋà madiŋal gəl à vok anja azladza uwaga, Yesu agòd à dza makalàh à vədah gà: “Tsakana anjak adamatsila tsewwa.” ²¹ Ngaha azlaməna mapàhla wakità seriya ala la azla Farisəya tadzəkà madzugway la magòdɔf: “Uwa asla à tsəhay dza uwanay, atugw mawisiga lakəl anja Zəzagəla uwa? Uwa aslala vok anja mamats tsakana à dza ala, tsa baŋa

☆ 5:14 5.14 3Musa 14.1-32

Zəzagəla kokuda gəl anha pəra aw uwa?” ²² Bokuba uwana Yesu asəl madzugway anətə, agòd à atà: “Mana kadzugwaw la mañoñuzay la ləv ankul la tsəh ma? ²³ Tak ma, butu ma, la magodfay kà: Tsakana anək adamatsila, awma magodfay: Sà à afik, ngaha hād anək, takay? ²⁴ Ama asa à gi kasəlaw kà, kà Kona anə dza la maslay la gudəñ uwanay la vok kà mamats tsakana anə dza ala.” Ngaha agòd à dza makalàh à vədah gə uwaga: “Gi uwaga gəgodf à ka: Sà à afik, zəb kəslah anək, ngaha dā anək à mtəga!” ²⁵ Kiya uwaga, hadzak, dza uwaga asà à afik la huma azladza gesina, azəb kəslah anha uwana ahəñay la afik, ngaha adà anha à mtəga la mazləb Zəzagəla. ²⁶ Ləv avələh atà à gay gesina, ngaha tazləbà Zəzagəla, guba akəd atà à gay, ngaha tagòd: “Lakana kà, mədanəñəñ azlatatak dzəba anha səla aw gə, ndzer.”

*Yesu azal Levi
(Mata 9.9-13; Mark 2.13-17)*

²⁷ La lig anə uwaga la ahəñ, Yesu asà à uda, ngaha anəñà masla mazəb hadama, sləm anha Levi, adadza madzay la gəy mazəb hadama la aku. ²⁸ Yesu agòd fal: “Nəfà à gi!” Hadzak, Levi asà à afik asək azlatatak à ahəñ gesina, anəfà masla.

²⁹ Levi atà magol tatak may la mtəga anha. Azladza anuvaw tahamà gay à vok la masla, azlaməna mazəb hadama, la azladza anik babay. ³⁰ Azla Farisəya la azlaməna mapəhla mapəhay ala, uwana tagə la pañaw tekula kà, azà à atà lakəl anə uwaga, tagòd à azlaməna matapla la slaka anha: “Kà mana kazuwaw la azlaməna mazəb hadama ma, ngaha kasaw la azladza uwana madz à ahəñ anətə kà delga aw gə, la azlaməna tsakana ma?” ³¹ Uwana Yesu atsənà uwaga, agòd à atà: “Azladza uwana la dufvats aw kà, tanəkuda mad à dokwtar aw, say azlauwana la dufvats pəra!” ³² Ama agòd atà aya: “Gəsà à wañ kà mazala azladza uwana azlawurwur aw, ama gəsà à wañ kà mazala azladza uwana atà la dufvats pəra, kà atà anə mapəh gay la ləv ala”, agòd.

*Gay lakəl anə makəs nəlay
(Mata 9.14-17; Mark 2.18-22)*

³³ Ngaha azladza tagòd fal: “Azlaməna matapla la slaka Yuhana kà takəsàhəh nəlay koksikoksi, ngaha tadəv kuda, amiyaka anə azla Farisəya bay. Ama azlaanək kà: tazuway, tasay.” ³⁴ Ama Yesu agòd atà: “Madzugway ankul ma maf leri à azlauwana à gəl tazala atà à mazəb vok à abà anə makəs nəlay à bañə masla mazəb mis aləg la tataka anətə la abà kagodfaw takay? Awan, akəs vok aw. ³⁵ Ama kaslà adàsa à wañ, à mok uwana masla mazəb mis adəgay la tataka anətə la abà aya aw kà, la mok uwatə la uwana tadəkəs nəlay suwan.” ³⁶ Yesu apəhatəla gay la gay la abà uwanay: “Dza la ahəñ, akohəni lukut mawga kà matafay à lukut maviyaga à vok aw, bañə adəhəñ kiya uwaga kà, awis lukut mawga ala, ngaha lukut mawga agay kalkal la lukut maviyaga babay aw. ³⁷ Ngaha aya babay kà, dza la ahəñ adəway iyaw matavəruk mawga à kiwa iyaw maviyaga à agu aw. Bañə adəhəñ kiya uwaga kà, mamlila anha kà, adəkwhah kiwa maviyaga ala, ngaha iyaw matavəruk asokw à vədah, ngaha kiwa babay awis ala. ³⁸ Ama kəla kà, say tadəway iyaw matavəruk mawga à kiwa iyaw mawga à agu suwan. ³⁹ Bañə dza adasa iyaw matavəruk maviyaga kà, ayəh mas iyaw matavəruk mawga aya aw, kà uwana tagòd kà: ‘Maviya gə la uwana aduwa mawga la matsidəy’, tagòd.”

6

*Yesu la uwana məñga anə vudf maduw ləv
(Mata 12.1-8; Mark 2.23-28)*

¹ Vərdi anik, la vudf maduw ləv Yesu aguwa à uda la guf nalkama la abà. (Uwana bokuba hi) Azlaməna matapla la slaka anha tadəkə manal gəl gə, ngaha tavərəsləh

kà mapadɔy kà uwana may azà à atà.✠ ² Azla Farisəya anik tagòd à atà: “Kà mana kadɔhaw tatak uwana tetəvi la ahəŋ aŋa maɔhəh uwaga, la vudɔ maduw ləv aw ma?”
³ “Kay”, Yesu agòd à atà: “Akul kà, kadzəŋəw tatak uwana David aɔfahəŋ la mok uwana may akəs la azladza uwana tagà atà nna aw takay?”
⁴ Masla, la azlaməna aŋha tahàd à gày Zəzagəla à agu, tazùw tatak may tsikaslaga, uwana maf à ahəŋ gə kà aŋa Zəzagəla pəra. Tekedika tetəvi la ahəŋ kà atà aŋa mazuway aw, say azlaməna mav tatak à Zəzagəla la uwana atà la tetəvi aŋa mazuway pəra.”✠
⁵ Yesu agòd à atà aya: “Kona aŋa dza la uwana məŋga aŋa vudɔ maduw ləv uwaga.”

Dza la ahəl mamətsayga
(Mata 12.9-14; Mark 3.1-6)

⁶ La vudɔ maduw ləv anik aya, Yesu ahàd à gày madəv kuɔa anik à agu, ŋgaha adzəkà matapla azladza la abatà. Dza anik la ahəŋ la abatà, uwana ahəl kaf aŋha kà mamətsayga.
⁷ La abatà kà, azlaməna mapàhla mapəhay ala, la azla Farisəya tatsəb sləm à Yesu la manərazay, à baŋa awur dza uwaga ala la vudɔ maduw ləv, kà atà aŋa maɔzəl à tsəh, kà mapuw ala gudzi à gəl kà uwana apesew vudɔ maduw ləv.
⁸ Ama Yesu asəl madzugway aŋatà, kiya uwaga agòd à dza uwana la ahəl mamətsayga: “Sà à afik, tsizilla à tataka à abà, la abà gə, la huma azladza gesina.” Dza uwaga asà à afik, ŋgaha atsizilla à atà à huma à gay la abatà.
⁹ “La kità”, Yesu agòd à atà: “Gi la manavay la slaka aŋkul: Mapəhay gami ma avà à anu tetəvi aŋa maɔhəh delga la vudɔ maduw ləv takay, awma maɔhəh mawisiga ay? Maɔəl sifa aŋa dza, awma maz sifa aŋa dza ala, la uwana delga takay?”
¹⁰ Atà gesina tatsəkəl yewdi à gay, kiya uwaga Yesu agòd à dza uwaga: “Biyà ahəl ala!” Abiyà ahəl ala, ŋgaha ahəl adawur ala.
¹¹ Ama azla Farisəya la azlaməna mapàhla mapəhay ala tahən ala la maŋor, ŋgaha la mapakàh ləv, ŋgaha tadzəkà mabay vok gay kà atà kà atà lakəl aŋa uwana asà à atà maɔhəŋ à Yesu à vok.

Yesu akasani azlaməna matapla kulo gəl aŋha səla
(Mata 10.1-15; Mark 3.13-19)

¹² La kaslà uwatà, Yesu ahàd à dadəgwal à afik kà madəv kuɔa la abatà, huyip ahən à madəv kuɔa à gəl, adəv kuɔa à Zəzagəla.
¹³ Mok uwana məl adawulla, azàla azlaməna asik aŋha, ŋgaha atsatsəmàni kulo gəl aŋha səla, uwana apakàtala kà azlaməna matapla la slaka aŋha.
¹⁴ Səmon (uwana avəl sləm Piyer bay) la deda aŋha Andəre, Yakuba, Yuhana, Filip, Bartelemi,
¹⁵ Mata, Tomas, Yakuba kona aŋa Alfe, Səmon uwana tazàlal Zələt,
¹⁶ Yudas kona aŋa Yakuba, ŋgaha Yudas Iskariyot, uwana apaka masla məzam aŋa Sufəl Yesu.

Yesu atapla tatak à maham à ahəŋ dza

ŋgaha awara azlaməna dɔvats ala
(Mata 4.23-25)

¹⁷ Yesu asà à ahəŋ la dadəgwal la afik atà nna, ŋgaha asà à vadavaday à afik, kà uwana azlaməna asik aŋha aŋuvaw la abatà. Azlaməna kutso Yahudiya, la azlaməna gudəŋ Urusalima ŋgaha azlauwana la makəla aŋa gudəŋ Tir, la Sədon uwana la gay mukwà, atà gesina la abatà.
¹⁸ Tasàhà à waŋ kà matsəbal sləm, ŋgaha kà atà aŋa mawarla la azladɔvats aŋatà la abà. Azlauwana tasà ŋgərpa la ahəl aŋa azlamasəɔfok mawisiga babay kà, tawarà ala.
¹⁹ Dəwdəw dza tayàh kà maɔəbani Yesu, kà uwana ndzəɔa asahàh à uda la masla la abà, awàràhà atà ala gesina.

Barka la matsafay
(Mata 5.2-12)

- ²⁰ Yesu anèrèz azlamèna matapla la slaka anha agòd:
 “Marabay agay la akul uwana azlamèna kudfa lagwa, kà uwana makoray Zèzagèla kà adàgay kà ankul.
- ²¹ Marabay agay la akul uwana may az akul lagwa, kà uwana kadàbèzawwal tatak may sakay sasakay.
 Marabay agay la akul uwana katuwaw lagwa, kà uwana kadàkèdàslaw.
- ²² Marabay agay la akul à baña azladza tapèsew akul, takweska akul, tatsək à akul magodahay à gəl, ngaha tatèrəb akul la mawisiga, kà Kona anja dza.*
- ²³ Ràbàw la vud uwaga, ngaha vālāhàw à zagèla kà uwana masik mənğa akud akul la zagèla, kiya uwaga à uwana azlababa ankul madzidziga tatèrəbàhà azlamèna mapəh à atà gay à ahàl uwarà.
- ²⁴ Ama ngərpa agay la akul, akul azlagorobu, kà uwana kadazuwwaw.
- ²⁵ Ngərpa agay la akul, akul uwana kakoraw tatak sakay sasakay lakana, kà uwana may la uwana adàkad akul.
 Ngərpa agay la akul uwana kadakèdàslaw lakana, kà uwana bawbaw kà, kadàgaw la mazaw la gəl la abà, ngaha kadàgahaw la iyaw tugwi la adi.
- ²⁶ Ngərpa agay la akul à baña azladza gesina tasləkaw akul, kà uwana kiya uwaga la uwana, azlababa ankul madzidziga tadfahàhàn la azlamèna mapəh à atà gay à ahàl fidaga.”

Mawoy masla məzam
 (Mata 5.38-48; 7.12)

²⁷ “Ama gəpəh à akul, akul uwana katsəbaw gi sləm: Wòyàw azlamèna məzam ankul, dfaHàw delga à azladza uwana tapèsew akul. ²⁸ Pìsàw gay à azlauwana à vok, tatsafla akul, dèwàw kudfa kà anja azlauwana tatèrəb akul. ²⁹ Baña dza adedka à pañaw à abà, gòlla anik uwanay à awtày aya, baña dza ahəl dawara anjak kà, sàkal ahəl bəzi anha aya babay. ³⁰ Kəla dza uwana anav à ka tatak kà, vəl, baña dza azəb à ka tatak ala la gasa kà, kapùwla gudzi à gəl aw. ³¹ Tatak delga uwana asa à akul azladza tadfahakulan kà, dfaHàwàn à azladza anik bokuba uwaga suwan kəla.”

³² “Baña kawoyawwan kà azladza uwana tawoya akul pəra ma, kà mana kakudaw masik anik aya ma? Kà uwana bə azlamèna tsakana babay kà, tawoya azlauwana tawoya atà babay suwan pəra. ³³ Ngaha baña kadfahawwan delga kà azlauwana tadfahakulan delga pəra ma, kà mana kakudaw masik anik aya ma? Amiyaka azlamèna tsakana kà, kiya uwaga à uwana tadfehən babay. ³⁴ Baña kakəllaw goder à dza uwana kasəlaw, kà adəpəlay ma, kà mana kakudaw masik anik aya ma? Azlamèna tsakana babay kà, takal vok goder, ngaha atà anja mavàh vok anatà suwan, kità ma: Uwa adàvə akul masik aya zlà ma uwa? ³⁵ Ama kəla kà: Wòyàw azlamèna məzam ankul, ngaha kəlàw atà goder la kokudfa madzugway kà mawul akul ala. Kiya uwaga kà, kadàbèzaw à masik mənğa la slaka Baba uwana kərkər la afik, ngaha kadàgaw azlabəza anha. Kà uwana masla kà dziriga la huma anja azlamèna tsakana la azlamèna makəsafər gesina. ³⁶ Hənàwla, la delga ngaha la vok mahamay, bokuba Baba ankul uwana adahənla la dzəba anha səla aw.”

Kadafaw seriya à azladza anik à gəl aw
 (Mata 7.1-5)

³⁷ “Kadafaw seriya à azladza anik à gəl aw, ngaha Zèzagèla adàdfahakulla seriya à gəl suwan aw; kadəkaw seriya à azladza à gəl aw, ngaha Zèzagèla adàdfəkakulla seriya à gəl suwan aw, matsawan azladza anik ala, ngaha Zèzagèla adàmatsakullan ala suwan. ³⁸ Vəw à azladza anik, ngaha Zèzagèla adàvə à akul: Zèzagèla adàtsak akul à zliba ankul à agu tsən tsətsən, tadəhatsəkwən la madəkəwən serafaffa. La

* 6:22 6.22 1 Piyer 4.14

daram uwana kagurawla à azladza anik kà, uwaga la la uwana tadàgur à akul ala suwanj.”

³⁹ Yesu apèh à atà gay la gay la abà anik, agòf à atà: “Guləf aslala vok anja makəs guləf anik à ahàl takay? Awanj, atà səla nna tadəsakway à afək à abà. ⁴⁰ Masla matapla aduw masla matapalla aw, ama banja adədəv matapla madzenjay anja à gay kà, aslala vok anja magay bokuba masla.”

⁴¹ “Kay, kà mana kanəja kəsaf la yewdi anja deda anjak la awtəy, ama anjak uwana magol tsəkudf tsəkudf la awtəy kà, kanəja aw ma, kà mana ma? ⁴² Ngaha kagodfay à deda anjak: ‘Deda, sək à gi, gəzəb à ka kəsaf la adi ala’. Kak, la gəl anjak kà, kanəja magol tsəkudf tsəkudf uwaga la anjak la awtəy aw ma? Kak, masla magolla dza, zəb anjak la adi ala dadən, ngaha la lig la ahəj kà, kadənənla lela kà mazəb kəsaf à deda anjak la adi ala, la dziriga.”

*Masəl ahəf kà la mayyay anja la vok
(Mata 7.16-20; 12.33-35)*

⁴³ “Ahəf delga kà avà mayyay mawisiga aw, ahəf mawisiga babay kà, aslala vok anja mav mayyay delga aw. ⁴⁴ Iyay, kəla ahəf kà agay masəlayga la mayyay anja la vok. Dza aslala vok anja madəzl gudəv la matatak la vok aw, ngaha bay, dza adəzl matavəruk la mazləb la vok aw. ⁴⁵ Dza delga kà, adəhəj kà delga, kà uwana, uwana la ləv anja la tsəh kà delga. Dza mawisiga kà, adəhəj kà mawisiga, kà uwana uwana la ləv anja la tsəh kà mawisiga. Kà uwana panaw anja dza kà, apəhay kà uwana la ləv anja la tsəh.”

*Gay lakəl anja azlagəy səla
(Mata 7.21-29)*

⁴⁶ “Kà mana kazalaw gi ala: Sufəl, Sufəl, ngaha tsa kadəhaw tatak uwana gəpəh à akul aw ma? ⁴⁷ Kəla uwabeyuwi uwana atsa à wanj à slaka gulo ngaha atsəb sləm à kuda gulo kà, gəpəhakulla dza uwana gəgagazləla la masla. ⁴⁸ Masla kà kalkal la dza uwana atatukw matatukway anja gəy anja kà à təhus à afik. Mok uwana iyaw adədzəka mas à afik, akəl la lig gəy, afad adəf la ndzəfa, ama gəy kà akaləh à ahəj aw, kà uwana tatətukw kà à təhus à afik. ⁴⁹ Ama dza uwana atsəb sləm à gay gulo, ngaha akəs uwaga aw kà, masla kà gəgagazləla kà la dza, uwana anjal gəy à wuyyanj à afik. Mok uwana iyaw mukwà adàda à mukwà à afik, azəb gəy uwaga gesina, adalla.”

7

*Yesu awur magamza anja mənja anja azlaslodzi anja azla Rom ala
(Mata 8.5-13)*

¹ Mok uwana Yesu adadəv gay anja à gay la huma anja maham à ahəj dza, atsizlla ala la abatà, ahàd à Kapernahum. ² Mənja anja azlaslodzi anja azla Rom la ahəj la abatà. Magamza anja uwana awoyən kaykay, aga la dufvats, agà kà la ləv la ləv. ³ Mok uwana mənja anja azlaslodzi atsənə gay uwana tapahay lakəl anja Yesu kà, masla asləl azlamasiga anik la tataka azla Yahudiya la abà, kà madəv kuda à Yesu kà mas à wanj anja mawur magamza anja ala. ⁴ Kiya uwaga, mok uwana tabəz à slaka Yesu, tadəval kuda la kamkam la iyaw tugwi, ngaha la magodfay: “Dza uwanay kà, azlayla kà vok kà kazlakay, ⁵ kà uwana masla kà awoyà tsəhay gami, ngaha aya, masla la uwana anjal anu gəy madəv kuda gami aya.” ⁶ Kiya uwaga Yesu anəfà atà, ngaha mok uwana tadazlabəz kà mtəga, mənja anja azlaslodzi uwaga asləl azlamanalay anja kà magodal: “Madzahaga katərəb gəl anjak aw, kà uwana gəsla kà kak anja makəl gəl à ahəj kà mas à gəy gulo à agu aw. ⁷ Kà uwaga, gi babay la gəl gulo kà, gənərəz kà, gəsà kà mad à awtəy à slaka anjak la gəl gulo aw. Ama pəh gay tekula

la tsəh ala pəra kà kona gulo aña mawurla. ⁸ Gi babay kà azlaməngga la ahəŋ lakəl gulo, gi babay, gi lakəl aña azlaslodzi anik suwaŋ. Nğaha gəslala vok magodfay à tekula aŋatà: Həd, kà aday. Gəgodfay à anik aya: Sà à waŋ kà, atsa à waŋ, nğaha bay gəgodfay à masla sləray gulo: 'Dahəŋ uwanay kà, adəhəŋ bay.' ⁹ Mok uwana Yesu atsənà gay uwaga, awoyà masla kaykay, agòla vok, nğaha agòd à maham à ahəŋ dza uwana tanəfà la tsəh: "La dziriga gəpəh à akul: Gədanəŋəŋ didididi à tsəhay madiŋal gəl à vok uwanay, amiyaka bà la Isərayel aw." ¹⁰ Azlaməna sləray aña məngga aña azlaslodzi tawùl à mtəga, nğaha tabèz à magamza uwaga à gəl, kà adawur ala.

Yesu awulla kona aña mis kudfa à uda la mamətsay

¹¹ Nğaha Yesu ahəd à gudəŋ anik uwana à abà, sləm aŋha Nayyin, la azlaməna matapla la slaka aŋha, nğaha maham à ahəŋ dza aŋuvaw tanəfà masla. ¹² Kiya uwaga mok uwana tazlèbèz à gay gamagày aŋha huđ gudəŋ, tagagàm la azladza uwana tazèb mazimnekiđ à uda. Uwaga bəzi tekula gə aña mis kudfa, uwana anik aŋha la ahəŋ aw. Maham à ahəŋ dza aña gudəŋ uwaga gesina tagà la slaka mis uwaga. ¹³ Mok uwana Sufəl Yesu anəŋà mis uwaga vok ahamàl: "Katùw aw", agòdal. ¹⁴ Nğaha Yesu azà vok à slaka mazimnekiđ, adəbani azlav aŋha. Azlaməna mazəbay tatsizlla à ahəŋ, Yesu agòd: "Kohana, sà à afik, gəgod à ka!" ¹⁵ Kiya uwaga mazimnekiđ atsizlla ala, nğaha adzəkà mavats gay. La lig la ahəŋ Yesu awùlla à iyà aŋha. ¹⁶ La abatà ləv avàl à azladza à gay gesina, tazlèbà Zəzagəla la magodfay: "Magol masla mapəhal gay à ahəl aña mapəh azladza adapəhla vok ala la tataka gami la abà lakana. Zəzagəla la gəl aŋha adasa à ahəŋ kà mazlak tsəhay aŋha lakana." ¹⁷ Nğaha gay aña Yesu uwaga atsən la kutso Yahudiya la abà gesina la kutso uwana la makəla aŋha gesina.

*Azladza uwana Yuhana masla madəh batem asləl atà à waŋ
(Mata 11.2-19)*

¹⁸ Kiya uwaga azlaməna matapla la slaka aña Yuhana tapəh uwaga gesina aŋatà à məngga aŋatà. Yuhana azàl azladza səla la tataka aŋatà la abà, ¹⁹ nğaha aslèlla atà à slaka Yesu kà manaval à gay ala: "Kak, ma kak dza uwana məkud kà aña mas à waŋ takay? Awma məkud dza anik kəla ay?" ²⁰ Mok uwana tabèz à slaka Yesu, tagòdal: "Yuhana, masla madəh batem, asləl anu à waŋ kà manav à ka: 'Kak, ma kak dza uwana məkuday kà aña mas à waŋ takay, awma məkud dza anik ay?' " ²¹ La kaslà uwatà, Yesu awarà azladza ala aŋuvaw, la azladfuvats aŋatà la abà, nğaha la azlamazay vok aŋatà la abà, apàlla atà ala la ndzəda aña azlamasasəfok mawisiga la abà, nğaha avəh yewdi à azlaguləf aŋuvaw. ²² Kiya uwaga awùlla gay à azlaməna masləl atà à waŋ gə aña Yuhana: "Dàw, kadəpəhaw à Yuhana uwana kanəŋəwwəŋ la uwana katsənəwwəŋ:

'Azlaguləf tanəŋla, azladeri taday, azlaməna akəl zagəla tawarla, azlamadagazlam tatsən sləm, azlamazimnekiđ tawul à uda la mamətsay. Nğaha gay matsidəyga babay adatsən à azlaməna kudfa.'^{*}

²³ Marabay agay la dza, uwana asak gi à tsəh ala la madiŋal gel à vok la abà aw!"

²⁴ Mok uwana azlaməna matapla la slaka Yuhana tadiy aŋatà, Yesu adzəkà mapəhay à maham à ahəŋ, dza lakəl aŋha la magodfay: "Mana à uwana kadàw kà mayahay la fəta la abà ma? Mazuwa uwana afad abəlakəŋ ay? Awaŋ, uwaga aw. ²⁵ Kətà zlà ma: Mana à uwana kadàw aña manəŋəŋ zlà ma? Dza uwana atsəkwhəh à lukut mahəfəyga à abà kəla ay? Azlauwana tatsəkwhəh à lukut mahəfəyga à abà kà, atà kà azlasufəl. Nğaha tadzà à ahəŋ la huđ gày sufəl. ²⁶ Kətà zlà ma: Mana kadàw kà aña manəŋəŋ ma, masla mapəhal gay ahəl aña Zəzagəla kəla ay? Iyay,

^{*} 7:22 7.22 Yesayya 35.5-6; 61.1

gëgodf à akul: amiyaka adagay masla mapəhal gay à ahàl babay kà, ²⁷ hadfay, Yuhana kà masla kà dza uwana matsetseray apəh lakəl anha:

'Aganay gəsləl masləlay gulo à awtày à huma anak,' Zəzagəla agodf: 'Kà masla anja mapəslak tetəvi.'"[✧]

²⁸ "La dziriga gəpəh à akul: La tataka azladza asik la abà, agà la ahəŋ dza uwana agà bokuba Yuhana masla madàh batem uwanay aw; tekefika, dza uwana mabəziga bəziga la makoray Zəzagəla kà, aduwa Yuhana uwanay lagwa."

²⁹ Maham à ahəŋ dza gesina la azlaməna mazəb hadama tatsəb sləm à masla, atà gesina tagədāŋ à afik kà Zəzagəla kà dziriga. Atà tabəzəl batem la slaka Yuhana.

³⁰ Ama azla Farisəya la azlaməna mapəhla mapəhay ala, takweskà tatak uwana asà à Zəzagəla kà madàh à atà à ahəŋ kà anjata, kà uwana takweskà batem anja Yuhana.

³¹ Yesu agòdf aya: "Lagwa ma, la mana gəgazləla azladza anja zamana anja lakana uwanay ma? La mana atà tadəbani vok lagwa ma? ³² Hadfay, atà gəgazləla atà la azlabəza uwana tadzàh madzay la vadavaday kasukwa la afik. Tazàläh vok, kà atà kà atà la magodfay: Anu mətsà à akul talakwoy, ama akul kahàbàwal à tsəh aw. Məhàb à akul dəs kufa, ama katàwàw la mats hulolo aw. ³³ Nğaha aya Yuhana masla madàh batem azlanal, azùw kaf aw, nğaha asàh iyaw matavəruk aw, nğaha kagòdfaw aya kà: 'Masla la masasədok mawisiga.' ³⁴ Kità aya, Kona anja dza azlanal, azuway, asay, nğaha kagòdfaw kà: 'Nərəzàw dza uwanay tsi: Masla hud', kagòdfaw. 'Afa sləm kà à mazuway la masay anha pəra. Kafaw masla kà à tataka anja azlaməna mazəb hadama abà, la azlaməna tsakana, nğaha la azladza uwana madz à ahəŋ anjata kà lela aw.' ³⁵ Ama matsihila anja Zəzagəla apəhla masla ala la slaka azladza gesina kà makəs masla."

Yesu la mtəga anja Səmon zil Farisəya

³⁶ Zil Farisəya anik azàla à Yesu kà mazuw tatak may la mtəga anha. Yesu ahàd à mtəga anja zil uwatà, adzà à tatak may à adi. ³⁷ Mis masla tsakana agà la gudəŋ uwatà la abà. Mok uwana atsənà, kà Yesu la tatak may la adi la mtəga anja zil Farisəya uwaga kà, asəlla aməl matərsin à wan wuf la dərəw gà. ³⁸ Mis atsizl à makəla asik anja Yesu la matuway, aləbà asik anja Yesu la iyaw tugwi, nğaha aslaslādāŋ ala la anjdz gəl anha, nğaha ahəl asik anja Yesu à təkul à abà kà madzadzabəl aməl matərsin à gəl.

³⁹ Mok uwana zil Farisəya uwana azàla Yesu, anəŋà uwaga kà, agòdf la gəl anha kà: 'Ndzer kà, agaynə zil uwanay, agay masla mapəhal gay à ahàl kà mapəh à azladza kà, naka asəl mis uwanay kà masla tsakana gə.' ⁴⁰ Yesu agòdf à zil Farisəya: "Səmon, gi la gay anik kà mapəh à ka!" Səmon agòdfal: "Məŋga, pəh!" ⁴¹ Nğaha Yesu agòdf: "Tsənəŋ lela: Dza anik la ahəŋ uwana avà goder sili à azladza səla, anəfà dza anik la gursu dadərmokw zlo, nğaha la slaka dza anik aya, gursu dzik zlo. ⁴² Uwana tabəz à tatak kà mapəlla aya aw, asàk à atà ala goder anha la vok. Nğaha ma, dza uwala à uwana awoyàŋ kaykay la?" ⁴³ Səmon agòdfal: "Gi kà, gədzugw kà, dza uwana gursu dadərmokw zlo la vok, kà masla la uwana 'Kikay', agòdfay kaykay." Yesu agòdfal: "Iyay, azlayla kà." ⁴⁴ Yesu agòla à huma à slaka mis la magodf à Səmon: "Səmon, kanəŋa mis uwanay ay? Gi la kay anak, bə iyaw bay, kà katəfəgəŋ kà mapal asik gulo aw, ama masla kà aləb à gi asik gulo la iyaw tugwi anha, nğaha aya la anjdz gəl anha la uwana aslaslādāŋ ala. ⁴⁵ Kak, kakəs gi la ahàl səla aw, ama masla kà akəs gi la ahàl səla. Dagay uwana gəsà à gày kà akəsà à asik gulo, kà uwana awoyà gi. ⁴⁶ Kak, kadàh à gi à aməl à gəl aw, ama masla kà adzadzab à gi matərsin à asik. ⁴⁷ Kà uwaga à uwana gəgodf à ka: Kà magol masal məŋga uwaga apəhla ala kà, maham à ahəŋ tsakana anha kà adamatsila, suwan. Ama anja dza uwana tamàtsàlən ala njuv kà, masal anha suwan kà njuvga babay." ⁴⁸ Kiya uwaga Yesu agòdf à mis: "Tsakana anak

adamats ala.” ⁴⁹ Azladza uwana la tatak may la adi atà nna, tadzèkà manjonuzay: “Uwa asla dza uwaga, aslala vok aña mamats tsakana à dza ala uwa?” ⁵⁰ Ama Yesu agòd à mis: “Madiñal gəl à vok aňak adabəl ka, hàd la wurwur!”

8

Azlamis uwana tanəfàh Yesu

¹ La lig aña uwaga la ahəŋ, Yesu adàh à azlagudəŋ à abà la azlahudf gudəŋ, azahà gay matsidayga aña makoray Zəzagəla. ² Azlaməna matapla la slaka aňha kulo gəl aňha səla uwatà, la azlamis anik anik, uwana adapalàh atà ala la azlamasasəđok mawisiga la abà, ŋgaha la azladuvats anik anik la abà, atà gesina tanəfà, Mariyama, dəg zla Magdala, uwana akudəkal azlamasasəđok mawisiga məđəf lakəl ala, ³ ŋgaha Yohana mis aña Kuza, vazaray aña sufəl Herod, Suzan la azlamis anik aňuvaw uwana tazlək Yesu la azlaməna matapla la slaka aňha, la ləmana aňatà.

Gay la gay la abà aña masla maslək hi (Mata 13.1-9; Mark 4.1-9)

⁴ Azladza gudəŋ anik, anik gesina tasàhà à waŋ, tahamà gay à vok la slaka aňha, ŋgaha apəh à atà gay la gay la abà uwanay:

⁵ “Masla maslək tatak asà à uda, kà mad maslək hi. La mok uwana aslək hi uwaga la guf aňha la abà, azlafofulo anik anis à tetəvi à ama. Tafàhal asik à gəl ŋgaha azladiyan tasà à waŋ, tazùw à gay. ⁶ Azlaanik aya anis à pala akur à afik, bokuba uwana kutso la pala akur lakəl məŋga aw, hi asà à uda katskats, ŋgaha uwaga agùl ala katskats, kà uwana kutso la pala akur lakəl məŋga aw. ⁷ Gotənaŋ fofulo anik anis à atək à abà, asà à uda, ama bokuba uwana tazigənaŋ la slaka gə, atək akəd à tsəh. ⁸ Bə gotənaŋ fofulo anik aya anis à kutso delga à abà, uwaga asà à uda, azigən, atsà gəl lela, ŋgaha tavà mayyay lela, anik ayyà à adi huməts, anik aya ayyà à adi zuŋ, ŋgaha anik ayyà à adi zazun səla.” Mok uwana Yesu adakəd gəl à mapəh gay aňha, agòd à atà la mazatəlan à gəl: “Tsəbàwwal sləm lela, à baŋa sləm aga à akul lakəl!”

Kà mana Yesu apəhay kà la gay la gay la abà ma? (Mata 13.18-23; Mark 4.13-20)

⁹ Azlaməna matapla la slaka aňha tanəv godega aña gay la gay la abà uwatà. ¹⁰ Yesu agòd à atà: “Akul kà, kabəzàw nasiri aña masəl godega aña wakità Zəzagəla. Ama kà aña azladza anik kà, apəhatàla kà la gay la gay la abà pəra: 'Kà atà aña manəŋəŋ, ama bokuba tanəŋəŋ aw, kà atà aña matsəŋəŋ ama bokuba tatsənaŋ aw.'”[☆]

Yesu apəh godega aña gay la gay la abà aňa maslək hi uwatà à uda (Mata 13.18-23; Mark 4.13-20)

¹¹ “Agaŋay godega aña gay la gay la abà uwanay: Fofulo kà gay Zəzagəla. ¹² Azladza anik məpakatàla bokuba tetəvi uwana hi anisal à ama: Atà tatsəb sləm à gay, ama katskats seteni asa à waŋ, abəd à gay uwaga la ləv aňatà la tsəh, kà atà aña madiñal gəl à vok kà mabəlay aw. ¹³ Azlaanik aya kalkal la pala akur uwana fofulo anis à afik. Tatsəb sləm à gay, takəs la marabay katskats, ama tasakal adala slilih la atà la abà la lela aw. Tadiñal gəl à vok kà aña kaslā ŋuv pəra, la mok uwana azlanğərpa tadzahka vok kà, takweska madiñal gəl à vok la katskats. ¹⁴ Fofulo uwana anis à atək à abà aya kà, apəhla azlauwana ala tatsəna gay Zəzagəla, takəs, ama madzugway la adi aña gudəŋ à vok uwanay, la matsiday aňha, la mapapatay aňha lakəl aña ləmana, asufa gay uwanay ala la ləv aňatà la tsəh, ŋgaha ahən aw. ¹⁵ Fofulo uwana anis à

☆ 8:10 8.10 Yesayya 6.9-10

kutso delga à abà kà, apèhla azlauwana ala tatsəb sləm à gay, ngaha takəs uwaga la ahàl sèla ngaha la ləv tekula, ngaha tatsizlla gay uwaga à afik, kiya uwaga tahən lela.”

Gay la gay la abà aṅa fənəs
(Mark 4.21-35)

¹⁶ Yesu agòd: “Dza avats fənəs kà maf à tsəh tasà takay, awma kà maf à tsəh gogozläh takay? Awan, tafay kà à slaka dzəgamma gà, kà azladza uwana tada à gày aṅa manəṅ ufaka aṅha. ¹⁷ Dèwdèw tatak mahadəṅ à ahəṅ gà kà, adəpəhla vok ala, ngaha dèwdèw tatak nasiri gà, adəgay masəlay gà, adəpəhla vok ala la dazuwaya la afats kà manəṅəṅ aṅa azladza. ¹⁸ Dahàw hanəkəli la kaykay à uwana katsənawwan! Kà uwana tavà y mənṅa à dza à uwana la tatak, ama kà tazəballan ala à abà bəziga gà à uwana adzugw mabəzal babay.”

Iyà la azladede aṅa Yesu
(Mata 12.46-50; Mark 3.31-35)

¹⁹ Iyà la azladede aṅa Yesu tahəd à slaka aṅha, ama tabəzal à vok aw, kà uwana maham à ahəṅ dza aṅuvaw. ²⁰ Ngaha tapəh à Yesu: “Iyà la azladede aṅak la uda, tayàh ka, asa à atà manəṅ ka”, tagòdɔl. ²¹ “Iyà la azladede gulo kà azlauwana tatsəna gay Zəzagəla, ngaha la madəhəṅ, la uwana azladede gulo la iyà gulo pəra”, Yesu agòd à atà.

Yesu atsizl kular à ahəṅ
(Mata 8.23-27; Mark 4.35-41)

²² Vərdi anik kà, Yesu ahəd à kəslah iyaw à afik la azlaməna matapla la slaka aṅha, agòd à atà: “Məguwà la gay dərəv à uda anik”, ngaha tahəd. ²³ Uwana tagà la kəslah iyaw la afik kà, Yesu adzəhəl. Katskats magol kular adzəkà vok la ndzəda lakəl iyaw, kəslah iyaw ahən ala la magantsay aṅa iyaw uwana adàhà à abà, ngaha atà kà, tagà la zlamtsa la abà. ²⁴ Kiya uwaga azlaməna matapla tazà vok à slaka aṅa Yesu tatsənəṅ ala la magòdɔl: “Mənṅa, mənṅa, məzləmamətsay, zlak anu!”

Hadzak, Yesu asà à afik ngaha aslèh məlo à kular à gəl la magantsay ana iyaw, ngaha tadzà à ahəṅ titi. ²⁵ Ngaha Yesu agòd à azlaməna matapla la slaka aṅha: “Aṅala madiṅal gəl à vok aṅkul la?” Ama guba akəs atà, ləv avəl atà à gay, ngaha tagòd à vok kà atà kà atà: “Tsəhay dza uwala à uwanay la? Amiyaka kular, la magantsay aṅa iyaw babay kà tasəl masla, ngaha takəsəl gay la ahàl ala!”

Yesu awur dza uwana ala la azlamasəsəfok mawisiga
(Mata 8.28-34; Mark 5.1-20)

²⁶ La lig la ahəṅ gesina aṅatà tabəz à gay dərəv à uda aṅa gay dərəv aṅa Galili, uwana la kutso aṅa Gerasəniya la abà. ²⁷ Batsàrà uwana Yesu atsà à vədah la kəslah iyaw la afik, dza anik asà à wan la hudf gudəṅ la abà kà magagamay la masla. Dza uwatà kà zagəla zagəla lakəl, adasafay kà atsakwah à lukut abà aw, ahanay la gày la aku babay aw, la azlamabuwan zəvay la aku pəra. ²⁸ Mok uwana anəṅà Yesu, awiyà la ndzəda ngaha atəd à makəla asik aṅha la magòdɔl: “Mana kayahay la slaka gulo ma? Yesu Kona aṅa Zəzagəla uwana kərkər la afik. Kamkam gədəv à ka kudə, kasa à gi ngərpa aw gəgòd à ka!” ²⁹ Uwana apəh uwaga kà, kà uwana Yesu afà gay à masəsəfok mawisiga uwaga à gəl, kà masal à kəl ala. Zagəla zagəla uwaga adahal à gəl zwek zwek. Aṅuvaw tawadəhəṅ à ahəṅ la azlamazakazak ada, aslähàh ala la manaläh ada ala, kà matəf à fəta. ³⁰ Kiya uwaga Yesu anəval gay ala la magòdɔl: “Uwa à sləm aṅak uwa?” Masla awùlla à uda agòd: “Sləm gulo kà: Maham à ahəṅ.” Kà uwana azlazagəla zagəla kà atà aṅuvaw tahamàl à gəl. ³¹ Azlazagəla zagəla uwaga tadəv kudə à Yesu kà mawits atà à afək zəṅzəṅga à abà aw.

³² Maṇḷaṇḷa namzi la ahəŋ la abatà tapàd awul la madəguruh la afik. Azlazagəla zagəla uwaga tadəv kuḍa à Yesu, kà masla maslèlla atà à azlanamzi uwatà à abà. Yesu avà à atà tetəvi: “Dàw à atà à gəl!”, agòd à atà. ³³ Kiya uwaga azlazagəla zagəla uwaga, tasà à dza uwaga lakəl ala, tahàd à azlanamzi à gəl. Kiya uwaga maṇḷaṇḷa namzi uwaga tahòy à ahəŋ la madəguruh la afik, ŋgaha tatsàh gəl à iyaw à abà, tasufàh à abà.

³⁴ Uwana azlaməna manəŋla azlanamzi tanəŋà uwaga apakà vok, tahòy anatà, tahàd kà mapàh azlagay uwaga à azladza huḍ gudəŋ gesina, la azladza uwana la azlabəza gudəŋ la abà babay. ³⁵ Azladza tasà à uda la gudəŋ la abà gesina kà maday manəŋ tatak uwana apakà vok, ŋgaha tasà à waŋ à slaka Yesu, tabəzà dza uwaga à gəl azlazagəla zagəla tasàl à kəl ala. Adadza madzay la makəla aŋa Yesu, masla adatsokw lukut à vok, haŋkəli aŋha babay kà delga. Azladza uwana tanəŋəŋ gesina kà, ləv avàl atà à gay kà masla. ³⁶ Azladza uwana tanəŋəŋ mawurla aŋha, tapàh godega aŋa mawurla aŋha à azladza uwatà. ³⁷ Ŋgaha maham à ahəŋ dza gesina, uwana la makoray aŋa Gerasəniya tadəv kuḍa à Yesu kà mas à uda la makoray aŋatà la abà, kà uwana guba akəs atà à gay kaykay. Kiya uwaga masla ahàd à kəslah iyaw à afik, adà aŋha la abatà. ³⁸ Dza uwana azlazagəla zagəla tasàl à kəl ala, adəv kuḍa à Yesu kà madz à ahəŋ atà səla. Ama “Dà aŋak!”, Yesu agòdɔl la magòɔfay: ³⁹ “Wùl à huḍ gəy aŋak, ŋgaha pəh tatak uwana Zəzagəla adəhəŋ kà aŋak gesina!” Masla atsizilla ala, ahàd, apàh tatak gesina uwana Yesu adəhəŋ kà aŋha la makoray uwatà la abà gesina.

Yesu awur mis ala,

*ŋgaha awulla dugu aŋa Yayrus à uda la mamətsay
(Mata 9.18-26; Mark 5.21-43)*

⁴⁰ La mok uwana Yesu adawul à waŋ maham à ahəŋ dza takəs masla la ahàl səla, kà uwana takudà masla. ⁴¹ Dza anik uwana sləm aŋha Yayrus asà à waŋ, masla agà məŋga aŋa gəy madəv kuḍa, atəɔ à makəla asik aŋa Yesu, la madəval kuḍa kà masla aŋa manəf à mtəga aŋha. ⁴² Dugu aŋha kà tekula à ahàl gə, la uwatà mavay aŋha kulo gəl aŋha səla. Masla la dɔvats, aləg kà la ləv la ləv pəra.

La mok uwana Yesu aday la tetəvi la ama, maham à ahəŋ dza taŋisl masla la makəla gesina. ⁴³ Mis anik la ahəŋ aŋiz akəllal à tsəh ala dagay mavay kulo gəl aŋha səla. Ləmana aŋha gesina kà adadəvəŋ à dokwtar à tsəh gesina, ama ŋuləm aw. ⁴⁴ Kiya uwaga mis uwaga aguwa la lig aŋa Yesu, ŋgaha adəbanì makəlbà aŋa gay dzika aŋa lukut aŋha. Katskats makəlay aŋa aŋiz aŋha atsizilla à ahəŋ. ⁴⁵ Dzàw, Yesu atsizilla à ahəŋ, agòla vok: “Uwa à uwana adəbanì gi uwa?” Kəla uwabeyuwi agòɔɔl: “Gi kà, gi aw!” Piyer agòɔɔl: “Məŋga, kasəl kà maham à ahəŋ dza tahamà ka à adi, kakay kagòɔɔl kà: Uwa adəbanì gi uwi ma?” ⁴⁶ Yesu agòd: “Dza la ahəŋ adəbanì gi, kà uwana gətàp à ndzəɔa asà à uda la vok gulo la abà.” ⁴⁷ Kiya uwaga mis anəŋəŋ kà, aslàla vok kà mahad vok à ahəŋ aw, asà à waŋ la masukulay kosl kakosl à huma aŋa Yesu, ŋgaha atsehùr à makəla asik aŋha, apəhal godega aŋa uwana adəbanì gay lukut aŋha. La huma aŋa azladza la kirim yewdi awùr ala. ⁴⁸ Yesu agòɔɔl: “Dugu gulo, madɔŋal gəl à vok aŋak awùr ka ala, dà aŋak la lapiya!”

⁴⁹ La mok uwana Yesu à lig la mabəɔma la abà dadəŋ, dza anik asà à waŋ la mtəga aŋa məŋga aŋa gəy madəv kuḍa à Zəzagəla, la magòɔɔl: “Kà mana katərəb məŋga aya ma? Dugu aŋak adamətsay, tsewwa.” ⁵⁰ Mok uwana Yesu atsənà gay uwaga kà, agòd à Yayrus: “Ləv aval à ka à gay aw. Dɔŋal gəl à vok pəra, ŋgaha adəbəlay!” ⁵¹ Mok uwana tabəz à mtəga, Yesu avà tetəvi à dza amiyaka tekula kà mad à gəy aw, say Piyer, Yuhana, Yakuba, ŋgaha baba la iyà aŋa bəzi pəra. ⁵² Tekedika azladza gesina tatuway la matsàh hulolo, kà uwana bəzi adamətsay. Ama Yesu agòd

à atà: “Katawaw aw, kà uwana bəzi la adi atəɖ à madzehal à abà pəra”, agòɖ à atà. ⁵³ “Uwàà...”, takəɖəslal kà uwana tasəl kà bəzi kà adamətsay. ⁵⁴ Ama masla à Yesu akəs bəzi la ahəl la mazalal: “Bəzi, sà à afik, tsizlla ala!” ⁵⁵ Kiya uwaga bəzi awùlla à ləv, ŋgaha asà à afik. Yesu agòɖ à atà: “Vàwwal tatak may, azuw!” ⁵⁶ Gəl akəɖ azlababa aŋha à vok, ləv avàlàhà atà à gay. Ama Yesu afahà à atà akur à lig la magòɖ à atà: “Dza apəh tatak uwana apakà vok à azladza anik aw.”

9

Yesu asləl azlaməna matapla à slaka aŋha kulo gəl aŋha səla (Mata 10.5-15; Mark 6.7-13)

¹ Yesu ahamà gay azlaməna matapla la slaka aŋha à vok gesina, avà à atà ndzəɖa la maslay kà makudəkahay azlamasəsəɖok mawisiga gesina, ŋgaha kà mawar azlaməna ɖuvats ala. ² La lig la ahəŋ, asləl atà kà maz gay aŋa makoray Zəzagəla, ŋgaha kà mawar azlaməna ɖuvats ala, ³ agòɖ à atà: “Zəbàw tatak à ahəl aŋa maday aw. Adəgay azəva, adəgay kiwa, adəgay kaf, adəgay sili, adəgay lukut bay, katsəpawwan à vok aw! ⁴ Kəla huɖ gày uwana azladza takəs akul la kay la ahəl səla kà, dzàw à ahəŋ la abatà, tsərəh à uwana kadətsizlawla, kadədaw aŋkul la abatà. ⁵ Ŋgaha kəla slaka uwana tadəkəs akul la abà aw kà, sàw à uda la huɖ gày aŋatà. Baməraka burburu aŋa kutso aŋa gudəŋ aŋatà, uwana agəɖ akul à asik bay kà, kadəɖaw à atà à adi, uwaga kà agay bokuba tatak mapəh à atà à vok à abà gà kà aŋatà.” ⁶ Azlaməna matapla tatsizlla ala, tahəd kà maz gay matsidəyga aŋa makoray Zəzagəla la azlahuɖ gudəŋ gesina, ŋgaha tawàràhà azlaməna ɖuvats ala gesina.

Madzugway aŋa Herod lakəl aŋa Yesu (Mata 14.1-12; Mark 6.14-29)

⁷ Kiya uwaga à uwana Herod, sufəl aŋa gudəŋ uwatà, atsənà uwana tapəhay kà, gəl akəɖal à vok, kà uwana azladza anik tagòɖay kà: “Yuhana masla madəh batem adawul à uda la mamətsay.” ⁸ Azlaanik tagòɖ kà: “Eliya, la uwana adazlanjalay.” Ŋgaha azlaanik tagòɖ kà: “Uwaga kà, tekula la tataka azlaməna mapəh à atà gay à ahəl la abà uwarà, adazlanjalay.” ⁹ Ama Herod agòɖ: “Tsa gi la uwana ‘Nətsàw gəl aŋa Yuhana!’ gəgòɖ, ma uwaga zlà ma uwi? Uwa à dza uwaga tapəh azlatatak aŋuvaw lakəl aŋha zlà à ama uwa?” Kà uwaga à uwana ayàh manəŋ Yesu.

Yesu avà tatak may à azladza dəbow zlo (Mata 14.13-21; Mark 6.30-44; Yuhana 6.1-14)

¹⁰ Uwana azlaməna matapla tawùl à wan tapəh à Yesu dèwdèw tatak uwana tadəhəŋ gesina. Uwana adatsən uwaga kà, asəlla atà à uda la abatà, adàla atà à fəta à awtəy kokudə gəl aŋatà la huma aŋa huɖ gudəŋ, uwana sləm aŋha Betsayda. ¹¹ Ama uwana maham à ahəŋ dza adatsən uwaga kà, tanəfà masla, Yesu akəs atà la lela, ŋgaha apəh à atà gay aŋa makoray Zəzagəla, la mawar azlauwana ala, asà à atà mawarla.

¹² Mok uwana vəɖ adasa à wan, azlaməna matapla tahəd à slaka aŋha, tagòɖal: “ ‘Dàw aŋkul,’ gòɖ à maham à ahəŋ dza, kà atà aŋa mad à azlagudəŋ uwana à abà takəs anu gay à adi, kà atà aŋa məbəz tatak may la azlaslaka mahan à ahəŋ, kà uwana la abatà kà fəta.” ¹³ Ama Yesu agòɖ à atà: “Akul, vaw à atà tatak may, tazuw!” Atà tagòɖ à Yesu: “Kaf gay bərsəw zlo, la bəza kilfi səla pəra, aga anu la ahəl. Asa à ka məday kà masukw tatak may kà aŋa maham à ahəŋ dza uwanay gesina la gəl gami kəla ay?” ¹⁴ Kà uwana la abatà kà matugway aŋatà kà aslay dza dəbow zlo. Yesu agòɖ à azlaməna matapla la slaka aŋha: “Dzàhàw atà madzay la dzibokw dzibokw, dzik zlo dzik zlo gesina aŋatà!” ¹⁵ Azlaməna matapla takəs, ŋgaha tadzàhà atà madzay gesina aŋatà. ¹⁶ Ŋgaha Yesu ahəl kaf gay bərsəw zlo la kilfi səla uwatà, anəŋà à

zagëla, “Kikay”, agòd à Zëzagëla. Atsakà kaf ala, avà à azlamëna matapla la slaka anha, ngaha azlamëna matapla uwaga tavàh à maham à ahëj dza uwatà bay. ¹⁷ Kiya uwaga këla uwabeyuwi azùw këla anha may anha. Azlamëna matapla tahamà gay à matam à atà à ahàl gà à vok, takosà kulo gël anha sëla à uwana atëm à atà à ahàl la kaf gay bërsew zlo la kilfi sëla uwaga la abà.

*Piyer apëhla ala kà Yesu kà Kristu
(Mata 16.13-19; Mark 8.27-29)*

¹⁸ Vud tekula Yesu adëv kufda kokufda gël anha. Azlamëna matapla tasà à wan à slaka anha. Yesu anäv atà manavay la magod à atà: “Uwa azladza tagod kà gi uwa?”

¹⁹ Tawulàlla tagòdäl: “Azladza anik tagodfay kà: Kak Yuhana, masla madàh batem, azladza anik bay tagod: Kak Eliya, azlaanik aya tagod: Kak tekula la tataka anha azlamëna mapëh à atà gay à ahàl, à uwana tapàhàh gay à azladza uwarà.” ²⁰ Yesu agòd à atà: “Iyay zlà, akul ma: Gi uwa kagodaw uwa?” Piyer agòdäl: “Kak la uwana Kristu anha Zëzagëla.”

Yesu apëh gay mamëtsay anha à ahëj

*la mawul à uda anha la mamëtsay
(Mata 16.20-28; Mark 8.30-9.1)*

²¹ Yesu afahà à atà akur à lig kaykay, kà atà anha mapëh tatak uwaga à dza aw. ²² Ngaha azàlàn à gël, agòd aya: “Say Kona anha dza as ngërpa mënga. Azlamasiga, la azlamadzahaga anha azlamëna mav tatak à Zëzagëla, ngaha la azlamëna matapla mapëhay à azladza tadàkweska masla, tadàkòd masla bay, ama la mahëney mamakër adàwul à uda la mamëtsay.” ²³ Ngaha agòd à azladza gesina: “Baña dza asal manëf gi kà, asak maf slëm à gël anha, ngaha azëb ahàf mamëtsay anha koksikoksi, ngaha anëfa gi. ²⁴ Dza uwana asal matëf gël anha, adàziñ ala, ama dza uwana az gël anha ala kà gi, adàbël gël anha. ²⁵ Mana akës vok à dza, uwana akor gudëj à vok gesina, ngaha masla adàz gël anha ala la makòd gël à vok anha ma? ²⁶ Baña ziruwu az dza kà gi, ngaha kà gay gulo, kità kà, Kona anha dza kà, ziruwu adàkësay kà masla suwan, la mok uwana adàsa à ahëj la mazlëbay anha, ngaha la mazlëbay anha Baba Zëzagëla, ngaha la anha azlamalika anha tsikasläga la abà. ²⁷ Hadfay, gëpëh à akul la dziriga: Azladza anik la tataka ankul la abà la abanay kà, tadàmëtsay dän aw, say baña tanëj makoray anha Zëzagëla dän.”

*Mabëdfla vok anha Yesu
(Mata 17.1-8; Mark 9.2-8)*

²⁸ La lig mavakay mtëgis la ahëj, à uwana apëh gay uwaga, Yesu ahël Piyer, Yuhana, ngaha Yakuba, à tsëh, adàla atà à gudëj à afik, kà madëv kufda la abatà kokufda gel anatà. ²⁹ La mok uwana tadëv kufda, hudf adi anha agòlla vok, lukut anha awutsòdäy tëlla. ³⁰ Katskats aganay azladza sëla la slaka anha, tavàts gay, uwatà kà Musa atà la Eliya, ³¹ uwana tapëhla vok ala la mazlëbay anha zagëla la abà. Tapàhà gay lakël anha slëray anha uwana adàdëhëj, la mamëtsay à Urusalima anha. ³² Piyer la azlamana-lay anha uwaga, tatàd à madzëhal à abà. Ama kà uwana tatsënla, tanëjà mazlëbay anha, ngaha la azladza sëla uwana tatsizilla à ahëj la masla. ³³ Mok uwana azladza sëla uwaga tadiy anatà, tasàk à Yesu à ahëj, Piyer agòdäl: “Mënga, delga zlà bà à uwana anu la abanay zla. Mëdàh safsaf makër à abanay, tekula à anjak, tekula anha Musa, ngaha tekula anha Eliya.” Kà uwana masla asël tatak uwana apëhay aw ³⁴ La mok uwana Piyer abadmä, habaga akël à atà mëlës à adi, tabadamma. Lëv avàl à azlamëna matapla uwaga à gay, kà uwana habaga atsakà à atà à ama la makël à atà mëlës à adi. ³⁵ Ngaha kuda atsënà à uda la habaga uwatà la abà: “Masla uwanay, la

uwana Kona gulo uwana gi gækèsàni. Tsèbàwwal slèm.”[☆] ³⁶ Mok uwana kuda uwaga atsèn kà, tanə̀nə̀n kà Yesu kokuda gəl anha pə̀ra. Azlamə̀na matapla la slaka anha tadzà à ahə̀n titi. Nğaha babay tapə̀h à dza tatak uwana tanə̀nə̀n la mavakay uwatà aw.

*Yesu awur bə̀zi uwana ala la masasə̀dɔk mawisiga
(Mata 17.14-18; Mark 9.14-27)*

³⁷ La bebə̀n gə̀, uwana tatsà à ahə̀n la gudə̀n la afik, maham à ahə̀n dza anjувaw tasà à wə̀n kà magagamay la Yesu. ³⁸ La maham à ahə̀n dza uwatà la abà kà, dza anik la ahə̀n awiyà la magoday: “Mə̀nğa, vok ahamà ka, kà bə̀zi gulo tekula gə̀ uwanay tsi, kà uwana masla la dɔvats. ³⁹ Kà uwana masasə̀dɔk mawisiga akasay, amallal gəl à ahə̀n, agodzal à ahə̀n la ndzə̀ɔfa, huzlə̀v asahal à wə̀n la gay la awtə̀y, atə̀rə̀b à ahə̀n kà mə̀nğa, mə̀nğa, asək à ahəl kà wiy aw. ⁴⁰ Gə̀dè̀v kudà à azlamə̀na matapla la slaka anək kà makudə̀kal masasə̀dɔk mawisiga uwaga lakəl ala, ama taslala vok aw.” ⁴¹ Uwana Yesu atsənà gay uwaga, agòd à atà: “Kayyà, akul azladza mawisiga, kokuda madinjal gəl à vok, dagay mbà à uwana mədadzà à ahə̀n anina ma? Dagay mbà gə̀dàbasahakulan ma?” Yesu agòdɔl: “Sàgə̀la kona anək à wə̀n à abanay!” ⁴² Mok uwana bə̀zi azà vok à slaka anha, masasə̀dɔk amə̀llal gəl à ahə̀n, agodzalla bə̀zi la ndzə̀ɔfa. Ama Yesu aslè̀h mə̀lo à masasə̀dɔk mawisiga uwatà à gəl la ndzə̀ɔfa, nğaha awurà bə̀zi ala, avà à baba anha. ⁴³ Nğaha gesina anətà la abatà, lə̀v avəl atà à gay, kà mə̀nğa anja ndzə̀ɔfa anja Zə̀zagə̀la la mazlə̀bay nğaha la maslay anha.

*Yesu apə̀hay gay mamə̀tsay la mawul à uda anha aya
(Mata 17.22-23; Mark 9.30-32)*

Ama Yesu atapà azlamə̀na matapla la slaka anha, agòd à atà kà: ⁴⁴ “Fə̀w gay uwanay à sləm à abà lela! Kona anja dza kà tadə̀və̀y à ahəl anja azladza.” ⁴⁵ Ama tatsənà gay uwatà aw, ahadà godega anja gay uwatà à ahə̀n, kà atà anja masə̀lay aw. Nğaha atà kà, guba akès atà kà manav godega anha babay.

*Uwa à mə̀nğa gə̀, uwa?
(Mata 18.1-5; Mark 9.33-37)*

⁴⁶ Kiya uwaga azlamə̀na matapla tadzəkà mabay vok gay la tetə̀vi la ama, kà masəl dza uwana mə̀nğa gə̀ la tataka anətà la abà. ⁴⁷ Yesu asəl madzugway anətà uwana tadzugway gesina la lə̀v anətà la tsə̀h, masla akès bə̀zi njuvga, atsizllatə̀n à huma à gay, ⁴⁸ agòd à atà: “Dza uwana akəs bə̀zi njuvga uwanay kà, kà uwana awoya gi kà, masla babay kà akəs gi, nğaha dza uwana akəs gi, akəs dza uwana aslè̀l gi à wə̀n babay. Dza uwana bə̀ziga la tataka ankul la abà kà, masla la uwana mə̀nğa gə̀.”

*Dza uwana masla mə̀zam gami aw kà, masla kà slawda gami
(Mark 9.38-40)*

⁴⁹ Yuhana adzəkà mabə̀ɔma, agòdɔl: “Mə̀nğa, mənə̀nə̀ dza anik uwana akudə̀kə̀h azlamasə̀dɔk mawisiga la sləm anək, nğaha mə̀və̀rə̀la gay kà uwana anina aw.” ⁵⁰ Yesu agòd à atà: “Awan, kà mana kavə̀rə̀wla gay ma, kà uwana dza uwana masla mə̀zam ankul aw kà, masla kà slawda ankul!”

Gudə̀n anik la kutso Samariya akweska Yesu

⁵¹ Mok uwana kaslā mad à zagə̀la anja Yesu adagay nekwa kà, akès tetə̀vi kà mad à Urusalima. ⁵² Yesu aslè̀l azlamə̀na maslə̀lay la huma dadə̀n, tahəd, tadà à gudə̀n, uwana la Samariya la abà kà madə̀halla azlatatak à ahə̀n gesina. ⁵³ Nğaha azlamə̀na madz à ahə̀n la gudə̀n uwatà takəs aw, kà uwana agà la tetə̀vi la ama, kà mad à Urusalima. ⁵⁴ Kiya uwaga à uwana azlamə̀na matapla Yuhana atà la Yakuba tatsənə̀n uwaga kà, tagòd: “Sufəl, asa à ka kà mənə̀v akəl atsa à ahə̀n la zagə̀la kà mabə̀bə̀h

atà à gay ay?"[☆] 55 Ama Yesu agòlla vok, anəṅà atà à adi, ṅgaha aslèhà à atà vok. 56 ṅgaha atà tahàd à gudəṅ anik à abà.

*Azlawana tayàh manəf Yesu Kristu
(Mata 8.19-22)*

57 Mok uwana tatsizlla ala, dza anik agòd à Yesu: "Yesu, kəla slaka uwana kadàday kà gədànéf ka." 58 ṅgaha Yesu agòdàl: "Azlamayaka kà: afək aṅatà la ahəṅ, azla-diyaṅ kà: gày aṅatà la ahəṅ, ama Kona aṅa dza kà bà, slaka mahəṅ gəl à ahəṅ aṅha la ahəṅ kà maduw ləv aw." 59 Kiya uwaga Yesu agòd à anik aya: "Nəfà gi!" Ama masla agòdàl: "Məṅga, vā à gi tetəvi, kà gi aṅa mal baba gulo dadàṅ." 60 Ama Yesu agòdàl: "Sàk azlamazimnekiđ talàh vok aṅatà, ama kak kà, hàd, kazà gay aṅa makoray Zəzagəla." 61 Dza anik agòdàl aya: "Sufəl, gi kà gənəf ka nəma, ama vā à gi tetəvi kà maday, 'Gi kà maday', gədàgòd à huđ gày gulo dadàṅ."[☆] 62 Yesu agòd à atà: "Kəla dza uwana adafa ahàl aṅha à səđuk sla à lig, ṅgaha anəṅ à lig kà, masla kà, akəsa vok aya kà aṅa makoray Zəzagəla aw."

*Sləray aṅa azlaməna asik dzik məđəf gəl aṅha səla
uwana Yesu aslèl atà*

10

1 La lig aṅa uwaga la ahəṅ, Sufəl atsatsàmànì azladza anik dzik məđəf gəl aṅha səla, ṅgaha aslèlatàla səla səla la huma aṅha, à azlagudəṅ uwana à abà, à uwana masla la gəl aṅha asàl madàđàh à abà. 2 Kiya uwaga Yesu agòd à atà: "Sləray matsəđ tatak la ahəṅ aṅuvaw, ama azlaməna sləray kà dəṅ aw. Kità kà, dèvwàw kuđa à dza ana makor tatak, kà masla aṅa masləl azlaməna matsəđ tatak à waṅ dəṅ. 3 Dàw, aganay gəsləl akul bokuba azlatuwaṅ à tataka azlakəda fəta à abà. 4 Kazəbaw sili à ahàl, amiyaka kiwa aṅa tatak may, la kwimik babay aw. Katsizllaw à ahəṅ la tetəvi la ama kà madàh 'Ayyi' à dza aw. 5 Kəla gày, uwana kadaw à gày kagòdaw dadàṅ teraṅa kà: 'Lapiya agay la kay uwanay.' 6 Baṅa masla lapiya la ahəṅ la kay uwatà, ayyi aṅa lapiya ankul adàdza à ahəṅ lakəl aṅha, tsa baṅa kità aw kà, ayyi aṅa lapiya ankul anəfa akul. 7 Dzàw à ahəṅ la huđ gày aṅa lapiya, zùwàw, sàw uwana taf à akul à huma à gay gesina, kà uwana masla sləray kà azlayla masik aṅha. Ama katsetserahaw à gày à gày aw. 8 Baṅa kadàdaw à huđ gudəṅ anik à abà, ṅgaha takəs akul la ahàl səla, zùwàw tatak uwana taf à akul à huma akul à gay. 9 Wàràw azlaməna đuvats ala la gudəṅ uwatà la abà, gòdàw à azlaməna madz à ahəṅ la abatà kà: 'Makoray aṅa Sufəl Zəzagəla kà nekwa la akul.' 10 Ama baṅa kadaw à huđ gudəṅ anik à abà, ṅgaha takəs akul la ahàl səla aw kà, sàw à uda à tetəvi à ama, ṅgaha gòdàw à atà: 11 'Aganay məđəf à akul burburu aṅa gudəṅ aṅkul à adi, à uwana agàđ à anu à asik la gudəṅ aṅkul la abà. Tekedika sèlàw la lela kà: Makoray Zəzagəla kà adagay nekwa.' 12 La dziriga gəpəh à akul kà: La vuđ seriya kà ṅuləm adagay kà aṅa azlaməna madz à ahəṅ la gudəṅ Sodom, kà azlaməna madz à ahəṅ la gudəṅ uwanay la abà."

*Ṅgərpa lakəl aṅa azlagudəṅ uwana takweska Yesu
(Mata 11.20-24)*

13 "Ṅgərpa lakəl aṅak à kak Korazən! Ṅgərpa lakəl aṅak à kak Betsayda! Kà uwana agay nadzipo uwana tadahəṅ la tataka aṅkul la abà agay kà la gudəṅ Tir la Sədon kà, nakà, dagay uwarà azlaməna madz à ahəṅ la abà kà tatsàh kutso akàl à vok, ṅgaha la madaw abùh à vok, kà mapəhla ala kà, atà tapəh gay la ləv ala. 14 Kà uwaga à uwana gəgòd à akul kà: La vuđ seriya kà, seriya uwana adàbəz azlaməna gudəṅ

Tir, la azlaməna gudəŋ Sədon kà, ŋuləm kà aŋatà, à kà aŋa gudəŋ aŋkul. ¹⁵ Ŋgaha kak, Kapernahum, kadzugw kà: ‘Gədazigəŋay tsərah à zagəla’, kagod takay? Awaŋ, tadàdukw ka à vədfah à gày akàl à abà.” ¹⁶ Kiya uwaga Yesu agòd à azlaməna matapla la slaka aŋha: “Dza uwana atsəb à akul sləm, atsəb à gi sləm babay, dza uwana akweska akul kà, akweska gi babay, ŋgaha akweska masla masləl gi à waŋ babay aya.”

Mawul à wan aŋa azlaməna asik dzik mədfəf gəl aŋha səla

¹⁷ Kiya uwaga azlaməna asik uwaga tawùl à waŋ, la marabay tseksatsek tagòd: “Məŋga gami, amiyaka azlamasəsəfok mawisiga babay kà takəs anu gay la ahəl ala, à mok uwana mədapəh à atà gay aŋak!” ¹⁸ “Haday”, Yesu agòd à atà: “Gəŋəŋə seteni atədf à ahəŋ la zagəla bokuba mawutsədfay aŋa habaga. ¹⁹ Tsənàwwàŋ, aganay gədavà à akul maslay kà akul aŋa mahabàh azlabebi ala, la azlaaliz, ŋgaha babay kà akul aŋa mahabàh ndzəfa aŋa masla məzam ala gesina. Ŋgaha tatak mawisiga la ahəŋ adədəbani à akul aw.” ²⁰ Ama kəla kà, karabaw kà uwana azlamasəsəfok mawisiga takəs gay aŋkul aw, ama kà, ràbàw kà, kà uwana sləm aŋkul matsetserayga la wakità aŋa sifa la abà, la zagəla la afik!”

Yesu arab

(Mata 11.25-27; 13.16-17)

²¹ La mok uwatà, Masasəfok Zəzagəla ahənà Yesu ala la marabay, agòd: “Iyay, Baba Sufəl aŋa zagəla ŋgaha aŋa vədfah, kikay gəgodf à ka, kà uwana kafətla à azlabəzaga la ama ala tatak nasiriga uwana kahadfaŋ à azlaməna masəl tatak uwana à adi: ‘Mədawur gəl’, tagodf. Iyay Baba gəzləb ka kà uwaga.”

²² “Baba gulo abək à gi tatak gesina. Dza la ahəŋ asəl Kona aw, say Baba pəra asəl gi, dza la ahəŋ asəl Baba aw, say gi Kona aŋha pəra, ŋgaha la azlauwana, Kona apəhatàla masla pəra.”

²³ Ŋgaha Yesu agòla à huma à azlaməna matapla la slaka aŋha à gay, agòd à atà, à atà kokudfa gəl aŋatà pəra: “Marabay kà aŋkul, kà uwana yewdi ankul tanəŋà tatak dzəba aŋha səla aw!” ²⁴ La dziriga gəpəh à akul, azlaməna mapəh à atà gay à ahəl aŋa mapàh à azladza, la azlasufəl tayàh kà manəŋ uwaga kanəŋàwwàŋ lagwa, ama tanəŋàŋ aw. Ŋgaha kà matsənəŋ uwana katsənàwwàŋ lagwa, ama tatsənàŋ aw.”

Gay la gay la abà aŋa zil Samariya

²⁵ Masla mapàhla wakità mapəhay ala, asà à afik. Asəl matap ləv aŋa Yesu, kà mabəzal à tsəh la gay la abà, agòdfal: “Məŋga, mana à uwana, gədfəhəŋ kà gi aŋa mabəz sifa adəv à gay aw ma?” ²⁶ Kiya uwaga Yesu agòdfal: “Mana tatsetsər à wakità mapəhay à abà ma, aŋa kadzeŋay ma?” ²⁷ Masla awùlla à uda, agòdfal: “Wòyà Sufəl Zəzagəla aŋak, la ləv aŋak gesina, la ndzəfa aŋak gesina, la haŋkəli aŋak gesina, ŋgaha la sifa aŋak gesina, ŋgaha wòyà masla magay aŋak, bokuba gəl aŋak uwana kawoyàŋ.” ²⁸ Kiya uwaga Yesu agòdfal: “Delga kawùlla à uda, Dahàŋ kiya uwaga zlà, kadàbəz sifa uwana adəv à gay aw.”

²⁹ Ama masla asəl mag gəl aŋha dziriga, agòd à Yesu: “Iyay zlà, uwa à masla magay gulo uwa?” ³⁰ Yesu agòdfal: “Iyay tsənàŋ: Dza anik atsizilla ala la Urusalima kà mad à Yeriko. La tetəvi la ama, azlaməna nabəra tasà à waŋ, tazlawàŋ, tazlàb masla, tazùw, ŋgaha tasàkàl à ahəŋ la ləv la ləv pəra. ³¹ La lig la ahəŋ, tsəhay azlaməna mav tatak à Zəzagəla aguwaŋ la tetəvi uwatà. Mok uwana anəŋà dza uwaga kà, akəllal vavara à adi, aguwa la dərəv à uda anik. ³² Ŋgaha aya, zil Levi, (Uwana azlakaha à azlaməna mav tatak à Zəzagəla à sləray uwana la abà, tafahaŋ la gày Zəzagəla la aku) anəfà tetəvi uwatà bay. Mok uwana adabəz à slaka uwatà, anəŋà dza uwaga, akəllal vavara

à adi aya suwan, aguwà la dèrèv à uda anik. ³³ Agà la ahèj aya babay zil Samariya uwana la mauguzahay la abà, anèfà tetèvi uwatà babay suwan, abèzà à slaka anja dza uwatà la lèv la lèv. Mok uwana anèjàn, vok ahamàl kaykay kà masla. ³⁴ Nğaha azà vok à slaka anja niβ, apàlahaal azlaamik anja, la madàhàhal amàl à gèl, la iyaw matavèruk uwana azay la abà, bokuba mamlelèj uwana azay la amik la abà, nğaha abàkal azlaamik uwaga, afà masla à tatak anja uwana à afik, masla aday la afik, nğaha adàla masla à gày mèlok dza à agu, la slaka uwana tadànèjal à adi lela. ³⁵ La bebèj bèj, mok uwana atsizilla ala, kà mad anja, ahèl gursu sèla à uda, avà à dza anja gày mèlok la magòfal: 'Fàl slèm lela à dza uwanay, la vud uwana gèdàwul à wan à abanay kà, gi la gèl gulo, gèdàpèlla ka tatak uwana kadàziñ ala kà anja gesina.' "

³⁶ La lig la ahèj Yesu anavà à dza uwaga gà: "Iyay zlà, la tataka anja azladza makèr uwaga la abà, ma uwala à uwana agà bokuba masla magay anja dza uwana azlamèna nabèra tazùw, tazlàβ ala?" ³⁷ Masla mapahla mapèhay uwaga ala agòd: "Gi kà, dza uwana vok ahamàl kà masla, gègòd." "Delga", Yesu agòfal, "Kak babay, hàd, kadahàn kiya uwaga babay suwan zlà."

Yesu la mtèga Marta atà la Mariyama

³⁸ Mok uwana atà la tetèvi la ama la azlamèna matapla anja, ahàd à gudèj anik à abà. Mis anik la ahèj la abatà, slèm anja Marta, akès Yesu à mtèga anja la ahèl sèla. ³⁹ Deda anja mis uwatà la ahèj, slèm anja Mariyama, adzà madzay la makèla asik anja Sufèl, kà matsèβ slèm à uwana masla apèhay. ⁴⁰ Bokuba uwana slèray madagèl adakèd gèl à Marta à vok, nğaha agòd à Yesu: "Sufèl, uwaga kà aza ka aw, tak à uwana deda gulo adasakgèla slèray à gèl gesina ay? 'Zlakà deda anjak', gòdàl!" ⁴¹ Sufèl awulàlla agòfal: "Marta, Marta, katèrèβ gèl anjak la azlatatak anjувaw kiga ma, kà mana ma?" ⁴² Ama kèla kà, tatak tekula la uwana akèsa vok! Mariyama kà, akèsàni tatak uwana dzèβa anja sèla aw gà, uwana dza azèballan ala aya aw tetuwa."

11

Gay lakèl anja madèv kudà (Mata 6.9-13; 7.7-11)

¹ Kiya uwaga vèrdi anik, Yesu adèv kudà la slaka anik. Mok uwana adakèd gèl à madèv kudà, tekula la tataka azlamèna matapla la slaka anja la abà anàval: "Sufèl, tàpanula madèv kudà, bokuba anja Yuhana uwana atàpla azlamèna asik anja."

² Yesu agòd à atà: "Baña kadèvwaw kudà kà, gèdàw kà:

Baba,

Slèm anjak tsikaslaga agay masèlay gà, la slaka azladza.

Nğaha makoray anjak atsa à wan.

³ Và à anu tatak may asla à anu kèla mahènay.

⁴ Matsan tsakana gami ala,

Nğaha anu bay la gèl gami anja mamatsin à azladza uwana ala, tafahà à anu mawisiga à vok.

Nğaha, fà à anu slèm, kà seteni anja mapapat anu aw."

⁵ Nğaha Yesu agòd à atà: "Baña tekula ankul ada à mtèga slawda anja la tataka vèd agòfal: 'Slawda gulo, kamkam bèk à gi kaf gay bèrsew makèr tsi, ⁶ kà uwana slawda gulo anik agurùh à gi, asà à wan la mauguzahay, gèsèl tatak uwana gèvèl aw.'

⁷ Tsènàw mabafma à uda la kay anja dza anik uwanay tsi: 'Sàk à gi titi, gèdatsak gamagày à ama kà dagay uwarà, nğaha anu babay kà mèdahan à ahèj la azlabèza gulo, tsewwa. Gèslala vok anja mas à afik anja mav à ka aya aw.' ⁸ Nòdà à gi kà, masla adàsa à afik kà anja mavèl kà, kà slawda aw; ama adàsa à afik kà, kà uwana slawda

aṅha ad à huma à gay la mazalay, la mapakla. ⁹ Ama gi kà gəgod à akul kà: Nàvav ṅgaha kadàbəzawwal, yàhàw ṅgaha tadàv à akul dèdàwwàṅ, ṅgaha dza uwana ayahay abəzal, ṅgaha dza apəzl gamagày à dza uwana azalay, ¹⁰ kà uwana kəla dza uwana anavay: abəzal; dza uwana ayahay: abəzal; ṅgaha dza apəzl gamagày à dza uwana azalahay. ¹¹ Baba ma aṅa uwa la tataka aṅkul la abà, baṅa bəzi aṅha anaval kilfi ma avàl bebi takay? ¹² Awma baṅa anaval slaslay ma avàl aliz ay? ¹³ Akul azlamawisiga nəma, ama kasəlaw mav tatak delga à azlabəza aṅkul, ṅgaha zlà ma adaməraka Baba uwana la zagəla la afik takay. A masla uwana avàhay Masasəfok aṅha à azladza uwana tanaval?”

Mapəh mawisiga lakəl aṅa Masasəfok tsikaslaga
(Mata 12.22-30; Mark 3.20-27)

¹⁴ Yesu adzəkà makudək masasəfok mawisiga à dza anik lakəl ala à uwana adapakəṅ ala kà bada. Mok uwana masasəfok mawisiga uwaga adasal à kəl ala, bada adzəkà mabəfma, ṅgaha ləv avàl à maham à ahəṅ dza à gay gesina la abatà. ¹⁵ Ama azladza anik la tataka aṅatà la abà, tagòd: “Belzəbul, sufəl aṅa azlamasasəfok mawisiga la uwana avàl ndzəfà kà makudəkàh azlamasasəfok mawisiga.” ¹⁶ Azladza anik asà à atà malal à afək à ahəṅ, kà uwaga à uwana azladza anik tagòd: “Dahà à anu a ahəṅ nadzipo tsi, kà aṅa mapəhanula kà, Zəzagəla la uwana asləl kà à waṅ.” ¹⁷ Ama Yesu asəl madzugway aṅatà, agòd à atà: “Baṅa azladza gudəṅ tekula tatsək ala, ṅgaha tapa guvəl la tataka aṅatà la abà kà, makoray ana gudəṅ uwatà kà azila, huđ gày la huđ gày tagwàh vok à gəl. ¹⁸ Tsa baṅa seteni la gəl aṅha adatsakla ma, kakay makoray aṅha ad à huma à gay aya ma? Tsa akul kagodaw kà: Gəkudəkàh azlamasasəfok mawisiga kà Belzəbul la uwana avà à gi ndzəfà kagodaw ma? ¹⁹ Iyay, akul kadzugwaw kà Belzəbul la uwana avà à gi ndzəfà kà makudəkàh azlamasasəfok mawisiga, uwaga kagòdàw. Kità ma, uwa adavà ndzəfà à azlabəza aṅkul, kà makudəkàhla uwa? Kà uwaga à uwana tadəgah azlaməna seriya aṅkul. ²⁰ Ama tsa baṅa la Masasəfok Zəzagəla la uwana gəkudəkàh azlamasasəfok mawisiga uwanay kà, tsa kətà kà, gòdàw kà makoray aṅa Zəzagəla kà adabəz akul à vok lakana, gòdàw zlà!”

²¹ “Baṅa dza mabəlafaga abək kazlaṅa guvəl aṅha à vok, anəṅla gày aṅha lela, kà uwana akoray gesina kà ahəl adàlla vok aw. ²² Ama baṅa dza uwana aduwa masla la ndzəfà atsa à waṅ à slaka aṅha, ṅgaha akəfaslal, ahəlla kazlaṅa guvəl aṅha uwana ala à uwana afà manəwəṅ aṅha à afik gesina. ṅgaha ahəl tatak aṅha, avàh à azladza à uda gesina.”

²³ “Dza uwana anu səla aw kà, masla kà, masla məzam gulo. ṅgaha babay, dza uwana azlak gi, kà mahamla gay à vok aw kà, masla kà, masla madədasiṅla.”

Mawul à waṅ aṅa masasəfok mawisiga
(Mata 12.43-45)

²⁴ “La mok uwana masasəfok mawisiga adasa à uda la dza la abà kà, aday auguzahay la azlaslaka deyday gə gesina, ayàh slaka maduw ləv. Ama baṅa abəzal aw kà, agodəy la gəl aṅha kà: ‘Lagwa kà, gəday, gədàwul à slaka gulo uwana à abà, gəsà à uda la abà.’ ²⁵ ṅgaha awulay, abəzal à gəl kà masladəyga lela, madəhəṅ à ahəṅ gə dzəfà aṅha səla aw. ²⁶ La abatà kà, aday, ayahay azlamasasəfok mawisiga anik à tsəh mədəf, azlauwana taduwa masla la dzaṅdzaṅ, tatsa à waṅ atà nna, tadza à ahəṅ la abatà. Kiya uwaga kà madz à ahəṅ aṅa dza uwaga agay mawisiga dafuwa à gay uwana uwarà.”

Mas à afik la ahəl lela

²⁷ Mok uwana Yesu adapəh gay kiya uwanay kà, mis anik adzəkà mabəfma la tataka maham à ahəṅ dza la abà: “Lapiya agay la mis uwana azàb ka la huđ, ṅgaha

la uwana avàhà à ka awà.” ²⁸ Ama Yesu agòdal kà: “Lapiya agay kaykay kà la azladza, uwana tatsəb sləm à gay Zəzagəla, ɲgaha taf sləm à uwaga lela.”

Nadzipo aɲa Yonas

(Mata 12.38-42)

²⁹ Mok uwana dza adahama gay à vok la slaka aɲha kà, Yesu agòd à atà: “Azladza aɲa zamana uwanay lakana kà, azlamawisiga, dziriga aɲatà la ahəɲ aw. Atà tayàh nadzipo, ama nadzipo la ahəɲ tanəɲ aw, say aɲa masla mapəhal gay à ahəl Yonas uwatà pəra. ³⁰ ɲgaha bokuba uwana Yonas apàk nadzipo kà aɲa azlaməna gudəɲ Niniv kà, kiya uwaga Kona aɲa dza adàpak nadzipo kà aɲa azladza aɲa zamana aɲa lakana suwaɲ. ³¹ La vuɖ seriya kà, mis sufəl gə uwana la gəl la aku, adàgola à huma azladza aɲa lakana à gay, ɲgaha adàpuwa à atà gudzi à gəl, kà uwana asà à afik la tsəh la ahəɲ la makəd gəl à ahəɲ gudəɲ à vok, kà matsəb sləm à gay matsihila aɲa Salomon. Aganay à dza uwana aduwa Salomon la abanay lakana. ³² La vuɖ seriya azlaməna aɲa gudəɲ Niniv tadàgola afad à azladza aɲa lakana à gəl, ɲgaha tadàpuwa atà gudzi à gəl, à kà uwana azlaməna madz à ahəɲ la gudəɲ Niniv tapəh gay la ləv ala, la mok uwana tatsənà sayda aɲa Yonas. Ama dza uwana aduwa Yonas kà aganay la abanay zlà.”

Gay lakəl uɖaka

(Mata 5.15; 6.22-23)

³³ “Dza la ahəɲ avats fənəs maf à tsəh tasà aw, ama afay kà à slaka masəret fənəs à ahəɲ, kà mav uɖaka à azladza gesina, uwana tad à gày. ³⁴ Yewdi kà uɖaka aɲa vok aɲak: baɲa yewdi aɲak kà wurwur kà, vok aɲak gesina kà uɖaka, ama baɲa yewdi aɲak la ɖuvats kà, vok aɲak gesina kà la mələs la abà. ³⁵ Kiya uwaga kà, ɖahà haɲkəli kà uɖaka uwana la vok aɲak kà, kà aɲa magay la mələs la abà aw. ³⁶ Iyay, baɲa vok aɲak gesina auday, kokudfa magay la abà aɲa bəzi mələs la slaka anik kà, vok aɲak gesina kà adàgay uɖaka, bokuba fənəs uwana av uɖaka la huɖ gày gesina.”

Yesu adzəka gay

à azla Farisəya à vok la azlaməna mapàhla mapəhay ala

(Mata 23.1-36; Mark 12.38-40)

³⁷ La mok uwana Yesu adadəv mabadma à gay, zil Farisəya anik azàlal kà mazuw tatak may atà səla la mtəga aɲha. Yesu adà à gày à dza à tatak may à gəl. ³⁸ Kay, zil Farisəya uwaga akəs gəl la ahəl səla, kà uwana Yesu apəl ahəl kà mazuw tatak may aw, azùw pəra. ³⁹ Sufəl agòdal: “Akul, azla Farisəya kà kapalahaw azlatatak masala iyaw, la azlakəsɬad. Ama la huɖ aɲkul kà, kahənàwla la makəsafər dzəbaɲɲa, ɲgaha à gəl la adi gesina. ⁴⁰ Akul azlakusonju. Dza uwana adahàɲ udaga uwaga, ma masla la uwana adahà huɖga à awtày takay? ⁴¹ ɲuləm kavàw à azlaməna kuda à tatak uwana la kətsaw aɲkul la abà, la uwana la kəsɬad aɲkul la abà, ɲgaha tatak gesina adàgay dzahhà kà aɲkul.”

⁴² “ɲgərpa la aku, azla Farisəya! Kà uwana kavàw Zəzagəla makulo aɲa tatak aɲkul, baməraka la azlatsəhay aləl bəzaga gesina bay, ama kapəsewaw dziriga la masal aɲa Zəzagəla. Tekedika naka uwatà la uwana madfehəɲ kəla, ɲgaha mapəsew azlatatak anik anik deydayga uwanay gesina.”

⁴³ “ɲgərpa la aku, azla Farisəya! Kà uwana asa à aku azlaslaka materaga la azlagày madəv kuda la aku, ɲgaha aya asa à aku kà azladza tadəhakulla ‘Ayyi’, la huma maham à ahəɲ dza gesina kà mapəhla gəl aɲkul ala, kà aku azladza məɲga. ⁴⁴ ɲgərpa la aku! Aku uwana kapakàhàw kà bokuba azlazəvay uwana adakal à ahəɲ tabazl à abà tanəɲla aya aw, kalkal la kutso uwana tauguzahay la afik.”

⁴⁵ “Iyay”, tekula la tataka azlaməna mapəhla mapəhay ala la abà agòdal: “Məngə, la mapəhay kiya uwaga kà, anu babay kà kagòdaha à anu ma kasəl nəmay?”

⁴⁶ Yesu agòd à atà: “Nğərpa la akul, akul azlaməna mapəhla mapəhay ala! Kà uwana kabədfaw dzəgla à azladza à gəl, tsa tekefik akul la gəl ankul kà, amiyaka la gay gəl ahəl babay kà, kadəbawani aw. ⁴⁷ Nğərpa la akul! Akul uwana kañalahaw zəvay aña azlaməna mapəh à atà gay à ahəl kà mapəh à azladza, tekefik azlababa ankul la uwana takədfah atà. ⁴⁸ Kiya uwaga kà, akul azlaməna sayda aña atà lakəl aña sləray aña atà uwana tadəhəñ. Kà uwana atà la uwana takədfah azlaməna mapəh à atà gay à ahəl. Nğaha aya, akul kà katərkakaslahaw la mañaləh azlazəvay aña atà aya! ⁴⁹ Kiya uwaga à uwana Zəzagəla agòd la matsihila aña kà:

“Gədəsləl atà à awtəy azlaməna mapəh à atà gay à ahəl la azlaməna matapatəla tatak. Atà tadəkədfahay azlaanik aña atà, nğaha babay tadətərərəbəh azlaanik aña atà aya!”

⁵⁰ Gəpəh à akul la dziriga kà, añiz aña azlaməna mapəh à atà gay à ahəl, uwana tasòkwəh à vəfah dagay madzəka gudəñ à vok kà, tadənavay kà la ahəl aña azladza aña lakana. ⁵¹ Dagay añiz aña Abel tsərəh à añiz aña Zakari, uwana kakədfaw à tataka azlaslaka makədf tatak à abà la slaka tsikaslaga. Gəpəh à akul la dziriga kà, tadənav añiz aña azladza uwaga kà la ahəl aña azladza aña lakana!”

⁵² “Nğərpa la akul, akul azlaməna mapəhla mapəhay ala! Kà uwana kazəbàw tsəkurum uwana av tetəvi kà masəl tatak, uwala akul la gəl ankul kà, kadaw à gəy la abatà aw, nğaha pəra aya kà, kadədfaw gay à azladza anik uwana à ahəñ, asa à atà mad à gəy la abatà.”

⁵³ Mok uwana Yesu adasa à uda la abatà azlaməna mapəhla mapəhay ala la azla Farisəya tanəfə masla la gay, tanəvəhal azlatatak añuvaw la gay ala. ⁵⁴ Atà tayəh məbəzal à tsəh la azlagay mawisiga la abà, nğaha kà atà aña mapuwalla gudzi à gəl.

12

Madəh hañkəli lakəl aña magolla dza

(Mata 10.26-27)

¹ La kaslə uwatà kà, azladza dəbow dəbow tahamà gay à vok, tsərəh à uwana azladza tafəh vok asik à gəl kà atà kà atà. Teraña kà, Yesu kà, apəh gay kà à azlaməna matapla la slaka aña dadəñ, masla agòd à atà: “Nəñəwla gəl ankul, kà tatak makəslin aña azla Farisəya, uwaga asal magòdfay kà: Magolla dza aña atà.

² Tatak mahəfəhəñ à ahəñ gə gesina, adəgay mapəhla vok ala gə, nğaha tatak nasiri gə gesina adəgay masəlayga la dazuwaya. ³ Kəla tatak uwana kadəhawwanə la mələs la abà kà, adətsənla la paraka, nğaha tatak uwana kà nənuzawla la gəl la gəl la kay kà, uwaga adəgay bokuba mawiyłaga la gay azəñ.”

Gay lakəl aña guba

(Mata 10.28-31)

⁴ “Gəgòdfay kà akul, azlaməna gay ləv gulo, guba akəs akul kà azlauwana takədf sləb vok aw. Kà uwana tatak anik la ahəñ tadəhəñ à uwana aduwa uwaga aw!

⁵ Ama aganay gəpəhakulla, dza uwana kahoyaw guba, kà masla: Guba akəs akul kà Zəzagəla, kà uwana mok adəkədf akul kà, asla kà maduw vok ankul à akəl uwana à abà, adəmətsila aw kəla, iyay, masla la uwana kahoyaw guba aña pəra.”

⁶ “Tak ma taslala vok aña maduw dəgtsetsek zlo ala, kà aña sili səla aw takay? Iyay, tekefika amiyaka tekula aña atà kà azila la huma Zəzagəla aw. ⁷ Amiyaka añidz takasagəl ankul gesina kà, Zəzagəla asəl, la tekula tekula gesina aña. Guba akəs akul aw, kà uwana kaduwaw azladəgtsetsek gesina la manəñla akul à adi.”

*Maz sayda lakɛl aɲa Yesu la mapuw ala gudzi à gɛl
(Mata 10.32-33; 12.32; 10.19-20)*

⁸ “Haɗay, gɛgɔɗ à akul la dziriga: Baɲa dza agɔɗay: ‘Gi aɲa Yesu la paraka’, ‘Aɲulo’, Kona aɲa dza adàgɔɗay la huma aɲa azlamalika aɲa Zɛzagɛla lakɛl aɲha bay. ⁹ Ama baɲa dza apɛhay mawisiga lakɛl kà aɲa Kona aɲa dza, Kona aɲa dza adàpɛh mawisiga lakɛl aɲha suwan, la huma aɲa azlamalika aɲa Zɛzagɛla.”

¹⁰ “Kɛla dza uwana apɛh mawisiga lakɛl aɲa Kona aɲa dza, adàmatsalan ala, ama kɛla dza uwana agɔɗàh à Masasɛɗok Zɛzagɛla kà, masla adàbɛz mamatsila tsakana aɲha aw!”

¹¹ “Mok uwana tadàbayàh akul à azlagày madɛv kuɗa à agu, baɲaw à huma aɲa azlasufɛl, baɲaw à huma aɲa azlagumna kà aɲa maɗahàh akul seriya à gɛl kà, guba akɛs akul à kà tatak uwana kadàpɛhaw, kà matɛf gɛl aɲkul aw. ¹² Kà uwana la kaslà uwatà kà, uwana kadzugwaw aw kà, Masasɛɗok Zɛzagɛla adàpɛhakulla adàgay la paɲaw aɲkul la awtày.”

Gay la gay la abà aɲa masla gorobu kusonju gà

¹³ Kiya uwaga dza anik la ahɛɲ, la maham à ahɛɲ dza la abà, agɔɗ à Yesu: “Mɛɲga, gɔɗ à deda gulo kà: ‘Vàhàw lɛmana, uwana baba aɲkul asàk à akul à ahɛɲ’, gɔɗal.”

¹⁴ Yesu awulàlla, agɔɗal: “Zil, uwa à uwana afà à gi à ahɛɲ, kà gi aɲa magay masla seriya aɲa mavàhakulla tatak ala la deda aɲak uwa?” ¹⁵ Kiya uwaga agɔɗ à atà gesina: “Dahàw han̄kɛli la gɛl aɲkul lakɛl aɲa mawoy lɛmana, kà uwana sifa aɲa dza kà la magay la ahɛɲ, amiyaka adàgay masla gorobu mɛɲga gà, aw.” ¹⁶ Kiya uwaga Yesu apɛh à atà gay la gay la abà uwanay la magɔɗay:

“Dza anik la ahɛɲ uwana agà la azlaalàk delga delga. ¹⁷ Masla adzugw la gɛl aɲha, ‘Mana gɛɗehɛɲ mi: Tsa uwala slaka aslèkà à gi aɲa matsakàh tatak may gulo à abà aw mi. ¹⁸ Lagwa kà, gɛkalàh bɛza vɛɗa uwanay à ahɛɲ gesina, ɲgaha gɛɲalàh mɛɲga mɛɲgaga, ɲgaha gɛɗàtsakah azlatatak gulo à abà gesina. ¹⁹ ɲgaha gɛɗagɔɗay à gɛl gulo: Kak la tatak aɲuvaw, lagwa adàgay kà aɲa mavay dɛɲ; dùw lɛv aɲak, zùw, ɲgaha sà, ràb aɲak, dùw asik à zagɛla.’ ²⁰ Ama Sufɛl Zɛzagɛla agɔɗal: ‘Kak zil kusonjuga! Zlahaw la vɛɗ uwanay lakana kà kamɛtsay ma, ɲgaha ma adàgay ma aɲa uwa à tatak uwaga kadahaɲ à ahɛɲ gesina uwa?’ ” ²¹ Kiya uwaga Yesu azalàɲ à gel, agɔɗ à atà: “Kiya uwaga à uwana dza uwana ahamà lɛmana aɲa gɛl aɲha à ahɛɲ kà, masla kà, galepi la huma yewdi aɲa Zɛzagɛla aw.”

*Maf madzugway à Zɛzagɛla à afik
(Mata 6.25-34)*

²² Kà uwaga à uwana Yesu agɔɗ à azlamɛna matapla la slaka aɲha, “Kafawla kà gɛl à ahɛɲ kà tatak may uwana kadzadzawla kà vok aw, bamɛraka lakɛl aɲa tatak matsokw à abà babay aw. ²³ Sifa ma aduwa tatak may aw takay? ɲgaha ma vok aduwa tatak matsokw à abà aw takay? ²⁴ Nɛrɛzàw azlakwakwak tsi: Uwala taslɛkay aw, ɲgaha tatsɛɗay babay aw, vɛɗa aɲatà la ahɛɲ, kà aɲa lebɛɲ aw. Ama Zɛzagɛla adzadzar atà, akul ma kaduwawwan aɲlakolan uwaga aw takay? ²⁵ Uwa la tataka aɲkul la abà aslala vok aɲa maziɲ à mavay aɲa mamɛtsay aɲha à adi amiyaka ɲuv la aslasl gɛl aɲha uwa? ²⁶ ɲgaha ma, tsa baɲa azlabɛza tatak babay kà, kaslawwalla vok aw ma, kà mana kafawla kà gɛl à ahɛɲ lakɛl aɲa azlatatak anik anik deyday ma? ²⁷ Nɛrɛzàw bokuba uwana azlamawuratatay aɲa guf tazigɛnay tsi: Tadàh slɛray aw, ɲgaha tavavɛɗ slewzi kà aɲa lukut babay aw. Ama la dziriga gɛgɔɗ à akul kà: Amiyaka bà Salomon uwana akɔr lɛmana aɲha aɲuvaw babay kà, abɛzà à lukut bokuba aɲa azlamawuratatay uwaga tatsokw à abà aw. ²⁸ Iyay zlà, Zɛzagɛla adàw lukut à azlakɛsaf à vok uwana à vok la fɛta bay lakana, tekeɗika atà kà lakana baɲaw lebɛɲ kà tayakats à akal à gay: ɲgaha ma adàgay anu uwanay babay takay? Kay akul

la madıñal gəl à vok matsihilaga hadıay. ²⁹ Kiya uwaga kà, kafawla kà gəl à ahəñ, la uwana kadàzuwwaw, la uwana kadàsaw aw, ıgaha kagahaw azlaadi aw. ³⁰ Kà uwana uwaga kà, say azladza uwana tasəl Zəzagəla aw, la uwana tayàh tatak uwaga koksikoksi. Ndzer Baba añkul uwana la zagəla la afik kà asəl tatak uwana kanawkuđa aña gesina. ³¹ Fàwla kà gəl à ahəñ dadəñ terəña kà, kà makoray Zəzagəla, la lig la ahəñ kà masla adəkəs akul à ahəl ala dèwdèw tatak uwana kanavawwal.”

*Ləmana la zagəla
(Mata 6.19-21)*

³² “Maham à ahəñ bəziga, guba akəs akul aw, kà uwana asa à Baba kà masla aña mav à akul makoray aña. ³³ Dàwàw azlatatak añkul ala, vàhàw sili gə à azlaməna kuđa à uda. Pàkàw vok ankul ala kà kiwa sili uwana sili adəv à lag la aku aw, ıgaha ləmana uwaga awisila la zagəla aw aw. Kà uwana la abatà kà, masla à gəl ad à abatà aw, marzaw la fafay bay awisəñ ala aw. ³⁴ Kà uwana slaka uwana ləmana aña kà, la abatà bay kà, ləv aña adz à ahəñ babay suwañ!”

Azlamagamza uwana tadz à ahəñ la adi

³⁵ “Gàw madàh vok à ahəñ gə, wàdàhàw parapara añkul à tsəh lela, ıgaha bay fənəs añkul agàh mavats à ahəñ gə. ³⁶ Gàw bokuba azlamagamza uwana takud mənğa aña tətà ala, à baña ahəd à mazəb mis, kà atà mapəzlal gamagay la mok uwana mazalahay aña adàsa à wañ. ³⁷ Marabay à gay kà la azlamagamza uwana mənğa aña tətà atsa à wañ, abəz atà à gəl la adi. La dziriga gəpəh à akul kà, mənğa aña tətà adàwad parapara aña à tsəh, ıgaha adàdzàh atà madzay, kà mavàh à atà tatak may la gəl aña. ³⁸ Baña mənğa aña tətà asa à wañ la tataka vəd, adàduw uwaga babay, baña abəz atà à gel la adi kà, marabay agay la atà! ³⁹ Tsəbàw sləm à gay uwanay lela: Agayña zil gày asəl kaslè uwana masla à gəl atsa à wañ kà, mazləl gày aña la vəd kà, naka masla kà naka adzəhal aw huyip à ahən à ahəñ la adi, kà mad à gay aña, aña masla à gəl aw. ⁴⁰ Akul babay kà, gəw nekwa, kà uwana la mas à wañ aña Kona aña dza babay kà adəgay kà bə kiya uwaga la guruh!”

*Azlamagamza səla
(Mata 24.45-51)*

⁴¹ Kiya uwaga Piyer agòdal: “Sufəl kà aña mi la uwana kapəhay gay la gay la abà uwaga, awma kà aña azladza gesina takay?” ⁴² Kiya uwaga Sufəl agòdal: “Kità ma, uwa à masla sləray dziriga, ıgaha hanəkəliga uwa? Uwaga kà dza uwana mənğa aña afà à gəl aña azlamagamza anik, kà masla aña mavàh à atà tatak may la kaslè uwana asa à atà. ⁴³ Marabay agay la magamza uwana mənğa aña awul à wañ, abəzal à gəl la sləray aña la abà. ⁴⁴ Hadıay, gəpəh à akul la dziriga: Ndzer, zil gày adàvə ləmana aña à ahəl aña gesina. ⁴⁵ Ama baña magamza uwaga agòday la ləv aña la tsəh: ‘Mənğa gulo kà adəsafay’, ıgaha adzəka makəsafər la mazlabàh azlamagamza anik anik gesina, ıgaha aday à mazuway à abà, à masay à abà, apaka masla guzu. ⁴⁶ Kiya uwaga kà, mənğa aña adàsa à wañ la guruh, la mavakay uwana adzugw mas à wañ aña mənğa aña aw. Kiya uwaga kà, mənğa aña adəsəl ıgərpa, kà uwana akudəñ ala aw, masla kà tadəfay kà à tataka aña azlaməna tsakana à abà.”

⁴⁷ “Tekedıka magamza uwana asəl tatak uwana asa à mənğa aña, akuda mənğa aña ala aw kà, adəhəñ kà bokuba uwana asa à gəl aña pəra, mazlabay adəslal mənğa. ⁴⁸ Ama kà aña magamza uwana asəl madàh uwana asa à mənğa aña aw, ıgaha adàh sləray uwana agay tazlabla kà, tadəzlabay kà ıv pəra, kà uwana asəl aw. Dza uwana tavəl tatak mənğa kà, la slaka aña kà, tanaval kà mənğa suwañ; ıgaha aya dza uwana tafal à ahəl mənğa tadənaval mənğa suwañ.”

Yesu atsala mavàhla à waŋ
(Mata 10.34-36)

⁴⁹ Yesu agòd: “Gi kà, gèsà à waŋ kà, kà masèlla akàl à waŋ à gudəŋ à vok, ŋgaha asa à gi kà agay mavats vok gà. ⁵⁰ Batem anik la ahəŋ tadàfahgəŋ, nənàw madz à ahəŋ gulo la mazaw la gəl la uwaga la abà tsi, gətərəbɔy tsərəh adàpakà vok. ⁵¹ Akul ma, kagodaw ma, gəsèlla lapiya à kutso uwanay à abà, kagodaw takay? Awaŋ, gəgod à akul, ama mavàhla la uwana gəsèlla à waŋ. ⁵² Dahàw haŋkəli, dagay lakana, huɔ gày aŋa dza uwana atà zlo la kay, tadàtsak kəla azladza makər tadàhamay à azladza səla à gəl, ŋgaha səla adàham à makər à gəl. ⁵³ Baba adàgola afad à bəzi aŋha à gəl, iyà babay adàgola afad à dugu aŋha à gəl, dugu bay adàgola afad à iyà à gəl. Dzedzi misga adàgola afad à kuhuwa aŋha à gəl, ŋgaha kuhuwa aŋha babay adàgola afad à dzedzi aŋha misga à gəl.”✧

Matsənəŋ godega aŋa məlo
(Mata 16.2-3)

⁵⁴ Kiya uwaga Yesu agòd à maham à ahəŋ dza aya: “La mok uwana kanəŋaw habaga atsa à afik la matəɔ à ahəŋ afats, katskats kagodaw kà: ‘Iyaw adàsuway’, uwaga apakàhà vok, haday. ⁵⁵ Baŋa kanəŋaw afad adəɔday la gəl la aku, ‘Aŋuf adàgay la ahəŋ’, kagodaw, uwaga bay kà apakàhà vok, haday. ⁵⁶ Kay, akul kà akul azlaməna magolla dza, kasəlaw mavàh məlo uwana ala la vədah, ŋgaha la uwana la zagəla, ŋgaha ma kà mana katsənaw godega aŋa məlo uwanay lakana aw zlà ma?”

Matsən vok gay la masla məzam
(Mata 5.25-26)

⁵⁷ “Kà mana akul la gel aŋkul kadahaw vok seriya à vok aŋkul à gəl kà madz à ahəŋ la dziriga la abà aw ma? ⁵⁸ Baŋa dza apuwa à ka gudzi à gəl kà, la mok uwana akul à tetəvi la ama, kadaw à huma seriya akul səla kà, wəɔ vok à uda kà akul aŋa matsən vok gay səla, ŋgaha kà masla aŋa maf ka à ahəl aŋa masla seriya aw, ŋgaha bay kà masla seriya aŋa maf ka à ahəl aŋa azlaslodzi aw, ŋgaha kà azlaslodzi babay aŋa maduw ka à daŋay aw. ⁵⁹ La dziriga gəpəh à ka kà, kadàsa à uda la abatà aw, say baŋa katsatsakwàh azlamatəm à ahəŋ sili aŋak à waŋ gesina dadəŋ!”

13

Mapəh gay la ləv ala baŋaw mamətsay

¹ La kaslà uwatà, azladza anik tasà à waŋ kà mapəh à Yesu gay lakəl aŋa azla Galili, uwana Pilatus akəɔ atà, à mok uwana tahəd kà maf tatak aŋatà à slaka mav tatak à Zəzagəla. ² Yesu agòd à atà: “Haday, ma kadzugwaw ma azla Galili uwaga ma: ‘Tadfaheŋ mawisiga uwana aduwa aŋa azla Galili anik uwanay,’ kagodaw takay? ³ Awaŋ, gəgod à akul gesina, baŋa kapəhaw gay la ləv ala aw kà, akul gesina kadàzahawla bokuba aŋatà babay. ⁴ Iyay zlà, azladza kulo gəl aŋha mtəgis uwana məŋ gày la gudəŋ Silowe atəɔ à gəl, adzamàhà atà ala ma, akul ma, la madzugway aŋkul ma, azlaməna tsakana taduwa azlaməna gudəŋ Urusalima anik kagodaw takay? ⁵ Kay! Awaŋ, gəgod à akul, ama baŋa kapəhaw gay la ləv ala aw kà, akul gesina kadàmatsaw à gay bokuba atà babay.”

Gay la gay la abà aŋa gudəv uwana av mayyay aw

⁶ Kiya uwaga Yesu apəh à atà gay la gay la abà uwanay la magoɔday: “Dza anik la ahəŋ, gudəv la guɔ matavərək aŋha la abà. Masla atsizilla ala, ahəd kà mayàh mayyay la vok aŋha, ama abəzal aw. ⁷ Masla à dza aŋa guɔ, agod à masla mapəs guɔ aŋha: ‘Kay, nənəŋ tsi, dagay mavay makər gəsàhà waŋ kà mayàh mayyay la

vok aṅha, ama gəbəzal aw, adadza à slaka à gəl deyday, kiya kà, gəkəsay aya aw, nàts à ahəṅ.’⁸ Ama masla mapəs guf agodal: ‘Məṅga gulo, kamkam, sàkal la viya uwana aya, gədàla à tsəh aṅha gədàtəkal vərəw à tsəh dadàṅ. ⁹ Baṅa gədàdfehəṅ kiya uwaga kà, zlahaw kà adəyyay, nərəz tsərəh à kà vuđ anik, baṅa ayya aw kà: Kadànats à ahəṅ!’ ”

Yesu awur mis makələh à vəđah gə ala, la vuđ maduw ləv

¹⁰ La vuđ maduw ləv, vərđi anik, Yesu adzəkà matapla tatak à azladza la gəy madəv kuđa la aku. ¹¹ La abatà aga la ahəṅ mis masla đuvatsga, uwana agà makələh à vəđah gə dagay mavay kulo gəl aṅha mtəgis. Masasəđok mawisiga adakalahal gay à vok, aslalla à vok aṅa matsizlla ala aw. ¹² Mok uwana Yesu anəṅà mis uwaga azàlal la magodal: “Lagwa kà, wùr ala la đuvats aṅak la abà!” ¹³ Abəkal ahàl à gəl, ṅgaha la katskats, mis atsizlla ala, ṅgaha adzəkà mazləb Zəzagəla la matsəkay. ¹⁴ Ama məṅga aṅa gəy madəv kuđa kà, gəl akəđal à vok, ləv avàlal à gay kà mawur dza ala uwana Yesu awurəṅ ala vuđ maduw ləv. Agòđ à maham à ahəṅ dza: “Mavakay mukwa la ahəṅ la tsəh aṅa kasukwa, à uwana dza aslala vok aṅa mađàh sləray. Sàhàwwàṅ, tawarakulla la azlamavakay uwaga la tsəh, awkà kasawwan kà mawarakulla la mavakay maduw ləv aw!”^{*} ¹⁵ “Iyay”, Sufəl Yesu agòđ à atà: “Akul azlaməna magolla dza, kəla uwabeyuwi aṅkul ma apələh sla aṅha ala baṅaw ziwṅṅu aṅha ala la vuđ maduw ləv kà madla atà à iyaw à abà aw takay?” ¹⁶ ṅgaha ma baməraaka mis mayyi à tsəh ala aṅa Abəraham, uwana tak seteni adatsiṅ à sasala aṅha à abà mavay kulo gəl aṅha mtəgis, ṅgaha ma azlayla kà vok aṅa mapələṅ ala la sasala aṅha la abà la vuđ maduw ləv aw takay?” ¹⁷ Mawul à uda aṅa Yesu uwaga akəlla ziruwı à azlaməna məzam aṅha à gəl gesina; ama maham à ahəṅ dza tagà la marabay məṅga kà azlasləray nadzipo uwana Yesu ađahàhəṅ.

Gay la gay la abà aṅa tsəhay hamadz

(Mata 13.31-32; Mark 4.30-32)

¹⁸ Apəh à atà gay la gay la abà anik, agòđ à atà: “La mana makoray Zəzagəla adəbani vok ma? La mana à uwana gəgagazləla ma?” ¹⁹ Yesu agòđ: “Makoray Zəzagəla kà, gəgagazləla la tsəhay hamadz uwana atsà à uda la lig gəy aṅa dza: Azigəṅay, apaka magol ahəf, tsərəh à uwana azladıyan tasaha à wan kà maṅaləh gəy aṅatà à afik.”

Gay la gay la abà aṅa tatak maməsl tatak ala

(Mata 13.33)

²⁰ Kiya uwaga Yesu agòđ à atà aya: “La mana gəgagazləla makoray Zəzagəla ma?” ²¹ Makoray Zəzagəla kà kalkal la tatak maməsl tatak ala, uwana mis akotsəṅ à pəhàw dogum zlo à tsəh, uwana ađàh kilo dzik səla gəl aṅha səla, tsərəh à uwana aməsl magol pəhàw uwaga ala gesina.”

Gamagəy slərkutskuts gə

(Mata 7.13-14,21,23)

²² La maday aṅha la abà à Yesu kà, aguwàhà à uda la azlaməṅ gudəṅ la abà, la azlabəza gudəṅ la abà gesina, ṅgaha la matapla tatak à azladza la tetəvi aṅa maday à Urusalima la ama. ²³ Kiya uwaga dza anik anav: “Məṅga, kà mana azladza ṅuv pəra tadəbəlay ma?” Ama Yesu agòđ à atà: ²⁴ “Wəđàw vok à uda kà mad à gəy la gamagəy slərkutskutsga uwaga; la paraka gəpəh à akul kà, azladza aṅuvaw tadəyah aṅa mad à gəy la abatà, ama tadəslay aw.”

²⁵ Agòđ à atà: “La mok uwana zil gəy adatsizlla ala adatsak à gamagəy à ama kà, akul uwana la uda kadədzawka mazalahay la magodalay: ‘Sufəl, Sufəl, pəzl anu à ama

^{*} 13:14 13.14 2Musa 20.9-10; 5Musa 5.13-14

ala.' Ama masla adàtsizlla ala, adàgodf à akul: 'Akul gesina uwaga, gəsəl slaka uwana kaguwanj la abà aw, gəsəl akul aw.' ²⁶ Ngaha kadàgodfawwal: 'Məzàw tatak məsàh tatak gesina kà la slaka gə anina, ngaha aya katàpàhànula tatak la azlagudənj gami la abà.' ²⁷ Ngaha aya adàgodf à akul: 'Gəsəl akul aw, gəsəl slaka uwana kaguwanj la abà aw, zàw gi vok akul gesina ankul, uwana kadahàw mawisiga.' ²⁸ La abatà la uwana kadàtawaw, la mapadf slidf la tsəh ala tərawawa, la mok uwana kadənənjaw Abərahəm, Isak, Yakuba, ngaha la azlaməna mapəh à atà gay à ahəl, kà mapàh à azladza gesina la makoray Zəzagəla, tekefika akul kà akul mawits akul à uda gə. ²⁹ Ngaha aya kà, azladza tadàsa à wanj la tsəh la ahənj, la matədf à ahənj afats, la mas à afik afats ngaha la gəl la aku bay. Ngaha atà tadàbəzal slaka madza madzay la tatak may lakəl la makoray anja Sufəl Zəzagəla. ³⁰ Kiya uwaga azlaanik la tataka azlaməna huma la abà, tadàgay azlaməna lig, ngaha azlaanik la tataka azlaməna lig la abà bay kà, tadàgay azlaməna huma."

*Vok ahama Yesu kà Urusalima
(Mata 23.37-39)*

³¹ La kaslà uwatà kà, azla Farisəya anik tazà vok à slaka Yesu, ngaha tagòdfal: "Dà anjak la abanay. Həd à slaka anik kà uwana Herod asal makədf ka!" ³² Ngaha Yesu agòdf à atà: "Dàw, kadàpəhaw à hayyanj uwaga kà kiya uwanay: Aganay gəkudəkàh azlamasədfok mawisiga la mawar azladza ala lakana, lebənj, ama la mavakay makər anja kà gədàkədf gəl à sləray gulo. ³³ Ama kəla kà, say gətsizlla ala lakana, lebənj, la vudf uwahà, kà uwana akəsa vok kà anja masla mapəhal gay à ahəl anja Zəzagəla anja maməts à uda anja hufd gudənj Urusalima aw, say la hufd gudənj Urusalima kəla."

³⁴ "Urusalima, Urusalima kak la uwana kakàdfàh azlaməna mapəh à atà gay à ahəl anja Zəzagəla, uwana aslələh kà atà à wanj gesina. Asik dənj gədayahah maham gay à azladza anjak à vok la slaka gula, bokuba gotsak uwana ayàh maham gay azlabəza anja à vok, la tsəh gogozlèh anja. Ama kakəsàw aw. ³⁵ Hadəy, lagwa kà, gəy ankul adəpak njvagay. Ama gi kà, gəpəh à akul la dziriga kà, akul kadənənjaw gi, tsərəh à kaslà uwana kadàgodfaw kà: 'Zəzagəla apis gay à dza uwana à vok, atsa à wanj la sləm anja Sufəl Zəzagəla', aw." ^{*}

14

Yesu awur masla dɤuvats ala

¹ Vərdi anik, Yesu ahəd à mtəga anja tekula anja mənja anja azla Farisəya la vudf maduw ləv, kà mazuw tatak may. Azladza uwana la abatà, tanərəz Yesu lela. ² Dza anik la ahənj uwana makəsl vədfah gə la abatà la huma anja. ³ Yesu apəh gay à azlamənja anja azlaməna mapəhla mapəhay ala la azla Farisəya: "Wakità mapəhay gami ma avà tetəvi kà mawur dza ala la vudf maduw ləv takay?" ⁴ Ama asà à atà mawulla gay à uda aw. Kiya uwaga abək ahəl à masla dɤuvats à gəl, awurənj ala, ngaha asək à dza uwatà, adà anja. ⁵ Yesu agòdf à atà: "Uwa à uwana bəzi anja anjakaw kokur anja atədf à suwa à abà ma la vudf maduw ləv kà, azəb à uda aw uwi?" ⁶ Dza la ahənj aslələ vok kà mawulla gay à uda lakəl anja uwaga aw.

Gay lakəl anja mayahani slaka ngaha lakəl anja mazalahay

⁷ Iyay, la abatà Yesu anərəz mayahani slaka anja azladza uwana tazələh atà à maham gay à vok à abà. Tayahay kà azlaslaka delga. Kiya uwaga apəh à atà gay uwaga: ⁸ "Banja dza azàla ka à madəvaday mazəb mis à abà kà, kayəh slaka madza madzay delga gə dadənj aw. Zlahaw dza anik la ahənj, à uwana tazələh à madəvaday uwaga à abà, aduwa ka bay ma? ⁹ Ngaha kà pəra masla mazalèh akul atsa à wanj,

^{*} 13:27 13.27 Mahabay 6.8 ^{*} 13:35 13.35 Mahabay 118.26; Yeremiya 22.5

agodf à ka: ‘Kona, sàkla slaka uwaga à dza uwanay.’ La abatà kà, kak kà magol ziruwi adahama ka à gəl kà matsizlla ala la huma, kà mad à lig. ¹⁰ Ama baŋa tazàla ka kiya uwaga kà: Hād, kadza aŋak à madzay la lig. Kà uwana la mok uwana masla mazallāh akul adàda à awtāy kà, adāgodf à ka: ‘Slawda, kak kà, zà vok à huma à gay la abanay’, la abatà kà, kà aŋak kà adāgay dzəba aŋha səla aw la huma azladza uwaga gesina, kà kak aŋa mad à huma à gay. ¹¹ Kà uwana kəla uwabeyuwi uwana azigən gəl aŋha kà, tadāwulla ala à lig. Ngaha dza uwana awulla gəl à vədah kà, tadādalla à huma.”

¹² Kiya uwaga Yesu agodf à dza uwana, azālāh babay: “Iyay zlà, baŋa kavà tatak may, baŋaw kata kaf à uda kà, kazālāh azlaslawda aŋak la azladedā aŋak, baŋaw la azlayaga aŋak, la azlaməna magay aŋak, uwana azlagalepiga pəra aw. Way kà atà babay kà tadāzalla ka vərđi anik, kà mazuw tatak, kà uwana baŋa tazàla ka kà bokuba tapəlla ka uwana à abà tazūw la mtəga anak suwaŋ. ¹³ Ama baŋa kat kaf à uda kà, zālāh kà azlaməna kuđa, azlamagodu, azladeri ngaha la azlaguləf pəra. ¹⁴ Kità kà, kadāgay la marabay, kà uwana atà kà taslala vok aŋa mapəlla ka à abà aw. Uwaga kà Zəzagəla la uwana adāpəlla ka à abà la mavakay uwana adāwulla azladza dziriga à uda la mamətsay.”

Gay la gay la abà aŋa məŋ mat kaf à uda

(Mata 22.1-10)

¹⁵ Mok uwana tatsən gay uwaga kà, tekula la tataka aŋa azladza uwana la tatak may la adi, agodf à Yesu: “Tsa kətà kà, marabay agay la dza uwana adāzuw tatak may aŋha la makoray aŋa Zəzagəla!” ¹⁶ Yesu agodf à atà: “Dza anik la ahəŋ, atà magol kaf à uda, ngaha azālāh azladza aŋuvaw. ¹⁷ La mok uwana tatak adahənay kà, asləl magamza aŋha kà mazalāh azladza uwana tapəh à atà: ‘Sàw à waŋ, sàw à waŋ adagay, kà uwana tatak may kà adahənay!’ ¹⁸ Ama gesina aŋatà tadzəkà manav kamkam la tekula tekula. Matera agodf à magamza: ‘Gi, gəsükw guf kà, asa à gi, gəday kà manəŋəŋ, kamkam bəsgəŋ.’ ¹⁹ Kiya uwaga masəla agodfal aya: ‘Gəsükw sla səđuk zlo, gəday gədāgurla atà sləray, kamkam bəsgəŋ.’ ²⁰ Ngaha anik agodfal aya suwaŋ: ‘Gi kà, gədazəb mis kà bə lagwa lagwa, kà uwaga à uwana gəslala vok aŋa manəf ka aw pəra.’ ²¹ Kiya uwaga magamza awul à slaka məŋga aŋha, apəhal uwana tapəhal gesina. La abatà kà, zil gāy apək ləv, la magodfay à magamza aŋha: ‘Hād, katskats à azlavadavaday à afik, la azlagay barama à ama la huđ gudəŋ la abà, ngaha hād kasəlla azlaməna kuđa à waŋ, la azlamagodu, la azlaguləf ngaha la azladeri gesina!’ ²² Zwek la huma, uwana uwaga adadaha vok kà, magamza asà à waŋ agodf à məŋga aŋha: ‘Məŋga, uwana kapəh kà, adahà vok, ama slaka atamà à ahəŋ bə gotənaŋ aya.’ ²³ Kiya uwaga məŋga agodf à magamza aŋha: ‘Lagwa kà, dāh à azlabəza mazləramāh tetəvi à ama, la azlalig zlagam, fāh à atà gasa à gəl, kà masəlla atà à waŋ kà aŋa mahənlā aŋa gāy gulo!’ ²⁴ Ndzer, gəpəh à akul la dziriga kà, azlauwana gəzālāh atà takwəsāh kà, tetuwa tadətap tatak may gulo tetuwa aw.’”

Tatak uwana dza apakla masla madiŋal gəl à vok la slaka Yesu

(Mata 10.37-38)

²⁵ Maham à ahəŋ dza aŋuvaw tanəfà Yesu la tsəh. Yesu agəla vok, ngaha agodf à atà: ²⁶ “Baŋa dza asal, manəf gi kà, say apəsew baba aŋha, la iyà aŋha, la mis aŋha, la azlabəza aŋha, la azladedā aŋha ngaha amiyaka gəl aŋha dadāŋ. Tsa baŋa kiya uwaga aw kà, aslala vok aŋa magay masla matapla la slaka gulo aw. ²⁷ Kəla dza uwana akəs mamətsay aŋha, ngaha anəf gi aw kà, aslala vok aŋa magay masla matapla la slaka gulo aw. ²⁸ Baŋa dza asal maŋal magol gāy kà, say adza madzay

☆ 14:10 14.10 Haŋkəli 25.6-7

dadàŋ, atugw tatak uwana adàziŋ ala gesina dadàŋ. Baŋa sili aslay kà mahənlan ala, la uwana adzəka sləray. ²⁹ Awkà baŋa adzəka maf godega à gày à ahəŋ pəra, uwala à adàhənəŋ ala aw kà, kəla dza uwana adənəŋ gày uwana ahənla aw kà, tadàdzəka makəfaslal. ³⁰ Tadəgodəy: ‘Nəŋàw tsi, kona uwanay tsi: Adzəkà maŋal magol gày, uwala aslala vok aŋa mahənəŋ ala aw tsi!’ ³¹ Kiya uwaga babay la sufəl uwana asal map guvəl la sufəl anik kà, say adza madzay dadàŋ, kà manərezay à baŋa dza dəbow kulo aslala vok aŋa map guvəl la dza dəbow dzik səla. ³² Baŋa aslay aw kà, tsa sufəl anik uwanay aləg kərkər dadàŋ kà, say asləl gay kà manav masəl vok atà səla.” ³³ Yesu agòd kiya uwaga babay zlà: “Baŋa dza apəsew tatak aŋha gesina aw kà, aslala vok aŋa magay masla matapla la slaka gulo aw!”

*Slugul uwana azladəy aw
(Mata 5.13; Mark 9.50)*

³⁴ “La hadəy gà kà, slugul kà tatak delga. Ama baŋa azladəy aya aw ma, kakay dza azladəŋ ma? ³⁵ Uwaga akəsa vok baməraka aŋa kutso aw, ŋgaha bay apək arəguwa babay aw. Uwaga kà say maftukw ala pəra. Dza uwana sləm lakəl kà atsəbal sləm lela zlà!”

15

*Gay la gay la abà aŋa tuwaŋ mazilaga ŋgaha uwana tabəzal
(Mata 18.12-14)*

¹ La abatà azlaməna mazəb hadama la azladza anik uwana madz à ahəŋ aŋatà kà lela aw kà, tazà vok à slaka Yesu kà matsəbal sləm. ² Azla Farisəya la azlaməna mapàhla mapəhay ala taŋoŋüz à tsəh ala kà atà kà atà la magodəy: “Nəŋàw, konnay akəs azlaməna tsakana kà la ahəl səla tsi, ŋgaha tazùw tatak may la slaka gà la atà nna tsi.” ³ Kiya uwaga Yesu apəh à atà gay la gay la abà uwanay, agòd à atà:

⁴ “Uwa la tataka aŋkul la abà uwana akor tuwaŋ dzim, ŋgaha tekula aŋatà azila à ama, asak à dzik ladəga gəl aŋha ladəga gà uwanay la fəta, kà masla aŋa mad mayàh tekula gà uwaga tsərəh à uwana abəzal aw uwi? ⁵ Mok uwana adabəz tuwaŋ aŋha kà arabay, akəsay, af à kuda. ⁶ Mok uwana adà à mtəga kà, adzəka mazalàh azlaslawda aŋha la azlaməna magay aŋha, la magod ə atà: ‘Mərəb anina, kà uwana gədaabəzal tuwaŋ gulo uwana azalà.’ ⁷ Kiya uwaga babay gəgod ə akul kà, marabay məŋga adəgay la zagəla la afik, kà aŋa masla tsakana tekula uwana apəh gay la ləv ala, aduwa dza dzik ladəga gəl aŋha ladəga gà uwanay, uwana: ‘Anu azladziriga’, tagod.”

Gay aŋa gursu uwana azalà ŋgaha tabəzal

⁸ “Awma mis ma uwala à uwana akor gursu kulo, ŋgaha tekula azilà à ama, kadzugwaw ma, avats fənəs, aslad gày, ŋgaha ayahay la haŋkəli, tsərəh à uwana abəzal aw takay? ⁹ Mok uwana adabəzal gursu aŋha kà, azallàh azlaslawda aŋha la azlamatetegi aŋha gesina, ŋgaha agod ə atà: ‘Mərəb anina, kà uwana gursu gulo uwana azalà kà gədaabəzal adagay!’ ¹⁰ Kiya uwaga babay, gəgod ə akul kà, marabay adagay la zagəla la afik, la slaka azlamalika aŋa Zəzagəla, kà mapəh gay la ləv ala aŋa masla tsakana tekula, uwana atsà à huma aŋa Zəzagəla.”

Gay aŋa kona mazilaga la mawul à waŋ aŋha

¹¹ Kiya uwaga Yesu agòd aya: “Dza anik la ahəŋ agà la azlabəza səla. ¹² Kiya uwaga, mabəziga bəziga agòd ə baba aŋha: ‘Baba vā à gi humà ləmana, uwana adəgay aŋulo!’ Kiya uwaga baba avahà ləmana à azlabəza aŋha səla ala. ¹³ Mok uwana adahəni à ahəŋ ŋuv, mabəziga bəziga adàw humà makoray aŋha ala, adà aŋha kərkər la sili gà. La abatà azà sili aŋha ala la magogotsay aŋa gudəŋ à vok

la abà gesina. ¹⁴ Kiya uwaga, mok uwana adakəđ tatak aŋha gesina kà, magol may adzəkà vok la gudəŋ uwatà la abà, ŋgaha adzəkà mawoy tatak, ama tatak la ahəŋ aw. ¹⁵ Masla ahàđ à mtəga dza anik aŋa gudəŋ uwatà la abà uwana aslèl à guf aŋha à abà kà manəŋla azlanamzi. ¹⁶ Masla kà ayàh kà bà mahən huđ aŋha ala, la azlamaholahola uwana azlanamzi tapadəy, ama dza la ahəŋ avàl aw. ¹⁷ Təh, awùlal à gəl lakəl aŋa madz à ahəŋ aŋha uwana uwarà, agòđ: ‘Azlaməna sləray aŋa baba gulo kà tatak may aduwa atà, ama gi kà, masla la uwanay gəmətsay kà may ma, kakay ma? ¹⁸ Lagwa kà, ŋuləm, gəda à mtəga baba gulo gədəgodal: Baba, kamkam gəđahà mawisiga à Zəzagəla à vok, ŋgaha à kak à vok bay. ¹⁹ Baba, lagwa kà, azlayla kà vok kà mazal gi ala bəzi aŋak aya aw! Ama lagwa kà, fà à gi à ahəŋ bokuba gi magamza aŋak!’ ²⁰ La abatà kà atsizlla ala, kà mad à mtəga baba aŋha.”

“Mok uwana aləg kərkər la gày aŋa baba aŋha kà, baba aŋha anəŋəŋ kà, atsa à waŋ. Ŋgaha vok ahamàl kaykay. Hadzak, asà à afik, atsəđal à ama, avàl kà, akəsà vok la marabay. ²¹ Bəzi uwaga agòđal: ‘Baba, kamkam gəđahà mawisiga à Zəzagəla à vok, ŋgaha à kak à vok. Lagwa kà, azlayla kà vok kà mazalgəla bəzi aŋak aya aw!’ ²² Ama baba agòđ à azlamagamza aŋha: ‘Katskats, sàwla dawara delga à waŋ, kaduwal à vok; fàwwal dzedà à ahàl, bəkàwwal kwimik à asik. ²³ Lagwa kəsàw vèlik magagseyga à waŋ, kakəđaw, məpəđ ŋgaha mərəb, ²⁴ kà uwana bəzi gulo uwana agà bokuba mamətsayga kà aganay, adawul à uda la sifa aya, azalà, ama adagay mabəzalga.’ Ŋgaha kiya uwaga tadzəkà marabay.”

²⁵ “Tekedika magol bəzi aŋha kà, agà la fəta. La mok uwana atsà à waŋ la fəta, uwana adagay nekwa la gày kà, atsənà talakway la azladəs la madəvaday gesina. ²⁶ Magol bəzi uwaga azàla magamza tekula, anəvalla gay ala: ‘Mana ma à uwaga adadzəka vok la mtəga gami ma?’ ²⁷ Kiya uwaga magamza agòđal: ‘Deda aŋak kà adawul à waŋ. Masla gà la uwaga, baba aŋak akəđ vèlik magagseyga uwatà, kà uwana awùlla à waŋ la wurwur.’ ²⁸ Nəŋ, adzəkà mapak ləv, ŋgaha akəs mad à gày aya aw. Kiya uwaga baba aŋha asà à uda, adəval kuđa kà mad à gày. ²⁹ Ama masla agòđ à baba aŋha: ‘Baba, mavay dəŋ à uwana gi la slaka aŋak, didi gədakweska mapəhay aŋak aw. Ama bà məzezak babay kà, kavà à gi aŋa marabla la azlamanalay gulo aw! ³⁰ Ama baŋa kà aŋa bəzi aŋak uwanay adadadas tatak aŋak ala la zlapay la tsəh, ŋgaha adawulla à waŋ kà, kakəđal vèlik uwana məgagsəŋ aya ma kà mana ma?’ ³¹ Ama baba agòđal: ‘Bəzi gulo, iyay, kak la ahəŋ koksikoksi la gi, gəsəl. Kasəl kà, dèwdèw tatak uwana gəkoray kà uwaga kà aŋak aw takay? ³² Ama lakana kà, akəsà vok kà, məvalàh à zagəla, la mahab madəvaday, kà uwana deda aŋak uwana agà bokuba mamətsayga kà, aganay adawula à uda la sifa aya, azalà ŋgaha adagay mabəzalga aya kà uwaga à uwana mərəbay!’ ”

16

Gay la gay la abà aŋa magamza kaskasga (Mata 25.14-30)

¹ Kiya uwaga Yesu agòđ à azlaməna matapla la slaka aŋha aya: “Dza galepi gà la ahəŋ uwana agà la magamza lakəl aŋa ləmana aŋha gesina. Ŋgaha azladza tasàhàla gay uwana à waŋ, magamza aŋha uwaga adahahəŋ la tatak aŋha. ² Məŋga aŋha azàlal, agòđal: ‘Mana ma à uwana gətsenəŋ lakəl aŋak ma? Iyay, tğw à gi godega aŋa sləray aŋak lagonay, kà uwana kadəgay magamza gulo aya aw!’ ³ Magamza adzugw la gel aŋha, agòđ: ‘Aga, məŋga gulo azəb gi à tatak aŋha lakəl ala ma, mana ma à uwana gəđəhəŋ lagwa zlà ma? Mapəs guf, ndzəđa gulo la ahəŋ aw. Matsatsàh tatak babay, ziruwi. ⁴ Iyay, təga, gəsəl uwana gədàđəhəŋ à mok uwana adàzəb gi à tatak aŋha lakəl ala. Azladza la ahəŋ à uwana tadàfa à gi à ahəŋ à mtəga aŋatà.’

⁵ Kiya uwaga azalàh azladza uwana goder anja mənğa anha agàhà à atà la vok tekula, tekula. Agòf à matera: ‘Nna à goder anja mənğa gulo, uwana agà kà la vok ma?’
⁶ ‘Amàl kuvu goŋgoŋ dzim’, agòfal. Magamza agòfal: ‘Wakità anja goder anjak kà, aganay, dzà madzay katskats, katsetser goŋgoŋ dzik zlo!’
⁷ Nğaha anavà dza anik aya: ‘Kak ma, nna aga kà la vok ma?’ ‘Nalkama nesesa dadərmokw zlo.’ Magamza agòfal: ‘Kak bay kà, aganay à wakità anja goder anjak: Tsetsèr dadərmokw ufad!’
⁸ Kiya uwaga mənğa anha, azləbà magamza kaskasga uwana adfahà uwaga gesina la demdem, kà uwana azladza anja gudəŋ à vok lakana taduwa à azladza anja ufaka la katskats la sləray anjatà la abà.”

⁹ Yesu azalàn à gəl, agòf à atà: “Kəsaw vok slawda la azlaləmana anja gudəŋ à vok uwanay, nğaha kà vuđ uwana kadàbəzaw à tatak aw kà, tadəkəs akul à slaka madz à ahəŋ, uwana adəv à gay aw.
¹⁰ Kà uwana dza uwana dziriga la azlabəza tatak la abà kà, masla kà dziriga la azlaməŋ tatak la abà babay. Nğaha dza uwana kaskas la azlabəza tatak la abà kà, masla kaskas la azlaməŋ tatak la abà bay.
¹¹ Tsa baŋa akul kagaw dziriga la tatak uwana la abà, tafà à akul à ahà la gudəŋ uwanay la vok aw, ma uwa à uwana adàfa à akul ləmana dziriga à ahà zlà ma uwa?
¹² Baŋa akul kagaw dziriga la ləmana anja azladza anik aw, ma uwa à uwana aslala vok mav à akul ləmana ankul uwa?”

¹³ “Kiya uwaga dza la ahəŋ atsəp azlaməŋga səla à huma à gay aw: Apəsew anik, nğaha akəs gay anja anik; awoy anik, nğaha akweska anik. Kiya uwaga babay zlà, kaslawwalla vok kà matsəp Zəzagəla à huma la sili aw.”

*Azlamapəhay anik anja Yesu
 (Mata 11.13; 5.31-32; Mark 10.11-12)*

¹⁴ Azla Farisəya tatsənà gay uwaga gesina, takədàsl à Yesu, kà uwana atà kà, azlaməna mawoy sili mənğa.
¹⁵ Kiya uwaga Yesu agòf à atà: “Akul kà: ‘Anu azladza dziriga’, kagodaw la huma anja azladza la madàh gasa. Ama Zəzagəla asəl madzugway ankul. Uwana azladza tanərəz bokuba tatak mənğa gà kà, la huma Zəzagəla, kà uwaga kà bokuba tatak deydayga pəra.”

¹⁶ “Azlaməna mapəh à atà gay à ahà la azlamapəhay anja Musa tapàh gay lakəl anja makoray Zəzagəla tsərəh à kaslà anja Yuhana masla madàh batem. Dagay la mok uwatà kà, kəla uwabeyuwi adàh gasa kà mad à makoray Zəzagəla à abà.
¹⁷ Zagəla la kutso kà adəv à gay la butu, à kà matəđla anja mapəhay njuvga la wakità Zəzagəla la abà.”

¹⁸ “Kəla dza uwana akudək mis anha, nğaha azəb anik kà adada à gəl gaw, nğaha dza uwana azəb mis uwana zil anha akudəkay babay kà, adada à gəl gaw suwan.”

Dza galepi atà la Lazar

¹⁹ “Dza galepi anik la ahəŋ, uwana atsakwàh à diri mativga à abà uwana tsakalay anjatà kà zlazladfa. Masla kà adzàhà à ahəŋ kà say la matsidəy la abà pəra.
²⁰ La abatà kà, masla kudfa anik la ahəŋ uwana sləm anha Lazar. Vok anha gesina kà bà amik amik tsatsabasla. Adzàhà à ahəŋ la slaka mahən à ahəŋ la gay gamagay anja galepi.
²¹ Asal mahən huđ anha ala la azlatatak may mapətsəh pətsəhga, uwana atəđ à ahəŋ la table anja galepi uwaga la afik, ama aslà aw. Nğaha aya kà, azlakəda tasàhà à wan kà mamətəđàh amik anha uwaga la abatà kà, azàhəŋ kaykay.
²² Masla kudfa uwatà aməts, nğaha azlamalika tasà à wan, tazəb masla, tadàlla à slaka Abəraham la zagəla. La lig la ahəŋ kà, galepi uwaga aməts suwan, talà, tatùw lela.
²³ Galepi uwaga kà asà nğərpa mənğa la mezewi. La matərabay anha la abà kà, anəŋà à zagəla kərkər kà, anəŋà Abəraham la Lazar la slələf anha lakəl.
²⁴ Nğaha masla adzəkà mazalahal la magođay: ‘Baba Abəraham, vok ahamà ka kà gi, sləl Lazar à wan, atəp gay gəl ahà anha à iyaw abà, kà matasgəla alàh gulo, kà uwana gəs nğərpa mənğa la gày

akàl uwanay la abà.’ ²⁵ Ama Abərahām agòfal: ‘Iyay bəzi gulo, dzùgw tsi, kazùw matsiday la mok uwana kalèg la sifa, ama Lazar kà asà ngərpa mənğa. Lagonay kà, adabəz à matsiday suwəŋ la abanay, ngaha kà kak, kadaβəf à matərəβay à abà. ²⁶ Ngaha aya kà, la tataka gami la abà la akul kà, magol afək zəŋzəŋga la ahəŋ; avahanula. Azladza uwana la slaka gami la abanay taslala vok aŋa mad à uda à slaka aŋkul aw, ngaha azlauwana la slaka aŋkul taslala vok aŋa mas à gay babay à slaka gami aw.’ ²⁷ Galepi agòf: ‘Kamkam, baba Abərahām, sləl Lazar à mtəga baba gulo, ²⁸ kà uwana azladedə gulo la ahəŋ zlo aya, kà masla aŋa mapəh à atà à vok à abà, kà atà aŋa mas à wəŋ à slaka uwanay gi la abà aw.’ ²⁹ Ama Abərahām agòfal: ‘Musa la azlaməna mapəh à atà gay à ahəl kà tapəh à atà. Say takəs gay aŋatà pəra!’ ³⁰ Galepi agòfal: ‘Awan, baba Abərahām, diga aw. Ama baŋa dza awul à uda la mamətsay, ahəd, la uwana tadəkəs gay aŋha, ngaha tadəpəh gay la ləv ala.’ ³¹ Kiya uwaga Abərahām agòfal: ‘Baŋa tatsəna gay aŋa Musa la azlaməna mapəh à atà gay à ahəl anik aw kà, amiyaka bə dza uwana awùlla à uda la mamətsay, adəday babay kà, tadətsən gay aŋha aw’ ”, kiya uwaga Yesu apəh à atà.

17

Tsakana

(Mata 18.6-7,21-22; Mark 9.42)

¹ Yesu agòf à azlaməna matapla la slaka aŋha: “Tatak uwana adədahla azladza à tsakana à abà la ahəŋ koksikoksi. Ama ngərpa adəgay la dza, uwana adəh uwaga. ² Nuləm tawadal dzəgla à kuda, taduw à dərəv à abà, à kà uwana adukw tekula aŋa azlabəza uwanay à tsakana à abà. ³ Dahəw haŋkəli lela!”

“Baŋa deda aŋak adəfaha tsakana kà, pəhal la tələmna; baŋa atuw lakəl aŋa tsakana aŋha kà, matsallaŋ ala. ⁴ Baŋa adəhà à ka tsakana à vok asik mədəf la mavakay la tsəh, pəra kəla madəh tsakana kà, atsa à wəŋ atuway lakəl aŋha kà, matsallaŋ ala gesina.”

Madiŋal gəl à vok

⁵ Azlaməna matapla tagòf à Sufəl: “Zànula madiŋal gəl à vok gami à gəl!” ⁶ Sufəl agòf à atà: “Agayŋa la madiŋal gəl à vok aŋkul à gay la ahəŋ bakət tsəhay hamadz kà, naka: “Bəfə vok ala la abanay, həd kadətsəβ vok à dərəv à abà!”, kagodaw à gudəv kà, naka uwaga kà apakakulla vok, kà uwana akul la madiŋal gəl à vok.”

Sləray aŋa magamza

⁷ “Uwa la tataka aŋkul la abà, à uwana magamza aŋha apəs guf baŋaw anəŋla azlatatak kà, la mok uwana adasa à wəŋ la fəta kà: ‘Sà à wəŋ katskats, kadza à tatak may à gəl’, agòfal uwa? ⁸ Awan, ama agòfal kà: ‘Dəh gi tatak may, bədfə lukut, kà mav à gi tatak may la tatak masay, la lig la ahəŋ kà pəra, kak kadədzəka mazuw tatak, la masay suwəŋ.’ ⁹ Kagodaw ma, ‘Kikay’, agòf à masla sləray uwana adəhəlla kiya uwanay kagodaw takay? Awan, uwaga kà sləray aŋha. ¹⁰ Akul babay kà kiya uwaga: Mok uwana kadəfahaw uwana tapəh à akul gesina kà, gòfəw kà: ‘Anu azlaməna sləray deydayga pəra’, gòfəw; ‘Mədəhəŋ kà uwana uwaga kà, agay kà sləray gami pəra’.”

Yesu awara azlaməna akəl zagəla ala kulo

¹¹ La mok uwana Yesu adà à Urusalima kà, aguwa la gay makwi aŋa Samariya atà la Galili. ¹² La kasla uwana masla azlədà à huđ gudəŋ anik à abà kà, azlaməna akəl zagəla kulo tagagam la masla. Tatsəzl à fəta à awtəy. ¹³ Ngaha tazə kuda à zagəla la mawiyay: “Yesu, mənğa, vok ahama ka kà anu!” ¹⁴ Masla anərəz atà, agòf à atà: “Dəw kadəpəhawla vok aŋkul à azlaməna mav tatak à Zəzagəla!” La mok uwana

atà la asik lakèl kà maday kà, tanèrèz vok aṇatà kà: Tawàrla. ✧ ¹⁵ Kiya uwaga tekula la tataka aṇatà la abà, uwana anèṇàṇ kà adawurla kà, awùl à slaka Yesu la mazlèb Zəzagəla la kuda zləkkà. ¹⁶ Atèḍf à makəla asik aṇha la magoḍfay: ‘Kikay’. Masla kà tekeḍika zil Samariya. ¹⁷ Kiya uwaga Yesu agòḍf à atà: “Azladza kulo tawàr ala aw takay? Atà la azlaladəga anik uwanay la? ¹⁸ Dza la ahəṇ adzùgw kà mawul à awtày kà mav kikay aw. Say mèlok dza uwanay pəra.” ¹⁹ Ngaha Yesu agòḍf à dza uwana awùl à waṇ: “Sà à afik, hàd aṇak; madiṇal gəl à vok aṇak adawur ka ala!”

*Mas à waṇ aṇa makoray Zəzagəla
(Mata 24.23-28,37-41)*

²⁰ Azla Farisəya tanavà Yesu: “Mbà makoray Zəzagəla adàsa à waṇ mi”, tagòḍal. Yesu agòḍf à atà: “Makoray Zəzagəla kà, atsa à waṇ la kiya uwanay aṇa manəṇəṇ la yewdi aw. ²¹ Ngaha dza aslala vok babay kà magoḍfay kà: ‘Aganay la abanay, baṇaw agatày la abatày’, tagoḍfay babay aw. Sèlàw kà, aganay la tataka aṇkul la abà à makoray Zəzagəla.”

²² Masla agòḍf à azlaməna matapla la slaka aṇha: “Azlamavakay anik tadàsa à waṇ à uwana kadəyahaw la iyaw tugwi kà manəṇ Kona aṇa dza bà à mavakay tekula, ama kadənəṇawwaṇ aya aw. ²³ Ngaha azladza tadəgoḍfah à akul Kristu kà ‘Aganay la abanay, baṇaw agatày la abatày.’ Kakəsaw gay aṇatà aw, kadaw la abatà aw! ²⁴ Kà uwana bokuba habaga uwana awutsəḍf à uda la ləv zagəla la abà, dagay la tsəh la ahəṇ tsərəh à gəl à agu kà, la kiya uwaga adəpaka vok la vuḍf mas à waṇ aṇa Kona aṇa dza babay. ²⁵ Ama kəla kà say asa ṇgərpa mənṅa dadən, ṇgaha kà say azladza aṇa zamana uwanay takweska masla aya dadən. ²⁶ Bokuba uwana apakàhà vok la zamana aṇa Nuhu kà, kiya uwaga à uwana adəpaka vok babay la mavakay aṇa Kona aṇa dza. ✧ ²⁷ La zamana uwatà azladza tazàw, tasàh, tazàḍ mis, tavàh azladəgam aṇatà à zil, tsərəh à mavakay uwana Nuhu adà à kəslah iyaw à agu. Ama atà kà, tadzùgw tatak anik ḍikidiki tsərəh à uwana mazlaha asà à waṇ azàhà atà ala aw. ✧ ²⁸ Apakà vok la zamana aṇa Lot bay kà kità: Tazàw, tasàh, tasàkwàh, tadəwàh ala, taslèkàh tatak, ṇgaha taṇjàlèh azlagày aṇatà. ²⁹ Ama la mavakay uwana Lot asà à uda la gudəṇ Sodom la abà kà, Zəzagəla aduw akàl à ahəṇ la zagəla uwana la abà, kadàh kà kadàh. Ngaha azaha azladza ala gesina. ✧ ³⁰ Adəpaka vok kalkal la uwaga la vuḍf mas à waṇ aṇa Kona aṇa dza babay.”

³¹ “Kiya uwaga babay la mavakay uwatà kà, dza uwana la gəl gày la afik kà, amiyaka kazlaṇa aṇha la kay kà, adàsa à ahəṇ kà mahəlay aw. Ngaha babay kà, dza uwana la guf la abà kà, adàwul à mtəga babay aw. ³² Dzùgwàw lakèl aṇa mis aṇa Lot tsi. ³³ Dza uwana ayàh matəf sifa aṇha kà, adàziṇ ala, ṇgaha dza uwana atùw sifa aṇha aw kà, adətəfəṇ uwaga. ³⁴ La dziriga gəpəh à akul: La vuḍf uwatà kà, azladza sèla la kəslah tekula la afik kà, tekula tadəzəbay, tekula tadəsakal. ³⁵ Azlamis sèla la vèl tekula la afik kà, tekula adəzəbay, tekula tadəsakal. ((³⁶ Aya kà, azlazil sèla la guf tekula la abà, tekula tadəzəbay, ṇgaha tekula tadəsakal.))” ³⁷ Kiya uwaga azlaməna matapla la slaka aṇha tanəv: “Sufəl, uwaga ma adəpaka vok ma lala?” Masla agòḍf à atà: “La slaka uwana tatak mamatsayga la ahəṇ la uwana azlakwatsamu taham gay à vok la abatà.”

18

Gay la gay la abà aṇa mis kuḍa atà la masla maḍàh seriya

¹ La lig la ahəṇ Yesu apəh à atà gay la gay la abà kà aṇa mapəhatàla kà masak à madəv kuḍa la tsəh ala la ahəṇ la maruw vok à ahəṇ aw. ² “Masla seriya la ahəṇ la

✧ 17:14 17.14 3Musa 14.1-32 ✧ 17:26 17.26 1Musa 6.5-8 ✧ 17:27 17.27 1Musa 7.6-24 ✧ 17:29 17.29 1Musa 18.20-19.25

gudəŋ anik ahoy guba aŋa Zəzagəla aw, ŋgaha akəs gay aŋa dza babay aw. ³ La gudəŋ uwatà la abà babay kà, mis kudfa anik la ahəŋ, asàh à waŋ à slaka aŋha la magodfal: ‘Dàh à gi seriya la masla məzam gulo.’ ⁴ Asik dəŋ masla seriya akwesàhal à gəl, ama la lig la ahəŋ adzùgw la gəl aŋha: ‘La dziriga kà, guba az à gi kà aŋa Zəzagəla aw, gəkəs gay aŋa azladza aw. ⁵ Ama lagwa kà, mis kudfa uwanay atərəb gi ayigəla kà, gəfàhla seriya aŋha ŋgaha masla aŋa masàh à waŋ aŋa mawis à gi gəl à vok aya aw.’ ” ⁶ Kiya uwaga Sufəl Yesu agòd: “Tsənàw uwana masla seriya mawisiga uwanay agòd tsi. ⁷ Kətà zlà ma, Zəzagəla kà adàfah dziriga à azlauwana atsatsàmànì atà aw, kagòdaw takay? Adàfah dziriga à azlauwana tanàval tatak mavakay la mahəŋay gesina. ŋgaha vok ahamàl kà atà babay aya. ⁸ Bà la dziri gəpəh à akul kà, adàfah à atà dziriga la katskats. Tekedfik ma, baŋa Kona aŋa dza adàsa à waŋ ma, adàböz à madinjal gəl à vok à gəl la vəfah takay?”

Gay la gay la abà aŋa

zil Farisəya ŋgaha la masla mazəb hadama

⁹ Uwana Yesu apəh gay la gay la abà uwanay kà, kà aŋa azladza anik, uwana tapakà gəl aŋatà ala kà: ‘Anu azladza dziriga la huma Zəzagəla’, tagòd, tapəsəw azladza anik. ¹⁰ “Azladza sèla tatsizilla kà mad madəv kudfa la məŋ gày Zəzagəla la aku. Anik zil Farisəya, anik uwanay masla mazəb hadama. ¹¹ Zil Farisəya atsizilla ala, adəv kudfa la kiya uwanay: ‘Sufəl Zəzagəla, kikay gəgod à ka, kà uwana gi kà, gi kiya azladza anik aw. Kà uwana atà kà: Azlaməna gəl, azlamawisiga, azlamabila! Zəzagəla, kikay gəgod à ka, kà uwana gi kà kiya masla mazəb hadama uwanay aw! ¹² ŋgaha aya kà, asik sèla gəkəs nəlay la kasukwa la tsəh, kəla tatak gulo uwana gəbəzal kà, gəvəhay tekula la gay aŋa makulo gesina.’ ¹³ Ama masla mazəb hadama atsizilla à fəta à awtày, aslà kà madzək yewdi à zagəla aw, ama atatàslla gay ləv: ‘Sufel Zəzagəla gulo, vok ahama ka kà gi, à gi uwana gi masla tsakana!’ ¹⁴ Gəpəh à akul la dziriga kà, masla la uwana adà à mtəga la ləv sətakaga, à kà dza anik uwanay. Kà uwana kəla uwabeyuwi uwana azigəŋ gəl aŋha kà tawulla à lig, ŋgaha kəla dza uwana awulla gəl aŋha à vəfah kà, Zəzagəla adàdalla à huma.”

Azladza tasàhla azlabəza à slaka Yesu (Mata 19.13-15; Mark 10.13-16)

¹⁵ Azladza tasàhla azlabəza à Yesu à waŋ, kà masla aŋa mapis à atà gay à vok, ŋgaha azlaməna matapla la slaka aŋha taslàh atà məl à gəl. ¹⁶ Ama Yesu azàla atà la magodfay: “Sàkàw azlabəza tasa à waŋ à slaka gulo, kavəraw atà ay aw, kà uwana makoray Zəzagəla kà aŋa azlatsəhay azlauwaga! ¹⁷ La dziriga gəpəh à akul: Kəla uwabeyuwi uwana akəs makoray aŋa Zəzagəla bokuba azlabəza uwanay aw kà, adàda à makoray Zəzagəla dikidiki aw!”

Kohana galepi gà

(Mata 19.16-30; Mark 10.17-31)

¹⁸ Masiga anik aŋa azla Yahudiya anavà Yesu la magodfal: “Məŋga, kak delga, mana à delga gədehəŋ, kà gi aŋa mabəzal sifa adəv à gay aw ma?” ¹⁹ Yesu agòd: “Kà mana ‘Kak delga’, kagòd à gi ma? Dza delga la ahəŋ aw, say Zəzagəla kokudfa gəl aŋha pəra delga. ²⁰ Kasəl mapəhay uwana la wakitə Zəzagəla la abà ay? Kada gəl gaw aw, kakəđ dza aw, kada à gəl aw, kadfahà fida lakəl aŋa dza anik aw, ŋgaha zləkàw baba aŋak la iyà aŋak!”[☆] ²¹ Kohana agòd: “Uwaga kà, dagay la bəziga la uwana gekəs uwaga gesina.” ²² Uwana Yesu adatsən uwaga kà, agòd: “Lagwa kà, tatak tekula atəm à ka kà à ahəŋ! Kəla tatak gesina uwana kakoray kà: Dàw ala, vəh à azlaməna kudfa à uda gesina, ŋgaha sà à waŋ, kanəfa à gi, kadàböz ləmana

☆ 18:20 18.20 2Musa 20.12-16; 5Musa 5.16-20

la zagəla!”²³ Ama mok uwana kohana atsən uwaga gesina kà, aməts à ahəŋ la adi, kà uwana galepi.²⁴ Uwana Yesu anəŋəŋ kà, adapak ləv kà, agòd: “Haday gà, kà zlazladfa kà dza galepi aŋa mad à makoray Zəzagəla.”²⁵ Njuləm zlugumi aguwa à uda la afik lepiri, kà dza galepi aŋa mad à makoray Zəzagəla.”²⁶ Kiya uwaga azlauwana tatsəbal sləm kà, tadzəkà magodəy: “Tsa aŋa kità ma, uwa à uwana aslala vok aŋa mabəlay zlà ma uwa?”²⁷ Yesu agòd: “La slaka azladza kà zlazladfa, ama la slaka Zəzagəla kà zlazladfa aw.”²⁸ Kiya uwaga Piyer agòd: “Tsənəŋ anu kà, mədasək tatak uwana à ahəŋ məkor gesina, kà manəf ka.”²⁹ Yesu agòd à atà: “Gəpəh à akul la dziriga kà, baŋa dza asək gəy aŋha à ahəŋ, à mis aŋha à ahəŋ, à azladedə aŋha ahəŋ, à azlababa aŋha à ahəŋ, à azlabəza aŋha à ahəŋ kà makoray Zəzagəla kà,³⁰ dagay lakana la zamana uwanay adəbəz tatak aŋuvaw, ŋgaha la huma la gay aya kà, adəbəz sifa adəv gay aw aya!”

Yesu awulla gay aŋa mamətsay aŋha à tsəh

la mawul à uda aŋha kà maməkər

(Mata 20.17-19; Mark 10.32-34)

³¹ Yesu ahəl azlaməna matapla kulo gəl aŋha səla uwatà à tsəh, ŋgaha agòd à atà: “Tsənəwwəŋ, aganay mədàda à Urusalima, kà uwana la abatà la uwana tatak uwana azlaməna mapəh à atà gay à ahəl aŋa mapəh à azladza tatsətsər adəgəd à afik, lakəl aŋa Kona aŋa dza.”³² Tadəkəs masla, tadəvə à ahəl aŋa azladza uwana azla Yahudiya aw, atà tadəkədəslal, tadətsakal magodəfahay à gəl la matafal sleslib à vok.³³ Tadəzlabay la kurpi, tadəkəfay. ŋgaha la mahəŋay maməkər kà, adəwul à uda la mamətsay.”³⁴ Ama azlaməna matapla tatsənə godega aŋha aw, kà uwana godega aŋa gay uwatà kà, ahədətəŋ à adi, tasəl uwana Yesu apəh aw.

Yesu awura guləf ala

(Mata 20.29-34; Mark 10.46-52)

³⁵ Uwana Yesu azləbəz gudəŋ Yeriko kà, guləf anik madza madzay gə la gay tetəvi, atsatsəh tatak la abatà.³⁶ Mok uwana atsənə dərəkəruk aŋa maham à ahəŋ dza uwana tadà à awtəy kà, katskats masla adzəkà manavay la magodəy: “Uwaga ma, mana ma aguwa ma?”³⁷ Azladza tagòd: “Yesu, zil Nazaret la uwana ada à awtəy kiya uwaga la maham à ahəŋ dza la tsəh.”³⁸ Kiya uwaga adzəkà mawiyay la magodəy: “Yesu, Yesu, Kona aŋa David, vok ahama ka kà gi.”³⁹ Ama azladza uwana taguwà à huma tasləhal məl à gəl, “Dzà à ahəŋ titi!”, tagòd, ama azà kuda à zagəla la mawiyay aya: “Kona aŋa David vok ahama ka kà gi, gəgòd à ka!”⁴⁰ Kiya uwaga Yesu atsizilla à ahəŋ, “Səwgəla à waŋ!”, agòd à atà. Mok uwana tadəlla guləf à slaka aŋha, anavə guləf la gay ala:⁴¹ “Mana asa à ka, kà gəfahəŋ ma?”, Yesu agòd. “Məŋga, asa à gi kà gənəŋla la yewdi gulo”, guləf awuləlla.⁴² La abatà: “Nəŋ ala, madiŋal gəl à vok aŋak adawur ka ala!”⁴³ Kiya uwaga, ufak, anəŋla la kirim yewdi, ŋgaha anəfə Yesu la tsəh la mazləb Zəzagəla. Mok uwana maham à ahəŋ dza anəŋə uwaga kà, gesina aŋatà tazləbà Zəzagəla.

19

Yesu atà la Zase

¹ Mok uwana Yesu adada à gudəŋ Yeriko kà, aguwa à uda la huɸ gudəŋ la abà.² Dza anik la ahəŋ, uwana sləm aŋha Zase la abatà, masla kà məŋga aŋa azlaməna mazəb hadama, ŋgaha galepi aya,³ ayəh manəŋ Yesu. “Uwa à Yesu uwatà uwi?”, agòd, ama aslə aw, kà uwana maham à ahəŋ dza kà aŋuvaw, ŋgaha babay kà azigən aw, agòd à ahəŋ desl.⁴ Ahəd à huma à gay la mahoyay, ahəd à gudəv à afik, ŋgaha kà masla aŋa manəŋ Yesu, uwana aguwa à awtəy la tetəvi uwatà.⁵ ŋgaha mok

uwana Yesu adabèz à tsəh aŋha kà, anəŋ à afik, agòfal: “Zase, sà à vədah katskats, kà uwana lakana kà, say gəda à mtəga aŋak!” ⁶ Katskats asà à vədah, akəs Yesu la ahàl səla, kà mad à mtəga aŋha. ⁷ Uwana azladza gesina tanəŋà masla kà, taŋəŋùz à tsəh ala, tagòf: “Kakay ada mahən à mtəga masla tsakana ma?” ⁸ Zase asà à afik la huma aŋa Sufəl, agòfal: “Sufəl, tenma aŋa ləmana gulo kà, gəvəh à azlaməna kudə à uda gesina. Ngaha aya, baŋa gəfahà mawisiga à dza à vok la mahəl sili aŋha la kaskas kà, gəvəlla à iyaw à tsəh asik makər, ngaha aŋa magay maufad la iyà aŋa sili aŋha!” ⁹ Yesu agòfal: “Lakana kà maβəlay adasa à hud gəy uwanay, kà uwana masla babay kà mayyi à tsəh ala aŋa Abəraham, ndzer. ¹⁰ Kà uwana Kona aŋa dza asà à waŋ kà mayhə maβəl azlauwana tazəhla.”

*Gay la gay la abà aŋa gursu aŋa luwəluwə
(Mata 25.14-30)*

¹¹ Yesu ahəd à huma à gay la mapəhatəla gay la gay la abà à azladza uwana tatsənə paŋaw aŋha. Bokuba uwana atə nekwa la Urusalima kà tagòf kà: ‘Makoray Zəzagəla kà apəhla vok ala la katskats la dazuwaya’, gəl aŋatə agòf. Kiya uwaga Yesu apəh à atə gay la gay la abà anik. ¹² Aganay à uwana apəh: “Gadamula anik, uwana la hud gəy mənğa, ahəd à gudəŋ anik kərəkər kà mazuw sufəl la abatə, kà masla mawul à mtəga la lig la ahəŋ. ¹³ Uwana adəy kà, azəlləh azlamagamza aŋha kulo dadəŋ, avəhà à atə gursu aŋa luwəluwə tekula tekula, agòf à atə: ‘Tsakəlləw la sili uwanay, tsərəh à mok uwana gədəwul à waŋ.’ ¹⁴ Ama azlaməna gudəŋ aŋha tapəsəw masla, tasləl gay kà magodəy kà: ‘Asa à anu dza uwanay aŋa magay sufəl lakəl gami aw’, tagòf. ¹⁵ Mok uwana adazuw sufəl kà, awul à waŋ à gudəŋ aŋha à abà. Ngaha azəlləh azlamagamza aŋha uwana avəhà à atə gursu aŋa luwəluwə kà aŋa matsakalla, asəl manərəz uwana tabəzalla à adi. ¹⁶ Kiya uwaga matera adə à awtəy la magodəy: ‘Sufəl, sili aŋak kà ayyà à tsəh sili kulo.’ ¹⁷ Sufəl agòfal: ‘Delga, kak magamza delga, bokuba uwana kagə dziriga la bəzi tatak la abà kà, gəf ka à ahəŋ lawan aŋa gudəŋ kulo.’ ¹⁸ Kiya uwaga masəla asà à waŋ: ‘Sufəl, sili uwana kavə à gi kà, gəbəzalla à adi zlo aya’. ¹⁹ Sufəl agòf à masla babay: ‘Kak babay, kak lawan aŋa gudəŋ zlo.’ ²⁰ Magamza anik asà à waŋ aya, agòf: ‘Sufəl, aganay sili aŋak, gəfafad à makatsekatsa à abà, gəhadəŋ à ahəŋ. ²¹ Guba akəs gi kà kak, kà uwana kak dza dzaŋdzaŋga. Kà uwana tatak uwana kak kafə à ahəŋ aw babay kà, kazəbay, ngaha bə tatak uwana kak kasləka aw babay kà, katsəfəy.’ ²² Sufəl agòfal: ‘Kak magamza maksafərga. Paŋaw aŋak uwana kapəh, la uwana adəhà à ka seriya à gəl. Iyay, kasəl kà gi dza dzaŋdzaŋga, ngaha gəzəb tatak uwana gəfə à ahəŋ aw, kagòf. Gətsəf tatak uwana gəsləkə aya bay aw, kagòf.’ ²³ Ngaha sufəl agòfal: ‘Kà mana kafə sili gulo à gəy makal goder, naka mok uwana gədəwul à waŋ kà, naka gəday, gəhəl sili la iyaw la tsəh la abatə aw ma?’ ²⁴ Ngaha sufəl agòf à azladza uwana la slaka aŋha: ‘Zəbəwwal gursu tekula uwaga la ahəl ala, vəwla à dza uwana à vok akor sili kulo!’ ((²⁵ Atə tagòf: ‘Sufəl, masla kà sili kà kulo la ahəl ŋuwə!’)) ²⁶ ‘La dziriga’, gəpəh à akul: ‘Dza uwana akoray kà, tadəvəlla à vok. Ama dza uwana akoray aw kà, bə bəziga uwatə aga la ahəl kà, tadədəvəlla à ahəl ala aya! ²⁷ Ama azlaməna məzam gulo uwana la abanay, asà à atə kà gəkor atə aw kà, səwla atə à abanay à huma gulo, kədəw atə la yewdi gulo’, sufəl agòf à azlamagamza aŋha”, kiya uwanay Yesu apəh.

*Yesu ada à hud Urusalima à abà
(Mata 21.1-11; Mark 11.1-11; Yuhana 12.12-19)*

²⁸ La mok uwana adapəh gay uwaga, Yesu adə à huma aŋa maham à ahəŋ dza kà mad à Urusalima. ²⁹ Mok uwana tazləbèz à Betfaze atə la Betaniya, nekwa la gudəŋ uwana gudəŋ kuvu tagòfal kà, asləl azlaməna matapla səla la slaka aŋha la huma, agòf à atə: ³⁰ “Dəw à gudəŋ uwaga à abà la huma aŋkul. Baŋa kadəbəzaw

kà, kadànéhəw bəzi ziwŋŋu mawadəŋ à ahəŋ gə, uwana dza adadza à afik didi aw. Dapəlləw, kadàsawla à wəŋ à abanay. ³¹ Baŋa: ‘Kà mana kapəllaw mi’, dza agod à akul kà, ‘Sufəl gami awoyəŋ’, gòdàwwal!’ ³² Uwana azlaməna masləlay taday kà, tanəŋà tatak gesina apakà vok bokuba uwana Sufəl apəh à atà. ³³ Mok uwana tapəl bəzi ziwŋŋu uwaga kà: “Kà mana kapəllaw bəzi ziwŋŋu uwaga mi?”, ³⁴ azladza aŋha tagòd à atà, “Sufəl awoyəŋ”, tagòd. ³⁵ Ŋgaha tasəlla bəzi ziwŋŋu uwaga à slaka Yesu, atà tadəwal azlalukut aŋatà à lig, tadzà Yesu à afik. ³⁶ Mok uwana adadzəka maday, azladza tadəw azlalukut aŋatà à tetəvi à ama. ³⁷ La mok uwana tazləbəzay à Urusalima, kà mad à ahəŋ la gudəŋ kuvu la afik kà, azlaməna matapla tahən ala la marabay gesina aŋatà, ŋgaha tazləbà Zəzagəla la kuda zləkkà, kà azlatatak nadzipoga uwana tanaŋəŋ gesina. ³⁸ Azla dza tagòd: “Delga kà Zəzagəla apis gay à Sufəl uwana à vok, atsa à wəŋ la sləm aŋa Sufəl Zəzagəla! Lapiya la zagəla, ŋgaha mazləbay agay la Zəzagəla uwana la zagəla la afik.”[✧] ³⁹ Ŋgaha azla Farisəya anik uwana la tataka maham à ahəŋ dza la abà tagòd à Yesu: “Məŋga, ‘Dzàw à ahəŋ titi’, gòd à azlaməna matapla la slaka aŋak!” ⁴⁰ Ama Yesu agòd à atà: “Baŋa: ‘Dzà à ahəŋ titi’, gəgod à atà babay kà, bə azlaakur babay kà tadzəka mawiyay babay!”

Yesu atuw lakəl aŋa Urusalima

⁴¹ Mok uwana Yesu azləbəz à huɖ gudəŋ kà, adzəkà matuway à uwana adanəŋəŋ ⁴² la magodəy: “Agayŋa kak la gəl aŋak kasəl tatak uwana agay lapiya kà aŋak kà, naka kità aw. Ama lagonay kà adadza à ahəŋ kà bokuba nasiriga la huma yewdi aŋak. ⁴³ Kà uwana azlamavakay anik tadəsa, à wəŋ à uwana azlaməna məzam aŋak tadəkəs à ka gay adi la kazlaŋa guvəl la ahəl, tadətsak à ka à ama tadətsah kà makalla gesina. ⁴⁴ Tadəzakala tetuwa kak la azləbəza aŋak, amiyaka bə akur tekula babay kà adəgəɖ à gəl aŋa anik aw, kà uwana awul à ka à gəl à mavakay uwana Zəzagəla asa à wəŋ aŋa mazlak ka aw.”

Yesu la məŋ gəy Zəzagəla la aku

(Mata 21.12-17; Mark 11.15-19; Yuhana 2.13-22)

⁴⁵ Mok uwana Yesu adada à məŋ gəy Zəzagəla à agu kà, adzəkà makudəkəh azlaməna matsakalay à lag la aku. ⁴⁶ Agòd à atà: “Aganay à uwana tatsetsèr à wakità Zəzagəla à abà:

‘Gəy gulo kà adagay kà gəy madəv kuɖa, ama akul kà kadapakawwəŋla kà tsakur aŋa azlaməna gəl.’[✧]

⁴⁷ Yesu atapəhla tatak à azladza la məŋ gəy Zəzagəla la aku koksikoksi. Azlamadzahaga aŋa azlaməna mav tatak à Zəzagəla, la azlaməna mapəhla mapəhay à azladza, ŋgaha la azladza uwana masəl à atà gə, la gudəŋ uwatà la abà, tayəh makəs Yesu, kà makəɖay. ⁴⁸ Ama taslə kà madəh dabaray uwana asà à atà madəhəŋ aw, kà uwana azladza gesina kà, tafə sləm kà à masla la matsəbal sləm pəra.

20

Ndzəɖa aŋa Yesu ma aguwa à wəŋ ma ala la

(Mata 21.23-27; Mark 11.27-33)

¹ La vərđi anik Yesu atəpla tatak à azladza la məŋ gəy Zəzagəla la aku, ŋgaha apəh à atà gay matsidəyga. Azlamadzahaga aŋa azlaməna mav tatak à Zəzagəla, la azlaməna mapəhla mapəhay ala, la azlamasiga aŋa azla Yahudiya ² tasà à wəŋ à slaka aŋha tagòdɖal: “Pəhanula, la ndzəɖa ma uwala à uwana kadəhla azlatatak uwanay tak la? Uwa à uwana avà à ka tetəvi aŋa madəh azlatatak uwanay uwa?”

³ Yesu agòd à atà: “Gi babay kà, gənav à akul tatak tekula lagwa, wùlləwəgəla suwəŋ!

⁴ Uwa à uwana aslèl Yuhana à waŋ kà maɗàh batem tak uwa? Zəzagəla ay, awma azladza takay?" ⁵ Ama atà tadzəkà mabay vok gay la tataka aŋatà la abà kà atà à atà, ŋgaha tagòɗ: "Baŋa məgod Zəzagəla la uwana aslèl à waŋ, 'Kà mana zlà ma kadiŋàwwal gəl à vok aw mi', adàgodɗay. ⁶ Baŋa məgod: 'Azladza la uwana taslèl à waŋ kà', maham à ahəŋ dza uwana la abanay gesina tadàtsah anu à gəl la akur aya, kà uwana tasəl kà Yuhana kà masla mapəhal gay à ahəl aŋa Zəzagəla kà mapàh à azladza ndzer." ⁷ ŋgaha tawulàlla: "Anu kà, məsəl dza uwana aslèl à waŋ aŋa maɗàh batem aw." ⁸ La abatà Yesu agòɗ à atà: "Kətà kà, gi babay kà, gəpəhakulla ndzəɗa uwana gəɗàhla azlatatak uwanay babay zlà à ama aw."

*Gay la gay la abà aŋa azlamagamza maksafər gà
(Mata 21.33-46; Mark 12.1-12)*

⁹ Kiya uwaga Yesu adzəkà mapəh gay la gay la abà uwanay à maham à ahəŋ dza: "Dza anik atsəb gày matavəruk aŋha, asàkla uwaga la azlamagamza aŋha la ahəl, ŋgaha adà aŋha kərkər à gudəŋ anik, asàf la abatà.* ¹⁰ Mok uwana adasal kà, aslèl dza aŋha à azlamagamza à tsəh, kà mavəl humà mahəŋay aŋa tatak guf aŋha. Ama mok uwana azlamagamza tanəŋəŋ kà, tazlàbal, ŋgaha takudək la ahəl deyday. ¹¹ Bə gotənaŋ aslèl dza anik aya. Ama atà tazlàb à gəl, ŋgaha tatsəkəla magodəhay à gəl, la makudəkay la ahəl deyday babay. ¹² Aslèl dza anik kà mamakər aya. Ama tatsàh, tadàhal amik à vok, ŋgaha taməl à tetəvi à tsəh. ¹³ Dza aŋa guf matavəruk agòɗ: 'Mana à uwana gədehəŋ lagwa zlà ma?', agòɗ la gəl aŋha, 'Gəsləlla à atà bəzi gay ləv gulo, zlahaw kà, tadàsləkaw masla.' ¹⁴ Ama mok uwana tanəŋà masla, azlamagamza tatsatsəl vok gay kà atà à atà, tagòɗ: 'Masla la uwana masla mazuw gày, sàw à waŋ katskats, məkəɗ pəra, anu mədàbəɗ à mazuw gày à gəl!' ¹⁵ Tadùw à uda la guf la abà, takəd."

"Ama kakay dza aŋa guf matavəruk adàɗahatəŋ à vok ma? ¹⁶ Adàsa à waŋ adàkad azlamagamza maksafərga uwaga gesina, ŋgaha adàvə guf à ahəl aŋa azladza anik uwana tadàvəhal mahəŋay aŋa matavəruk la kaslà uwana asal gesina." Ama mok uwana tatsənà uwaga tagòɗ: "Kiya uwaga apakà vok aw!" ¹⁷ Ama Yesu anəɗəz atà la magodəy: "Uwanay tatsetsər, ma mana asal mapəhla ala tak ma? 'Akur uwana azlaməna maŋal gày tapəsəw kà,

Masla la uwana adagay akur mawad gày gesina.'*

¹⁸ Kəla dza uwana atəɗ à akur uwanay à afik kà adàkalahla. Ama baŋa akur uwanay la uwana atəɗ à dza à gəl kà, aslèrəɗəŋ ala kədəŋna."

¹⁹ Azlaməna mapəhla mapəhay ala la azlamadzahaga aŋa azlaməna mav tatak à Zəzagəla tayàh kà makəs Yesu la kaslà uwatà. Ama guba akəs atà kà maham à ahəŋ dza, kà uwana tasəl kà apəh gay la gay la abà uwaga kà lakəl aŋatà.

*Mapəl hadama à məŋ sufəl aŋa azla Rom
(Mata 22.15-22; Mark 12.13-17)*

²⁰ Kiya uwaga kà mabəz à Yesu à tsəh kà, azlaməŋga taslèl azlaməna matsəb sləm, uwana tapakà gəl aŋatà ala kà bokuba azladza dziriga, awkà bokuba azlaməna matsəb sləm pəra aw, kà mabəzal à tsəh la gay mawisiga uwana la abà, atsà à waŋ la gay aŋha la awtəy amiyaka tekula, ŋgaha kà atà aŋa mav masla à ahəl aŋa azlaməna makoray. ²¹ Kiya uwaga tanəval à gay ala la magodəy: "Məŋga, məsəl kà uwana kapəhay, la uwana katapla à azladza, kà dziriga, ŋgaha babay kà kakəsani dza makasay aw, ama la dziriga, la tetəvi aŋa Zəzagəla à uwana katapla à azladza. ²² Anu ma tetəvi la ahəŋ, kà mapəl hadama gami à məŋ sufəl Zəsar ay, awma mapəhay gami avà à anu tetəvi aw kəlay?" ²³ Bokuba uwana Yesu asəl demdem aŋatà kà, agòɗ à atà: ²⁴ "Pəhàwgəla akur sili uwatà dadəŋ tsi", agòɗ à atà. "Gəl la sləm uwanay ma

aṅa uwa, la sili uwanay la afik uwa?”, agòd à atà. Tagòdal: “Aṅa Zəsar.” ²⁵ Kiya uwaga Yesu agòd à atà: “Kità kà, pèlāw à mənə sufəl Zəsar tatak uwana aṅha, ṅgaha pèlāw à Zəzagəla uwana aṅha suwaṅ!” ²⁶ Kiya uwaga kà, tabəz à gay à tsəh kà makəsla masla aw, kà uwana gay aṅha uwana apəh la huma maham à ahəṅ dza kà mawisiga la abà aw, ləv avəl atà à gay kà mawulla gay à uda aṅha, tadzà à ahəṅ titi.

Manavay lakəl aṅa mawul à uda la mamətsay
(Mata 22.23-33; Mark 12.35-37)

²⁷ Kiya uwaga azladza anik la tataka azla Sadukiya la abà, atà uwana: ‘Mawul à uda la mamətsay la ahəṅ aw’, tagòd, tasà à waṅ à slaka Yesu kà manaval: ²⁸ “Məṅga, aganay uwana Musa apəh: Baṅa dza aməts à mis ala kokudā mabəz bəzi kà, say deda aṅha azəb mis aṅha à uda la gày kudā, ṅgaha atsizilla ala tsəhay aṅha ala.” ²⁹ Azladza la ahəṅ atà mədəf la azladeda aṅatà. Magolga gə azəb mis, amətsal akəlla ala kokudā mabəz bəzi. ³⁰ Deda masəla ṅgaha mamakər tazəb mis uwaga à uda la gày kudā. ³¹ Kiya uwaga tazəb tsərəh à mədəf nna gesina. Gesina aṅatà tamətsaləṅ ala kokudā mabəz bəzi la mis uwaga. ³² Uwana uwaga adada à lig kà, mis aməts bay suwaṅ. ³³ ṅgaha ma la vuḍ mawul à uda la mamətsay, ma mis ma adəgəday ma à uwa, tsa atà gesina aṅatà kà tazəb uwa?”

³⁴ ṅgaha Yesu agòd à atà: “Azladza aṅa zamana uwanay la uwana tazəb vok. ³⁵ Ama azlauwana Zəzagəla adətsatsamani atà kà mabəz à sifa adəv gay aw, tadəwul à uda aṅa madz à ahəṅ la sifa uwana adədəv gay aw kà, atà kà, tadəzəb vok aya aw. ³⁶ Kà uwana la dziriga gə kà, tadəmətsay aya aw, tadəpakahay kà bokuba azlamalika, ṅgaha tadəgəhay azlabəza aṅa Zəzagəla, à kà uwana tawul à uda la mamətsay kà madz à ahəṅ la sifa. ³⁷ Iyay, lakəl aṅa mawul à uda la mamətsay kà, Musa apəh lakəl aṅha la wakità la abà la paraka: ‘Sufəl Zəzagəla gulo, Zəzagəla aṅa Abəraham, Zəzagəla aṅa Isak, ṅgaha Zəzagəla aṅa Yakuba bay.’”

³⁸ Zəzagəla kà Zəzagəla aṅa azlamazimnekid aw, ama aṅa azladza uwana la sifa, kà uwana tatak gesina uwana la sifa kà aṅha.” ³⁹ La kità kà, uwana tatsən uwaga kà, azlaməna mapəhla wakità aṅa mapəhay ala tagòd: “Məṅga, uwaga kà lela kapəh.” ⁴⁰ Kà uwana taslā manaval gay aya aw.

Kristu atà la David
(Mata 22.41-46; Mark 12.35-37)

⁴¹ Yesu agòd à atà: “Kakay tagòday kà Kristu kà Kona aṅa David ma? ⁴² Kà uwana David la gəl aṅha kà agòd à wakità aṅa Mahabay la abà kà: ‘Sufəl Zəzagəla agòd à Sufəl gulo:

Dzà madzay la ahəl kaf gulo lakəl

⁴³ tsərəh à uwana gəbək à ka azlaməna məzam aṅak à tsəh asik!’”

⁴⁴ Tsa baṅa David la gəl aṅha kà azəlalla Sufəl ma, kakay apək kona aṅha ma?”

“Dahəw haṅkəli kà azla Farisəya la azlaməna mapəhla wakità

mapəhay ala”, Yesu agod
(Mata 23.1-36; Mark 12.38-40)

⁴⁵ Mok uwana maham à ahəṅ dza atsəbal sləm kà, Yesu agòd à azlaməna matapla la slaka aṅha: ⁴⁶ “Dahəw haṅkəli kà azlaməna mapəhla wakità mapəhay ala kà uwana atà kà, asa à atà mauguzahay la azladawara məṅga məṅga gə la vok, kà mapapatla dza. ṅgaha asa à atà kà azladza tasukw atà kà la azlabarama uwana la ama mahamay dza la abatà, asa à atà madza madzay kà la slaka teraṅa la gày madəv kudā la aku, ṅgaha aya asa à atà madza madzay kà la slaka delga la tatak may lakəl. ⁴⁷ Atà kà,

azlaməna mazaw azlamis kufə à uda aya, ngaha asà à atà mavakàh à madəv kufə à abà la slaka madəv kufə. Atà kà tadàbəzal seriya kà dzanđzanđa.”

21

*Mav tatak à Zəzagəla aña mis kufə
(Mark 12.41-44)*

¹ Yesu anəŋ à slələf à gəl kà, anəŋà azlagalepi uwana tawàts sili à sahar aña ofərand à abà la mənə gày Zəzagəla la aku. ² La abatà bay kà anəŋà mis kufə kufəga uwana awits kalamay səla à abà la abatà la ləv tekula. ³ Yesu agòđ: “La dziriga, gəpəh à akul kà, mis kufə uwanay kà avà kà aduwa azladza anik uwanay gesina. ⁴ Azladza uwanay tavà kiya uwanay kà, kà uwana adabaday la slaka aŋatà, ama mis kufə uwanay kà, azəb à uda kà uwana agà la ahəl aña madzadzarla gəl aŋha gesina.”

*Yesu apəh gay makal mənə gày Zəzagəla à ahəŋ
(Mata 24.1-2; Mark 13.1-2)*

⁵ Azladza anik tapəh lakəl aña mənə gày Zəzagəla kà ahəđ. ‘Madahala vok à uda gə, la azlaakur delga delga gə’, tagòđ, ‘Ngaha la azlatatak anik anik uwana tavàh à Zəzagəla.’ Yesu agòđ à atà: ⁶ “Mavakay adàsa à waŋ, kà azlaakur uwanay adàdza à ahəŋ kiya uwanay aw, amiyaka bà akur tekula adəgəđal à gay aw, tadəbazlah à ahəŋ gesina.”

*Azlamatərbəy uwana adəpahla madəv gay gudəŋ à vok ala
(Mata 24.3-14; Mark 13.3-13)*

⁷ Kiya uwaga tanàval à gay la: “Mənəga, mbà à tatak uwaga adəpaka vok ma? Tatak ma uwala à uwana adəpəhanula zlà?”

⁸ Kiya uwaga Yesu agòđ à atà: “Dahàw haŋkəli, dza apapat akul aw, kà uwana azladza aŋuvaw tadəsaha à waŋ la sləm gulo, à uwana ‘Anu azlakristu. Lagwa kà, kaslà aŋha la uwanay adàsa à waŋ lagwa’, tadəgoday. Ama kadənəfaw atà aw. ⁹ Baŋa kadətsənaw gay lakəl aña guvəl, la azlamawiyay aŋha kà, ləv adəval akul à gay aw, kà uwana uwaga kà say leri apaka vok dadəŋ, ama uwaga kà makəđ gəl à ahəŋ aña gudəŋ à vok dadəŋ aw.” ¹⁰ Kiya uwaga agòđ à atà: “Azladza tsəhay anik tadəpa guvəl la azlatsəhay anik, ngaha makoray anik adəpa guvəl la makoray anik. ¹¹ Azlamabəlak à vok aña kutso adəgahay la ahəŋ aŋuvaw, dufvats la azlamay, la matərbəy adagahay la ahəŋ la azlaslaka anik anik. Azlatatak guba, la azlanadzipo mənəga tadəsà à ahəŋ la zagəla.”

¹² “Ama kà uwaga aña mapak vok gesina kà tadəkasa akul, tadətsərkəwah akul tadətərbəh akul la azlagəy madəv kufə la aku, ngaha tadəwats akul à danəy, tadəbayàh akul à huma aña azlasufəl, ngaha à huma aña azlalawan kà gi. ¹³ Uwaga la uwana adəvə à akul tetəvi kà maz sayda gulo. ¹⁴ Lagwa kà, gəđfawaŋ à afik la ləv aŋkul la tsəh kà akul aña magogotsay kà aña mahəl à ahəŋ aw. ¹⁵ Kà uwana gi la gəl gulo la uwana gədəguway la paŋaw aŋkul la awtəy, kà mav à akul matsihila kà masla məzam aŋkul aña maməl akul gəl à ahəŋ aw. ¹⁶ Tekedfika kà, bà azlababa aŋkul, la azladedə aŋkul dardarga, ngaha la azlaslawda aŋkul la uwana tadətsərkəwah akul. Ngaha tadəzah sifa aña azlaanik aŋkul ala aya. ¹⁷ Azladza gudəŋ à vok gesina tadəpəsew akul kà uwana kawoyaw gi. ¹⁸ Ama bà la uwaga kà, amiyaka bà aŋidz takasagəl aŋkul tekula babay kà adəzila aw. ¹⁹ La matsizilla à ahəŋ lela aŋkul la uwana kadəbəzaw à sifa aŋkul.”

*Yesu apəh gay makal Urusalima à ahəŋ
(Mata 24.15-21; Mark 13.14-19)*

²⁰ “Mok uwana kadànéṅaw azlaməna guvəl tadəkəs gay à Urusalima à adi kà, səlàw kà nekwa: ‘Takal à ahəṅ adàgay’, kadàgodaw. ²¹ Kiya uwaga azlauwana atà la Yahudiya kà, tadàhoy à gudəṅ à afik. Ngaha azlauwana tadàgay la hudf aṅa Urusalima kà, tadàza vok, ngaha azlauwana la lig gà la uda kà, tadàda à abà aya aw. ²² Ama azlamavakay uwaga kà azlamavakay aṅa seriya la mazay, ama kà magədf uwana à afik tatsetsèr à wakità Zəzagəla à abà.✠ ²³ Ngərpa adàgay la azlamis uwana la bəza la hudf, la azlauwana bəza vərna aga à atà la ahàl la mavakay uwaga, kà uwana matərəbāy la mapak ləv aṅa Zəzagəla adàpəhla vok ala la tataka azlatsəhay uwanay la abà. ²⁴ Tadàkadāh atà la katsakar, tadàpakah atà ala kà azlamayà la tataka azlatsəhay gudəṅ à vok la abà. Azladza uwana azla Yahudiya aw, tadàhabah Urusalima à tsəh tsərəh à uwana kaslā aṅatà adədəv à gay.”

Mas à ahəṅ aṅa Kona aṅa dza
(Mata 24.29-31; Mark 13.24-27)

²⁵ “Azlamasəlay, la azlanadzipo anik anik la afats la abà, la təla la abà, la azlatsetsilin, ngaha la kutso la abà adàgay la ahəṅ. Gudəṅ à vok adàgay la mazaw la gel la abà, gəl adàkadāf atà à vok kà mahohumay aṅa maganṅsay aṅa azladərəv.✠ ²⁶ Azladza tadəməts à gay kà ngərpa uwana adàpaka vok la kutso la abà la vədfah, kà uwana azlandzəfa uwana la zagəla tadàbəlak à vok. ²⁷ Kiya uwaga kadànéṅaw Kona aṅa dza atsa à ahəṅ la habaga zagəla la abà, la mazləbāy, ngaha la maslay gesina.✠ ²⁸ Mok uwana azlatatak uwaga tadàdzəka mapakàh vok kà, dzərədfàkàw vok ala, tsizllàw gəl ala la matsizlla à ahəṅ lela, kà uwana mabəlay aṅkul kà nekwa.”

Uwana gudəv apəhla ala
(Mata 24.32-35; Mark 13.28-31)

²⁹ Kiya uwaga Yesu apəh à atà gay la gay la abà uwanay: “Nərəzàw gudəv la azlaahāf anik anik gesina tsi. ³⁰ Baṅa kadànéṅaw azlababasl aṅatà tadzəka madāy kà, səlàw kà madara kà nekwa. ³¹ La kità babay, mok uwana kadànéṅaw azlatatak uwaga tadàdzəka vok kà, səlàw kà, makoray Zəzagəla kà nekwa atsa à waṅ. ³² La dziriga, gəpəh à akul: Zamana uwanay adədəv à gay dadəṅ kà mapak vok aṅa azlatatak uwaga aw. ³³ Zagəla la kutso tadədəv à gay, ama gay gulo kà, adədəv à gay aw.”

Nəṅàwla gəl aṅkul

³⁴ “Nəṅàwla gel aṅkul! Kà gəl aṅa makāf akul à vok lakəl aṅa tatak masay, la tatak may, la azlatatak aṅa gudəṅ à vok uwanay aw! Tsa baṅa kità aw kà, mavakay aṅa seriya adàsa à waṅ adàgoruh akul. ³⁵ Kà uwana mavakay uwatà kà, adàsa à waṅ kà bokuba makəs tatak aṅa kəda kəfu à uwana adàsa azladza à gudəṅ à vok à gəl. ³⁶ Dzàw à ahəṅ la adi, dèvəw kudā la kaslā gesina, kà akul aṅa mabəz ndzəfa kà matəf uwana la gay ala atsa à waṅ gesina, ngaha kà akul aṅa matsizlla à ahəṅ dzawwa la huma aṅa Kona aṅa dza.”

³⁷ Tekedika la afats kà, Yesu atəpla tatak à azladza la məṅ gəy Zəzagəla la aku, ama la mokokhu gà kà, ahəd, ahèn à gudəṅ uwana afik: ‘Gudəṅ kuvu’, tagòfal. ³⁸ Maham à ahəṅ dza gesina asà à waṅ la bəṅ la zay la tsəh kà matsəbal sləm la məṅ gəy Zəzagəla la aku.

22

Azlamasiga takəs sawaray kà makəs Yesu
(Mata 26.1-5; Mark 14.1-2; Yuhana 11.45-53)

¹ Mok uwana uwaga adada à lig kà, madəvaday aña Pain uwana kokudà tatak maməsləŋ ala, à uwana tazalalla Paska agay nekwa.* ² Kiya uwaga azlamadzahaga aña azlaməna mav tatak à Zəzagəla, ŋgaha la azlaməna mapəhla mapəhay ala tayəh dabaray kà makəđ Yesu, ama guba akəs atà kà maham à ahəŋ dza.

*Yudas adəfah vok à ahəŋ kà mav Yesu à ahəl aña azlamasiga
(Mata 26.14-16; Mark 14.10-11)*

³ Kiya uwaga seteni aguwa la Yudas uwana la abà, tazalalla Iskariyot, tekula aña azlaməna matapla kulo gəl aña səla. ⁴ Ŋgaha masla ahəd kà matsən vok gay la azlamadzahaga aña azlaməna mav tatak à Zəzagəla, la azlaməŋga aña azlaməna manəŋla məŋ gày Zəzagəla, kà mav à atà Yesu à ahəl. ⁵ Tarəb məŋga, “Mədàvə à ka sili!”, tagòđal. ⁶ Yudas akəs la ahəl səla, ayəh tetəvi kà maf à atà Yesu à ahəl kokudà matsəŋəŋ aña maham à ahəŋ dza.

*Yesu adəh tatak may aña Paska à ahəŋ
(Mata 26.17-25; Mark 14.12-21; Yuhana 13.21-30)*

⁷ Kiya uwaga mavakay aña Pain uwana kokudà tatak maməsləŋ ala, uwana azladza takəđəh magadzaw adada à abà. ⁸ La kità, kà Yesu asləl azla Piyer atà la Yuhana la magòđ à atà: “Dəw, kadəfahaw anu tatak aña madəvaday Paska à ahəŋ, kà anu aña mazuway!” ⁹ “Lala asà ka məday aña madəhəŋ à ahəŋ la?” tagòđal. ¹⁰ Ŋgaha agòđ à atà: “Mok uwana kadabəzaw à huf gudəŋ à abà kà, kadəgagamaw la dza uwana iyaw lakəl la tuguzl gə. Danəfəw masla à gày uwana à abà, adada à abà. ¹¹ Ŋgaha kadəgòđaw à zil gày: ‘Məŋga anav gày, uwana adəzuw tatak may aña Paska la aku, la azlaməna matapla la slaka aña la slaka aňak.’ ¹² Kiya uwaga adəpəhakulla gày madəhəŋ à ahəŋ gə uwana lakəl aña gày anik la afik, ŋgaha kà la abatà la uwana kadəfahaw tatak may à ahəŋ.” ¹³ Mok uwana taday kà, tabəz à tatak à gəl gesina bokuba uwana Yesu apəh à atà, ŋgaha tadzəkà madəh vok à ahəŋ kà aña madəvaday Paska.

*Tatak may tsikaslaga
(Mata 26.26-30; Mark 14.22-26; 1 Korintiya 11.23-25)*

¹⁴ Mok uwana kaslā adaslay kà Yesu la azlaməna matapla la slaka aña tadzəh à tatak may à adi, ¹⁵ Yesu agòđ à atà: “Gəwoyaŋ kà bə mawoyay kà mazuw tatak may aña Paska uwanay anina dadəŋ, kà gi aña mas ŋgərpa. ¹⁶ La dziriga gəgòđ à akul: Tetuw gədəzuway aya aw, tsərəh à uwana adəgay magəđ à afik gə la makoray aña Sufəl Zəzagəla dadəŋ.” ¹⁷ Azəb kətsaw à ahəl la tatak masay gə, “Kikay”, agòđ à Zəzagəla, “Kəsəw kətsaw uwanay, kaslawwaŋ à vok à gay la tataka aňkul la abà. ¹⁸ Kà uwana la dziriga gəpəh à akul kà, gədəsa iyaw matavəruk uwanay aya aw, say la makoray Zəzagəla.”

¹⁹ Ŋgaha azəb kaf, “Kikay”, agòđ à Zəzagəla, atsakəŋ ala, avà à atà la magòđ à atà: “Uwanay kà vok gulo ((uwana mavəy gə kà aňkul. Dahəw uwanay kà gi aña mawul akul à gəl.” ²⁰ La lig aña mazuw tatak may à gay la ahəŋ kà, avà à atà kətsaw iyaw la tatak masay la abà, agòđ à atà: “Kətsaw uwanay kà, kətsaw makəs vok slawda mawga la aňiz gulo, uwana masokw à vəđah gə kà aňkul.))”*

²¹ “Ama aganay à dza uwana adəta à gi kaf à gəl mədatsəp vok à ahəl à tatak may à abà anu səla.* ²² Ndzer, Kona aña dza adədiy aña bokuba uwana tatsetsər à wakitə Zəzagəla à abà, ama ŋgərpa la dza uwana atal kaf à gəl, avà à ahəl aña azladza!” ²³ Ŋgaha azlaanik uwanay tadzəkà manavəh vok kà atà kà atà: “Uwa à uwana adzugw madəh tsəhay gə uwaga la tataka gami la abà uwa?”, tagòđ.

Uwa à məŋga gə uwa?

* 22:1 22.1 2Musa 12.1-27 * 22:20 22.20 Yeremiya 31.31-34 * 22:21 22.21 Mahabay 41.9

²⁴ Mabay vok gay atsizlla ala la tataka aṅa azlaməna matapla la abà, kà masəl dza uwana azlayla magay mənḡa aṅatà. ²⁵ Yesu agòd à atà: “Azlasufəl aṅa gudəṅ à vok takor azladza aṅatà, azlaməna ndzəda lakəl aṅatà babay asa à atà kà tazala à atà ala azladza delga. ²⁶ Ama akul kà, kiya uwaga aw. Mənḡa gà la tataka aṅkul la abà kà apakay kà masla mazəb kiwa. Nḡaha masla makor akul aya kà, agay kà bokuba masla mazəb akul dagum. ²⁷ La dziriga, ma dza ma uwala à uwana mənḡa tak la? Uwana adza madzay la tatak may lakəl ay, awma uwana atsak tatak may à azladza, adàha à atà ala ay. Nḡoḡa à gi kà, dza uwana la tatak may lakəl, la uwana mənḡa gà. Ama gi kà gi la ahəṅ la tataka aṅkul la abà koksikoksi bokuba masla madəhəkulla tatak may. ²⁸ Akul kà akul la ahəṅ la gi koksikoksi la nḡərpa gulo la abà. ²⁹ Nḡaha bokuba gi, uwana Baba afa à gi à makoray aṅha à abà kà, gi babay kà gədàfa à akul à makoray à abà suwaṅ. ³⁰ Kà akul aṅa mazuway la masay tatak la table gulo la afik la makoray gulo, nḡaha kadàdzahaw madzay la azlakursi sufəl la afik kà madəh seriya à azlatsəhay kulo gəl aṅha səla aṅa Isərayel à gəl.”

Yesu apəh gay fida aṅa Piyer à ahəṅ

(Mata 26.31-35; Mark 14.27-31; Yuhana 13.36-38)

³¹ Yesu agòd à Səmon: “Səmon, Səmon, tsənàṅ tsi: Seteni adanav tetəvi kà magodzal ka kà, bokuba uwana tasəh tatak kà mavàh azlatafàr gà ala la fofulo delga gà. ³² Ama gi kà gədəv kuḡa kà aṅak Piyer, kà madinjal gəl à vok aṅak aṅa maruw vok à ahəṅ aw, nḡaha kà pəra aṅa kadàwul à tetəvi à tsəh kà, dadzərəḡàhà azladeda aṅak ala gesina!” ³³ Piyer agòd: “Sufəl, gi kà dḡəḡd à uwali gəḡod aw, amiyaka à danay, amiyaka tadəkəḡd ka, kà gi kà, gi nekwa kà mamətsay la slaka gà à anu səla.” ³⁴ Ama Sufəl Yesu agòd à Piyer: “Tsənàṅ Piyer, lakana kà mewgdzagalaṅ adawiyay dadəṅ aw, kà magòḡay aṅak kà kasəl gi aw asik makər.”

Sili, kiwa, nḡaha katsakar

³⁵ Kiya uwaga Yesu agòd à atà: “La mok uwana gəsləl akul kokudə sili, kokudə kiwa, kokudə kwimik ma, kanàwkuḡa aṅa tatak takay?” “Awaṅ, mənəkudə aṅa tatak aw”, tagòḡdal. ³⁶ Kiya uwaga Yesu agòd à atà: “Lagonay kà, kiya uwatà aya aw, dza uwana sili aṅha la ahəṅ kà, ahəl, dza uwana kiwa aṅha la ahəṅ kà azəb, nḡaha dza uwana katsakar aṅha la ahəṅ aw kà, aduw dəbdəbi aṅha ala kà masukw katsakar. ³⁷ Kà uwana la dziriga kà tatak uwana tatsətsər lakəl gulo kà say agəḡd à afik,

'Masla kà, tatugwla la azlaməna tsakana.'✧

La haḡay kà, uwana tatsətsər lakəl gulo kà adagəḡd à afik.” ³⁸ Azlaməna matapla la slaka aṅha tagòḡdal: “Sufəl, katsakar səla la uwanay ma diga aw takay?” Yesu agòd à atà: “Diga uwà gà.”

Yesu adəv kuḡa la Getsemane

(Mata 26.36-46; Mark 14.32-42)

³⁹ Bokuba uwana zagəla aṅa Yesu, asà à uda, adà aṅha à gudəṅ kuvu à afik. Azlaməna matapla la slaka aṅha tanəfà la tsəh. ⁴⁰ Mok uwana tabəz à slaka uwatà à abà kà: “Dəvəw kuḡa kà akul aṅa matəḡd à mapapatay à abà aw!”, agòḡd à atà. ⁴¹ Masla azà à atà vok la vok ala, zad daməl akur, akədəḡd à ahəṅ, adəv kuḡa. ⁴² “Baba, baṅa asa à ka kà, zà kətsaw nḡərpa uwanay ala la slaka gulo. Ama kadəhaṅ kà mawoyəṅ gulo aw, say aṅak!” ((⁴³ Kiya uwaga malika asà à ahəṅ la zagəla adzərəḡṅ ala. ⁴⁴ Adəv kuḡa la mazaw la gəl mənḡa, aməts à madəv kuḡa à abà tsəràh à uwana aṅuf anəḡdal à adi ala, vikuza bokuba aṅiz.)) ⁴⁵ Mok uwana adadəv madəv kuḡa à gay kà, asà à waṅ à slaka azlaməna matapla aṅha, abəz atà à gəl, kà atà la madzəhal

aŋa mazaw la gəl la abà. ⁴⁶ Agòd à atà: “Kà mana kadzewhal ma? Sàw à afik dèwàw kufa, kà akul aŋa matəf à mapapatay à abà aw.”

Makəs Yesu

(Mata 26.47-56; Mark 14.43-50; Yuhana 18.3-11)

⁴⁷ Uwana Yesu aləg la maɓadma la abà kà, maham à ahəŋ dza azlənjal, atà la azla Yudas, tekula aŋa azlaməna matapla kulo gəl aŋha səla, uwana tatàpàhla tatak la slaka aŋha. Tazà vok à awtày à slaka Yesu. ⁴⁸ Ama Yesu agòdɓal: “Yudas, la makəs gi à vok la uwana kaduw Kona aŋa dza ala takay?” ⁴⁹ Mok uwana azladza uwana la Yesu tanəŋà uwaga adzəkà vok kà, tagòdɓal: “Sufəl, mətsəf à atà kuda à gəl la katsakar ay?” ⁵⁰ Tekula la tataka aŋa azlaməna matapla la abà adəf magamza aŋa madzahaga aŋa azlaməna mav tatak à Zəzagəla, anətsal sləm lakəl ala. ⁵¹ Ama Yesu avərə gay: “Sàkàw uwaga, digiya”, agòd à atà. Yesu adəbanì sləm aŋa dza uwatà awurəŋ ala.

⁵² Kiya uwaga Yesu agòd à azlamadzahaga aŋa azlaməna mav tatak à Zəzagəla, la azlaməŋga aŋa azlaməna manəŋla gày Zəzagəla, ŋgaha la azlamasiga: “Kasàwwəŋ kà makəs gi la azlakatsakar la azlaazəva la ahəl, bokuba gi masla nabəra ŋuwà? ⁵³ Tekedika kəla mavakay kà, məgàh anina la məŋ gày Zəzagəla la aku, uwala katàpàw gi ahəl à vok aw. Ama uwanay kà adagay kà kaslā aŋkul, la ndzəda aŋa mələs.”

“Gəsəl Yesu aw”, Piyer agod

(Mata 26.57-58,69-75; Mark 14.53-54,66-72; Yuhana 18.12-18,25-27)

⁵⁴ Takàs Yesu, tadàlla à mtəga aŋa məŋ madzahaga aŋa azlaməna mav tatak à Zəzagəla; Piyer anəfà à atà la tsəh zadamma. ⁵⁵ La mok uwatà kà, anasl la ahəŋ, tavəts akəl à kodal à abà, Piyer adzà madzay la slaka azladza uwana la akəl la adi. ⁵⁶ Masla sləray misga tekula anəŋà Piyer adzà à akəl à adi, atsəkəl yewdi à gay la magodɓay: “Zil uwanay babay kà tauguzàh atà səla.” ⁵⁷ Ama Piyer adfahà fida: “Gəsəl masla aw, gəgod à ka, mis!” ⁵⁸ Zweg la huma la gay dza anik anəŋəŋ, agòdɓal: “Kak babay kà, kak tekula aŋatà.” Ama Piyer agòd à dza uwaga: “Awan, gi tekula aŋatà aw.” ⁵⁹ Mok uwana tasəfànì kà, dza anik awasləŋ à afik la magodɓay: “Ndzer, dza uwanay kà tauguzàh atà səla, masla babay kà zil Galili.” ⁶⁰ Ama Piyer agòd: “Kona, gəsəl uwana asa à ka mapəhay aw!”, uwana taləg la mavats gay la abà kà, mewgdzagalaŋ awiyà. ⁶¹ Sufəl Yesu agəla vok, anəŋà à Piyer à adi, ŋgaha awùl à Piyer à gəl, à gay aŋa sufəl uwana apəhal à vok à abà uwarà: ‘Gurayŋa mewgdzagalaŋ adawiyay lakana kà asik makər kà, kadəgodɓay kà, kasəl gi aw.’ ⁶² Piyer asà à uda atùw la iyaw tugwi.

Tadala Yesu à huma seriya aŋa azla Yahudiya

(Mata 26.67-68; Mark 14.65)

⁶³ Azladza uwana tanəŋla Yesu takəfàslal, ŋgaha tazlāb. ⁶⁴ Tawəɓal lukut à yewdi à ama, tanəval: “Uwa à uwana adəf kà tak uwa? Səl zlà!” ⁶⁵ ŋgaha tatsəkəl azlamagodfahay anik anik à gəl aya. ⁶⁶ Uwana məl adawula kà, azlamasiga aŋa azla Yahudiya, la azlamadzahaga aŋa azlaməna mav tatak à Zəzagəla, la azlaməna mapàhla mapəhay ala, tahamà gay à vok, ŋgaha tadàla Yesu à huma à azlaməna sawaray aŋatà ⁶⁷ la magodɓay: “Baŋa kak Kristu kà: Pəh à anu!” Ama Yesu agòd à atà: “Gədapəh à akul bay kà, kafəwwal sləm aw, ⁶⁸ à bà gənava à akul à manavay tekula bay kà, kawullaw gi ala aw. ⁶⁹ Ama dagay lakana Kona aŋa dza adza madzay la ahəl kaf aŋa Baba Zəzagəla lakəl, uwana Zəzagəla adahama ala ndzəda gesina.” ⁷⁰ Gesina aŋatà tagòd: “Lagwa zlà ma, kak Kona aŋa Zəzagəla ay?” Kiya uwaga Yesu agòd à atà: “Iyay, kiya uwana kagodɓaw kà, gi masla!” ⁷¹ Kiya uwaga tagòd: “Lagwa kà, məyàh azlaməna sayda aya zlà ma aw. Anu la gəl gami kà, mədatsənəŋ paŋaw aŋha adagay.”

23

Yesu la huma Pilatus

(Mata 27.11-14; Mark 15.1-5; Yuhana 18.28-38)

¹ Ngaha la abatà kà, maham à ahəŋ dza gesina tatsizlla ala, tadàla Yesu à huma Pilatus. ² Tadzəkà makallal gay à vok la magoɗay: “Dza uwanay kà, masla mapəs à tsəh à gudəŋ gami à afik, ‘Dza apəl hadama à Zəsar aw’, agòɗ, ŋgaha ‘Gi Kristu, gi Sufəl’, agòɗ aya.” ³ Pilatus anàval à gay ala: “Kak la uwana kak Sufəl aŋa azla Yahu-diya, haɗay ay?” “Iyay, kiya uwana kapəh”, Yesu agòɗal. ⁴ Pilatus agòɗ à azlamadzahaga aŋa azlaməna mav tatak à Zəzagəla, ŋgaha à maham à ahəŋ dza: “Dikidiki gəbəz à mawisiga aŋa dza uwanay aw.” ⁵ Ama tazà kuda à zagəla la ndzəɗa. “Masla la uwana apəs à tsəh à maham à ahəŋ dza à afik la matapla aŋha. Adzəkà la Galili, la Yahudiya gesina, tsərəh à uwana adabəzla à abanay lakana.”

Yesu la huma Herod

⁶ Mok uwana Pilatus atsənà uwaga kà, anàv: “Konnay ma, zil Galili takay?” ⁷ Uwana adatsenəŋ kà, asà à waŋ kà la makoray aŋa Herod la abà kà, asləl masla à slaka Herod, kà uwana la mavakay uwatà kà, Herod kà agà la Urusalima. ⁸ Mok uwana Herod anəŋà Yesu kà, arəb mənŋga, kà uwana ayahay aŋa manəŋəŋ kà dagay uwarà, kà uwana atsənà gay uwana tapəhay lakəl aŋha kà delga. Ngaha adzəgw kà Yesu, adahalla nadzipo. ⁹ Anàvəhal azlamanavay aŋuvaw, ama Yesu abəɗalma aw. ¹⁰ Azlamadzahaga aŋa azlaməna mav tatak à Zəzagəla, la azlaməna matapla mapəhay à azladza la abatà, tapùwla gudzi à gəl la ndzəɗa. ¹¹ Herod la azlaslodzi aŋha takəɗaslal, tatərəbàŋ, tadùwal lukut delga gə à vok, ŋgaha tawùlla masla à slaka Pilatus. ¹² La mok uwatà la uwana Herod atà la Pilatus takəs vok slawda, kayka uwarà kà tasà vok iyaw aw.

Seriya mamətsay atəɗ à Yesu à gəl

(Mata 27.15-26; Mark 15.6-15; Yuhana 18.39-19.16)

¹³ Pilatus ahamà gay azlamadzahaga aŋa azlaməna mav tatak à Zəzagəla à vok, la azlamalahaga aŋa gudəŋ uwatà. ¹⁴ Ngaha agòɗ à atà: “Akul, kasəwgəla dza uwanay à waŋ kà: ‘Apəs à tsəh à gudəŋ à afik’, kagoɗaw. Iyay, lagonay kà gənàval gay kà la huma aŋkul gesina, ama gəbəz à mawisiga la slaka aŋha kà madukwla seriya à gəl la mapuwla gudzi à gəl uwana kapùwwal à gəl aw. ¹⁵ Amiyaka Herod babay kà, anəŋà mawisiga aŋha aw, kà uwaga à uwana asləl anu à abanay. Kiya uwaga dza uwanay adahà mawisiga takəɗla aw!” ¹⁶ Pilatus agòɗ: “Lagwa kà gəslahəŋla pəra, ŋgaha gəduwal gəl, ada aŋha.” ((¹⁷ Kəla madəvaday Paska kà, gumna adawəh gəl à masla daŋay tekula uwana asa à maham à ahəŋ dza, kà uwana uwaga kà adagay zagəla aŋha kà madaw à atà la gəl kəla madəvaday.)) ¹⁸ Ama gesina aŋatà tawiyà la ndzəɗa: “Kəɗ kà kona uwaga, kaduwanula gəl à Barabas!” ¹⁹ (Tadùw Barabas à daŋay tekeɗika uwana apəs à tsəh à gudəŋ à afik, akəɗ dza.) ²⁰ Bə gotənaŋ Pilatus anavà atà gay ala aya, kà uwana asəl maduw gəl à Yesu. ²¹ Ama tazà kuda à zagəla la mawiyay: “Zləl masla à ahəf à adi, zləl masla à ahəf à adi.” ²² Pilatus awùlla à atà la tsəh kà mamakər la magoɗ à atà: “Mawisiga ma uwala à uwana adahəŋ la? Gəbəzà à mawisiga la slaka aŋha amiyaka bə tekula uwana takəɗla aw!”, Pilatus agòɗ à atà: “Ama gəslahəŋ ala la kurpi, ŋgaha gəduwalla à gəl.” ²³ Ama tasà mawiyay à zagəla kaykay la magoɗay: “Say mازل masla à ahəf à adi”, ŋgaha mawiyay aŋatà agəɗ à afik. ²⁴ Ngaha kà bokuba uwana asà à atà la uwana Pilatus agəɗaŋ à afik, kà marab ləv aŋatà. ²⁵ Kiya uwaga kà, apəlla à atà masla makəɗ dza uwana ala, tadùw à daŋay la mapəs à tsəh à gudəŋ à afik la tsəh, kiya uwana maham à ahəŋ dza uwaga anàv. Ngaha tavà à atà Yesu à ahəl, kà atà aŋa madahallaŋ, bokuba uwana asà à atà.

Matatasl Yesu à ahàf à adi

(Mata 27.32-44; Mark 15.21-32; Yuhana 19.17-27)

²⁶ Mok uwana tadàla Yesu, tagagàm la dza anik uwana slèm anha Sèmon, atsà à waɲ la fəta, masla kà zil gudəɲ Søren. Azlaslodzi takès, tafàl ahàf à kuda kà manəfla Yesu la tsəh. ²⁷ Maham à ahəɲ dza anuwaw, la azlamis, tanəfà la hulolo ɲgaha la mataway kà masla, tabàk ahàl à gəl. ²⁸ Yesu agòt ala à huma à gay, agòd à atà: “Azlamis gudəɲ Urusalima katuwaw kà gi aw, ama tùwàw à gəl ankul la azlabəza ankul, ²⁹ kà uwana mavakay adàsa à waɲ à uwana tadàgodfay kà: ‘Marabay kà la azladəgər, la azlauwana azlabəza tasà awà anətà aw.’ ³⁰ Kiya uwaga azladza tadàdzəka magodàh azlagudəɲ: ‘Tadaw anu à gəl, ɲgaha hàdàhàw anu à ahəɲ’, tadàgodfah à azladadəgwəl. ☆ ³¹ Baɲa dza adəhəɲ kiya uwanay la ahàf biyaga, ma kakay adàpaka vok la magolga ma?”

³² Tadàla azlaməna nakəra anik à awtày səla, kà makad atà la slaka gə. ³³ Mok uwana tabəz à slaka uwana *Golgota* tagòdàl kà, (Uwana asal magodfay: slaka hərəɲ gəl), tatàslàh atà à ahàf à adi tekula la ahàl kaf, tekula la ahàl gudzay anha. ³⁴ Kiya uwaga Yesu agòd: “Baba, basà à atà tsakana anətà, kà uwana tasəl uwana tadehəɲ aw!” ɲgaha tavàhà lukut anha la tataka anətà la abà, la matsal tsatsa lakəl. ³⁵ Maham à ahəɲ dza la abatà, azlamasiga anha azla Yahudiya uwana la abatà tadzəkà makədaslla Yesu la magodfay: “Masla uwana abàlaha azladza anik kà, masla la gəl anha kà, abəla gəl anha suwaɲ zlà, à baɲa masla kà Kristu, uwana Zəzagəla akəsàni tak zlà!” ☆ ³⁶ Azlaslodzi babay takədaslal; tatədfalla iyaw hamhamga, ☆ ³⁷ ɲgaha tagòdàl: “Baɲa kak la uwana sufəl anha azla Yahudiya kà, bəlla gəl anək zlà!” ³⁸ Aganay à uwana tatsetsər à gəl anha à afik: DZA UWANAY KÀ SUFƏL ANA AZLA YAHUDIYA.

³⁹ Tekula la tataka anha azladza səla uwana la abà tatəsl à atà à ahàf à adi atà nna, akədaslal la magodfay: “Kak kà, kak Kristu aw takay? Bəlla gəl anək, ɲgaha bəlla anu babay zlà!” ⁴⁰ Ama anik uwanay apisal iyaw à tsəh la kaykay agòdàl: “Kahoy yewdi anha Zəzagəla, à kà uwana kagaw la seriya tekula la abà la masla aw takay? ⁴¹ Kà anami kà uwanay takad anu kà, azlayla atà takad anu. Kà uwana leri məbəzaw à masik anha tatak uwana mədàhàwwaɲ. Ama masla kà, adəhà mawisiga amiyaka bə tekula à ahàl aw.” ⁴² ɲgaha agòdàl: “Kamkam Yesu, dafà gi à ahəɲ la slèm, à vuɖ uwana kadəgay la makoray anək la abà.” ⁴³ Yesu agòdàl: “Hadəfay, gəpəh à ka la dziriga: Lakana uwanay kà, kadəgay la makoray gulo la abà, anu səla.”

Mamətsay anha Yesu

(Mata 27.45-56; Mark 15.33-41; Yuhana 19.28-30)

⁴⁴ La tataka afats mələs apakà vok la kutso la abà gesina tsərəh afats dat magova gova gərewni delga. ⁴⁵ Mok uwana afats adakəl mələs kà, bafta uwana la gəy Zəzagəla la aku akwohà la tsərəh à afik tsərəh à vədah, la tataka la abà. ⁴⁶ Kiya uwaga Yesu awiyà la ndzəda agòd: “Baba, gəsaka masasədok gulo kà la ahàl anək.” Mok uwana adapəh uwaga la gay ala kà, aməts. ☆ ⁴⁷ Məɲga anha azlaslodzi anha azla Rom anəɲà tatak uwana apakà vok gesina, adzəkà magodfay: “Ndzer kà, dza uwanay kà, dza dziriga”, ɲgaha adzəkà mazləb Zəzagəla. ⁴⁸ La lig la ahəɲ kà, maham à ahəɲ dza gesina uwana tasà à waɲ kà manəɲ uwana apakà vok gesina kà, tawul à mtəga la madad gay ləv. ⁴⁹ Azlaslawda anha Yesu la azlamis uwana tanəfà à waɲ dagay la Galili, tatsəzl à fəta à awtày kà manərəz tatak uwana apakà vok gesina.

Mazəb Yesu à uda

(Mata 27.57-61; Mark 15.42-47; Yuhana 19.38-42)

☆ 23:30 23.30 Hosəya 10.8 ☆ 23:35 23.35 Mahabay 22.7,18 ☆ 23:36 23.36 Mahabay 69.21 ☆ 23:46 23.46
2Musa 26.31-33; Mahabay 31.5

⁵⁰ Dza anik la ahəŋ uwana sləm aŋha Yusufu, uwana la tataka aŋa azlamasiga la abà, masla babay kà dza dziriga. ⁵¹ Masla kà adzugway kà lakəl aŋa mas à waŋ makoray Zəzagəla, masla kà atsənà sawaray aŋa azladza anik babay aw, masla kà zil gudəŋ Arimate, la kutso Yahudiya la abà. ⁵² Ahàd, abèz à Pilatus à vok kà manaval mazimnekiđ aŋa Yesu. ⁵³ Uwana Pilatus adaval tetəvi kà azèb vok aŋa Yesu à ahəŋ la ahàf la adi kà, afafàdɔal lukut à adi. Ngaha adàlla à zəvay mawga uwana à agu talà à təhus à afik, tafà dza à agu didi dadəŋ aw. ⁵⁴ Vuđ uwatà kà, vuđ mađàh vok à ahəŋ aŋa vuđ madu w ləv. ⁵⁵ Azlamis uwana tanəfà Yesu à waŋ la tsəh dagay la Galili, tanəfà Yusufu à waŋ, tanəŋà zəvay, ngaha la tsəhay maf Yesu uwana à ahəŋ tahənəŋ à ahəŋ la zəvay la aku. ⁵⁶ Ngaha tawùl à mtəga aŋatà, ngaha tadɔahà vok à ahəŋ la azlaamàl, la azlamatərsin kà mađàh à Yesu à vok. Ngaha la vuđ madu w ləv kà taduw ləv bokuba uwana mapəhay agod.✧

24

Mawul à uda aŋa Yesu

(Mata 28.1-10; Mark 16.1-8; Yuhana 20.1-10)

¹ Bəŋ la zay la tsəh, vuđ ladu kà, azlamis uwatà tadàla azlaamàl la azlamatərsin uwana tadahəŋ à ahəŋ kà madla. ² Azlamis tabèz à zəvay à gəl kà matakoslal bəlam la ama ala gà, zad zwek la gay zəvay. ³ Tadà à agu, ama tanəŋà sləb vok aŋa Sufəl Yesu aw. ⁴ Gəl akàd à atà à vok. Bokuba uwana atà la madzugway la abà kà, azlamalika səla tatsàkwàh à lukut medfekuga təlla gà à abà, tapəhatàla vok. Lukut aŋatà aŋəràzl atà à adi. ⁵ Ama uwana guba adakad à atà à gay gesina kà, sasukwà tadzà à ahəŋ, azladza uwatà tagòd à atà: “Kà mana kayahaw dza uwana la sifa la tataka azlamazimnekiđ la abà ma? ⁶ Aga la abanay aw, adawula à uda la mamətsay. Dzùgwàw lakəl aŋa uwana apəh à akul la mok uwana à lig la Galili tsi. ⁷ Say Kona aŋa dza agəy mav à ahàl aŋa azlaməna tsakanaga, ngaha tadətatasl à ahàf à adi, ngaha awul à uda la mahənay mamakər.”

⁸ Kiya uwaga awùlla atà à gəl à gay aŋa Yesu uwana apəh à atà. ⁹ Ngaha tatsizlla ala la gəl zəvay, tadàla gay uwaga à slaka azlaməna matapla kulo gəl aŋha tekula uwanay, ngaha à azladza anik gesina bay. ¹⁰ Uwaga kà azla Mariyama dəg zla Magdala, Yohana, ngaha Mariyama iyà aŋa Yakuba, la azlamis anik uwana tahàd atà nna, tapəh gay uwaga à azlaməna matapla aŋha. ¹¹ Ama azlaməna matapla uwaga tafà sləm à gay uwaga aw, uwaga kà: ‘Gay masesiŋay’, tagòd. ¹² Ama Piyer atsizlla ala, ahàd à gel zəvay; anəŋà à agu kà, anəŋà kà azlagabaga pəra, ngaha awùl à mtəga la mavalàh à zagəla kà tatak uwana apakà vok.

La tetəvi maday à Emawus la tsəh

(Mark 16.12-13)

¹³ La mavakay uwaga Piyer awùl à lig, aganay azladza səla la tataka azlaməna manəf Yesu la tsəh, tadà à gudəŋ uwana sləm aŋha Emawus. Tataka aŋatà atà la Urusalima kà bokuba magur mahoy pəlis zlo mala məkwa. ¹⁴ Tavàts gay la tetəvi la ama, lakəl aŋa tatak uwana apakà vok gesina. ¹⁵ Kiya uwaga mok uwana tabəy vok la mavats gay kà, Yesu adasa à waŋ à slaka aŋatà, tahàd la tetəvi la ama atà nna. ¹⁶ La abatà tanəŋəŋ masla, ama tatak anik adəd à atà gay à ahəŋ, kà aŋa masəlay. ¹⁷ La abatà Yesu abadɔatàmà: “Lakəl ma aŋa mana ma, kabəyàw vok gay la tetəvi la ama ma?”, agòd à atà. Ngaha tatsizlla à ahəŋ la mazaw la gəl. ¹⁸ La kità tekula aŋatà, uwana sləm aŋha Kəleyopas, agòdɔal: “Kak ma, kak məlok aŋa Urusalima ay? Kasəl uwana apakà vok la mahənay uwanay la abà aw takay?” Dza uwaga anavà atà: “Mana apakà vok ma?” ¹⁹ “Aa, à tatak uwana apakà vok la Yesu, zil

Nazaret uwana masla mapəhal gay à ahàl aña Zəzagəla aña mapəh à azladza, masla maslay, la ndzəfa la gay la abà la huma Zəzagəla, ngaha la slaka azladza ay? ²⁰ Ama azlamasiga aña azlaməna mav tatak à Zəzagəla, la azlaməna makoray gami tavà à ahàl aña azladza aña makəday la matatasl à ahàf à adi. ²¹ Tekedika anu mənawəŋ kà masla la uwana adəzlak Isərayel, ama lakana mahənay mamakər aŋha à uwana tatak uwanay apakà vok. ²² Ngaha aya kà, azlamis anik la tataka gami la abà, takəf anu gəl à vok. Kà uwana bəŋ la zay la tsəh lakana kà, tahàd à gəl zəvay. ²³ Ama tabəzà mazimnekid aña Yesu aw, tawùl à wəŋ aña mapəh à anu, kà azlamalika tapəh à atà vok, ngaha tapəh à atà la paraka, kà Yesu la adi. ²⁴ Mok uwana azlamis tapəh uwaga kà, azlaməna gami anik tahàd à gel zəvay, ngaha tanəŋəŋ gesina bokuba uwana azlamis tapəh, ama masla kà, tanəŋəŋ aw.”

²⁵ La kaslà uwatà Yesu agòf à atà: “Kayyà, akul azladza matsən sləm aw gə, akul azlanalnal aña makəs mapəhay aña azladza uwana Zəzagəla apəh à atà gay à ahàl aña mapəh à azladza! ²⁶ Kiya uwaga Kristu asà ngərpa dadəŋ la uwana ada à makoray aŋha à abà?” ²⁷ Kiya uwaga apəh à atà à gay uwana tatsətsər lakəl aŋha la wakità Zəzagəla la abà gesina, la wakità aña Musa la abà, akəfal gəl la wakità aña azladza uwana Zəzagəla apəh à atà gay à ahàl kà mapəh à azladza.

²⁸ Uwana tazlèbèz à gudəŋ uwana à abà asà à atà maday kà, dza uwaga azèb atà asik lakəl ala. ²⁹ Azladza sèla uwanay tazàlal à tsəh la magòfal: “Mədza à ahəŋ anina adagay vəf.” Ngaha adagay kà madz à ahəŋ atà nna. ³⁰ Kaslà aña mazuw tatak may adaslay kà, tadzəkà madz à tatak may à adi la slaka gə, uwana tadzəl à adi kiya uwaga kà, azèb kaf, “Kikay”, agòf à Zəzagəla, atsakəŋ ala, avà à atà. ³¹ La katskats yewdi aŋatà apèzlla à ama ala, tasəl masla, ama azà à atà à adi. ³² “Agà! Mok uwana abəfanumà, apəh à anu gay Zəzagəla la tetəvi la ama kà, ləv azlawəh kà anu à ama aw takay?”

³³ La gay uwaga hahadzək tavəlèh à afik, tawùl à Urusalima. Tabèz azlaməna matapla kulo gəl aŋha tekula à gəl la azlaslagama aŋatà. ³⁴ Tagòf: “Ndzer, mənŋa gami kà awùl à uda la mamətsay, kà uwana Səmon Piyer anəŋəŋ. ³⁵ Kiya uwaga azladza sèla uwanay tawùl à wəŋ à slaka aŋatà, tapəh à atà gay uwana apakà vok la tetəvi la ama, la masəl Yesu aŋatà la mok uwana atsəkà kaf ala.”

Yesu apəhla vok à azlaməna matapla aŋha anik ala aya

³⁶ Mok uwana taləg la mabəfma la abà aya, à uwana Yesu atsizlla à tataka aŋatà à abà, adfahà à atà ‘Ayyi’, agòf à atà: “Lapiya agay la akul!” ³⁷ La abatà aŋidz ahamà à atà à gəl mənŋa, kà uwana: ‘Mədanəŋ tatak mavavat dza’, gəl agòf, agòf à atà. ³⁸ Kiya uwaga masla agòf à atà: “Kà mana kagudəkəhəwla ala ma? Kà mana katsəw gay la ləv aŋkul la tsəh ma? ³⁹ Bə, gi ndzer gəvələw à ahàl gulo la azlaasik gulo tsi, dəbəwəni gi, kà uwana tatak mavavat dza kà la sləb vok, la aslasl, bokuba dza aw.” ⁴⁰ Uwana adapəh à atà gay uwaga, apəhatəla ahàl aŋha, la azlaasik aŋha. ⁴¹ Ama taslèla vok aña makəsay aw, kà uwana marabay aduwə ndzəfa aŋatà; la abatà Yesu anavà atà: “Tatak may aga la akul la ahàl ay?” ⁴² Maslà tavəl tenma aña kilfi manazayga la pəhəw malpayga, la zuway mazuway. ⁴³ Azèb, ngaha apəf la huma aŋatà. ⁴⁴ La lig la ahəŋ agòf à atà: “Mok uwana gi la akul gəgòf à akul kà: Tatak uwana matsetserayga lakəl gulo la wakità aña Musa la abà la azlauwana la wakità aña azlaməna mapəh à atà gay à ahàl la abà kà mapəh à azladza anik, ngaha la uwana la mahabay aña David la abà gesina kà, azlayla kà vok apakà vok haday.”

⁴⁵ La abatà Yesu apakwə hanəkəli aŋatà, kà atà aña matsən wakità Zəzagəla uwaga.

⁴⁶ Ngaha agòf à atà aya: “Aganay, à gay uwana tatsətsər à abà:

‘Kristu as ngərpa dadəŋ, ngaha kà masla aña mawul à uda la mamətsay la mahənay mamakər.

⁴⁷ Kiya uwaga azlayla vok, kazàw gay uwanay à azladza gesina la sləm aṅha, kadzaw kà la abanay la Urusalima, tsəràh à makad' gəl à ahəṅ gudəṅ à vok gesina, zàw à atà gay mapəh gay la ləv ala, la gay mabasa à atà tsakana aṅatà.' ⁴⁸ Akul kà, akul azlaməna sayda aṅa uwaga. ⁴⁹ Kiya uwaga, gi la gəl gulo gədàsləlla akul Masasəfok Zəzagəla uwana à ahəṅ, Baba gulo apəh à ahəṅ uwarà, ama say: Dzàw à ahəṅ la gudəṅ uwanay tsəràh à uwana ndzəda aṅa Masasəfok uwaga adàsa à akul à gəl dadàṅ, la uwana kadàdaw.”

Mad à zagəla aṅa Yesu

(Mark 16.19-20; Sləray 1.9-11)

⁵⁰ La lig aṅa uwaga la ahəṅ gesina, Yesu asəlla atà à uda la gudəṅ la abà tsəràh à uwana tazlábèz à gudəṅ Betaniya. Mok uwana tadabəz à abatà kà adziyla ahàl à zagəla, ṅgaha apis à atà gay à vok. ⁵¹ La abatà Zəzagəla azəb à slaka aṅha. ⁵² Kiya uwaga tazləbà, ṅgaha tawùlla à Urusalima la marabay məṅga. ⁵³ Ama tadzàhà à ahəṅ koksikoksi la məṅ gày Zəzagəla la aku kà mazləb Zəzagəla.

GAY MARABƏJ UWANA YUHANA ATSETSÈR Evangile selon Jean

Gay anja ufaka ngaha la sifa

¹ Mok uwana Zəzagəla aləg madəh gudəŋ à vok dadəŋ kà, agà la ahəŋ uwana tazàlalla Gay. Gay uwatà adzà à ahəŋ la Zəzagəla. Gay uwaga kà Zəzagəla la gəl anha. ² Gay uwaga agà la Zəzagəla dagay madzəka. ³ Tatak gesina uwana Zəzagəla adahəŋ kà, kà masla; tatak anik la ahəŋ à uwana Zəzagəla adahəŋ kokuda masla aw. ⁴ Sifa kà la masla la abà, sifa uwatà kà avà ufaka à azladza. ⁵ Ufaka uwaga aùd la mələs la abà, mələs aslala vok à mamatsin ala aw.

⁶ Zəzagəla asləl dza anik uwana à waŋ, sləm anha Yuhana. ⁷ Asà à waŋ kà, kà maz sayda anja ufaka. Asà à waŋ kà, kà azladza gesina kà madiŋal gəl à vok, kà madegolay uwana apəh. ⁸ Masla à Yuhana agà ufaka la gəl anha aw, ama asà à waŋ kà maz sayda lakəl anja ufaka uwaga. ⁹ Ufaka uwaga kà agà ufaka dziriga, asà à waŋ à gudəŋ à vok, uwaga aùd à azladza gesina.

¹⁰ Gay uwaga agà la gudəŋ la vok. Zəzagəla adahə gudəŋ à vok kà la masla, ama azladza uwana la gudəŋ la vok tasəl aw. ¹¹ Agà la tataka anja azladza anha la abà, ama azladza anha takweskà. ¹² Ama azlauwana takəs, la azlauwana tadiŋal gəl à vok, avà à atà maslay kà mapakahay azlabəza anja Zəzagəla. ¹³ Tapək azlabəza anja Zəzagəla la tetəvi anja azladza la mayyay anja vədah, bokuba uwana azladza tatugway aw. Ama Zəzagəla la uwana, avà à atà sifa mawga.

¹⁴ Gay uwaga apək dza la sləb vok, adzà à ahəŋ la tataka gami la abà. Ləv anha kà tekula la slaka azladza, adahənla la dziriga, kà anha kà, apəhanula mazləbay anha, uwana la mazləbay uwana bəzi tekula abəzal la slaka Baba anha. ¹⁵ Yuhana azà sayda lakəl anha, awiyà: “Lakəl anha gəpəh à akul à uwana gəgòd: ‘Masla manəf gi à tsəh à waŋ atsà à waŋ, ama masla la uwana mazləbayga kà gi, masla kà agà la ahəŋ dagay uwana taləg mayyi gi, aduwa gi la maslay’, gəgòd à akul.”

¹⁶ Anu gesina məbəzà à masik la gorobu la abà; məbəzà à mapis gay à vok kaykay lakəl anja mapis gay à vok aya. ¹⁷ Zəzagəla avà à anu mapəhay la ahəl anja Musa, ama vok mahamay la dziriga kà tasà à waŋ kà la ahəl anja Yesu Kristu. ¹⁸ Dza adanəŋ Zəzagəla dikiđiki aw, ama Kona anha tekula gə, uwana la makəla anja Baba lakəl, la uwana apəhanula masla.

Sayda anja Yuhana masla madəh batem (Mata 3.1-12; Mark 1.1-8; Luka 3.1-18)

¹⁹ Aganay uwana Yuhana apəh à mok uwana azla Yahudiya la Urusalima tasləl azlaməna mav tatak à Zəzagəla la azlaməna sləray la mən gəy Zəzagəla la aku à slaka anha kà manaval: “Kak ma, kak uwa?” ²⁰ Akweskà mawulatàla aw, ama adzadəŋ ala la paraka la huma anjatà gesina: “Gi kà, gi Kristu aw.” ²¹ “Kak uwa zlà ma uwa? Kak Eliya, uwana tapəh uwarà ay?” “Awan, gi masla aw”, Yuhana agòd à atà. “Kak masla mapəhal gay ahəl anja Zəzagəla ay?”, tagòdal. “Awan”, agòd à atà. ²² Kiyə uwaga tagòdal: “Kak uwa zlà ma uwa? Say kapəh à anu gay ngaha mədəpəh à azlauwana tasləl anu à waŋ. Kak la gəl anjak ma: ‘Gi uwà’ kagòd lagwa uwa?” ²³ Yuhana agòd à atà: “Gi kà gi

✧ 1:21 1.21 5Musa 18.15,18; Malaki 4.5

'Kuda aña dza uwana awiyay la kəsaf la abà: Dahàw tetəvi tərta à ahəŋ kà aña Sufəl!' "✧

(Kiya uwaga à uwana masla mapəhal gay à ahəl Yesayya atsetsər à wakità Zəzagəla à abà)

²⁴ La tataka azlaməna masləl atà à waŋ uwatà la abà kà, azla Farisəya la abà.

²⁵ Tanavà Yuhana: "Tsa aña kak Kristu aw, kak Eliya aw, kak masla mapəhal gay à ahəl kà mapàh à azladza aw, ma kà mana kadàh batem zlà ma?" ²⁶ Yuhana agòd à atà: "Gi gəcfahakullan batem kà la iyaw; dza anik la ahəŋ la tataka aŋkul la abà, kasəlaw aw, ²⁷ atsa à waŋ la lig gulo la ahəŋ, ama gi bay kà gəsla kà mapəl zuwid kwimik aŋha ala babay aw."

²⁸ Tatak uwaga gesina adfahà vok la Betaniya, la gay dərəv uda anik aña mukwà Urdun, la slaka uwana Yuhana adfahà batem.

Yesu kà Magadzaw aña Zəzagəla

²⁹ La bebəŋ gà, Yuhana anəŋà Yesu atsà à waŋ à slaka aŋha, agòd: "Aganay magadzaw aña Zəzagəla uwana azəb tsakana aña gudəŋ à vok gesina. ³⁰ Lakəl aŋha la uwana gəpəh à akul, gəgòd à akul: 'Dza la ahəŋ atsa à waŋ la lig gulo. Masla la uwana mazləbayga kà gi, kà uwana masla kà, agà la ahəŋ dagay uwana taləg mayyi gi. ³¹ Gi kà gəsəl masla aw, ama gəsà à waŋ kà madàh batem aña iyaw à azlatsəhay Isərayel, kà atà aña masəl masla.' "

³² Yuhana agòd aya: "Gənəŋà Masasəfok tsikasla atsà à ahəŋ la zagəla bokuba habakoku, adzà à gəl aŋha. ³³ La mok uwatà gəsəl masla aw, ama Zəzagəla la uwana asləl gi kà gi aña madàh batem: 'Masasəfok adàdza madzay lakəl aŋha, masla kà adàdàh batem la Masasəfok Zəzagəla', agòd à gi. ³⁴ Gədanəŋ uwaga, gəgədfiŋ à afik, kà masla la uwana Kona aña Zəzagəla", Yuhana agòd.

Azlaməna matapla la slaka Yesu Kristu teraŋa

³⁵ La bebəŋ gà aya kà, Yuhana adatsizilla à ahəŋ la abatà la azlaməna matapla la slaka aŋha səla. ³⁶ Uwana anəŋà Yesu ada à awtày agòd: "Aganay Magadzaw aña Zəzagəla!" ³⁷ Azlaməna matapla aŋha səla uwaga kà, tatsənà uwana apəh, ŋgaha tanəfà Yesu. ³⁸ Yesu agolà vok, anəŋà à lig, anəŋəŋ kà tanəfà masla, ŋgaha anavà atà: "Mana kayahaw ma?" Tagòdàl: "Rabbi, kadza à ahəŋ ma lala?" (Rabbi asal magòday: Məŋga) ³⁹ Agòd à atà: "Sàw à waŋ, kadànəŋawwaŋ!" Ŋgaha tahəd, tanəŋà slaka madz à ahəŋ aŋha. (Mok uwaga kà sa ufad aña mokokhu) Tadəvə mavakay uwatà à gay atà nna.

⁴⁰ Tekula la tataka aña azladza uwana la abà tatsənà sayda aña Yuhana, anəfà Yesu, masla la uwana Andəre, deda aña Səmon Piyer. ⁴¹ Teraŋa dadəŋ, Andəre agagəm la deda aŋha Səmon, agòdàl: "Kay, mədanəŋ Kristu, bokuba magòday: dza uwana Zəzagəla afəl dzakwa à gəl!" ⁴² Adàla Səmon à slaka Yesu. Yesu anərèz masla, agòdàl: "Kak la uwana, kak Səmon kona aña Yuhana, la huma la gay sləm aŋak adəgay Kayfas." (Uwana asal magòday kà dzəgla)

Yesu azala Filip atà la Natanayel

⁴³ La bebəŋ gà, asà à Yesu kà mad à kutso Galili ŋgaha tagagəm la Filip, agòdàl: "Nəfà à gi!" ⁴⁴ Filip kà zil Betsayda, gudəŋ aŋatà tekula la Andəre la Piyer. ⁴⁵ Filip tatagəm la Natanayel, ŋgaha agòdàl: "Mədanəŋ dza uwana Musa apəh lakəl aŋha la wakità mapəhay la abà, baməraka azlaməna mapəh à atà gay à ahəl kà mapàh à azladza babay kà, tapəh lakəl aŋha, sləm aŋha kà, Yesu kona aña Yusufu uwana la gudəŋ Nazaret." ⁴⁶ Natanayel agòdàl: "Dziri kà tatak delga aguwa à waŋ la Nazaret ay?" Filip agòdàl: "Sà à waŋ, kadànəŋəŋ!"

⁴⁷ Mok uwana Yesu anəṅà Natanayel ada à awtày à slaka aṅha kà, apèh lakèl aṅha: “Aganay zil Isərayel denḍenḡa, mawisiga la ahəṅ la masla la abà aw.” ⁴⁸ Natanayel anavàl: “Kakay kasèl gi ma?” Yesu agòḍal: “Gəṅəṅà ka à mok uwana kak la tsəh gudəv, à mok uwana Filip aləg mazala ka.” ⁴⁹ Kiya uwaga Natanayel agòḍal: “Rabbi, kak la uwana kak Kona aṅa Zəzagəla, kak Sufəl aṅa azla Isərayel!” ⁵⁰ Yesu awulà ala: “Kadiṅal gəl à vok kà, kà uwana gəṅəṅà ka la tsəh gudəv, gəgòḍ à ka takay? Kadənəṅ azlatatak uwana tadəḍuw uwanay gesina.” ⁵¹ Yesu agòḍal aya: “La dziriga gəpəh à akul, kadənəṅaw zagəla mapəzl à ama ala gə. Tsad tsatsad, azlamalika aṅa Zəzagəla tadàda à afik, ṅgaha tatsa à ahəṅ à gəl aṅa Kona aṅa dza.”✧

2

Nadzipo teraṅa uwana Yesu adəhaṅ la mazəb vok la abà la Kana

¹ Uwana mahəṅay səla adada à lig kà mamakərga, kà mazəb vok apakà vok la Kana la kutso aṅa Galili. Iyà aṅa Yesu la abatà. ² Yesu atà la azlaməna matapla la slaka aṅha bay kà tazàla atà à mazəb vok uwaga à abà. ³ Mok uwana iyaw matavəruk adadəv à gay. Iyà aṅa Yesu agòḍal: “Tatak masay la ahəṅ aya aw!” ⁴ Ama Yesu awulà ala: “Mis, kak la uwana kapəh à gi uwana asa à gi madəhəṅ takay? Kaslà gulo adaslay dadəṅ aw.” ⁵ ṅgaha iyà aṅha agòḍ à azlaməna sləray: “Dahàw tatak uwana adəpəh à akul gesina!”

⁶ La abatà agà la ahəṅ yuṅ mukwà, uwana azla Yahudiya tataḍfani iyaw à abà kà madəhlaṅ sləray kà mapalahla azlaasik kà uwana uwaga kà bokuba mafəla fəla aṅatà, kà magay tsidəṅa. Kəla yuṅ tekula adəh tuguzl zlo, baṅaw mukwa. ⁷ Yesu agòḍ à atà: “Hànàw iyaw à azlayuṅ uwanay à abà pawasl papawasl.” Tahànəṅ ala bokuba uwana apèh à atà. ⁸ Kiya uwaga Yesu agòḍ à atà: “Tadəwni iyaw uwaga ṅuv, kadawla à mənḡa aṅa madəvaday.” Tatəḍfani, tadàlla. ⁹ Mənḡa aṅa madəvaday atapəṅ, kà apək iyaw matavəruk. Masla asəl slaka uwana aguwa à waṅ à abà aw. (Ama azlaməna matat iyaw kà, tasəl slaka uwana aguwa à waṅ la abà) Azàla masla mazəb mis, ¹⁰ ṅgaha agòḍal: “Azladza kà tatsəvkàh mavəhay kà iyaw matavəruk matsidəyga dadəṅ, baṅa azlaməna mazaləh atà gesina tasay kà, la lig la ahəṅ kà pəra, tavəh uwana atsidə aw. Ama kak kà, kabək matsidəyga à ahəṅ dadəṅ.”

¹¹ Uwaga la uwana nadzipo matera uwana Yesu adəhaṅ la Kana la kutso Galili, apəhla mazləbay aṅha ala, kà uwana à uwana azlaməna matapla la slaka aṅha tadṅ gəl à masla à vok.

¹² La lig aṅa uwaga la ahəṅ, ahəd à gudəṅ Kapernahum la iyà aṅha, la azladedə aṅha, la azlaməna matapla la slaka aṅha, tadzani à ahəṅ la abatà.

Yesu la mənḡ gày Zəzagəla la aku

(Mata 21.12-13; Mark 11.15-17; Luka 19.45-46)

¹³ Uwana madəvaday aṅa Paska aṅa azla Yahudiya nekwa kà, Yesu ahəd à Urusailima.✧ ¹⁴ Abəz azlaməna matsakalay à gəl, la mənḡ gày Zəzagəla la aku. Tadəw sla ala, la azlatuwaṅ, la azlahabakoku, abəz azlaməna mabəḍla sili à gəl bay, tadzəh madzay la huma aṅa sili aṅatà, tabəḍla. ¹⁵ Adəhà kurpi aṅa zuwidə, akudəkàh atà à lag gesina la mənḡ gày Zəzagəla la aku, la azlatuwaṅ, la azlasla aṅatà, adakwà table aṅa azlaməna mabəḍla sili à vəḍah anasà sili aṅatà ala. ¹⁶ ṅgaha agòḍ à azlaməna madaw azlahabakoku ala: “Həlàw atà ala la abanay! Kapakəw gày aṅa baba gulo ala kà gày matsakalay aw!” ¹⁷ Təh, awul à azlaməna matapla la slaka aṅha gay uwana tatsetsər à wakità Zəzagəla à abà à gəl:

'Mawoy gày aṅak gulo kà, bokuba akəl uwana ababəhgəla ləv la tsəh.'✧

¹⁸ Ama azlamadzahaga aṅa azla Yahudiya tanavàl: “Tsəhay nadzipo ma uwala kapəhanula kà anu aṅa masəlay kà kak la maslay kà madəhəṅ kiya uwanay la?”
¹⁹ Yesu agòḍ à atà: “Kàlāw məṅ gày Zəzagəla uwanay à ahəṅ, ṅgaha gədàula à afik la mahəṅay makər.”
²⁰ Azla Yahudiya tagòḍal: “Gày uwanay taṅàl kà tadəhà mavay dzik ufaḍ gəl aṅha mukwà, kà pəra masla kadàwula à afik la mahəṅay makər kagòḍ, aah..?!”
²¹ Ama məṅ gày Zəzagəla uwana Yesu apəh, kà lakəl aṅa vok aṅha.
²² Uwana Yesu adawula à uda la mamətsay kà, təh awùl à azlaməna matapla à gəl la slaka aṅha à gay uwaga, tadinḅ gəl uwana à vok matsetserayga, ṅgaha la gay uwana Yesu apəh à atà gesina.

Yesu kà asəl tatak uwana la ləv aṅa dza la tsəh gesina

²³ Mok uwana Yesu la Urusalima, la kaslā aṅa madəvaday aṅa Paska kà, azladza aṅuvaw tadinḅ gəl à vok, kà azlanadzipo uwana adəhàtəṅ.
²⁴ Ama Yesu afà à atà gəl aw, kà uwana asəl madzugway aṅatà lela.
²⁵ Kà uwana masla kà anəkudà dza aṅa mapəhalla madzugway aw, kà uwana masla la gəl aṅha asəl uwana la ləv aṅatà la tsəh.

3

Yesu atà la Nikodemus

¹ Dza anik la ahəṅ sləm aṅha Nikodemus, agà tekula aṅa azlamasiga aṅa azla Yahudiya, masla kà zil Farisəya.
² La vəḍ la abà vərđi anik asà à waṅ à slaka Yesu la magòḍal: “Rabbi, məsəl kà Zəzagəla asləl ka à waṅ kà matapanula, kà uwana dza la ahəṅ adəhəṅ tsəhay nadzipo uwaga kadəhəṅ aw, tsa baṅa Zəzagəla la masla aw aw.”
³ Yesu agòḍal: “Haḍay, gəgòḍ à ka la dziriga: Dza aslala vok manəṅ makoray Zəzagəla aw, say baṅa adayyi vok mawga dāṅ.”
⁴ Nikodemus anavàl: “Kakay dza adagay magol gā, kà ayyi vok mawga aya ma? Aslala vok aṅa maul à huḍ aṅa iyà aṅha kà mayyay aya ay?”
⁵ Yesu agòḍal: “La dziriga gəpəh à ka: Dza aslala vok aṅa mad à makoray Zəzagəla aw, say baṅa adayyi vok, la iyaw ṅgaha la Masasəḍok.”
⁶ Uwana tayyà la sləb vok, uwaga sləb vok; uwana tayyà la Masasəḍok, uwaga Masasəḍok.
⁷ Ləv avàl à ka à gay kà, kà uwaga gəpəh à ka aw: ‘Azlawla kà vok, say akul gesina kayyaw vok mawga.’
⁸ Afad adəḍay bokuba uwana asal; katsəna madəḍay aṅha, ama kasəl slaka uwana asà à waṅ la abà aw, kasəl slaka uwana ada à abà aw. Kiya uwaga à uwana apaka vok la azladza uwana tayyà vok la Masasəḍok.”
⁹ Kiya uwaga Nikodemus agòḍal: “Kakay uwaga apaka vok ma?”
¹⁰ Yesu agòḍal: “Tsa kak masla matapla à azla Isərayel la abà, kà pəra masla kasəl uwaga aw uwà?”
¹¹ Gəpəh à ka la dziriga: Məpəhay lakəl aṅa tatak uwana məsəl, ṅgaha lakəl aṅa tatak uwana mənəṅəṅ. Ama asa à akul makəs sayda gami aw.
¹² Tsa kadinḅaw gəl à gay aṅa azlatatak uwana apaka vok la vəḍah aw ma, ṅgaha ma, kakay zlà ma kadəkəsaw kaslawwal à vok aṅa madinḅ gəl à vok à baṅa gəpəh à akul gay aṅa azlatatak la zagəla ma?
¹³ Dza la ahəṅ adada à zagəla aw, tsa baṅa Kona aṅa dza uwana asà à ahəṅ la afik aw aw.”

¹⁴ “Kiya uwana uwarà Musa adzilà bebi aṅa adà à zagəla la ahəf la gay la fəta la abà, kiya uwaga tadədzilla Kona aṅa dza à zagəla suwaṅ.”
¹⁵ ṅgaha kəla uwabeyuwi uwana adinḅ gəl à masla à vok abəz sifa adəv à gay aw.
¹⁶ Kà uwana Zəzagəla awoya gudəṅ à vok kà kaykay, à uwana avà Kona aṅha tekula gā uwaga, kà dēwdēw dza uwana tadinḅ gəl à vok kà, tazila aw, ama kà, tadəbəz sifa adəv gay aw.
¹⁷ Zəzagəla asləl Kona aṅha à waṅ kà, kà seriya à gudəṅ à vok à gəl aw, ama kà gudəṅ à vok aṅa mabəz mabəlay la masla.”

✧ 3:14 3.14 4Musa 21.9

¹⁸ “Dza uwana adiŋ gəl à Kona à vok, seriya adàkəsay aw, ama dza uwana adiŋal gəl à vok aw kà, seriya adakəsay, kà uwana adiŋ gəl à Kona tekula gà aŋa Zəzagəla à vok aw. ¹⁹ Aganay slaka uwana seriya aguwaŋ la abà: Udfaka asà à waŋ à gudəŋ à vok, ama azladza tahaya mələs kà udfaka, kà uwana maɗehəŋ aŋatà kà delgaw. ²⁰ Azladza gesina taɗàh mawisiga kà, tapəsew dziriga aŋa udfaka, ŋgaha tatsa à waŋ à udfaka à abà aw, kà uwana asa à atà kà sləray mawisiga uwaga aŋa mapəhla vok ala, la udfaka la abà aw. ²¹ Ama dza uwana akəs dziriga kà, aday kà la udfaka la abà, kà azladza gesina aŋa manəŋəŋ la dazuwaya, kà akəs gay aŋa Zəzagəla la masləkaway.”

Yesu atà la Yuhana masla maɗàh batem

²² La lig aŋa uwaga la ahəŋ Yesu atsizilla ala, ahəd à kutso aŋa Yahudiya à abà la azlaməna matapla la slaka aŋha. Tasàfàni la abatà atà nna, taɗahàhà batem. ²³ La kaslà uwatà kà Yuhana aɗahàhà batem à azladza la Aynon, uwana nekwa la Salim, kà uwana iyaw la ahəŋ la abatà məŋga. Azladza tasàhà à waŋ à slaka aŋha, ŋgaha aɗahà à atà batem, suwaŋ. ²⁴ (La kaslà uwatà kà, Yuhana kà taɗùw à daŋay daɗàŋ aw)

²⁵ Kiya uwaga azlaanik la tataka azlaməna matapla aŋa Yuhana la abà taɗzəkà mabay vok gay la zil Yahudiya anik, lakəl aŋa tsəhay mapal vok aŋatà aŋa magay tsidəŋa. ²⁶ Tahəd à slaka Yuhana ŋgaha tagòɗal: “Rabbi, kadzugway lakəl aŋa dza uwana kagaw akul səla la gay dərəv uda aŋa mukwà Urdun, uwana kaz anu sayda lakəl aŋha takay? Lagwa kà, masla bay kà, aɗàh batem à azladza, azladza takəl à slaka aŋha gesina!” ²⁷ Yuhana agòɗ à atà: “Dza la ahəŋ aslala vok abəz tatak aw, say baŋa Zəzagəla aɗavàl. ²⁸ Akul la gəl aŋkul kà, akul azlaməna sayda gulo, gəgòɗ kà: Gi Kristu aw. Ama gi à masləl gi à waŋ gà, la huma aŋha pəra. ²⁹ Masla mazəb mis kà masla la uwana zil mis. Ama sləgud aŋa zil misga, adatsizilla à ahəŋ la makəla aŋha, atsəbal sləm. Baŋa adatsən kuda aŋa zil mis, arabay. Kiya uwaga à marabay gulo babay suwaŋ zlà. Lagwa kà, marabay gulo aɗahənla pawasla. ³⁰ Kà aŋa uwaga kà, say masla agay mazləbaya, ŋgaha mazləbay gulo atatuway.”

Dza uwana asa à ahəŋ la zagəla

³¹ “Dza uwana asa à ahəŋ la zagəla, masla lakəl aŋa azlatatak gesina, ama dza uwana la vəɗah masla dza aŋa vəɗah, apəhay kà gay aŋa vəɗah bay. Uwana asa à ahəŋ la zagəla aga lakəl aŋa tatak gesina. ³² Uwana anəŋàŋ, uwana atsənàŋ la uwana apəhay, ama dza akəs mapəhay aŋha aw. ³³ Kəla uwabeyuwi uwana akəs mapəhay aŋha, agəɗaŋ à afik kà Zəzagəla kà dziriga. ³⁴ Dza uwana Zəzagəla asləlla à waŋ apəhay gay aŋa Zəzagəla, kà uwana ahənəŋ ala la Masasəɗok aŋha. ³⁵ Baba awoya Kona aŋha, ŋgaha avàl ndzəɗa lakəl aŋa tatak gesina. ³⁶ Dza uwana adiŋ gəl à Kona à vok, abəz sifa aɗəv à gay aw, ama dza uwana akweska Kona, aɗàbəz sifa uwaga tetuwa à aw, ama mapak ləv aŋa Zəzagəla adza à ahəŋ lakəl aŋha.”

4

Yesu atà la mis Samariya

¹ Azla Farisəya tatsənàŋ kà Yesu aɗàh batem, ŋgaha abəz azlaməna matapla ɗaɗuwa à gay aŋa Yuhana. ² (Ama Yesu la gəl aŋha kà aɗahà batem à dza amiyaka tekula aw, say azlaməna matapla la slaka aŋha pəra) ³ Mok uwana Yesu atsənà uwaga tapəhay kà, asàk à kutso Yahudiya à ahəŋ, awùl à Galili. ⁴ Kà awùl à Galili kà, say aguwa à uda la kutso Samariya.

⁵ La mas à uda la Samariya abəz à gudəŋ uwana à abà sləm aŋha Səser, uwana nekwa la guf uwana Yakuba avà à kona aŋha Yusufu. ⁶ La abatà suwa aŋa Yakuba la ahəŋ, Yesu aɗày vok la mauguzahay aŋha la abà, adzà madzay la gay suwa. Mok

✧ 4:5 4.5 1Musa 33.19; Josu'e 24.32

uwaga azlagay tataka afats. ⁷ Mis Samariya asà à waɲ kà matəf iyaw, Yesu agòfal: “Mis təd à gi iyaw, gəsay!” ⁸ (La kaslà uwatà kà, azlaməna matapla aɲha tadà à huɗ gudəɲ kà mayàh tatak may) ⁹ Mis Samariya agòf à Yesu: “Kak, kak zil Yahudiya! Kakay kaslala vok kà manav à gi iyaw masay à gi uwana gi mis Samariya ma?”[✧] (Apèh kiya uwaga kà, kà uwana azla Yahudiya tatsənà vok la azla Samariya aw ma) ¹⁰ Yesu awulà ala: “Agayɲa kasəl tatak uwana Zəzagəla avà y kà, ɲgaha naka kasəl dza uwana anava à ka iyaw masay kà, naka kak la uwana kanaval iyaw sifa, ɲgaha naka avà kà uwaga.” ¹¹ Mis agòfal: “Məɲga, tsa tatak matəfɪa iyaw aga la kak là ahàl aw, suwa bay kà kərkər ma, kakay kabəz iyaw sifa ma? ¹² Baba gami madzidziga Yakuba avà à anu suwa uwanay; bay kà asàh la azlabəza aɲha la azlaləmmana aɲha babay. Kadzugw ma, ‘Gəɗuwa Yakuba’, kagoɗ, takay?” ¹³ Yesu awulà ala: “Kəla uwa-beyuwi uwana asà iyaw aɲa suwa uwanay, nəlay adəkəsəy aya, ¹⁴ ama dza uwana adəsəy iyaw uwana gədətəɗfallaɲ kà, nəlay adəkəsəy aya aw. Kà uwana iyaw uwana gədətəɗfallaɲ kà, adəpakay la huɗ aɲha mukwà aɲa iyaw, uwana akəlay aɲa sifa adəv à gay aw.” ¹⁵ Mis agòfal: “Məɲga, tədəgəɲ iyaw uwaga, kà nəlay aɲa makəs gi aya aw, ɲgaha kà gi aɲa manəkudfa aɲa mas à waɲ aɲa matəf iyaw la abanay aya aw.”

¹⁶ Yesu agòfal: “Həd, kazala zil aɲak, kasawwaɲ à abanay.” ¹⁷ Mis agòfal: “Zil gulo la ahəɲ aw.” Yesu agòfal: “Dziriga à uwana kapèh: ‘Zil gulo la ahəɲ aw’, kagoɗ. ¹⁸ Haɗay, kadàh à zil zlo, ama uwana kak la mtəga aɲha lagwa kà, zil aɲak aw. Kapèh dziriga.” ¹⁹ Kiya uwaga mis agòfal: “Məɲga, gəsəl kà kak masla mapəhal gay à ahàl aɲa Zəzagəla. ²⁰ Azlababa gami madzidziga tadavàh kudfa à Zəzagəla la gudəɲ uwanay la afik, ama akul azla Yahudiya kà, kagoɗaw kà: ‘Slaka uwana dza adəv kudfa à Zəzagəla, kà la Urusalima’, kagoɗaw.” ²¹ Yesu agòfal: “Mis, dɪɲ à gi gəl à vok, kaslà adàsa à waɲ à uwana kadədəvaw kudfa à Baba Zəzagəla la gudəɲ uwanay la afik aw, amiyaka la Urusalima aw. ²² Akul azla Samariya kasəlaw tatak uwana kadəvawwal kudfa aw; ama anu, anu azla Yahudiya kà, məsəl tatak uwana mədəval kudfa, kà uwana mabəlay kà, asa à uda kà la azla Yahudiya la abà. ²³ Ama kaslà adàsa à waɲ, lagwa kà adasa à waɲ lagwa, uwana azlaməna madəv kudfa tadədəv kudfa la Masasəɗok ɲgaha la dziriga, azladza uwana tadəv kudfa kiya uwaga à ahəɲ, à uwana Baba ayahay. ²⁴ Zəzagəla kà Masasəɗok gə, azlauwla kà vok kà, azlauwana tadəval kudfa kà la Masasəɗok ɲgaha la dziriga.”

²⁵ Mis agòfal: “Məsəl kà Mesi atsa à waɲ, uwana asal magoɗay kà Kristu. A baɲa adàsa à waɲ, adəpəhanula tatak gesina.” ²⁶ Yesu agòfal: “Gi gə la uwaga gəbada-kama lagwa.”

²⁷ La kaslà uwatà, azlaməna matapla la slaka aɲha tawùl à waɲ, ɲgaha ləv avàl à atà à gay kà uwana tavàts gay la mis. Ama dza aslala vok aɲa manaval aw: “Mana asal mi? Baɲaw, kà mana kabaɗawma akul səla mi?”, la ahəɲ aw.

²⁸ Kiya uwaga mis asək à tuguzl aɲha à ahəɲ, ahəd à huɗ gudəɲ à abà, la abatà agòf à azladza: ²⁹ “Sàw à waɲ, kà nəɲàwwaɲ dza uwana adapəh à gi tatak uwana gəɗahàhàɲ gesina. Zlahaw kà, masla Kristu aw ay?” ³⁰ Azladza tasà à uda la gudəɲ la abà, tahəd à slaka Yesu.

³¹ La kaslà uwatà azlaməna matapla tadəv kudfa à Yesu kà mazuw tatak may. “Rabbi, kamkam zùw tatak may!”, tagòfal. ³² Ama agòf à atà: “Gi la tatak may uwana kasəlaw aw.” ³³ La abatà azlaməna matapla tanəv vok kà atà kà atà: “Dza anik adasalla tatak may à waɲ kəlay?”

³⁴ Yesu agòf à atà: “Tatak may gulo kà, makəs gay aɲa dza uwana asləl gi à waɲ, ɲgaha maɗàh sləray uwana afà à gi à ahàl kà maɗehəɲ. ³⁵ Akul kà, kagoɗaw kà, à lig təla uɗaf kà matsəɗ tatak, ama gi kà gəgoɗ à akul kà, nərəzàw guf lela tsi,

✧ 4:9 4.9 Ezəra 4.1-5; Nehemiya 4.1-2

hi adahənyay, nekwa kà matsəḍfay. ³⁶ Masla matsəḍf tatak abəz masik aṅha, ɲgaha ahama hi à ahəṅ kà aṅa sifa adəv à gay aw, ɲgaha kà masla masləkay atà la masla matsəḍfay tarabay la slaka gà. ³⁷ 'Dza anik asləkay, dza anik atsəḍfay', uwana gay la gay la abà agodf kà, bə dziriga. ³⁸ Gəsləl akul kà matsəḍfay la guf uwana la abà kadəhaw sləray la abà aw; azladza anik tadəhà sləray gà uwana, ɲgaha kà kabəzaw à gəl kà sləray aṅatà.”

³⁹ Azla Samariya aṅuvaw tadɪṅal gəl à vok la gudəṅ uwatà kà gay uwana mis apəh à atà: “Apəh à gi tatak gesina uwana gəḍahàhəṅ”, mis agodf à atà. ⁴⁰ Mok uwana tadasa à waṅ à slaka Yesu, tadəval kuḍa kà madzin à ahəṅ atà nna; kiya uwaga Yesu adəhà mavakay səla atà nna. ⁴¹ Gotənaṅ aṅuvaw tadɪṅ gəl à Yesu à vok, kà gay aṅha uwana apəh à atà. ⁴² La abatà tagodf à mis: “Lagwa kà, məḍɪṅal gəl à vok kà uwana kapəh à anu pəra aw, ama kà uwana anu la gəl gami məḍatsəṅəṅ uwana apəh, la dziriga, məsəl kà masla la uwana masla məbəl gudəṅ à vok.”

Yesu awur bəzi aṅa məṅga aṅa masla sləray ala

⁴³ Mok uwana Yesu adadza à ahəṅ la abatà mavakay səla, asək atà à ahəṅ, ahəd à kutso Galili. ⁴⁴ Yesu la gəl aṅha agodf: “Masla məpəhal gay à ahəl aṅa Zəzagəla məbəz mazləbay la gudəṅ aṅha la abà aw.” ⁴⁵ Ama tekefik mok uwana adabəzay à gudəṅ aṅha, azladza takəs la ahəl səla, kà uwana mok uwana tahəd à madəvaday à Urusalima, tanəṅəṅ, uwana adəhəṅ la madəvaday uwatà la abà gesina.

⁴⁶ La kaslə uwatà, masla awul à Kana, la slaka uwana apakà iyaw ala kà iyaw matavəruk. Kana uwaga agà kà la Galili la abà. Masla sləray aṅa gumna la ahəṅ la abatà, bəzi aṅha la dʒuvats la Kapernahum. ⁴⁷ Mok uwana masla sləray uwaga atsəṅəṅ kà Yesu adasa à waṅ à Yahudiya la Galili kà, masla atsizlla ala, ahəd à slaka Yesu, adəval kuḍa kà manəf masla à Kapernahum, kà masla aṅa mawur bəzi aṅha ala. Kà uwana bəzi agà kà la ləv la ləv pəra. ⁴⁸ Yesu agodf: “Akul gesina, kadiṅaw gi gəl à vok aw, say baṅa kadəṅəṅaw azlanadzipo la uwana kadəḍɪṅawwal gəl à vok.” ⁴⁹ Masla sləray agodf: “Məṅga, sà à waṅ à mtəga gulo dadəṅ, kà mamətsay aṅa bəzi gulo.” ⁵⁰ Yesu agodf: “Həd à mtəga aṅak, bəzi aṅak aga la ahəṅ, adza à ahəṅ la sifa, awkà adəmətsay aw.” Zil uwaga adɪṅ gəl à uwaga à vok Yesu apəhal. ⁵¹ Uwana agà la tetəvi la ama, kà mawul à mtəga, tagagəm la azlaməna sləray aṅha, maslə tagodf: “Bəzi aṅak adabəlay!” ⁵² Masla anəv à atà la məl, ma uwala abəzà à ɲuləm la. Tagodf: “Lakuḥu la sa tekula, à uwana akəl vok asəlla vok ala.” ⁵³ Kiya uwaga awul à baba à gəl kà kalkal la kaslə uwana Yesu apəhal: “Bəzi aṅak adabəlay”, agodf. Kà uwaga à uwana masla la azlaməna huḍ gay aṅha gesina tadɪṅ gəl à Yesu à vok.

⁵⁴ Uwaga kà masəla aṅa nadzipo uwana Yesu adəhəṅ dagay la mas à uda aṅha la Yahudiya, la kutso Galili.

5

Yesu awur dza magul à afik gə ala

¹ Uwana uwaga adada à lig, azla Yahudiya tadzəkà mahab madəvaday, Yesu bay ahəd à Urusalima. ² La gudəṅ uwatà la abà nekwa la gamagəy aṅa azlatuwaṅ, agà la ahəṅ iyaw matsakayga uwana sləm aṅha la gay ibəranəṅkowen: *Betsata*. Iyaw uwatà tanudə ala à gay à abà la azlatsatsagla zlo. ³ La tsəh aṅa tsatsagala uwatà, azlaməna dʒuvats aṅuvaw tahəṅəṅəṅ hal à tsəh: azlaguləf, azladeri, azlamagul à afik gə. ((Takudəh məbələk vok aṅa iyaw uwana abələkəhà à vok. ⁴ Kwà à kwà malika aṅa Zəzagəla asəh à ahəṅ aṅa məbələkəh iyaw uwaga. Masla dʒuvats uwana atsa à vok à iyaw uwaga à abà abələkay, awur ala la dʒuvats aṅha la abà, baməraḳa dʒuvats tsəhay gə uwala beyli gesina.)) ⁵ Masla dʒuvats anik la ahəṅ la abatà, adadəh mavay dzik

makər gəl aṅha mtəgis. ⁶ Uwana Yesu anəṅà dza uwatà la slaka mahən à ahəṅ, asəl kà adasafay la dʒuvats aṅha uwaga la abà, Yesu agòdʒal: “Asa à ka mawur ala ay?” ⁷ Masla dʒuvats awulà ala, anəṅal à adi agòdʒal: “Məṅga, dza gulo la ahəṅ aṅa madla gi à abà la kaslā uwana iyaw aβəlak vok aw. Baṅa gəwadʒ vok à uda, gəda à abà zlā, gədaḡodʒay kà dza anik atsà à vok à abà kà gi.” ⁸ Yesu agòdʒal: “Sà à afik, zəb butsi aṅak, ṅgaha dà aṅak!” ⁹ Hadzak, asà à afik awùr ala, akəl butsi aṅha à abà, adzəkà maday.

Ama mavakay uwatà kà mavakay maduw ləv tekedʒik. ¹⁰ Uwana azlamasiga aṅa azla Yahudiya tanəṅəṅ, tagòdʒ à dza uwana awùr ala: “Lakana kà vuđ maduw ləv, wakità mapəhay gami avà tetəvi kà mazəb butsi aṅak aw!”[✧] ¹¹ Agòdʒ à atà: “Dza uwana awurà gi ala agòdʒ à gi: ‘Kəl butsi aṅak à abà, ṅgaha dà aṅak’, agòdʒ à gi.” ¹² Tanavàl la gay ala: “Ūwa à dza uwana ‘Zəb butsi aṅak, dà aṅak’, agòdʒ à ka uwa?” ¹³ Ama dza uwana awurà ala kà, asəl dza uwana awurəṅ ala aw. Yesu adadiy aṅha la abatà, kà uwana maham à ahəṅ dza aṅuvaw la abatà.

¹⁴ Zweek, la huma la gay, Yesu agagəm à məṅ gəy Zəzagəla à agu atà səla, ṅgaha agòdʒal: “Tsənəṅ lagwa kà kawùr ala. Kadahəṅ tsakana aya kà tatak mawisiga uwana aduwa uwanay aṅa mabəza kà aya aw!” ¹⁵ Dza uwaga adà aṅha, ṅgaha agòdʒ à azla Yahudiya kà Yesu la uwana awurəṅla. ¹⁶ Kà uwaga à uwana azla Yahudiya tadzəkà matərəb Yesu, à kà uwana awurà dza ala la vuđ maduw ləv. ¹⁷ Ama Yesu agòdʒ à atà: “Baba gulo adəh sləray koksikoksi, gi bay kà gədehəṅ kiya uwaga suwaṅ.”

¹⁸ Kà gay uwaga à uwana, azla Yahudiya tayəh kaykay kà makəday, kà uwana agòdʒ kà Zəzagəla kà Baba aṅha, ṅgaha agagazləla gəl aṅha la Zəzagəla. Awkà kà, uwana apəsəw mavakay maduw ləv pəra aw.

Maslay aṅa Kona aṅa Zəzagəla

¹⁹ Kà uwaga, Yesu agòdʒ à atà: “Gəgodʒ à akul la dziriga, Kona aslala vok madəh tatak la gəl aṅha aw, say anəṅəṅ kà say uwana Baba adəhəṅ. Uwana Baba adəhəṅ gesina, uwaga la uwana Kona adəhəṅ babay. ²⁰ Kà uwana Baba awoya Kona, apəhalla uwana adəhəṅ gesina. Adəpəhalla à azlatatak uwana aduwa uwanay aya, kà Kona aṅa madəh uwaga. ṅgaha uwaga adaval akul ala ləv à gay. ²¹ Bokuba uwana Baba awùlla azlamazimnekidʒ à uda la mamətsay kà mav à atà sifa kà, kiya uwaga babay Kona av sifa à uwabeyuwi uwana awoyaṅ gesina. ²² Baba kà adəh seriya à dza à gəl aw, ama avà maslay madəh seriya uwaga à ahəl aṅa Kona aṅha gesina, ²³ kà azladza gesina aṅa masləkaway Kona, bokuba uwana tasləkaw Baba. Dza uwana asləkaw Kona aw, masla asləkaw Baba uwana asləl à waṅ babay aw.”

²⁴ “Gəpəh à akul la dziriga, dza uwana atsəb sləm à gay gulo, ṅgaha adiṅ gəl à dza uwana à vok asləl gi à waṅ kà, masla la sifa adəv à gay aw. Seriya adəkəsay aw, aguwa à uda la mamətsay, adəbəz sifa adəv à gay aw. ²⁵ Haday gəgodʒ à akul la dziriga, kaslā atsa à waṅ, ṅgaha kaslā uwaga aga la tataka gami la abà lagwa, uwana azlamazimnekidʒ tadətsenəṅ kuda aṅa Kona aṅa Zəzagəla, ṅgaha kà azla-uwana tadəkədedʒal à ahəṅ tadədz à ahəṅ la sifa. ²⁶ Iyay, bokuba uwana Baba la maslay kà mavəy sifa adəv à gay aw à azladza, kiya uwaga bay avà maslay uwaga à Kona aṅha à ahəl, kà masla aṅa mav sifa à azladza. ²⁷ Avà maslay à Kona aṅha kà madəh seriya, kà uwana masla Kona aṅa Zəzagəla. ²⁸ Ləv aval à akul à gay kà uwaga aw, kà uwana kaslā atsa à waṅ, à uwana azlamazimnekidʒ uwana la zəvay la aku gesina tadətsən kuda aṅha, ²⁹ ṅgaha tadəsa à uda la zəvay aṅatà la aku. Azladza uwana tadəhəṅ delga tadəwula à uda kà mabəzal masik aṅatà uwana sifa adəv à gay aw, ama azlauwana tadəhəṅ mawisiga tadəwula à uda kà madəhətaṅ seriya à gəl.”[✧]

✧ 5:10 5.10 Nehemiya 13.19; Yeremiya 17.21 ✧ 5:29 5.29 Daniyel 12.2

Azlamasəlay uwana lakəl maslay aṇa Yesu

³⁰ “Gi la gəl gulo kà gəslala vok kà madfàh tatak aw, gədfàh seriya kà bokuba uwana ‘Dahàn’, Baba agòd à gi, seriya gulo kà dziriga, kà uwana gəyàh mawoyəṇ aṇa gəl gulo aw. Ama uwana asa à dza uwana aslèl gi à waṇ pəra. ³¹ Baṇa gəz sayda aṇa gəl gulo kà, sayda gulo kà agay dziriga aw. ³² Ama say dza anik la uwana az sayda lakəl gulo, gəsəl kà sayda uwana aziṇ lakəl gulo kà dziriga. ³³ Kasləlaw azlaməna matsəb sləm à slaka Yuhana, sayda aṇha uwana azaṇ kà dziriga. ³⁴ Ama gi kà gənəkudfa aṇa sayda aṇa dza aw, gəula akul à gəl kà, kà akul aṇa maβəz maβəlay pəra. ³⁵ Yuhana kà agà kà bokuba fənəs mavatsiṇ à ahəṇ gà pəra, ṅgaha karabaw ṅuv la udaka aṇha la abà. ³⁶ Ama sayda gulo uwana gəziṇ kà, aduwà aṇa Yuhana uwana azàṇ, azlasləray uwana Baba gulo avà à gi kà mahənəṇla kà, taz sayda gulo. ṅgaha babay kà apəhla ala kà Baba la uwana aslèl gi à waṇ. ³⁷ Baba uwana aslèl gi à waṇ apəhay lakəl gulo aya. Akul kà kadàtsənaw kuda aṇha didi aw, ṅgaha kadənəṇaw huɸ adi aṇha babay aw. ³⁸ Akul kafaw gay aṇha à ləv aṅkul à tsəh aw, kà uwana kadiṇawwal gəl à vok à dza uwana aslèl à waṇ aw. ³⁹ Kadzeṇaw wakità Zəzagəla la haṅkəli, kadzugwaw kà: ‘La abà la uwana mədàβəz sifa adəv à gay aw’, kagodfaw. Bə dziri hadfay gà, la wakità uwaga la abà la uwana sayda gulo. ⁴⁰ Ama asa à akul aṇa mas à slaka gulo aṇa maβəz sifa dziriga aw.”

⁴¹ “Ama gi kà, gəyàh mazləb gi aṇa azladza aw. ⁴² Ama akul kà, gəsəl kà, kawoyaw Zəzagəla la ləv aṅkul la tsəh aw. ⁴³ Gəsà à ahəṇ kà la sləm aṇa Baba gulo, ama karabaw gi à huma aw. Ama baṇa dza anik atsa à waṇ la maslay aṇa aslasl gəl aṇha kà, kakəsaw. ⁴⁴ Akul asa à akul mayàh mazləbay aṇa azladza anik anik, ṅgaha kayahaw mazləbay uwana asa à ahəṇ la slaka Zəzagəla dziriga aw. ṅgaha ma kakay kadiṇaw gəl à vok ma? ⁴⁵ Ama kadzugwaw kà, gədàta akul kaf à gəl la slaka Baba gulo, kagodfaw aw. Ama Musa la uwana adàta à akul kaf à gəl, à masla uwana kafaw manəwəṇ aṅkul à masla à afik. ⁴⁶ Agayṇa ndzer, kadiṇaw gəl à Musa à vok kà, naka kadiṇaw gi gəl à vok babay, kà uwana Musa atsetsèr kà lakəl gulo. ⁴⁷ Ama tsa kadiṇaw gəl à uwana à vok atsetsèr aw ma, kakay kadiṇaw gəl à gay gulo à vok zlà ma?”

6

Yesu av tatak may à azlazil dəbow zlo

(Mata 14.13-21; Mark 6.30-44; Luka 9.10-17)

¹ La lig aṇa uwaga la ahəṇ, Yesu ahəd à gay dərəv à uda anik aṇa dərəv Galili, uwana tazalalla bay dərəv Tiberiya. ² Maham à ahəṇ dza aṇuvaw tanəfà, kà uwana tanaṇà azlanadzipo uwana adfahàhàṇ la mawar azladza ala. ³ Yesu ahəd à dadəgwal à afik la abatà, tadzà madzay la azlaməna matapla la slaka aṇha. ⁴ Paska, madəvaday aṇa azla Yahudiya, nekwa. ⁵ Uwana Yesu anəṇà maham à ahəṇ dza aṇuvaw tatsà à waṇ à slaka aṇha, Yesu atàp à Filip agòdɸal: “Lala mədàβəz tatak may kà masukway, kà mav à maham à ahəṇ dza uwanay aṇa mazuway zlà?” ⁶ Apəh uwaga kà, kà matap Filip. Awkà, masla kà asəl tatak uwana naka adəhəṇ. ⁷ Filip agòdɸal: “Amiyaka məsukw kaf aṇa gursu dadərmokw səla bay kà, aslay kà kəla uwabeyuwi aṇatà aṇa maβəzal ṅuv aw.” ⁸ Tekula la tataka azlaməna matapla aṇha la abà Andəre, deda aṇa Səmon Piyer agòdɸal: ⁹ “Bəzi kohna anik la ahəṇ la abanay, kaf gay bərsew zlo la kilfi səla la ahəl, ama uwaga ma, mana akəs à vok aṇa maham à ahəṇ dza kiya uwanay ma?” ¹⁰ Kiya uwaga Yesu agòd à atà: “Dzàw azladza madzay gesina, slaka uwatà kà delga kà madzàh madzay, kà uwana kəsaf la ahəṇ.” ṅgaha atà tadzàhà madzay gesina aṇatà taslay zil dəbow zlo. ¹¹ Yesu ahəl kaf uwaga, “Kikay”, agòd à Zəzagəla, atsakà kaf ala, ṅgaha avàhà à azladza. Ahəl kilfi, adfahàṇ kalkal kiya uwaga aya. Tazùw tsəràh à uwana asläh à atà. ¹² Mok uwana tahànla gesina, Yesu agòd à

azlaməna matapla la slaka aṅha: “Hamàw gay à mapətsèh pətsèhga uwaga à vok, atəɖfal ala amiyaka tekula aw.” ¹³ Ngaha tahamà gay à mapətsèh pətsèhga uwana à vok atəm a atà à ahəl, tahənənṅ ala takosà kulo gəl aṅha səla.

¹⁴ Uwana azladza tanəṅənṅ nadzipo uwana Yesu adahənṅ, tagòɖ: “Kayyà, dza uwanay ndzer kà masla mapəhal gay à ahəl, uwana naka atsa à waṅ à gudəṅ à vok!” ¹⁵ Uwana Yesu asəl kà azladza tatsà à waṅ kà mafiya à sufəl à abà la ndzəɖa kà, kà uwaga à uwana adà aṅha à gudəṅ à afik kokudfa gəl aṅha.

Yesu aday lakəl dərəv

(Mata 14.22-23; Mark 6.45-52)

¹⁶ Mok uwana mokokhu adasa à waṅ kà, azlaməna matapla la slaka Yesu tadà à ahəṅ à gay dərəv, ¹⁷ tahəd à kəslah iyaw à afik, ṅgaha tadzəkà mad à uda la dərəv la abà, kà mabəziya à Kapernahum. La mok uwaga kà, vəɖ adasa à waṅ, Yesu aləg mabəz atà à tsəh dadənṅ. ¹⁸ Magol kular adzəkà à vok, iyaw dərəv adzəkà maganṅsay la mavəlay lakəl. ¹⁹ Azlaməna matapla kà, taday azlatalka magur mahoyay pəlis səla la tenma baṅaw makər kà zlazladfa aṅa afad. Uwana tanəṅ Yesu adà à awtəy à slaka aṅatà lakəl dərəv la asik kà, guba akəs atà. ²⁰ Ama Yesu agòɖ à atà: “Guba akəs akul aw, gi ṅwà!” ²¹ Tayəh mazəb à tsəh la kəslah iyaw la afik nəma, la katskats tanəṅà kà kəslah iyaw adədəbani kutso uwana asà à atà mad à abà.

Maham à ahəṅ dza ayəh Yesu

²² La bebəṅ gà kà, maham à ahəṅ dza uwana tagəɖ à gay dərəv à uda anik, awul atà à gəl kà la mokokhu lakuhu kà, agà la ahəṅ pəra kà kəslah iyaw tekula, ṅgaha tasəl bay kà Yesu ahəd à kəslah iyaw à afik la azlaməna matapla la slaka aṅha aw. Ama azlaməna matapla aṅha tahəd kokudfa gəl aṅatà pəra. ²³ Ama pəra kà, azlakəslah iyaw anik taguwà à waṅ la Tiberiya, tasà à waṅ à slaka uwana Yesu avà kaf, à mok uwana kikay agòɖ à Zəzagəla kà aṅa uwaga. ²⁴ Uwana maham à ahəṅ dza anəṅənṅ kà Yesu la abatà aw, azlaməna matapla la slaka aṅha bay kà atà la abatà aw, tadəh à azlakəslah iyaw uwaga à afik, tada à Kapernahum kà mayahay.

Yesu kà kaf uwana av sifa

²⁵ La kiya uwaga tabəzà Yesu à vok la gay dərəv à uda anik aṅa dərəv ṅgaha tagòɖfal: “Rabbi, kasà à abanay mbà?” ²⁶ Yesu awulà à atà ala: “Hadfay, gəpəh à akul la dziriga, kayahaw gi kà, kà uwana kazùwàw kaf, kahànàwla, aslahà à akul, awkà kà azlanadzipo la azlasləray gulo uwana gəɖfahənṅ aw. ²⁷ Kadahaw sləray kà aṅa tatak may uwana awis ala aw. Ama ɖahàwənṅ kà aṅa tatak may uwana adza à ahəṅ, avà sifa adəv à gay aw. Tatak may uwaga kà, Kona aṅa dza la uwana adàvə à akul la maslay, uwana abəzal la slaka Baba Zəzagəla.” ²⁸ Ngaha tanavəl: “Mana məɖehəṅ kà madəh sləray uwana asa à Zəzagəla zlà ma?” ²⁹ Yesu awulà à atà ala: “Sləray uwana Zəzagəla akuday la slaka aṅkul kà, say madiṅ gəl à dza uwana à vok, Zəzagəla asləl à waṅ.” ³⁰ Tagòɖfal: “Nadzipo ma uwala kapəhanula kà anu aṅa madiṅ à ka gəl à vok la? Ngaha ma sləray ma uwala kadfehəṅ la?” ³¹ Azlababa gami madzidziga tazùw manne à uwana asàhà à ahəṅ la zagəla la fəta la abà, bokuba uwana tatsətsər à wakitə Zəzagəla à abà. Masla avà à atà tatak may uwana asàh à ahəṅ la zagəla.”✠ ³² Yesu awulà à atà ala: “Hadfay la dziriga, gəpəh à akul, Musa la uwana avà à akul tatak may uwana asà à ahəṅ la zagəla aw. Ama Baba gulo la uwana avà à akul tatak may dziriga, uwana asà à ahəṅ la zagəla. ³³ Kà uwana tatak may uwana Zəzagəla avəy kà, anik la ahəṅ aw, say masla uwana asà à ahəṅ la zagəla, (Uwaga kà Yesu) ṅgaha ava sifa à azladza gudəṅ à vok gesina.” ³⁴ Kiya uwaga tagòɖfal: “Kayyà Sufəl, və à anu tatak may uwaga koksikoksi kəla zlà!” ³⁵ Yesu asà à atà ala à uda: “Gi la

✠ 6:31 6.31 2Musa 16.4,15; Mahabay 78.24

uwana gi tatak may aña sifa. Dza uwana atsa à wañ à slaka gulo, adiñ à gi gəl à vok kà, may adàkəs aya aw, nəlay adàkəs bay aw. ³⁶ Ama gəpəh à akul: Kanəñaw gi, ama bà la uwaga gesina kà, kanəñaw gi kadiñaw gi gəl à vok aw. ³⁷ Mana beymi uwana Baba avà à gi, atsa à wañ à slaka gulo, ñgaha gədàkweska dza uwana atsa à slaka gulo aw. ³⁸ Kà uwana gəsà à ahəñ la zagəla kà, kà madəhəñ mawoyəñ aña dza uwana aslèl gi à wañ, awkà aña gəl gulo aw. ³⁹ Aganay uwana asa à dza uwana aslèl gi à wañ: Kà gəziñ ala tekula aña tatak uwana avà à gi à ahəl aw, ama kà gəula atà à uda la mamətsay la sifa la mavakay makəf gəl à ahəñ gudəñ à vok. ⁴⁰ Aganay uwana asa à Baba gulo: Kà dèwdèw dza, uwana tanəñà Kona aña Zəzagəla, ñgaha tadiñal gəl à masla à vok kà, tabəzal sifa adəv à gay aw, ñgaha gədaula atà à uda la mamətsay la madəv à gay gudəñ à vok.”

⁴¹ Azla Yahudiya tañoñuz lakəl aña Yesu, kà uwana Yesu, ‘Gi tatak may uwana asà à ahəñ la zagəla’, agòf. ⁴² “Təga kà, Yesu kona aña Yusufu aw takay? Məsəl baba aña la iyà aña, ñgaha ma kakay: ‘Gəsà à ahəñ la zagəla’, agòf zlà ma?”, tagòf. ⁴³ Yesu awulà atà ala: “Sàkàw à mañoñuz à tsəh ala kà akul à akul. ⁴⁴ Dza aslala vok aña mas à wañ à slaka gulo aw, say Baba uwana aslèl gi à wañ, la uwana abiyəñ masla à slaka gulo, ñgaha gi gədàula à uda la mamətsay la vud makəf gəl à ahəñ. ⁴⁵ Azladza uwana Zəzagəla apəh à atà gay à ahəl kà mapàh à azladza, tatsetsèr à wakità à abà:

'Zəzagəla la gəl aña adàtapatala tatak gesina.'[✧]

Kəla dza uwana atsəb sləm à Baba, akəs mapəhay aña, masla atsa à wañ à slaka gulo. ⁴⁶ Asal magoday, kà dza adanəñ Zəzagəla aw. Dza uwana asà à ahəñ la slaka Zəzagəla la uwana adanəñ Baba pəra.”

⁴⁷ “La dziriga gəpəh à akul, dza uwana adiñal gəl à vok kà, adəbəz sifa adəv à gay aw. ⁴⁸ Gi tatak may uwana avà sifa adəv gay aw. ⁴⁹ Azlababa aña kul madzidziga tazuw manne la fəta la abà. Bà la uwaga bay kà taməts à gay. ⁵⁰ Ama uwabeyuwi uwana azuw tatak may uwana asà à ahəñ la zagəla kà, adəmətsay aw. ⁵¹ Gi tatak may aña sifa, uwana asà à ahəñ la zagəla. Baña dza azuw tatak may uwatà, adàdza à ahəñ la sifa aña koksikoksi. Tatak may uwana gədàvəl kà vok gulo, gədàvay, ñgaha gudəñ à vok aña madz à ahəñ la sifa.”

⁵² Lakəl aña gay uwaga azla Yahudiya tabayà vok gay kà atà kà atà, tagòf: “Kakay dza uwanay avà à anu sləb vok aña aña mazuway ma?”, tanavà vok. ⁵³ Yesu agòf à atà: “Haday, gəpəh à akul la dziriga: Baña kazuwaw sləb vok aña Kona aña dza aw, ñgaha baña kasaw aña aña aw kà, kadəbəzaw à sifa tetuwa aw. ⁵⁴ Dza uwana azuw sləb vok gulo, ñgaha as aña gulo kà, abəz sifa adəv à gay aw, ñgaha gədàula à uda la mamətsay la vud makəf gəl à ahəñ gudəñ à vok. ⁵⁵ Kà uwana sləb vok gulo kà tatak may dziriga, ñgaha aña gulo bay kà tatak masay dziriga aya. ⁵⁶ Dza uwana azuw sləb vok gulo, as aña gulo, adza à ahəñ la gi la abà, ñgaha gi babay gədza à ahəñ la masla la abà. ⁵⁷ Bokuba uwana Baba uwana la sifa aslèl gi à wañ, ñgaha gi gədza à ahəñ la sifa kà masla, kiya uwaga babay dza, uwana azuw gi, adza à ahəñ la sifa kà gi babay. ⁵⁸ Aganay tatak may uwana asà à ahəñ la zagəla: Masla kà bokuba uwana azlababa aña kul tazawàh, uwana tamàtsàh à gay aw. Ama dza uwana azuw tatak may uwanay, adàdza à ahəñ la sifa aña koksikoksi.” ⁵⁹ Yesu apəh à atà gay uwaga kà la mok uwana atapla azladza la gày madəv kuɗa la aku la Kapernahum.

Gay lakəl aña sifa uwana adəv à gay aw

⁶⁰ Mok uwana tatsən uwana Yesu apəh kà, aña uvaw la tataka azlaməna asik aña la abà tagòf: “Gay uwanay kà zlazladza, uwa aslala vok aña makəs uwaga uwa?”, tagòf. ⁶¹ Yesu asəl kà gay uwaga kà adàla mañoñuzay à azlaməna asik aña à ləv à

✧ 6:45 6.45 Yesayya 54.13

tsəh, ɲgaha agòd à atà: “Uwaga ma atsəf akul à asik la tsəh ala takay? ⁶² Kakay tak à gay kanəɲaw Kona aɲa dza, uwana ada à afik à slaka aɲha uwana à abà adzà à ahəɲ uwarà ma? ⁶³ Masasəfok Zəzagəla la uwana avà sifa; vok aɲa dza kà asla tatak aw. Azlagay uwaga gəpəh à akul, la uwana Masasəfok ɲgaha sifa. ⁶⁴ Ama azladza anik la ahəɲ la tataka aɲkul la abà kà, tadinjal gəl à vok aw.” (Kà uwana dagay madzəka kà, Yesu kà asəl azladza uwana tadàɲjal gəl à vok aw, ɲgaha la dza uwana adàtal kaf à gəl) ⁶⁵ Azalàn à gəl la magodfay: “Kà uwaga à uwana gəgodf à akul, dza aslala vok aɲa mas à waɲ à slaka gulo aw, tsa baɲa Baba abiyəɲ à waɲ, avəl tetəvi.”

⁶⁶ Dagay la mavakay uwatà aɲuvaw la tataka azlaməna manəfay aɲha la abà, tawùl à lig. ⁶⁷ Kiya uwaga Yesu agòd à azlaməna matapla la slaka aɲha kulo gəl aɲha səla: “Asa à akul madin akul babay suwaɲ ay?” ⁶⁸ Səmon Piyer agòdɲal: “Sufəl, məday ma à slaka ma aɲa uwa? Tsa kak la azlagay uwana tav sifa adəv à gay aw uwa? ⁶⁹ Lagonay kà, məɲjal gəl à vok, kak tsikaslaga uwana Zəzagəla asləl ka à waɲ.” ⁷⁰ Yesu agòd à atà: “Akul kulo gəl aɲha səla gətsatsəmànì akul aw takay? Ama tsa tekula aɲkul kà seteni!” ⁷¹ Apəh uwaga kà lakəl aɲa Yudas Iskariyot, kona aɲa Səmon, uwana agà la tataka azlaməna matapla kulo gəl aɲha səla uwaga la abà. Masla la uwana naka ata kaf à Yesu à gəl.

7

Azladeda aɲa Yesu tadinjal gəl à masla à vok aw

¹ Uwana uwaga adada à lig kà, Yesu auguzàh la kutso Galili, asəl kà madz à ahəɲ la kutso Yahudiya aw, kà uwana azla Yahudiya tayàh makəday. ² Mok uwana madəvaday aɲa azla Yahudiya, uwana tazalalla madəvaday tsatsagla adagay nekwa kà, ³ azladeda aɲha tagòdɲal: “Zà vok la abanay, hàd à Yahudiya, kà azlaməna asik aɲak kà manəɲ sləray aɲak uwana kadəhahəɲ. ⁴ Baɲa dza asal azladza tasəl masla kà, apəhla gəl aɲha ala. Tsa kadahàh azlasləray anik anik kiya uwanay kà, dahàɲ la paraka azladza aɲa manəɲ ka.” ⁵ (Amiyaka azladeda aɲha tadinjal gəl à masla à vok bay aw) ⁶ Yesu agòd à atà: “Kaslà gulo uwana asa à gi kà, adasa à waɲ aw. Ama kà akul kà, kəla kaslā gesina kà delga. ⁷ Gudəɲ à vok aslala vok aɲa mapəsew akul aw, ama gi kà apəsew gi. Kà uwana gəpəh la paraka kà azlasləray aɲha uwana adəhəɲ kà mawisiga. ⁸ Dàw aɲkul à madəvaday akul zlà. Məday anina aw, kà uwana kaslā uwana asa à gi adasa à waɲ dadàɲ aw.” ⁹ Uwana adapəh à atà gay uwaga kà, adzà à ahəɲ la Galili.

Yesu la madəvaday tsatsagla

¹⁰ Iyay, la mok uwana azladeda aɲha tad à madəvaday, masla babay ahəd, ama apəhla vok ala aw, la səbàh pəra. ¹¹ La abatà la madəvaday la abà azla Yahudiya tayàh masla la maham à ahəɲ dza la abà la madəvaday la abà: “Aɲala?”, tagòd. ¹² Tavàts gay la tsəh ala la gəl à gəl lakəl aɲha, la tataka maham à ahəɲ dza la abà. Azlaanik tagòd: “Masla kà, dza delga”, azlaanik tagòd bay: “Awaɲ, dza delga aw!” Tagòd: “Masla mazàh azladza ala.” ¹³ Ama dza aslāla vok aɲa mapəhay gay lakəl aɲha la dazuwaya aw, kà uwana guba akəs atà kà azla Yahudiya.

¹⁴ Mok uwana madəvaday adada à lig tenma kà, Yesu ahəd à mən gày Zəzagəla à agu, adzəkà matapla tatak à azladza. ¹⁵ Ləv avəl à azla Yahudiya à gay la magodfay: “Kakay dza uwanay asəl tatak tsa tapla aw ma?” ¹⁶ Yesu awulà à atà ala: “Matapla uwana gəpahla ala kà, asa à waɲ kà la slaka gulo aw, ama asà à ahəɲ kà la slaka Zəzagəla, uwana asləl gi à waɲ. ¹⁷ Baɲa dza asal madàh masal aɲa Zəzagəla kà, adəsəl tatak uwana gəpəhakulla kà, asa à waɲ kà la slaka Baba Zəzagəla, awkà uwaga kà gay aɲa ndzəda aɲa aslasl gəl gulo aw. ¹⁸ Dza uwana apəh gay aɲa aslasl gəl aɲha kà, ayàh mazləb gəl aɲha. Ama dza uwana adàh sləray kà aɲa dza uwana asləl à

wan̄ kà, masla kà apəhay kà uwana dziriga, ngaha mawisiga la ahəŋ la uwana la abà apəhay aw. ¹⁹ Musa avà à akul mapəhay aw takay? Ama amiyaka tekula an̄kul kà, akəs gay an̄a mapəhay aw. Kà mana kayahaw makəđ gi zlà ma?" ²⁰ Maham à ahəŋ dza awulà: "Kak la masasəđok mawisiga, kak masla zagəla zagəla, uwa ayàh makəđ kà uwa?" ²¹ Yesu agòđ à atà: "Gəđahən̄ kà sləray tekula pəra, à uwana ləv avàl akul à gay gesina! ²² Musa avà à akul tetəvi kà makadav azlabəza à uda, (Amiyaka Musa la uwana adzəkà makadav azlabəza à uda babay aw, ama azlababa an̄kul madzidziga), kà uwaga à uwana kakadavaw azlabəza an̄kul à uda la vud̄ maduw ləv bay.✧ ²³ Kakadavaw dza à uda la vud̄ maduw ləv kà matəm mapəhay an̄a Musa à ahəŋ aw, ngaha ma kà mana kapakaw gi ləv à gəl, à kà uwana gəwurà dza ala səđakaka la vud̄ maduw ləv ma? ²⁴ Sàkàw à madàh seriya an̄a tatak uwana kanəŋawwan̄ la uda gà. Ngaha đahàw seriya la tetəvi an̄ha."

Yesu ma Kristu takay?

²⁵ Azladza anik uwana tadzà à ahəŋ la Urusalima tagòđ: "Dza gà la uwanay à uwana tayahay an̄a makəđay aw takay? ²⁶ Nəŋəwwən̄, abad̄ma la dazuwaya la tataka azladza la abà, ama uwala gay la ahəŋ tapəhal aw. Ngaha azlaməŋga gami ma tasəl kà masla la uwana Kristu ndzer zlà ma uwa? ²⁷ Ama ban̄a Kristu adàsa à wan̄, dza la ahəŋ asəl slaka uwana adaguwa à wan̄ la abà aw. Ama dza uwanay kà məsəl slaka uwana asà à wan̄ la abà."

²⁸ Yesu ataplà la məŋ gày Zəzagəla la aku, azà kuda à zagəla agòđ à atà: "La dziriga kasəlaw gi, ngaha kasəlaw slaka uwana gəsà à wan̄ la abà ay? Gi kà, gəsà à wan̄ kà la aslasl gəl gulo aw, ama dza uwana asləl gi à wan̄ kà, dza dziriga. Akul kà kasəlaw aw! ²⁹ Ama gi kà, gəsəl masla, kà uwana la slaka an̄ha la uwana gəsà à wan̄, ngaha masla la uwana asləl gi à wan̄ bay." ³⁰ Kiya uwaga tayàh makəs masla, ama dza aslà kà matapal ahəl à vok aw, kà uwana kaslà an̄ha adaslay dadən̄ aw. ³¹ An̄uvaw la tataka maham à ahəŋ dza la abà, tadiŋ gəl à masla à vok, tagòđ: "Ban̄a Kristu adàsa à wan̄ kà, adàđehəŋ azlanadzipo adàduwan̄ an̄a kona uwanay ay?", tagòđ.

Tasləl azlaməna manəŋla gày Zəzagəla kà makəs Yesu

³² Azla Farisəya tatsənà uwana maham à ahəŋ dza apəh la gəl à gəl lakəl an̄a Yesu, ngaha azlamadzahaga an̄a azlaməna mav tatak à Zəzagəla, la azla Farisəya tasləl azlakohana kà makəs masla. ³³ Yesu apəh à atà la paraka: "Gi la ahəŋ la akul an̄a kaslà ŋuv aya, la lig la ahəŋ gəđawula à slaka dza, uwana asləl gi à wan̄. ³⁴ Kadàyahaw gi ama kadàbəz gi aw, kà uwana kaslaw mad à slaka uwana gəđàday aw." ³⁵ Azla Yahudiya tanəv vok kà atà kà atà: "Lagwa ma masla ma adàday ma uwala à uwana: 'Kadənəŋaw gi aya aw', agòđla? Adàday ma à slaka azla Yahudiya uwana taslèh gəl à ahəŋ la tataka azla Gərək la abà, kà matapatàla azlatatak takay? ³⁶ Gay uwaga apəh ma mana asal magòđay ma? 'Kadàyahaw gi, ama kadàbəza gi aw, kà uwana kaslawwal à vok mad à slaka uwana gəđàday aw. La slaka uwana gəđàdza à ahəŋ babay aw', agòđ ma?"

Dərəv an̄a iyaw sifa

³⁷ La mavakay uwana takəđ gəl à mavədaday, la uwana aga delga, la vud̄ uwatà Yesu astizlla ala la huma maham à ahəŋ dza, azà kuda à zagəla, agòđ: "Uwabeyuwi uwana nəlay azəŋ, asa à wan̄, asa iyaw la slaka gulo.✧ ³⁸ Kəla uwabeyuwi uwana adiŋ gi gəl à vok, dərəv an̄a iyaw sifa adəkəlay la ləv an̄ha la tsəh bokuba uwana tatsetsər à wakità Zəzagəla à abà."✧ ³⁹ Yesu kà apəhay kà lakəl an̄a Masasəđok Zəzagəla, uwana azlauwana tadiŋal gəl à vok tadàbəzal, kà uwana tabəz Masasəđok dadən̄ aw, kà uwana Yesu adada à afik kà mabəz mazləbay la slaka Baba an̄ha aw.

✧ 7:22 7.22 2Musa 17.10; 3Musa 12.3 ✧ 7:37 7.37 3Musa 23.36 ✧ 7:38 7.38 Hezəkiyel 47.1; Zakari 14.8

Maham à ahəŋ dza atsak ala kà Yesu

⁴⁰ Azladza anik la tataka maham à ahəŋ dza la abà tatsənəŋ gay uwaga tagòd: “Ndzer kà, dza uwanay kà masla mapəhal gay à ahəl aŋa Zəzagəla kà mapàh à azladza.” ⁴¹ Azlaanik tagòd: “Masla kà Kristu!”, azlaanik tagòd: “Awan, masla aw, Kristu kà aguwa à waŋ la Galili ay? ⁴² Tatsetsèr à wakità Zəzagəla à abà kà: Kristu kà adàguwa à uda kà la mayyi à tsəh ala aŋa David, ŋgaha adàguwa à waŋ la Betelehem, la gudəŋ uwana David adzà à ahəŋ la abà.”^{*} ⁴³ Maham à ahəŋ dza atsak ala kà Yesu. ⁴⁴ Azlaanik la tataka aŋatà la abà, asà à atà makəs Yesu, ama dza la ahəŋ aslala vok aŋa matapal ahəl à vok aw.

Azlamadzahaga aŋa azla Yahudiya takweska Yesu

⁴⁵ Azlakohana tawùl à slaka azlaməŋga aŋa azlaməna mav tatak à Zəzagəla la azla Farisəya, tanəv atà: “Kà mana kasàwla Yesu à waŋ aw ma?” ⁴⁶ Azladza uwana taslèlla atà, tawulà à atà: “Dza la ahəŋ adapəh gay ku bà aŋa dza uwanay didi didi aw.” ⁴⁷ Azla Farisəya tanəv atà: “Akul babay kà kadənəfaw mapapatay aŋha uwaga ŋwà? ⁴⁸ Məŋga la ahəŋ la tataka gami la abà, baŋaw la tataka aŋa azla Farisəya la abà, adadiŋal gəl à vok ay? ⁴⁹ Ama say azladza deyday gə la uwana tadiŋal gəl à vok, kà uwana tasəl mapəhay aŋa Musa aw, atà azlamatsaflaga!” ⁵⁰ Nikodemus agà la tataka aŋa azla Farisəya la abà. A masla uwana asà à waŋ à slaka Yesu la vəd vərđi anik, agòd à atà: ⁵¹ “Haday, ma wakità seriya avà tetəvi kà madàh seriya à dza à gəl, la kokufa matsən uwana adahəŋ takay? Awma məsəl uwana adahəŋ aw, takay?” ⁵² Tawulàl ala: “Kak zil Galili ay? Dzèŋ wakità lela, ŋgaha kadatsenəŋ kà masla mapəhal gay à ahəl aŋa Zəzagəla adàguwa à waŋ la Galili aw!” ((⁵³ La lig la ahəŋ kəla uwabeyuwi awul à mtəga aŋha.

8

Mis uwana azab zil

¹ Mok uwana uwaga adadəv à gay kà, Yesu ahəd à gudəŋ kuvu à afik. ² La bebəŋ gə la zay la tsəh, awul à məŋ gəy Zəzagəla à agu aya, ŋgaha maham à ahəŋ dza aŋuvaw tahamà à slaka aŋha. Adzà madzay, adzəkà matapatàla azlatatak ³ Azlaməna mapàhla mapəhay ala, la azla Farisəya tadàlla mis uwana à awtəy, takəs la mazaŋ zil la tsəh. Atà tatsizlləŋ à huma aŋa maham à ahəŋ dza gesina, ⁴ ŋgaha tanəv Yesu: “Məŋga, mis uwanay kà, takəs kà la mabila la tsəh. ⁵ La wakità Zəzagəla gami la abà Musa agòd à anu kà, azlatsəhay mis uwanay kà, say makad atà la matsàh atà la akur pəra. Kak ma kakay kagod ma?”^{*} ⁶ Tapəh uwaga kà, kà makəsəl madiŋay à ahəŋ kà aŋa mapuwal gudzi à gəl. Ama la abatà Yesu akəsà gəl à ahəŋ, anəh à kutso à abà la gay gəl ahəl aŋha. ⁷ Uwana bà manaval tanavàl kà, awulà gəl à afik la magod à atà: “Dza uwana la tataka aŋkul la abà adadəh tsakana didi aw kà, atsa vok ala akur à mis uwaga zlà!” ⁸ ŋgaha la lig la ahəŋ, awulà gəl à vədah kà manəhay aya. ⁹ Mok uwana tatsənə gay uwaga kà, tadahà aŋatà la tekula, tekula, azlamagolga dəŋ, ŋgaha azlabəza gə. Yesu agəd à ahəŋ kokufa aŋha la mis matsizl à ahəŋ gə, uwaga la huma aŋha. ¹⁰ Kiya uwaga awulà gəl à afik agòdàl: “Mis, atà la azlaməna mapuwa à ka gudzi à gəl aŋak la? Dza la ahəŋ adükw kà ka seriya à gəl aw uwa?” ¹¹ “Dza la ahəŋ aw, məŋga”, mis agòdàl. Yesu agòdàl: “Gi babay kà, gədukw ka seriya à gəl aw, həd, ama kadadəfaha tsakana aya aw!”, Yesu agòdàl.)

Yesu la uwana udfaka aŋa gudəŋ à vok

¹² Bà gotənaŋ Yesu apəh gay à maham à ahəŋ dza aya: “Gi la uwana gi udfaka aŋa gudəŋ à vok. Dza uwana anəf gi kà masla adəbəz udfaka aŋa sifa, adəday la mələs la

^{*} **7:42** 7.42 2 Samuyel 7.12; Mika 5.2 ^{*} **8:5** 8.5 3Musa 20.10; 5Musa 22.22-24

abà aw.” ¹³ Azla Farisøya tagòfal: “Kak kà kapøhay kà sayda aña gəl aňak, uwana kapøhay kà makəs vok aňha la ahøŋ aw.” ¹⁴ Yesu awulà à uda agòf à atà: “Bamørika gədəza sayda aña gəl gulo babay kà, mapøhay gulo kà dziriga, kà uwana gi kà gəsəl slaka uwana gəsà à waŋ, la slaka uwana gəday babay. Ama akul kà, kasəlaw slaka uwana gəsà à waŋ la slaka uwana gəday babay aw. ¹⁵ Akul kà kadahaw seriya kà la mahoy yewdi, ama gi kà gəfàh seriya kà kiya uwaga aw. ¹⁶ Bà amiyaka gəfàh seriya à dza kà seriya gulo kà dziriga, kà uwana gəfàh seriya kà kokufa gəl gulo aw, ama anu la Baba uwana aslèl gi à waŋ. ¹⁷ Uwaga kà matseserayga la wakità seriya aňkul la abà: Sayda aña azladza səla uwana tapøhay kalkal kà dziriga. ¹⁸ Gəza sayda aña gəl gulo ŋgaha Baba uwana aslèl gi à waŋ az sayda aña gəl gulo babay.” ¹⁹ Tanàv Yesu: “Uwa à Baba aňak uwa?” Yesu awulà à atà ala: “Akul kasəlaw gi aw, bamørika Baba gulo babay aw, agayŋa kasəlaw gi kà, naka kasəlaw Baba gulo babay.”

²⁰ Yesu apøh gay uwaga kà la mok uwana atàpatàla tatak la møŋ gày Zəzagəla la aku. Apøh uwaga kà la slaka uwana tafàh sahar aña ofərand à ahøŋ, dza aslèla vok aña makəsaw aw, kà uwana kaslè aňha adaslay dadəŋ aw.

Kaslawwal à vok aña mad à slaka uwana gəday aw

²¹ Yesu agòf à atà aya: “Gəda aňulo, kadəyahaw gi, ama akul kadàmatsaw à tsakana aňkul à abà. Kaslawwal à vok kà mad à slaka uwana gəday aw.” ²² Azla Yahudiya tagòf vok kà: “Adəkəf vok ay à uwana: ‘Kaslawwalla vok kà mad à slaka uwana gəday aw’, agoday?” ²³ Yesu awulà à atà ala: “Akul kà akul azladza aña vəfah, ama gi kà gəsà à ahøŋ kà la zagəla. Akul azlaaŋa gudəŋ à vok uwanay, ama gi kà gi aña gudəŋ à vok uwanay aw. ²⁴ Kà uwana à uwana gəgof à akul kà kadàmatsaw à tsakana aňkul à abà, ndzer kà, kadàmatsaw à tsakana aňkul à abà, à baŋa kadiŋaw gi gəl à vok à gi uwana gi aw.” ²⁵ Tanavàl à gay zlà: “Kak uwa?” Yesu agòf à atà: “Gi uwana gəpəh à akul dagay madzəka. ²⁶ Lakəl aňkul gi la azlagay møŋga aña mapøh à akul, à gay uwana adəhakulla seriya à gəl. Ama dza aslèl gi à waŋ kà dziriga, gəpøhay à azladza gudəŋ à vok kà uwana gətapla la slaka Baba pəra.”

²⁷ Tasəl kà Yesu apøhay lakəl aña Baba Zəzagəla aw. ²⁸ Kiya uwaga Yesu agòf à atà: “Baŋa kadàtsizllaw Kona aña dza ala kà, kadəsəlaw kà gi uwana gi la ahøŋ. Kadəsəlaw kà gəfàh tatak la gəl gulo aw, ama gəpøhay kà lakəl aña uwana Baba apahà à gi ala pəra. ²⁹ Dza uwana aslèl gi à waŋ kà, anu səla, awkà asək gi kokufa gəl gulo aw, kà uwana koksikoksi gəfəhøŋ uwana ahəfal à adi.” ³⁰ Uwana Yesu adapøhay kiya uwaga, azladza aňuvaw tadiŋal gəl à masla à vok.

Azladza makor gəl gə la azlamayà

³¹ Yesu agòf à azla Yahudiya uwana tadiŋal gəl à vok: “Baŋa kakəsaw matapla à mapøhay gulo kà, kadəgaw azlaməna matapla la slaka gulo ndzer. ³² Kiya uwaga kà, kadəsəlaw dziriga, ŋgaha dziriga adədala akul à makor gəl à abà.” ³³ Tawulà à uda: “Anu kà anu mayyi à tsəh ala aña Abəraham, ŋgaha anu azlamayà aña azladza dikiŋiki aw, ŋgaha ma kakay kagof à anu kà, mədəgay la makor gəl la abà ma?” ³⁴ Yesu agòf à atà: “Haday, gəpəh à akul la dziriga: Kəla uwabeyuwi uwana adəh tsakana kà, masla kà mayà aña tsakana. ³⁵ Mayà kà, aslèla vok aña magay masla gày aw. Ama kona kà, agay masla gày aña koksikoksi. ³⁶ Baŋa Kona adəpəlakulla kadəgaw la makor gəl la abà ndzer. ³⁷ Gəsəl kà akul mayyi à tsəh ala aña Abəraham. Ama kayahaw makəf gi aya, kà uwana kakəsaw matapakulla gulo aw. ³⁸ Gəpøhay lakəl aña tatak uwana Baba gulo apøh à gi ala, ama akul kà kadahaw uwana baba aňkul tapəhəkulla, suwaŋ.”

³⁹ Tawulà à uda: “Baba gami kà Abəraham!” Yesu awulà à atà ala: “Agayŋa kagaw azlabəza aña Abəraham kà, naka kadahaw sləray aña Abəraham uwana adəhəhəŋ. ⁴⁰ Gi kà, gəpəh à akul kà dziriga, uwana gətsənəŋ la slaka Zəzagəla, la uwana gəpøh

à akul, ama bà la uwaga kà, kayahaw makəf gi. Tsəhay gə uwaga kà, Abəraham adahən didi aw. ⁴¹ Akul kà kadahawwan kà sləray aña baba ankul.” Atà tawulà ala: “Anu azlabəza gəl gaw aw, anu Baba gami kà la Zəzagəla, tekula pəra.” ⁴² Yesu agòf à atà: “Agayña Zəzagəla agay Baba ankul ndzer kà, naka kawoyaw gi, kà uwana gəsà à wan la slaka anha, à uwana gəsà à slaka ankul kà masal anha. Gəsà à wan kà, la aslasl gəl gulo aw, masla la uwana aslèl gi à wan. ⁴³ Kà mana katsəbaw sləm à uwana gəpəh à akul aw zlà ma? Kà uwana kaslaw kà aña matsən uwana gəpəhay aw. ⁴⁴ Akul kà, baba ankul kà la seteni, asa à akul madəh uwana asa à seteni kà uwana masla makad dza dagay la madzəka vok aña tatak. Adapəh dziriga didi aw, kà uwana dziriga la ahəj la slaka anha aw. Baña apəh fida, apəh la fəla anha, kà uwana masla fida, ngaha masla baba aña fida. ⁴⁵ Ama gi kà, gəpəhay kà dziriga, ngaha kà uwaga la uwana kadijaw gi gəl à vok aw. ⁴⁶ Uwa la tataka ankul la abà aslala vok agodəy kà, gədadəhəj tsakana uwa? Kà mana, baña gəpəh dziriga kà, kadijawwal gəl à vok aw zlà ma? ⁴⁷ Dza aña Zəzagəla kà, atsəb sləm à gay Zəzagəla. Ama akul azlaa Zəzagəla aw. Gay gə la uwaga katsəbaw gi sləm aw!”

Yesu atà la Abəraham

⁴⁸ Azla Yahudiya tagòfal: “Azlayla anu à uwana: Kak zil Samariya, məgodf à ka, ngaha kak la azlamasəfok mawisiga aw uwà?” ⁴⁹ Yesu agòf à atà: “Gi la masasəfok mawisiga aw, ama gi gəsləkaw Baba gulo, ama akul kà kapəsew gi. ⁵⁰ Gi kà gəyàh mazləbay aña gəl gulo aw. Dza anik la ahəj tekula, uwana ayàh gi mazləbay, masla la uwana masla seriya bay. ⁵¹ La dziriga gəpəh à akul: Dza uwana akəs gay gulo, adəmətsay diki diki aw.” ⁵² Azla Yahudiya tagòfal: “Lagonay kà məsəl ndzer kà, kà kak la masasəfok mawisiga, Abəraham aməts, azlaməna mapəh à atà gay à ahəl taməts, ngaha kak kagodəy kà: ‘Dza uwana akəs mapəhay gulo kà, adəmətsay aw’, kagodə ma? ⁵³ Baba gami Abəraham aməts: Kadzugw ma: ‘Gəduwa masla’, kagodə takay? Azlaməna mapəh à atà gay à ahəl bay taməts. Ngaha ma kapakà gəl anək ala ma kà kak uwi?” ⁵⁴ Yesu awulà à atà ala, la magodəy: “Agayña gəzləb gəl gulo kà, naka mazləbay gulo, akəs vok aw. Baba gulo la uwana azləb gi, à masla à uwana: ‘Zəzagəla gami’, kagodəw. ⁵⁵ Ama kasəlaw masla diki diki aw. Ama gi kà gəsəl masla. Agayña gəgodəy kà, gəsəl masla aw kà, naka gəgay masla fida bokuba akul. Ama gəsəl masla, ngaha gəkəs gay anha. ⁵⁶ Abəraham baba ankul kà, arəb lakəl mavakay aña mas à wan gulo, anəjəngə ngaha arəb kaykay.” ⁵⁷ Azla Yahudiya tagòfal: “Uwala kaslay mavay dzik zlo, awkà pəra: ‘Gənəjə Abəraham’, kagodə ay?” ⁵⁸ Yesu awulà à uda: “Hadəy, gəpəh à akul la dziriga: Mok uwana taləg mayyay Abəraham kà, gi la ahəj.” ⁵⁹ Ngaha tahəl akur kà matsəhla. Ama kusəh. Yesu ahadə vok à ahəj, asà à lag la mən gəy Zəzagəla la aku.

9

Yesu awur dza uwana ala tayyà à ahəj la guləf gə

¹ Mok uwana Yesu anəfà tetəvi anha, anəjəngə dza anik uwana tayyà à ahəj guləf gə. ² Azlaməna matapla la slaka anha tanavà: “Məngə, kà mana dza uwanay kà tayyà à ahəj kà guləf gə ma? Kà tsakana aña gəl anha ay, à uwana kà tsakana aña azlababa anha ay?” ³ Yesu awulà à atà ala: “Kà tsakana anha aw, kà tsakana aña azlababa anha magay aw. Tayyà guləf kà, kà sləray aña Zəzagəla aña mapəhla vok ala la masla la abà pəra. ⁴ La afats kà, say mədəh sləray aña dza uwana aslèl gi à wan. Vəf la uwaga atsa à wan, à uwana dza aslala vok aña madəh sləray aya aw. ⁵ La mok uwana gi la gudəj la vok kà, gi udaka aña gudəj à vok.” ⁶ Uwana Yesu adapəh uwaga la gay ala, atəf slesli f à vədah aləpənì kutso, asəfəh à yewdi aña guləf uwaga. ⁷ Ngaha agòfal: “Həd, kadəpal yewdi anək la mukwà Silowe la abà (Sləm

uwaga asal magodfay maslèlay) Guləf ahàd, apəl adi. La mok uwana awùl à waŋ la tetəvi la ama, aslala vok aŋa manəŋla adagay.”

⁸ Azlaməna magay aŋha la azladza uwana tanəŋ à ahəŋ atsatsàh tatak uwarà, tagòd: “Uwanay kà dza uwana adzàhah madzay kà matsatsàh tatak aw, takay?”

⁹ Azladza anik: “Masla”, tagòdàh. Azlaanik babay: “Masla aw”, tagòd, “Ama maftsa à vok aŋha pəra”, tagòd. Zil uwaga agòd à atà: “Kà bà, gi!” ¹⁰ Tagòdal: “Kakay yewdi aŋak apakwà vok ma?” ¹¹ Agòd à atà: “Dza uwana tazalalla Yesu aləpàni abisl, ŋgaha asàfàh gi à yewdi, ŋgaha agòd à gi: ‘Hàd, kadàpal adi aŋak la mukwà Silowe la abà’, agòd à gi. Ŋgaha gəhàd, mok uwana gədapal à adi, gəslàla vok aŋa manəŋla.” ¹² Tanavàl: “Aŋala dza uwatà la?”, tagòdal, “Gəsəl aw”, agòd à atà.

Azla Farisəya tanav guləf la gay ala

¹³ Kiya uwaga tadàla guləf à slaka azla Farisəya. ¹⁴ Kà uwana Yesu aləpàni kutso, asəfàhal à yewdi kà dza uwatà la mavakay maduw ləv à uwana awurəŋ ala. ¹⁵ Kà uwaga à uwana azla Farisəya babay tanəv dza uwatà, tagòdal: “Kakay kanəŋla lagonay adagay ma?” Kona uwaga agòd à atà: “Asàfàh à gi abisl à yewdi, ŋgaha agòd à gi: ‘Hàd à mukwà Silowe à abà, kapal adi’, ayà gəgòd, gəhàd, gəpəl adi, ŋgaha lagwa gədanəŋla.” ¹⁶ Azlaanik la tataka azla Farisəya la abà tagòd: “Dza uwana adàhà tsəhay gə uwana yewdi kà, asà à waŋ kà la slaka Zəzagəla aw, kà uwana afà gəl à vuđ maduw ləv aw.” Ama azlaanik tagòd: “Kakay dza aslala vok aŋa madàh nadzipo kiya uwanay, tsa baŋa masla tsakana ma?” Ŋgaha tatsək ala la tataka aŋatà la abà.

¹⁷ Azla Farisəya tanəv à guləf uwana awùr ala aya gotənaŋ: “Kak ma uwa kagòd kà dza uwana awurà kà ala uwa?” Agòd à atà: “Masla mapəhal gay à ahəl aŋa Zəzagəla, kà mapàh à azladza”, agòd à atà. ¹⁸ Bà gotənaŋ azla Farisəya tadìŋal gəl à vok, kà masla tayyà guləf gə aw, ŋgaha awùr ala tagòd aw, kà uwaga à uwana tazəl azlababa aŋha à waŋ aya babay, ¹⁹ kà tanav atà gay ala, tagòd: “Haday ma, uwanay kà kona aŋkul ay? Ndzer ma, kayyàw ma guləf gə ay? Kà kay à uwana apakà vok à uwana anəŋla lagwa adagay ma?” ²⁰ Azlababa aŋha tawulà à uda, tagòd: “Məsəl kà masla kona gami, uwana məyyà guləf gə. ²¹ Ama anu kà, məsəl tatak uwana apakà vok kà manəŋla aŋha lagonay aw, ŋgaha məsəl dza uwana apəzllal yewdi babay aw. Nəvəw à masla la gəl aŋha, kà uwana masla asla manaval gay adagay.” ²² Uwana tapəh kiya uwanay kà, kà uwana guba akəs à atà kà azla Yahudiya, kà uwana azla Yahudiya tatsatsəl vok gay kà atà aŋa makudək azladza uwana à lag la gəy madəv kuđa la aku, uwana: ‘Yesu kà Kristu’, tagodfay. ²³ Kà uwaga à uwana azlababa aŋha tagòd kà: “Masla kà asla maula gay à uda la gəl aŋha, nəvəw à masla”, tagòd.

²⁴ Bà gotənaŋ azla Farisəya tahàd, tazàla dza uwana awùr ala aya kà masəla, ŋgaha tagòdal: “Pəh la dziriga la huma Zəzagəla, məsəl kà dza uwatà kà masla tsakana.”

²⁵ Agòd à atà: “Gəsəl aw, adagay masla tsakana, adagay masla tsakana aw kà, gəsəl aw. Ama tatak tekula uwana gəsəl kà: Gi guləf, ama lagwa kà gənəŋla!” ²⁶ Tanavàl aya: “Mana kadahəŋ ma? Kakay apəzl à ka yewdi ma?” ²⁷ Awulà à atà ala: “Gədapəh à akul təga aw uwa?”, agòd à atà. “Ama kafəw gi sləm aw. Kà mana asa à akul matsənaŋ aya kà masəla ma mi? Awma akul babay ma asa à akul magay azlaməna matapla la slaka aŋha babay kəla ay?” ²⁸ Tatsəkəkal magodfahay à gəl la magodfay: “Kak masla matapla aŋa zil uwaga, ama anu kà anu, anu azlaməna matapla aŋa Musa. ²⁹ Məsəl kà Zəzagəla abadmə la Musa, ama masla kà, bà slaka uwana asà à waŋ la abà kà, məsəl aw!” ³⁰ Zil uwaga awulà à atà ala: “Lagwa kà tatak uwanay la uwana aval ləv à dza à gay zlə, kasəlaw slaka uwana asà à waŋ la abà aw, ama masla la uwana apəzl gi yewdi gulo! ³¹ Məsəl kà Zəzagəla atsəb sləm à azlaməna tsakana aw, ama atsəb sləm à dza uwana ahoy yewdi aŋha, ŋgaha akəs mapəhay

aŋha. ³² Didi didi gèdatsənəŋ tagodfay kà dza adapəzl yewdi à dza, uwana tayyà guləf gà aw. ³³ Agayŋa dza uwaga atsa à waŋ la slaka Zəzagəla aw kà, naka tatak la ahəŋ adəhəŋ aw.” ³⁴ Tagodf à guləf: “Tayyà ka à tsakana à abà, ŋgaha ma asa à ka, kà matapanula tatak takay?”, takudək à lag la gày madəv kuda la aku.

Magay guləf la tetəvi aŋa Zəzagəla la tsəh

³⁵ Mok uwana atsənà à Yesu kà takudək à lag la gày madəv kuda la aku kà, agagəm atà səla, agòdɔl: “Kadiŋ gəl à Kona aŋa dza à vok ay?” ³⁶ “Məŋga, pəhgəla, uwa à masla uwa, kà gi aŋa madiŋ gəl à masla à vok uwa?”, agòdɔl. ³⁷ “Masla gà la uwaga kanəŋaŋ, à uwana abadakama lagwa”, Yesu agòdɔl. ³⁸ “Gədiŋal à ka gəl à vok, Sufəl gulo”, zil uwaga agòdɔl, ŋgaha la makədəf à ahəŋ la huma aŋha.

³⁹ Kiya uwaga Yesu agòdɔl: “Gəsà à waŋ à gudəŋ uwanay à vok kà seriya aŋa madəh vok, kà azlaguləf aŋa manəŋla, ŋgaha azlaməna yewdi aŋa mapakəh guləf.” ⁴⁰ Azlaanik la tataka azla Farisəya la abà, uwana la slaka aŋha la abatà, tatsənà gay uwaga, ŋgaha tanavàl: “Anu ma anu azlaguləf babay suwaŋ ay?” ⁴¹ Yesu agòdɔl à atà: “Agayŋa kagaw azlaguləf kà, naka kagaw azlaməna tsakana aw, ‘Tsa mənəŋla’, kagodfaw kà, tsakana aŋkul aləg.”

10

Gay la gay la abà aŋa masla manəŋla azlatuwaŋ

¹ “Gəpəh à akul la dziriga, dza uwana aguwa la gay gamagày aŋa gargar aŋa azlatuwaŋ aw, ama aguwa à ahəŋ kà la gəl aŋa zlagam, bi aguway la slaka anik kà, masla kà masla gəl, masla nabəra. ² Ama dza uwana aguwa à gày la gamagày kà, masla manəŋla azlatuwaŋ. ³ Masla manəŋla gamagày kà apəzlal gamagày, azlatuwaŋ bay tatsən kuda aŋha. Azàlləh azlatuwaŋ aŋha, sləm la sləm, ŋgaha atsala atà à uda. ⁴ Baŋa adasa à atà à uda gesina kà, masla aguwa atà à huma, azlatuwaŋ tanəfay, kà uwana tasəl kuda aŋha. ⁵ Ama tanəf məlok dza aw, tahoyal à ahəl, kà uwana tasəl kuda aŋha aw.”

⁶ Yesu apəh à atà gay la gay la abà uwaga, ama tasəl tatak uwana apəh à atà aw.

Yesu masla manəŋla azlatatak delga.

⁷ Yesu agòdɔl aya: “Gəpəh à akul la dziriga, gi la uwana gi gamagày aŋa gargar aŋa azlatuwaŋ. ⁸ Azlauwana tatsà à vok à waŋ kà gi kà, gesina kà, azlaməna gəl, azlaməna nabəra. Ama azlatuwaŋ tatsəb à atà sləm aw. ⁹ Gi la uwana gi gamagày. Dza uwana adàda à gày la sləm gulo adəbəlay, aslala vok ada à gày, atsa à uda, abəz tatak may. ¹⁰ Masla gəl kà, atsa à waŋ kà, kà mad à gəl pəra, makadfay, la madàdasəh atà ala. Ama gi kà gəsà à waŋ kà azladza aŋa mabəzal sifa uwana aduwa vok kaykay.”

¹¹ “Gi masla manəŋla azlatuwaŋ delga. Masla manəŋla azlatuwaŋ delga av sifa aŋha kà azlatuwaŋ aŋha. ¹² Dza uwana adəh sləray kà aŋa sili pəra, uwala azlatuwaŋ aŋha aw kà, dza aŋa azlatuwaŋ aw. Asakay azlatuwaŋ à ahəŋ, ahoy aŋha à baŋa anəŋa kəda fəta atsa à waŋ à slaka aŋha, ŋgaha kəda fəta akəs atà, adàdasəh atà gesina. ¹³ Ahoy aŋha kà uwana adəh sləray kà aŋa sili, ŋgaha af sləm à azlatuwaŋ aw. ¹⁴⁻¹⁵ Gi masla manəŋla azlatuwaŋ delga. Bokuba uwana Baba asəl gi, gi bay gəsəl masla. Gəsəl azlatuwaŋ gulo, atà babay tasəl gi. ŋgaha gəv sifa gulo kà aŋa azlatuwaŋ gulo. ¹⁶ Azlatuwaŋ gulo anik la ahəŋ à uwana atà la ahəŋ la gargar uwanay la abà aw. Say gəsəlla atà à waŋ babay kà atà aŋa masəl kuda gulo lagwa. Kiya uwaga adagay maham à ahəŋ tuwaŋ tekula, la masla manəŋla atà tekula à ahəl.”

¹⁷ “Baba awoya gi, kà uwana gəvə sifa gulo, kà gi aŋa maulal à tsəh aya. ¹⁸ Dza la ahəŋ azəb sifa la slaka gulo la ndzəda aw, ama gi la uwana gəvəy la mawoyəŋ gulo.

Gi la maslay kà mavày, ngaha gi la maslay aña maulal à tsəh aya. Kiya uwaga la uwana: “Dahàn’, Baba gulo agòd à gi.”

¹⁹ Kà gay uwaga matsakla ahàd à tataka azla Yahudiya à abà aya. ²⁰ Anjvaw la tataka anàtā la abà tagòd: “Masla la masasəfok mawisiga, bada, kà mana katsəbawwal sləm ma?” ²¹ Azlaanik tagòd: “Dza uwana la masasəfok mawisiga aslala vok aña madehən kiya uwanay aw. Kakay masasəfok mawisiga aslala vok mawur guləf ala ma?”

Azla Yahudiya takweska Yesu

²² Madəvaday matsikasl mən gày Zəzagəla ala apakà vok la Urusalima la təla awkusa. ²³ Yesu auguzàh la mən gày Zəzagəla la aku la tsəh tsatsagla aña Salomon. ²⁴ Kiya uwaga azla Yahudiya takəsəl gay à adi, tagòd: “Mbà kadəsəlla à anu à uda la madzugway gami la abà ma? Baña kak Kristu kà, pəh à anu la dazuwaya, lakana!” ²⁵ Yesu agòd à atà: “Gədapəh à akul nəma, asa à akul matsəb gi sləm aw pəra. Sləray uwanay gədehən la ndzəda aña Baba gulo kà sayda gulo. ²⁶ Ama akul kà, kadiñawwal gəl à vok aw, kà uwana akul la tataka aña azlatuwan gulo la abà aw. ²⁷ Azlatuwan gulo tatsəna kuda gulo, gəsəl atà, ngaha tanəfa gi. ²⁸ Gəvə à atà sifa adəv à gay aw, tadəmətsay didi aw, dza aslala vok aña mahəl atà la ahəl gulo aw. ²⁹ Tatak uwana Baba gulo abək gi atà kà, aduwan azlatatak gesina, dza la ahən ahəl atà la ahəl aña Baba gulo aw. ³⁰ Anu la Baba kà anu tekula.”

³¹ Azla Yahudiya tahəl akur kà matsəhla aya. ³² Ama Yesu agòd à atà: “Gədahà azlasləray dzəba aña səla aw gə uwanay, la huma ankul gesina la maslay aña Baba gulo uwana avà à gi, ngaha ma kà sləray ma uwala asa à akul matsəhgəla akur la?” ³³ Azla Yahudiya tawulà ala: “Asa à anu kà matsəh kà la akur kà sləray uwana kadəhən aw, ama kà uwana kapəh mawisiga lakəl aña Zəzagəla: Tsa kak dza deyday kà pəra, kagagazləla gəl anək la Zəzagəla ma, məgod.”[☆] ³⁴ Yesu awulà à atà ala: “Tatsetsər à wakità mapəhay akul à abà kà, Zəzagəla agòd à akul azlazəzagəla,[☆] ³⁵ məsəl la paraka kà, kà dza aslala vok aña mawisən ala uwana matsetserayga la wakità mapəhay la abà aw. Zəzagəla azal azlazəzagəla azladza uwana takəs gay aña. ³⁶ Gi kà, Zəzagəla akəsàni, asləl gi à wan à gudən uwanay à vok, ngaha ma kakay kagodaw kà, gəpəh mawisiga à Zəzagəla à vok ma? Tsa gəpəhla dziriga kà gi Kona aña aña ma? ³⁷ Tsa baña sləray aña Baba gulo la uwana gədehən, awkà kadiñaw gi gəl à vok zlà ma aw. ³⁸ Ama baña sləray aña la uwana gədehən kà, diñaw gi gəl à vok, kadiñaw gi gəl à sləray gə uwana à vok tsi, kà akul aña masəl la paraka aw kà gi la Baba la abà, ngaha Baba babay la gi la abà.”

³⁹ Tatàhkà à makəsay gotənan, ama atəf kà atà. ⁴⁰ Yesu adà aña à gay dərəv à uda aña mukwà Urdun, la slaka uwana Yuhana adəhàhà batem uwarə. Ngaha adzà à ahən la abatà. ⁴¹ Azladza anjvaw tasəh à slaka aña. Tagòd: “Dikidiki Yuhana kà, adəfah nadzipo aw, ama uwana apəh lakəl aña dza uwanay kà agəf à afik, ndzer.” ⁴² La abatà azladza anjvaw tadiñ gəl à masla à vok.

11

Mamətsay aña Lazar

¹ Dza anik la ahən, sləm aña Lazar, agə la dūvats, adzà à ahən la Betaniya, la gudən uwana Mariyama atà la deda aña Marta tadzà à ahən. ² (Mariyama uwaga kà mis uwana adzadzəb aməl matərsin à Sufəl Yesu à asik à gəl, aslasladə, anəlal la anidz gəl aña) Deda aña Lazar la uwana agə la dūvats. ³ Azladedə dəgamga səla uwaga tasləl gay à Yesu à tsəh, tagòd: “Sufəl, slawda anək kà la dūvats.”

[☆] 10:33 10.33 3Musa 24.16 [☆] 10:34 10.34 Mahabay 82.6

⁴ Uwana Yesu atsənà uwaga, agòf: “Duvats aña Lazar kà, òuvats mamamòtsay aw, ama uwaga kà, kà mapəhla maslay aña Zəzagəla ala, uwaga la uwana adəpəhla mazləbay aña Kona aña ala bay.”

⁵ Yesu awoyà Marta atà la Mariyama la Lazar deda añaatà. ⁶ Mok uwana atsənəñ kà Lazar la òuvats kà, adzà à ahəñ la slaka uwatà mavakay səla aya gotənañ. ⁷ La lig la ahəñ, agòf à azlaməna matapla la slaka aña: “Məwùl à kutso Yahudiya!” ⁸ Azlaməna matapla la slaka aña tawulà ala: “Məñga adasafay aw, bà nekwa nekwa azladza tayəh matsəh ka à gəl la akur, ñgaha asa à ka mawul à abatà aya ay?” ⁹ Yesu agòf à atà: “Sa kulo gəl aña səla la ahəñ la mavakay la tsəh aw takay? Kà uwana baña dza aday la afats, matekwid atsalla aw, kà uwana anəña udfaka aña gudəñ à vok uwanay. ¹⁰ Ama baña dza aday la vəd kà, matekwid atsalla, kà uwana udfaka la ahəñ la masla la abà aw.” ¹¹ Yesu apəh à atà gay uwaga ñgaha azətələnğ à gəl: “Slawda gami Lazar kà aga la madzəhal gə, kà uwaga à uwana gəday aña madatsənəñ ala.” ¹² Azlaməna matapla tawulà à uda: “Sufəl, baña adzəhal kà, adəwurla, haday!” ¹³ Ama Yesu kà asəl magodəy kà Lazar kà adamòtsay, ama azlaməna matapla la slaka aña tadzùgw lakəl aña madzəhal deyday pəra. ¹⁴ Kiya uwaga Yesu agòf à atà la paraka kà: “Lazar adamòtsay. ¹⁵ Gi la marabay kà aña kul, à kà uwana gi la abatà aw, ñgaha kà akul aña madinğ gi gəl à vok. Ama lagwa, məhad à slaka aña.” ¹⁶ Kiya uwaga Tomas uwana tazalalla vəgal, agòf à azlaməna matapla anik: “Anu babay kà, məhad kà mədàmòtsay la mənğa gami.”

Yesu masla maula azladza à uda la mamòtsay

ñgaha masla mav sifa.

¹⁷ Mok uwana Yesu adà à awtəy kà, Lazar adadəh mahənañ ufad la zəvay la aku. ¹⁸ Betaniya kà nekwa la Urusalima, kərkər aña kà bokuba magur mahoyay pəlis tekula. ¹⁹ Azla Yahudiya aña vaw tasəhà à wañ à mtəga Marta atà la Mariyama kà mamòtsay aña deda añaatà Lazar.

²⁰ Uwana Marta atsənəñ kà Yesu atsà à wañ, ahəd kà matsədəfal à ama. Ama Mariyama adzà à ahəñ à mtəga. ²¹ Marta agòf à Yesu: “Sufəl, agayña kagay la abanay kà, naka deda gulo amòtsay aw. ²² Ama lagonay babay kà, tatak uwana kadənavay à Zəzagəla gesina kà, adəvə à ka!” ²³ Yesu agòfəfal: “Deda aña k adəula à uda la sifa.” ²⁴ Marta agòfəfal: “Gəsəl adəwula à uda la mamòtsay, la kaslā uwana azlamazimnekid tadəula à uda la vud makəd gəl à ahəñ.”

²⁵ Yesu agòfəfal: “Gi la uwana gi masla maula azladza à uda la mamòtsay, ñgaha la sifa, dza uwana adinğ gi gəl à vok, adədzà à ahəñ la sifa, amiyaka kà amòts, ²⁶ ñgaha dza uwana la sifa, ñgaha adinğ gi gəl à vok kà, adəmətsay diki diki aw, kadinğ gəl à uwaga à vok nəmay?” ²⁷ “Iyay Sufəl”, agòfəfal, “Gədinğal gəl à vok, kà kak Kristu, Kona aña Zəzagəla, uwana naka atsà à wañ à gudəñ à vok.”

Yesu atuway

²⁸ Mok uwana Marta adapəh gay uwaga, ahəd, azàla deda aña Mariyama, agòfəfal la gəl à gəl: “Məñga gami kà, agə la abanay, ayəh ka, kà mad à awtəy.” ²⁹ Mok uwana Mariyama adatsən gay uwaga, asà à afik amərə vok kà mad à slaka Yesu. ³⁰ Mok uwatà kà, Yesu kà, adabəz à hudf gudəñ à abà dadəñ aw, aləg la slaka uwana tagagəm la Marta. ³¹ Uwana azla Yahudiya, uwana atà la kay la slaka Mariyama kà matabla gay à ahəñ, tanəñəñ asà à uda la mamər vok kà, tanəfà à uda. Tadzùgw kà, adàla kà matuway à gəl zəvay tagòf. ³² Mok uwana Mariyama adabəz à slaka uwana Yesu kà agə la abatà, atəd à makəla asik aña la makədəday, ñgaha agòfəfal: “Sufəl, à magay kagay la abanay kà, naka deda gulo kà amòtsay aw.” ³³ Uwana Yesu anəña, atuway la azla Yahudiya uwana tasà à wañ atà nna bay tataway, hudf kut, ləv

agòdɔfàl kà uwaga. ³⁴ Anàv atà: “Kalàw ma uwala?” Tagòdɔfàl: “Sufèl, sà à waɲ, kanəɲa slaka uwana tallà à abà.” ³⁵ Yesu atùw. ³⁶ Kiya uwaga azla Yahudiya tagòdɔf: “Nəɲàw mawoy masla aɲha tsi!” ³⁷ Ama azlaanik la tataka aɲatà la abà tagòdɔf: “Masla uwana apokwàhà yewdi à azlaguləf tak ma, kà mana asla kà madəɔf gay à mamətsay à Lazar la vok ala aw ma?”

Mawul à uda la mamətsay aɲa Lazar

³⁸ Bà gotənaɲ kà, Yesu kà ləv aɲha adatəsl ala aw, ahàd à gəl zəvay. Uwaga kà tsakur, matsakal à ama gà la akur mabəlam bəlamga. ³⁹ “Zəbàwwal abəlam la gay ala!”, Yesu agòdɔf à atà. Marta, deda aɲa mazimnekidɔf agòdɔf: “Sufèl, azinay adagay, kà uwana adadɔfah mahənaɲ ufadɔf la aku.” ⁴⁰ Yesu agòdɔf: “Gəpəh à ka aw takay, kà baɲa kadiɲal gəl à vok kà, kadànəɲəɲ mazləbay Zəzagəla, gəgòdɔf à ka aw ay?” ⁴¹ Tazəbal abəlam la gay ala. Yesu anəɲà à zagəla la magoɔfay: “Baba, kikay gəgòdɔf à ka, kà uwana katsəb gi sləm. ⁴² Gəsəl kà kadatsəb gi sləm koksikoksi, ama uwana gəpəh uwanay kà, kà maham à ahəɲ dza uwanay tatsəb gi sləm lagwa, kà atà aɲa madiɲal gəl à vok, kà kak la uwana kasləl gi à waɲ.” ⁴³ Mok uwana adapəh gay uwaga, awiyà la ndzəɔf: “Lazar, sà à lag la aku!” ⁴⁴ Mazimnekidɔf asà à lag, azlaahàl la azlaasik aɲha matsafadɔf à ahəɲ à ahəɲ gà la gabaga, hudɔf adi aɲha mafafadɔf nalbət à adi gà. Yesu agòdɔf à atà: “Pələwwàɲ ala, ɲgaha sàkàwwal, adà aɲha.”

Tatsatsəl vok gay kà makəs Yesu

⁴⁵ Aɲuvaw la tataka azla Yahudiya uwana la abà tasà à waɲ à slaka Mariyama, tanəɲà tatak uwana Yesu adɔfahəɲ gesina, tadiɲ gəl à masla à vok. ⁴⁶ Ama azlaanik la tataka aɲatà la abà, tahàd à slaka azla Farisəya, tatùgw à atà uwana Yesu adɔfahəɲ gesina. ⁴⁷ Kiya uwaga azla Farisəya la azlamadzahaga aɲa azlaməna mav tatak à Zəzagəla la azlaməna makoray tahamà gay à vok kà matstsəzl vok gay, tagòdɔf: “Mana mədehəɲ la dza uwanay adəh azlanadzipo aɲuvaw mi? ⁴⁸ Baɲa məsakal kiya uwanay, azladza gesina tadiɲ gəl à masla à vok, ɲgaha azla Rom bay tadàsa à waɲ, tadàkalah anu məɲ gày Zəzagəla gami à ahəɲ la tsəhay gami.” ⁴⁹ Tekula la tataka aɲatà, uwana sləm aɲha Kayyif, uwana masla agà məɲ madzahaga la mavay uwatà la tsəh, agòdɔf à atà: “Kasəlaw tatak aw! ⁵⁰ Kasəlaw kà ɲuləm dza tekula aməts kà gudəɲ gesina aɲa mazila aw takay?” ⁵¹ Apəh gay uwaga kà la masal aɲha aw, ama kà masla la uwana məɲ madzahaga la mavay uwatà la tsəh. Apəh à ahəɲ kà say Yesu amətsay, kà aɲa azla Yahudiya, ⁵² Kà aɲa tsəhay aɲatà pəra aw, ama bay kà maham gay azlabəza aɲa Zəzagəla uwana à vok, taslèh gəl à ahəɲ la uda gesina. ⁵³ Dagay la vudɔf uwatà, azlaməɲga aɲa azla Yahudiya tatsatsəl vok gay, kà makəs Yesu kà makəɔfay. ⁵⁴ Kà uwaga à uwana Yesu auguzàh la dazuwaya, la tataka azla Yahudiya la abà aya aw. Masla ahàd à gudəɲ anik à abà la fəta, uwana sləm aɲha Efərayim, adzà à ahəɲ la abatà la azlaməna matapla la slaka aɲha.

⁵⁵ Madəvaday aɲa Paska aɲa azla Yahudiya nekwa. Azladza gudəɲ anik anik aɲuvaw tadà à afik à Urusalima, kà uwana asà à atà matsikasl gəl ala ɲurayɲa mavakay madəvaday atsà à waɲ. ⁵⁶ Tayàh Yesu à mok, uwana atà la məɲ gày Zəzagəla la aku. Tanavà vok kà atà kà atà: “Mana kadzugwaw ma, adàsa à waɲ à madəvaday takay? Awma adàsa à waɲ aw ay?” ⁵⁷ Uwana tapəh kiya uwaga kà, kà uwana azlamadzahaga aɲa azlaməna mav tatak la azla Farisəya tagòdɔf kà: “Baɲa dza asəl slaka aɲha kà, apəhla ala kà maday makəsay”, tagòdɔf.

12

*Mariyama adzadzàb matərsin à Yesu à asik à gəl
(Mata 26.6-13; Mark 14.3-9)*

¹ Mahənaɣ mukwa adà à lig kà, kà mas à waɲ aɲa madəvaday Paska, Yesu ahàd à gudəɲ Betaniya, à slaka uwana Lazar adzà à ahəɲ, à Lazar uwana awulà à uda la mamətsay. ² La abatà tatà tatak may à Yesu. Lazar kà tekula la tataka azladza uwana la abà, tadzàh à tatak may à adi la Yesu. Marta la uwana atsàk à atà tatak may. ³ Ngaha Mariyama azəb dərew amàl matərsin bəf la dərew gà matsidəyga, azlà gay tenma aɲa litre. Tsakalay aɲha kà zlazladfa. Adzadzàb à Yesu à asik à gəl, ngaha aslaslàdɲan ala la aɲidz gəl aɲha, kà uwana abàdal à asik à gəl. Uwaga kà tafahaɲ kà la ahàf mazinayga. Mazinay aɲha azəb gày à gəl. ⁴ Tekula la tataka azlaməna matapla aɲha la abà à Yudas Iskariyot, masla uwana ayah mat à kaf à Yesu à gəl agòd: ⁵ “Kà mana taduw matərsin uwanay ala kà aɲa sili gursu dadərmokw makər, kà mavàh sili gà à azlaməna kudfa aw ma?” ⁶ Uwana apəh kiya uwaga kà, kà uwana awoyà azlaməna kudfa magay aw, ama kà uwana masla kà masla gəl: Masla la uwana anəɲla kiwa sili, ngaha azabàhàni uwana tafàh à agu. ⁷ Yesu agòdɲal: “Sàkal, afà matərsin uwaga à ahəɲ kà aɲa vudɲ mal gi, ⁸ akul, koksikoksi kadàgaw la azlaməna kudfa, ama gi kà, mədàday anina koksikoksi aw.”✠

Matsatsəl vok à gay kà makəɲ Lazar

⁹ Mok uwana maham à ahəɲ dza asəl kà Yesu kà aga la Betaniya kà, azla Yahudiya tahàd, ama kà gay aɲa Yesu pəra aw, ama bay kà, kà Lazar uwana Yesu awùlla à uda la mamətsay bay. ¹⁰ Azlaməngə aɲa azlaməna mav tatak à Zəzagəla tatsənà vok gay kà makəɲ Lazar, ¹¹ kà masla à uwana azla Yahudiya aɲuvaw tasàk azlaməngə aɲatà la tsəh ala kà madiɲal gəl à Yesu à vok.

Yesu ahàd à Urusalima à abà (Mata 21.1-11; Mark 11.1-11; Luka 19.28-40)

¹² La bebəɲ gà, maham à ahəɲ dza, uwana tasà à waɲ à madəvaday Paska tatsənəɲ, kà Yesu atsà à Urusalima à abà. ¹³ Kiya uwaga tasà à uda, taslàh babasl la azlaslahoy à vədah la tetəvi la ama, kà Yesu aɲa maday maguw à ahəɲ la afik, kà magagamay atà nna la mawiyay: “Mazləbay agay la Zəzagəla, Zəzagəla apisa gay à dza uwana à vok, atsa à waɲ la sləm aɲa Sufəl. Zəzagəla apisa gay à Sufəl aɲa azla Isərayel à vok!”✠ ¹⁴ Yesu abəz à ziwɲɲu, adzà à afik la abatà, bokuba uwana wakità Zəzagəla apəh:

¹⁵ 'Akul azladza Siyon, guba akəs akul aw, məɲ Sufəl aɲkul kà masla la uwana atsa à waɲ, adadza madzay la bəzi ziwɲɲu à afik.'✠

¹⁶ Azlaməna matapla la slaka aɲha kà, tatsənà godega aɲa tatak uwaga dadəɲ aw, ama mok uwana Yesu adàbəz à mazləbay kà, awul à atà à gəl uwana wakità Zəzagəla apəh lakəl aɲha kà uwaga dziriga, ngaha atà bay tagòd à uwaga à afik uwana apəh gesina lakəl aɲha la sləray aɲatà gesina.

¹⁷ Maham à ahəɲ dza, uwana atà la abatà, à mok uwana Yesu awùlla Lazar à uda la mamətsay kà, tapəh lakəl aɲa uwana tanəɲəɲ gesina bay. ¹⁸ Kà uwaga à uwana, maham à ahəɲ dza asà à waɲ kà magagamay la Yesu, kà uwana tasəl kà masla la uwana adahà nadzipo uwaga. ¹⁹ Kiya uwaga azla Farisəya tagòd kà atà kà atà: “Nəɲàwwàɲ zlà, kaslawwal à vok kà aɲa madàh tatak aya zlà aw, kà uwana azladza gesina kà tanəfay kà masla adagay.”

Azla Gərək anik tayàh manəɲ Yesu

²⁰ Azla Gərək anik la tataka aɲa azladza uwana la abà tasà à waɲ à Urusalima kà madəv kudfa à Zəzagəla la madəvaday la abà kà, ²¹ tazà vok à slaka Filip, uwana asà à waɲ la Betsayda, uwana la Galili, tagòdɲal: “Kona, asa à anu manənəɲ Yesu.” ²² Filip ahàd, apəh à Andəre, ngaha tahàd à slaka Yesu, atà səla. ²³ Yesu agòd à atà:

“Lagonay kà, kaslà adaslay adagay, à uwana Kona aña dza mabèz à mazlèbay aña. ²⁴ Haday, gègodf à akul la dziriga: Fofulo hi tekula adza à ahèj bawtawta, à baña atəf à kutso à abà, baña akəl gay aw. Ama baña adakəl à gay, adàsa à uda kà, av mayyay aņuvaw. ²⁵ Dza uwana awoya sifa aña kà, adàziņ ala. Ama dza uwana afa sləm à sifa aña la gudəj uwanay la vok aw kà, adàbəl uwaga kà aña sifa adəv à gay aw. ²⁶ Baña dza asal mazlak gi kà, say anəf à gi, kiya uwaga bay magamza gulo adàgay la slaka uwana gədàgay suwaņ, Baba gulo adàzləb magamza uwana adazlak gi.”

Yesu apəh gay mamətsay aña à ahəj

²⁷ Yesu agòdf lagwa kà: “Baņbabaņ, ləv agòf à gi, kakay gègodfay lagwa mi? Baba təf gi kà tatak uwana abəz à gi la kaslà uwanay? Ama kà aña uwaga la uwana gəsa à waņ. ²⁸ Baba và mazlèbay à sləm aņak!” Kuda atsənà à ahəj la zagəla la afik agòf: “Gədazlèbay, ŋgaha gədàzləbay aya gotənaņ.”

²⁹ Maham à ahəj dza uwana la abatà tatsənà kuda uwatà: “Uwatà kà maslèh məl aña habaga”, tagòf. Azlaanik tagòf: “Malika abadalmà.” ³⁰ Ama Yesu apəh à atà la paraka: “Kuda uwaga atsənà à ahəj kà, kà aņulo aw, ama kà aņkul. ³¹ Lagonay kà, kaslà adaslay à uwana seriya adàh vok à gudəj à vok uwanay à gəl, lagonay la uwana takudək sufəl aña gudəj à vok uwanay adagay kà makələj à uda. ³² Gi, baña gədàda à afik la vədah kà, gədàbiy azladza gesina à slaka gulo.” ³³ La gay uwaga asəl mapəhla tsəhay mamətsay aña uwana ala adàmətsay. ³⁴ Maham à ahəj dza agòdfal: “Mədzəj la wakità mapəhay gami la abà kà, Kristu adàdza à ahəj aña koksikoksi. Ŋgaha ma, kakay kagòfay, kà Kona aña dza adàday à zagəla ma? Uwa à Kona aña dza uwa?”^{*} ³⁵ Yesu agòdf à atà: “Udfaka kà aga la ahəj la tataka aņkul dadəj, aña kaslà ŋuv. Nəfaw tetəvi dziriga la mok uwana akul la udfaka la abà, kà mələs aña matsak à akul à ama aw, kà uwana dza uwana aday la mələs la abà kà, asəl slaka uwana ada à abà aw. ³⁶ Kiya uwaga kà, diņàwwal gəl à vok à mok uwana akul la udfaka la abà, kà akul aña magay azladza aña udfaka.”

Azla Yahudiya tadiņ gəl à Yesu à vok aw

Uwana Yesu adapəh gay uwaga kà, adà aña la abatà, ahəf à atà vok à adi. ³⁷ Amiyaka bə la azlanadzipo uwana adahàhəj, aņuvaw la huma aņatà babay kà, tadiņal gəl à vok aw, ³⁸ kà magədf uwana à afik, masla mapəhal gay à ahəl Yesayya uwana agòf:

'Sufəl uwa adin gəl à gay gami à vok uwa? A uwa à uwana Sufəl Zəzagəla apəhla maslay aña ala uwa?'

³⁹ Taslala vok aña madiņal gəl à vok aw kà uwana Yesayya agòf aya:

⁴⁰ 'Zəzagəla aguləfàh atà ala, adatsakah à atà haņkəli à ama, kà yewdi aņatà aña manəjla aw, kà haņkəli aņatà aña masəl tatak aw. Ŋgaha kà atà aña magola vok à slaka gulo, kà gi aña mawur atà ala aya aw.'

Zəzagəla agòf.^{*} ⁴¹ Yesayya apəh uwaga kà, kà uwana anəjə mazlèbay aña Yesu, à uwana apəh lakəl aña.

⁴² Aņuvaw la tataka azlaməna gày zil aña azla Yahudiya la abà, tadiņ gəl à Yesu à vok, ama la dazuwaya aw, kà uwana guba akəs atà kà azla Farisəya aña makudəkàh atà à lag gày madəv kuđa la aku. ⁴³ Kà uwana asà à atà kà azladza tazlèb atà, à kà mazlèb atà aña Zəzagəla.

Gay aña Yesu kà, adàh seriya

⁴⁴ Kiya uwaga Yesu azà kuda à zagəla la magòfay: “Dza uwana adin gi gəl à vok, adin gəl kà à gi à vok pəra aw, ama à dza uwana à vok asləl gi à waņ babay. ⁴⁵ Ŋgaha

^{*} **12:34** 12.34 Mahabay 110.4; Yesayya 9.7; Hezəkiyel 37.25 ^{*} **12:40** 12.40 Yesayya 6.10; 53.1

dza uwana anəŋa gi, anəŋa dza uwana aslèl gi à waŋ babay. ⁴⁶ Gi kà, gəsà à waŋ à gudəŋ à vok kà bokuba gi ufaka, kəla dza uwana adiŋ gi gəl à vok kà, adz à ahəŋ la mələs la abà aw. ⁴⁷ Ama baŋa dza atsəna gay gulo, ŋgaha akəs aw kà, gi la uwana gədàfahla ala seriya à gəl aw, kà uwana gəsà à waŋ kà aŋa mabəl azladza gudəŋ à vok, awkà aŋa madàh seriya à gudəŋ à vok à gəl aw. ⁴⁸ Dza uwana akweska gi, ŋgaha akəs gay uwana gəpəh aw kà, seriya la ahəŋ lakəl aŋha, gay uwana gəpəh la uwana adàfahla ala seriya à gəl, la vudf madəv à gay gudəŋ à vok. ⁴⁹ Gay uwanay gəpəhay kà la maslay aŋa aslasl gəl gulo aw, ama Baba uwana aslèl gi à waŋ kà, la gəl aŋha, la uwana avà à gi maslay kà gi aŋa mapəhay, aŋa matapla azladza. ⁵⁰ Uwana apəh à gi, la uwana atsakakulla sifa adəv à gay aw à waŋ. Uwana gəpəhay kà, gəpəhay kà bokuba uwana Baba avà à gi maslay lakəl aŋha.”

13

Yesu apalàh asik à azlaməna matapla la slaka aŋha

¹ Uwaga kà vudf madàh vok aŋa madəvaday Paska. Yesu asəl kà kaslā aŋha adaslay, kà maz vok aŋha la gudəŋ uwanay la vok, ŋgaha kà madiy aŋha à slaka Baba aŋha la zagəla. Koksikoksi awoyàhà azlaməna aŋha uwana la gudəŋ la vok, adàwoya atà tsərəh à makəf gəl à ahəŋ.

² Yesu la azlaməna matapla la slaka aŋha tazùw tatak may aŋa mokokhu. La mok uwaga kà, seteni adaguway la ləv aŋa Yudas, kona aŋa Səmon Iskariyot la tsəh, kà mat kaf à Yesu à gəl. ³ Yesu asəl kà masla kà asà à waŋ kà la slaka Baba, ŋgaha awulay à abatà aya, kà uwana Zəzagəla Baba avàl maslay à ahəl gesina. ⁴ Kiya uwaga Yesu atsizilla ala la tatak may la adi, asərət dawara aŋha la vok ala, azəb gabaga aŋha, awàd à tsəh. ⁵ ŋgaha avəd iyaw à daraw à abà adzəkà mapalàhla asik à azlaməna matapla la slaka aŋha, adàhàh à atà iyaw la asik ala la gabaga, uwana awàd à tsəh. ⁶ Mok uwana adabəz à slaka aŋa Səmon, Səmon Piyer agòdɔl: “Sufəl, kak la uwana kapal gi asik, kagòd takay?” ⁷ Yesu awulà ala la magòdɔl: “Səmon Piyer, tatak uwana gədehəŋ lagonay kà, kasəl dadəŋ aw, ama la huma la gay la uwana kadəsəl godega aŋha.” ⁸ Səmon Piyer agòdɔl: “Awaŋ Sufəl, kapal gi asik aw!” Yesu agòdɔl: “Baŋa gəpala à asik aw, kadàbəz à tatak la ahəl gulo aya aw.” ⁹ Səmon Piyer awulà ala: “Sufəl, tsa kità kà, kapal gi azlaasik pəra aw, ama pal gi azlaahəl gulo, la gəl gulo gesina!” ¹⁰ Yesu agòdɔl: “Dza uwana adapal vok gesina kà, anəkudfa mapal vok aya aw, say azlaasik gə pəra, kà uwana vok aŋha kà kuzekaka. Akul azlakuzekaka, ama akul gesina nəma aw.” ¹¹ Yesu kà asəl dza uwana adətal kaf à gəl, kà uwaga à uwana agòdɔl: “Akul azlakuzekaka gesina aw.”

¹² La lig aŋa uwaga la ahəŋ, à mok uwana adapalàh à atà asik, Yesu awulà dawara aŋha à vok aya, ŋgaha adzà madzay la slaka aŋha la abà, agòd à atà: “Katsənaw godega aŋa uwaga gədàfahakullaŋ takay? ¹³ Akul kazalawgəla məŋga, ŋgaha Sufəl, azlayla akul nəma, kà uwana gi masla haday. ¹⁴ Tsa baŋa gi la uwana gi Sufəl, ŋgaha məŋga kà, kà gədapalàh à akul asik lagwa, akul babay kà, azlayla kà vok kà kapalahaw vok asik kà akul kà akul suwaŋ babay zlà. ¹⁵ Lagwa kà gədapəhakulla mafətsa à vok aŋha, à uwana kadàhəwəŋ bokuba uwana gədehəŋ zlà, la slaka aŋkul. ¹⁶ Haday la dziriga gəpəh à akul: Masla sləray la ahəŋ, aduw məŋga aŋha aw, masləlay bay, aduw dza uwana aslèl aw! ¹⁷ Lagonay kà, kasəlaw uwaga, kadəgaw la marabay à baŋa kakəsaw uwaga gesina.”

¹⁸ “Gəpəhay kà lakəl aŋkul gesina aw, gəsəl azlauwana gətsatsəmàni atà. Ama say gay aŋa matsetseray uwanay agəf à afik, dza uwanay məzuw tatak may anu səla, la uwana adəguwgəla à lig à vok.✧ ¹⁹ Dagay lagonay gəpəh à akul à vok à abà, kokuɔfa

mapak vok aña azlatatak uwaga, ngaha kà baña azlatatak uwaga adàpaka vok kà, akul aña masəlay kà gi uwana gi ndzer. ²⁰ Gəpəh à akul la dziriga: Dza uwana akəs gi, akəs dza uwana asləl gi à wañ babay.”

*Yesu apəh gay matal kaf à gəl aña Yudas
(Mata 26.20-25; Mark 14.17-21; Luka 22.21-23)*

²¹ La mok uwana Yesu adapəh gay uwaga, abək mazaw la gəl mənğa agòd: “Gəpəh à akul la dziriga kà: Tekula ankul adàta à gi kaf à gəl!” ²² Azlaməna masla matapla tanəñà à vok à adi kà atà kà atà, tasəl dza uwana apəhay lakəl aña aw. ²³ Tekula aña azlaməna matapla uwana Yesu awoyən kaykay, agà la makəla aña. ²⁴ Səmon Piyer anavəl la yewdi, kà masla aña manavay à Yesu kà masəl dza uwana apəhay lakəl aña. ²⁵ Kiya uwaga, masla matapla ahùb à slaka Yesu kà manaval: “Sufəl uwa, uwatà uwa?”[☆] ²⁶ Yesu agòdal: “Aganay gədəbay aləl à kaf à gəl, dza uwana gədàvəl kà, masla gə la uwaga.” Kiya uwaga Yesu atsikàni kaf, adəbal à aləl à gəl, ngaha avà à Yudas, kona aña Səmon Iskariyot. ²⁷ Mok uwana Yudas azəb kaf uwaga kà, seteni adà à ləv aña à tsəh. Yesu agòdal: “Uwana asa à ka madəhən kà, dəhən la katskats!”

²⁸ (Ama bà dza tekula la tataka aña azladza uwana la abà, tadzàh à tatak may à adi kà, dza la ahən agòd: ‘Kà mana Yesu apəh kiya uwaga mi’, la ahən aw. Kà uwana tatsənən aw. ²⁹ Bokuba uwana: Kà uwana Yudas la uwana kiwa sili la ahəl kà, tadzùgw kà Yesu asal masləlay, kà masukw tatak aña madəvaday aya, tagòd. Bañaw: ‘Và tatak à azlaməna kuđa’, agòdal, tagòd) ³⁰ Yudas akəs kaf uwana atsəkallən à ahəl, asà à uda katskats kà, adagay vəd.

Mapəhay mawga

³¹ Mok uwana Yudas adasa à uda kà, Yesu agòd: “Lagonay kà, mazləbay aña kona aña dza apəhla vok ala, ngaha mazləbay aña Zəzagəla adapəhla vok ala la masla la abà. ³² Mazləbay aña Zəzagəla apəhla vok ala la kona aña dza la abà, Zəzagəla bay adəpəhla mazləbay uwana ala à Kona aña dza akor la gəl aña, adəh uwaga kà zwek bà lagwa. ³³ Azlabəza gulo gi la ahən la akul aña kaslè njuv pəra. Kadəyahaw gi, ama gəpəh à akul bokuba uwana gəpəh à azla Yahudiya aya: Kaslawwal à vok aña mad à slaka uwana gəday aw. ³⁴ Gədàvə à akul mapəhay mawga: Wòyàw vok kà akul à akul, say kawoyaw vok kà akul à akul bokuba uwana gəwoyà akul. ³⁵ Baña kawoyaw vok kà akul à akul kà, azladza gesina tadəsəlay kà, akul azlaməna matapla la slaka gulo, hadfay!”

Yesu atà la Piyer

(Mata 26.31-35; Mark 14.27-31; Luka 22.31-34)

³⁶ Səmon Piyer anavəl à gay la: “Sufəl kaday ma à uwala?” Yesu awulà ala: “Kaslala vok aña manəf gi à slaka uwana gəday lagonay aw. Ama bawbaw kà, kadənəf gi.” ³⁷ Piyer agòdal: “Sufəl, kà mana gəslay kà manəf ka lagonay aw ma? Gi, gədàdāh vok, kà mav sifa gulo kà anək!” ³⁸ Yesu agòdal: “Ndzer, kà kak kadàdāh vok aña mav sifa anək kà anulo ay? Gəpəh à ka la dziriga kà, gurayña mewgdzagalan awiyay kà asik makər, kadəgəfay asik makər, kà kasəl gi aw!”

14

Yesu kà masla tetəvi uwana adala anu à slaka Zəzagəla

¹ “Kazamaw la gəl aw”, Yesu agòd à atà, “Dinəw gəl à Zəzagəla à vok, ngaha dīnəw gi gəl à vok bay. ² Slaka madz à ahən anjuvaw la mtəga Baba gulo, gəday gədàdāhakulla slaka à ahən. Agayña hadfay awkà, naka gəpəh à akul aw. ³ Ngaha

☆ 13:25 13.25 Mahabay 35.19; 69.4

baŋa gëdaday gëdadahakulla slaka à ahëŋ, kà gëdàwula à waŋ, kà gi aŋa mahël akul à slaka gulo, kà akul aŋa magay la slaka uwana gi la abà. ⁴ Akul kà, kasëlaw tetëvi mad à slaka uwana gëday.” ⁵ Tomas agòfal: “Sufël, mësël slaka uwana kaday aw. Kakay mëslala vok aŋa masël tetëvi ma?” ⁶ Yesu awulà ala: “Gi tetëvi, gi dziriga, gi sifa. Dza aslala vok aŋa mad à slaka Baba la tetëvi anik, kokudfa maguway la slaka gulo aw. ⁷ Baŋa kasëlaw gi kà, kasëlaw Baba gulo babay. Dagay lagonay kà, kasëlaw masla, ŋgaha kanëŋawwaŋ babay.”

⁸ Filip agòfal: “Sufël, pëhanula Baba, uwaga kà diga zlà.” ⁹ Yesu agòfal: “Mëdadza à ahëŋ kà mëŋga anina kà, bà përa kà, kasël gi aw uwa, Filip? Dza uwana anëŋà gi kà, anëŋà Baba gulo babay, ŋgaha ma kakay kagòfay pëhanula Baba ma? ¹⁰ Kadinjal gël à vok, kà gi la Baba la abà, Baba la gi la abà aw uwa? Gay uwanay gëpëh à akul gesina kà, atsa à waŋ kà la slaka gulo aw, ama la slaka Baba gulo. Baba uwana adza à ahëŋ la gi la abà la uwana ahën slëray aŋha ala. ¹¹ Dinàw gi gël à vok à uwana gëgod: Gi la Baba la abà, Baba bay la gi la abà. Baŋa kadinjawwal gël à gay uwaga à vok aw kà, dinàw gël à abà à slëray gè uwana à vok tsi! ¹² La dziriga gëpëh à akul: Dza uwana adin gi gël à vok, adàdàh azlaslëray uwana gëdadehëŋ suwaŋ. Adàdàh slëray uwana aduwa uwanay, kà uwana gi gëdaà à slaka Baba gulo. ¹³ Dëwdëw tatak uwana kadànavaw la slëm gulo kà, gëdàvà à akul uwaga gesina, kà Kona aŋa mapëhla mazlëbay aŋa Baba aŋha ala. ¹⁴ Baŋa kanavaw tatak la slëm gulo kà, gëdàvà à akul uwaga.”

Yesu apëh gay aŋa maslël Masasëfok Zëzagëla à ahëŋ

¹⁵ Yesu agòf: “Aŋa kawoyaw gi kà, naka kakësaw mapëhay gulo. ¹⁶ Gëdàdëv kudfa à Baba, kà masla aŋa maslël à akul masla mazlak akul anik à waŋ kà, Masasëfok dziriga, kà masla aŋa magay la akul koksikoksi. ¹⁷ Gudëŋ à vok kà aslala vok aŋa mabëzal aw, kà uwana aslala vok aŋa manëŋëŋ la masëlay aw. Ama akul kà kasëlaw masla, kà uwana adagay la akul ŋgaha adàdza à ahëŋ la akul la abà.”

¹⁸ “Gëdàsak akul à ahëŋ la matawaŋ la abà aw, gëdàwula à waŋ à slaka aŋkul. ¹⁹ La kaslà ŋuv la abà, gudëŋ à vok adànëŋ gi aw, ama akul kà, kadànëŋaw gi, kà uwana gi la sifa, akul babay la sifa. ²⁰ Baŋa mavakay uwatà adàsa à waŋ kà, la mok uwatà la uwana kadàsëlaw kà gi la Baba la abà, ŋgaha kà Baba bay la gi la abà, ŋgaha gi bay la akul la abà.”

²¹ “Dza uwana akës mapëhay gulo, ŋgaha anëŋla uwaga kà, masla mawoya gi zlà. Baba gulo adàwoy dza uwana awoya gi babay, gëdàwoya masla, gëdapëhalla vok.” ²² Yahuda (awkà Yudas Iskariyot aw), agòfal: “Sufël, kakay uwaga adàh vok, kà kapëhanula vok kà anu përa, awkà à gudëŋ à vok aw ma?” ²³ Yesu awulàl ala, agòfal: “Dza uwana awoya gi akës mapëhay gulo kà, Baba gulo adàwoyëŋ, anu la Baba gulo mëdàduw à awtày à slaka aŋha, mëdàdza à ahëŋ la mtëga aŋha. ²⁴ Dza uwana awoya gi aw kà, akës mapëhay gulo aw. Uwana katsënaŋ gi gëpahay kà, uwaga kà asa à waŋ kà la slaka gulo aw, ama asa à waŋ kà la slaka Baba gulo uwana aslël gi à waŋ.”

²⁵ “Gëdapëh à akul uwaga dagay uwarà, à mok uwana mëga anina. ²⁶ Masla mazlak akul, à Masasëfok tsikasla uwana Baba adàslël à akul à waŋ, la slëm gulo kà, masla la uwana adàtapahakulla tatak gesina, ŋgaha adàwula à akul à gël uwana gëdapàha à akul gesina aya.”

²⁷ “Gësak à akul ala lapiya à ahëŋ, gëvà à akul lapiya gulo. Gëvà à akul kà bokuba uwana gudëŋ à vok avà à akul aw. Kazamawla gël aw, guba akës akul babay aya aw. ²⁸ Katsënaŋ uwana gëgòf à akul kà, gëdiy aŋulo. Ama gëdàwula à waŋ à slaka aŋkul. Agayŋa kawoyaw gi kà, naka karabaw à kà uwana gëda à slaka Baba gulo, gëgodf à akul, kà uwana Baba la uwana mëŋga kà gi. ²⁹ Lagonay kà, gëdapëhakulla

vok à abà, kokudfa mapak vok aña azlatatak uwaga, kà mok uwana adàzlanjalay kà, kadàdijawwal gəl à vok. ³⁰ Gəslala vok aña mabadma mənğa anina aya aw, kà uwana sufəl aña gudəŋ à vok uwanay kà nekwa atsa à waŋ. Maslay aŋha la ahəŋ bà ŋuv lakəl gulo aw. ³¹ Ama say gudəŋ à vok asəlay, kà gəwoya Baba kəla, ŋgaha gədza à ahəŋ kiya uwana asa à Baba. Sàw à afik mēda aŋami la abanay lagwa!”

15

Yesu kà matavəruk uwana av mayyay

¹ Yesu agòd aya: “Gi la uwana gi matavəruk dziriga, Baba gulo kà dza aña guf matavəruk. ² Kəla ahəl matavəruk uwana av mayyay aw kà, aslèh gi à vok ala. Ngaha kəla ahəl uwana av mayyay kà adàdeslay, kà aña mav mayyay mənğa aya. ³ Kà matapla uwanay gədatapaakulla kà, kadàgaw madadeslayga. ⁴ Nèbàw vok la gi, bokuba uwana gi la manəb vok gə la akul. Ahəl matavəruk aslala vok aña mav mayyay la aslasl gəl aŋha aw, say agay manəb vok gə, à iyà gə à vok. Kiya uwaga babay kaslawwal à vok aña madz à ahəŋ kokudfa gəl aŋkul aw, say baŋa kanəbaw gi vok à vok.”

⁵ “Gi la uwana gi matavəruk iyà gə, akul kà akul azlamazləzl vok gə. Dza uwana adza à ahəŋ la gi la abà, iyaw gulo akəlay la masla la abà, masla adàvə mayyay aŋuvaw, kà uwana kaslawwalla vok aña madàh tatak la kokudfa gi aw. ⁶ Dza uwana adza à ahəŋ manəb vok gə la gi aw kà, taduw à uda la guf la abà, bokuba ahəl matavəruk makədəval à vok ala gə, agula la abatà, tatsatsamay kà mabəkay à akəl à gay, ŋgaha akəl abad à gay ledfa. ⁷ Baŋa kadənəbaw vok la gi, ŋgaha bay gay gulo adənəb vok la akul la abà, nàvəw uwana asa à akul gesina, kadəbəzawwal. ⁸ Baŋa kavəw mayyay aŋuvaw, kadàgaw azlaməna matapla la slaka gulo. La uwaga la uwana mazləbay aña Baba gulo adəpəhla vok ala la slaka azladza. ⁹ Gəwoya akul la ləv tekula, bokuba uwana Baba gulo awoya gi. Dzəw à ahəŋ la masal gulo la abà. ¹⁰ Baŋa kakəsaw mapəhay gulo kà, kadàdzaw à ahəŋ la masal gulo la abà, kalkal bokuba uwana gəkəsəŋ mapəhay aña Baba gulo, ŋgaha gədza à ahəŋ la masal aŋha la abà babay.”

¹¹ “Gəpəh à akul uwaga kà, kà marabay gulo aña magay la akul la abà, ŋgaha marabay aŋkul babay aña magay mahənlaga. ¹² Aganay mapəhay gulo: Wòyàw vok kà akul à akul, bokuba uwana gəwoya akul bay. ¹³ Masal la ahəŋ aduw aña dza, uwana av sifa aŋha kà aña azlaslawda aŋha aw. ¹⁴ Akul azlaslawda gulo, à baŋa kadəhaw uwana ‘Dahəwwəŋ’, gəgod à akul gesina. ¹⁵ Dagay lakana kà, gədàzala akul ala azlamagamza aya aw, kà uwana magamza kà asəl tatak uwana mənğa aŋha adəhəŋ aw. Ama gədàzalla akul ala azlaslawda, kà uwana tatak uwana gətəpla la slaka Baba kà, gədatap à akul ala babay suwaŋ. ¹⁶ Akul la uwana kakəsəwni gi aw, ama gi la uwana gəkəsəni akul, gəbək akul à ahəŋ kà kadaw aña mav mayyay, ŋgaha mayyay uwaga adasafay aña koksikoksi. Kiya uwaga Baba adàvə à akul dèwdèw tatak uwana kadənavaw la sləm gulo. ¹⁷ Gay uwana gəpəh à akul à vok à abà lagwa, say kawoyaw vok kà akul à akul.”

Gudəŋ à vok à azina vok à Yesu ala la azladza aŋha

¹⁸ “Baŋa gudəŋ à vok azinakulla vok ala kà, sèləw kà atsà vok à mazin gi vok ala dadəŋ teraŋa. ¹⁹ Agay kagaw azlaaŋa gudəŋ à vok kà, naka gudəŋ à vok awoya akul kà uwana akul azlaaŋa. Ama gətsatsəmàni akul, gəhəl akul à uda la abà, lagonay kà, akul azlaaŋa gudəŋ à vok aya aw, kà uwaga à uwana gudəŋ à vok azinakulla vok ala. ²⁰ Awula à akul à gəl, à uwana gəpəh à akul uwarà kà, magamza aduwa mənğa aŋha aw. Baŋa tatərəb gi kà, tadətərərbah akul bay, ama baŋa takəs mapəhay gulo kà, tadəkəs mapəhay aŋkul babay. ²¹ Ama tadəfahakulla uwaga à vok gesina kà, kà

ahàl gulo, kà uwaga à uwana tasèl dza uwana aslèl gi à waŋ aw. ²² Agayŋa gètsà à waŋ kà aŋa mapèh à atà aw, kà naka tsakana aŋatà atèd à atà à gèl aw. Ama lagwa kà haŋay lakèl aŋa tsakana aŋatà la ahèŋ aya aw. ²³ Dza uwana azin gi vok ala kà, azina vok à Baba gulo ala bay. ²⁴ Agayŋa gèdàh azlatatak nadzipo gà uwana dza adahèŋ aw aw, kà naka tsakana atèd à atà à gèl aw. Ama tsa gèdaɗahah azlanadzipo uwaga kà, ŋgaha bà gotènanj kà, tazinan vok ala la Baba gulo. ²⁵ Ama uwaga apakà vok kà, kà magèd uwana à afik tatsetsèr à wakità mapèhay à abà: 'Tadazingèŋ vok ala kà kiga pèra.'

Yesu agòd à atà.

²⁶ Yesu agòd à atà aya: "Baŋa masla mazlak akul adàsa à waŋ, masla la uwana Masasèdòk dziriga, uwana adàguwa à waŋ la slaka Baba gulo, gèdàslèl à akul à ahèŋ à baŋa gèdada à slaka Baba gulo. Masasèdòk uwaga adàza sayda lakèl gulo. ²⁷ Ŋgaha akul bay kadàzaw sayda gulo, kà uwana kagaw la gi dagay la madzèka."

16

¹ "Gèpèh à akul uwaga kà, kà akul aŋa masak madiŋal gèl à vok aw. ² Tadàkudèkah akul à lag la gày madèv kufà aŋa azla Yahudiya la aku. Kaslà adàsa à waŋ à uwana azladza uwana tadàkadafah akul, tadàgoday kà: 'Slèray uwana mèdehèŋ kà, akès à Zèzagèla à gèl.' ³ Tadàh uwaga kà, kà uwana tasèl Baba aw, ŋgaha tasèl gi babay aw. ⁴ Ama gèpèh à akul uwanay kà, kà akul aŋa madzugway lakèl aŋha, kà baŋa adapaka vok kà, kà aŋa mawul à akul à gèl."

Slèray aŋa Masasèdòk Zèzagèla

"Uwana gèpèh à akul uwaga dagay madzèka aw kà, kà uwana gi la tataka akul la abà. ⁵ Lagonay kà, gèda à slaka dza uwana aslèl gi à waŋ, ama dza la ahèŋ 'Kad à uwali', agòd à gi la tataka aŋkul la abà, amiyaka tekula aw. ⁶ Ama mazaw la gèl adakès akul kà uwana gèpèh à akul uwaga. ⁷ Ama gèpèh à akul la dziriga kà, aŋkul kà ŋulèm gèda aŋulo, kà uwana baŋa gèda aŋulo aw kà, masla mazlak akul atsa à ahèŋ à slaka aŋkul aw. Ama baŋa gi gèda aŋulo kà, gèdàslèl à akul à ahèŋ. ⁸ Masla kà, baŋa adàsa à ahèŋ kà, adàpèhla à azladza gudèŋ à vok madzugway mawisiga aŋatà, lakèl aŋa tsakana, lakèl aŋa dziriga, ŋgaha lakèl aŋa seriya aŋa Zèzagèla. ⁹ Tadàvavar gèl aŋatà lakèl aŋa tsakana, kà uwana tadiŋ gi gèl à vok aw, ¹⁰ tavavar gèl aŋatà lakèl aŋa tatak dziriga, kà uwana gèda à slaka Baba gulo, ŋgaha kà, kadànèŋaw gi aya aw. ¹¹ Lakèl aŋa seriya babay kà, kà uwana sufèl aŋa gudèŋ à vok uwanay kà seriya adàkèsay."

¹² "Gi la azlagay aŋuvaw kà mapèh à akul, ama kaslawwalla vok aŋa makèsin dadèŋ aw. ¹³ Mok uwana Masasèdòk dziriga adàzlanjalay kà, adàdala akul la dziriga la abà gesina, kà uwana adàpèhay kà lakèl aŋa maslay aŋa gèl aŋha aw, ama adàpèhay kà lakèl aŋa uwana atsènanj, ŋgaha lakèl aŋa azlatatak uwana atsa à waŋ la huma la gay. ¹⁴ Masla adàpèhla mazlèbay gulo ala, kiya uwana atsènanj la slaka gulo, la uwana adàzakulaŋ. ¹⁵ Kèla tatak uwana Baba akoray kà uwaga aŋulo, kà uwaga à uwana gègod à akul kà, Masasèdòk Zèzagèla adàwula à akul tatak uwana abèzal la slaka gulo."

Mazaw la gèl adàpaka marabay

¹⁶ Yesu agòd à atà: "Aŋa kaslà ŋuv kadànèŋaw gi aya aw, ama zwek la huma la gay ŋuv kadànèŋaw gi aya." ¹⁷ Kiya uwaga azlaanik la tataka azlamèna matapla la slaka aŋha, tanàvaha à vok kà atà kà atà: "Uwaga ma, mana asal magòday ma? Agòd à anu kà: 'Aŋa kaslà ŋuv kà mèdànèŋèŋ gi aw, ama zwek la huma la gay aya kà mèdànèŋèŋ gi aya, ŋgaha babay gèda à slaka Baba', agòd aya. ¹⁸ Mana asal magòday kaslà ŋuv ma? Mètsèna uwana asal mapèhay aw." ¹⁹ Yesu asèl kà asa à atà manaval.

Kiya uwaga agòd à atà: “Asafay à uwana gèpèh à akul uwaga aw, zwek la huma la gay kadànéhàw gi aw, la lig la ahèj ñuv kadànéhàw gi aya. Lakèl ma aña uwaga à uwana kanavahaw vok takay? ²⁰ Gèpèh à akul la dziriga: Katawaw, katsahahaw hulolo, ama gudèj à vok adàrabay, kadàzamawla gèl, ama mazaw la gèl aṅkul kà, adàpaka marabay. ²¹ Baña mis azlà asekw à ahèj kà, mazaw gèl adal à vok, kà uwana kaslà matèrèbay aṅha adaslay, ama baña adasekw à ahèj kà, matèrèbay avikaṅ, kà uwana marabay kà uwana adayyi bèzi. ²² Kiya uwaga babay, akul la mazaw la gèl la abà la kaslà uwanay, ama gèdànéhàw akul aya, ṅgaha lèw aṅkul adàrabay. Dza la ahèj aslala vok kà mazèbakulla marabay ala tetuwa aw.”

²³ “Baña mavakay uwatà adasa à waṅ kà, kadànavaw gi tatak la slèm gulo aya aw. Gèpèh à akul la dziriga: Kèla tatak uwana kanavaw la slèm gulo kà, Baba adàvà à akul uwaga gesina. ²⁴ Tsèràh à lakana dadàṅ kà, kadanavaw tatak la slèm gulo aw. Nàvaw ṅgaha kabèzawwal, ṅgaha kà marabay aṅkul aña mahèhà.”

Yesu kà adakèdasl à gudèj à vok

²⁵ “Gèpèh à akul azlatatak uwaga gesina kà la gay la gay la abà, ama kaslà atsa à waṅ à uwana gèdàpèh à akul kà la gay la gay la abà aya aw. Gèdàpèh à akul kà la dazuwaya lakèl aña Baba gulo. ²⁶ Baña mavakay uwaga adaslay kà, gèdàdèw kufà à Baba kà aṅkul, gègòd magay aw. ²⁷ Kà uwana Baba la gèl aṅha awoya akul. Awoya akul kà, kà uwana kawoyaw gi, kà uwana kadiṅawwal gèl à vok, kà gèsà à waṅ la slaka aṅha. ²⁸ Gèsà à waṅ à gudèj à vok kà, gèsà à ahèj kà la slaka Baba. Lagwa kà, gèda à slaka Baba, gèsak à gudèj à vok à ahèj.”

²⁹ Azlamèna matapla la slaka aṅha tagòdàl: “Lagonay kà, kapèhay la dazuwaya, kokufà la gay la gay la abà zlà. ³⁰ Lagwa kà, mèdasèlay kà kasèl tatak gesina, ṅgaha kanèkufà kà dza aña manav à ka tatak aw. Mèdiṅal gèl à vok kà ndzer, kasà à ahèj kà la slaka Baba Zèzagèla.” ³¹ Yesu agòd à atà: “Kadiṅawwal gèl à vok adagay lagwa ay? ³² Kaslà adàsa à waṅ, lagwa kà adasa à waṅ, uwana kadàslèhaw gèl à ahèj uwabeyuwi adàdiṅ aṅha à mtèga aṅha, kadàsakaw gi à ahèj kokufà gulo. Ama la dziri kà, gi kokufà gulo aw, kà uwana anu la Baba gulo. ³³ Uwana gèpèh à akul uwaga gesina kà, kà akul aña magay la lapiya la maham gay à vok la abà la gi. Akul kà, kadàsaw ṅgèrpa la gudèj la vok, ama kurit yewdi, agòd à akul aw! Kà uwana gèdakèdaslla gudèj à vok.”

17

Yesu adèw kufà kà aña azlamèna matapla aṅha

¹ Mok uwana Yesu adapèh gay uwaga à gay gesina kà, anèṅà à zagèla, agòd: “Baba, kaslà kà adaslay. Pèhla mazlèbay aña Kona aṅak ala, ṅgaha Kona aṅak apèhla mazlèbay aṅak ala suwaṅ, ² kà uwana kavàl maslay lakèl aña azladza gesina la vèdàh, kà masla aña mav sifa adèw à gay aw à azladza uwana kabèkal atà gesina. ³ Sifa adèw à gay aw kà, kà aña azlauwana tasèl ka pèra, à kak Zèzagèla dziriga gè, ṅgaha kà masèlay Yesu Kristu uwana kaslèl à ahèj. ⁴ Gèdapèhla mazlèbay aṅak ala la vèdàh, gèdadèwèṅ à gay slèray uwana kaf à gi à ahàl kà madèhèj. ⁵ Lagwa zlà kà, Baba kà, vè à gi mazlèbay uwana gègè la masla la huma aṅak mok uwana gudèj à vok alèg madzèka dàṅ zlà.”

⁶ “Baba, azladza uwana kabèk à gi, atà la gudèj uwanay la vok kà, gèdàpèhatàla kak, kà uwana atà tagay azlaaṅak, ṅgaha kabèk à gi atà, lagwa kà, atà takès gay aṅak. ⁷ Lagwa kà dèwdèw tatak uwana kavà à gi kà, tasèl kà, atsà à ahèj la slaka aṅak. ⁸ Kà uwana gèpèh à atà ala gay uwana kapèh à gi à ahàl kà mapèh à atà, takès, tasèl ndzer kà gèsà à waṅ la slaka aṅak, ṅgaha kà kak la uwana kaslèl gi à waṅ.”

⁹ “Baba gədöv à ka kudfa kà aṅatà. Awkà gədöv kudfa kà gudəṅ à vok aw, ama kà aṅa azlauwana kabək à gi atà à ahàl, kà uwana azlaañak. ¹⁰ Dèwdèw tatak uwana aṅak kà aṅulo, dèwdèw tatak uwana aṅulo bay kà, uwaga kà aṅak, kà uwaga à uwana mazləbay gulo apəhla vok ala la azlatatak uwaga la abà gesina. ¹¹ Gi kà, gi la gudəṅ la vok aya aw, ama atà kà, atà la gudəṅ la vok. Gi kà gəda à slaka aṅak Baba tsikasla, nənḷa atà la ndzəda aṅa sləm aṅak uwana kavà à gi, kà atà aṅa magay tekula, bokuba uwana mөгaw tekula anu səla. ¹² Mok uwana gi la slaka aṅatà gəfà à atà sləm la maslay aṅa sləm aṅak, sləm uwana kavà à gi. Gənənḷa atà, amiyaka tekula aṅatà bay kà, azàla aw. Say dza uwana naka azilà, wakità agòd kà magəđ uwana à afik, wakità agòd pəra.✧ ¹³ Ama lagonay kà, gəda à slaka aṅak, à uwana gəpəh kiya uwanay kà, kà uwana gələg la gudəṅ la vok dadəṅ, kà atà aṅa mabəzal marabay gulo la huđ aṅatà, marabay uwana mahənlaga. ¹⁴ Gi, gəvà à atà gay aṅak, ṅgaha gudəṅ à vok azin atà vok ala, kà uwana azlaañgə gudəṅ à vok aw, bokuba gi uwana gi aṅa gudəṅ à vok bay aw. ¹⁵ Gədöv à ka kudfa kà mahəl atà à uda la gudəṅ la vok aw, ama aṅa manəṅla atà kà mawisiga. ¹⁶ Atà kà azlaañgə gudəṅ à vok aw, bokuba gi, uwana gi aṅa gudəṅ à vok aw. ¹⁷ Pək atà ala kà azlaañak, gay aṅak kà dziriga pəra. ¹⁸ Gi gədasləl atà à gudəṅ à vok, bokuba uwana kasləl gi à ahəṅ à gudəṅ à vok. ¹⁹ Gəvà à ka sifa gulo gesina kà aṅatà, kà atà babay aṅa magay azlaañak la dziriga.”

²⁰ “Gədöv kudfa kà, kà aṅatà pəra aw, ama kà aṅa azlauwana tadədiṅ gi gəl à vok, à kapəhla ala aṅatà bawbaw bay.” ²¹ “Gədöv kudfa kà atà gesina aṅa magay tekula. Baba, tagay tekula la anu bokuba kak la gi babay anu tekula pəra, gudəṅ à vok aṅa masəlay kà kak kasləl gi à waṅ. ²² Baba gəvà à atà mazləbay uwana kavà à gi, kà atà aṅa tagay tekula bokuba anu səla uwana anu tekula. ²³ Gəgay la atà la abà, ṅgaha kak babay mөгaw anu səla, kà magay tekula la slaka gə. ṅgaha gudəṅ à vok aṅa masəlay kà kak la uwana kasləl gi à ahəṅ hađay, ṅgaha kà kak kawoya atà bokuba uwana kawoya gi.”

²⁴ “Baba, kak kavà à gi atà, asa à gi kà atà tagay la slaka uwana gədəgay, ṅgaha kà atà aṅa manəṅ mazləbay gulo, uwana kavà à gi, kà uwana kawoya gi dagay uwana kaləg mađàh gudəṅ à vok. ²⁵ Baba dziriga, gudəṅ à vok asəl ka aw, ama gi kà gəsəl ka, ṅgaha azlauwana babay kà tasəl ka kà kak la uwana kasləl gi à ahəṅ. ²⁶ Lagwa gəpəhatàla kak, ṅgaha gədəpəhatàla kak aya, kà masal aṅak uwana kawoya gi aṅa magay la atà babay, ṅgaha gi babay aṅa magay la atà.”

18

Makəs Yesu

(Mata 26.47-56; Mark 14.43-50; Luka 22.47-53)

¹ Kiya uwaga mok uwana Yesu adadəv madəv kudfa à gay kà, ahəd la azlaməna matapla la slaka aṅha à gay dərəv à uda anik aṅa mukwà Kidəron. La abatà kà, gəy aləl la ahəṅ adà à abà la azlaməna matapla la slaka aṅha. ² Yudas masla matal kaf à Yesu à gəl babay kà, asəl slaka uwatà, kà uwana Yesu adàha à abatà kwà à kwà la azlaməna matapla la slaka aṅha. ³ Yudas zlà, ahəd à gəy aləl à abà la maham à ahəṅ slodzi, la azlaməna manəṅla gəy Zəzagəla la tsəh. Azladza uwaga kà azlamadzahaga aṅa mav tatak la azla Farisəya la uwana tabəkəl à tsəh, tahəl fənəs la matəvani à akəl à ahəl. ⁴ Kiya uwaga Yesu kà asəl tatak uwana adəbəzal gesina, azà à vok à awtəy à slaka aṅatà, agòd à atà: “Uwa, kayahaw uwa?” ⁵ Tawulà ala, tagòd: “Yesu, zil Nazaret.” Yesu agòd à atà: “Giga la uwanay, à uwana kayahaw!”

✧ 17:12 17.12 Mahabay 41.9

Yudas uwana atàl kaf à gèl, la abatà atà nna. ⁶ Mok uwana ‘Gèga la uwanay’, Yesu agòd à atà kà, tawùl à lig, tatàd à vèfah. ⁷ Yesu anàv à atà aya, agòd à atà aya: “Uwa, kayahaw uwa?” Tagòdàl: “Yesu, zil Nazaret.” ⁸ Yesu agòd à atà: “Gèga la uwanay, gèdagod à akul aw takay? Baña gi kayahàw kà, sàkàw azlaanik uwaga tada aṅatà!” ⁹ Kiya uwaga la uwana gay uwana Yesu apèh uwarà, agòd à afik: “Baba, azladza uwana kabèk à gi à ahàl kà, amiyaka tekula aṅatà kà adazila aw.” ¹⁰ Katsakar la Sèmon Piyer la ahàl, abèd katsakar à lag, adèdfla mayà aṅa mən madzahaga aṅa azlaməna mav tatak à Zəzagəla, akədèval sləm ahàl kaf lakəl ala, sləm aṅa mayà uwatà kà Malkus. ¹¹ Yesu agòd: “Hay, Piyer, wulà katsakar aṅak à gày aṅha à agu. Kadzug kà ‘Gəsa ṅgərpa à uda la kətsaw uwana la abà Baba avà à gi aw’, kagod takay?”

Tadala Yesu à humà Hanas

¹² Maham à ahəṅ slodzi, la azlaməṅga aṅatà, la azlaməna manəṅla gày Zəzagəla aṅa azla Yahudiya tahamà à Yesu à adi, takàs, tawàdàṅ. ¹³ Teraṅa kà, tadàlla à mtəga aṅa Hanas dadàṅ. Hanas kà tsinay aṅa Kayyif, uwana masla la uwana mən madzahaga aṅa azlaməna mav tatak à Zəzagəla la mavay uwatà la tsəh. ¹⁴ Tekedik kà, Kayyif la uwana avà sawaray à azla Yahudiya: “Nuləm kà dza tekula aməts à kà azladza gesina aṅa maməts à gay”, agòd tekedik.

“Gəsəl Yesu aw”, Piyer agod

(Mata 26.69-70; Mark 14.66-68; Luka 22.55-57)

¹⁵ Sèmon Piyer atà la masla matapla anik tanəfà Yesu. Masla matapla anik uwatà kà, mən madzahaga asəl, tahàd à gày à kodal à abà la slaka la Yesu, à kodal aṅa mən madzahaga uwaga à abà. ¹⁶ Ama Piyer agòd à gay gamagày. Kiya uwaga masla matapla anik uwana mən madzahaga asəl, asà à uda aḃadmə la mis uwana anəṅla gamagày kà mav tetəvi à Piyer, kà mad à gày. ¹⁷ Mis uwana anəṅla gamagày agòd à Piyer: “Kak babay kà kak masla matapla aṅa zil uwanay aw takay?” “Awan, awan, gi la abà aw”, Piyer agòd.

¹⁸ Anasl la ahəṅ, azlaməna sləray, la azlaməna manəṅla tavatsà akəl à ahəṅ, kà madz la ahəṅ la adi. Piyer babay adzà à akəl à adi la slaka aṅatà.

Mən madzahaga Hanas anava Yesu la gay ala

(Mata 26.59-66; Mark 14.55-64; Luka 22.66-71)

¹⁹ Mən madzahaga aṅa azlaməna mav tatak uwana anavà Yesu lakəl aṅa azlaməna matapla la slaka aṅha, lakəl aṅa matapla aṅha uwana atàpla à azladza. ²⁰ Yesu agòdàl: “Gəpèhàhàh gay à azladza la dazuwaya, gətàpàhàtàla azlatatak la azlagày madəv kudà la aku, ṅgaha la mən gày Zəzagəla la aku, la slaka uwana azla Yahudiya tahàmàhà gay à vok gesina, gəhadà tatak à ahəṅ aw. ²¹ Kà mana kanav gi tatak aya ma? Nàv à azladza uwana tatsəb gi sləm lakəl aṅa azlagay uwana gəpèh à atà gesina. Atà tasəl la lela lakəl aṅa uwana gəpèh à atà.” ²² Uwana Yesu apèh gay uwaga kà, masla manəṅla anik uwana la makəla aṅha, akədèval mamits à ahàl la magòdàl: “Kiya uwaga la uwana kaula à mən madzahaga aṅa azlaməna mav tatak à Zəzagəla à adi takay?” ²³ Yesu agòdàl: “Baña gəpèh mawisiga kà pəhgəla mawisiga uwatà. Ama baña dziriga gəpèh ma, kà mana kadèd à gi kiya uwanay ma?” ²⁴ Hanas asləl masla la mawadəṅga à slaka Kayyif mən madzahaga.

Piyer agod aya kà: “Gəsəl Yesu aw”

(Mata 26.71-75; Mark 14.69-72; Luka 22.58-62)

²⁵ La mok uwatà Sèmon Piyer la abatà à vud akəl à vok. Tanavàlla gay ala: “Kak babay, kak tekula aṅa azlaməna matapla aṅa zil uwanay aw takay?” Ama Piyer awulà à uda, agòd: “Awan, awan, gi la abà aw!” ²⁶ Tekula la tataka aṅa azlamagamza aṅa

məŋ madzahaga aŋa azlaməna mav tatak à Zəzagəla la abà, uwana yaga aŋa dza uwana Piyer akəðəval sləm lakəl ala, agòðal: “Kak à uwana gənəŋà ka la gày aləl la abà, akul səla aw takay?” ²⁷ “Gi aw!”, Piyer agòð aya, katskats mewgdzagalaŋ awiyà la kaslà uwatà.

Yesu la huma Pilatus

(Mata 27.1-2,11-14; Mark 15.1-5; Luka 23.1-5)

²⁸ La gay bebəŋ bəŋ, tasəlla Yesu à uda la mtəga Kayyif, tadàlla à mtəga gumna aŋa azla Rom. Ama azla Yahudiya tadà à gày la mtəga aŋa gumna aw, kà uwana wakità mapəhay aŋatà avà à atà tetəvi aw, kà uwana baŋa tadà à gày kà, adatàla àläh à vok, taslala vok aŋa mazuw tatak may aŋa madəvaday Paska aw. ²⁹ Kà uwaga à uwana gumna Pilatus asà à uda à slaka aŋatà, anəv à atà lakəl: “Ma aŋa mana kapuwàw gudzi à dza uwanay à gəl ma?” ³⁰ Tagòðal: “Agayŋa agay dza mawsiga aw kà, naka məslala vok aŋa mav à ka à ahəl aw.” ³¹ Pilatus agòð à atà: “Dàwla, kadàfahawla seriya à gəl aŋkul bokuba uwana wakità mapəhay aŋkul apəhay.” Azla Yahudiya tagòðal: “Tetəvi la ahəŋ kà aŋami aŋa madàh seriya mamətsay à dza à gəl aw.” ³² Uwaga apakà vok aŋa magəð gay aŋa Yesu à afik, apəh lakəl aŋa mamətsay aŋha. ³³ Kiya uwaga Pilatus awùl à gày, azàla Yesu, agòðal: “Kak, Sufəl aŋa azla Yahudiya ay?” ³⁴ Yesu agòðal: “Kapəh uwaga ma la gəl aŋak ay? Awma azlaanik tapəh à ka magay ay?” ³⁵ Pilatus agòðal: “Gi zil Yahudiya suwaŋ ay? Azlayaga aŋak dardar gə, la azlamadzahaga aŋa azlaməna mav tatak à Zəzagəla la uwana tavà à gi kak, mana kadahəŋ takay ma?” ³⁶ Yesu agòð: “Makoray gulo kà aŋa gudəŋ à vok uwanay aw, agayŋa makoray gulo kà aŋa gudəŋ à vok uwanay kà, naka iyay, azlaməna sləray gulo tagòðfay kà mav à gi à ahəl aŋa azla Yahudiya aw. Ama kiya uwaga aw, makoray gulo kà aŋa gudəŋ à vok uwanay aw.” ³⁷ Pilatus agòðal zlà: “Lagwa ma kak Sufəl ay?” Yesu agòðal: “Bokuba uwana kapəh kà, gi Sufəl. Tayyà gi, gəsà à ahəŋ à gudəŋ à vok kà, kà mapəh dziriga. Uwabeyuwi uwana asal dziriga atsəb sləm à dziriga uwana gəpəhay.” ³⁸ “Mana à dziriga ma?”, Pilatus agòðal.

Seriya mamətsay atəð à Yesu à gəl

(Mata 27.15-31; Mark 15.6-20; Luka 23.13-25)

Mok uwana adapəh gay uwaga, Pilatus asà à uda aya, kà mad à slaka azla Yahudiya, adzàðatəŋ ala, agòð à atà: “Gəbəz à tatak uwana adukwla zil uwanay à ahəŋ aw. ³⁹ Ama bokuba uwana zagəla aŋkul kà, gəðàwa à akul gəl à masla danay tekula kəla madəvaday Paska ma. Lagwa ma asà à akul gəduwa à akul gəl à Sufəl aŋa azla Yahudiya ay?” ⁴⁰ Kiya uwaga tadzəkà mawiyay: “Awaŋ, masla aw! Barabas la uwana asa à anu!” Tekedik Barabas uwatà kà, agà kà masla nabəra.

19

¹ Kiya uwaga Pilatus avà à atà tetəvi kà masläh Yesu ala la kurpi. ² Azlaslodzi taslāsłap gabaga aŋa atək kà mawad à Yesu à gəl, ŋgaha tatsàkwà à deri mativga gə à abà vikuza. ³ Tazà à vok à slaka aŋha, ŋgaha tagòðal: “Ayyi, Sufəl aŋa azla Yahudiya!” ŋgaha tazláb la maməts à ahəl.

⁴ Kiya uwaga Pilatus asà à uda aya, agòð à maham à ahəŋ dza, agòð à atà: “Gətsakulla à uda à abanay. Kà akul aŋa masəlay kà tatak la ahəŋ à uwana azlayla kà madukwla seriya à gəl aw.” ⁵ Yesu asà à uda la gabaga aŋa atək lakəl, la deri mativga la vok vikuza. ŋgaha Pilatus agòð à atà: “Aganay dza zlà!” ⁶ Ama uwana azlamadzahaga aŋa azlaməna mav tatak à Zəzagəla, la azlaməna manəŋla gày Zəzagəla tanəŋəŋ kà, tadzəkà mawiyay: “Zləl masla à ahəf à adi, zləl masla à ahəf à adi!” Pilatus agòð à atà: “Zlələw masla à ahəf à adi la gəl aŋkul, kà uwana gəbəzà à tatak uwana gəðfahalla seriya à gəl aw.” ⁷ Azla Yahudiya tagòðal: “La wakità mapəhay

gami la abà kà, mapəhay gami agòf kà: Azlayla à vok amətsay kà uwana: ‘Gi la gəl gulo kà, gi Kona aña Zəzagəla’, agòf.”

⁸ Mok uwana Pilatus atsənà gay uwatà, guba akès kaykay aya. ⁹ Awùl à gày, ngaha anàv à Yesu: “Kasà à waŋ ma la ala tak la?” Ama Yesu kà awulà gay à uda aw.

¹⁰ Kiya uwaga Pilatus agòfal: “Asà à ka mabadgəma aw ay? Kasəl kà gi la maslay aña maduwa ka gəl, ngaha bay kà, gi la maslay aña mazləl ka à ahàf à adi aw takay?”

¹¹ Yesu agòfal: “Kak la maslay lakəl gulo aw, say baña uwana Zəzagəla avà à ka dagay la afik pəra. Kà uwaga à uwana dza uwana avà à ka gi à ahàl la uwana aduwa ka la tsakana gesina.” ¹² Dagay la mok uwatà Pilatus ayàh tetəvi kà maduw gəl à Yesu. Ama azla Yahudiya tadzəkà mawiyay: “Baña kasak à dza uwaga kà, kak slawda aña mən sufəl aya aw! Kəla dza uwana ‘Gi sufəl’, agòf kà, masla məzam aña mən sufəl!”

¹³ Mok uwana Pilatus atsənà gay uwaga kà, awùlla Yesu à uda aya, adzà à kursi aña seriya à afik, la slaka uwana tazalalla Pave (Uwaga asal magòfay: slaka akur madəlay gay gə, la gay Ibəranəŋkowen *Gabbatha*, tagòfal) ¹⁴ Uwaga kà, agà vud madàh vok aña vud madəvaday Paska, la tataka afats. Pilatus agòf à azla Yahudiya: “Masla la uwaga à Sufəl aŋkul!” ¹⁵ Ama tadzəkà mawiyay: “Kəf masla, kəf masla, zləl à ahàf à adi!” Azlaməŋ madzahaga aña azlaməna mav tatak à Zəzagəla tagòf: “Sufəl gami anik la ahəŋ aw, say mən sufəl aña azla Rom pəra.” ¹⁶ Kiya uwaga Pilatus avà à atà Yesu à ahàl, kà atà aña mazləl à ahàf à adi. Kiya uwaga tadàla Yesu.

Tazləl Yesu à ahàf à adi

(Mata 27.32-44; Mark 15.21-32; Luka 23.26-43)

¹⁷ Yesu asà à uda la gudəŋ la abà, ahàf uwana tadəzləllal à adi lakəl aŋha, kà mad slaka uwana tazalalla slaka aslasl takas à gəl. (Tazalalla *Golgota* la gay Ibəranəŋkowen) ¹⁸ La abatà la uwana, azlaslodzi tazləl Yesu à ahàf à adi. La kaslā uwatà la uwana tazləl azladza səla à ahàf à adi atà nna, tekula la ahàl kaf, tekula la ahàl gudzay aŋha. Yesu la tataka la abà.

¹⁹ Pilatus avà à atà tetəvi kà matsetser wakità kà maf à ahàf à adi lakəl aŋha. Aganay matsetseray gə uwana tatsètser: YESU ZIL NAZARET, SUFƏL AŇA AZLA YAHUDIYA. ²⁰ Azla Yahudiya aŋuvaw tadzəŋàh matsetseray uwatà, kà uwana slaka uwana tazləl Yesu à ahàf à adi, kà nekwa la mad à huđ gudəŋ à abà, matsetseray gə uwana tatsètser kà la gay Ibəranəŋkowen, la gay latin, ngaha la gay gərək. ²¹ Kiya uwaga azlamadzahaga aña azlaməna mav tatak à Zəzagəla uwana la tataka azla Yahudiya la abà, tagòf à Pilatus: “Matsetseray uwanay: Gi Sufəl aña azla Yahudiya, kagòf kà kità aw, ama tsetsèr kà: Dza uwanay la uwana agòf kà: ‘Gi Sufəl aña azla Yahudiya’, agòf, kagòfay.” ²² Pilatus agòf: “Uwana gədatsetseray kà, adza à ahəŋ kiya uwaga pəra.”

²³ Mok uwana azlaslodzi tazləl Yesu à ahàf à adi kà, tahəl lukut aŋha, tavàhəŋ ala slaslaka ufad, kəla slodzi abəzal slaka tekula, tekula. Tahəl deri aŋha uwana madzəbayga vok aw, tsəràh à afik, tsəràh à vədah. ²⁴ Azlaslodzi tagòf à vok kà atà kà atà: “Məkwaha deri uwanay ala aw, ama mətsà tsatsa lakəl kà anu aña masəl dza uwana agòfal.” Uwanay apakà vok kà magəf gay uwana à afik wakità Zəzagəla apəh:

'Tavàhà lukut gulo la tataka aŋatà la abà, tatsà tsatsa la lukut gulo lakəl.'☆

Kiya uwanay la uwana azlaslodzi tadəhəŋ zlà.

²⁵ Nekwa la ahàf uwana tazləllal Yesu à adi kà, iyà aŋha atsizl à abatà, atà la deda aŋha duguga, mis aña Kəlopas, ngaha Mariyama dəg zla Magdala. ²⁶ Yesu anəŋà iyà aŋha, la makəla aŋha masla matapla uwana awoyəŋ kaykay. Yesu agòf à iyà aŋha:

“Mis uwanay kà kona anjak la uwaga.” ²⁷ Ngaha agòf à masla matapla uwaga: “Iyà anjak la uwaga.” Dagay vudf uwatà, masla matapla azèb à mtøga anja.

Mamøtsay anja Yesu

(Mata 27.45-56; Mark 15.33-41; Luka 23.44-49)

²⁸ Uwana uwaga adada à lig gesina, Yesu asèl tatak gesina kà adadøv à gay, apèh uwaga kà mahøn gay uwana ala matsetseray agòf: “Nølay aza à gi.”[☆] ²⁹ Iyaw hamhamga la ahøn la abatà la daraw gà dønøra. Azlaslodzi tadùw sawsaw à iyaw hamhamga uwaga à abà, tafà à kavak à gay kà madziyla à afik anja makokuzay. ³⁰ Mok, uwana adakokuz iyaw uwaga, Yesu agòf: “Lagwa kà adagay diga!” Akèsà gøl à ahøn, amøts.

Slodzi azløla makøla à Yesu ala la atsøkaf

³¹ Uwaga kà mavakay madfah vok anja maduw løv, asà à azla Yahudiya kà, azlavok adza à ahøn la ahàf à adi tsøràh à mavakay maduw løv aw, kà uwana mavakay uwatà kà mavakay mapis ala gay à vok gà, tanäv à Pilatus kà, takàlàhà à atà asik ala, kà mahøl vok à ahøn la ahàf la adi. ³² Kiya uwaga azlaslodzi tasà à wan takàlàhà asik à matera ala, la anja masøla, uwana la makøla anja Yesu lakøl la slaka gà. ³³ Uwana tabèz à Yesu à vok kà, tanønàn kà adamøtsay. Kà uwaga à uwana takàlla ala asik ala aw. ³⁴ Ama tekula anja azlaslodzi azløl ala makølla la atsøkaf, batsàrà aniz la iyaw asà à uda. ³⁵ Dza uwana azàn lakøl anja tatak uwaga apakà vok gesina kà, azàn lakøl anja kà dziriga, masla bay kà asèl kà uwana anønà, akul babay kà kaslaw anja madijal gøl à vok. ³⁶ Uwanay apakà vok kà gay anja matsetseray anja magøf à afik ndzer:

'Tadàkølah aslasl anja ala aw.'[☆]

³⁷ La azlaslaka anik la wakità la abà agòf aya kà:

'Tadànøn dza uwana tazlølàn ala la ahàf la adi.'[☆]

Maf Yesu à zøvay à agu

(Mata 27.57-61; Mark 15.42-47; Luka 23.50-56)

³⁸ Uwana uwaga adada à lig, Yusufu zil gudøn Arimate, anäv tetøvi la slaka Pilatus kà mazøb vok anja Yesu. (Yusufu kà masla matapla la slaka Yesu la gøl à gøl, kà uwana guba azøn kà azla Yahudiya) Pilatus avàl tetøvi. Kiya uwaga Yusufu asà à wan, azèb vok anja Yesu à ahàf à adi ala. ³⁹ Nikodemus, zil uwana ahàd à slaka Yesu la vøf, asà à wan à slaka anja bay, matørsin, la azlaahàf kidzidzi uwana mahamala gay à vok gà la ahàl, mahanay anja kà kilo dzik makør (Bokuba tasà kulo gøl anja zlo) ⁴⁰ Tazèb vok anja Yesu atà søla, tafadfal bafta à adi, tafahàhal azlatatak mazinay gà à vok, uwana zagølà anja azla Yahudiya, kà mazøb dza à uda, à banja adamøtsay. ⁴¹ La slaka uwana tazløl Yesu à ahàf à adi kà, gày alàl la ahøn la abatà. La gày alàl uwatà la abà kà, zøvay mawga la ahøn, taf dza à agu didi aw. ⁴² Bokuba uwana vudf madfah vok anja vudf maduw løv anja azla Yahudiya kà, tafà Yesu à agu la abatà, kà uwana zøvay kà nekwa.

20

Mawul à uda la mamøtsay anja Yesu

(Mata 28.1-8; Mark 16.1-8; Luka 24.1-12)

¹ Bøn la zay la tsøh vudf maduw løv anja azla Yahudiya, Mariyama døg zla Magdala, ahàd à gøl zøvay. Masla anønàn kà akur uwana la zøvay la gay kà, matakoslal à ama ala gà. ² Adà anja la mahoyay, abèz à Sømon Piyer à vok, atà la masla matapla anik uwana Yesu awoyàn kaykay, agòf à atà: “Suføl kà, tazèb à lag la zøvay la aku, mèsøl

☆ 19:28 19.28 Mahabay 69.21; 22.15 ☆ 19:36 19.36 2Musa 12.46; 4Musa 9.12; Mahabay 34.20 ☆ 19:37 19.37 Zakari 12.10

slaka uwana tadàlla à abà aw.” ³ Piyer atà la masla matapla anik uwanay tahàd à gəl zəvay. ⁴ Tahàd la mahoyay, tahòy, ama masla matapla anik uwanay aduwà Piyer la mahoyay, atsà vok à gəl zəvay. ⁵ Atsòñ gəl à agu, anə̀nà bafta la vədah la aku, ama adà à agu aw. ⁶ Səmon Piyer, uwana asà à wañ la lig la ahə̀n, adà à agu. Masla anə̀nà bəfta la vədah, ⁷ la nalbət uwana tafafàd à Yesu à gəl, masla kà, adə̀banì vok la bafta aw, mafafàd à abà gà la slaka anik kokudà gəl aṅha. ⁸ La lig la ahə̀n, masla matapla uwana atsà vok à gəl zəvay, adà à agu suwañ. Anə̀nə̀n, ṅgaha adiṅal gəl à vok. ⁹ (Tekedfika la kaslā uwatà kà, azlamə̀na matapla tatsə̀nà godega aṅa wakità, uwana Yesu adàwula à uda la mamə̀tsay agodf, dadə̀n aw) ¹⁰ ṅgaha azlamə̀na matapla sə̀la uwatà tawùl aṅatà.

*Yesu apə̀hla vok à Mariyama uwana də̀g zla Magdala
(Mata 28.5-10; Mark 16.9-11)*

¹¹ Mariyama atsizilla ahə̀n la gay zəvay la matuway. Uwana atuway kà, atsòñ gəl à zəvay à agu kà manə̀rə̀zay, ¹² ṅgaha anə̀nà azlamalika sə̀la la lukut medəkuga la vok tə̀lla, tadzàh madzay la slaka uwana hənà Yesu à ahə̀n. Tekula adzà madzay lakəl gə̀, anik adzà madzay la godega gə̀. ¹³ Azlamalika uwaga tanə̀valla gay: “Mis, kà mana katuway ma?” Mis agodf à atà: “Tazə̀b vok aṅa Sufəl gulo, gəsəl slaka uwana tadàlla à abà aw.” ¹⁴ La mapə̀h gay uwaga la gay la, agolà vok, ṅgaha anə̀nà Yesu. ¹⁵ Yesu anə̀valla gay ala: “Mis, kà mana katuway ma? Uwa kayahay uwa?” Mis adzùgw kà masla slə̀ray guf, agodf, à uwana apə̀hal kiya uwanay: “Baṅa kak kazə̀b kà, pə̀hgə̀la slaka uwana kafà à abà, kà gə̀day, gə̀dàzə̀bay.” ¹⁶ Yesu agodfal: “Mariyama!” Fə̀tsal, Mariyama agolà vok à slaka aṅha, ṅgaha agodfal la gay Ibə̀ranə̀nkwən: “*Rabbuni!*” (Uwana asal magodfay: Mə̀ṅga gulo) ¹⁷ Yesu agodfal: “Kakəs gi à ahə̀n aw, kà uwana gə̀dàda à afik à slaka Baba gulo aw. Ama hād, kadə̀godf à azladedà gulo kà gə̀dàda à afik à slaka Baba gulo, uwana Baba aṅkul babay, à slaka Zə̀zagə̀la gulo uwana Zə̀zagə̀la aṅkul babay.” ¹⁸ Kiya uwaga Mariyama də̀g zla Magdala azà gay uwaga à azlamə̀na matapla: “Gə̀danə̀n Sufəl!” ṅgaha atùgw a atà tatak uwana apə̀hal gesina.

*Yesu apə̀hla vok à azlamə̀na matapla la slaka aṅha
(Mata 28.16-20; Mark 16.14-18; Luka 24.34-49)*

¹⁹ La gay mokokhu aṅa vuđ maduw lə̀v aṅa azla Yahudiya uwatà, azlamə̀na matapla tahamà gay à vok la gə̀y anik la aku, tatsàkà à gamagə̀y à ama la tsəkurum, kà uwana guba azà à atà kà azla Yahudiya. Yesu asà à wañ, atsizl à tataka aṅatà à abà, agodf à atà: “Lapiya aga la akul!” ²⁰ Uwana adapə̀h à atà uwaga, apə̀hatàla ahəl aṅha la makə̀la aṅha. Azlamə̀na matapla tahən ala la marabay à kà uwana tanə̀nà Sufəl. ²¹ Yesu agodf à atà aya: “Lapiya aga la akul, bokuba uwana Baba asləl gi à wañ kà, gi babay kà gə̀sləl akul suwañ.” ²² La lig aṅa uwaga la ahə̀n, afətà à atà afad à gəl, agodf à atà: “Bə̀zàw Masasə̀dfof Zə̀zagə̀la! ²³ Uwabeyuwi uwana kamatsawwala tsakana ala kà, adə̀bə̀z mamatsila. Azlauwana kamatsaw à atà tsakana ala aw kà, tadə̀bə̀z mamtsila babay aw.”

Yesu atà la Tomas

²⁴ Mok uwana Yesu asà à wañ kà, Tomas, tekula aṅa azlamə̀na matapla kulo gəl aṅha sə̀la, (Uwana tazalal və̀gal), la uwana agə̀ la tataka aṅatà la abà, à mok uwana Yesu asà à wañ aw pə̀ra. ²⁵ Azlamə̀na matapla anik tagodfal: “Mənə̀nà Sufəl!” Ama Tomas agodf à atà: “Baṅa gə̀dànə̀nə̀n azlamokfak aṅa mamasamasa uwana la ahəl aṅha aw kà, gə̀diṅal gəl à vok aw, say baṅa gə̀dàtap gay gəl ahəl gulo à amik, aṅa mamasamasa uwatà à abà dadə̀n, ṅgaha gə̀tə̀p ahəl gulo à amik uwana à abà la makə̀la aṅha aw kà, gə̀diṅal gəl à vok aw!”

²⁶ Bə̀ la mad à abà aṅa kasukwa uwatà aya kà, azlamə̀na matapla tahamà gay à vok la kay aya. Vuđ uwatà kà, Tomas la tataka aṅatà la abà. Gamagə̀y matsakahay gə̀

la tsökurum, ama Yesu asà à waŋ, atsizl à tataka aŋatà à abà, la magoɗfay: “Lapiya aga la akul!” ²⁷ Ngaha agòɗ à Tomas: “Tomas, tàp gay gəl ahəl aŋak à abà la abanay, ngaha nərèz makəla gulo, sàk à matsigay, diŋal gəl à vok pəra.” ²⁸ Tomas agòɗɗal: “Sufəl gulo, Zəzagəla gulo!” ²⁹ Yesu agòɗɗal: “Kà uwana kadanəŋ gi pəra, à uwana kadiŋal gəl à vok ay? Marabay la azlauwana tadiŋal gəl à vok la kokudə manəŋ gi!”

Godega aŋa wakità uwanay

³⁰ Yesu adahà azlanadzipo anik la huma aŋa azlaməna matapla aŋha aŋuwaw, uwana tatsetsər à wakità uwanay à abà aw. ³¹ Ama uwana agà la abà kà tatsetser kà, kà akul aŋa madiŋal gəl à vok kà Yesu kà Kristu, ngaha Kona aŋa Zəzagəla. La madiŋal gəl à vok uwaga kà akul kabəzaw sifa adəv à gay aw, la masla la abà.

21

Yesu apəhla vok à azlaməna matapla məɗəf

¹ La lig aŋa uwaga la ahəŋ aya, Yesu apəhla vok à azlaməna matapla la slaka aŋha, la gay dərəv Tiberiya, la kuba uwanay uwana apəhatàla vok: ² Səmon Piyer, la Tomas (Uwana tazalalla vəgal), Natanayel, uwana la Kana aŋa Galili, azlabəza aŋa Zebede, la azlaməna matapla səla anik aŋa Yesu, tahamà gay à vok. ³ Səmon Piyer agòɗ à atà: “Gəday, gəɗakas kilfi.” Atà tagòɗɗal: “Anu babay kà, mənəfa ka”, ngaha tahàd à kəslah iyaw à afik. Ama la huɗ vəɗ uwatà kà, takəs tatak aw. ⁴ Mok uwana məl azl à awulà, Yesu apəhatàla vok la gay dərəv, ama azlaməna matapla tasəl kà uwaga kà Yesu aw. ⁵ Kiya uwaga Yesu agòɗ à atà: “Azlakohana, kakàsaw kilfi ay?”, agòɗ à atà. “Awaŋ”, tagòɗɗal. ⁶ Masla agòɗ à atà: “Dùwàw dzarawa aŋkul à makəla à ahəl kaf aŋa kəslah iyaw, ngaha kabəzaw à kilfi!” Kiya uwaga tadùw à abà ngaha tabəz kilfi tsəràh à uwana taslala vok aŋa mabiyəŋ à uda aya aw, kà uwana adahənla la kilfi. ⁷ Masla matapla uwana Yesu awoyàŋ kaykay agòɗ à Piyer: “Uwaga kà Sufəl gami!”

Kà uwaga, mok uwana Səmon Piyer atsənà uwaga: ‘Sufəl’ tagòɗ kà, adùw lukut aŋha à vok, avàl à iyaw à abà. ⁸ Azlaməna matapla anik tasà à waŋ la kəslah iyaw, la mabiy dzarawa uwana kilfi adahən à abà. Kərkər la gay dərəv aw, bokuba zuwid tekula. ⁹ Mok uwana tasà à vəɗah kà, tanəŋà akəl, kilfi la afik la Pain. ¹⁰ Yesu agòɗ à atà: “Kilfi uwaga kakàsaw, kasawla azlaanik à waŋ à abanay.” ¹¹ Səmon Piyer ahàd à kəslah iyaw à afik, abiyà dzarawa à vəɗah la kilfi mənŋa gə dzim bəzi aŋha dzik zlo gəl aŋha makər gesina aŋha. Ama la magol kilfi uwaga babay kà dzarawa akwahala aw. ¹² Yesu agòɗ à atà: “Sàw à waŋ, kazuwaw!” Amiyaka bə tekula la tataka azlaməna matapla aŋha la abà kà, dza aslala vok aŋa manaval: “Kak uwa” aw, kà uwana tasəl kà masla Sufəl aŋatà. ¹³ Yesu azà vok à slaka Pain, ahəl, ngaha avàhà à atà, ngaha akəl à atà kilfi babay, bokuba uwana avàhà à atà Pain.

¹⁴ Uwaga kà, kà mamakər à uwana Yesu apəhla vok à azlaməna matapla la slaka aŋha, la lig aŋa mawul à uda aŋha la mamətsay.

Yesu atà la Piyer

¹⁵ Uwana tazùw tatak may à gay kà, Yesu agòɗ à Səmon Piyer: “Səmon, Kona aŋa Yuhana, kadùwà azlauwanay la mawoy gi takay?” “Iyay, Sufəl, kasəl kà gəwoya ka” Yesu agòɗɗal: “Nəŋla azlabəza tuwaŋ gulo.” ¹⁶ Ngaha agòɗɗal kà masəla aya: “Səmon, Kona aŋa Yuhana, kawoya gi ay?” “Iyay, Sufəl, kasəl kà gəwoya ka.” Yesu agòɗɗal: “Fà sləm à azlabəza tuwaŋ gulo!” ¹⁷ Ngaha Yesu agòɗɗal kà mamakər aya: “Səmon, Kona aŋa Yuhana, kawoya gi ay?” Piyer agòɗɗal la mazaw la gəl gə, kà uwana Yesu apəhal kà mamakər: ‘Kawoya gi ay?’ Ngaha agòɗɗal: “Sufəl, kasəl tatak gesina, kasəl bay kà, gəwoya ka.” Yesu agòɗɗal: “Nəŋla azlatuwaŋ gulo! ¹⁸ La haɗfay gəgòɗ à ka: La mok uwana kaləg meɗega, kafəh parapara aŋak à tsəh la gəl aŋak, kadàhah à

slaka uwana asà à ka. Ama aña kadàgay makoz kà, tadàbay à ahàl anjak ala, kà dza anik aña maf à ka parapara à tsəh, ngaha dza anik adàdala ka à slaka uwana asà à ka maday aw.”¹⁹ (La gay uwaga kà Yesu asal mapəhla ala tsəhay mamətsayga uwana Piyer adàmətsay kà mavà y mazləbay à Zəzagəla) La lig la ahəy Yesu agòfal: “Nəfà gi!”

Yesu la masla matapla uwana awoyaŋ kaykay

²⁰ Piyer anəŋà à lig kà, anəŋà masla matapla uwana Yesu awoyaŋ kaykay, atsà à waŋ la lig aŋatà. Masla uwana ahùb à Yesu à makəla, la mok uwana atà la tatak may lakəl uwarà, à uwana anàv à Yesu: ‘Sufəl, uwa à dza uwana adàta à kaf à gəl uwa?’²¹ Piyer anəŋà, ngaha agòf à Yesu: “Dza uwanay, takay Sufəl, masla ma mana à uwana adàbəzal tak ma?”²² Yesu agòfal: “Baŋa asa à gi adz à ahəy la sifa tsərəh à uwana gədàwula à waŋ ma, mana anjak la abà ma? Kak kà, nəfà gi pəra.”²³ Azlaməna maham à ahəy gay Zəzagəla tatsənà gay uwaga: ‘Masla matapla uwanay, adàmətsay aw’, tagòf. Ama, ‘Adàmətsay aw’, Yesu agòf à Piyer aw, ama agòf pəra kà: ‘Baŋa asa à gi adza à ahəy la sifa tsərəh à kaslā uwana gədàwula à waŋ ma, mana anjak la abà mi?’, agòfal pəra.

²⁴ Uwaga masla matapla gə la uwanay à uwana atsetsèr gay uwanay kà, ngaha məsəl kà uwana atsetsèr kà dziriga.

Makəf gəl à ahəy aña wakità uwanay

²⁵ Yesu adàhà azlasəray anik aŋuvaw. Agay tatsetseray la tekula, tekula gesina kà, naka gudəy gesina aslala vok aña makəsiŋ azlawakità uwanay tatsetser aw.

SLƏRAY AŇA AZLAMƏNA MATAPLA LA SLAKA YESU Les Actes des Apôtres

¹ A kak slawda gulo Tewofil.

La wakità gulo matera la abà kà, gətsetser à ka lakəl aŇa Yesu. Gədatsetseray lakəl uwana apàhla ņgaha la uwana atapàhla à azladza gesina, dagay madzəka vok aŇa sləray aŇha, ² tsərəh à mavakay uwana Zəzagəla azəb à zagəla. Mok uwana aləg la gudəŋ la vok, akàsàni azladza kà magay azlaməna matapla aŇha, atàpàhàtəla uwana naka tadəhəŋ, adahà uwaga kà la ndzəda aŇa Masasəđok Zəzagəla. ³ La lig la ahəŋ, à mok uwana adamatsay apəhatəla vok asik dəŋ la mahanay dzik ufad la abà, kà atà aŇa masəlay la dziriga kà masla la sifa. Apəh à atà gay aŇa makoray Zəzagəla. ⁴ Vərđi anik uwana tadahama gay à vok kà mazuw tatak may la slaka gə kà, agòđ à atà: “Baba gulo, apəh à akul à ahəŋ kà mav à akul tatak uwanay, à uwana gəpəh à akul, kadaw à slaka aw, dzàw à ahəŋ la abanay la Urusalima kakudaw. ⁵ Kà uwana Yuhana adahà batem à azladza la iyaw, ama la huma la gay kà, akul kà, tadəđahakullan kà la Masasəđok Zəzagəla.” ⁶ Azlaməna matapla uwana tahamà gay à vok la Yesu tanəval: “Sufəl gami, la kaslā uwatà la uwana kadəv makor gəl à tsəhay aŇak Isərayel ay?” ⁷ Yesu agòđ à atà: “Uwaga kà gay aŇkul la abà kà masəl kaslā uwatà aw, say Baba gulo la uwana asəl uwaga pəra. ⁸ Ama à akul kà, Zəzagəla adəv à akul Masasəđok aŇha, la ndzəda aŇha ņgaha kadəgaw azlaməna sayda gulo, la abanay la Urusalima, ņgaha la kutso Yahudiya, la Samariya ņgaha tsərəh à makəđ gəl à ahəŋ gudəŋ à vok gesina.”

Mad à zagəla aŇa Yesu

⁹ La mapəh uwaga la gay ala, azəb vok à zagəla, ahəd à slaka Baba, la huma yewđi aŇatə. ņgaha azà à atà à adi, ņgaha tanəŋəŋ aya aw. ¹⁰ La mok uwana atà la matsak yewđi à zagəla aya kà, azladza səla tatsizlla atà à vok la lukut medfekuga la vok təlla. ¹¹ Tagòđ à atà: “Akul azla Galili, kà mana kadzaw à ahəŋ tsək yewđi à zagəla ma? Yesu uwana ahəd à zagəla asək akul à ahəŋ, adəwul à waŋ bokuba uwana kanəŋəw mad à zagəla aŇha.”

Tayahani dza kà mabəđla à slaka aŇa Yudas à abà

¹² La lig aŇa uwaga la ahəŋ, azlaməna matapla tasà à ahəŋ la gudəŋ uwana la afik, tazalalla gudəŋ kuvu, kiya uwaga tasà à ahəŋ la abatə, tahəd à Urusalima kərkər aŇha kà mahoyay pəlis tekula. ¹³ Mok uwana tabəzà Urusalima kà, tadà à gəy uwana à agu lakəl aŇa gəy anik la afik tadzà à ahəŋ la aku uwarə. Azladza gə uwana kà: Piyer, Yuhana, Yakuba kona aŇa Alfe, Səmon uwana tazala Zəlot ņgaha Yahuda kona aŇa Yakuba. ¹⁴ Gesina aŇatə tahaməh gay à vok kà madəv kudə la slaka gə, la azlamis, la Mariyama iyə aŇa Yesu, ņgaha la azldeđa aŇa Yesu.

¹⁵ La vərđi anik aya, azlaməna madiŋal gəl à vok tahamà gay à vok: Dza dzim bəzi aŇha dzik səla. Hadzak, Piyer atsizlla ala la tataka aŇatə la abà, agòđ à atà: ¹⁶⁻¹⁷ “Azladedə, Yudas kà agə la tataka gami la abà. Masla kà tavəl sləray bokuba anu bay. Ama la mok uwana azladza tayəh makəđ Yesu kà, aguwa azladza à huma, kà makəs Yesu. Dagay uwarə la matsetseray la abà, David apəh à ahəŋ lakəl aŇa Yudas uwana naka adəhəŋ. Ndzer, say gay uwanay agəđ à afik bokuba uwana apəh à vok.”

¹⁸ Yudas kà adahəŋ kà mawisiga. Sili uwana tapəlal kà maguw azladza à huma aŇa mapəhla Yesu ala kà, asəkwlə guf, ņgaha atsə gəl à ahəŋ la guf uwatə la abà,

tsəzllòh, hana aṅha gesina asà à vədah gesina, vərđəda. ¹⁹ Azlaməna madz à ahəṅ la Urusalima tasəl à uwana apakà vok gesina, gay gə la uwaga tazalalla guf uwatà la gay gudəṅ aṅatà kà: *Hakeldama*, bokuba magodəy kà: Guf aṅa aṅiz. ²⁰ Piyer awùlla à gay aṅha à tsəh, agòđ aya: “Gay gə la uwaga David apəh à ahəṅ dagay uwarà lakəl aṅa Yudas la wakità aṅa Mahabay la abà:

'Gày aṅha adàpakay ṅvagay tsewwa,
Dza adàdza à ahəṅ la aku aṅa tetuwa.'

Tatsetsər aya kà:

'Say dza anik abəđ à slaka aṅha à abà aya.'"[☆]

²¹⁻²² “Say dza abəđ à slaka aṅha à abà kà mapak masla sayda aṅa mawul à uda aṅa Sufəl Yesu gami la mamətsay. Dza uwaga agay kəla kà tekula la tataka azlauwana la abà mauguzahàh anina la kəla slaka uwana Sufəl Yesu adahàh à abà dagay zamana uwana Yuhana adahàlla batem tsəràh asàk anu à ahəṅ à mok uwana Yesu awùl à uda la mamətsay awùl à zagəla.” ²³ Kiya uwaga tatsizlla azladza səla ala: Yusufu uwana tazalalla Barsabas, sləm aṅha anik aya Yustus, atà la Matiyas. ²⁴ Ngaha tadəv kuđa à Zəzagəla gesina aṅatà, tagòđ: “Sufəl, kak uwana kasəl madzugway aṅa ləv aṅa dza kà, pəhanula la uwana kakəsàni la tataka aṅatà la abà, ²⁵ kà masla aṅa mabəđ à slaka asik aṅa Yudas à abà kà magay masla matapla, kà masla aṅa madfàh sləray aṅha à uwana Yudas asàkal, kà masla aṅa mad à slaka uwana à abà agə aṅha.” ²⁶ La lig la ahəṅ tatsà à atà goropu lakəl aṅa mazəbani tekula aṅatà. Kiya uwaga Zəzagəla azəbàni Matiyas, ngaha adà à matugway aṅa azlaməna matapla kulo gəl aṅha tekula gə uwaga à adi.

2

Mas à ahəṅ aṅa Masasəđok Zəzagəla

¹ Mok uwana madəvaday aṅa Pentakosta adasa à waṅ, azlaməna madiṅal gəl à vok tahamà gay à vok gesina la slaka tekula la abà.[☆] ² Katskats tatsənà maslèh mèlo bokuba mahohumay aṅa mənṅ kular, asa à ahəṅ la zagəla, ngaha ahənà gày uwana ala, atà la aku gesina. ³ La abatà azlatatak anik tapàhla vok ala bokuba azlaalàh akàl; taslèhà gəl à ahəṅ, tadzàh à kəla uwabeyuwi aṅatà à gəl gesina. ⁴ Gesina aṅatà tahən ala la Masasəđok Zəzagəla, ngaha tadzəkà mabəđma la azlagay gudəṅ anik anik, bokuba uwana Masasəđok avà à atà kà mapəhay.

⁵ La kaslà uwatà azla Yahudiya uwana tanəfà mapəhay aṅa fəla aṅatà, la ahəṅ la Urusalima, tasà à waṅ la azlakutso anik anik la abà gesina, tasà à waṅ kà madz à ahəṅ la Urusalima. ⁶ Mok uwana tadatsən mahohumay uwaga, tasà à waṅ, tahamà gay à vok. Ləv avàlàh à atà à gay gesina aṅatà, kà uwana kəla uwabeyuwi aṅatà kà atsənəṅ kà tapəh gay kà la gay gudəṅ aṅha. ⁷ Kiya uwaga gesina aṅatà ləv avàlàh à atà à gay, gəl akàđ à atà à vok, tagòđ: “Azladza uwanay tavats gay kà, kà azla Galili aw takay? ⁸ Ngaha ma, uwanay ma kakay apaka vok, kà kəla uwabeyuwi gami atsəna kà tapəhay kà la gay gami uwi? ⁹ Tsa tekeđik kà azladza uwanay tasà à waṅ la kutso Partiya, Medi, Elam, Mesopotami, Yahudiya, Kapadotsəya, tsəràh à Asəya. ¹⁰ Ngaha la Fərizi, Pamfiliya, Misəra, ngaha la kutso aṅa Libiya uwana nekwa la Səren, azlaanik la tataka gami la abà, tasà à waṅ la Rom, ¹¹ azlauwana azla Yahudiya slilih gə la azlauwana tapakàh azla Yahudiya mapakay, azlaanik uwana tasà à waṅ la Kəreta ngaha azlaanik la Arabiya. Ama ku bə la uwaga bay kà, kəla uwabeyuwi gami atsəna kà tapəhay lakəl aṅa sləray mənṅa aṅa Zəzagəla la gay gudəṅ aṅha!” ¹² Ləv avàlàh à atà à gay gesina, tasəl uwana tapəhay aw, tagòđ kà atà à atà: “Uwanay

[☆] **1:20** 1.20 Mahabay 69.25; 109.8 [☆] **2:1** 2.1 3Musa 23.15-21; 5Musa 6.9-11

ma, mana asal magodfay mi?" ¹³ Ama bà la uwaga kà azlaanik takəfàsl azlaməna madıñal gəl à vok la magodfay: "Ndzer, azladza uwanay kà guzu adakad atà à gay."

Mapəhay aña Piyer

¹⁴ Hadzak Piyer asà à afik la azlaməna matapla kulo gəl aña tekula gə uwanay, azà kuda à zagəla, agòd à maham à ahəñ dza: "Akul azla Yahudiya, ñgaha akul uwana kadzaw à ahəñ la Urusalima la abà gesina, sələw, tsəbàw sləm à gay uwanay gəpəh à akul lagwa. ¹⁵ Kay, azladza uwanay kà, guzu adakad atà bokuba uwana kagodfaw aw, kà uwana bà zil gosila bay kà, adaslay dadəñ aw. ¹⁶ Ama kà magəd uwana à afik, masla mapəhal gay à ahəl Yoyel apəh: ¹⁷ Zəzagəla agòd:

'Kiya uwanay à uwana adəpaka vok la madəv à gay mahənay:

Gədəsləl Masasəfok gulo à ahəñ à azladza à gəl gesina;

azlabəza añkul, la azlakohana añkul, la azlamakozga añkul masasiñay adəsasi-ñahla atà, gədəbəfahà atà à ama la abà, tapəh pañaw gulo.

¹⁸ Ndzer, hadfay gədəsləh Masasəfok gulo à gəl aña azlamagamza gulo, azlazilga, la azlamisga la mavakay uwatà

Ñgaha tadəpahah à azladza.

¹⁹ Gədəfahah azlanadzipo la zagəla ñgaha la vəfah,

añiz, akəl ñgaha habaga la azlakəsək tadəgahay la ahəñ,

²⁰ Afats adətəfa zagəla,

Təla adəgay mativga vikuza, bokuba añiz.

La lig la ahəñ kà pəra, mavakay aña Sufəl uwana mazləbaya, aña mas à wañ.

²¹ Kəla dza uwana atsal sləm aña Zəzagəla agay adəbəlay!"*

²² "Akul azla Isərayel, tsəbàw sləm à uwanay gəpəhay", Piyer agòd à atà. "Yesu zil Nazaret uwana Zəzagəla asləl à wañ, apəhla maslay aña ala, la madəh azlanadzipo la azlamasəlay anik anik la tataka añkul la abà, akul babay kasəlaw. ²³ Zəzagəla avà à ahəl añkul bokuba uwana awoyən kà uwana dagay uwarà, asəl uwana kadəfahawwalləñ à vok. Gay gə la uwaga kavəw masla à ahəl aña azlaməna tsakana kà mazləlay à ahəf à adi kà mamətsay. ²⁴ Ama Zəzagəla awùlla à uda la mamətsay, adzà à ahəñ la sifa aya. Ndzer kà, masla kà agəd à ndzəfa aña mamətsay à ahəl aw.

²⁵ David apəh lakəl aña kà:

'Koksikoksi gənəñəñ Sufəl gulo la yewdi gulo, agə la ahəl kaf gulo, kà gi aña magogotsay aw.

²⁶ Gay gə la uwaga, ləv gulo adahən ala la marabay, ñgaha gay gulo uwana gəpəhay kà matsidayga,

Baməraka gi la sləb vok pəra, gədəf manəwəñ gulo à masla à afik.

²⁷ Kadəsak gi la ahəl aña mamətsay aw.

Kadəkəsay kà sləb vok aña kohana aña amazinla aw.

²⁸ Kak, kapəhgəla tetəvi uwana adala gi à sifa à abà,

Gi la marabay kà uwana kak la gi."*

²⁹ "Azladeda gulo, azlayla gi gəpəh à akul la paraka lakəl aña Baba gami madziga David; masla kà aməts tallà, zəvay aña la ahəñ la tataka gami la abà tsərəh à lakana. ³⁰ Masla mapəhal gay ahəl aña Zəzagəla asəl kà Zəzagəla azùwal mawadfay la magodfal: 'Gədəkəsani à uda tekula la mayyi tsəh ala aña kəla abà, gədəfa à sufəl à abà.'* ³¹ David asəl dagay uwarà lakəl aña mawul à uda aña dza, uwana mafal dzakwa à gəl gə, kà uwaga agòd:

'Gəsakal la mezewi aw ñgaha vok aña azin ala aw.'

Zəzagəla agòd."

* **2:21** 2.21 Yoyel 2.28-32 * **2:28** 2.28 Mahabay 16.8-11 * **2:30** 2.30 Mahabay 132.11; 2 Samuyel 7.12-13

³² Piyer agòd aya: “Zəzagəla awùlla Yesu uwanay à uda la mamətsay, anu azlaməna sayda aña uwaga gesina. ³³ Zəzagəla Baba atsizllàn à ahəl kaf aña, ngaha avəl Masasəđok uwana apəh à ahəj, masla aslèh anu à ahəj à gəl à uwana kanəjəwwəj la uwana katsənəwwəj lagwa. ³⁴ David kà, masla kà ahəd à zagəla aw, ama apəh gay lakəl aña dza uwana tafal dzakwa à gəl, agòd:

‘Sufəl Zəzagəla gulo agòd à sufəl gulo: ‘Dzà aňak à abanay la ahəl kaf gulo lakəl.

³⁵ Tsərah à uwana gəđəbək azlaməna məzam aňak à tsəh à asik aňak, kà maf asik à afik aňak.’”✧

³⁶ “Kità gəgod à akul à azla Isərayel, ndzer kasəlaw kà, akul kazlèlləw Yesu uwanay à ahəf à adi, masla la uwana Zəzagəla apakəj ala kà Sufəl, ngaha afəl dzakwa à gəl.”

³⁷ Uwana tatsən gay uwaga kà, ləv avələh à atà à gay gesina. Tanavə Piyer la azlaməna matapla anik: “Azladedə, mana à uwana məđəhəj ma?” ³⁸ Piyer agòd à atà: “Pəhəw gay la ləv ala, ngaha kəla uwabeyuwi aňkul tadəhalla batem la sləm aña Yesu Kristu kà tsakana aňkul aña mamətsilla. Ngaha Zəzagəla adəvə à akul Masasəđok aña. ³⁹ Kà uwana mapəh à ahəj aña Zəzagəla kà aňkul, la mayyi à tsəh ala ngaha kà aña azlauwana kərkər gə, kà aña azlauwana Sufəl Zəzagəla gami adəzala à atà gesina.”

⁴⁰ Kiya uwaga Piyer apəh à atà azlagay anik anik aya, kà məbaz atà à tsəh, ngaha kà madzərəđəh atà ala la magòd à atà: “Səw à uda la tataka aña azladza uwana takəs Yesu aw, yəhəw kà Zəzagəla aña məbəl akul pəra.” ⁴¹ Aňuvaw la tataka aňatə la abə tadəj gəl à gay aña Piyer à vok ngaha tadəhə à atə batem. La mavakay uwatə dza dəbow makər azə à vok à azlaməna matapla à adi. ⁴² Tavə vok aňatə kà matsəb sləm à uwana à azlaməna matapla tapəhatəla, tadzə à ahəj la mazuw tatak may tekula la abə, ngaha tazəw tatak may la slaka tekula babay, ngaha la madəv kuđə à Zəzagəla la slaka gə.

Madz à ahəj aña azlaməna madiňal gəl à vok

⁴³ Azlanadzipo la azlaməsəlay aňuvaw tadəhəhə vok la ahəl aña azlaməna matapla, ngaha ləv avələh à azladza à gay. ⁴⁴ Azlaməna madiňal gəl à vok tagə tekula, ngaha tahamə gay à tatak aňatə à vok la slaka gə gesina. ⁴⁵ Tadəwəh azlələk aňatə ala la azlaləmana aňatə, tavəhəh sili gə la tataka aňatə la abə uwabeyuwi kəla udəra aña. ⁴⁶ Kəla mavakay tahamə gay à vok la məj gəy Zəzagəla la aku, tazəwəh tatak may aňatə la slaka gə la mtəga la ləv tekula la marabay. ⁴⁷ Tazləbəhəh Zəzagəla, ngaha azladza gesina tawoyəhə atə. Kəla mavakay Sufəl Zəzagəla azəhə à atə ala azlauwana à adi asal məbəl atə.

3

Mawur dza deriga ala

¹ Vərdi anik, Piyer atə la Yuhana tahəd à məj gəy Zəzagəla à agu kà madəv kuđə la gay mokokhu, la kaslə aña madəv kuđə. ² Deri anik la ahəj la gay gamagəy uwana tazalalla gamagəy delga, masla kà deriga dagay mayyay məj aña. Kəla mavakay azladza tadəhəla à gay gamagəy uwaga, kà masla aña matsətsəh tatak la slaka azlaməna mad ə gəy à agu. ³ Piyer atə la Yuhana tadə à gəy kə, anavə atə à tatak. ⁴ Ama Piyer atə la Yuhana tatsəkəl yewdi à gay, ngaha Piyer agòdəl: “Nərəz anu!” ⁵ Dza uwaga anərəz atə la tsetsi dadəj, adzəgw kà abəz tatak la ahəl aňatə. ⁶ Piyer agòdəl: “Tetuwa sili aga gi la ahəl aw, ama uwana gəkoray gəvə à ka. La sləm aña Yesu Kristu, zil Nazaret, sə à afik, həd, gəgod ə ka!” ⁷ Ngaha akəs la ahəl kaf, atsizllàn ala, katskats asik la azlamatakola takola aña tadzərəđəhə ala. ⁸ Hadzak, atsizlla ala, dzaradzara, ahəd, tadə à məj gəy Zəzagəla à agu la azlaməna matapla

la mavalàh à zagəla, ngaha la mazləb Zəzagəla. ⁹ Maham à ahəŋ dza anəŋà deri uwaga, aday la mazləb Zəzagəla. ¹⁰ Uwana tasəl kà, uwaga kà deri uwana adzàhà madzay kà matsatsàh tatak la gày gamagày aŋa məŋ gay Zəzagəla uwana tazala ala gamagày delga kà, bəðək, ləv avàlàhà à atà à gay kà tatak uwana apakà vok.

Mapəhay aŋa Piyer la məŋ gày Zəzagəla la aku

¹¹ Piyer atà la Yuhana taləg la golav aŋa məŋ gày Zəzagəla uwana la abà tazalalla: Golav aŋa Salomon. Dza uwaga asək atà à ahəŋ aw. Kiya uwaga azladza tasàhà à waŋ à slaka aŋatà la mahoyay, kà uwana ləv avàlàhà à atà à gay kà uwaga. ¹² Mok uwana Piyer adanəŋ uwaga kà apəh gay à maham à ahəŋ dza, agòd à atà: “Akul azla Isərayel, kà mana ləv avàlàhà à akul à gay ma? Kà mana kanərezaw anu bokuba anu la uwana matsizlla dza uwanay ala la ndzəða aŋa aslasl gəl gami ma, la manəf fəla gami lela ma? ¹³ Awaŋ, Zəzagəla aŋa azlababa gami madzidziga, aŋa Abəraham, aŋa Isak, ngaha aŋa Yakuba uwana tadaval kuða, avà mazləbay à Kona aŋha. Uwana akul la gəl aŋkul kavàw à ahəl aŋa azlaməna makor dza kapùwàwwalla gudzi à gəl la huma Pilatus, à mok uwana masla adzùgw maduwal à gəl. ¹⁴ Kakwèsàw kà dza dziriga, sətakaga, ngaha kanavàw la slaka Pilatus kà maduw à akul gəl à masla makad dza. ¹⁵ Kiya uwaga kakəðàw Madzahaga aŋa sifa, ama Zəzagəla awùlla à uda la mamətsay, anu kà anu azlaməna sayda aŋa uwaga. ¹⁶ Ama kà aŋa dza uwanay kà, kanəŋawwaŋ; kasəlaw uwaga kà: Ndzəða aŋa Yesu la uwana avəl ndzəða uwanay, madiŋ gəl à Yesu à vok la uwana awurà dza uwanay ala la huma yewdi aŋkul.”

¹⁷ “Azladedə, mok uwana azlamasiga aŋkul kapùwàw gudzi à Yesu à gəl, la azlamasiga aŋkul kà, gəsəl kà la masəl gəl gə, kadahàw uwaga aw. ¹⁸ Iyay, kiya uwanay à uwana Zəzagəla agəðəŋ gay aŋha uwana à afik, apəh à azlaməna mapəh à atà gay à ahəl aŋha uwarà, kà uwana apəh à ahəŋ kà Kristu adəs ngərpa, agòd. ¹⁹ La kità kà, pəhàw gay la ləv ala, gòla vok à slaka Zəzagəla, kà masla aŋa mamatsakulla tsakana aŋkul ala. ²⁰ Kiya uwaga Zəzagəla adəsak akul ala zamana lapiya à waŋ, ngaha adəsləl akul Kristu uwana à waŋ apəh à ahəŋ uwarà kà aŋkul, uwaga kà Yesu. ²¹ Ama kà aŋa diŋa kà, Yesu adzà à ahəŋ la zagəla tsəràh à uwana Zəzagəla apakàh azlatatak ala kà mawga dadəŋ, bokuba uwana apəh à azlaməna mapəh à atà gay à ahəl dagay uwarà. ²² Təga kà Musa agòd kà:

'Sufəl Zəzagəla aŋkul adəsləl akul masla mapəhal gay à ahəl à waŋ bokuba gi, uwana adəgay tekula la mayyi à tsəh ala aŋkul la abà. Kadətsəbaw sləm à uwana adətapakulla gesina.

²³ Ama kəla uwabeyuwi uwana adətsəb sləm à masla mapəhal gay à ahəl uwatà aw kà, adədzà à ahəŋ la tataka aŋa azladza aŋa Zəzagəla la abà aw, tadəkad atà.

²⁴ Amiyaka azlaməna mapəh à atà gay à ahəl anik babay kà, tapəh bokuba aŋa Musa lakəl aŋa tatak uwana adəpaka vok la zamana gami, dagay Samuyel, ngaha la azlauwana la lig aŋha la ahəŋ. ²⁵ Azladedə, mapəh à ahəŋ uwana Zəzagəla apəh à ahəŋ la azlaməna mapəh à atà gay ahəl kà, kà aŋkul, kiya uwaga babay à uwana Zəzagəla akəs vok slawda la Abəraham:

'Gədəpis azlatsəhay gudəŋ à vok gesina la tsəhay aŋak,' agòd, 'Makəs vok slawda uwaga kà, kà aŋkul.'

²⁶ Kà uwaga à uwana Zəzagəla asləl à akul Kona aŋha à waŋ, à akul tsəhay aŋha teraŋa. Asləl à akul à waŋ aŋa mapəh à akul ala dabaray, kà akul aŋa mas à uda la mawisiga aŋkul la abà, ngaha kà masla aŋa mapis à akul gay à vok.”

4

Piyer atà la Yuhana la huma seriya

¹ Mok uwana Piyer atà la Yuhana tapèh gay à maham à ahəŋ dza aya kà, azlaməna mav tatak à Zəzagəla tasà à waŋ, la mənŋa aŋa azlaməna manəŋla mənŋ gày Zəzagəla, ŋgaha la azla Sadukiya uwana tagòf kà: Mawul à uda la mamətsay la ahəŋ aw. ² Tapakà ləv lakəl aŋatà, kà uwana azlaməna matapla tatapla à azladza kà, azladza tadawul à uda la mamətsay. ³ Kà uwana vəf adasa à waŋ, takàs atà kà, tawùts atà à daŋay tsərəh à bebəŋ. ⁴ Tekedik aŋuvaw uwana tatsən mapəhay aŋatà uwaga kà, tadiŋal gəl à vok, kiya uwaga matugway aŋa azlaməna madiŋal gəl à vok azigən tsərəh azladza dəbow zlo.

⁵ La bebəŋ gà, azlaməŋga aŋa azla Yahudiya, la azlamasiga, la azlaməna mapəhla wakità seriya ala tahamà gay à vok gesina aŋatà la Urusalima. ⁶ Hanas, mənŋ madzahaga aŋa azlaməna mav tatak à Zəzagəla la ahəŋ, la Kayyif, la Yuhana, la Alekəsander ŋgaha la azlauwana la huɸ gày aŋa mənŋ madzahaga gesina. ⁷ Tadàla azla Piyer la Yuhana à huma aŋatà, ŋgaha tanavà atà gay ala: “La ndzəɸa ma aŋa uwa, awma la sləm aŋa uwa kawuràwla masla ɸuvats ala uwa?” ⁸ Masasəɸok ahənà Piyer ala, ŋgaha agòf à atà: “Akul, azlaməŋga aŋa azla Yahudiya, la azlamasiga, ⁹ kanavàw anu gay ala lakana, kà uwana məɸahà delga la mawur deri ala. ‘Kakay awùr ala mi?’, kagòɸàw. ¹⁰ Haɸay zlà, delga kasəlaw gesina, akul azladza Isərayel, masla uwana kazlèlàw à ahàf à adi, à Yesu zil Nazaret, Zəzagəla awùlla à uda la mamətsay. ¹¹ Lakəl aŋa Yesu uwanay, à uwana wakità Zəzagəla apəh lakəl aŋha agòf: ‘Akur uwana akul azlaməna maŋal gày kadùwàwla, masla la uwana adapak akur mawaf gày.’[✠]

¹² Kiya uwaga gəgòf à akul: Zəzagəla abèl dza baməraka tekula kokuɸa masla aw. Dza anik la ahəŋ tetuwa à uwana Zəzagəla asləl à waŋ à gudəŋ à vok kà mabəl azladza aw.”

¹³ Azladza uwaga ləv avàlähà à atà à gay kà uwana tanəŋà mawaf vok à uda aŋa Piyer atà la Yuhana, ŋgaha bay kà, tasəl kà tadà à nekol aw, tasəl la gəl aŋatà kà atà kà azlaməna matapla la slaka aŋa Yesu. ¹⁴ Ama uwana tanəŋà dza uwana awurà ala atsizl à ahəŋ la makəla aŋatà kà, taslèla vok kà mapəh à atà gay aw. ¹⁵ Tavà à atà tetəvi kà mas à uda, kà atà aŋa makəs sawaray aŋatà kà atà kà atà. ¹⁶ Tagòf à vok: “Mana məɸehəŋ à azladza uwanay à vok ma? Kà uwana azlaməna madz à ahəŋ la Urusalima gesina tasəl la paraka kà nadzipo uwanay apakà vok ndzer, uwala anu babay à waŋ məslala vok aŋa magoɸay aw. ¹⁷ Ama asa à anu gay uwanay atsən ala kà masəlay aŋa azladza aw, lagwa kà məɸəɸ à atà gay à ahəŋ lakəl aŋa Yesu.”

¹⁸ ŋgaha tazàla à atà à gày aya, tavèr à atà gay kà matapla sləm aŋa Yesu à azladza.

¹⁹ Ama Piyer atà la Yuhana tawùlla à atà ala: “Akul la gəl aŋkul à kà nàtsàw gay uwaga ala. Delga la huma Zəzagəla kà makəs gay aŋkul ay, awma aŋa Zəzagəla takay? ²⁰ Ama anu kà, məslala vok aŋa masak mapəh uwana mənəŋəŋ la uwana mətsənəŋ aw.” ²¹ Uwana azladza uwaga tasläh à atà məl à gəl kà tasək atà. Tabəzà tetəvi kà madukw à atà seriya à gəl aw, kà uwana azladza gesina tazlèbà Zəzagəla lakəl aŋa tatak uwana apakà vok gesina. ²² Dza uwana awurà ala la nadzipo uwaga kà, mavay aŋha kà aɸuwa dzik uɸaf.

Madəv kuɸa aŋa azlaməna madiŋal gəl à vok

²³ Uwana tadùw à atà gəl kà, Piyer atà la Yuhana tahəd à slaka azlaməna aŋatà, ŋgaha tatùgw atà uwana azlaməŋ madzahaga aŋa azlaməna mav tatak à Zəzagəla, la azlamasiga tapèh à atà. ²⁴ Uwana tatsən uwaga kà, tadəv kuɸa à Zəzagəla la ləv tekula: “Zəzagəla gami, kak la uwana kaɸahà zagəla, la kutso, la dərəv ŋgaha la

azlatatak uwana la abà gesina.☆ 25 Kak la uwana kapèh à anu la Masasəđok anjak la paŋaw aŋa baba gami madzidziga David, magamza anjak uwana agòđ:

'Kà mana azladza gudəŋ à vok tapakàh, azlavalàhà ma?

Kà mana azladza tadzàhkà madàh dabaray deyday gà ma?

26 Azlasufəl aŋa gudəŋ à vok tadàhà vok à ahəŋ kà aŋa guvəl,

Ngaha azlaməŋga bay tatsən vok gay

Lakəl aŋa Sufəl Zəzagəla ngaha lakəl aŋa Kristu aŋha, (Masla mafal dzakwa à gəl gà).☆

27 Ndzer, apakà vok la abanay la Urusalima, Herod la Pontsəyus Pilatus, la azladza à uda gà ngaha la azlatsəhay Isərayel tahamà gay à vok gesina lakəl aŋa Yesu, magamza tsikasliga aŋha, uwana mafal dzakwa à gəl gà. 28 Tahamà gay à vok kà madàh uwana kadzùgw à ahəŋ gesina dagay uwarà la mawoyəŋ anjak la abà. 29 Sufəl, lagonay kà, tsən à maslah məlo aŋatà tsi, lagwa kà, və maslay à azlamagamza anjak kà mapəh gay anjak la mawađ vok à uda gesina zlà. 30 Lagwa kà, və à anu maslay anjak kà madàh azlanadzipo anik anik la sləm aŋa Yesu, Kona anjak zlà." 31 Mok uwana tadadəv madəv kuđa à gay kà, slaka uwana atà la abà abəlakà à vok. Tahən ala gesina aŋatà la Masasəđok Zəzagəla, ngaha tapèh gay Zəzagəla la mawađ vok à uda.

Azlaməna madiŋal gəl à vok tahamà gay à tatak aŋatà à vok

32 Azlaməna madiŋal gəl à vok tagà la ləv tekula la matsən vok gay lela. Dza la ahəŋ "Ləmana kà, kà aŋulo pəra", agòđ la tataka aŋatà la abà aw. Uwana takòr gesina kà, tadàhà vok huŋwa à vok la tataka aŋatà la abà aw. 33 Azlaməna matapla tazà sayda lakəl aŋa Yesu kaykay, tagòđ kà Yesu awùl à uda la mamətsay: "Mənəŋəŋ", tagòđ. Ngaha Zəzagəla apisà gay à azlaməna madiŋal gəl à vok à vok. 34 Dza la ahəŋ la tataka aŋatà la abà, kuđa akəs aw, kà uwana azlaməna àlak, la azlagày la ahəŋ, tadawàh ala la tataka aŋatà la abà, ngaha tasàhla sili gà à waŋ. 35 Tabàkàh à slaka azlaməna matapla, la lig la ahəŋ tavàhàhà sili uwaga, kəla udəra aŋa dza.

36 Bokuba Yusufu, zil Levi la kutso Sipəre uwana azlaməna matapla tazàlal Barnabas. (Barnabas asal magođay: Masla mabəllafàh azladza ala) 37 Masla adùw àlak aŋha ala, asəlla sili gà à slaka azlaməna matapla gesina.

5

Gay lakəl aŋa Ananiyas atà la mis aŋha Safira

1 Ama dza anik la ahəŋ, uwana sləm aŋha Ananiyas, atà la mis aŋha Safira, tadùw àlak aŋatà ala la matsən vok gay lela. 2 Atəmla sili à mtəga, ngaha adàla uwanay à huma aŋa azlaməna matapla la kokuđa masəlay aŋatà, ama mis aŋha kà asəl uwaga. 3 Kiya uwaga Piyer agòđal: "Ananiyas, kà mana kavà tetəvi à seteni, ahàd à ləv anjak à tsəh kà mavavar Masasəđok Zəzagəla la matəmla sili aŋa àlak anjak, uwanaw kadù ala à mtəga ma? 4 Mok uwana kaləg madula kà bà àlak anjak. Uwana kaduwla, bay sili gà bay, bà kà kak kakoray. Kà mana kadzugw la ləv anjak kà madàh tsəhay mawisiga uwanay ma? Fida kà kadàhəŋ kà à dza aw, ama à Zəzagəla." 5 Uwana Ananiyas adatsən gay uwaga kà, atəđ à vəđah, aməts. Azladza uwana tatsənà uwaga gesina kà, guba məŋga akəs à atà. 6 Azlakohana tasà à waŋ, tafafəđal lukut à adi, tazəb à uda, tallà.

7 Zweek, tatak aŋa sa makər adada à lig, mis aŋa Ananiyas adà à gày kokuđa masəl uwana apakà vok. 8 Piyer anavàl à gay ala magođal: "Pəh à gi, uwanay sili aŋa àlak anjukul uwana kadùwàwla pəra takay?" Mis agòđal: "Iyay, bà masla gà la uwaga." 9 Kiya uwaga Piyer agòđal: "Kà mana katsənàw vok gay kà matap Masasəđok Sufəl

☆ 4:24 4.24 2Musa 20.11; Nehemiya 9.6; Mahabay 146.6 ☆ 4:26 4.26 Mahabay 2.1-2

ma? Tsənən, azlauwana tallà zil anjak kà, atà la uwaga tatsà à gày la gày gamagày, ngaha tadàzəb ka, talla ka!" ¹⁰ La kirim yewdi, atəđ à makəla à asik anja masla matapla, ngaha aməts. Azlakohana tasà à gay, tabəzal à gəl kà mamətsay gà; tazəb, ngaha tadàla, tallà à makəla anja zil anja. ¹¹ Guba mənğa akəs azlaməna gay Zəzagəla la azladza anik gesina uwana tatsənà gay uwaga.

Azlaməna matapla tadjaha azlanadzipo

¹² Azlaməna matapla tadjahàhà azlanadzipo la masəlay anik anik la tataka azladza la abà. Azlaməna madinjal gəl à vok gesina tahàmàhà gay à vok la ləv tekula la golav anja Salomon la abà. ¹³ Dza uwana adinjal gəl à vok aw kà, aslala vok kà maham gay à vok atà nna aw. Kay nəma kà, azladza tawoyà à atà! ¹⁴ Azladza anjvaw tasàhà à wan, azlazil la azlamis tadinjal gəl à Zəzagəla à vok, ¹⁵ kà azlanadzipo uwana azlaməna matapla tadjahàhən. Azladza tasàhla azlaməna dıvats à azlatetəvi à ama à wan anjvaw. Tahànàhà atà à azlakəslah à afik, la azlabutsi, kà makud mad à awtəy anja Piyer, kà maguwa anja à kəl ala anja dzəgay anja. ¹⁶ Azladza anjvaw tasàhà à wan la azlagudən uwana la abà la makəla anja Urusalima. Tasàhla azlaməna dıvats à wan, la azladza uwana zagəla zagəla agà à atà lakəl, gesina anjatà tawarà ala.

Matərəb azlaməna matapla

¹⁷ Mən madzahaga anja azlaməna mav tatak à Zəzagəla la azlauwana tagà la masla, bokuba magodəy azla Sadukiya, tagà la maɲor lakəl anja azlaməna matapla, ngaha tadzəkà matərəb atà. ¹⁸ Kiya uwaga takəs azlaməna matapla, tawùts atà à danj. ¹⁹ Ama la hudə anja vəđ kà, malika anja Zəzagəla asà à ahən, apəzl gamagày anja gày danj, asəlla azlaməna matapla à uda, ngaha agod à atà: ²⁰ "Dàw à mən gày Zəzagəla à agu, ngaha zàw gay anja sifa adəv à gay aw à azladza!" ²¹ Azlaməna matapla takəs. Bən la zay la tsəh, tahəd à mən gày Zəzagəla à agu kà matapla azladza.

La vudə uwatà kà, mən madzahaga anja azlaməna mav tatak à Zəzagəla, ngaha la uwana la abatà gesina tahamà gay à vok la azlamasiga anja azla Yahudiya, takəs sawaray ngaha tasləl azladza kà madka azlaməna matapla à danj. ²² Uwana azlaməna masləlay tabəzà danj kà, tabəz atà aw. Tawùl, tapəh à azlaməna sawaray: ²³ "Məhəd à danj kà, azlagamagày kà matsakahayga lela, azlaməna manənla gamagày tagà la slaka anjatà la abà la gay gamagày. Ama mapəzl gamagày kà, dza la aku aw." ²⁴ Uwana mənğa anja azlaməna manənla mən gày Zəzagəla, la azlamənğa anja azlaməna mav tatak à Zəzagəla tatsən uwaga kà, gəl akəd à atà à vok, tasəl uwana tadjugway aya lakəl anja azlaməna matapla aw, ngaha tanavàhà vok uwana adapakà vok. ²⁵ Kiya uwaga hazlan, dza anik asà à wan, agod à atà: "Tsənəwwən tsi! Azladza uwana kakəsaw atà, kawətsaw atà à danj kà, atà la mən gày Zəzagəla la aku, tatapla azladza!" ²⁶ La abatà mənğa anja azlaməna manənla ahəd la azladza, ngaha tawùlla azlaməna matapla à wan. Ama la gasa aw kà uwana guba akəs à atà, kà matsàh atà la akur anja azladza.

²⁷ Mok uwana tasəlla atà à wan à huma anja sawaray kà, mən madzahaga anja azlaməna mav tatak à Zəzagəla anavà atà gay ala. ²⁸ Agod à atà: "Mədadəđ à akul gay à ahən kà matapla la sləm anja dza uwaga aw ay? Ngaha ma, kà mana kadəhəwwən lagwa ma? Kaslèhəw matapla anjul à Urusalima à abà gesina, ngaha ma asa à akul aniz anja ma anja mawul à anu à gəl takay?!" ²⁹ Ama Piyer la azlaməna matapla anik tawùlla à atà ala: "Leri makəs gay anja Zəzagəla dıdıwa à gay anja azladza. ³⁰ Haday, Zəzagəla anja azlababa gami madzidziga awùlla à uda la mamətsay, dza uwaga kazlèlləw à ahəf à adi. ³¹ Zəzagəla azəb à ahəl kaf anja à gəl, apakən ala kà Sufəl, ngaha masla mabələn kà mav tetəvi à azla Isərayel kà mapəh gay la ləv ala kà atà anja mabəz mamatsila anja tsakana anjatà. ³² Haday, anu la gəl gami kà, anu

azlaməna sayda kà aña uwaga, anu la Masasəđok uwana Zəzagəla avà à azlauwana takəs gay aña.”

³³ Mok uwana tatsən gay uwaga kà tapakàh ləv, asà à atà makad azlaməna matapla. ³⁴ La tataka aña tətə zil Farisəya anik, sləm aña Gamaliyel la abà, masla mapàhla mapəhay aña Musa ala. Azladza gesina tasləkaway. Uwana azladza anik tapakàh ləv, asà à afik la tataka aña tətə la abà, agòđ: “ ‘Dàw à uda’, gòđaw à azladza uwanay dadəñ.” ³⁵ Mok uwana tasà à uda, agòđ: “Azladedə gulo, azla Isərayel, məđahà hanəkəli la uwana məđehəñ à azladza uwanay à vok. ³⁶ Dzùgwàw lakəl aña Tewudas uwana avàlla à wañ uwarà tsi: ‘Gi mən dza’, agòđ, tsərəh à uwana azladza dadərmokw ufađ tanəfà. Ama takəđ, ngaha azlauwana tanəf à masla gesina tasləhà gəl à ahəñ, ama tadəv à gay tərzləm. ³⁷ La lig aña la ahəñ Yudas, zil Galili adzəkà la mok uwana tatùgw dza aya, azàläh azladza aņuvaw kà manəf masla, ama takəđ masla la azlaməna manəfay aña gesina, tərzləm. ³⁸ Lagonay kà, gəgòđ à akul kà, məsəlla à ahàl à azladza uwanay la tsəh ala, tada aña tətə. Baña sləray aña tətə uwanay təđehəñ atsà à wañ kà la slaka azladza asik kà, adàzila bay, ³⁹ ama baña asà à wañ kà la slaka Zəzagəla ndzer kà, məslala à vok kà madəđəfal gay à ahəñ aw. Məđahà hanəkəli, məpə guvəl la Zəzagəla aw!” Azlaməna sawaray takəs mapəhay aña Gamaliyel. ⁴⁰ Tazàla azlaməna matapla à gày, tazləbàh atà, tagòđ à atà: “Kapəhaw la sləm aña dza uwaga aya aw, ama lagwa kà dāw aņkul!” ⁴¹ Azlaməna matapla tazà à vok la slaka sawaray la marabay kà uwana azlayla atà la huma Zəzagəla kà mas ngərpa kà sləm aña Yesu, kà uwana Zəzagəla asəl kà tabasiñ. ⁴² Ngaha kəla mahəñay tadà à huma à gay la matapla gay marabəñ à azladza lakəl aña Yesu, uwana Zəzagəla afəl dzakwa à gəl, la mən gày Zəzagəla la aku, ngaha la gày anik anik.

6

Takasani azladza məđəf kà mazlak azlaməna matapla

¹ La kaslə uwana azlaməna matapla tasigla kà azla Yahudiya uwana tapəh gay Gərək la azlauwana tapəh gay gudəñ aña tətə tagòđ: “Azlamis kuđa gami kà, tafà à atà sləm, à mok uwana tavàh tatak may aw”, tagòđ. ² Kiya uwaga azlaməna matapla kulo gəl aña səla uwaga tahamà gay à azlaməna asik à vok gesina, ngaha tagòđ à atà: “Anu kà, akəs à anu à vok, kà anu aña masak à mapəh gay Zəzagəla, kà mad à gay aña tatak may à abà aw. ³ Azladedə, tsatsəmàwni azladza məđəf, uwana kasəlaw madz à ahəñ aña tətə la tataka aņkul la abà, mahənlaga la Masasəđok Zəzagəla ngaha azlaməna makor hanəkəli gə lela. Ngaha mədəbək à atà sləray aña tatak may uwaga à ahàl aña tətə. ⁴ Ngaha anu kà, məslala vok aña mav vok gami gesina à madəv kuđa à abà la maz gay Zəzagəla à azladza.” ⁵ Gay uwaga akəsà vok à azladza uwana tahamà gay à vok gesina. Takàsàni azladza; Etiyen, uwana adahənlə la madiñal gəl à vok, la Masasəđok Zəzagəla: la Filip; Pərokor; Nikanor; Timon; Parmenas; ngaha Nikolas, zil Antiyews uwana abəđəla vok à tsəhay Yahudiya à abà dagay uwarà. ⁶ La lig la ahəñ tapəhla atà à azlaməna matapla, kà atà aña madəv kuđa lakəl aña tətə la məbək à atà ahàl à gəl.

⁷ Gay Zəzagəla asləhà gəl à ahəñ kaykay. Matugway aña azlaməna madiñal gəl à vok azigəñ, asigla la Urusalima, ngaha azlaməna mav tatak à Zəzagəla aņuvaw takəs madiñal gəl à Yesu à vok.

Makəs Etiyen

⁸ Etiyen uwana Zəzagəla aņis ala gay à vok kaykay, agà la ndzəđə mənğa la tetəvi aña Zəzagəla la tsəh, ađahàhà azlanadzipo anik anik la tataka azladza la abà. ⁹ Azla Yahudiya anik tasàhà à wañ la Səren la Alekəsəndəra, la azlauwana tadəv kuđa la

gày uwana la aku, tazalalla gày aña azlamayà mapalla gà, la azla Yahudiya anik, uwana tasàhà à wañ la kutso Səlisəya ñgaha la kutso Asəya, gesina añaatà tabayà vok gay la Etiyen. ¹⁰ Ama taslàla vok kà matsizlal à huma aw kà uwana Masasəfok la uwana avàl hañkəli. ¹¹ Kiya uwaga tasùkw azladza kà atà aña magoɗay kà: “Mətsənàñ apəh mawisiga lakəl aña Musa ñgaha lakəl aña Zəzagəla.” ¹² La abatà tavədzàhà à tsəh azladza à afik, la azlamasiga ñgaha la azlaməna mapəhla wakità mapəhay ala. Ñgaha tahamà Etiyen à gəl, tadàlla à huma aña azlamasiga añaatà. ¹³ Tadàlla azlaməna sayda fida uwatà à awtày babay kà mapəh fida lakəl aña: “Dza uwanay kà; asak à mapəh mawisiga lakəl aña mənəy gày Zəzagəla gami, ñgaha lakəl aña mapəhay aña Musa aw. ¹⁴ Mətsənàñ agòɗ aya kà: ‘Yesu zil Nazaret uwaga adàkalah mənəy gày Zəzagəla gami à ahən, ñgaha adàbədfla madz à ahən uwana Musa avà à anu’, agòɗ aya.” ¹⁵ Azladza uwana la gày sawaray la aku gesina tatsək yewdi à Etiyen à gay, tanəñàñ kà huɗ adi aña kà kalkal la aña malika aña Zəzagəla.

7

Mapəhay aña Etiyen

¹ “Uwanay tapəh à ka vok ma haɗay ay?”, mənəy madzahaga aña azlaməna mav tatak à Zəzagəla agòɗ à Etiyen. ² Etiyen awùlla à uda: “Azladeda la azlababa gulo, tsəbàw à gi sləm. Zəzagəla uwana mazləbayga apəhla vok à baba gami madzidziga Abəraham, à mok uwana agà la kutso Mesopotami, à mok uwana aləg maday kà madz à ahən la Karan. ³ Ñgaha agòɗal:

'Sà à uda la gudəñ aña, la huɗ gày aña, hād, kadàdza à ahən la gudəñ uwana gədəpəhakla!'[☆]

⁴ Kiya uwaga Abəraham asà à uda la kutso Kaldiya, ahād kà madz à ahən la Karan. La lig aña mamətsay aña Baba aña la ahən, Zəzagəla adàlla à kutso uwanay à abà, kadzaw à ahən la abà lakana lagwa. ⁵ La abatà kà, bə slaka madiñ asik à ahən bay, kà abəzal aw. Ama Zəzagəla apəh à Abəraham à vok à abà kà mavàl kutso uwaga, agòɗal:

'Gədāv à ka, ñgaha mayyi à tsəh ala aña la uwana adàkoray'[☆]

agòɗal, tekeɗika, Abəraham kà bəzi aña la ahən à mok uwatà aw. ⁶ Aganay uwana Zəzagəla apəh:

'Mayyi à tsəh ala aña adàdza à ahən la gudəñ dza la abatà, tadəgay azlamayà, ñgaha tadətərərəbàh atà tsəràh à mavay dadərmokw uɗad.

⁷ Ama gədàɗah seriya à azladza uwana à gəl tadətərəb atà. La lig la ahən tadədiy añaatà la abatà, tadəkəɗəɗ à gi à ahən la slaka uwanay lagwa,[☆]

Zəzagəla agòɗ. ⁸ Kiya uwaga Zəzagəla akəs vok slawda la Abəraham, agòɗal kà:

'Makədəv vok à uda la uwana masəlay aña makəs vok slawda uwaga.'

Gay gà la uwaga, Abəraham akədəv bəzi aña Isak à uda la lig mahənay mtəgis la ahən, kiya uwaga babay, Isak akədəv Yakuba à uda uwana akədəv azlabəza aña kulo gəl aña səla à uda bay. Atà la uwana takəslla azlatsəhay gami ala.”

⁹ “Azlaməna makəsl anu uwaga tafahəñ mañor à deda añaatà Yusufu à vok, tadùw à azla Misəra ala kà aña mayà. Ama Zəzagəla agà la masla. ¹⁰ Zəzagəla anəñla la ñgərpa uwaga la abà gesina. Avà hañkəli à Yusufu kà masla aña mabəz mawoyəñ, la vok matsidəy la huma aña Faruna, sufəl aña Misəra. Masla la uwana afà à Yusufu à ahən kà gumna aña makoray Misəra, ñgaha lakəl aña huɗ gày aña gesina. ¹¹ Mok uwatà kà, may mənəga adzəkà à vok la kutso Misəra la Kanana gesina. Ñgərpa agà mənəga, ñgaha azlababa gami madzidziga tabəzà tatak may kà mazuway aw. ¹² Mok uwana Yakuba atsənàñ kà tatak may la ahən la makoray Misəra kà, asləl azlababa

☆ 7:3 7.3 1Musa 12.1 ☆ 7:5 7.5 1Musa 12.7 ☆ 7:7 7.7 1Musa 15.13-14

gami asik tekula dadəŋ. ¹³ Maday kà masəla uwana tahəd kà, Yusufu apəhla vok à azladedə aŋha, ŋgaha Faruna asəl kà azlauwaga kà huɸ gày aŋa Yusufu. ¹⁴ La abatà Yusufu asləl atà kà mazala baba aŋha Yakuba, la azladza gesina uwana la huɸ gày aŋha, gesina aŋatà taslà dza dzik məɸəf gəl aŋha zlo. ¹⁵ Kiya uwaga Yakuba ahəd à kutso Misəra à slaka uwana aməts à abatà, la azlababa gami madzidziga bay. ¹⁶ Talàh atà kà à Səsem à zəvay uwana à agu Abərahəm asùkw la gursu, la slaka aŋa tsəhay Hemor.”

¹⁷ “Mok uwana kaslà adaslay, kà Zəzagəla aŋa mahən mapəhay aŋha uwana ala, adahəŋ la Abərahəm, tsəhay gami ayyà à tsəh aŋuvaw la kutso Misəra. ¹⁸ Ŋgaha sufəl mawga uwana asəl Yusufu aw adzəkà makor gudəŋ uwaga. ¹⁹ Sufəl uwatà avavàràhà tsəhay gami, afàhà à atà leri à gəl kà mamal azlabəza ala, kà azlabəza aŋa mamats à gay. ²⁰ La zamana uwatà la uwana tayyà Musa, uwana bəzi mahəɸayga. Zəzagəla awoyàŋ. Tanəŋla tsərəh à təla makər la huɸ gày aŋa baba aŋha. ²¹ Mok uwana taməl à uda, dugu aŋa Faruna azəb, adzadzər bokuba mayyay aŋha. ²² Kiya uwaga Musa adzəŋ atsətəhà ala la azlatatak gesina uwana azla Misəra tasəl, ŋgaha agà maslay gə la gay la abà, ŋgaha la sləray aŋha la abà gesina.”

²³ “Mok uwana mavay aŋha adaslay dzik ufaɸ kà: ‘Gəday, gədənəŋ azlaməna gulo azla Isərayel à gay’, Musa agòɸ. ²⁴ Anəŋà zil Misəra atərəb tsəhay aŋha, abəɸ à huma kà mazlakəŋ dza uwana tatərəbəŋ, apəl goder, akəɸ zil uwaga. ²⁵ Musa adzùgw kà azladedə aŋha tadəsəlay kà: ‘Zəzagəla akəs mapəl atà ala tadəgəɸay’, agòɸ, la mazlak atà aŋha, ama tatsənà godega aŋha aw. ²⁶ La bəŋ gə Musa abəzà azla Isərayel səla à gəl tazlāb vok, asəl kà masəl à atà à vok. Agòɸ à atà: ‘Azladedə, tsa akul la deda ma, kà mana katərəbaw vok kà akul à akul ma?’ ²⁷ Ama dza uwana atərəb anik uwanay, adəkà Musa la vok ala, agòɸal: ‘Uwa afà à ka à ahəŋ məŋga bəŋaw kà masla seriya lakəl gami uwa? ²⁸ Awma asa à ka makəɸ gi, bokuba uwana kakəɸ zil Misəra lakuhu kəlay?’ ²⁹ Uwana Musa adatsən gay uwaga kà, ahòy aŋha, ahəd, adzà à ahəŋ la kutso Madiyan. La abatà abəzà azlabəza zilga səla.”

³⁰ “La lig aŋa mavay dzik ufaɸ la ahəŋ, la mok uwana Musa la fəta aŋa gudəŋ Sənayyi kà, malika aŋa Zəzagəla asà à waŋ, apəhla vok à Musa la alàh aŋa akəl uwana ababəhay la tsewwagay la abà. ³¹ Uwana adanəŋ tatak uwaga kà, ləv avàlal à gay. Ama bokuba uwana azà à vok à awtày nekwa kà manərəziŋ ala kà, kuda aŋa Sufəl Zəzagəla atsən la abà, agòɸ:

³² ‘Gi Zəzagəla aŋa Abərahəm, aŋa Isak ŋgaha aŋa Yakuba, aŋa azlababa aŋak madzidziga uwaga.’[✧]

Musa adzəkà masukulay dawdadaw kà guba, ŋgaha aslāla vok kà manərəziŋ ala aya aw. ³³ Kiya uwaga Sufəl Zəzagəla agòɸal:

‘Sərətàh kwimik aŋak la asik ala, kà uwana slaka uwanay kak la abà kà, kutso tsika-slaga, kokudà àlāh.

³⁴ Gədanəŋ ŋgərpa aŋa azlatsəhay gulo la Misəra. Gəɸatsən mabas vok aŋatà ŋgaha gəsà à ahəŋ kà mapəlla atà ala. Lagwa kà, sà à waŋ, gəsləl ka à Misəra.’[✧]

³⁵ “Sələw azladedə, azla Isərayel takweskà Musa la magòɸal: ‘Uwa à uwana afà ka à ahəŋ, kà məŋga, ŋgaha kà masla seriya uwa’, tagòɸal. Ama bə la uwaga kà, la lig la ahəŋ Zəzagəla asləl à slaka aŋatà kà magay məŋga aŋatà, ŋgaha kà mapəlla atà ala, la ndzəɸa aŋa malika uwana apəhalla vok la tsewwagay la abà. ³⁶ Masla la uwana asəlla azladza à uda la Misəra la maɸahàh azlamasəlay la azlanadzipo anik anik la abatà, ŋgaha la gay dərəv mativga, ŋgaha la fəta la abà, tsərəh à mavay dzik ufaɸ. ³⁷ Bə Musa uwaga aya gotənaŋ, la uwana agòɸ à azla Isərayel: ‘Zəzagəla adəsləl à akul masla mapəhal gay à ahəl anik à waŋ bokuba gi, uwana adàsa à uda

la tsəhay anjul la abà.' ³⁸ Musa gə la uwaga à uwana adzà à ahəŋ la mahəm à ahəŋ anja Isərayel la fəta la abà; agà la azlababa gami madzidziga, ŋgaha la malika uwana abəfəlmà la gudəŋ Sənyayi la afik. La abatà la uwana abəzà à azlagay uwana tavà sifa, la slaka Zəzagəla kà mav à anu."

³⁹ "Ama azlababa gami madzidziga takəs uwaga aw, takweskà, tayàh mawul anjata à Misəra. ⁴⁰ Tagòf à Haruna: "Dahà à anu azlazəzagəla uwana taguwa à anu à huma, kà uwana məsəl tatak uwana abəzà à Musa, uwana asəlla anu à uda la Misəra aw."

⁴¹ La mavakay uwatà tadhà vèlik luwàluwà, ŋgaha tavàl tatak. Tarəb mənğa lakəl anja sləray anja ahəl anjata. ⁴² Ama la lig anja uwaga la ahəŋ, Zəzagəla aguwà à atà ala lig à gay, asək à atà kà masləkaw azlatsetsiliŋ uwana la zagəla, bokuba uwana tatsetsər à wakità anja azlaməna mapəh à atà gay à ahəl à abà:

'Akul, tsəhay Isərayel kà anjulo, à uwana kakəfəw azlatatak anik anik la mav tatak anik takay? A mavay dzik ufaɸ uwaga la fəta la abà ay?

⁴³ Awanj, kazəbàw gày lukut anja Molokw mazlazlay anjul, ŋgaha kazəbàw maftsa à vok anja tsetsiliŋ kà anja Refan, mazlazlay anjul. Azlamazlazlay uwana kà kadəhàw atà kà masləkaw atà. Gay gə la uwaga gədàza akul kərkər la Babila.'"⁴⁴

⁴⁴ Gotənanj Etiyen adà à huma à gay, agòf: "Mok uwana azlababa gami madzidziga tadzà à ahəŋ la fəta la abà, tagà la gày lukut, uwana tadùw à sahar anja makəs vok slawda à gəl, kà atà anja masəlay kà Zəzagəla agà la tataka anjata la abà. Gày uwatà kà tadhəhəŋ kà, bokuba uwana Zəzagəla apəhla à Musa, kà madəhəŋ kalkal la uwana anəŋəŋ. ⁴⁵ La lig la ahəŋ, azlababa gami tavà gày lukut uwaga à mayyi à tsəh ala anjata. Mayyi à tsəh ala uwaga kà Josu'e la uwana aguwà à atà à huma kà, mazaɸ kutso anja azlatsəhay anik, uwana Zəzagəla akudək à atà la huma anjata. Gay gə la uwaga, gày lukut adzà à ahəŋ la gudəŋ la abà tsəràh à zamana anja sufəl David. ⁴⁶ David abəzà vok mahamay anja Zəzagəla, adəval kuɸa, kà masla anja mabəzal tetəvi kà manjalal mən gày Zəzagəla à Zəzagəla anja Yakuba.'"⁴⁷ Ama Salomon la uwana anjalal uwaga pəra."

⁴⁸ "Tekedika Zəzagəla uwana la zagəla la afik, adza à ahəŋ la gày uwana la aku azladza tanjalal aw. Bokuba uwana masla mapəhal gay à ahəl apəh. Sufəl Zəzagəla agòf kà:

⁴⁹ 'Zagəla kà kursi gulo, kutso kà slaka maf à asik gulo à ahəŋ. Tsəhay gày ma uwala à uwana kanjalaw à gi la? Slaka ma uwala asla kà gi anja maduw ləv la abà la?

⁵⁰ Gi la uwana gəfəhəŋ azlatatak uwaga gesina aw takay?'"⁵¹

⁵¹ "Haday, akul azlaməna madzadzəŋəh gəl ala, ləv anjul la sləm anjul kà, asa à atà matsən gay anja Zəzagəla dikiɸiki aw! Kakwesaw kà Masasəfok anja Zəzagəla koksikoksi, bokuba anja azlababa anjul.'"⁵² Azlaməna mapəh à atà gay à ahəl, azla ma uwala, azlababa anjul madzidziga tatərebəh atà aw la? Atà tatakəfəh azla-uwana, tasà à wanj kà maz mas à wanj anja dza dziriga lagonay bay, kà masla la uwanay katəwwal kaf à gəl, ŋgaha kakəfəw. ⁵³ Tekedik kà akul kà, Zəzagəla avà à akul mapəhay la ahəl anja azlamalika, ama kakəsəw aw."

Makəɸ Etiyen la akur

⁵⁴ Uwana maham à ahəŋ anja azlaməna sawaray tatsən gay uwaga kà, tapəɸ slif la tsəh ala, tapakəh ləv mənğa lakəl anja Etiyen. ⁵⁵ Ama Etiyen uwana mahənla ala gə la Masasəfok Zəzagəla, adzilə yewdi à zagəla, anəŋə mazləbay anja Zəzagəla, la Yesu matsizl à ahəŋ gə la ahəl kaf anja Zəzagəla lakəl. ⁵⁶ Etiyen agòf: "Tsəbàwwal sləm: Gənəŋə zagəla kà zagəla mapəzlla ama ala gə, ŋgaha Kona anja dza dzawwa la ahəl kaf anja Zəzagəla lakəl." ⁵⁷ Tawiyà la ndzəɸa kà makəɸal gəl à ahəŋ la manakəh à

✧ 7:43 7.43 Amos 5.25-27 ✧ 7:46 7.46 2 Samuyel 7.1-16 ✧ 7:50 7.50 Yesayya 66.1-2 ✧ 7:51 7.51 Yesayya 63.10

sləm à ama. Gesina aṅatà tahamàl à gəl. ⁵⁸ Tabayàṅ à uda la gudəṅ la abà, ṅgaha tadzəkà matsahay la akur kà makəḍfay. Azlaməna makəḍfay tahamà lukut aṅatà à slaka bəzi kohana, uwana sləm aṅha Sawul. ⁵⁹ Uwana tatsahay la akur kà Etiyen, adəv kuda kiya uwanay: “Sufəl Yesu, gəmətsay kà à ahəl aṅak à afik!” ⁶⁰ ṅgaha akədèḍ à ahəṅ, azà kuda à zagəla awiyà: “Sufəl, katugw uwaga bokuba tsakana lakəl aṅatà aw!”, agòḍ. La mapəh gay uwaga la gay ala, aməts.

8

¹ Makəḍ Etiyen kà, akəs à Sawul à gəl.

Sawul atərəḅ azlaməna gay Zəzagəla

La mavakay uwatà, matərəḅbay mənḡa adzəkà à vok lakəl aṅa maham à ahəṅ məna gay Zəzagəla la Urusalima. Gesina aṅatà taslèhà gəl à ahəṅ la kutso Yahudiya ṅgaha la Samariya. Say azlaməna matapla pəra tatəm à Urusalima. ² Ama azladza dziriga talà Etiyen, ṅgaha tatùw mənḡa. ³ Sawul awəḍf vok à uda kà mabəzl gəl à maham à ahəṅ məna gay Zəzagəla à abà; adàhàh gəy la gəy, kà makas azlaməna madiṅal gəl à vok, azlazil la azlamisga gesina, kà mawats atà à daṅay.

Azlaməna Samariya tatsənaṅ gay marabəṅ

⁴ Azlauwana taslèhà gəl à ahəṅ kà, tauguzàhàh la kutso gesina kà maz gay marabəṅ. ⁵ Filip ahəd à Samariya, ṅgaha azà gay aṅa Kristu à azlaməna madz à ahəṅ la gudəṅ uwatà. ⁶ Maham à ahəṅ dza takəs gay aṅa Filip à mok uwana tatsənaṅ ṅgaha tanəṅàṅ azlanadzipo uwana adahàhàṅ. ⁷ La kità azlamasəḍok mawisiga tasàhà à uda la azlaməna dıvats la abà aṅuvaw la mawiyay, ṅgaha azlamagul à afik gə, la azladeri tawarà ala bay. ⁸ Marabay mənḡa apakà vok la gudəṅ uwatà.

⁹ Dza anik la ahəṅ, dagay uwarà la gudəṅ uwatà, sləm aṅha Səmon. Masla kà avàlàh ləv à azladza à gay la Samariya la məzla aṅha. Masla kà: “Gi mən dza”, agòḍ. ¹⁰ Gay gə la uwaga azladza la gudəṅ uwatà gesina, azlauwana azlaməṅga tagòḍ à atà, la azlabəzaga gesina, taslèkàw masla, tagòḍ kà: “Masla la uwana ndzəḍa aṅa Zəzagəla uwana tazàlalla ndzəḍa mənḡa gə.” ¹¹ Taslèkàwàh masla mənḡa kà uwana avàlàh ləv à azladza à gay la məzla aṅha dagay uwatà. ¹² Ama mok uwana tadiṅ gəl à gay marabəṅ uwana à vok, Filip azàṅ lakəl aṅa makoray Zəzagəla, ṅgaha lakəl aṅa sləm aṅa Yesu Kristu kà, tabəzà batem, azlazil la azlamis. ¹³ Səmon la gəl aṅha bay, adiṅal gəl à vok, abəzà batem, adzà à ahəṅ la slaka Filip, ṅgaha ləv avalàhal à gay mənḡa la manəṅ azlamasəlay la azlanadzipo uwana Filip adahàhàṅ.

¹⁴ Azlaməna matapla la Urusalima tatsənaṅ kà azladza la Samariya takəs gay aṅa Zəzagəla kà, taslèl à atà Piyer à awtày atà la Yuhana. ¹⁵ Mok uwana tabəzà à Samariya kà, tadəv kuda kà aṅa azlaməna madiṅal gəl à vok kà atà aṅa mabəz Masasəḍok Zəzagəla. ¹⁶ Kà uwana Masasəḍok Zəzagəla adasa à ahəṅ, baməraaka à gəl aṅa tekula aṅatà dadàṅ aw, tabəzà batem la sləm aṅa Sufəl Yesu dadàṅ pəra. ¹⁷ Gay gə la uwaga à uwana, Piyer atà la Yuhana tabək à atà ahəl à gəl, ṅgaha mabəz Masasəḍok Zəzagəla.

¹⁸ Mok uwana Səmon anəṅà Masasəḍok asà à gəl aṅa azlaməna madiṅal gəl à vok, à mok uwana azlaməna matapla tabək à atà ahəl à gəl kà, Səmon ayàh mabək sili à azla Piyer atà la Yuhana. ¹⁹ Agòḍ: “Vàw à gi ndzəḍa uwaga babay suwan, kà kəla uwabeyuwi uwana gədəbəkəkal ahəl à gəl aṅa mabəz Masasəḍok Zəzagəla.” ²⁰ Ama Piyer awulàlla: “Zàlla la sili aṅak, kà uwana kadzugw kà: Mavày aṅa Zəzagəla kà tasukway la sili, kagòḍ. ²¹ Humà gə aṅak la ahəṅ, la gay uwanay la abà aw. Kak kà, kak la sləray gami la abà aw, kà uwana ləv aṅak la dziriga la huma Zəzagəla aw! ²² Pəh gay la ləv ala kà mawisiga aṅak uwaga, dəv kuda à Sufəl, zlahaw kà masla amatsakanə ala tsəhay madzugway aṅak uwaga tak. ²³ Kà uwana gənəṅàṅ kà

kadahən ala la mawisiga dehakakga, ngaha kak mayà aña tsakana.” ²⁴ Kiya uwaga Səmon agòd à Piyer atà la Yuhana: “Kamkam, dèwàw kufa à Sufəl kà gi, kà gay uwana kapèhàw à gi aña mabəz à gi aw!”

²⁵ Piyer atà la Yuhana tapàh sayda aña Sufəl Yesu la maz gay marabəñ la Samariya, ngaha tawulà à Urusalima. La tetəvi aña atà la ama kà, tapàhàh gay marabəñ lakəl aña Yesu la azlabəza gudəñ uwana la kutso Samariya la abà gesina.

Filip atà la slawpara aña mən sufəl misga la Etiyopiya

²⁶ La lig aña uwaga la ahəñ, malika aña Sufəl Zəzagəla apəhla vok à Filip, agòdàl: “Filip, sà à afik, wul à gəl à agu, à tetəvi uwana à ama asà à uda la Urusalima ada à Gaza.” Tetəvi uwana tetəvi kəsaf. ²⁷ Filip atsizlla ala, ahàd. Tagagàm à tetəvi à ama la dza anik. Dza uwatà kà zil Etiyopiya, subaga, slawpara aña Kandantse, mən sufəl misga la Etiyopiya. Asà à Urusalima kà masləkaw Zəzagəla. ²⁸ Agà la tetəvi mawul à mtəga aña la tsəh, la dərkwə aña la afik, adzeñay la wakità aña masla mapəhal gay à ahəl Yesayya la abà. ²⁹ Masasədok Zəzagəla agòd à Filip: “Hàd à slaka aña, zà à vok à slaka aña dərkwə aña!” ³⁰ Filip azà à vok à slaka aña la mahoyay, ngaha atsənà zil Etiyopiya uwaga adzeñay la wakità aña masla mapəhal gay à ahəl Yesayya la abà. Anavàl à gay la: “Katsənà uwaga kadzeñay ay?” ³¹ Kona uwaga agòdàl: “Kakay gətsenəñ à baña dza adəpatgəla godega aña aw ma? Sà à wañ à slaka gulo à dərkwə la afik”, agòd à Filip. ³² Aganay à slaka uwana adzəñ la wakità la abà:

'Agà bokuba tuwañ uwana tadàla à makəday, bokuba bəzi tuwañ uwana atuway à baña tatsəf anidz aña aw.

Kiya uwaga məslək, apokwà gay aña aw.

³³ Tapəsəw, takəl ala ziruwı à gəl, tadükw ala seriya à gəl kà deyday pəra.

Uwa à uwana adàslala vok aña matugway lakəl aña tsəhay aña uwa?

Kà uwana takəf à gəl à sifa aña la gudəñ la vok. [✧]

³⁴ Slawpara uwaga anavà Filip: “Kamkam, pəhgəla lakəl ma aña uwa masla mapəhal gay à ahəl apəhay uwa? Apəhay ma lakəl aña, awma lakəl aña dza anik ay?” ³⁵ Filip adzəkà lakəl aña uwana dza uwaga adzeñay la wakità la abà, azàla gay lakəl aña Yesu. ³⁶ Uwana taday, taday kà, tabəzà à iyaw à vok, la abatà slawpara agòd: “Tsa iyaw la uwanay, ma mana à uwana adəf à gi gay à ahəñ kà mabəz batem ma?” ((³⁷ Filip agòdàl: “Baña kadiñal gəl à vok la ləv aña gesina kà, kaslala vok kà, mabəz batem.” Kona uwaga awulàlla: “Gədiñal gəl à vok, kà Yesu Kristu kà Kona aña Zəzagəla.”)) ³⁸ Ngaha la abatà: “Tsizlla dərkwə à ahəñ”, agòd à magamza aña. Filip atà la slawpara tasà à ahəñ, tahàd à iyaw à abà, ngaha Filip adəhàlla batem. ³⁹ La mok uwana tasà à uda la iyaw la abà kà, Masasədok Sufəl Zəzagəla azəbà Filip ala dzəgasl. Slawpara anəñəñ aya aw, ama adà aña la marabay. ⁴⁰ Batsàrà kà, Filip anəñla kà agà la Azot. Kiya uwaga aguwàh la azlagudəñ la abà gesina, kà maz gay matsidəyga la slaka gesina tsəràh uwana abəzà Zəsare.

9

Mapəh gay la ləv ala aña Sawul

¹ La mok uwatà, Sawul asakà matərəbəñ la makəf azlaməna matapla la slaka Sufəl Yesu aw. Ahàd à slaka mən madzahaga aña azlaməna mav tatak à Zəzagəla. ² Anavà patanti, kà aña gəy madəv kufa la Damas, kà makas azladza uwana tanəfa Yesu, azlazil la azlamis gesina, kà madla atà à Urusalima.

³ Mok uwana adabəz à patanti uwaga kà, atsizlla ala, kà mad à Damas. La tetəvi la ama, uwana azlabəzay, katskats mən udfaka asà à ahəñ la zagəla, aùd la slaka aña.

✧ 8:33 8.33 Yesayya 53.7-8

⁴ Atəf à vəfah, ngaha atsənà kuda uwana agòfal: “Sawul, Sawul, kà mana katərəb gi ma?” ⁵ Anàv, agòfal: “Kak uwa, Sufəl?” Kuda uwaga agòfal: “Gi Yesu uwana katərəbəñ.” ⁶ Ama agòfal: “Sà à afik, hād à gudəñ à abà, la abatà la uwana tadàpəh à ka uwana kadàfehəñ.” ⁷ Azlaməna mauguzahay atà nna tagudəkàhla, taslala vok kà mapokw gay aw, tatsənà mabəfma, ama tanəñà dza aw. ⁸ Sawul asà à afik la vəfah, apəzl yewdi, ama aslala vok kà manəñ tatak aw. Takès à ahəl kà madla à Damas. ⁹ Tsəràh mavakay makər, aslala vok kà manəñla aw, azùw ngaha asà tatak babay aw.

¹⁰ Masla asik anik la ahəñ la Damas uwana sləm anha Ananiyas. Sufəl Zəzagəla apəhal la masasiñay, agòfal: “Ananiyas, Ananiyas!” “Awway, gi la uwanay, Sufəl gulo”, Ananiyas agòfal. ¹¹ Sufəl Zəzagəla agòfal: “Katskats, hād lagonay à bəzi barama tərrega à ama. Lakay anja Yudas, dza uwana sləm anha Sawul zil Tarsus, adəv kuda lagwa, d’anàv. ¹² Kiya uwaga la masasiñay kà, Sawul anəñà dza anik, uwana sləm anha Ananiyas adà à gày kà mabəkal ahəl à gəl, kà masla anja manəñla aya.” ¹³ Ananiyas agòfal: “Sufəl, azladza anjovaw tapəh à gi lakəl anja dza uwaga, lakəl anja uwana adfahəñ à azlaməna manəfay anjak à vok la Urusalima. ¹⁴ Ngaha asà à wañ à abanay la patanti, uwana la ahəl azlamadzahaga anja azlaməna mav tatak à Zəzagəla la Urusalima tavəl, kà makas azladza uwana tatsəl sləm anjak à gay.” ¹⁵ Ama Sufəl Zəzagəla agòfal: “Hād, kà uwana gədazəb masla, ngaha gədàpakəñ ala, kà masla mapəhla gi ala, la slaka azlatsəhay anik anik, la azlasufəl anjatà, ngaha la tsəhay Isərayel. ¹⁶ Gi la gəl gulo gədàpəh ala ngərpa uwana adàsəy kà gi.”

¹⁷ Kiya uwaga Ananiyas ahād, adà à gày uwatà à agu, abək ahəl à Sawul à gəl, agòfal: “Deda Sawul, Sufəl Yesu uwana apəhakala vok la tetəvi la ama à uwana katsà à wañ, masla la uwana asləl gi à wañ, kà kak anja manəñla aya, ngaha kà kak anja magay mahənlaga la Masasəfok Zəzagəla.” ¹⁸ Katskats tatak anik bokuba mafafətay anja kilfi anis à Sawul la adi ala, ngaha anəñla aya. Hadzak, asà à afik ngaha tadàhalla batem. ¹⁹ La lig la ahəñ azùw tatak may, ngaha abəzà à ndzəfa aya.

Sawul apəh gay Zəzagəla la Damas

Sawul asəf la azlaməna madiñal gəl à vok njuv la Damas. ²⁰ Katskats adzəkà mapəhəh gay Zəzagəla la azlagày madəv kufə la aku, la mapəhla ala, kà Yesu kà Kona anja Zəzagəla. ²¹ Azladza uwana tatsəbal sləm gesina, ləv avələh à atà à gay, tagòf: “Uwaga kà dza uwana atərəbàhà azladza la ndzəfa la Urusalima, azlauwana takès gay anja Yesu aw takay? Ngaha asà à wañ à abanay kà anja makas atà la madla atà à mən madzahaga anja azlaməna mav tatak à Zəzagəla aw takay?”

²² Ama Sawul azəñ la ndzəfa koksikoksi la mad à huma à gay, azla Yahudiya uwana tadzà à ahəñ la Damas, tasəl uwana tawulàlla aya à mok uwana apəhatàla kà Yesu kà Kristu aw.

²³ Uwana adasafni kà, azla Yahudiya takès sawaray kà makəfay. ²⁴ Ama atsənà uwana tatsənəñ à vok kà madfahalləñ à vok. Kəla mavakay la mahənay tanəñla gay gamagày anja huf gudəñ kà makəfay. ²⁵ Kiya uwaga la vəd vərđi anik, azlaməna asik anha tazəb, tafà à takosà à abà, tadzilà à ahəñ la gəl zlagam, uwana takəslla gay à huf gudəñ à adi.

Sawul la Urusalima

²⁶ Mok uwana Sawul adawul à Urusalima kà, ayəh maham gay à vok la azlaməna matapla; ama guba akès à atà gesina, kà uwana tadiñal gəl à vok, kà masla ndzer kà adapaka masla manəf Yesu aw. ²⁷ Ama Barnabas akès à tsəh, adàlla à slaka azlaməna matapla la slaka Yesu, ngaha atügw à atà godega manəñ Sufəl Yesu anja Sawul la tetəvi la ama, ngaha la uwana Sufəl Yesu abəfalmà. Apəh à atà gay lakəl anja mawaf

vok à uda aña Sawul uwana azà gay aña Yesu la Damas aya. ²⁸ Dagay kaslà uwatà kà, Sawul adà à atà à adi, tauguzàhàh la gudəŋ Urusalima kà maz gay aña Sufəl Yesu. ²⁹ Ngaha apàhàh à azla Yahudiya uwana tapəh gay Gərək la mabay vok gay la atà babay, ama atà kà, tayàh kà makəday. ³⁰ Mok uwana azladedà tatsən uwaga kà, talakà Sawul à Zəsare, ngaha tasləl à Tarsus.

³¹ Kiya uwaga azlaməna madiŋal gəl à vok la kutso Yahudiya, la Galili, la Samariya gesina tadzà à ahəŋ la lapiya, kokudə matərəbay. Tadzərəđàh ala, tadzà à ahəŋ la mahoy à adi aña masləkaw Sufəl Zəzagəla la abà, tasəg ala la mazlakay aña Masasəđok Zəzagəla.

Mawurla aña Ene

³² La kaslà uwatà Piyer auguzàhàh la azlagudəŋ la abà gesina. Vərđi anik, ahəd à slaka azlaməna madiŋal gəl à vok uwana tadzà à ahəŋ la Lidda. ³³ La abatà dza anik uwana sləm aña Ene la ahəŋ. Magul à afik gə dagay mavay mtəgis agà la slaka mahən à ahəŋ. ³⁴ Piyer agòđal: “Ene, Yesu Kristu awur ka ala! Sà à afik, kakəl slaka mahən à ahəŋ aňak à abà!” Hadzak Ene asà à afik. ³⁵ La abatà azlaməna madz à ahəŋ la Lidda ngaha la azlauwana la vaday Saron tanəŋəŋ gesina aňatà tapəh gay la ləv ala la huma aña Sufəl Yesu.

Mawulla Dorkas à uda

³⁶ Mis anik la ahəŋ la Yope sləm aña Tabita, (Sləm uwaga la gay Gərək Dorkas, uwana asal magòday Pəkur) Masla kà adahàhà azlasləray dzəba aña səla aw gə la mazlakay kuda. ³⁷ La kaslà uwatà đuvats akəs, ngaha aməts. La mok uwana tapəlal vok kà, tahənəŋ à gəy, uwana à agu lakəl aña gəy anik. ³⁸ Uwana azlaməna madiŋal gəl à vok la Yope tatsənəŋ kà Piyer la Lidda, nekwa la gudəŋ uwaga kà, tasləlal azladza səla à tsəh la gay: “Mədəv à ka kudə, sà à waŋ à mtəga gami la katskats.” ³⁹ Piyer anəfà à atà la katskats. Mok uwana tabəzà awtəy kà, tadàla à gəy uwana à afik tahənəŋ à agu. Azlamis kudə gesina tadà à awtəy à slaka aña la mataway; tapəhalla azlanenewi, ngaha la azladebdebi uwana Dorkas atsàh à mok uwana aləg la sifa. ⁴⁰ La abatà Piyer akudəkàh azladza à uda, ngaha akəđəd à ahəŋ, adəv kudə, agolà à huma à slaka mazimnekid: “Tabita, sà à afik!”, agòđal. Tabita apəzl yewdi, uwana anəŋà à Piyer à adi, asà à afik, adzà madzay. ⁴¹ Piyer akəs à ahəl, ngaha azlakəŋ kà matsizlləŋ ala. La lig la ahəŋ Piyer azàla azlamis kudə la azlaməna madiŋal gəl à vok, apəhatàla kà agay la sifa. ⁴² Uwaga asəlla à vok la Yope gesina, ngaha azladza aňuvaw tadiŋ gəl à Sufəl Yesu à vok. ⁴³ Piyer kà asəf məŋga la gudəŋ Yope la mtəga aña Səmon, masla masəđ zlap.

10

Piyer la mtəga Korneliyus

¹ Dza la ahəŋ la Zəsare, sləm aña Korneliyus, masla kà zil Rom, məŋga aña azla-slodzi dzim aña maham à ahəŋ slodzi, uwana tazalal ala maham à ahəŋ Italiya. ² Masla awoyà Zəzagəla, asləkəw Zəzagəla la azlaməna huđ gəy aña gesina. Azlakəh azlaməna kudə uwana azlatsəhay Yahudiya, ngaha adəv kudə à Zəzagəla koksikoksi. ³ La gay mokokhu vərđi anik la sa makər, masasiŋay asasiŋla, anəŋà malika aña Zəzagəla adagay à slaka aña ngaha agòđal: “Korneliyus!” ⁴ Anərəz malika la masukulay, ngaha agòđal: “Kak uwa, Sufəl gulo?” Malika awulàlla: “Zəzagəla adatsən madəv kudə aňak la mazlakəh azlaməna kudə aňak, ngaha lagwa kà kawùllal à gəl. ⁵ Lagwa kà, sləl azladza à Yope kà mazal Səmon uwana ‘Piyer’, tagòđal. ⁶ Ahəŋay kà la mtəga Səmon masla masəđ zlap, uwana gəy aña kà la gay dərəv.” ⁷ Mok uwana malika uwaga abəđalmə, adada aña kà. Korneliyus azəl azlamagamza aña səla,

la slodzi tekula uwana anəŋlal, masla bay, awoyà Zəzagəla. ⁸ Atùgw à atà uwana apakà vok gesina, ŋgaha aslèlla atà à gudəŋ Yope.

⁹ Kiya uwaga tatsizlla ala, tahàd à Yope. La bebəŋ gà, mok uwana tazlabèz Yope kà, Piyer bay kà, ahàd à gəl gày à afik kà madəv kuɖa la tataka afats. ¹⁰ May akès Piyer, asəl mazuw tatak may. A mok uwana tadzəkà matal tatak, à uwana masasiŋay asasiŋla. ¹¹ Anəŋà zagəla apèzlla vok, ŋgaha tatak anik asà à ahəŋ: Magol məŋ tatagà bokuba peteli gay dzika ufaɖ mawaf à ahəŋ ala gà, afà à vok à vəɖah. ¹² La huɖ aŋha kà kəla tsəhay tatak asik ufaɖ la abà gesina, la azlatatak uwana taday la huɖ, ŋgaha la azlatsəhay tatak uwana tahoyay gesina. ¹³ Ama Zəzagəla agòɖal: “Sà à afik, kakəɖ, ŋgaha pàɖ zlà, Piyer!” ¹⁴ Ama Piyer agòɖ: “Awaŋ, kiya uwaga aw, Sufəl gulo, kà uwana ɖikidiki gəɖapaf tatak àlàhga aw, aslèh!” ¹⁵ Agòɖal aya: “Kapakəŋ ala bokuba àlàhga à uwana Zəzagəla adapakəŋ ala tsidəŋa aw.” ¹⁶ Uwaga adahà vok asik makər, ŋgaha la lig la ahəŋ la kirim yewdi tatak uwaga awùl à zagəla.

¹⁷ Piyer adzùgw godega aŋa uwana masasiŋay uwaga asəl mapəhalla. Ama la kaslà uwatà kà, azlaməna masləlay aŋa Korneliyus tanavahay la slaka azladza: “Lala à gày aŋa Səmon masla masaf zlap la?”, tagòɖay. Tsa mok uwaga kà, atà la gay gamagày aŋha. ¹⁸ Tazàlàh, ŋgaha tanàv: “La abanay à Səmon uwana tazalalla Piyer ahəŋay ay?” ¹⁹ Piyer alèg la madzugway aŋa masasiŋay uwaga la abà, uwana Masasəɖok Zəzagəla agòɖal: “Nəŋəŋ, azladza makər la uwaga tayàh ka la gay gamagày la uda. ²⁰ Sà à afik, dà à ahəŋ, kadaw akul nna, kokuɖa matsurəkway, kà uwana gi la uwana gəslèlla ka atà à waŋ!” ²¹ Piyer asà à ahəŋ à slaka azladza uwaga, ŋgaha agòɖ à atà: “Gəga la uwanay à uwana kayahaw gi. Mana kasawka à waŋ ma?” ²² Tagòɖal: “Məsà à waŋ kà, Korneliyus məŋga aŋa azlaslodzi dzim, la uwana aslèlla anu à waŋ. Masla kà dza dziriga, uwana azləb Zəzagəla, uwana azla Yahudiya gesina kà: ‘Dza’, tagòɖal. Malika aŋa Zəzagəla apəhal gay, kà masla aŋa mazala à ka, kà kak aŋa mapəhal uwana asa à ka mapəhal.” ²³ ŋgaha Piyer adàla atà à gày, avà à atà slaka mahən à ahəŋ. La bebəŋ gà, takès tetəvi, tahàd atà nna. Azladedə anik, la tataka azladza la abà la Yope, talakà à atà. ²⁴ La bebəŋ gà aya tabəzà Zəsare. Korneliyus babay kà adahama gay azladza à vok la azlahuɖ gày aŋha gesina kà makud atà. ²⁵ Uwana Piyer adà à gày kà, tagagəm la Korneliyus, atəɖ à huma aŋha, akəɖəɖal à ahəŋ. ²⁶ Ama Piyer akès à afik la magòɖal: “Sà à afik, gi kà bə gi dza kiya kak bay.” ²⁷ Kiya uwaga tadà à huma à gay la mabafma la abà la Korneliyus, ŋgaha tsərəh à uwana tahamə gay à vok takuday. ²⁸ Agòɖ à atà: “Kasəlaw kà zil Yahudiya aŋa madz à ahəŋ la azlatsəhay anik, kà zlazlafə, ama Zəzagəla apəh à gi kà gəpak tsəhay dza anik ala kà àlàhga, gəda à gày aŋha aw, gəgəɖay aw. ²⁹ Gay gà la uwaga mok uwana kazàlàw gi kà, gəsa à waŋ kokuɖa madzurəkway. Lagwa ma, kà mana kazàlàw gi mi?”

³⁰ Korneliyus awulàlla: “Adagay mahəŋay ufaɖ lakana, bə la kaslà uwanay gəɖəv kuɖa la mtəga gulo la sa makər aŋa mokokhu. La kirim yewdi kà, dza anik ada-tsakwəh la lukut mawutsəɖay gə la vok la huma gulo. ³¹ ŋgaha agòɖ à gi: Korneliyus, Zəzagəla atsənà madəv kuɖa aŋak, ŋgaha mazlakay aŋak uwana kazlakəh à azlaməna kuɖa adawullal à gəl. ³² Lagwa kà, sləl azladza à Yope kà mazal Səmon uwana tazalalla Piyer. Adza à ahəŋ la mtəga Səmon, masla masaf zlap, uwana gày aŋha la gay dərəv. ³³ Katskats gəsləl azladza à awtày, kà mazal à ka. Kadahəŋ delga la mas à waŋ aŋak. Lagonay kà, anu la uwanay gesina gami la huma aŋa Zəzagəla, kà matsəb sləm à uwana Sufəl apəh à ka, kà mapəh à anu gesina zlà.”

Mapəhay aŋa Piyer la mtəga Korneliyus

³⁴ Piyer adzəkà mabafma, agòɖ: “Lagwa kà, gədasəlay kà Zəzagəla kà avəh à dza mavahay aw. ³⁵ Kəla dza tsəhay uwala beyli uwana adiŋal gəl à vok, ŋgaha

adàh dziriga kà, ahədal à adi. ³⁶ Hadfay, kasəlaw kà Zəzagəla asləl gay aṅha à slaka azla Isərayel, uwaga kà gay matsidəyga à uwana məslalà vok aṅa magla lapiya la Zəzagəla, kà madegolay Yesu, uwana asəlla anu vok la Zəzagəla, uwana Sufəl aṅa dza gesina. ³⁷ Gay matsidəyga uwanay adzəkà vok la Galili, la lig aṅa batem uwana la ahəṅ Yuhana azàṅ, ṅgaha aslèhà gəl à ahəṅ la kutso Yahudiya. ³⁸ Kasəlaw à uwana Zəzagəla asləl Masasəḍok aṅha à ahəṅ, à Yesu zil Nazaret à gəl, ṅgaha kasəlaw babay, à uwana Yesu auguzàhàh la azlagudəṅ la abà gesina la madəhəṅ delga la mawar azladza uwana ala, atà la ahəl aṅa seteni. Ndzer kà, Zəzagəla agà la masla. ³⁹ Gesina gami kà, anu azlaməna sayda aṅa tatak uwana adahàhàṅ la Urusalima, la kutso aṅa azla Yahudiya la abà gesina. Takəḍ masla la mazləl à ahəl à adi. ⁴⁰ Ama Zəzagəla awùlla à uda la mamətsay la mahəṅay makər, ṅgaha avəl ndzəḍa kà mapəhla vok ala. ⁴¹ Ama azladza gesina tanəṅàṅ aw, anu uwana atsatsàmànì anu la madzəka, kà anu aṅa magay azlaməna sayda pəra, mənəṅàṅ. La lig aṅa uwana Zəzagəla awùlla à uda la mamətsay kà, məzùw, məsà la slaka gà anina. ⁴² Ṅgaha apəh à anu à vok à abà kà maz gay marabəṅ à azladza, ṅgaha kà mapəhla ala kà Zəzagəla afà Yesu à ahəṅ, kà masla seriya lakəl aṅa azladza uwana la sifa, ṅgaha lakəl aṅa azlauwana tamatsay. ⁴³ Azlaməna mapəh à atà gay à ahəl kà mapəh à azladza gesina tapəh lakəl aṅha: Kəla dza uwana adin gəl à Yesu à vok kà, Zəzagəla adàmatsalla tsakana aṅha ala, kà sləm aṅa Yesu.”

Azladza uwana azla Yahudiya aw, tabəzà Masasəḍok Zəzagəla

⁴⁴ Mok uwana Piyer aləg la maḍadma la abà kà, Masasəḍok Zəzagəla asà à gəl aṅa azladza uwana tatsəb sləm à gay aṅha gesina. ⁴⁵ Azla Yahudiya uwana tadiṅ gəl à Yesu à vok, azlauwana tanəfà Piyer à waṅ kà, ləv avàläh à atà à gay, kà Masasəḍok, uwana Zəzagəla avà à azladza uwana azla Yahudiya aw bay. ⁴⁶ Kà uwana tatsənà atà tazlèb maslay aṅa Zəzagəla la azlagay mələk gà, uwana tatəpla aw. Piyer agòḍ: ⁴⁷ “Lagwa ma məslala vok aṅa madəḍ gay à azladza uwanay à ahəṅ kà madəhatəṅ batem aṅa iyaw, tsa tabəzà Masasəḍok Zəzagəla bokuba anu ay?” ⁴⁸ Ṅgaha avà tetəvi kà madəh à atà batem la sləm aṅa Yesu Kristu. Ṅgaha tanavəl à masla aṅa madzin à ahəṅ atà nna.

11

Piyer apəhla uwana ala apaka vok la mtəga Korneliyus la huma

aṅa azlaməna madiṅal gəl à vok la Urusalima

¹ Azlaməna masləlay la azlaməna madiṅal gəl à vok uwana tadzà à ahəṅ la Yahudiya tatsənəṅ kà azladza uwana azla Yahudiya aw babay takəs gay Zəzagəla. ² Uwana Piyer adawul à Urusalima kà, azla Yahudiya uwana tadiṅ gəl à Yesu à vok taslähàla vok. ³ Tagòḍal: “Kahàd à tataka aṅa azladza uwana à abà, makadav atà à uda gà aw, ṅgaha kazùw aw tatak may akul nna?!” ⁴ Kiya uwaga Piyer adzəkà matugw à atà godega aṅha takwatokw lakəl aṅa uwana apakà vok gesina. Agòḍ à atà:

⁵ “Gi, kà gi la Yope, mok uwaga gi la madəv kuḍa la abà kà, masesiṅay asesinla gi. Gənəṅà tatak anik asà à ahəṅ la zagəla, asà à slaka gulo. Tatak uwatà kà bokuba magol peteli, mawad à ahəṅ ala gà, kəla gay dzika ufad nna, asà à ahəṅ la zagəla, asà à slaka gulo. ⁶ Gənərèz huḍ aṅha la hanəkəli kà, gənəṅà azlatatak uwana la asik ufad, azlatatak fəta la azlauwana taday la huḍ, ṅgaha la azlauwana tahoyay la zagəla.

⁷ Ṅgaha gətsənà kuda aṅa Zəzagəla agòḍ à gi: ‘Piyer, sà à afik, kəḍ ṅgaha pad!’

⁸ Ama gəwulàlla: ‘Awaṅ, kiya uwaga aw, Sufəl gulo, dikiḍiki tatak àlähga adada à gay gulo à awtəy aw, aslèh!’ ⁹ La abatà kuda uwaga atsən à ahəṅ aya: ‘Kapakà tatak uwana ala Zəzagəla adapakəṅ ala tsidəṅa kà àlähga aw!’ ¹⁰ Adhà vok asik makər,

ngaha la lig la ahəŋ, tatak uwaga awùl à zagəla gesina. ¹¹ La kaslà uwatà azladza makər tasà à waŋ à gày, uwana à abà gi lakay. Taslèlla atà à waŋ kà dagay la Zəsare kà mayàh gi. ¹² La abatà Masasəđok Zəzagəla agòđ, gənəfà atà, kakwes aw. Kiya uwaga azladedə mukwà talaka gi babay à Zəsare, gesina gami mədà à gày la mtəga Korneliyus. ¹³ Uwana Korneliyus adanəŋ anu kà, adzəkà matugw anu gay lakəl aŋa malika uwana adà à mtəga aŋha, atsizlla à ahəŋ, agòđal: ‘Sləl azladza à Yope, kà mazalay à Səmon uwana tazalalla Piyer. ¹⁴ Adəpəh à ka ala gay uwana kadàbəla la azlaməna huf gày aŋak gesina.’ ¹⁵ La abatà gədzəkà mapəh à atà. Masasəđok Zəzagəla asà à atà à gəl bokuba uwana asà à anu à gəl babay suwaŋ, dagay uwarà. ¹⁶ La abatà kà, awùl à gi à gəl lakəl aŋa uwana Sufəl Zəzagəla apəh:

'Yuhana adəhəŋ batem la iyaw, ama akul kadàbəzaw batem kà la Masasəđok Zəzagəla.'

¹⁷ Ndzer, Zəzagəla avà à atà Masasəđok aŋha bokuba uwana avà à anu à mok uwana mədīŋ gəl à Sufəl gami Yesu Kristu à vok. Ngaha ma, gi ma gi uwa, kà madəđ gay à Zəzagəla à ahəŋ uwa?" ¹⁸ Mok uwana tatsən gay uwaga kà, tadzà à ahəŋ titi, ngaha tazləbà Zəzagəla la magoday: "Haday kà, Zəzagəla adavà tetəvi à azladza uwana azla Yahudiya aw babay, kà atà aŋa mapəh gay la ləv ala, kà atà maβəzal sifa adəv gay aw, haday."

Azlaməna madiŋal gəl à vok la Antiyews

¹⁹ Azlaməna madiŋal gəl à vok taslèhà gəl à ahəŋ kà makəđ Etiyen, uwana takəđ. Azlaanik la tataka aŋatà la abà tadà à Fenesəya, ngaha à Sipəre, ngaha à Antiyews. Ama tazà gay Zəzagəla kà à azla Yahudiya pəra. ²⁰ Ama azlaməna madiŋal gəl à vok anik uwana la Sipəre la azlauwana la Səren, tahəd à Antiyews, ngaha tazà gay marabəŋ lakəl aŋa Yesu Kristu à azlauwana azla Yahudiya aw. ²¹ Ndzəđa aŋa Sufəl Zəzagəla agà la atà, azladza aŋuvaw tapəh gay ləv ala, tadiŋ gəl à Sufəl Yesu à vok.

²² Mok uwana gay uwaga adatsən à azlaməna madiŋal gəl à vok la Urusalima kà, tasləl à atà Barnabas à awtày à Antiyews. ²³ Uwana adada à awtày kà, arəb məŋga, kà uwana Zəzagəla apisà gay à azlaməna madiŋal gəl à vok à vok, kiya uwaga Barnabas adzərəđàh atà ala, kà atà aŋa mahoy yewdi aŋa Zəzagəla la manəfay la ləv tekula. ²⁴ Barnabas kà dza delga gà, mahənlaga la ndzəđa aŋa Masasəđok Zəzagəla, ngaha la madiŋal gəl à vok. Azladza aŋuvaw tanəfà Sufəl Zəzagəla.

²⁵ Barnabas ahəd kà mayàh Sawul la Tarsus. ²⁶ Uwana adabəzal, asəlla à Antiyews. Atà səla nna, tadzà à ahəŋ mavay tekula la abatà, kà atà səla aŋa matapla azlaməna gay Zəzagəla la matsetsehàh atà ala aŋuvaw la Antiyews. La uwana, azlaməna matapla tadzəkà mazalalla la sləm: Azlaməna madiŋal gəl à vok.

²⁷ La zamana uwatà azlaməna mapəh à atà gay à ahəl aŋa Zəzagəla kà mapəh à azladza, tasàhà à waŋ la Urusalima, tadàh à Antiyews. ²⁸ Tekula aŋatà uwana sləm aŋha Agabus, atsizlla ala, la ndzəđa aŋa Masasəđok Zəzagəla agòđ: "Magol may atsa à waŋ à gudəŋ à vok gesina." (Apakà vok la zamana makoray aŋa məŋ sufəl Kəlod) ²⁹ Kiya uwaga azlaməna matapla tatsənà vok gay kà kəla uwabeyuwi aŋatà avà uwana aslala vok kà masləl à azladedə uwana la may la abà la kutso Yahudiya. ³⁰ Uwana tadəh uwaga, tasləl Barnabas atà la Sawul kà madla sili uwaga à slaka azlamasiga la kutso Yahudiya.

12

Takəs Yakuba ngaha taduw Piyer à danay

¹ La zamana uwatà Sufəl Herod adzəkà matərəb azlaməna madiŋal gəl à vok, ² akəđ Yakuba, deda aŋa Yuhana la katsakar. ³ Uwana anəŋəŋ kà, akəs à azla Yahudiya à gəl kà, akəs Piyer aya. (Kaslà uwaga agà mavakay aŋa Pain uwana tatak

makəslin la tsəh aw) ⁴ Bokuba uwana akəs à azla Yahudiya à gəl, à uwana Herod akəs Piyer, aduw à danay. “Nəhəwla!”, agòd à azlaslodzi. Atà azlaslodzi tatsək ala madzəga ufađ, kəla slaka kà, slodzi ufađ ufađ, kà uwana asəl madalla à humə aña azladza à baña madəvaday Paska adədəv à gay. ⁵ Azlaslodzi tanəŋla Piyer la danay, ama azlaməna madiŋal gəl à vok tada à humə à gay la madəv kuđa à Zəzagəla la ləv tekula kokuđa masakal.

Piyer asa à uda la danay

⁶ La mahənay uwana naka Herod adala Piyer à humə à azladza, Piyer la madzəhal gə la tataka azlaslodzi səla la abə, mawođəŋ à ahəŋ gə la mazakazak səla, ŋgaha azlaməna manəŋla bay atə la slaka aŋatə la abə la gay gamagəy. ⁷ La kirim yewdi, malika aña Sufəl Zəzagəla apəhla vok ala, magol uđaka aùđ la gəy danay la aku. Malika afetekə Piyer, atsənəŋ ala, agòdal: “Sà à afik, katskats!” Azlamazakazak tanəsəl à ahəl ala. ⁸ ŋgaha malika agòdal: “Wəđ parapara aŋak à tsəh, ŋgaha wəđfəhə kwimik aŋak!” Piyer ađahəŋ kiya uwaga, ŋgaha malika agòdal: “Dùw dəbdebi aŋak à vok, ŋgaha kə nəfə gi!” ⁹ Piyer asə à uda la gəy danay la aku la manəf malika. Asəl kə uwaga malika ađehəŋ kə dziriga aw. Gəl aŋha agòd kə: ‘Məsəŋay la uwana asəŋla à gi’, agòd. ¹⁰ Tatsəd à azlaslaka azlaməna manəŋla terəŋa la vok ala, azlaməsəla la vok ala, ŋgaha tabəzə à gay gamagəy aña adə à vok, adə à huđ gudəŋ. Gamagəy uwaga apəzlla vok la ahəl aŋha la humə aŋatə, ŋgaha tasə à uda. Tadə à baramə à ama. La abatə malika asək à Piyer à ahəŋ.

¹¹ Uwana Piyer adavəh gəl ala lakəl aña uwana apakə vok kə, agòd: “Ndzer, Zəzagəla asləl malika aŋha à waŋ kə mapəl gi ala la ahəl aña Herod, ŋgaha la mawisiga uwana la abə gesina azla Yahudiya tayəhla gi kə madəhŋəŋ à vok gesina.”

¹² Uwana adavəh gəl ala kə, ahəd à mtəga Mariyama, iyə aña Yuhana uwana tazalalla Mark, la slaka uwana azladza aŋuvaw tahamə gay à vok kə madəv kuđa. ¹³ Piyer atsizlla à gay gamagəy ađəđəŋ, ŋgaha masla sləray misga, uwana sləm aŋha Rode, azə vok à gay gamagəy à huđ kə mapəzlay. ¹⁴ Katskats asəl kuđa aña Piyer, arəb məŋga, ama apəzl gamagəy aw aduw vok à gəy, kə mapəh à azladza kə Piyer la uda la gay gamagəy. ¹⁵ “Kak kusuŋu!” Ama masla kə, agəđəŋ afik ndzer kə, bə masla. ŋgaha tagòdal: “Uwaga malika aŋha!” ¹⁶ Tekedik Piyer asək à madəđ à gay gamagəy aw. Uwana tapəzl gamagəy tanəŋəŋ kə, tsa masla, ləv avələh à atə à gay gesina. ¹⁷ Piyer adzilə ahəl à zagəla, akokòt à atə à ahəl à adi, kə atə aña madz à ahəŋ titi, ŋgaha adzəkə matugw à atə uwana Sufəl Zəzagəla ađahəŋ kə masəla à uda la danay la abə. Agòd à atə aya: “Kadəpəhaw à Yakuba, ŋgaha à azladedə anik aya babay.” La lig la ahəŋ, asə à uda, adə aŋha à slaka anik.

¹⁸ Uwana məl adawulla kə, gəl akəđ à azlaslodzi à vok: “Kakay Piyer adə aŋha ma?”, tagòdəh à vok. ¹⁹ Herod ayəh, ama abəzal aw. Anavəh azlaməna manəŋla la gay ala, ŋgaha avə tetəvi kə makəđ atə. La lig la ahəŋ masla à Herod ahəd, adzə à ahəŋ la Yahudiya ŋgaha la Samariya.

Mamətsay aña Herod

²⁰ La mok uwatə kə, azlaməna gudəŋ Tir la azla Sədon tayəh matsən vok gay la Herod, kə uwana la abatə la uwana tabəz tataka may aŋatə. Kə uwana Herod la mapək ləv gə lakəl aŋatə. Tasə à waŋ, takəs dza anik uwana à ahəl, masla manəŋla huđ gəy aña Sufəl, uwana sləm aŋha Bəlastus. ŋgaha tahəd à slaka Herod kə manav məsəl vok. ²¹ La abatə Herod akədəv à atə kaslə à ahəŋ, kə mapəh à atə gay. La mavakay uwatə, atsəkəw à lukut sufəl aŋha à abə, ŋgaha adzə madzay la kursi sufəl aŋha la afik, ŋgaha apəh à atə gay la kuđa zləkkə. ²² Maham à ahəŋ dza agòd: “Uwaga kə mabəđma aña dza asik aw”, tagòd, “Ama aña zəzagəla.” ²³ Uwana Herod atsənə

uwaga kà, adəđ à gay ləv. Gay gà la uwaga malika aña Zəzagəla adùwal dıvats à gəl, maduwari azùw à gay, ɲgaha aməts, kà uwana azləbà gəl aña bokuba Zəzagəla.

²⁴ Kiya uwaga gay aña Sufəl Zəzagəla azigən kaykay aya.

²⁵ Mok uwana Barnabas atà la Sawul tadəvla sləray aña atà à gay la gudəɲ Urusalima, tawùl à lig ɲgaha tazəb Yuhana uwana à tsəh, tazalalla Mark.

13

Tahəl azla Barnabas atà la Sawul kà mad mad'ah sləray

¹ La tataka maham à ahəɲ məna gay Zəzagəla la abà la Antiyews kà, azlaməna mapəh à atà gay à ahəl la ahəɲ kà mapəh à azladza, ɲgaha la azlaməna matapla: Barnabas, Səmeyyon uwana sləm aña marsiga, Lutsəyus zil Səren, la Manayen uwana tazigən la slaka gà la Herod sufəl, ɲgaha Sawul. ² La vərđi anik, uwana tadəv kufə à Zəzagəla la makəs nəlay, Masasəđok Zəzagəla agəđ à atà: “Bəkàw gi, azla Barnabas atà la Sawul à fəta à awtəy kà mahəneɲ sləray uwana ala, gəzàlla atà ala.” ³ Uwana takəđ gəl à madəv kufə la makəs nəlay, tabək atà à ahəl à gəl, ɲgaha tasləl atà à sləray à abà.

Barnabas atà la Sawul la gudəɲ Sipəre

⁴ Bokuba uwana Masasəđok Zəzagəla asləl azla Barnabas atà la Sawul, tahəd à gudəɲ Səloysəya, la abatà tahəd à kəslah iyaw à afik kà maday à gudəɲ uwana à afik la tataka iyaw la abà, sləm aña Sipəre. ⁵ Mok uwana tabəzay à Salamin, tadzəkà mapəh gay Zəzagəla la azlagəy madəv kufə aña azla Yahudiya la aku, Yuhana, uwana tazalalla Mark, azlək atà la sləray.

⁶ Taguwà à uda la gudəɲ uwatà la abà tsərəh à Pafos. La abatà tabəzà məzla anik à gəl uwana sləm aña Bar-Yesu, zil Yahudiya. “Gi masla mapəh à gi gay à ahəl”, agəđ, ama tsa fida. ⁷ Masla kà tasəl vok lela la sufəl aña gudəɲ uwatà. Sləm aña sufəl uwatà kà Sergiyus Pawlus, masla makor hanəkəli. Sufəl uwaga azàla Barnabas atà la Sawul kà matsən gay Zəzagəla la slaka aña atà. ⁸ Ama məzla uwatà (Uwana tazalalla Elimas la gay Gərək) akəs atà aw. Ayəh madəđ gay à sufəl à ahəɲ kà matsən gay Zəzagəla, kà masla aña madiɲal gəl à vok aw. ⁹ Kiya uwaga Sawul uwana tazalalla Pol babay, agà mahənlaga la Masasəđok Zəzagəla, atsək yewđi à məzla uwaga à gay. ¹⁰ ɲgaha agəđ: “Kak đemđem kahənlə la makəsafər, kak kona aña seteni. Kak masla məzam aña tatak delga aña Zəzagəla gesina, kadəsakal à tsəh ala, ma mbà à mawis dziriga aña Sufəl Zəzagəla ala ma? ¹¹ Gəgəđ à ka, tsənəɲ lagwa Sufəl Zəzagəla adəđ kà: Kapək guləf, kanəɲla aw la tataka mahəney anik la abà aya aw.” Katskats yewđi aña Elimas apək mərəzlakka tabəđamma bokuba la vəđ, taptap ayəh dza kà makəs à ahəl. ¹² Uwana sufəl anəɲà uwaga apakà vok kà, adinə gəl à Zəzagəla à vok. Gay aña Sufəl Zəzagəla adəl à ləv à tsəh kaykay.

Pol atà la Barnabas la Antiyews la kutso Pisədiya

¹³ La abatà azla Pol tasà à uda la gudəɲ Pafos, tahəd à kəslah iyaw à afik kà mad à Perge la kutso Pamfliya. La abatà la uwana Yuhana, uwana tazala Mark bay, asək atà à tsəh ala, awùl à Urusalima. ¹⁴ Tatsilla ala la asik, dagay la Perge tahəd à Antiyews la kutso Pisədiya. La vud maduw ləv tahəd à gəy madəv kufə à agu, tadzəhà madzay. ¹⁵ Mok uwana tadzeɲay la wakitə mapəhay aña azlaməna mapəh à atà gay à ahəl la abà, mənğa aña gəy madəv kufə azəl à atà: “Azladeda, baña akul la gay kà mapəh à maham à ahəɲ dza, kà madzərəđəh atà ala kà kaslawwəla vok aña mapəhay lagwa à dagay.” ¹⁶ Pol atsizilla ala, adziyla ahəl à zagəla, agəđ à atà: “Akul azla Isərayel la azlatsəhay dza anik uwana kasləkawaw Zəzagəla, tsəbàw gi sləm! ¹⁷ Zəzagəla aña tsəhay gami Isərayel uwana atsatsəmənì azlababa gami madzidziga, azigənà tsəhay

aŋha, mok uwana atà la məlok la Misəra, kiya uwaga asəlla atà à uda la Misəra la ndzəfa aŋha mənğa. ¹⁸ Adzadzàr atà la kəsaf la abà mavay dzik ufađ. ¹⁹ Azàŋ ala makoray məđəf la kutso Kanana, avà kutso uwatà à tsəhay aŋha. ²⁰ Uwaga gesina adahàŋ bokuba mavay dadərmokw ufađ bəzi aŋha dzik zlo.”

“La lig aŋa uwaga la ahəŋ, Zəzagəla abək azlaməna seriya à azlababa gami madzidziga à ahəŋ, tsərəh à zamana aŋa masla mapəhal gay à ahəl Samuyel. ²¹ La lig la ahəŋ kà, tanavà maf à atà sufəl à ahəŋ ŋgaha Zəzagəla af à atà Sawlu à ahəŋ, kona aŋa Kis, uwana asà à uda la tsəhay aŋa Benyamin la abà, akòr mavay dzik ufađ. ²² La lig la ahəŋ, Zəzagəla akweska Sawlu, afà à atà David à ahəŋ kà sufəl. Apəh gay lakəl aŋha, agòđ: ‘Gedabəzal David kona Isay, dza uwana asà à ləv gulo, ŋgaha adəfahgəŋ uwana asa à gi gesina.’ ²³ Tekula la mayyi à tsəh ala aŋa David kà Yesu, à uwana Zəzagəla apakàŋ ala kà masla mabəl azlatsəhay aŋha Isərayel, kiya uwaga à uwana apəh à ahəŋ dagay uwarà. ²⁴ Mok uwana Yesu à lig mas à waŋ kà, Yuhana agòđ: ‘Azla Isərayel, pəhàw gay la ləv ala, ŋgaha tadəhakullaŋ batem!’, agòđ à atà. ²⁵ La kasla uwatà à uwana, Yuhana adabəz makəđ gəl à ahəŋ sifa aŋha kà, agòđ à atà: ‘Gi uwa, kagəđaw uwa? Gi kà, gi dza uwana kakudaw aw. Ama fàw à sləm à abà, kà masla anəfa gi à tsəh à waŋ ŋgaha baməraaka gi kà gəsla kà mapəl suwid kwimik aŋha uwana ala, la asik aw.’ ²⁶ Azladedə, akul mayyi à tsəh ala aŋa Abəraham la azladza anik uwana kasləkawaw Zəzagəla. Gay aŋa mabəlay uwanay asəlla kà à slaka gami. ²⁷ Ama azlaməna madz à ahəŋ la Urusalima, la azlaməŋga aŋatà kà, tatsənà godega aŋa Yesu aw, ŋgaha bay tatsənà mapəhay aŋa azlaməna mapəh à atà gay à ahəl uwana tadzəŋəh la azlagəy madəv kuda la aku kəla vuđ maduw ləv aw. Ama tagəđà gay uwaga à afik la makəđ Yesu. ²⁸ Amiyaka tabəzà tetəvi kà madukwlaŋ à ahəŋ kà makəđay aw, bay kà tanavà Pilatus kà makəđay. ²⁹ Uwana tadəv uwana à gay tadəhəlləŋ à vok wakità Zəzagəla apəh lakəl aŋha gesina kà, tazəb à ahəŋ la ahəl la adi, tafà à zəvay à agu. ³⁰ Ama Zəzagəla awùlla à uda la mamətsay. ³¹ Azlamavakay aŋuvaw apəhla vok à azlauwana tanəfà à waŋ la Galili tsərəh à Urusalima. Lagwa kà, atà la uwana azlaməna sayda aŋha la slaka azla Isərayel. ³² Anu la gəl gami mədasa à akul ala gay marabəŋ uwanay. Zəzagəla apəh à azlababa gami madzidziga, azla Yahudiya à ahəŋ. ³³ Adagəđəŋ à afik lagonay kà, anu azlamayyi à tsəh ala aŋha. La mawulla Yesu à uda la mamətsay, bokuba uwana tatsətsər à wakità aŋa mahabay masəla la abà:

'Kak bəzi gay ləv gulo,

Lakana gədayyi ka.'✠

³⁴ Aganay babay uwana Zəzagəla apəh à ahəŋ lakəl aŋa mawulla à uda aŋha la mamətsay, kà masla aŋa mazinla aw.

'Ndzer, gədəpisakulla gay à vok la ahəl gulo bokuba

Uwana gəpəh à David à ahəŋ uwarà.'

³⁵ Gay gə la uwaga David agòđ la azlaslaka anik la abà:

'Iyay, kadəsaka dza aŋak la slaka mamətsay aw, kà mazinla aŋa dza aŋak aw.'✠

³⁶ David kà, masla kà adəhà uwana asà à Zəzagəla tsərəh à mamətsay aŋha, tallà à makəla aŋa azlababa gami madzidziga ŋgaha azin ala. ³⁷ Ama dza uwana Zəzagəla awùlla à uda la mamətsay kà, azin ala aw. ³⁸⁻³⁹ Azladedə, delga kasəlaw, anu məzə-kullaŋ kà, kà la Yesu la uwana Zəzagəla aməts tsakana à azladza ala. La masla la uwana Zəzagəla agəŋ azlauwana tadin gəl à masla à vok sətaka, kà uwana mapəhay aŋa Musa kà asla aw. ⁴⁰ Lagwa kadəhaw hanəli lakəl aŋa uwana azlaməna mapəh à atà gay à ahəl tapəh kà aŋa mazəb akul aw:

✠ 13:33 13.33 Mahabay 2.7 ✠ 13:35 13.35 Yesayya 55.3; Mahabay 16.10

⁴¹ 'La kaslà aṅkul gədàfehəṅ sləray anik. Akul uwana kapəsewaw gay aṅa Zəzagəla, nərəzaw zlà, kul azlaməna mapəsew gay Zəzagəla, ləv aval à kul à gay, kamətsaw à gay kà sləray uwana gədada à ahəṅ la zamana aṅkul, kà uwana amiyaka tatapəhakulla godega aṅha bay kà naka kakəsaw aw.'"

⁴² Mok uwana Pol atà la Barnabas tasà à lag la gày madəv kuḍa la aku kà, tagòḍ à atà kà, tadàwul à waṅ la vuḍ maduw ləv anik aya kà mapəh à anu lakəl aṅa uwaga aya gotənaṅ, tagòḍ à atà. ⁴³ Mok uwana azladza taslèh ala, aṅuvaw la tataka azla Yahudiya la abà, ṅgaha la azlauwana tabəḍla vok à tsəhay Yahudiya à abà, tanəfà Pol atà la Barnabas. Azla Pol tadzərəḍhàtala kà matsizl à delga uwana à afik, Zəzagəla asəl maḍahatəṅ.

⁴⁴ La vuḍ maduw ləv azladza la gudəṅ uwatà gesina tahamà gay à vok kà matsən gay Sufəl Zəzagəla. ⁴⁵ Uwana azla Yahudiya tanəṅə maham à ahəṅ dza kiya uwaga kà, atà maṅor akəsà atà, tafà guvəl à uwana à adi Pol apəh, ṅgaha tatsəkəl magoḍahay à Pol à gəl. ⁴⁶ Pol atà la Barnabas tagòḍ à atà la paraka: "Azlayla kà vok, kà gay Zəzagəla agay mapəh à kul gə dadəṅ. Ama tsa kakwesawka gay sifa adəv gay aw kà, məday mədəziṅ à azladza uwana azla Yahudiya aw zlà. ⁴⁷ Aganay mafàh akur à ahəṅ, uwana Sufəl Zəzagəla afàhà à gi à lig, agòḍ:

'Gəfà à ka à ahəṅ, kà ka aṅa magay uḍaka aṅa azladza, kà ka aṅa maz gay maḍəlay à azladza uwana la makəḍ gəl à ahəṅ gudəṅ à vok gesina.'"

⁴⁸ Mok uwana azlauwana azla Yahudiya aw tatsən uwaga kà tarəb. Tadzəkə mazləḍ gay aṅa Sufəl. Azlauwana Zəzagəla atsatsəmàni atà gesina kà, atà aṅa maḍəz sifa adəv gay aw kà, tadiṅal gəl à vok.

⁴⁹ Gay Sufəl Zəzagəla aslèhà gəl à ahəṅ la kutso uwatà la abà gesina. ⁵⁰ Ama azla Yahudiya tavətsàhəh azlamis uwana ala sləm aṅatà la ahəṅ, azlauwana tasləkəw Zəzagəla, la azlagadamola aṅa gudəṅ uwatà gesina, ṅgaha tayàh azla Pol la magazlay tsərəh à uwana takuḍəkəh atà à uda la makoray aṅatà la abà. ⁵¹ Azla Pol atà la Barnabas tagòḍ: "Gay gami la abà aw", tagòḍ. Tadèḍ à atà burburu aṅa gudəṅ aṅatà à adi, ṅgaha tahàd aṅatà à Ikoniyum. ⁵² Baməraaka takuḍəkəh azla Pol la Antiyews bay kà, azlaməna matapla la gudəṅ uwatà tagà la marabay, ṅgaha tahənà ala la Masasəḍok Zəzagəla.

14

Pol atà la Barnabas la Ikoniyum

¹ Uwana Pol atà la Barnabas tabəzà Ikoniyum, tahàd à gày madəv kuḍa à agu, bokuba uwana tadəhəṅ la Antiyews babay, tsərəh à uwana gay mənḡa aṅa azla Yahudiya la azlauwana azla Yahudiya aw tadiṅal gəl à vok. ² Ama azla Yahudiya uwana takweska madiṅal gəl à vok, tavədzàhəhà azladza uwana ala, atà azla Yahudiya aw, kà atà aṅa madzugw mawisiga lakəl azladedə uwaga. ³ Pol atà la Barnabas tadzà à ahəṅ mənḡa la Ikoniyum, tapàh gay Sufəl Zəzagəla la dazuwaya. Tazà gay lakəl aṅa vok mahamay aṅha, ṅgaha Sufəl avà à atà ndzəḍa kà maḍàh azlamasəlay la azlanadzipo, kà mapəhla ala kà gay aṅatà kà dziriga. ⁴ Azladza gudəṅ uwaga tatsəkə ala. Azlaanik tagà aṅa azla Yahudiya, ṅgaha azlaanik tagà aṅa azlaməna asik.

⁵ Azla Yahudiya la azladza uwana azla Yahudiya aw, la azlasufəl aṅatà, tadəhà vok à ahəṅ kà matəreḍ azla Pol kà aṅa makəḍ atà la matsàh atà la akur. ⁶ Uwana azla Pol tadatsən uwaga kà, tahòy aṅatà, tanəfà tetəvi uwana adà à Lisətəra la Derbe, la makoray aṅa Likawoniya la abà. ⁷ Tadzəkə maz gay marabəṅ à azladza la abatà.

Pol atà la Barnabas la Lisətəra

✧ 13:47 13.47 Yesayya 42.6; 49.6

⁸ La Lisətəra dza anik la ahəŋ adzà à ahəŋ kà la slaka madza madzay, kà uwana magul à afik gə dagay mayyay, aslala vok adaday la asik aŋha, amiyaka asik tekula aw. ⁹ Vərđi anik kà, atsəb sləm à uwana Pol apəhay. Pol atsəkəkal yewđi à gay ŋgaha anəřəz kà masla la madiŋal gəl à vok, aslala vok kà mawurla. ¹⁰ Kiya uwaga agòđal, la kuda zləkkà: “Sà à afik, tsizlla à asik aŋak à gay, dzawwa!” Hadzak, dza uwaga atsizlla à asik aŋha à gay, adzəkà maday. ¹¹ Uwana maham à ahəŋ dza adanəŋ uwaga Pol adahəŋ kà, tadzəkà mawiyay la gay gudəŋ aŋatà, gay Likawoniya: “Azlazəzagəla kà, tadapakàh azladza gə adagay, ŋgaha tasà à tataka gami à abà la vəđah!” ¹² Tazàla à Barnabas Tsoys, sləm aŋa mazlazlay aŋatà, ŋgaha Pol bay kà, Herməs tagòđal, kà uwana masla kà masla mapəh gay. ¹³ Masla mav tatak à Zəzagəla Tsoys, uwana la slaka mazlazlay kà, la gay gamagəy aŋa mad à gəy à huđ gudəŋ, asəlla azlakokur à waŋ, tatsafəđəh atə gəl à uda la azlamawuratatay à gay gamagəy aŋa gəy mazlazlay, asəl kà maham à ahəŋ dza takəđ tatak à azla Barnabas atə la Pol. ¹⁴ Mok uwana tatsən uwaga, takohàhà lukut à vok, tahòy à tataka maham à ahəŋ dza à abà la mawiyay: ¹⁵ “Azlaslawda, kà mana kadahəw uwanay mi, anu bay kà anu azladza asik bokuba akul miya! Məsà à akul ala gay marabəŋ à waŋ kà mawulla akul à gəl kà akul masak azlamazlazlay deydayga uwana kanəfaw lagwa, ŋgaha kà akul magola vok à slaka Zəzagəla, uwana la sifa, masla uwana adahə zagəla la kutso, la azlamukwà ŋgaha la azlatatak uwana la abà gesina!✧ ¹⁶ La zamana uwana uwarà kà, asək azlatsəhay gesina kà manəf tetəvi aŋa gəl aŋatà. ¹⁷ Tekedik kà, apəlla vok à azladza la azlasləray aŋha dzəba aŋha səla aw gə uwana adəhəŋ: Asùw akul iyaw, kaləw tatak la kaslā aŋha, avà à akul tatak may ŋgaha ahənà ləv akul ala la marabay.” ¹⁸ Baməraka la mapəhay kiya uwaga babay kà, la zlazladfa tadəđ gay à maham dza à ahəŋ kà makəđ tatak.

¹⁹ La kaslā uwatà, azla Yahudiya anik tasà à waŋ la gudəŋ Antiyews la kutso Pisədiya ŋgaha la Ikoniyum. Tavədzàh à tsəh azlamaham à ahəŋ dza à afik, tatsàh Pol la akur kà makəđay, ŋgaha tasəpəř à uda la gudəŋ la abà kà uwana tadzùgw kà: ‘Adamətsay’, tagòđ. ²⁰ Ama uwana azlaməna madiŋal gəl à vok tahamà gay à vok lakəl aŋha kà, asà à afik, awùl à gudəŋ à abà. La bebəŋ gə kà, tahàd à Derbe atə la Barnabas.

Mawul à waŋ la Səriya kà mad à Antiyews

²¹ Pol atə la Barnabas tazə gay marabəŋ la Derbe la slaka uwana tabəzà azladza aŋuvaw kà aŋa Yesu. ŋgaha tawùl à Lisətəra, à Ikoniyum, à Antiyews uwana la kutso aŋa Pisədiya la abà. ²² Kəla gudəŋ uwana tadàhà à abà kà, tadzəřəđəhà azlaməna madiŋal gəl à vok ala, kà matsizl à madiŋal gəl à vok à afik. “Hadəy kà, mad à makoray Zəzagəla kà, say maguw à uda kà la azlamagol ŋgəřpa la abà dadəŋ.” ²³ La kəla maham à ahəŋ məna gay Zəzagəla kà, tatsatsəmàhàni azladza kà mapak atə ala kà azlamasiga. ŋgaha takəs nəlay, tadəv kuđa kà aŋa azlaməna madiŋal gəl à vok, ŋgaha tabək à atə à ahəl aŋa Sufəl Zəzagəla, à uwana tadiŋal gəl à vok, tadə aŋatà.

²⁴ Tagùw à uda la kutso Pisədiya la abà ŋgaha tabəzà kutso Pamfiliya. ²⁵ Tazə gay Zəzagəla la Perge, la lig la ahəŋ tahàd à Ataliya. ²⁶ Dagay la abatà tadə à kəslah iyaw à afik, tahàd à Antiyews la gudəŋ uwatà la uwana tabək à atə à ahəl aŋa Zəzagəla, kà masla mav à atə vok mahamay kà aŋa sləray aŋha, sləray uwaga kà tahənəŋ ala lagwa.

²⁷ Mok uwana tabəzay à Antiyews, tahamà gay azlaməna madiŋal gəl à vok à vok gesina, ŋgaha tatùgw à atə uwana apakà vok la atə gesina, uwana Zəzagəla adahəŋ la atə, la mapəzl tetəvi à azladza uwana azla Yahudiya aw, kà atə aŋa madiŋal gəl à vok babay. ²⁸ Tadzà à ahəŋ məŋga la azlaməna madiŋal gəl à vok la abatà.

✧ 14:15 14.15 2Musa 20.11; Mahabay 146.6

15

Maham gay à vok la Urusalima

¹ Azladza anik tasà à wan̄ la Yahudiya, tahàd à Antiyews, tagòd à azladedà: “Kaslawwalla vok kà mabəlay aw, say baña kakədəvwaw vok à uda, bokuba uwana mapəhay aña Musa apəh dən̄.”[✧] ² Pol atà la Barnabas takəs aw, tabayà vok gay lakəl aña uwaga. Tasləl Pol atà la Barnabas ngaha la azladedà anik la Antiyews, kà madla atà à Urusalima kà mapəhay lakəl aña gay uwaga la azlaməna matapla la slaka aña Yesu, la azlamasiga.

³ Kiya uwaga azlaməna madiñal gəl à vok tasləl atà. Taguwà à uda la Fenesəya la Samariya la mapəhla ala gay magola vok aña azlauwana azla Yahudiya aw à slaka Zəzagəla. Gay mawga uwaga kà, avà marabay à azladza gesina. ⁴ Mok uwana tabèz à Urusalima, azlaməna matapla la slaka aña Yesu, la azlamasiga, ngaha la azlaməna madiñal gəl à vok takəs atà la ahəl səla, ngaha azla Pol tapəh à atà tatak uwana Zəzagəla adahàn̄ la atà gesina. ⁵ Ama azlaməna madiñal gəl à vok anik, uwana taguwà à uda la maham à ahəñ aña azla Farisəya la abà kà, tagòd kà: “Say makadav azlaməna madiñal gəl à vok uwana à uda azla Yahudiya aw, ngaha mətapatàla aya makəs mapəhay aña Musa dadən̄ kəla.”

⁶ La abatà azlaməna matapla la slaka aña Yesu, la azlamasiga tahamà gay à vok kà manərəz gay uwaga. ⁷ La lig mavats gay mən̄ga uwaga la ahəñ, Piyer asà à afik, agòd: “Azladedà, kasəlaw kà Zəzagəla akəsàni gi la tataka an̄kul la abà dagay uwarà, kà gi aña maz gay marabəñ à azladza uwana azla Yahudiya aw. Kà atà aña matsənəñ, ngaha kà atà aña madiñal gəl à vok bay. ⁸ Zəzagəla uwana masla masəl madzugway aña ləv aña azladza gesina, apəhla ala kà awoyà azladza uwaga babay, avà à atà Masasədok aña bokuba uwana avà à anu babay. ⁹ Zəzagəla avàhànula la atà aw: Agà ləv aña sətaka, kà uwana tadiñal gəl à vok. ¹⁰ Ngaha ma, kà mana lagonay kà, katàpàw Zəzagəla la maf atà magol mahanay mən̄ga à gəl ma? Baməraka anu, la azlababa gami madzidziga kà məslàla vok aña mazəbay tekedik aw ma? ¹¹ La madiñal gəl à Sufəl Yesu à vok kà, vok mahamay aña la uwana mədabəlay, kiya uwaga babay la atà aw takay?”

¹² Kiya uwaga maham à ahəñ dza adzà à ahəñ titi, tatsəb sləm à Barnabas atà la Pol uwana tapəh à atà azlanadzipo uwana Zəzagəla adahàn̄ la ahəl aña atà la tataka aña azladza uwana la abà, azla Yahudiya aw. ¹³ Mok uwana takəd̄ gəl à mabəfma, Yakuba abəd̄ à gay à gay agòd: “Azladedà, tsəbàw sləm dən̄! ¹⁴ Səmon atùgw lakəl aña Zəzagəla bokuba uwana akəs azladza uwana azla Yahudiya aw, dagay la mok uwana Zəzagəla akəsàni azladza anik aña atà, kà atà magay azlaaṅha. ¹⁵ Ngaha mapəhay aña azlaməna mapəh à atà gay à ahəl agagəm la uwaga. Kiya uwana matsetseray agòd:

¹⁶ 'La lig aña uwaga la ahəñ, Sufəl Zəzagəla agòd: 'Gədàwul à wan̄,
Gədəñal ṅvagay aña David uwana akàlàh à ahəñ,
Gədətsizl uwaga ala.

¹⁷ Ngaha kà pəra, azladza gesina kà mayàh gi.'
Sufəl Zəzagəla agòd.

'Tsəhay gesina uwana gəzəl atà, atà magay azlagulo.'

¹⁸ Kiya uwaga à uwana Sufəl Zəzagəla agòd, à uwana apəhla uwaga ala dagay uwarà la viyaṅu.'"[✧]

¹⁹ Gay gə la uwaga Yakuba azàlən̄ à gəl, agòd: “Gi kà madzugway gulo kà, asa à gi makad̄ gəl à azlatsəhay anik uwanay à vok tagolà vok à slaka Zəzagəla aw. ²⁰ Ama ṅlēm mətsetser à atà, kà tapad̄ sləb uwana tadəhla matuwlay la mazlazlay aw,

kà uwana uwaga kà mawisiga, tadjahàh mabila aw, tapad tatak uwana tasùfàñ ala masufay aw, tasa aniz aw, kà uwana uwaga kà mawisiga.* 21 Kay dagay uwarà kà, azladza tapàh mapəhay anja Musa la kəla gudəñ anja tadjəñàh la kəla vud maduw ləv la gày madəv kuɗa la aku!”

Wakità uwana tasləl à azlaməna madiñal gəl à vok

uwana azla Yahudiya aw

22 Kiya uwaga azlaməna matapla la slaka anja Yesu, la azlamasiga, la azlaməna madiñal gəl à vok takəs matsatsamani azladza anik la tataka anjata la abà kà, kà masləl atà la azla Pol la Barnabas à Antiyews. Yahuda uwana tazalalla Barsabas atà la Silas, atà səla nna azlaməna madiñal gəl à vok masəl atà gə. 23 Tasləl atà la wakità uwaga la ahàl:

“Anu azlaməna matapla la slaka anja Yesu, la azlamasiga la uwana mətsetser à akul. ‘Ayyi’, məgod à akul, akul azlaməna madiñal gəl à vok, uwana akul azla Yahudiya aw la Antiyews ngaha la azlauwana la kutso Səriya la Səlisəya. 24 Mətsənəñ kà azladza anik tasà à uda la tataka gami la abà la abanay, tadà à awtày kà makadəkulla gəl à vok, ngaha la mav à akul madzugway la gay anjata. Anu kà, məpəh à atà gay à ahàl lakəl anja uwaga aw. 25 Gay gə la uwaga, gesina gami, məkàsàni azladza kà masləl à akul à awtày, talakà azladedə gami mawoy atà gə uwaga à awtày Barnabas atà la Pol, 26 uwana tadùw sifa anjata ala kà sləray anja Sufəl Yesu Kristu. 27 Məsləl akul azla Yahuda atà la Silas à awtày, tadəpəh à akul lakəl anja uwana mədətsetseray la abanay lagwa. 28 Akəs à Masasəɗok tsikasla la gəl anu gesina gami, məkəs kà manəf akul, akəs à maham à ahəñ anik à gəl aya aw, say uwanay məpəh la uwana akəsà vok pəra. 29 Kapadaw sləb matulay aw, la anja mazlazlay aw; kasaw aniz aw, kapadaw sləb anja tatak uwana tasufay ala masufay aw, kadaw à gəl gaw aw. Baña kasakaw uwaga la tsəh ala gesina kà, kà kadahàw delga. Mədzà à ahəñ wurwur zlà!”

30 Mok uwana tavà à atà wakità uwaga: “Dàw zlà!”, tagòɗ à atà. Azlaməna masləlay tahàd, tabəzà à Antiyews. La abatà tahamə gay azlaməna madiñal gəl à vok à vok gesina, ngaha tavà à atà wakità uwatà. 31 Atà tadjəñ, ngaha adzərəɗəhàtəla, tarəb kaykay lakəl anja! 32 Yahuda atà la Silas tagə azlaməna mapəh à atà gay à ahàl kà mapàh à azladza, la gəl anjata tavəts gay mənğa la azladedə kà madzərəɗəh atà ala la mav à atà ndzəɗa. 33 Uwana tasafay la abatà, azladedə talakà atà: “Dàw la wurwur zlà!”, tagòɗ à atà, ngaha tawùl à slaka azladza uwana tasləlla atà à wan. ((34 Ama Silas kà, kà ayàh madz à ahəñ la abatà.))

35 Tekedik Pol atà la Barnabas tasəf la Antiyews, La azladza anik anuwaw, tapàhàhla azladza la maz gay anja Sufəl Zəzagəla.

Pol atà la Barnabas tavàh vok ala

36 Uwana tadadza à ahəñ nuv, Pol agòɗ à Barnabas: “Məwùlàw, mədànanaw azladedə à gay la azlaslaka uwana məzàhàw gay anja Sufəl Zəzagəla, kà anu anja masəl madz à ahəñ anjata.” 37 Barnabas kà, asəl madla Yuhana uwana tazalalla Mark la tsəh. 38 Ama Pol akəs kà madalla aw, kà uwana vərđi anik kà, asək atà à ahəñ la kutso Pamfiliya, awùlla atà à tsəh ala la sləray anjata la abà. 39 Mapak ləv adà à tataka anjata à abà. Tavàhàla tsərəh à uwana Barnabas azəb Mark, tahàd à kəslah iyaw à afik kà maday à Sipəre. 40 Pol azəb Silas. Ngaha azlaməna madiñal gəl à vok tadəv kuɗa kà atà, kà Zəzagəla anja mavàhàh à atà vok mahamay anja, ngaha tatzilla ala. 41 Pol ahàd à kutso Səriya la Səlisəya, adzərəɗəhà azlaməna madiñal gəl à vok ala la madiñal gəl à vok la abà.

* 15:20 15.20 2Musa 34.15-17; 3Musa 17.10-16; 18.6-23

16

Timotawus alak azla Pol atà la Silas

¹ Pol abəzà Derbe ɲgaha à Lisətəra. La abatà masla madiɲal gəl à vok anik la ahəɲ, sləm aɲha Timotawus. Iyà aɲha kà dæg zla Yahudiya, masla madiɲal gəl à vok. Ama baba aɲha kà tsəhay zil Gərək. ² Azladedə uwana la Lisətəra ɲgaha la Ikoniyum gesina kà, tafà madzugway aɲatà kà à masla à afik. ³ Pol asəl mazəb Timotawus kà magay manalay aɲha. Kà maday atà səla kà, akədəv à uda dadəɲ. Adfahəɲ kiya uwaga kà, kà uwana azla Yahudiya uwana tadzà à ahəɲ la abatà gesina kà, tasəl kà baba aɲha Timotawus kà zil Yahudiya aw. ⁴ Kəla gudəɲ uwana tagùwàh la abà kà, tapàh à azlaməna madiɲal gəl à vok, tatak uwana azlaməna matapla la slaka aɲha Yesu, la azlamasiga la Urusalima tapəh, ɲgaha tafàh à atà akur à lig kà makəs mapəhay uwatà lela. ⁵ Kiya uwaga məna madiɲal gəl à vok tadzərədfàhà ala la madiɲal gəl à vok la abà, ɲgaha matugway aɲatà azàhàla vok à gəl kəla mahənay.

Masesiɲay asesiɲla Pol la Makeduniya

⁶ Ama Masasəfok Zəzagəla adəf à atà gay à ahəɲ kà maz gay Zəzagəla la kutso Asəya, kà uwaga à uwana taguwà à uda la Fərizi la Galatiya. ⁷ Mok uwana tabəzà Misiya kà, asà à atà mad à kutso Bitiniya à abà, ama Masasəfok aɲha Yesu avà à atà tetəvi gotənaɲ aw. ⁸ Kà uwaga taguwà la Misiya, ɲgaha tadà à ahəɲ à gay dərəv la Tərowas. ⁹ La huɖ aɲha vəf masesiɲay asesiɲla Pol. Anəɲà zil Makeduniya atsizlla à ahəɲ, adəval kuɖa: “Guwà à waɲ la Makeduniya kà mazlak anu!”, agòɖal. ¹⁰ Katskats la lig aɲha masesiɲay uwaga la ahəɲ, məyàh tetəvi kà maday à Makeduniya. Məsəl kà Zəzagəla azàla anu kà maz gay marabəɲ à azladza la kutso uwatà la abà haday.

La Filipiya, Lidiya adiɲ gəl à Zəzagəla à vok

¹¹ Mətsizlla ala la gudəɲ Tərowas la kəslah iyaw, tərəra, məhàd à gudəɲ uwana à afik la tataka iyaw la abà, sləm aɲha Samotəras, la bebəɲ gə məzlanàl la Neyapoləs. ¹² Dagay la abatà la uwana, məhàd à Filipiya uwana gudəɲ teraɲa la makoray Makeduniya, slaka madz à ahəɲ aɲha azla Rom. Mədzà à anu à ahəɲ la abatà. ¹³ La vuɖ maduw ləv mədà à uda la gudəɲ la abà kà mayàh slaka madəv kuɖa aɲha azla Yahudiya la gay mukwà. Mədzàhà madzay ɲgaha mətapla azlamis uwana tahamà gay à vok la abatà. ¹⁴ Tekula la tataka aɲha azlamis uwatà la abà, sləm aɲha Lidiya, asà à waɲ la gudəɲ Tiyatir, masla matsakal azlasana, uwana iyaw aɲha zlazlafa, masla mahoy adi aɲha Zəzagəla babay. Atsəb anu sləm, ɲgaha Sufəl Zəzagəla azàla haɲkəli kà masla aɲha maf sləm à uwana Pol apəhay. ¹⁵ La abatà tadfàhalla batem la azlaməna huɖ gay aɲha gesina, azàla anu à mtəga aɲha la magoɖay: “Bokuba uwana tsa kasəlaw kà gədadɲal gəl à Zəzagəla à vok la dziriga kà, sàw à waɲ, kadzaw à ahəɲ la mtəga gulo”, agòɖ à anu. Afà anu leri à gəl.

Tawits azla Pol à daɲay

¹⁶ Vərdi anik la ahəɲ uwana mədà à slaka madəv kuɖa kà, məgagəm la dugu mayà gə, uwana la masasəfok mawisiga lakəl. Apàhàh tatak uwana adəpaka vok la huma la gay, la mapàh tatak uwaga kà, adabəz sili kà aɲha məɲga aɲha. ¹⁷ Adzəkà manəf anu la tsəh, awiyaa agòɖ: “Azladza uwanay kà, azlaməna sləray aɲha Zəzagəla uwana kərkər la afik! Tapəhakulla tetəvi uwana Zəzagəla adəbəla akul!” ¹⁸ Apəhàh uwaga mavakay dəɲ. La makəɖ gəl à ahəɲ, Pol adày vok, agolà vok à slaka aɲha, agòɖ à masasəfok mawisiga: “Kak masasəfok mawisiga, la sləm aɲha Yesu: Sà à uda la masla la abà, gəgoɖ à ka!” La kirim yewdi masasəfok asà à uda. ¹⁹ Mok uwana azlaməɲga aɲha dugu mayà uwaga tanəɲaɲ kà tabəz sili aya aw kà, takàs azla Pol atà la Silas ɲgaha tabayà atà à vadavaday kasukwa à afik tsəràh à huma aɲha azlaməɲga aɲha gudəɲ. ²⁰ Tadàla atà à slaka azlagumna aɲha azla Rom ɲgaha tagòɖ: “Azladza uwanay

kà, tatsàlla magazlay à gudəŋ gami à abà, atà kà, azla Yahudiya. ²¹ Nğaha tapàhla mapəhay uwana ala wakità seriya gami avəra gay à azladza, anu uwana anu azla Rom, kà manəfay la makəsay.” ²² Maham à ahəŋ dza ahamà atà à gəl. Azlagumna tahəl lukut aŋa Pol atà la Silas, nğaha tavà tetəvi kà mazlabàh atà la kurpi. ²³ Uwana tazlabàh atà la kurpi kà, tawits atà à daŋay, nğaha tafàhà akur à azlaməna manəŋla à atà à lig kà, kà manəŋla atà lela. ²⁴ Uwana masla manəŋla atà adatsən gay uwaga kà, awits atà à daŋay huđ gà à agu, nğaha abək atà sasala à asik.

²⁵ La huđ aŋa tataka vəđ azla Pol atà la Silas tadəv kuđa, nğaha tahàb kà mazləb Zəzagəla; azlaməna daŋay anik tatsənà atà babay. ²⁶ Katskats kutso abəlàkà vok mənğa mənğa, baməraka matatukway aŋa gày kà abəlàkà vok, katskats azlagamagày tapəzlla vok, nğaha la kità bay, azlasasala la azlamazakazak tapallàhà à vok à azlaməna daŋay la vok ala kokuđa gəl aŋatà. ²⁷ Masla manəŋla azlaməna daŋay atsənà ala. Uwana anəŋəŋ kà gamagày aŋa gày daŋay mapəzl vok gà, abəđ katsakar aŋha kà makəđ vok, kà uwana adzùgw kà, azlaməna daŋay tahoyay. ²⁸ Ama Pol awiyà la ndzəđa: “Kay, kakəđ vok aŋak aw, anu gesina gami la ahəŋ!” ²⁹ Masla manəŋla uwaga anəv akəl, ahəd à gày daŋay à agu la katskats la masəkulay la abà kà guba, atəđ à makəla asik aŋa azla Pol atà la Silas. ³⁰ Nğaha asəlla atà à uda, anavà atà: “Azlaməŋga gulo, mana gəđehəŋ kà gi aŋa mabəlay ma?” ³¹ Tawulàlla: “Diŋ gəl à Yesu à vok, nğaha kabəlay, kak la huđ gày aŋak gesina!” ³² Nğaha tazàla gay aŋa Sufəl Zəzagəla la azlaməna huđ gày aŋha gesina. ³³ Masla manəŋla gày daŋay uwaga, ahəl atà à uda la vuđ uwatà, nğaha apəlàh azlaamik aŋatà. La lig la ahəŋ tadàhalla batem la azlaməna huđ gày aŋha gesina. ³⁴ Adàla azla Pol la Silas à gày aŋha à agu, nğaha avà à atà tatac may. Zil uwaga la azlaməna huđ gày aŋha gesina tahən ala la marabay, kà uwana tadiŋ gəl à Zəzagəla à vok.

³⁵ Mok uwana məl adawula, azlagumna aŋa azla Rom, tasləl dza à slaka masla manəŋla gày daŋay la magədal: “Sàk azladza uwaga, tahəd aŋatà”, tagədal. ³⁶ Masla manəŋla asà à waŋ, apəh à azla Pol, agəđ à atà: “Azlagumna tav tetəvi kà mawits akul à gəl. Kaslawwalla vok aŋa mas à uda, kà madiy aŋkul la lapiya.” ³⁷ Ama Pol agəđ à azlaməna masləlla atà à waŋ: “Lakuhu tazlabàh anu la vadavaday kasukwa la afik, nğaha kà pəra tawits anu à gəl kokuđa madəh seriya gami, tsa anu babay kà, anu azla Rom kà pəra, tawits anu à gəl, la gəl à gəl ma kà mana mi?! Kiya uwaga aw! Say atà la gəl aŋatà tatsa à waŋ kà mapəl anu ala, kəla!” ³⁸ Azlaməna masləllay tawùlla à gay uwaga à azlagumna Rom. Ama guba akəs atà kayakay kà uwana tatsənəŋ kà Pol la Silas kà azla Rom. ³⁹ Kiya uwaga, atà tasà à waŋ tadəv atà kuđa, nğaha tasəlla atà à lag la gày daŋay la aku, nğaha aya tadəv atà kuđa kà mas à uda la kutso aŋatà la abà. ⁴⁰ Uwana Pol atà la Silas tadasa à uda la daŋay, tahəd à mtəga Lidiya dadəŋ. Uwana tanəŋ azladedà la abatà tadzərəđàhàtəla, nğaha tahəd aŋatà.

17

Pol atà la Silas la Tesaloniki

¹ Tanəfà tetəvi uwana aguwa la Amfipolis la Apoloniya nğaha tabəzà Tesaloniki. Gày madəv kuđa aŋa azla Yahudiya la ahəŋ la abatà. ² Bokuba uwana adagay zagəla aŋa Pol, ahəd à gày madəv kuđa à agu. Mavakay maduw ləv makər, Pol atsanà vok gay atà nna lakəl aŋa wakità Zəzagəla. ³ Atapàhàtəla la madzərəđàhàtəla, kà akəsà vok kà Kristu asà nğərpa, nğaha awùl à uda la mamətsay, Pol agəđ à atà: “Yesu uwanay gəpəh à akul kà, Kristu gà la uwaga.” ⁴ Azladza anik la tataka aŋatà la abà takəs uwaga, tanəfà Pol atà la Silas. Azla Gərək uwana tahòy yewdi aŋa Zəzagəla la azlamis huđ gudəŋ uwana sləm aŋatà la ahəŋ aŋuvaw.

⁵ Ama azla Yahudiya tahən ala la maṇor. Kiya uwaga tahamà gay azlabudfaray à vok, tawiyà kà maf à tsəh à maham à ahəṇ dza à afik la magazlay la hudf gudəṇ. Tahəd à mtəga Yason kà mayàh azla Pol atà la Silas, kà madla atà à huma aṇa azlaməna sawaray. ⁶ Uwana tabəz azla Pol la abatà aw kà, tabayà Yason la azladedà anik à huma aṇa azlaməṅga aṇa gudəṇ, ṅgaha tadzəkà mawiyay: “Azladza uwana tawis gudəṇ à vok ala kà, atà, la uwanay tabəzà à abanay lakana. ⁷ Yason akəs atà à mtəga aṇha, azladza uwaga gesina tapəsèw mapəhay aṇa sufəl aṇa Rom, kà uwana tapəhay kà məṇ sufəl anik la ahəṇ, uwana sləm aṇha Yesu”, tagòd. ⁸ Gay uwaga avədzàhà à tsəh à maham à ahəṇ dza à afik la azlaməṅga aṇa gudəṇ. ⁹ Kiya uwaga azlaməṅga tafà leri à azla Yason à gəl kà tapəl sili dāṅ kà maduw atà à gəl.

Pol atà la Silas la Bere

¹⁰ Uwana vədf adasa à waṇ, azladedà tagòd à Pol atà la Silas: “Dàw aṅkul à Bere!”, tagòd à atà. Mok uwana tabəzà abatà kà, tahəd à gày madəv kuḍa aṇa azla Yahudiya à agu. ¹¹ Azlauwanay kà madzugway aṇatà kà delga, kà azla Yahudiya aṇa Tesaloniki, takəs gay Zəzagəla la ahəl səla, kəla mavakay tamədzədfàh hudf aṇa wakità, kà masəlay à baṇa uwana Pol apəhay kà dziriga. ¹² ṅgaha aṇuvaw la tataka aṇatà la abà tadīṅal gəl à vok. Azla Gərək la azlamis uwana sləm aṇatà la ahəṇ, la azlazil tadīṅal gəl à vok. ¹³ Ama uwana azla Yahudiya uwana la Tesaloniki tatsənāṅ kà Pol apəh gay Zəzagəla la Bere kà, tasà à waṇ la maham à gay azladza à vok, kà mavədzàh azladza ala. ¹⁴ Kiya uwaga azladedà tadàla Pol à gay dərəv, ama Silas atà la Timotawus tagədf à Bere. ¹⁵ Azlauwana talakà Pol, tabəzla tsəràh à Atena. La lig la ahəṇ tawùlla aṇatà à Bere la gay uwana la ahəl Pol, apəh à atà kà mapəh à azla Silas atà la Timotawus, kà tabəzalla vok la katskats.

Pol la Atena

¹⁶ Mok uwana Pol akùd azla Silas atà la Timotawus la Atena kà, ləv azəṇ məṅga kà manəṇ gudəṇ uwaga adahənla la azlamazlazlay. ¹⁷ Tabayàhà vok gay la azla Yahudiya la gày madəv kuḍa la aku, la azlauwana azla Yahudiya aw, ama tahòy yewdi aṇa Zəzagəla, la azlauwana la vadavaday kasukwa la afik, ṅgaha la azlauwana tagagàmàh la masla. ¹⁸ Azlaməna matapla azladza anik azla Epikuriya ṅgaha la azla Sətoyisəya tavàts gay la masla. Azlaanik tagòd: “Mana masla gay zlawzlawga uwanay agòd lagwa zlà ma? Zlahaw kà apəhay kà gay aṇa azlazəzagəla məlok gə.” Tapəh uwaga kà, kà uwana Pol apəhay lakəl aṇa Yesu, ṅgaha lakəl mawul à uda la mamətsay. ¹⁹ Kiya uwaga takəs, tadàlla à gudəṇ uwana à afik Arewopez la huma aṇa azlaməna sawaray, ṅgaha tagòdɤal: “Lagwa asa à anu masəlay matapla, ma uwala asa à ka matapanula? ²⁰ Kà uwana asa à ka matapanula azlatatak məlok gə, ṅgaha bay asa à anu masəl godega aṇha zlà.” ²¹ (Azla Atena la azlaməlok dza uwana tadzà à ahəṇ la tataka aṇatà la abà, tadfahà tatak aw, say matsən azlagay mawga uwana tavàts pəra)

²² Hadzak, Pol atsizilla ala la tataka aṇa azlaməna sawaray la abà ṅgaha agòd: “Azla Atena, gədzügw kà akul kanəfaw azlatsəhay zəzagəla anik anik gərgagər. ²³ Haday, bokuba uwana gədauguzahay la hudf gudəṇ aṅkul la abà kà, gənəṇà azlaslaka mazlazlay aṅkul. ṅgaha gənəṇà anik aya uwana tatsetsèral à vok: ‘Slaka uwana kà aṇa zəzagəla dza asəl sləm aṇha aw.’ Iyay zlà! Kasləkawaw kokudà masəlay, ama gi kà gəsəl, uwana gəsà à waṇ kà mapəhakulla. ²⁴ Masla la uwana adfahāṅ gudəṇ à vok, la azlatatak uwana la hudf aṇha gesina, ama masla kà adza à ahəṇ la azlagay uwana la aku, ahəl aṇa dza aṇəl aw. ²⁵ Masla kà anəkudà kà dza aṇa madfahalla tatak aw, kà uwana masla la uwana av sifa à dza la masafay gesina.* ²⁶ La dza tekula la abà, la uwana mayyi à tsəh ala apakà vok gesina, ṅgaha abək atà à ahəṇ la gudəṇ

* 17:25 17.25 1 Sufəl 8.27; Yesayya 42.5

uwanay la vok. Dagay uwana aləg madəh vok, afəh azlakaslà à ahəŋ la azlamakwi aŋa madz à ahəŋ aŋatà babay. ²⁷ Adahà à atà kà atà mayàh masla təzltatəzl, kà atà aŋa maβəzal. Ama la dziriga kà, Zəzagəla kà kərkər la uwabeyuwi gami aw, ²⁸ Kà uwana:

'La masla anu la sifa masla la vok aŋa masafay anu la ahəŋ.'

Delga à uwana azladza anik aŋkul tahàb, ŋgaha tagòf:

'Anu babay kà anu azlabəza aŋha.'

²⁹ Tsa anu azlabəza aŋa Zəzagəla kà, məslala vok məgagəzləla la madzugway kà, Zəzagəla kà bokuba luwəluwà, sili, baŋaw akur aw. Kà uwana aŋa azlatatak uwaga kà, dza adahà à atà la haŋkəli aŋha, kà azlamazlazlay aŋha. Azlatatak uwaga kà azlaaŋa Zəzagəla aw. ³⁰ Iyay, kà uwana Zəzagəla atugw tsakana aŋa uwarà aya aw, kà uwana azladza tadza à ahəŋ kà la mawur gəl aw la abà. Ama lagonay kà, adazala azladza baməra ka leli gesina, kà mapəh gay la ləv ala. ³¹ La haday gə kà, afà mavakay tekula à ahəŋ, à uwana adəfah seriya à gudəŋ à vok à gəl la dziriga. La ahəl aŋa dza tekula uwana akəsàni, ŋgaha apəhanula masla la mawul à uda la mamətsay."

³² Uwana tatsənà, kà Pol apəh lakəl aŋa mawul à uda la mamətsay kà, azladza anik takəfəslal, azlaanik tagòf: "Iyay, lagwa kà, asa à anu aŋa mədətsəbal sləm vərđi anik aya zlà!" ³³ Kiya uwaga à uwana, Pol asà à uda la tataka aŋatà la abà.

³⁴ Azlaanik tadà à atà à adi, tadŋal gəl à vok. La tataka aŋatà la abà kà Denəs tekula la tataka maham à ahəŋ sawaray, uwana la abà la gudəŋ la afik, mis anik uwana sləm aŋha Damarəs, ŋgaha la azladza anik aya.

18

Pol la Korintiya

¹ La lig aŋa uwaga la ahəŋ, Pol atsizlla ala la Atena ŋgaha ahəd à Korintiya. ² Zil Yahudiya anik la ahəŋ la abatà, sləm aŋha Akilas, tagagəm la Pol. Pol ahəd à mtəga aŋha kà manəŋ atà à gay. Masla kà, tayyà kà à makoray aŋa Pontiya à abà, ama asafay la abatà aw. Asà à waŋ kà la Italiya la ahəl à ahəl atà la mis aŋha Pərəskila, kà uwana sufəl Róm, uwana sləm aŋha Kələd, akuđəkàh azla Yahudiya gesina la Róm. ³ Sləray aŋatà kà tekula la Pol, (Mataf gəy lukut) adzà à ahəŋ la mtəga aŋatà, ŋgaha tadəfahà sləray la slaka gə. ⁴ Kəla vuđ maduw ləv, Pol abayàhà vok gay la azla Yahudiya la gəy madəv kuđa la aku, kà atà tadŋal gəl à vok, baməra ka azla Gərək bay.

⁵ Ama mok uwana azla Silas atà la Timotawus tasà à waŋ la Makeduniya kà, Pol adahà sləray anik aya aw, say azəŋ kà gay Zəzagəla la mapəhla à azla Yahudiya, kà Yesu kà masla uwana Zəzagəla afəl dzakwa à gəl. ⁶ Ama uwana azla Yahudiya tafà gəl à gay aŋha aw, tatsəkəl magodəhay à gəl Pol adəf à atà burburu aŋa gudəŋ aŋatà à gəl, agòf à atà: "Baŋa kadəzahawla kà, mawisiga kà adagay kà aŋkul, gay gulo la abà aw. Dagay lagonay lagwa gəgola vok gulo à slaka azladza uwana azla Yahudiya aw adagay." ⁷ Kiya uwaga adà aŋha la abatà, ahəd à mtəga aŋa dza anik uwana sləm aŋha Titiyus Yustus, uwana ahòy yewđi aŋa Zəzagəla, ŋgaha gəy aŋha kà agə la makəla aŋa gəy madəv kuđa. ⁸ Kirəspus, məŋga aŋa gəy madəv kuđa, adiŋ gəl à Sufəl Yesu à vok la huđ gəy aŋha gesina. Azla Korintiya uwana tatsənà gay uwaga, tadŋal gəl à vok, ŋgaha tadəfahà à atà batem.

⁹ La vuđ la abà vərđi anik masesiŋay asesiŋla Pol, Sufəl Zəzagəla agòfəl: "Guba akəs ka aw, dà à huma à gay la mapəh gay gulo, kadza à ahəŋ titi aw! ¹⁰ Kà uwana gi la ahəŋ la kak. Dza la ahəŋ aslala vok kà makəs ka, kà madəfa à ka mawisiga à vok aw, kà uwana azlauwana tadəgəhay azlaaŋulo kà, atà ŋuv la gudəŋ uwanay la abà aw." ¹¹ Pol adzà à ahəŋ la Korintiya mavay la tenma, atəpəhla gay Zəzagəla à azladza.

¹² Mok uwana Galiyon apək gumna aña kutso Akayya, azla Yahudiya tahamà gay à vok, takəs Pol, tadàlla à huma seriya, ¹³ Tagòd: “Dza uwanay kà apapat azladza kà atà makədedf à Zəzagəla anik à ahəŋ, la azlatetəvi anik anik, uwana adəb vok la mapəhay gami aw.”

¹⁴ Pol asəl mabadma, à mok uwana Galiyon agòd à azla Yahudiya: “Baña dza uwanay akəd dza, bañaw adəh mawisiga anik zlazladfaga naka gəbasin, gətsəb akul sləm. ¹⁵ Ama tsa kabayaw vok gay kà lakəl aña azlagay, lakəl aña azlasləm, ŋgaha lakəl aña wakità seriya aŋkul kà, say akul la gəl aŋkul kakədəvwaw uwaga ala, gi kà, gədəh seriya aña tsəhay gə uwaga aw.” ¹⁶ Ŋgaha akudəkàh atà la huma seriya. ¹⁷ La abatà gesina aŋatà takəs Sostenus, məŋga aña gəy madəv kudfa, tazlāb la huma seriya. Ama Galiyon afəl sləm aw.

Pol awul à Antiyews

¹⁸ Uwana Pol adadzin à ahəŋ la Korintiya aya kà, la lig la ahəŋ, asək azladedà à ahəŋ, ahəd à Kenkeriya atà la Pərəskila la Akilas. La abatà afəts gəl à ahəŋ kà maslaf vok aŋha uwana aslāf la huma Zəzagəla. La lig la ahəŋ ahəd à kəslah iyaw à afik, kà mad à kutso Səriya.✠ ¹⁹ Uwana tabəzà Efesus, Pol asakà Akilas à ahəŋ atà la Pərəskila, ŋgaha ahəd à gəy madəv kudfa à agu, kà matsən vok gay la azla Yahudiya. ²⁰ Atà tanavəl masafani la abatà, ama akəs aw. ²¹ Asək atà à ahəŋ la magòd à atà: “Baña asa à Zəzagəla kà, gədəwul à waŋ à slaka aŋkul aya”, ŋgaha adà aŋha à Efesus la kəslah iyaw.

²² Mok uwana adabəz à Zəsare kà, ahəd à Urusalima kà madəh ayyi à azlaməna gay Zəzagəla la abatà. La lig la ahəŋ, adà à ahəŋ à Antiyews. ²³ Uwana adadzən à ahəŋ la abatà kà, awul aŋha aya, aguwa à uda la makoray aña Galatiya la abà, ŋgaha la Fərizi la madzərədəh azlaməna madiŋal gəl à vok ala.

Apolos azan gay Zəzagəla la Efesus ŋgaha la Korintiya

²⁴ La zamana uwatà kà, zil Yahudiya anik la ahəŋ, sləm aŋha Apolos tayyà à Alekəsandəra, abəzà à gudəŋ Efesus. Masla la haŋkəli aña mabadma, asəl wakità Zəzagəla lela. ²⁵ Asəl tetəvi aña Sufəl Zəzagəla lela. La mabadma delga apəhla gay aña Yesu à azladza la dziriga. Ama batem tsəhay gə aña Yuhana la uwana asəl pəra. ²⁶ Adzəkà mapəh gay la gəy madəv kudfa la aku la kokudfa guba. Mok uwana Pərəskila atà la Akilas tatsən mapəhay aŋha, tadàla masla à mtəga aŋatà, tapəhalla tetəvi aña Zəzagəla la dziriga. ²⁷ Kiya uwaga Apolos akəs tetəvi kà mad à kutso Akayya. Azladedà məna madiŋal gəl à vok tadzərədəŋ ala, tatsetsəral wakità à ahəl, kà mav à azlaməna madiŋal gəl à vok la kutso uwatà, kà atà makəsay la ahəl səla. Mok uwana adabəz à abatà kà, azlək azlaməna madiŋal gəl à vok la vok mahamay uwana Zəzagəla avəl. ²⁸ Apəh à azla Yahudiya la huma azladza gesina, tsərah à uwana dza apəzl gay maslək aw, apəhatàla la wakità Zəzagəla la abà, kà Yesu la uwana dza uwana Zəzagəla afəl dzakwa à gəl, Kristu.

19

Pol apəh gay Zəzagəla la Efesus

¹ Mok uwana Apolos la Korintiya, Pol aguwa la gudəŋ la afik, abəzà à Efesus. La abatà la uwana abəzà azlaməna madiŋal gəl à vok anik à vok. ² Anavà atà: “Kabəzaw Masasədok Zəzagəla, à mok uwana kadiŋəwwal gəl à vok ay?” Tawulàlla, tagòd: “Tetuwa mədatsənəŋ tapəhay lakəl aña Masasədok Zəzagəla aw.” ³ Kiya uwaga Pol anavà atà: “Tsəhay batem ma uwala tadfahəkulləŋ la?” Tawulàlla: “Tsəhay gə aña Yuhana”, tagòdal. ⁴ Pol agòd à atà: “Yuhana adfahà batem à azlauwana tapəh gay la

✠ 18:18 18.18 4Musa 6.18

löv ala, ngaha agòdàh à azla Isərayel kà, say tadin̄ gəl à dza uwana à vok adànefal à tsəh à wan̄, uwaga kà Yesu.”⁵ Mok uwana tatsən uwaga tadahàtàn̄ batem la sləm an̄a Sufəl Yesu.⁶ Pol abək à atà ahàl à gəl, gesina an̄atà tabəzal Masasəfok Zəzagəla. Tadzəkà mabadma la azlagay məlok gə, ngaha tazà sayda uwana tabəzal la slaka Zəzagəla.⁷ Gesina an̄atà kà taslay kulo gəl an̄ha səla.

⁸ Təla makər Pol adahàn̄ kà matapatàla la gày madəv kudfa an̄a azla Yahudiya la aku, apàhla azladza kokudfa guba, kà atà tatsənà vok gay, awədf vok à uda kà mapəhatàla gay an̄a makoray Zəzagəla.⁹ Ama azlaanik an̄atà tadzadzàn̄hà gəl ala, takweska, tapəh mawisiga lakəl an̄a tetəvi an̄a Sufəl Zəzagəla la huma maham à ahən̄ dza. Kà uwaga à uwana Pol ahəl azlaməna madiṅal gəl à vok, tahəd an̄atà. Kəla mavakay atəpla azladza la gày nekol an̄a Tiranus la aku.¹⁰ Anəfà madfah̄ uwaga tsərəh̄ à mavay səla, tsərəh̄ à uwana azladza la kutso Asəya, la azla Yahudiya, ngaha la maham à ahən̄ dza anik gesina tatsənà gay an̄a Sufəl Zəzagəla.

Gay an̄a azlakona an̄a Seva

¹¹ Zəzagəla adahàhà azlanadzipo tsəhay anik anik la ahàl an̄a Pol.¹² Azlalukut uwana tadabani vok an̄a Pol la azlanalbət gesina kà tawaràhà azlaməna dıvats ala gesina.¹³ La kaslà uwatà azla Yahudiya anik la ahən̄ uwana tauguzàhàh, tawùl à abanay, tawùl à abatày kà makudəkàh azlamasasəfok mawisiga à azlaməna dıvats lakəl ala, tazəb̄ kà sləm an̄a Sufəl Yesu kà makudəkàhla azlamasasəfok mawisiga uwaga. Tagòdàh̄ à azlamasasəfok uwaga: “Məgòd̄ à akul: Sàw à uda la sləm an̄a Yesu uwana Pol apahay!”¹⁴ Uwaga azlabəza an̄a mən̄ madzahaga an̄a mav tatak à Zəzagəla, uwana sləm an̄ha Seva, tadahà uwaga atà mədf. ¹⁵ Ama masasəfok mawisiga agòd̄ à atà: “Gəsəl Yesu, Pol babay gəsəl, ngaha ma akul ma, akul azla uwa tak uwa?”¹⁶ Masla zagəla zagəla avàl à atà à adi, aduwà à atà gesina. Azlàbàh̄ à atà à gay, adahàh̄ à atà amik à vok, tavàlàn̄ à uda, tahòy an̄atà la godega deyday.¹⁷ Azla Yahudiya la azlamaham à ahən̄ dza anik anik, uwana tadzà à ahən̄ la Efesus gesina, tatsənà uwaga. Löv avàl à atà à gay tsərəh̄ à uwana azladza tazàn̄ mazləbay sləm an̄a Sufəl Zəzagəla à gəl kaykay aya.¹⁸ An̄uvaw la tataka azlaməna madiṅal gəl à vok la abà tasàhà à wan̄, tapàh̄ gay la löv ala lakəl an̄a uwana tadadahan̄ la huma azladza gesina.¹⁹ An̄uvaw la tataka an̄a azlauwana la abà tadfah̄ məzla, tasàhla wakità an̄atà à wan̄, tadàwal à akəl à tsəh̄ la huma an̄a azladza gesina. Tatùgw sili an̄a wakità gə, uwana kà adfah̄ gursu dəbow dzik zlo.²⁰ Kiya uwaga à uwana gay an̄a Sufəl Zəzagəla aslèhà gəl à ahən̄ la ndzəda la mapəhla ndzəda an̄ha ala.

²¹ Mok uwana uwaga adada à lig gesina, Pol akəs tetəvi uwana aguwà la Makeduniya, la Akayya kà masla an̄a mad à Urusalima. “Ban̄a gədabəzay kà, gədàd à gudən̄ Rom babay”, agòd̄.²² Aslèl azlaməna mazlakay an̄ha səla à Makeduniya, Timotawus atà la Erastus, ama masla kà adzàn̄i à ahən̄ la Asəya dadən̄.

Masàh̄ gəl la Efesus

²³ La kaslà uwatà kà, gay mən̄ga atsizlla ala la Efesus lakəl an̄a tetəvi an̄a Sufəl Zəzagəla.²⁴ Dza anik la ahən̄ la abatà, sləm an̄ha Demetəriyus, uwana avàtsàh̄ azlamafsa à vok an̄a gày uwana azladza tasləkàwàh, uwanay gày an̄a mazlazlay Arəteməs misga, akəs atà à vok la azlaməna sləray an̄ha gesina kà madawla.²⁵ Azlàh̄ azlaməna sləray an̄ha, la azladza uwana sləray an̄atà tekula, ngaha agòd̄ à atà: “Azlakona, kasəlaw kà, la sləray gami akəs à anu aw takay,²⁶ kanəṅawwan̄, ngaha katsənawwan̄ uwana Pol uwanay adfehən̄ aw takay? Agòd̄ à azladza kà: Azlamazlazlay uwana mədfəhən̄ la ahàl kà, azlazəzagəla delga aw, agòd̄. Ngaha azladza takəs gay an̄ha kà la abanay la Efesus pəra aw, ama la makoray an̄a Asəya la abà gesina bay.²⁷ Ban̄a kiya uwanay kà, azladza tadəpəh̄ mawisiga lakəl an̄a sləray gami, ngaha tadəpəsew mən̄ gày mazlazlay Arəteməs baməraka Arəteməs bay, kà tadəhoy

yewdi anha aya aw. Tekedik kà, masla la uwana azla Efesus taslökaway la azladza gudəŋ à vok gesina!”

²⁸ Mok uwana tatsən gay uwaga kà, tapakà ləv kaykay, tadzəkà mawiyay, tagòd: “Arəteməs anja azla Efesus kà mənğa, Arəteməs anja Efesus kà mənğa!” ²⁹ Gay uwaga aslèhà gəl à gudəŋ à abà gesina, awisà gəl à azladza à vok, takàs azlaməna manəf Pol səla, Gayyus atà la Arəstarkus uwana tasà à waŋ la Makeduniya, tabayà atà, tadàla atà à vadavaday anja marazlay à afik. ³⁰ Pol bay kà asal anja mad à abà, ama azlaməna madiŋal gəl à vok tadəfal gay à ahəŋ. ³¹ Azlamənga anja kutso Asəya uwana azlaslagama anha tasləl gay à slaka anha, tadəval kudfa kà masla anja mad à vadavaday marazlay à afik aw. ³² La mok uwaga kà, maham à ahəŋ gesina hohofa gəl à vok, kəla uwabeyuwi awiyay deyday pəra, kà uwana anjvaw la tataka anjatà la abà, tasəl gay uwana ahamà atà gay à vok aw. ³³ Zil Yahudiya anik la ahəŋ la abatà la tataka azladza la abà, sləm anha Alekəsander, tadàlla à awtày à huma anja maham à ahəŋ dza kà uwana azla Yahudiya tasəl masla, kà mapəhla godega anja gay uwaga à azladza. ³⁴ Ama uwana tasəl kà masla babay zil Yahudiya kà, tazà mawiyay à zagəla la kuda tekula, tasəf la mawiyay la abà azlagay sa səla: “Arəteməs anja azla Efesus kà mənğa, Arəteməs anja azla Efesus kà mənğa!”

³⁵ “Dzàw à ahəŋ titi!”, mən səkəreter anja gudəŋ uwaga agòd à atà kà kudfa kudfa: “Hadfay, akul azla Efesus kà uwabeyuwi asəl kà gudəŋ anja Efesus kà masla manəŋla mən gày anja Arteməs, ŋgaha la maftsa vok tsikasлага anha, uwana asà à ahəŋ la zagəla, kəla dza uwala beyli asəl uwaga. ³⁶ Dza la ahəŋ ats gadzewi lakəl anha aw. Gay gà la uwaga say kadzaw à ahəŋ titi, ŋgaha kadfahaw hanəkəli lakəl anja uwana kadfahawwan bay. ³⁷ Hadfay, səlàw kà, azladza uwana kasàwla atà à abanay kà, tadà à gəl la mən gày mazlazlay gami la aku aw, uwala tapəh mawisiga lakəl anja mazlazlay gami bay aw. ³⁸ Baŋa gay la Demetərius lakəl, la azlaməna sləray anha, kà mapuw gudzi à dza à gəl kà, kaslà la ahəŋ à uwana dza ada à seriya la mok uwatà à huma anja azlamənga, la abatà la uwana tadəvah atà ala. ³⁹ Baŋa akul la azlagay anik aya babay kà, say kadawla à huma à azlaməna sawaray, kà makədəvəŋ ala la abatà. ⁴⁰ Ama kà anja uwanay lakana kà, akəs anu vok aw, kà uwana tagodf à anu kà, akul la uwana mədatsizl gay ala, tagodf à anu, kà uwana akəs anu vok kà maham gay à vok kiya uwanay aw!” ⁴¹ ŋgaha mok uwana adakədf gəl à gay uwaga kà: “Dàw ankul!”, agòd à atà.

20

Pol ahàd à Makeduniya ŋgaha à Akayya

¹ Mok uwana gay ataslèla kà, Pol ahamà gay à azlaməna madiŋal gəl à vok à vok. Adzərədfàhàla la azlagay, agòd à atà: “Gi kà, gəda à Makeduniya.” ² Aguwà à uda la kutso uwatà la abà la madzərədfàh azlaməna madiŋal gəl à vok ala, la mazàh à atà gay Zəzagəla, ŋgaha ahàd à Akayya. ³ Adzà à ahəŋ la abatà təla makər, adfahà vok à ahəŋ kà mad à Səriya la kəslah iyaw, ama atsənəŋ kà azla Yahudiya tatsən vok gay kà makədfay, gay gà la uwaga awul à Makeduniya. ⁴ Sopatər, kona anja Pirus, zil Bere alakəŋ, ŋgaha bay Arəstarkus atà la Sekundus, uwana azla Tesaloniki, Gayyus zil Derbe, Tisik atà la Tərofim ŋgaha bay Timotawus, uwana atà azla Asəya, tahàd atà nna gesina. ⁵ Tatsà vok à huma kà anu, tahàd à Tərowas, takudà anu la abatà. ⁶ Anu la gəl gami məgədf à Filipiya, uwana madəvaday anja pain uwana tatak maməsləla la tsəh aw adada à lig kà, la mahənay zlo kà məbəzà atà à vok la Tərowas la kəslah iyaw. Mədfahà kasukwa tekula la abatà.

Pol anəŋ azlaməna Tərowas à gay

⁷ La mokokhu gà, vuf səbdu kà, maham gay à vok kà mazuw tatak may tsikaslağa. La abatà Pol apèh gay à azladza. Apèh gay tsèràh à tataka vəd, kà uwana la bebəh gə kà, asal mad aᅇha. ⁸ La gày uwatà la aku lakəl aᅇa gày uwatà la afik, məhəm à agu kà, azlafənəs aᅇuvaw dzadzàhà la ahəh. ⁹ Bəzi kohana uwana sləm aᅇha Antikus adzà madzay la gay fenetər. Pol adà à huma à gay la mapəh gay Zəzagəla tsèràh à uwana Antikus ayi vok, adzehəl. Tsəᅇurəsl, atəd à ahəh, dagay la kəl gày mamakər la afik, tazəb à afik kà adamətsay. ¹⁰ Ama Pol asà à ahəh, ahùbal à gəl, akəs à vok, agòd: “Katawaw aw, mamətsayga aw!” ¹¹ Nᅇaha Pol awùl à gày uwatà à afik, azəb Pain atsəkàh ala, ᅇgaha tazùw gesina aᅇatà la slaka gə. Apèh à atà gay uwaga tsèràh à gay bebəh, la lig la ahəh adà aᅇha. ¹² Tadàla bəzi kohana uwaga à mtəga la sifa, tarəb məᅇga kà uwaga, tadzərədàhà ala.

Pol atsizlla ala la gudəh Tərowas, ahàd à Milet

¹³ Anu kà, mətəsà vok à huma, kà Pol aᅇa maday à kəslah iyaw à afik uwana adàla anu à Asos. La abatà la uwana mədzügw mazəb Pol à tsəh à kəslah iyaw à afik, kà uwana masla kà anəfà tetəvi à asik. ¹⁴ Mok uwana adabəz anu vok la Asos kà, məzəb à tsəh à kəslah iyaw à afik, məhəd à Mitilen. ¹⁵ Mətsizlla ala la abatà aya, məhəd à huma aᅇa Tsiyo. La bebəh aᅇha aya kà, məbəzà à Samos, ᅇgaha la bebəh aᅇha aya kà maufad kà, məbəzà à Milet. ¹⁶ Asà à Pol kà matsəd à Efesus lakəl ala, kà uwana asəl matsizl à ahəh kà maz kaslà ala la kutso Asəya aw, kà uwana av vok kà mabəz à Urusalima gurayᅇa madəvaday Pentakosta, adàh vok kəla.

Pol apəh gay à azlamasiga la Efesus

¹⁷ Mok uwana Pol adabəz à Milet kà, asləl gay à slaka azlamasiga aᅇa maham à ahəh məna gay Zəzagəla la Efesus: “Sàw à waᅇ à abanay!”, agòd à atà. ¹⁸ Mok uwana tadùw à awtày à slaka aᅇha kà: “Kasəlaw kakay à madz à ahəh gulo uwana gədzà à ahəh la makoray aᅇa Asəya la abà”, agòd à atà. ¹⁹ “Gədàhà sləray aᅇa Sufəl Zəzagəla la ləv tekula, ᅇgaha la iyaw tugwi la adi, la ᅇgərpa, la tataka aᅇkul la abà kà matsən vok gay la azla Yahudiya. ²⁰ Səlàw babay kà, gəhadàhəkulla tatak uwana à vok akəsà akul à vok aw. Gəpəh à akul uwaga gesina, ᅇgaha gətəpakulla la dazuwaya, ᅇgaha baməraka la azlahud gày aᅇkul. ²¹ Gəzàlla azla Yahudiya ᅇgaha la azlauwana azla Yahudiya aw kà mapəh gay la ləv ala, kà atà magola vok à slaka Zəzagəla, ᅇgaha atà aᅇa madih gəl à Sufəl Yesu à vok. ²² Ama lagonay kà, gəday à Urusalima, kà uwana Masasədok Zəzagəla afà à gi leri à gəl kà maday, lagwa kà, gəsəl tatak uwana adabəz à gi la abatà aw. ²³ Kəla kà, kəla hud gudəh uwana gəguwà à uda la abà kà, Masasədok Zəzagəla agòd à gi, kà tadàduw gi à daᅇay, gədàsa ᅇgərpa. ²⁴ Ama kà gi kà gədàmətsay, gədàdza à ahəh la sifa kà, bə tataka tekula, baᅇa gədəkəd gəl à madahay gulo, la sləray uwana Sufəl Zəzagəla afà à gi à gəl kà diga, uwaga kà mapəhla ala gay marabəh lakəl aᅇa vok mahamay aᅇa Zəzagəla.”

²⁵ “Gəuguzàhàh la tataka aᅇkul la abà gesina, gəzà gay aᅇa makoray Zəzagəla. Lagwa kà, gəsəl kà kadənəᅇaw gi aya aw. ²⁶ Kà uwaga à uwana gəpəh à akul la paraka lakana: Baᅇa tekula aᅇkul azalla kà: Gay gulo aw. ²⁷ Kà uwana gəzàla masal aᅇa Zəzagəla gesina, gəhadàhəkulla tatak à vok aw. ²⁸ Nəᅇàwla gəl aᅇkul, nəᅇàwla maham à ahəh məna gay Zəzagəla, uwana Zəzagəla asùkw atà la mamətsay aᅇa Kona aᅇha. ²⁹ Kà uwana baᅇa gədàda aᅇulo kà, azladza tadàsahah à waᅇ bokuba azlakəda fəta à tataka aᅇkul à abà, tadàsaka azlatuwaᅇ aw. ³⁰ Baməraka la tataka aᅇkul la abà bay kà, tadəpahla vok ala kà madàh fida kà azlaməna madihəl gəl à vok aᅇa manəf atà bay. ³¹ Kiya uwaga kà, nəᅇàwla gəl aᅇkul, awulla à akul à gəl gədəpaha à akul mavay makər, mavakay la mahanay gesina, la iyaw tugwi la adi.”

³² “Lagonay kà, gədàbək akul à ahəl aᅇa Zəzagəla, ᅇgaha à ahəl aᅇa vok mahamay aᅇha. Aslala vok kà aᅇa maziᅇh akul, aslala vok kà aᅇa mapis à akul gay à vok la

ləmana uwana adahàkulàn gesina. ³³ Gənavà sili la lukut la slaka dza aw. ³⁴ Akul la gəl ankul babay kà kasəlaw, kà gəfahàhà sləray la ahəl gulo, kà gi anja madəhla tatak uwana gənəkudə anha la azladza uwana anina. ³⁵ La azlatatak gesina la abà, gəpəhakulla kà say kazlakaw azlaməna kudə la tsəhay sləray uwanay gesina. Tawulla anu gəl babay à gay anja Sufəl Yesu uwana agòd la gəl anha:

'Marabay agay la dza uwana avày, marabay uwanay aduwa marabay anja dza uwana akəsəy pəra',
Yesu agòd."

³⁶ Mok uwana Pol adadəv gay anha à gay kà, akəd à ahəj, adəv kudə atà nna la slaka gə gesina. ³⁷ Gesina anjatà tatəw, la makas masla à vok ŋgaha: "Həd, zla!", tagòdal la mabak ahəl à kudə. ³⁸ Tapakàh ləv mənğa, kà uwana 'Kadənəjaw gi aya aw', agòd à atà. Ŋgaha talakàn à kəslah.

21

Pol aday à Urusalima

¹ La abatà 'Maday', məgòd à atà, məhəd la kəslah iyaw à afik, məbèz à Kos. La bebən gə, məbèz à Rodəs. Dagay la abatà məhəd à Patara. ² La abatà la uwana məbèzà à kəslah iyaw, kà mad à Fenesəya. Mədà à afik, məhəd, ³ Katskats mənəjə gudəj Sipəre, uwana la tataka dərəv la abà, məfəl à ahəl gudzay, kà mad à Səriya. Məsà à vədah la Tir kà matsək kazlanə anja kəslah iyaw à ahəj. ⁴ Məbèz azlaməna madijal gəl à vok la abatà, ŋgaha mədza à ahəj kasukwa tekula anina. Masasəfok Zəzagəla apəhatàla tatak uwana adəbəz Pol, kiya uwaga kà: 'Kadà à Urusalima aw', tagòdal. ⁵ Ama uwana kasukwa uwatà adada à lig kà, mətsizlla ala, məhəd la azlamis anjatà la azlabəza anjatà gesina, talakà anu à uda la hud gudəj la abà. Məkədèdàh à ahəj la gay dərəv mənğa, madəv kudə. ⁶ Mok uwana: 'Mədza à ahəj wurwur', mədagòd à vok kà, məhəd à kəslah iyaw à afik, atà babay tawul à mtəga anjatà.

⁷ Kiya uwaga mədəvə mauguzahay gami à gay la iyaw lakəl la mad à Tir, tsərəh à Potolemawus. La abatà babay, azladedə takəs anu, məvakà à abatà à slaka anjatà. ⁸ La bebən gə məhəl vok, məhəd à Zəsare. La abatà məhəd à mtəga anja Filip masla mapəh gay Zəzagəla, məhən à mtəga anha. Masla kà tekula la tataka azladza mədəf uwana la abà, tatsatsəmàni atà la Urusalima. ⁹ Azladəgam anha la ahəj, uwana tadàh à zil dadən aw, tapàhəh gay uwana Zəzagəla apəh à atà à ahəl kà mapəh à azladza. ¹⁰ Uwana mədahəni à abatà kà, masla mapəhal gay à ahəl anja Zəzagəla kà mapəh à azladza, uwana sləm anha Agabus, asà à wəj la Yahudiya. ¹¹ Asà à wəj à slaka gami, azəb parapara anja Pol, awədla asik à ahəj la azlaahəl anha, agòd: "Aganay uwana Masasəfok Zəzagəla agòd: 'Azla Yahudiya la Urusalima tadəwad dza anja parapara uwanay kiya uwanay, tadəfa masla à ahəl anja azladza uwana azla Yahudiya aw.' " ¹² Mok uwana mədatsən gay uwaga, anu la azladza uwana la Zəsare kà: "Kamkam, kahad à Urusalima aw!", məgòd à Pol. ¹³ Ama awulla à uda: "Kà mana katawaw ma? Asa à akul kà mav à gi guba takay? Ama gi kà, gədəvə vok gulo kà mawad gi la Urusalima pəra aw, ama kà mamətsay kà Sufəl Yesu Kristu bay." ¹⁴ Uwana məslàla vok kà madəfal gay à ahəj aw kà, mədza à ahəj titi: "Bokuba uwana asa à Zəzagəla pəra zlà", məgòdal.

¹⁵ Uwana mədadzə à ahəj la abatà kà, mədahə vok kà mad à Urusalima. ¹⁶ Azlaməna madijal gəl à vok anik la Zəsare talakà anu. Tadàla anu à mtəga anja Manason, uwana asà à wəj la Sipəre, masla madijal gəl à vok dagay uwarə, kà mahən anu à ahəj.

Pol ahad manəj Yakuba à gay

¹⁷ Mok uwana mēdabəzay à Urusalima kà, azlamadiṅal gəl à vok la abatà, takès anu la ahàl sèla. ¹⁸ La bebəṅ gà, mēhàd, la azla Pol, à mtəga aṅa Yakuba, à slaka uwana azlamasiga aṅa maham à ahəṅ mēna gay Zəzagəla gesina tahamàh gay à vok. ¹⁹ Pol adahà à atà ‘Ayyi’, ṅgaha apəh à atà sləray, uwana Zəzagəla adahà la ahàl aṅha la tataka aṅa azladza uwana azla Yahudiya aw. ²⁰ Mok uwana tatsən uwaga la slaka aṅha kà, tazlèbà Zəzagəla, tagòd à Pol: “Deda à kanəṅà uwana apakà vok la abanay la slaka azla Yahudiya tsi. Azla Yahudiya dəbow dəbew tapakà azlamadiṅal gəl à vok. Ama gesina kà tanəfa gay aṅa wakità seriya aya. ²¹ Tatsənəṅ kà, katàpla azla Yahudiya uwana tadzà à ahəṅ la tataka aṅa azla tsəhay dza anik la abà, kà atà aṅa magola vok à uda la wakità seriya aṅa Musa la abà, ṅgaha kagòd à atà kà, tasàkal makadav azlabəza aṅatà à uda, ṅgaha tasàk à madz à ahəṅ aṅa azla Yahudiya la tsəh ala babay. ²² Mana mēdehəṅ ma? Kà uwana ndzer tasəlay kà, kadasa à waṅ. ²³ Lagwa dāhà kà uwana mēpəhaha à ka: Azladza ufad la ahəṅ la abanay, à uwana asà à atà masəd vok. ²⁴ Nəfà atà, ṅgaha kadəsədfaw vok akul nna, bokuba uwana wakità seriya apəhay, pəl sili aṅa mafəts gəl à ahəṅ aṅatà. Baṅa kadādfah uwaga gesina kà, azladza tadəsəlay kà uwana tapəh à ka à vok, kà fida, ṅgaha atà kà masəlay kà kanəfa mapəhay aṅa Musa lela! ²⁵ Ama kà aṅa azlauwana azla Yahudiya aw kà, masla tapakà azlaməna madiṅal gəl à vok kà mətsetsèr à atà wakità kà mapəh à atà uwana məkəs: Təga kà, məgod à atà kaslawwalla vok mapad sləb matulay, sləb mazlazlay, mas aṅiz la mapad sləb aṅa tatak masewfla gà, kadāhaw mabila aw, uwaga gesina kà delga aw, mətsetsèr à atà.” ²⁶ Kiya uwaga la bebəṅ gà, Pol ahàd la azladza ufad uwaga, tasəd vok, kà magay sətaka, ṅgaha tahàd à məṅ gày Zəzagəla à agu. La abatà agòd: ‘Baṅa mahəṅay mədfəf adaslay kà, madəv sləray aṅa magay sətaka aṅa kəla uwabeyuwi aṅatà.’ (Bokuba magodəy kà sartà aṅa makad tatak kà aṅatà adaslay)

Takəs Pol la məṅ gày Zəzagəla la aku

²⁷ Mok uwana mavakay mədfəf uwaga azladəv à gay kà, azla Yahudiya uwana la makoray Asəya tanəṅà Pol la məṅ gày Zəzagəla la aku kà, ṅgaha tavədzàhà maham à ahəṅ dza ala, ṅgaha takès Pol, ²⁸ la mawiyay: “Azlatsəhay gami Isərayel zlakàw anu! Aganay dza à uwanay auguzàhəhay la slaka gesina, atùgw delga aw à azladza gesina lakəl aṅa azla Isərayel lakəl aṅa wakità seriya aṅa Musa, ṅgaha lakəl aṅa məṅ gày Zəzagəla babay! Bə gotənaṅ babay asəlla azlakirdi à gày Zəzagəla gami à agu, tadāhla àlāh à slaka tsidəṅa gami à vok.” ²⁹ (Uwana tapəh kiya uwaga kà, kà uwana tanəṅəṅ Tərofim zil Efesus atà la Pol tauguzàh la huđ gudəṅ la abà, tadzùgw kà tahàd à məṅ gày Zəzagəla à agu, gəl agod à atà) ³⁰ Gay uwaga atsən à huđ gudəṅ à abà gesina, azladza gesina tahamà gay à vok. Takès Pol, tabayəṅ à lag la gày Zəzagəla la aku, ṅgaha tatsàkàh azlagamagay à ama gesina. ³¹ Maham à ahəṅ dza asà à atà makədf Pol, ama gay uwaga atsən à məṅga aṅa azlaslodzi aṅa azla Rom, tagòdal kà azladza Urusalima gesina gəl adawis à atà à vok. ³² Katskats məṅga aṅa azlaslodzi ahəl azlaslodzi la azlaməṅga aṅatà, tahàd à maham à ahəṅ dza à abà la mahoyay. Uwana azladza tanəṅəṅ azlaslodzi tasà à waṅ kà, tasàk à mazlaṅ Pol. ³³ Kiya uwaga məṅga aṅa azlaslodzi azà vok à slaka Pol, akəs: “Wàdāwwəṅ kà la mazakazak sèla!”, agòd. ṅgaha anavà atà: “Uwanay ma, mana adahəṅ ma?”, agòd à atà. ³⁴ Azladza la maham à ahəṅ dza la abà tapəh azlagay anik anik deydayga. Takàdfla gəl à gay uwaga à vok, ṅgaha asəl uwana adəhəṅ kà gay uwauwaga uwaga aw, ṅgaha agòd kà: “Dāwla Pol à mtəga azlaslodzi!”, agòd. ³⁵ Mok uwana tabəzà maslək à ahàl gamagay, azlaslodzi tazəb mazəbay kà mav dzəhla aṅa maham à ahəṅ dza, ³⁶ kà uwana azladza tanəfà la tsəh dukwdadukw la mawiyay: “Məkədf, məkədf, məkədf!”

Pol awulla dzirga aḡha à uda kà mazlayla

³⁷ Mok uwana tazlädàla Pol à gày aḡa azlaslodzi uwatà à agu kà, Pol agòd à mənḡa aḡa slodzi: “Gəbəzal tetəvi kà mabədfma ay?” Mənḡa aḡa azlaslodzi agòd: “Tsa kasəl gay Gərək aw nna? ³⁸ Tsa kak kà zil Misəra, uwana azləl guvəl la azladza la kaslā uwanay adada à lig aw takay, uwana adàla azladza dəbow ufađ à kəsaf à abà kà magay azlaməna nabəra aw ay?” ³⁹ Pol agòd: “Gi zil Yahudiya, tayyà gi à Tarsus uwana la Səlisəya, gi bəzi huđ gudəḡ mənḡa gà. Kamkam, gəgòd à ka, vā à gi tetəvi kà gi aḡa mabədfma à maham à ahən dza uwanay!” ⁴⁰ Mənḡa aḡa azlaslodzi avəl tetəvi. Kiya uwaga Pol atsizlla à maslək ahəl gamagày à afik, akokòt à atà ahəl à adi kà madz à ahən titi, uwana tadzà à ahən titi kà, Pol apəh à atà gay, la gay Yahudiya:

22

¹ “Azladedà la azlababa, lagwa kà, tsəbàw sləm à gay mazlayla gi gulo uwana gəpəh à akul lagwa!” ² Mok uwana tatsənəḡ, kà apəh à atà kà la gay aḡatà kà, dziriya tadzà à ahən titi ḡgaha Pol agòd à atà:

³ “Gi zil Yahudiya, tayyà gi à Tarsus la Səlisəya, ama gəzigən kà la abanay la Uru-salima, ḡgaha bay kà, masla matapgəla tatak kà, Gamaliyel, masla la uwana apəh-gəla masəl mapəhay aḡa azlababa gami madzidziga. Gəđahà sləray aḡa Zəzagəla kà mənḡa bokuba aḡkul uwanay kadahàwwəḡ lakana. ⁴ Kasəlaw kà gətərbàhà azlaməna madiḡ gəl à Yesu à vok tsərəh à makəđ atà. Gəkàsàh azlazil la azlamis, gəwàts atà à daḡay. ⁵ Kiya uwaga madzahaga aḡa azlaməna mav tatak à Zəzagəla, la azlamasiga tanərəz kà delga à uwana gəđehən, tavà à gi wakità kà azladedà gami azla Yahudiya uwana la Damas, gəhəd à abatà kà makas atà, ḡgaha kà madla atà à Urusalima à huma seriya.”

*Pol apəh gay aḡa mapəh gay la ləv ala aḡha
(Sləray 9.1-19; 26.12-18)*

⁶ “Mok uwana gi la tetəvi la ama, kà mad à Damas, uwana azlāgay tataka afats kà, katskats magol uđaka mənḡa asà à ahən la zagəla, aùđ la makəla gulo. ⁷ Gətəđ à vəđah, ḡgaha gətsənà mabədfma agòd à gi: ‘Sawul, Sawul, kà mana katərbəḡ gi ma?’ ⁸ Gənàv: ‘Kak uwa, Sufəl?’ Agòd à gi: ‘Gi Yesu, zil Nazaret uwana katərbəḡ.’ ⁹ Azladza uwana la slaka gulo tanənà uđaka, ama tatsənà kuda uwana abadḡgəmà aw. ¹⁰ Kiya uwaga gənàv: ‘Sufəl, mana gəđehən ma?’ La abatà Sufəl Yesu agòd à gi: ‘Sà à afik, hād à gudəḡ Damas à abà, la abatà la uwana tadəpəhakala tatak gesina uwana asà à Sufəl Zəzagəla kadəhən.’ ¹¹ Uwana gəđapaka guləf kà magol uđaka uwana aḡərəzl gi à adi, azladza uwana məday anina takəs gi à ahəl, ḡgaha tadàla gi à Damas.”

¹² “Dza anik la ahən la abatà, uwana sləm aḡha Ananias, masla kà asəl Zəzagəla, akəs wakità seriya gami lela, sləm aḡha la ahən la tataka azla Yahudiya aḡa Damas la abà. ¹³ Asà à waḡ à slaka gulo, atsizl gi gəl, agòd à gi: ‘Sawul, deda gulo, nən ala aya à dagay!’ La kaslā uwatà gənənəḡ ala, ḡgaha gənənəḡ masla. ¹⁴ Agòd à gi: ‘Zəzagəla aḡa azlababa madzidziga akəsàni ka, kà mapəhla mawoyən aḡha ala la kak, kà manən dziriga aḡa Kona aḡha, ḡgaha kak aḡa matsən gay aḡha la dziriga. ¹⁵ Kà uwana say kagay masla sayda aḡha la huma aḡa azladza gesina lakəl aḡa uwana kanənəḡ ḡgaha katsənəḡ. ¹⁶ Lagonay ma, mana kakuday aya ma? Kəs batem!’ agòd à gi, ‘Kà Zəzagəla aḡa mazlak ka, kà aḡa mapal ka la tsakana aḡak la abà gesina, la mazal sləm aḡha!’.”

Sufəl Zəzagəla asləl Pol à slaka azladza uwana azla Yahudiya aw

¹⁷ “Gəwùl à waḡ à Urusalima. La mok uwana gəđəv kuđa la mən gày Zəzagəla la aku kà, masesiḡay asesiḡla gi. ¹⁸ Gətsənà Sufəl Yesu agòd à gi: ‘Hadzak gòd, sà à uda

la gudəŋ uwanay la abà, kà uwana azlaməna gudəŋ uwanay kà tadəkəs gay uwana kadəpəh à atà lakəl gulo aw.’ ¹⁹ Gəwulàlla, gəgòd: ‘Hadəy, Sufəl, tasəl la paraka kà gədfàh à azlagəy madəv kudfa à agu, gəkàsàh atà, gəwàtsàh atà à danəy, ŋgaha gəzlàbàh azlauwana tadiŋ gəl à gay anək à vok ndzer. ²⁰ Ŋgaha aya, mok uwana takəs Etiyen, masla sayda anək kà, gi bay kà gi la abatà. Gəkəs makədfay, gənəŋla lukut anə azlaməna makədfay.’ ²¹ Kiya uwaga Sufəl Zəzagəla agòd à gi: ‘Həd, kà uwana gəsləl ka kərkər à slaka azladza uwana azla Yahudiya aw!’.”

Pol la huma mənğa anə azlaslodzi

²² Maham à ahəŋ dza atsəb sləm à Pol tsərəh à uwana apəh gay uwaga, ama la lig la ahəŋ kà tadzəkà mawiyay: “Zàwwàŋ ala à dza uwaga, kədəw, azlayla adza à ahəŋ la sifa aw.” ²³ Tawiyà la makwahàh lukut la vok ala, la matak kutso à zagəla. ²⁴ Kiya uwaga mənğa anə azlaslodzi avà tetəvi kà madla Pol à gəy uwatà à agu, kà maslahəŋ ala, ŋgaha kà masla mapəh dziriga lakəl anə mana uwana azla Yahudiya tawiyay mi à mənğa. ²⁵ Ama mok uwana tawadəŋ kà mazlabay kà, Pol agòd à mənğa anə azlaslodzi uwana la abatà: “Dziri ma, tetəvi la ahəŋ kà mazlab zil Rom kokudfa matsən seriya anə takay?” ²⁶ Mok uwana adatsən uwaga kà, ahəd, apəh gay uwaga à mənğa anətà suwəŋ: “Kakay kadəgòd anək ma? Zil uwanay kà zil Rom.” ²⁷ Mənğa anə azlaslodzi asà à wəŋ à slaka Pol anavàl: “Pəh à gi, kak zil Rom ay?” “Iyay”, Pol agòd. ²⁸ Kiya uwaga mənğa anə azlaslodzi agòd: “Gi kà, gəpəl kà magol tebeləm anə sili kà gi anə mapak zil Rom.” Pol awulàlla: “Gi kà dagay mayyi gi.” ²⁹ La lig la ahəŋ azlauwana asà à atà mazlabay, kà masla anə mapəh dziriga kà, tawul anətà à lig. Baməraka mənğa anə azlaslodzi bay kà, guba akəs à uwana adatsənəŋ kà Pol kà zil Rom, à kà uwana awadəŋ la kadərtsi.

Pol la huma anə azlamasiga

³⁰ Mənğa anə azlaslodzi asəl kà masəlay, kà mana azla Yahudiya tayàh makədf Pol mi. Gay gə la uwaga, la bebəŋ gə kà apəzlla Pol ala la kadərtsi la abà. Agòd kà azlamadzahaga anə azlaməna mav tatak à Zəzagəla la azlamasiga gesina tahamà gay à vok, agòd. Kiya uwaga asəlla Pol à wəŋ, à huma anətà gesina.

23

¹ Pol atsək yewdi à azlamasiga à gay agòd: “Azladedə, gənəfà gay anə Zəzagəla kà kokudfa mawisiga dagay uwarə tsərəh à lakana.” ² Məŋ madzahaga uwana sləm anə Ananiyas avà tetəvi à azladza uwana la makəla anə Pol lakəl, kà madədf à paŋaw à abà. ³ Kiya uwaga Pol agòd: “Ndzer, Zəzagəla adədf ka, kak zlagam medfekuga. Kagòd kà: ‘Gədfàh seriya kà la tetəvi anə wakità seriya’, kagòd, ‘Tsa tekedik kanəfà aw’.” ⁴ Azlauwana la makəla anə Pol lakəl tagòd: “Kagòd à mən madzahaga anə Zəzagəla ŋuwà?” ⁵ “Azladedə, gəsəl kà mən madzahaga anə mav tatak à Zəzagəla à masla aw. Hadəy kà wakità agòd kà, ‘Kapəh mawisiga à mənğa anəkul à gəl aw’, agòd.”

⁶ Uwana Pol asəl kà azla Sadukiya uwana: Mawul à uda la mamətsay la ahəŋ aw tagòd, la tataka azla Farisəya la abatà kà, apəh gay à azladza la kuda zləkkà: “Azladedə, gi kà, gi zil Farisəya, kona anə zil Farisəya, uwana tasəlla gi à abanay kà, kà uwana: ‘Mawul à uda la mamətsay la ahəŋ’, gəgòd, à uwana tasəlla gi à huma seriya.” ⁷ Uwana adapəh gay uwaga kà, azla Farisəya la azla Sadukiya tadzəkà mabay vok gay la tataka anətà, ŋgaha maham à ahəŋ atsək ala. ⁸ (Kà uwana azla Sadukiya tagòd la paraka kà: ‘Mawul à uda la mamətsay la ahəŋ aw, malika la ahəŋ aw, masasədfok la ahəŋ babay aw’, tagòd. Tekedik kà azla Farisəya kà, tadiŋal gəl à uwaga à vok, kà aga la ahəŋ) ⁹ Uwana mawiyay uwaga adazalla vok à gəl kà, azlaanik la tataka azlamənğa anə wakità seriya la abà, uwana la maham à ahəŋ

aŋa azla Farisəya la abà tasà à afik, tavədzàhàtàla tagòd: “Kiya uwanay kà, məbəza mawisiga amiyaka tekula la slaka zil uwanay aw, zlahaw malika, baŋaw masasəfok apəhalla ala uwaga la dziriga à mənğa.”

¹⁰ Magazlay atsizilla ala mənğa kaykay tsərəh à uwana guba akəs mənğa aŋa azla-slodzi kà masläh Pol à ahəl aw. Gay gə la uwaga avà tetəvi à azlaslodzi kà mad à tataka maham à ahən dza à abà, kà atà aŋa madla Pol à mtəga aŋatà à agu. ¹¹ Kiya uwaga la huđ aŋa vəd uwatà Zəzagəla agòd à Pol: “Guba akəs ka aw, kaz sayda gulo la Urusalima la abanay, ŋaha bay kà, kaz sayda gulo la Rom aya babay.”

Azla Yahudiya tatsatsəl vok gay kà makəđ Pol

¹² La bebən gə, azla Yahudiya anik anik tahamà gay à vok, tagòd kà: “Məzùw tatak may, məs iyaw aw say baŋa məkəđ Pol”, tagòd, la mazuw mawəđay. ¹³ Azlaməna madəh sawaray uwaga kà, tađuwà dza dzik ufađ. ¹⁴ Tahəd à slaka azlamadzahaga aŋa azlaməna mav tatak à Zəzagəla la azlamasiga, tagòd à atà: “Anu kà, mədazuw mawəđay kà: ‘Məzùw tatak aw, say baŋa məkəđ Pol dən’, məgòd. ¹⁵ Akul lagwa, akul azlamənğa, nəvəw à mənğa aŋa azlaslodzi, kà asəkulla Pol à waŋ kà manərəz gay aŋha lela, gòdəwwal. Ŋaha məkəđah vok à ahən kà makəđay la tetəvi la ama, à baŋa atsa à waŋ.”

¹⁶ Ama bəzi duguma aŋa Pol atsənà uwana tapəh, ahəd à mtəga aŋa azlaslodzi, apəh uwaga à Pol à vok à abà. ¹⁷ La abatà Pol azàla mən slodzi tekula, agòđal: “Lakà kona uwanay à slaka mənğa aŋkul, kà uwana gay lakəl, kà mapəhal.” ¹⁸ Slodzi uwaga alakən à slaka mənğa aŋatà, agòđal: “Masla daŋay Pol azəl gi, agòd à gi kà, gəlakà kona uwanay à slaka aŋak, kà uwana gay lakəl kà mapəh à ka.” ¹⁹ Mənğa aŋa azlaslodzi akəs kona uwaga la ahəl, tahəd à fəta à awtəy kokudə gəl aŋatà, kà manaval gay uwaga. “Gay mana asa à ka mapəh à gi ma?” ²⁰ Agòđal: “Azla Yahudiya tatsən vok gay kà manav à ka Pol kà madalla lebən à huma seriya, kà masəl dziriga aŋha. ²¹ Ama kadədiŋal gəl à vok aw, kà uwana azladza dzik ufađ anik tadəgəba à fəta à abà kà makəđ Pol, kà uwana tazùw mawəđay, kà tazuw tatak may aw, tas iyaw aw say baŋa takəđ Pol dən, tagòd. Tađəh vok à ahən, takuday kà say gay aŋak pəra adagay.” ²² Kiya uwaga mənğa aŋa azlaslodzi afəh akur à kona uwaga à lig, kà masla aŋa mapəhay à dza anik aw, “Dà aŋak!”, agòđal.

Tasləl Pol à gumna Felikəs

²³ La lig la ahən, mənğa aŋa azlaslodzi azəl azlat à səhga aŋha səla, agòd à atà: “Həmaw gay azlaslodzi guvəl à vok dadərmokw səla, mənə pəlis dzik məkəđ, dza dadərmokw səla la atsəkəđ la ahəl aŋatà. Dahəw vok kà mad à Zəsare la sa ladəga aŋa mokokhu. ²⁴ Dahəw azlapəlis à ahən babay, kà madla Pol la sətaka à huma gumna Felikəs!” ²⁵ Ŋaha atsetsər à atà wakità à ahəl.

²⁶ “Gi Kəlod Lisəyas, à kak Felikəs, la dzəba aŋha səla aw aŋak, ‘Ayyi’, gəgòd à ka! ²⁷ Hađay, zil uwanay kà, asà à azla Yahudiya kà makəđay, ama uwana gətsənən kà zil Rom kà, gəhəd la azlaslodzi kà matafən, masla gə la uwaga masləl à akul à awtəy. ²⁸ Gəyàh masəl godega aŋa gay uwana tapùwalla gudzi à gəl, gay gə la uwaga gədàlla à slaka azlaməna sawaray aŋatà. ²⁹ Gənənən kà, gay la ahən aslā kà maduw à daŋay baŋaw aŋa makəđay aw, tapùwal gudzi à gəl kà lakəl aŋa mapəhay aŋatà pəra. ³⁰ Ŋaha aya kà, gətsənən kà azla Yahudiya tazùw mawəđay kà makəđay, gay gə la uwaga à uwana, gəsləl à slaka aŋak katskats. Gəgòd à azlaməna mapuwal gudzi à gəl kà, say tapuwal gudzi à gəl kà la slaka aŋak pəra.”

³¹ Kiya uwaga azlaslodzi tazəb Pol, tadàlla la vəd uwatà bokuba uwana mənğa aŋa azlaslodzi apəh, tadàlla à Antipatərəs. ³² La bebən gə, azlaslodzi uwana la asik tawùl à mtəga, ama azlauwana la pəlis kà, tadàla Pol. ³³ Tadàlla à Zəsare, tavə wakità uwatà à gumna, tasakà Pol la ahəl aŋha. ³⁴ Gumna adzən wakità uwatà, anavà Pol: “Kutso

ma uwala kadzà à ahəŋ la abà la?” Uwana adasəlay kà zil Səlisəya kà, ³⁵ agòdɔf: “Mədàtsən gay aŋak la vuɔf uwana azlaməna mapuw à ka gudzi à gəl tadasa à waŋ.” Nɔgaha agòd à azlaslodzi kà tanəŋla Pol la gày uwana la aku, Herod aŋal kà mahamàh gay à vok la aku.

24

Azla Yahudiya tapuwa gudzi à Pol à gəl la huma aŋa Felikəs

¹ Uwana mahəŋay zlo adada à lig kà, Ananiyas, madzahaga aŋa azla Yahudiya abəzà Zəsare, la azlamasiga anik anik, nɔgaha la Tertulus uwana asəl manəfay aŋa azla Rom gesina, kà mazlak atà. Mok uwana tabəzà huma gumna Felikəs kà, tapuwà gudzi à Pol à gəl. ² Mok uwana tazàlal kà, Tertulus adzəkà mapuw gudzi kiya uwanay: “Kumani, kumani, Felikəs məŋga, kà kak la uwana anu la lapiya la abà, kutso gami dzəba aŋha səla aw kà, kà matsihila aŋak. ³ Uwaga gesina kà, la slaka aŋak la uwana məbəzal, kikay aŋak məŋga. ⁴ Ama asa à gi gəzaka kaslà ala aw. Gay gà la uwaga, kamkam, tsəb anu sləm à uwana mədəpəhay lagwa. ⁵ Mənəŋəŋ dza uwanay, kà masla matsən sləm aw gà, kà uwana masla la uwana atəz magazlay ala la tataka azla Yahudiya aŋa gudəŋ à vok gesina, nɔgaha kà masla la uwana məŋga aŋa maham à ahəŋ aŋa azla Nazaret aya. ⁶ Nɔgaha aya kà, adəhà àläh à məŋ gày Zəzagəla gami à vok babay, kà uwaga à uwana məkəs. ((Asà à anu kà madəhalla seriya à gəl ma aŋami aŋa mi. ⁷ Ama Lisəyas, məŋga aŋa azlaslodzi azəb à uda la tataka gami la abà la ndzəɔa. ⁸ Gay gà la uwaga Lisəyas avà à anu tetəvi à azlaməna mapuwal gudzi à gəl, kà mas à waŋ à huma aŋak.)) Lagwa kà, baŋa kanaval gay ala kà, kasəl tatak uwana mapuwalla gudzi à gəl kà dziriga.” ⁹ Azla Yahudiya gesina tagəɔəŋ à afik kà uwana Tertulus apəh kà ndzer.

Pol awulla dziriga aŋha à uda la huma Felikəs

¹⁰ Kiya uwaga takəm, gumna agòd à Pol kà mabəɔma, nɔgaha Pol agòd: “Gəsəl kà kak masla seriya aŋa tsəhay uwanay dagay mavay dəŋ. Gay gà la uwaga gəslalà vok aŋa matsizl à huma aŋak kà mapəh uwana azlayla gi. ¹¹ Kà uwana aduw mahəŋay kulo gəl aŋha səla à mad à Urusalima gulo, kà masləkaway Zəzagəla gulo, aw, baməraaka kak la gəl aŋak kaslàla vok aŋa masəl godega aŋa uwaga. ¹² Tetuw tabəz gi gəl məgazlay la dza la məŋ gày Zəzagəla la aku, baməraaka la uwabeyuwi aw, baməraaka la maftsa à gəl à maham à ahəŋ dza à afik la gày madəv kuɔa la aku aw, baməraaka la azlaskaka anik anik la huɔf gudəŋ la abà bay aw. ¹³ Nɔgaha dza la ahəŋ la tataka aŋatà la abà, agəɔf gay mapuw gudzi aŋatà à gəl uwanay à afik aw. ¹⁴ Ama aganay uwana gəsək ala à uda: Gi la ahəŋ la masləkaway Zəzagəla aŋa azlababa gami, la manəf tetəvi mawga ‘Uwana fida’, kagəɔaw. Ama tekeɔik gəɔiŋ gəl à uwana à vok la wakità seriya la abà gesina, la aŋa azlaməna mapəh à atà gay à ahəl kà mapəh à azladza. ¹⁵ Kà uwaga, gi gəgəɔəŋ à afik kà Zəzagəla adəwulla azladza dziriga à uda ala la azlamawisiga la mamətsay, bokuba uwana tagəɔə à uwaga à afik. ¹⁶ Gay gà la uwaga gəɔawəɔf vok à uda kà madz à ahəŋ la ləv tekula la huma Zəzagəla nɔgaha la huma azladza bay.”

¹⁷ “La lig aŋa mauguzahay gulo mavay dəŋ la uda, aŋa mawul à Urusalima kà, gəwulla sili mazlakay à azlatsəhay gulo à waŋ, nɔgaha kà mav tatak à Zəzagəla bay. ¹⁸ Mok uwana gəɔəɔəh uwaga kà, tabəz gi gəl la məŋ gày Zəzagəla la aku, tabəz gi vok, kà mok uwana gəɔəɔəv masəɔf vok gulo à uda. Maham à ahəŋ dza la ahəŋ la slaka gulo baməraaka magazlay aw. ¹⁹ Ama azla Yahudiya aŋa kutso Asəya pəra la abatà, naka atà la uwana tatsà à waŋ à huma aŋak kà mapuw gi gudzi à gəl, agay tanəŋ mawisiga gulo. ²⁰ Baŋaw akul azladza uwanay bay, pəhəw mawisiga gulo, uwana gəɔəhəŋ à uwana tadàla gi à huma azlamasiga zlà. ²¹ Gay tekula pəra gəpəh

la kuda zləkkà, à mok uwana gi la huma aṇatà. Kà uwana gədiṇal gəl à vok kà mawul à uda la ahəṇ, à uwana gəsà à waṇ à huma aṇak lakana.”

²² Bokuba uwana Felikəs asəl gay lakəl aṇa azlaməna manəf Kristu kà, azà gay uwaga à huma à gay agòd: “Baṇa Lisəyas, məṇga aṇa azlaslodzi adàsa à waṇ kà, gədàpəh gay aṇak: Dàw aṇkul!”, agòd à atà gesina. ²³ Kiya uwaga: “Nəṇàwla Pol lela!”, agòd à məṇga aṇa azlaslodzi. “Ama vawal mas afad, vaw tetəvi à azlaslawda aṇha tanəṇal à gay!”, agòd à atà aya.

Pol la huma Felikəs atà la Dərusəla

²⁴ La lig azlamahanay anik la ahəṇ, Felikəs asà à waṇ la mis aṇha Dərusəla, uwana tsəhay Yahudiya. Azàla Pol kà matsəbal sləm lakəl aṇa madin gəl à Yesu Kristu à vok.

²⁵ Uwana Pol adzəkà mapəhay lakəl aṇa madz à ahəṇ dziriga, lakəl aṇa makəl gəl, ṅgaha lakəl aṇa seriya uwana adàsa à waṇ kà, ləv avàl à Felikəs à gay, agòd: “Kayyà, lagwa kà, dà aṇak, vud uwana gədàbəz kaslà kà gədàzalla ka aya!” ²⁶ Adzùgw kà Pol avàl sili. Gay gà la uwaga azàlaha, kà mabəfahma atà səla.

²⁷ La lig mavay səla la ahəṇ, Portsəyus Festus abəðf à slaka aṇa Felikəs à abà. Ama Felikəs asəl marab ləv à azla Yahudiya adùw gəl à Pol aw.

25

Asa à Pol kà gumna Rom la uwana adəhàlla seriya

¹ Uwana mahənay makər adada à lig, Festus abəzà kutso uwatà à abà, atsizilla ala la Zəsare, ahəd à Urusalima. ² La abata la uwana azlamadzahaga aṇa azla Yahudiya la azlamasiga anik uwana sləm aṇatà la ahəṇ, tavà mapuw gudzi aṇatà, uwana tapuwà à Pol à gəl à Festus, ³ kà mav à atà tetəvi kà madla Pol à Urusalima, kà uwana la madzugway aṇatà la abà kà, tatsən vok gay lakəl aṇha kà makəðf à tetəvi à ama. ⁴ Ama Festus awùlla à atà ala: “Pol kà, aga la daṇay la Zəsare, gi bay kà nekwa gəwul à abata. ⁵ Tsa kətà kà, azlamadzahaga aṇkul tanəfa gi à abata kà mapuwalla gudzi à gəl à baṇa adəhàkulla mawisiga à vok zlà.”

⁶ Festus adəhà mahənay mtəgis, bi kulo, la tataka aṇatà la abà pəra, ṅgaha awul à Zəsare. La bebəṇ gə, adà à gay seriya à agu, tadàla Pol à huma aṇha. ⁷ Uwana Pol adadu à awtəy kà, azla Yahudiya uwana tasà à waṇ la Urusalima takəsəl gay à adi, tapuwalla gudzi zlazladəga à gəl deyday, ama agəðf à atà à gay aw, kà uwana fida.

⁸ Ama Pol apəh dziriga aṇha, agòd: “Gəðahaṇ mawisiga lakəl aṇa mapəhay aṇa azla Yahudiya aw, baməraka lakəl aṇa məṇ gəy Zəzagəla babay aw, amiyaka à məṇ sufəl à vok aw.” ⁹ Festus uwana asəl marabəṇ azla Yahudiya agòd à Pol: “Asa à ka nəma aṇa mad à Urusalima, kà madəh à ka seriya la huma gulo nəmay?” ¹⁰ Pol agòd: “Gədàtsizlay kà à huma seriya aṇa gumna, say la abanay la uwana seriya gulo adəh vok. Gəðahà mawisiga à azla Yahudiya à vok aw, kak babay kà kasəl. ¹¹ Baṇa azlayla gi aw, gəðahà mawisiga, uwana azlayla gi mamətsay kà, gəkəs mamətsay. Ama baṇa gay la ahəṇ la mapuw gi gudzi à gəl aṇatà uwanay la abà aw kà, dza aslala vok aṇa mav à atà gi à ahəl aw. Kamkam dala gi à huma məṇ sufəl la Rom, adəfah seriya.”

¹² Kiya uwaga à uwana, Festus atsən vok gay la azlaməna sawaray aṇha agòd: “Tsa kanəv mad à huma seriya aṇa məṇ sufəl Rom kà, bə kaday zlà.”

Pol la huma Agəripa la Berenəs

¹³ La lig azlamahanay ṇuv, sufəl Agəripa asà à waṇ, atà la Berenəs, à Zəsare kà madəh ‘Ayyi’ à Festus. ¹⁴ Uwana tasəfəni kà, Festus apəh gay aṇa Pol à sufəl uwaga, agòd: “Dza anik la ahəṇ, Felikəs asəkəl la daṇay la abanay. ¹⁵ Mok uwana gəhəd à Urusalima kà, azlamadzahaga aṇa azlaməna mav tatak, la azlamasiga aṇa azla Yahudiya tapuwal gudzi à gəl, ṅgaha tanavà gi, kà gi aṇa madukwalla seriya à gəl. ¹⁶ Gəwùlla atà ala kà azla Rom kà atà la tetəvi kà madukw seriya à dza à gəl kiya

uwanay kokudə seriya la yewdi yewdi la huma aña azlaməna mapuw gudzi à dza à gəl aw. ¹⁷ Məsà à abanay anina. Katskats la bebəñ gə kà, gəhəd à gəy seriya à agu, gəvə tetəvi kà masəlla dza uwaga à wañ. ¹⁸ Azlaməna məzam aña bay atà la abatà, ama tasələ mapuw gudzi à wañ, kà mawisiga bokuba uwana gədzugw aw. ¹⁹ Say tabayà vok gay kà lakəl aña madz à ahəñ aña, ngaha lakəl aña dza anik uwana sləm aña Yesu, uwana Pol agòd kà aga la ahəñ la sifa pəra. ²⁰ Kiya uwaga, gi babay kà, uwana gəbèz à mawisiga aña aw kà: ‘Kakəsay kà madà Urusalima kà madəhla ka seriya la abatà ay?’, gəgòdɔl. ²¹ Ama Pol adəv gi kudə kà madəhla seriya la Rom, ngaha nəñawla tsərah à uwana gədəsləlay à slaka məñ sufəl Rom, gi magòd à atà.” ²² Agəripa agòd à Festus: “Gi babay kà, asa à gi matsən gay aña dza uwaga bay.” Festus agòdɔl: “Kadətsəbəl sləm lebəñ zlà!”

²³ La bebəñ gə, sufəl Agəripa la Berenəs tasà à wañ la makoray. Azladza tahəb atà dəs, tahəd à slaka seriya la azlamənga aña azlaslodzi la azlamənga aña gudəñ. “Səwla Pol à wañ!” Festus agòd, ngaha tadàla Pol à awtəy. ²⁴ Festus agòd: “Kak, sufəl Agəripa, la azladza uwanay azla Yahudiya uwana la abanay la uwana la Urusalima gesina, tapuwla gudzi à gəl la slaka gulo, atà gesina tagòd kà, say maz sifa aña ala. ²⁵ Ama gi kà, gəbèzà tatak uwana asla makədla aw. Iyay, ama dza masla la gəl aña ayəh, madəhalla seriya la huma məñ sufəl aña Rom kà, gəvə tetəvi kà masləl à abatà. ²⁶ Ama gəsəl tatak uwana gətseter à məñ sufəl lakəl aña aw. Gay gə la uwaga gəsəl à wañ à huma aña kul, kaykay kà à slaka aña kà kak sufəl Agəripa, bəña mədətsən godega aña gay aña kà pəra, gədətsetseray lakəl aña. ²⁷ Kà uwana asa à gi kà masləl masla danəy à huma seriya kokudə madzəf gay uwana ala lakəl aña aw.”

26

Mawisiga gulo la ahəñ aw, Pol agòd à Agəripa

¹ Kiya uwaga Agəripa agòd à Pol: “Tetəvi la ahəñ kà mabəfma aña k.” Kiya uwaga Pol abiyə ahəl ala kà mapəh dziriga aña uwana azlawla:

² “Hadəy, sufəl Agəripa, gi la marabay lakana kà, mapəh gay uwana azla Yahudiya tapuw gi ala gudzi à gəl gesina. ³ Kà uwana kasəl madz à ahəñ aña azla Yahudiya, ngaha la azlamanəfay aña gesina. Kamkam, tsəb gi sləm lela.”

⁴ “Azla Yahudiya tasəl madz à ahəñ gulo dagay uwana gi bəziga. Tasəl babay madz à ahəñ gulo la tataka azladza gulo la abà, ngaha la uwana la Urusalima bay. ⁵ Dagay uwarə gənəfə manəfay aña azla Farisəya, tetəvi aña manəfay zlazladəga, aña tasəl uwaga dagay uwarə, tazə sayda aña uwaga bay à bəña asa à atà. ⁶ Lagonay kà, gi la huma seriya kà, mapəhay uwana Zəzagəla akəsla vok slawda la azlababa gami madzidziga. ⁷ Tsəhay gami kulo gəl aña səla tafə gəl à uwana adapaka vok, gay gə la uwaga tasləkəw Zəzagəla vud mavakay gesina kà manəwəñ, uwaga à uwana azla Yahudiya tapuw gi gudzi à gəl! ⁸ Akul, azla Yahudiya, kà mana kagəfawwan à afik kà Zəzagəla adawulla azlamazimnekid à uda aw ma?”

⁹ “Tekedik kà, gi la gəl gulo kà, gəyəh mawis sləm aña Yesu zil Nazaret uwaga ala la dabaray anik anik. ¹⁰ Gəfəhə uwaga kà la Urusalima. Azlamadzahaga aña azla Yahudiya tavə à gi tetəvi kà madaw azladza uwana tanəf tetəvi uwaga à danəy gesina, azlauwana tadəhəhə atà seriya mamətsay à gəl. Gi bay, gəkəs uwaga bay. ¹¹ La azlagəy madəv kudə la aku gesina kà, gəfəhə à agu kà makas atà la matəreb atà tsərah à uwana tapəsəw sləm aña Yesu Kristu. Gəfə à atə guvəl à adi, kà atə aña masak à tetəvi aña madəjal gəl à vok aña, gəfəh tsərah à azlagudəñ uwana la uda gə kà matəreb atə la abatà bay.”

*Pol apəh gay aña mapəh gay la ləv ala aňha
(Sləray 9.1-19)*

¹² “Kiya uwana gədà à Damas la patanti la ahàl, uwana azlamadzahaga aña azlaməna mav tatak à Zəzagəla tavà à gi. ¹³ Mok uwana gi la tetəvi la ama, la tataka afats kà, ufaka asà à ahəŋ la zagəla aňərəzl gi à adi, anudà gi à abà la azladza uwana anina gesina. ¹⁴ Kuratata məsòkw à vədah gesina, gətsənà kuda uwana atsən la gay ibəranəŋkowen: ‘Sawul, Sawul, kà mana katərəb gi ma? Uwaga kà azakà à kak ndzer, bokuba kokur uwana akweska mabəlakəŋ aña dza aňha la azəva la gay.’ ¹⁵ Gənav: ‘Kak uwa, Sufəl?’ Sufəl agòd à gi: ‘Gi Yesu uwana katərəbəŋ. ¹⁶ Ama lagwa kà, sà à afik, tsizlla ala, kà uwana gəkəsàni ka, kà kak aña magay kohana gulo, uwana gəpəhakala vok. Kadəgay masla sayda gulo kà uwana kanəŋ gi lakana, ŋgaha kadàza à atà uwana gədəpəhakala aya. ¹⁷ Gədətəf ka la ahàl aña azla Isərayel ŋgaha la ahàl aña azla tsəhay dza anik gesina babay, azlauwana gədàsləl ka à slaka aňatà, ¹⁸ kà kak aña mapəzlla atà yewdi, kà kak aña masəlla atà à uda la mələs la abà, ŋgaha kadala atà à ufaka à abà, katəf atà la ndzəda aña seteni la abà, kà atà aña mad à masal aña Zəzagəla à abà, kà atà aña mabəz mamatsila tsakana aňatà. Kà slaka aňatà aña magay la tataka aña azlauwana la abà, tadiŋ gəl à Yesu à vok à uwana Zəzagəla adatsatsamani atà’, Yesu agòd.”

Pol apəhay lakəl aña sləray aňha

¹⁹ “Iyay, sufəl Agəripa, gəkəs kà tatak uwana Zəzagəla afətəgəla à adi ala la zagəla. ²⁰ Terəŋa dadəŋ kà, gəzəŋ kà azlaməna madz à ahəŋ la Damas, ŋgaha la Urusalima, azlauwana la kutso Yahudiya gesina, kà atà mapəh gay la ləv ala, la mabədlə vok à slaka Zəzagəla, ŋgaha kà atà madəh azlasləray delga, la uwaga azladza aña masəlay kà tagola ləv aňatà la dziriga. ²¹ Kà uwaga à uwana azla Yahudiya takəs gi la məŋ gəy Zəzagəla la aku, tawoyà makəf gi, ²² Ama tsərəh à lakana Zəzagəla anəŋla gi, gədatsizl à ahəŋ aña mapəhla ala dziriga la huma azladza gesina, la azlaməŋga la azladza anik gesina. Gəpəh tatak anik aw, say uwana Musa la azlaməna mapəh à atà gay à ahàl tapəh adəpaka vok pəra: ²³ Kristu adàsa ŋgərpa, adəgay matera aña mawul à uda la mamətsay, kà mapəhla ufaka aña mabəlay azla Yahudiya ala, la azlatsəhay anik anik gesina bay, tagòd.”

“Diŋal gəl à vok!”, Pol agòd à Agəripa

²⁴ Bokuba uwana Pol apəh dziriga aňha kà, Festus agòdɤal la kuda zləkkà: “Pol, kak utsi, mapatla, madzəŋay aňak uwaga kà apakəkala kà kusoŋu!” ²⁵ Pol agòdɤal: “Gi la lig aňak, gi kusoŋu aw! Uwanay kà gay dziriga, uwana azladza takəsay la uwana gəpəh gesina. ²⁶ Haday sufəl Agəripa, guba akəs gi, kà mapəh à ka aw, kà uwana kasəl gay gulo, tatak la ahəŋ mahadəkəŋ à adi gə la uwanay la abà gesina aw, kà uwana uwanay kà apəhla vok ala kà la dazuwaya. ²⁷ Sufəl Agəripa, kadiŋ gəl à uwana à vok, azlauwana azlaməna mapəh à atà gay à ahàl tapəhà ay? Gəsəl kà kadiŋal gəl à vok!” ²⁸ Agəripa agòd à Pol: “Tsa baŋa kiya uwaga kà, fà à gi, wəf vok à uda kà mapak gi ala, kà masla madiŋal gəl à vok zlà!” ²⁹ Pol agòd: “Adəgay lagwa, ku bà la huma la gay, gədəv kudə à Zəzagəla, kà kak la azlaməna matsəb gi sləm uwana la abanay gesina, kà akul magay kiya gi, uwana gi masla manəfay, ama la kokudə mazakazak!”

³⁰ La lig aña uwaga la ahəŋ, sufəl, gumna, la Berenəs gesina tasà à afik la azladza uwana la abatà kà uwana kaslà adaslay. ³¹ Uwana tadà à fəta à awtəy, tagòd kà: “Dza uwanay kà, adəhəŋ mawisiga uwana asla makədlə, baməraka maduw à dəŋay aw.” ³² La abatà Agəripa agòd à Festus: “Naka məsləlla vok aña maduw gəl à dza uwanay, agay ayəh madiya seriya à huma aña sufəl Rom aw.”

27

Tasləl Pol à Rom

¹ Mok uwana agèd à afik kà maday à Italiya la kəslah iyaw kà, tafà Pol la azlaməna danay anik, à ahəl anja mənğa anja azlaslodzi anja sufəl Rom, uwana sləm anja Yuliyus, masla tekula anja azlaməna manəŋla mən sufəl. ² Məhəd à kəslah iyaw uwana à afik asà à waŋ la Adəramit kà, uwana atsizlla à ahən la azlabəza gudən uwana la abà la gay dərəv uwana la kutso Asəya la abà. Arəstarkus, zil Makeduniya alakà anu.

³ La bebən gə, məbèz à Sədon. Vok aham à Yuliyus kà Pol, avəl tetəvi kà maday manəŋ azlaslawda anja à gay, kà manəŋal à adi. ⁴ Dagay la abatà mətəzizlla ala, məguwà la makəla anja gudən Sipəre, uwana la iyaw la abà, la gay uwana afad la ahən aw, kà uwana afad awul anu à adi la azlaslaka anik anik la abà. ⁵ Məguwà à uda la dərəv uwana la abà la makəla anja Səlisəya la Pamfiliya, məbèz à gudən Mira uwana la kutso Lisəya la abà. ⁶ La abatà mənğa anja azlaslodzi abəzà kəslah iyaw anik uwana atsizlla ala la Alekəsandəra, uwana adiyà à Italiya. Abək anu à uwatà à afik.

⁷ Mədà à huma la ŋuv ŋuv la azlamahanay anik anik la abà: La kudfa kudfa məbəzà à Sənid, à kà uwana afad adəd à anu gay à ahən kà maday à huma, məguwà la makəla anja Kəreta, uwana afad la ahən aw, mətəzəda à Salmone lakəl ala. ⁸ Məzləl gərdza la zlazlada, məbèz à slaka uwana tazalalla slaka matsizl à ahən delga, uwana kərkər la kutso Lase aw.

⁹ Mədzà à ahən mənğa la abatà kà uwana maday la kəslah iyaw kà zlazlada, tsərəh à uwana təla awkuza adà à lig. ¹⁰ Gay gə la uwaga Pol apəh à azladza anik à vok à abà la magod à atà: “Mauguzahay gami kà, adagay zlazlada ŋodəgi, kà uwana mən kular la ahən, azlatatak uwana la kəslah iyaw la abà, bə la gəl kəslah iyaw gə bay kà, tadəwis ala. Bə uwaga pəra aw, bə sifa gami babay kà, tadətafay ŋodəgi aw.” ¹¹ Ama mənğa anja azlaslodzi akəs gay anja masla mabiy kəslah iyaw la mənğa anja kəslah iyaw, kà gay anja Pol. ¹² Mətəzizlla à ahən la abanay la viya la abà kà delga aw. Gay gə la uwaga, gay mənğa anja azladza tayəh kà maday kà məbəz Fenikəs, la abatà la uwana slaka matsizl à ahən anja azlakəslah iyaw la gay tər gərdza anja Kəreta uwana agola à huma à mas à afik afats, ŋgaha la matəd à ahən afats à gay, kà uwana slaka uwatà kà adzà à afad à ama.

Kular la dərəv lakəl

¹³ Bokuba uwana bəzi afad adzəkà vok kà madəday fewfafew kà, delga tagod à kà uwarə afad adika atà, ŋgaha mauguzahay gami kà adagay delga tagod, ŋgaha tapəlla tatak uwana tawəfəh ala à kəslah iyaw à ahən, la maday la manəf gay gərdza anja Kəreta. ¹⁴ Ama asəf aw, katskats magol afad gədgədgəga uwana sləm anja maul à ahən anja mas à afik afats, asà à ahən la gudən uwana la afik la tataka iyaw la abà. ¹⁵ Aduwə ndzəda anja kəslah iyaw, dza aslala vok anja madla aw. Məsək afad, adəla anu bokuba uwana asəl. ¹⁶ Məguwà la makəla gudən uwana la iyaw la abà, sləm anja Kawda, uwana adzà à anu à ama ŋuv. La abatà la kudfa kudfa məwadə bəzi kəslah iyaw à ahən, kà mazila aw. ¹⁷ Tazəb kəslah iyaw bəziga uwaga, tafà à mənğa à afik. ŋgaha tatsefədə mənğa à ahən la azlazuwid, kà uwana guba akəs atà kà mazləl wuyyan, uwana la gay gərdza anja Libiya. Gay gə la uwaga tazəb lukut uwana à ahən adəla kəslah iyaw, taməl à iyaw à abà, tasək à kəslah iyaw afad adəla. ¹⁸ La bebən gə, afad bə madəday adəday, kà tadzəkà matsikla kazlanja uwana la kəslah iyaw la afik. ¹⁹ La bebən gə aya kà, tawəts ala azlazuwid la azlalukut la azlaahəf uwana tadəla kəslah iyaw la ahəl anətə. ²⁰ Mavakay dən kà mənənə afats la azlatsetsilin aw. Kà uwana afad adəday la ndzəda, tsərəh à uwana məfə madzugway kà mətəfay aw.

²¹ Azladza uwana la kəslah iyaw la afik tazùw tatak may dagay uwatà aw, Pol atsizilla ala, agòđ à atà: “Azladedà, agayña kakəsàw gay gulo kà à uwana madz à ahəŋ la Kəreta, gəgòđ kà, naka ŋuləm, naka mətəfay la nassara uwanay la abà adazuw anu la mazila uwanay mədàzila. ²² Ama lagwa kà, d’èđàw gay ləv, kà uwana dza la ahəŋ adàzila la tataka gami la abà aw, say kəslah iyaw pəra. ²³ Kà uwana la vədəfa kà, Sufəl Zəzagəla gulo uwana gənəfay, asləl malika aŋha à waŋ à slaka gulo. ²⁴ Agòđ à gi: ‘Pol, guba akəs ka aw! Ndzer, kadàtsilay à huma aŋa sufəl aŋa Rom. Aganay, vok adahama à Zəzagəla adàbəl sifa aŋak la azladza uwana la kəslah iyaw la afik gesina.’ ²⁵ Gay gà la uwaga guba akəs akul aw, gəfa madzugway gulo à Zəzagəla à afik, kà adàdehəŋ bokuba uwana apəh à gi! ²⁶ Ama afad adàdala anu à gudəŋ anik à afik la iyaw la abà.”

²⁷ Adadəh mahəŋay kulo gəl aŋha ufad à uwana afad adzəkà madla anu à dərəv à abà. La tataka vəd, masla mabəlak kəslah iyaw adzùgw kà: ‘Mədàbəz à kutso à abà’, gəl agòđal. ²⁸ Tazəb zuwid uwana tadəbal adà à agay kà magur zəŋzəŋ aŋha dərəv. Zəŋzəŋ aŋa kà, kà kulaslay dzik səla. Tadà à huma zwek kà kulaslay kulo. ²⁹ Guba akəs atà kà afad aŋa madla atà à gudəŋ à afik, gay gà la uwaga tatsək adà ufad à iyaw à abà, la lig kəslah iyaw, ŋgaha takudà kà afad aŋa madla aw tsərəh à məl maulla. ³⁰ Azlaməna mabəlak kəslah iyaw kà, asà à atà mas à ahəŋ la kəslah iyaw la afik kà madiŋ atà. Tazəb bəzi kəslah iyaw à ahəŋ à iyaw à gəl, ŋgaha tadzùgw kà mamalay adà, mawad ala kəslah iyaw à vok la huma gà bay. ³¹ Ama Pol agòđ à azlaslodzi la azlaməŋga aŋatà: “Baŋa azlaməna mabəlak kəslah iyaw tadza à ahəŋ la kəslah iyaw la afik aw kà, məbəlay aw.” ³² La abatà azlaslodzi tanàtsàhà zuwid uwana ala tadbəla kəslah iyaw bəziga gà, tasàkal, adà aŋha kokudà gəl aŋha.

³³ Mok uwana məl adawula à waŋ dadəŋ aw kà, Pol adəv atà kudà kà mazuw tatak may, agòđ à atà: “Dagay mahəŋay kulo gəl aŋha ufad kazuwaw tatak aw, kakùdàw. ³⁴ Delga kazuwaw tatak may ŋuv, à baŋa asa à akul mabəlay. Ama bamərika aŋidz gəl aŋkul azila aw!” ³⁵ Uwana adapəh uwaga, azəb tatak may, atsàkəŋ ala, kikay agòđ à Zəzagəla la huma azladza gesina, ŋgaha tadzəkà mazuway. ³⁶ Kiya uwaga haŋkəli aŋatà gesina adza à ahəŋ titi, tazùw. ³⁷ Matugway aŋa azladza uwana la kəslah iyaw la afik kà dadərmokw səla bəzi aŋha dzik mədəf gəl aŋha mukwa. ³⁸ Mok uwana tadahən ala tatsək nalkama à iyaw à abà kà matetuw mahanay aŋa kəslah iyaw.

Kular asləha kəslah iyaw ala

³⁹ Mok uwana məl adawulla kà, azlaməna mabəlak kəslah iyaw tasəl slaka uwana atà la abà aw, ama tawùl à slaka wuyyaŋ gà, kà uwana tanəŋà dzəluy aŋa dərəv. Tayəh madla kəslah iyaw à abatà kà magəd à abà à baŋa abəzà vok, tagòđ. ⁴⁰ Gay gà la uwaga tanàtsàhà zuwid adà uwana tawəđàhla à ahəŋ, tasàkal la iyaw la abà. ŋgaha tatsizlləŋ ala lukut, uwana la huma kəslah iyaw, kà afad aŋa madla à wuyyaŋ uwatà à afik. ⁴¹ Ama kəslah iyaw abəzà slaka uwana iyaw slemslem gà, atsà gay tər à wuyyaŋ à abà. Tetuwa abəlakà vok aw. ŋgaha godega gà kà maganətsay aŋa iyaw akàlàhəŋ ala gesina.

⁴² Azlaslodzi tawoyà makad azlaməna daŋay, kà tekula aŋatà aŋa matəfay la mago-sagosa aw. ⁴³ Ama məŋga aŋa slodzi aŋa Rom uwana asəl matəf Pol, adəđ à atà gay à ahəŋ kà magəd mapəhay aŋatà à afik. Avà tetəvi à azlauwana tasəl magosagosa kà mavalàh à iyaw à abà kà mats à vok à kutso à abà. ⁴⁴ Azlaanik aŋatà takəs azlaahəf aŋa kəslah iyaw à ahəl kà mas à uda, azlaanik tadəh à uda la makas azlamakalahla aŋa ahəf uwaga, kiya uwaga gesina aŋatà tasà à kutso à abà la wurwur.

28

Pol la kutso uwana la afik la iyaw la abà uwana sləm aŋha Malta

¹ Uwana mədabəz à kutso à abà la wurwur, mətşənəŋ kà sləm aŋa gudəŋ uwatà tazalalla Malta. ² Azladza la abatà takəs anu la ahàl səla. Uwana iyaw adadzəka masuway, anasl adzəkà vok babay, tavàtsàh à anu akàl à ahəŋ. ³ Pol ayàh tsetsema kà mabək à akàl à gay, akàl akudək bebi makəsafər gà à uda la tsetsema uwatà la abà, atsà Pol. ⁴ Mok uwana azladza uwana la abatà tanəŋà bebi adagəf à Pol à ahàl tadzəbərta kà, tagòf: “Paraka, zil uwanay kà masla makəf dza. Baməraka adatəfay la iyaw uwanay la abà bay kà, mazlazlay gami uwana mənəfay, sləm aŋha dziriga kà, adàsakal la sifa aw.” ⁵ Ama Pol akotsàk bebi à akàl à abà, atsənà mazəŋ aŋha amiyaka ŋuv ŋuv aw. ⁶ Madzugway aŋatà kà ahàl akəsàlal à gəl baŋaw amətsay, tagòf. Ama uwana adasafay, tanəŋà uwana adfahàlla tatak aw, tagòf: “Iyay, masla kà zəzagəla.”

⁷ Guf aŋa Pubəliyus, sufəl aŋa azladza gudəŋ uwatà la ahəŋ nekwa la slaka uwatà. Akəs anu la ahàl səla aŋa diŋa, mədza à ahəŋ la mtəga aŋha mahəŋay makər. ⁸ Baba aŋa Pubəliyus la slaka mahən à ahəŋ, akàl la vok atàh hudzay aŋiz. Pol ahàd à slaka aŋha, adəv kudfa, abəkàl ahàl à gəl, awurəŋ ala. ⁹ La lig la ahəŋ, azladza uwana la kutso uwatà la abà atà la dʒuvats, tasàhà à waŋ à slaka Pol, awarà atà ala. ¹⁰ Tavàhà à anu azlatatak deyday kà aŋuvaw. La mok uwana məday à kəslah iyaw à afik kà madiy aŋami babay kà, tavàhà à anu azlatatak uwana mənəkudfa aŋha la mauguzahay gami la abà gesina.

Pol atsizlla ala la Malta kà mad à Rom

¹¹ La lig aŋa təla makər la ahəŋ mətşizlla ala, mədà à kəslah iyaw uwana à afik aguwa à waŋ la Alekəsandəra tazàlalla: ‘Fəla vəgal’, uwana adzà à ahəŋ la gudəŋ uwatà la abà la təla zlazladfaga. ¹² Məhəl vok la abatà, məbəz à gudəŋ uwana sləm aŋha Sərakusa, məfahəŋ mahəŋay makər la abatà. ¹³ Mətşizlla ala la abatà aya, məbəz à gudəŋ uwana sləm aŋha Redziyo. La bebəŋ gà, afəf aŋa gəl à agu adzəkà vok. La mahəŋay səla la abà à məbəzà à Pusol. ¹⁴ La gudəŋ uwatà la abà kà, məbəzà à deda à vok uwana: “Dahàw à waŋ kasukwa tekula la abanay”, agòf à anu. Mətşilla ala, məhàd la asik. La kiya uwaga à uwana məbəzà à Rom. ¹⁵ Mok uwana azladedda la Rom tatsənà gay lakəl gami, tasà à waŋ à kasukwa aŋa Apiyus à slaka matsekw à ahəŋ, uwana barki makər la abatà bay kà magagamay anina. Uwana Pol adanəŋ atà, ‘Kikay’, agòf à Zəzagəla, adzərəfà vok ala, arəb məŋga.

Pol la Rom

¹⁶ Mok uwana mədabəz à Rom kà, tavà tetəvi à Pol kà madz à ahəŋ kokudfa gəl aŋha la slodzi tekula uwana anəŋla. ¹⁷ Uwana mahəŋay makər adada à lig kà, Pol azàläh azlaməŋga aŋa azla Yahudiya uwana la Rom. Tahamà gay à vok, agòf à atà: “Hadfay, azladedda, gəfahà mawisiga à azladedda gami à vok baməraka lakəl aŋa azlababa gami madzidziga gami aw, ama takəs gi la Urusalima, tafà gi à azla Rom à ahàl. ¹⁸ Azla Rom tanavà gi tatak uwana gəfahəŋ. La abatà asà à atà maduw gi gəl kà uwana tanəŋà mawisiga uwana gəfahəŋ kà makəfəla gi aw. ¹⁹ Ama uwana azla Yahudiya takəs kà, tadùw gi gəl aw, gay gà la uwaga leri gulo, gəgòf kà, say tafàh gi seriya kà la huma aŋa sufəl Rom, awkà gəpuwà gudzi azlatsəhay gulo à gəl magay aw. ²⁰ Gay gà la uwaga gəyàh akul aŋa manəŋ akul la mapəh à akul gay uwanay babay, tawəfà gi, kà gay aŋa dza uwana azla Isərayel tafà manəwəŋ aŋatà à afik, à uwana tawəfà à gi la mazakazak uwanay zlà.” ²¹ Tagòfal: “Məbəzal wakità tatsətsər à waŋ la Yahudiya babay aw, dza la ahəŋ asà à waŋ la abatà aŋa mapəh à anu tatak uwana apakà vok babay lakəl aŋak aw. ²² Ama lagwa asà à anu matsən madzugway aŋak lagwa zlà, kà uwana məsəl kà baməraka la mali kà, tapəsəw azladza uwana tanəf uwanay kak la abà lagwa.”

²³ La abatà tafà afats à ahəŋ, kà maham gay à vok aya la azla Pol. Uwana mavakay uwaga adaslay, azlauwana tahamà gay à vok la slaka Pol aduwà uwana uwarà. Lis, Pol avàk à mapəhatàla à gəl matapatàla gay makoray Zəzagəla. Awəđ vok à uda kà magəđ à atà à gay aŋa Yesu à afik adzəđ à atà gay aŋa Yesu ala la wakità aŋa Musa la abà, la uwana azlaməna mapəh à atà gay à ahəl tapəhla à abà. ²⁴ Azlaanik aŋatà takəs uwana Pol apəh, ama azlaanik takəs aw. ²⁵ Uwana tavəh vok ala kokufa matsən vok gay la tataka aŋatà la abà, Pol apəh à atà kà gay tekula pəra: “Tatak uwana Masasəđok Zəzagəla apəh à azlababa aŋkul la ahəl aŋa masla mapəhal gay à ahəl Yesayya kà, agəđ à afik hađay! ²⁶ Zəzagəla agəđ:

'Həd, gəđ à azladza gulo:

Katsənawwan ləla, ama bokuba katsənawwan aw.

Kanəŋawwan, ma bokuba kanəŋawwan aw.

²⁷ Azladza uwanay tadzadzəŋəh gəl aŋatà ala.

Tanakəh à sləm aŋatà à ama.

Tatsakəh à yewdi aŋatà à ama.

Tsa baŋa kità kà, atà aŋa manəŋla la yewdi, atà aŋa matsən la sləm aw.

Ŋgaha kà ləv aŋatà aŋa masəl tatak aw.

Ŋgaha kà atà aŋa mawul à slaka gulo kà gi gədəwur atà ala aya aw.*

Zəzagəla agəđ.”

²⁸ Pol agəđ aya: “Hađay, sələw kà Zəzagəla asləl gay aŋha à slaka azlatsəhay anik bay lakana, kà atà aŋa matsənəŋ!” ((²⁹ La lig aŋa uwaga la ahəŋ azla Yahudiya tadə aŋatà la mabay vok gay la tataka aŋatà la abà.))

³⁰ Mavay səla Pol adzà à ahəŋ la gəy hayyà la aku. Akəsəh dza uwana tadəh à awtəy à slaka aŋha la ahəl səla. ³¹ Azahà gay aŋa Zəzagəla, apəhla gay aŋa Sufəl Yesu Kristu à azladza, apəh la mawəđ vok à uda, dza la ahəŋ adəđal gay à ahəŋ aw.

WAKITÀ UWANA POL ATSETSÈR À AZLA ROM Lettre de Paul aux Romains

Pol adàh ayyi à azlamèna gudəŋ Rom

¹ Gi Pol, la uwana gətsetser wakità uwanay, gi uwana gi mayà aŋa Yesu Kristu. Zəzagəla akəsàni gi, kà gi aŋa magay masla matapla aŋha, kà gi aŋa maz gay marabəŋ à azladza. ² Gay marabəŋ uwanay kà, Zəzagəla apəh à anu à ahəŋ, kà masləl à anu à waŋ la paŋaw aŋa azlamèna mapəh à atà gay ahəl la awtày dagay uwarà, bokuba uwana matsetserayga la wakità Zəzagəla la abà. ³ Apəhay lakəl aŋa Kona aŋha, Sufəl gami Yesu Kristu, la kaslà uwana asà à gudəŋ à vok, agà mayyi à tsəh ala aŋa David. ⁴ Ama la kaslà uwana Zəzagəla awùlla à uda la mamətsay agədàŋ à afik kà Kona aŋha, la ndzəda ŋgaha ahənàŋ ala la ndzəda aŋa Masasəfok aŋha. ⁵ Kà madegolay masla aya à uwana Zəzagəla apakà gi ala kà masləlay aŋha, kà gi aŋa mad maz gay aŋha à azladza tsəhay gesina, kà atà aŋa madiŋal gəl à vok, ŋgaha kà atà makəs masla gay aŋha, kà atà aŋa masləkaw Yesu Kristu. ⁶ Akul, azla Rom babay akul la abà, à uwana Zəzagəla azalà à akul, kà akul aŋa magay azlaaŋa Yesu Kristu. ⁷ Gay gà la uwaga, gətsetser à akul, akul gesina uwana la Rom: “Zəzagəla awoya akul, Zəzagəla azalà à akul, kà akul aŋa magay azlaaŋha. Zəzagəla Baba, la Sufəl gami Yesu Kristu, kà vok ahamà atà kà akul, ŋgaha tavà à akul lapiya.”

Asa à Pol kà aŋa manəŋ

azlamèna madiŋal gəl à vok à gay la Rom

⁸ A dadàŋ kà, kikay gəgodf à Zəzagəla gulo kà aŋkul gesina, kà uwana azladza la gudəŋ la vok gesina kà, tapəhay lakəl aŋa madiŋ gəl à Yesu Kristu à vok aŋkul. Kikay gəgodf à Zəzagəla kà Yesu Kristu. ⁹ Baməraka mbaw, uwana gədəv kufda à Zəzagəla kà, gədəv kufda kà aŋkul, gi la madəv kufda la abà. Uwanay gəpəhay kà, Zəzagəla kà asəl kà dziriga, gədfəhəŋ sləray aŋha ndzer la ləv tekula, ŋgaha gəz gay marabəŋ lakəl aŋa Kona aŋha. ¹⁰ Gədəv kufda koksikoksi kà masla aŋa mav à gi tetəvi lagonay, à baŋa asal kà gi aŋa mad à awtày à slaka aŋkul. ¹¹ Asa à gi, kà gi aŋa maduw à awtày à slaka aŋkul ndzer, kà anu aŋa makal tatak, uwana Masasəfok Zəzagəla av à gi, ŋgaha kà madzərədfəh akul ala aya. ¹² Gədagoday, gəgodf kà anu gesina mədzərədfəh vok ala. Kadzərədfəwgəla kà uwana kadiŋaw gəl à Kristu à vok, ŋgaha gədzərədfəhakulla kà uwana gədiŋ à masla à vok babay.

¹³ Azladedə, sələw kà, gədzagàh mad à awtày manəŋ akul à gay, ama gəbəzà à tetəvi aw. Asà à gi mad à awtày kà madfəh sləray la tataka aŋkul la abà bokuba uwana gədfəhəŋ la azlatsəhay dza anik la abà babay. ¹⁴ Zəzagəla afà à gi sləray uwanay à gəl. La kità leri gulo gəz gay marabəŋ à azladza uwana tawur gəl, la azladza uwana tasəl tatak aw, gəzəŋ à azlauwana tadzeŋay la azlauwana tadzeŋay aw gesina. ¹⁵ Gay gà la uwaga, gəyàh tetəvi la iyaw tugwi kà mazakullaŋ gay marabəŋ à akul azladza la Rom babay.

Ndzəda aŋa gay marabəŋ

¹⁶ Ziruwi aza à gi kà maz gay marabəŋ aw. Gədfəf gay ləv kà mazaŋ gay marabəŋ, kà uwana ndzəda aŋa Zəzagəla la gay uwaga la abà, kà maβəl azlauwana tadiŋ gəl à Yesu à vok gesina. Terəŋa azla Yahudiya dadàŋ, ŋgaha azlauwana azla Yahudiya aw. ¹⁷ Gay marabəŋ uwaga la uwana apəhla ala kà, kakay Zəzagəla apaka kəla azladza ala dziriga la huma aŋha mi. Tetəvi uwaga adzəka vok kà la madiŋ gəl à masla à

vok përa. Bokuba uwana tatsetsër à wakità Zëzagëla à abà kà: Dza uwana Zëzagëla apakëñ ala dziriga la huma aña, kà uwana adin gël à Yesu à vok, kà masla la uwana la sifa dziriga.

Azladza gesina azlamëna tsakana

¹⁸ Ndzer, Zëzagëla apëh à anu la paraka kà masla la mapak lëv gà dagay la zagëla kà tsakana gesina uwana azladza tafëhëñ, ngaha kà uwana taslëkaway Zëzagëla aw. Adàdaha à atà seriya à gël, kà uwana la tatak mawisiga uwaga tafëhëñ kà adëd gay à azladza à ahëñ kà masël dziriga. ¹⁹ Zëzagëla adàdukw à atà seriya à gël, kà uwana tetëvi uwana à naka tasëla masla kà dazuwaya, kà uwana Zëzagëla la gël aña kà, adapëhatàla, ama tanëfà aw. ²⁰ Dza adanëñ masla dïkidiki aw. Ama la mañal gudëñ à vok tsëräh à lakana la uwana, azladza taslala vok aña masëlay lakël aña tatak uwana adahän. Uwaga paraka, masla la ndzëdä uwana atetuway dïkidiki aw. Ngaha adzadä ala babay, kà masla kokudä gël aña la uwana Zëzagëla. Kà uwaga à uwana Zëzagëla adäbasatan aw, tetuwa. ²¹ Tekedika tasël, kà Zëzagëla la ahëñ nëma, ama taslëkaw masla, bokuba uwana azlayla kà vok aw, kikay tagodäl aw. Madzugway añatà kà deydayga përa, tasël uwana tafëhëñ aw, tadza à ahëñ kà la mëlës la abà. ²² Madzugway añatà kà: ‘Anu azlamatsihila gä’, tagod, ama tsa tatsaha ala aw, ²³ kà aña maslëkaw Zëzagëla uwana la mazlëbay, ngaha uwana amëtsay dïkidiki aw. Kà atà kà, tasak à uwaga, taslëkaw kà azlamazlazlay. Tafahän kà azlatatak uwana la maftsa vok aña azladza uwana tamatsay, azlaanik bokuba azlatatak uwana taday la huf la vëdäh, ngaha azlaanik bokuba azlatatak mahoyay la zagëla, kà taslëkaw kà azlauwaga përa. ²⁴ Kà madëhëñ añatà uwaga à uwana Zëzagëla askätàla à ahäl la tsëh ala, kà atà aña madäh azlatatak mawisiga, uwana asa à lëv añatà, la kità tafaha azlatatak ziruwì gä, kà atà à atà. ²⁵ Dziriga aña Zëzagëla kà tasakal, tanëfa fida. Taslëkaw kà azlatatak uwana Zëzagëla añaläh la ahäl aña, ama taslëkaw masla uwana añäl tatak gesina aw. A naka taslëkaway kà masla aña koksikoksi la uwana. Amen.

²⁶ Gay gä la uwaga à uwana, Zëzagëla asakätàla à ahäl la tsëh ala, kà atà aña madëhëñ azlatatak uwana asa à lëv añatà. Azlamis tasak azlazil, ngaha tatsatsëläh vok kà atà kà atà mis mis, uwana naka azlayla kà vok aw. ²⁷ Azlazil babay tafahan kalkal la uwaga, tasak azlamis la tsëh ala kà matsatsëläh vok kà atà kà atà zil zil. Azlazil tafaha tatak ziruwì gä kà atà, tabiya seriya à gël añatà, la tsakana añatà uwana tafahan.

²⁸ Uwana azladza uwanay takweska masël Zëzagëla kà, Zëzagëla asakätàla la ahäl la tsëh ala, ngaha kà madzugway añatà aña magay mawisiga kayak, kà atà madäh azlatatak uwana azlayla kà vok kà madëhëñ aw. ²⁹ Azlatatak mawisiga gesina adahën lëv añatà ala, takäd yewdi à tatak aña azladza anik à vok, azlamaksafër, tafäh mañor, azlaadi, takäd dza, tabay vok gay, azladëmëdëm bokuba azlahayyan, tadala dza la gay. ³⁰ Takal dza ala, atà azlamëna mëzam aña Zëzagëla, tatsak magodahay à azladza anik à gël, azlazlapay takëslay, bà gotënan tayyi à tsëh azlatsakana anik anik aya, takës gay aña azlababa añatà dïkidiki aw. ³¹ Tasël gël aya aw, tagëdëñ gay añatà à afik aw, tasël mawoy dza aya aw, vok ahamaà atà kà azladza anik aw. ³² La paraka azladza uwaga tasël kà mapëhay aña Zëzagëla la ahëñ, ngaha këla dza uwana adäh tsëhay slëray mawisiga uwanay kà, mamëtsay atëdal à gël, ngaha bà uwaga tada à huma à gay la madäh mawisiga, ngaha tazlëba azladza uwana tafäh mawisiga uwaga babay.

2

Seriya aña Zëzagëla kà dziriga gä

¹ Kak uwana 'Gi masla madàh seriya à azladza anik à gəl', kagod, kasəl la gəl anək kà, kadàtəfay la huma seriya anə Zəzagəla aw, baməraka kadəgay uwi. Ndzer, la gay anək la uwana kàdabiyla vok seriya à gəl. ² Məsəl kà delga à baŋa Zəzagəla adàh seriya à azlaməna madàh mawisiga uwaga à gəl. ³ Kak dza, uwana kadàh seriya à azladza anik uwana à gəl tadàh tsəhay mawisiga uwaga, tsa kak babay kadəhən kà kiya anətà ma? 'Gədatəfay la huma seriya Zəzagəla', kagod takay? ⁴ Awma kapəsew Zəzagəla, kà uwana masla kà dza delga, ŋgaha akuday la tsetsi dadən anha. Səl kà, baŋa adəhan kiya uwanay kà, kà uwana asal kà kapəh gay la ləv ala aw takay? ⁵ Ama kak dzaŋdzaŋ, asa à ka mapəh gay la ləv ala aw. Kak la gəl anək kasəg vok seriya à gəl. Zəzagəla adàdukw à ka seriya à gəl. La kità kà, seriya anha adəkəs ka, la kaslə uwana mapak ləv anha adəpəhla vok ala la mavakay uwana adəfah seriya dziriga anha la huma azladza gesina. ⁶ Adəpəl masik anha à uwabeyuwi la kəla sləray anha. ⁷ Azladza tawəfàh vok à uda, asa à atà kà Zəzagəla adala atà à mazləbay anha à abà, ŋgaha Zəzagəla anə masəl atà, la masəl atà kà, masla avà à atà sifa adəv à gay aw. Sifa adəv à gay aw uwaga kà, Zəzagəla adəvay kà à tsəhay atà uwaga. ⁸ Ama azladza anik uwanay tafa asik à Zəzagəla à gəl, takweska dziriga, say mawisiga la uwana tanəfa. Ndzer, kà anə azlatsəhay dza uwaga kà Zəzagəla adəpaka à atà ləv à gəl anətà, ŋgaha adədukw à atà seriya à gəl. ⁹ Kà anə azladza gesina uwana tadəh mawisiga kà, tadəsa ŋgərpa zlazladəga; terəna dadən kà azla Yahudiya, ŋgaha la lig la ahən azlatsəhay anik anik gesina aya. ¹⁰ Ama azlauwana tawəfàh vok à uda kà madàh delga kà, masla adəv à atà mazləbay, Zəzagəla adəsəl atà, adəv à atà lapiya; terəna adəvay à azla Yahudiya dadən, la lig la ahən à azlatsəhay anik anik gesina babay. ¹¹ Kà uwana Zəzagəla kà avəh dza mavəhay aw.

¹² Azlauwana azla Yahudiya aw kà, atà kà, tasəl mapəhay uwana Zəzagəla apəh à Musa à ahəl aw. Baŋa atà tadəfaha tsakana kà, tadəzila kiya uwaga, kokudə magur atà la mapəhay uwaga. Ama azla Yahudiya kà tasəl mapəhay anə Musa, azlauwana tadəfaha tsakana la masəl mapəhay uwaga, seriya adəkəs atà, kà la uwaga suwan. ¹³ Kà uwana Zəzagəla adəpaka dza ala dziriga la huma anha la masəl mapəhəy pəra aw, say la madàh uwana apəh à abà, kiya uwaga kà agay dziriga la huma Zəzagəla. ¹⁴ Iyay nəma, azlatsəhay anik uwana azla Yahudiya aw kà, tasəl mapəhay anə azla Yahudiya aw, ama vərđi anik anik la gəl anətà tadəhən azlatatak uwana la tetəvi anə mapəhay uwatà la ama. La madəhən kiya uwaga, baməraka tasəl madàh tatak dzəbə anha səla aw gə. ¹⁵ Uwanay asal magodəy la madz à ahən anətà la abà kà, Zəzagəla afə mapəhay uwanay à ləv anətà à tsəh, kà atà anə masəlay uwana naka tadəhən. Kiya uwana ləv anətà apəhatàla, kà uwana vərđi anik awul atà à gəl kà tadəhən delga, ŋgaha vərđi anik awul atà à gəl kà tadəhən mawisiga. ¹⁶ Ama lakəl anə azlatatak uwana gəpəh à akul la abanay kà, adəsa à uda la dazuwaya la mavakay uwana Zəzagəla adəsləl Yesu Kristu à wan kà madàh seriya à azladza à gəl. Adəfah seriya à azlatatak mahadəhənəga uwana la ləv anətà la tsəh. Uwana gəpəh à akul la abanay kà, asa à uda kà la gay marabən uwanay la abà gəzan.

Azla Yahudiya takəs mapəhay anə Zəzagəla aw

¹⁷ Akul azla Yahudiya uwana: 'Anu azla Yahudiya', kagodəw, kafaw gəl anəkul kà à mapəhay uwanay à afik, katsaw zlapay la magodəy kà: 'Anu kà, məsəl Zəzagəla', kagodəw. ¹⁸ ŋgaha kasəlaw mawoyən anə Zəzagəla, ŋgaha la mapəhay uwana atapakulla, kà akul anə mayahani uwana delga. ¹⁹ Madzugway anəkul kà: 'Anu azlaməna makas azlaguləf à ahəl', kagodəw. ²⁰ ŋgaha kagodəw aya kà: 'Mapəhay anə Zəzagəla, kà anə azladza uwana tasəl tatak aw', kagodəw. Kagodəw aya kà: 'Mədàh à azladza uwana à ahən azlagubəgub la tetəvi anə Zəzagəla la tsəh'. Kagodəw aya kà: 'Mapəhay anə Zəzagəla atapanula masəlay, la dziriga anha gesina', kagodəw.

²¹ Iyay zlà, kà mana kapəhawla tetəvi à azladza anik à ama kà, mana kapəhawla à gəl ankul aw zlà ma? Kazaw sayda à azladza kà mad à gəl aw, ama kà mana akul kà kadaw à gəl ma? ²² 'Kadaw à gəl gaw aw', kagodəw à azladza, kà mana akul kà, kadaw à gəl gaw ma? Akul kafahaw akur à ahəŋ kà madəh mazlazlay, ama kà mana akul kahəlaw azlatatak, uwana la gày mazlazlay la aku ma? ²³ Kayyà, katsaw zlapay kà kaykay la magodəw kà: 'Məsəl mapəhay anja Zəzagəla', kagodəw, ama kà kalawla mapəhay anja ala, kiya uwaga kà, kawisaw sləm anja Zəzagəla ala. ²⁴ Kà uwaga à uwana tatsəsər à wakità anja Zəzagəla à abà, kà azlatsəhay dza anik tawis sləm anja Zəzagəla ala kà, kà madəhəŋ ankul, akul azla Yahudiya.*

²⁵ Akul azla Yahudiya kà, kadavaw vok à uda, kà mapəhla ala kà akul anja Zəzagəla. Ama baŋa kanəfaw mapəhay lela aw kà, makədəw vok à uda ankul kà deyday pəra. ²⁶ Baŋa dza uwana makədəw à uda gà aw, ama anəfa kà mapəhay, masla kà kalkal bokuba makədəw à uda gà. ²⁷ Dza uwana makədəw à uda aw gà, ama anəfa mapəhay, adəkəlla à akul ala ziruwi à gəl, à akul uwana kasəlaw mapəhay la gay anja makədəw vok à uda nəma, ama kanəfaw aw. ²⁸ Haday ma, magay zil Yahudiya ma la gay gà pəra takay? Awan, say la makədəw vok à uda, uwana anja Zəzagəla, awkà gay makədəvani sləb vok à vədah, uwana azladza tanəŋəŋ la yewdi pəra aw. ²⁹ Ama magay zil Yahudiya kà, aguwa à uda kà la ləv la tsəh, ŋgaha makədəw vok à uda kà agay kà anja ləv uwana Masasədok Zəzagəla, apəhla ala awkà la mapəhay uwana tatsetser aw, uwaga anəkudə maβəzal mazləbay la slaka azladza aw, ama la slaka Zəzagəla.

3

¹ Baŋa kiya uwaga ma, magay zil Yahudiya ma, mana akəs vok ma? Makədəw vok à uda ma, azlak anu takay? ² Haday, aduwa vok gesina, teraŋa dadəŋ kà, Zəzagəla afà gay anja kà atà à ahəl. ³ Iyay zlà, kakay mədagodəw la lagwa ma? Tsa azlaanik la tataka anjata la abà kà, tanəfa gay uwaga aw ma? Kadzugwaw ma Zəzagəla kà adəfah uwana apəh aw takay? ⁴ Awan! Bə amiyaka azladza gesina azlaməna fida babay kà, ndzer Zəzagəla adəfah dziriga anja. Bokuba uwana tatsəsər à wakità anja Zəzagəla abà kà:

'Kak Zəzagəla: Baŋa kəfadmə à azladza gesina tasəlay kà kapəh dziriga, amiyaka tapuwa à ka gudzi à gəl kà kadəkəfasl atà.*

⁵ Lagwa zlahaw azladza anik tagodəw kà, 'Mawisiga uwana mədəhəŋ kà, azlaka à azladza' tagodəw, 'Kà Zəzagəla kà adəhəŋ mawisiga aw'. Gay ma uwala à uwana mədəwulla atà ala la? Məgodəw kà Zəzagəla kà adəhəŋ mawisiga la matərabay, mədəgodəw ay? Uwanay gəpəh kà bokuba uwana azladza tapəhay. ⁶ Anja kiya uwaga ma, Zəzagəla ma dziriga aw zlà ma ay? Awan, kiya uwaga aw. Agayŋa Zəzagəla agay dziriga aw kà, naka aslala vok anja madəh seriya à gudəŋ à vok à gəl takay? ⁷ Zlahaw, azladza anik tagodəw babay kà: 'Fida uwana mədəhəŋ kà, azlaka kà azladza anja masəl dziriga anja Zəzagəla, kiya uwaga kà tadəzləb masla kà uwaga. Tsa baŋa kiya uwanay kà, anu azlaməna tsakana ma, la tetəvi uwali zlà ma li?' ⁸ Kiya uwaga azlaanik tagod: 'Mədəh mawisiga kà masəlay kà Zəzagəla kà masla mawoyəŋ, ma adəhəŋ mi?', tagod. Azlaanik tatugw à gi mawisiga à vok, tagod kà: Gi babay kà, gi gədzugway kà kiya uwaga. Zəzagəla adəfah seriya à azladza uwaga à gəl, kà uwana seriya uwaga kà azlayla à atà kà madukwatəŋ à gəl anja Zəzagəla.

Dza dziriga la ahəŋ amiyaka tekula aw

⁹ Lagwa ma, anu azla Yahudiya ma mədəw azladza anik takay? Awan. Tetuwa mədəw azladza anik aw. Gədapəha à akul, kà azla Yahudiya la azladza anik anik

* 2:24 2.24 Yesayya 52.5 * 3:4 3.4 Mahabay 51.4

gesina, kà anu la tsəh makoray aña tsakana. ¹⁰ Iyay, bokuba uwana tatsetsèr à wakità Zəzagəla à abà:

'Dza dziriga la ahəŋ la huma Zəzagəla amiyaka tekula aw.

¹¹ Dza la ahəŋ asəl dziriga aw

Dza la ahəŋ amiyaka tekula à uwana ayàh Zəzagəla aw

¹² Azladza gesina tagola à lig à Zəzagəla à gay, tawis ala gesina.

Dza la ahəŋ amiyaka tekula, adàh delga à azladza aw.

¹³ Kay, gay uwana atsa à afik la kuda aŋatà la ahəŋ kà, mawisiga bokuba mazinay aña zəvay mapəzlla à ama ala gà.

Alàh aŋatà kà avavar azladza.

Uwana atsa à waŋ la paŋaw aŋatà la awtày kà, kalkal la magur aña bebi uwana akəf dza.

¹⁴ Sləray aŋatà kà say matsafla dza pəra, ŋgaha gay dəhakakga pəra atsa à waŋ la gay aŋatà la awtày koksikoksi.

¹⁵ Tavay kà makəf dza.

¹⁶ Kəla slaka uwana taday kà, say gay atsən atà à tsəh ala.

¹⁷ Tasəl madz à ahəŋ la tələmma la abà la azladza aw.

¹⁸ Dikidiki tahoy yewdi aña Zəzagəla aw.*

¹⁹ Tekedika kà mapəhay aña Zəzagəla kà, apəhay kà azladza uwana mapəhay uwaga aga la atà la ahəl, kà maməts gay à gəl aña magay la ahəŋ, ŋgaha kà azladza gesina aña masəlay, kà atà azlaməna tsakana la huma Zəzagəla. ²⁰ Tsa aña kiya uwaga kà, dza la ahəŋ adəgay dziriga la huma Zəzagəla la manəf mapəhay aw, kà uwana mapəhay aña Zəzagəla apəhla ala kà masəl tsakana.*

Kakay azladza tapaka dziriga la huma aña Zəzagəla ma?

²¹ Ama lagonay kà, tetəvi uwana azladza tadəgəla dziriga la huma Zəzagəla kà, Zəzagəla adapəhla ala: Gay aña mapəhay la abà à tetəvi uwatà aw. Ama la wakità mapəhay aña Zəzagəla la abà, ŋgaha azladza uwana Zəzagəla apəh à atà gay à ahəl, kà mapàh à azladza, tapàhàh lakəl aña tetəvi uwatà dagay uwarà la magəfay kà: Zəzagəla adapəhla tetəvi anik mawga ala. ²² Tetəvi gə, uwana Zəzagəla apakla azladza dziriga ala la huma aŋha kà, la madiŋ gəl à Yesu Kristu à vok, Zəzagəla adapəzl tetəvi à azlauwana tadiŋ gəl à Yesu à vok, awkà azla Yahudiya pəra aw. Zəzagəla kà avàh dza aw. ²³ Dza gesina tafahaŋ tsakana, ŋgaha tabəzà mazləbay uwana naka Zəzagəla avà à atà aw. ²⁴ Ama Zəzagəla apis à atà gay à vok kà deyday, apakà atà ala dziriga la huma aŋha. Adəhəŋ uwaga kà la ahəl aña Yesu Kristu, à uwana apəlla atà ala la tsakana la abà. ²⁵ Zəzagəla afà à ahəŋ, kà masla aña mamətsay kà aña azladza, kà aŋiz aŋha aña mazəb à atà tsakana lakəl ala. Tetəvi uwaga kà, Zəzagəla apəzl à azladza, uwana tadiŋal gəl à Yesu à vok. Uwana adəhà uwaga kà, kà azladza aña masəlay kà masla kà dziriga. Bokuba magəfay kà, tsakana uwana uwarà tafahàhəŋ kà, Zəzagəla afal sləm aya aw. ²⁶ Abasəŋ ndzer, ama lagonay apəhla à azladza, kà masla kà dziriga. Masla asal madəhəŋ kà uwana dziriga, ŋgaha asal aya magəŋ azladza, uwana tadiŋ gel à Yesu à vok dziriga la huma aŋha bay.

²⁷ Tsa baŋa kiya uwanay kà, tatak la ahəŋ mətsalla zlapay takay? Awaŋ, tatak la ahəŋ aya aw. Zəzagəla adapaka anu ala dziriga kà, kà uwana mədiŋ gel à Yesu Kristu à vok. Awkà apakà anu ala dziriga kà, kà uwana mənəfa mapəhay aw. Tsa aña kiya uwaga kà, tatak la ahəŋ kà matsalla zlapay gami aya aw. ²⁸ Məsəl kà Zəzagəla apakà azladza ala kà dziriga la huma aŋha, à baŋa tadiŋ gəl à Yesu à vok, awkà kà uwana tanəfa mapəhay aw. ²⁹ Zəzagəla ma aña azla Yahudiya pəra takay? Awaŋ, aña azla

* 3:18 3.18 Mahabay 5.10; 10.7; 14.3; 36.2; 140.4; Yesayya 59.7 * 3:20 3.20 Mahabay 143.2

Yahudiya përa aw, ama Zëzagëla aña dza gesina. ³⁰ Kà uwana Zëzagëla kà tekula përa. Baña azla Yahudiya tadin gël à Yesu à vok, adàpaka atà ala dziriga la huma aña. Kà aña azladza tsəhay anik, uwana tadin gël à masla à vok bay kà, bə adàpaka atà ala dziriga la huma aña suwan ³¹ Zëzagëla apaka azladza ala dziriga, kà uwana tadin gël à Yesu à vok, uwana mөгod ma? Mөpөsew mapəhay takay? Tetuwa kiya uwaga aw! Mөгөdа mapəhay à afik kà la uwaga.

4

Kà mana Zëzagëla apakà Abəraham ala kà dziriga ma?

¹ Lagwa kà, mөdzugw lakəl aña Abəraham baba gami, uwana akəslla anu ala. Mana mөpөhay lakəl aña ma? Mana Abəraham abəzəl ma? ² Baña Zëzagëla apakən ala dziriga la huma aña kà, kà uwana adahàhən azlatatak dzəba aña səla aw gə, kiya uwaga naka azlayla kà Abəraham atsà zlapay. Ama atsà zlapay la huma Zëzagëla aw. ³ Kiya uwanay à uwana tatsetsər à wakità Zëzagëla à abà:

'Kà Abəraham adin gel à Zëzagëla à vok, kà uwaga à uwana Zëzagëla azalà ala dza dziriga la huma aña.'*

⁴ Səlàw kà baña dza adàh sləray delga, ngaha tavəl tatak kà madegolay sləray aña, tatak uwaga tapəlal kà masik aña, awkà deyday tavəl aw. ⁵ Baña dza adin gël à Zëzagëla à vok, uwala adzugw magay dziriga la huma Zëzagëla kà, sləray uwana adahən aw, la kità Zëzagëla adàpakən ala kà dza dziriga kiya uwanay. Zëzagëla kà, la maslay kà mapak masla tsakana ala kà dziriga la huma aña, ngaha adàh uwaga kà deyday. ⁶ Kalkal à uwana David apəh babay. Apəh lakəl aña azladza, uwana Zëzagëla apakàtəla kà azladza dziriga la huma aña. Sləray aña ahəl aņatà à uwana atugw aw. Azladza uwaga kà atà la marabay. ⁷ David agod kà:

'Marabay agay la azladza uwana Zëzagëla adəməts atə tsakana aņatə ala, marabay agay la azlauwana masla adətsak atə mawisiga aņatə ma.

⁸ Marabay agay la dza uwana Sufəl atugw tsakana aña aw.'*

⁹ Mөwul à gay aña David à tsəh. Marabay ma, la azladza uwana makadav atə à uda gə pəra takay? Awan, marabay kà la azlauwana makadav atə à uda gə aw babay. Mətsənən kà Abəraham agə dziriga la huma Zëzagëla, kà uwana adin gel à masla à vok. ¹⁰ Mok uwala Abəraham agə dziriga la huma Zëzagëla la? Mok uwatə ma akədəv vok à uda ay? Awma à lig la sufa gə ay? La mok uwatə kà, aləg aña makədəv vok à uda dən. ¹¹ Makədəv vok à uda, uwana Abəraham akədəv vok à uda kà, uwaga kà, agə madiya kà mapəhla ala kà, adadin gël à Zëzagëla à vok, ngaha Zëzagëla apakə masla ala kà dza dziriga, à mok uwana aləg makədəv vok à uda dadən. Kà uwaga à uwana Abəraham apakə baba aña azlauwana kokudə makadəv vok à uda, ama tadin gël à Zëzagëla à vok. Kiya uwaga masla adəpaka atə ala dziriga la huma aña, bokuba uwana apakə Abəraham ala babay.* ¹² Masla ndzer kà baba aña azlaməna makadav vok à uda gə bay. Ama gesina azlabəza aña aw, say azlauwana tanəfa madiņal gël à vok aña, kiya masla uwana adin gël à vok, la mok uwana aləg makədəv vok à uda.

Azladza uwana tadin gël à Yesu à vok, la uwana tabəz tatak

uwana Zëzagëla apəh à ahən

¹³ Dagay uwana Zëzagëla apəhà Abəraham à ahən la mayyi à tsəh ala aña kà, adavə à atə gudən à vok tadəkoray. Uwana Zëzagëla apəh uwaga kà, kà uwana Abəraham anəfə mapəhay aña wakitə seriya aw, ama apəhal kiya uwaga kà, kà uwana adin gël à Zëzagëla à vok, ngaha apakə dziriga la huma aña. ¹⁴ Iyay, agayña

* 4:3 4.3 1Musa 15.6 * 4:8 4.8 Mahabay 32.1-2 * 4:11 4.11 1Musa 17.10

azlauwana tadinj gəl à mapəhay anja wakità seriya à vok, tabəz tatak uwana Zəzagəla apəh à ahənj kà, naka azlauwana tadinj gəl à Zəzagəla à vok tagay deyday, ngaha naka tatak uwana Zəzagəla apəh à ahənj kà mavà y bay, naka agay deyday aya. ¹⁵ Haday, kà uwana mapəhay kà atsala kà mapak ləv anja Zəzagəla à wanj à gəl anja azladza uwana tanəfa aw, ama la slaka uwana mapəhay la ahənj aw kà, mapəsew mapəhay la ahənj babay aw.

¹⁶ Gay gə la uwaga à uwana, Zəzagəla apəh kà, apəh à ahənj kà anja azlauwana tadinj gəl à masla à vok. Adəhənj kiya uwanay, kà masla anja mav à atà tatak uwanay deyday. Asal mavà y à mayyi à tsəh ala anja Abəraham gesina. Avà y à azlaməna manəfay pəra aw, ama à azlatsəhay anik gesina, uwana tadinj gəl à Zəzagəla à vok bokuba à Abəraham, kà uwana Abəraham kà baba gami gesina. ¹⁷ Bokuba uwana tatsetsər à wakità Zəzagəla à abà, Zəzagəla agòf à Abəraham:

'Gəfa ka à ahənj kà kagay baba anja azlatsəhay anjvaw.'

Abəraham apakà baba gami la huma Zəzagəla, kà uwana adinj gəl à Zəzagəla à vok. Zəzagəla masla mav sifa à azlamazimnekidf, ngaha agənj la ahənj la afad gay anja azlatatak uwana amiyaka tagəhəh la ahənj aw. ¹⁸ La kità, Abəraham ahəd à huma à gay la madinj gəl à Zəzagəla à vok. Amiyaka uwana azladza tadzugw à tetəvi uwatà, kà Zəzagəla adəh uwana apəh à ahənj aya, aw. Abəraham ahəd à huma à gay la maf manəwənj anja à Zəzagəla à afik. La lig la ahənj Zəzagəla adəhallənj uwana apəhəl à ahənj la abatà, apakà baba anja azlatsəhay anjvaw, bokuba uwana Zəzagəla apəhal: 'Mayyi à tsəh ala anjak adagay anjvaw.' ¹⁹

¹⁹ Mok uwana Zəzagəla apəh uwaga kà, Abəraham mavay anja kà azlatalka dzim. Asəl kà adagay makoz gurdza gurdza, ngaha bay mis anja Sara bay kà degər aya, ama tayà vok la madinj gəl à vok la abà aw, kà uwana asəl kà Zəzagəla adadəh, uwana apəh à ahənj. ²⁰ Masla babay asəl kà adəbəz tatak uwana Zəzagəla apəhal à ahənj, abək gəl à ahənj səla aw. Madinj gəl à vok anja adzərəd ala kaykay, asləkəw Zəzagəla. ²¹ Ndzer, asəl la lela kà Zəzagəla la maslay kà madəh uwana apəhal à ahənj. ²² Gay gə la uwaga à uwana Zəzagəla, azalà ala: Dza dziriga la huma anja. ²³ Gay uwana Zəzagəla atəgwla Abəraham la dziriga la afik kà tatsetsər kà anja Abəraham kokudə anja pəra aw. ²⁴ Tatsetsər uwaga kà anjami babay. Banja mədinj gəl à Zəzagəla uwana à vok awùlla Sufəl Yesu à uda la mamətsay la abà, masla adəpaka anu ala dziriga la huma anja babay! ²⁵ Zəzagəla avà Yesu à ahəl anja azladza kà makəfay kà tsakana gami. Ngaha aya, Zəzagəla awùlla à uda la mamətsay, kà anu anja magay azladza dziriga la huma Zəzagəla kà masla.

5

Yesu adasəlla anu vok la Zəzagəla

¹ Tsa bà, uwana Zəzagəla adapaka anu ala dziriga la huma anja, kà uwana mədinj gəl à masla à vok, lagonay kà, gay la ahənj la tataka gami la abà la Zəzagəla aya aw, kà uwana Sufəl Yesu Kristu adasəlla anu vok la mamətsay anja. ² Yesu Kristu apəzlla anu tetəvi, kà anu anja mabəz mapis gay à vok la slaka Zəzagəla, kà uwana mədinj gəl à masla à vok. Mətsizlla à mapis gay à vok uwaga à afik, ngaha mərəb la mavaləh à zagəla, kà uwana mənawanj kà mədəbəz humə mazləbay gami la huma Zəzagəla. ³ Mərəbay la mavaləh à zagəla kà anja uwaga pəra aw, məvaləh à zagəla babay kà baməraka anu la mas ngərpa la abà, kà uwana ndzer məsəl kà ngərpa azlaka anu kà anja magur mabasiñ. ⁴ Banja məsla mabasiñ, mədəhənay, banja mədəhənay kà, mədəfa manəwənj gami à gay Zəzagəla à afik, adəvə anu bokuba uwana agòf. ⁵ Banja mənawanj kiya uwanay, mədəməts à vədəh deyday aw, kà uwana Zəzagəla apəh à

anu kà, awoya anu kà kaykay. Masasəfok aṅha uwana avà à anu, apèhanula masal aṅha.

⁶ Iyay uwarà kà, ndzəɗa gami la ahəŋ aw məslàla vok aṅa matəf gəl gami aw. La kaslà uwatà Yesu asà à waŋ, aməts kà aṅa azlaməna tsakana, à kaslà uwana Zəzagəla afà à ahəŋ. ⁷ Ndzer, məsəl kà zlazladfa kà dza aṅa mamətsay kà aṅa masla gamagày aṅha, bà amiyaka masla anəfa mapəhay bay kà, zlazladfa. Bi dza anik kà aslala vok aṅa makəs mamətsay kà madegolay dza uwana asəl dza. ⁸ Ama Zəzagəla apèhanula kaykay à mawoy anu aṅha mi, avà Yesu Kristu, aməts kà aṅami à mok uwana mələg azlaməna tsakana gə dadəŋ. ⁹ Yesu Kristu aməts kà aṅami, Zəzagəla apakà anu ala dziriga la huma aṅha la aṅiz aṅha. Tsa aṅa kiya uwanay, haday ndzer zlà kà, Yesu Kristu adətəf anu la mapak ləv aṅa Zəzagəla la abà. ¹⁰ Dagay uwarà məgà azlaməna məzam aṅa Zəzagəla, masla asəlla anu vok la mamətsay aṅa Kona aṅha. Bà uwana adasəlla anu vok la uwaga kà, məsəl ndzer kà adəbəl anu aṅa koksikoksi kà uwana Yesu avà sifa aṅha. ¹¹ Adadəv à gay kiya uwanay pəra aw. La kaykay kà, mərəbay la mavalàh à zagəla lakəl aṅa uwana Zəzagəla adəhanəŋ. Sufəl gami Yesu Kristu arabà anu ləv la uwana adàla anu à slaka Zəzagəla kà mapak anu ala azlaslawda aṅha.

Adama la Kristu

¹² Aganay godega aṅa gay uwanay: Tsakana asà à gudəŋ à vok kà, kà dza tekula uwana sləm aṅha Adama, ŋgaha la tsakana aṅha uwatà la abà la uwana, mamətsay aslèhà à gəl aṅa dza gesina, kà uwana dza gesina tadəhà tsakana, kà madegolay tsakana aṅa dza tekula uwaga. ¹³ Amiyaka mok uwana Zəzagəla aləg mav mapəhay aṅha kà, tsakana kà agà la ahəŋ la gudəŋ la vok. Ama Zəzagəla atugw tsakana lakəl aṅatà aw, kà uwana mapəhay aṅa Zəzagəla la ahəŋ dadəŋ aw. ¹⁴ Amiyaka la uwaga bay, d'adzəkà vok aṅa Adama, tsərah à Musa kà, mamətsay akòr lakəl aṅa azladza gesina, amiyaka tsakana aṅatà adəbanì aṅa Adama uwana akweskà mapəhay aṅa Zəzagəla bay aw kà tamətsàh.

Adama kà maftsa vok aṅa dza uwana atsa à waŋ. ¹⁵ Ama mavày uwana Zəzagəla avà à anu la dza uwanay kà, adəbanì vok la tsakana aṅa Adama d'ikidiki aw. Haday, aṅuvaw taməts kà tsakana aṅa dza tekula, ndzer, ama dzəba aṅha səla aw aṅa Zəzagəla aduwa uwaga la məŋga, kiya uwaga babay mavày deyday uwaga aviyà à azladza aṅuvaw, kà madegolay dza tekula Yesu Kristu. ¹⁶ Ama uwana Zəzagəla avà bay kà godega aṅha kà gərgər dəŋ awkà kiya tsakana aw. Tsakana uwana dza tekula uwatà adəhəŋ kà adukw ala seriya à gəl. Tekedfika, baṅa Zəzagəla apis gay à azladza à vok deyday, amiyaka tadəh tsakana aṅuvaw kà adəpaka atà ala kà azladza dziriga la huma aṅha, ŋgaha kà seriya matəf à atà à gəl aw. ¹⁷ Ndzer kà, dza tekula adəhà tsakana, ŋgaha tsakana akəs dza à gay gesina kà madegolay dza tekula uwaga. Ama dza anik, à Yesu Kristu adəhəŋ kà sləray anik. Kà madegolay masla, Zəzagəla avà mapis gay à vok la madu w à vok aṅha. Ŋgaha tadəbəz sifa, tadəkoray koksikoksi, kà madegolay Yesu Kristu.

¹⁸ Kà tsakana aṅa dza tekula Adama, à uwana tsakana asà à azladza gesina à gəl, ŋgaha seriya atəd à atà à gəl bay. Ŋgaha kà sləray dziriga aṅa dza tekula, Yesu Kristu bay la uwana adapəlla azladza ala la seriya aṅa Zəzagəla la abà, ŋgaha adàv à atà sifa adəv à gay aw. ¹⁹ Kà dza tekula Adama uwana akweskà mapəhay aṅa Zəzagəla, la uwana azladza gesina tapakà azlaməna tsakana, ŋgaha kà dza tekula Yesu Kristu bay, la uwana azladza aṅuvaw tadəpaka dziriga la huma Zəzagəla, kà uwana masla kà akəs gay aṅa Zəzagəla.

²⁰ Ama baṅa mapəhay adənazila kiya uwanay kà, kà tsakana aṅa azladza aṅa maṅazila kaykay. La kità, baṅa tsakana aṅa azladza adənazahla, mapis gay aṅa Zəzagəla aṅazàhla kaykay bay. ²¹ Bokuba uwana tsakana la uwana akoray lakəl aṅa

mamətsay kiya uwaga la dziriga, mapis gay à vok anja Zəzagəla aga la maslay anja mapak dza ala dziriga la huma anja kà mapis gay à vok, uwatà kà akoray, kà anu anja magay la sifa, uwana adəv à gay aw la ahàl anja Sufəl gami Yesu Kristu.

6

Mamətsay kà ahàl tsakana,

ama madz à ahəŋ la sifa kà ahàl Yesu Kristu

¹ Mana mədàgoday lagwa mi? Mədza à ahəŋ la tsakana la abà, ŋgaha mapis gay à vok anja Zəzagəla adəŋazila takay? ² Awan, kiya uwaga aw, məmèts kà ahàl tsakana, ŋgaha ma kakay məda à huma à gay la tsakana la abà aya zlà ma? ³ Hay! Kasəlaw kà, mok uwana mədahà batem kà, məgà à maham à gay à vok gà la Yesu Kristu la abà, la mok uwaga kà, bokuba magodday kà, məmèts la masla babay aw takay? ⁴ La batem kà, məkəs mamətsay la masla, kà mal anu la masla, kà anu anja masak à madz à ahəŋ maviyaga, bokuba uwana Zəzagəla awùlla Yesu à uda la ndzəda anja mazləbay anja.

⁵ Haday, anu azlamamatsay gà bokuba masla. Kiya uwaga mədahama gay à vok la masla, tsa kiya uwanay kà ndzer, mədàwul à uda bokuba uwana masla awul à uda babay. ⁶ Məsəl kà, la mok uwana Yesu Kristu aməts à ahàf à adi kà, Zəzagəla atatəsl madz à ahəŋ maviyaga gami à adi la abatà bay, kà vok tsakana gà uwanay anja mamətsay, kà anu anja magay azlamayà anja tsakana aya aw, ⁷ kà uwana tsakana anja magay la ndzəda la dza mamətsay gà aya aw. ⁸ Kà uwana mok uwana Kristu aməts kà, məmèts la slaka gà la masla, kiya uwaga, məsəl kà anu la masla, mədàdza à ahəŋ la sifa bay la masla. ⁹ ŋgaha aya, məsəl babay, kà Yesu Kristu awul à uda la mamətsay adəmətsay aya aw, kà uwana ndzəda anja mamətsay la ahəŋ lakəl anja aya aw. ¹⁰ La mamətsay anja kà, avàhalla la tsakana anja tetuwa. Lagwa aga la ahəŋ la sifa kà anja Zəzagəla anja koksikoksi. ¹¹ Iyay zlà, akul babay kà, kiya uwaga, sèlèw kà, kamətsaw kà ahàl tsakana. Lagwa akul la ahəŋ la sifa la huma anja Zəzagəla, kà uwana kahamaw gay à vok la Yesu Kristu.

¹² Tsa anja kiya uwanay lagwa zlà kà, kasakaw à tsakana akor akul aw. Kanəfaw mabila anja vok anjul, uwana adəzakulla vərđi anik aw. ¹³ Kakəsaw kà tsakana abəza tetəvi à tsəh anja madukw akul à ahəŋ, kà mawis akul ala aw. Tsa banja kiya uwaga zlà kà, vaw vok anjul à Zəzagəla, kà uwana akul azladza uwana kamətsaw, ŋgaha kawullaw à uda, vaw vok anjul à masla gesina, sàkəwwal adəhla akul sləray bokuba akul azlakazlanja sləray delga gà. ¹⁴ Kiya uwaga kà, tsakana adədza à akul à gəl aya aw kà uwana akul la tsəh anja mapəhay aw, kà magay la dziriga la huma Zəzagəla kà, dzaw à ahəŋ la mapis gay à vok anja la abà.

Anu azlamayà anja Zəzagəla, awma anja tsakana ay?

¹⁵ Uwaga ma, mana asal magodday lagwa mi? Məkor gəl kà madəhəŋ tsakana, kà uwana anu la tsəh anja mapəhay aya aw, kà uwana anu la mapis gay à vok anja Zəzagəla la abà takay? Tetuwa kiya uwaga aw! ¹⁶ Kasəlaw kà, banja kaduwaw vok anjul à dza anik ala, ŋgaha kagodəwwal kà kakəsaw gay anja kà, kapakaw mayà anja aw takay? Banja tsakana la uwana adza à akul à gəl, ndzer, akul azlamayà anja tsakana, ŋgaha kabiyaw mamətsay à gəl. La kità, banja kakəsaw kà gay anja Zəzagəla, kiya uwaga kagaw azlamayà anja, ŋgaha adəpaka akul ala kà azladziriga la huma anja. ¹⁷ Haday aw ay, uwarà kagaw mayà anja tsakana, ama lagonay kà, kiya uwaga aya aw. Kakəsaw gay uwana atəpakulla, kakəsaw azlatatak uwana atəpakulla la ləv tekula, kikay məgod à Zəzagəla kà uwaga. ¹⁸ Mapəlla, uwana kapələwla la tsakana la abà, kà kapəkəwla azlamayà anja dziriga adagay, kà akul anja madəh dziriga. ¹⁹ Gəpəh

à akul la gay zil kiya uwanay kà, kà uwana akul azlaguɓguɓ dadàŋ, kà matsən azlatatak uwanay. Dagay uwarà kavàw vok aŋkul gesina à mawisiga, kaŋazàhàw tsakana ala. Kà uwana kadàhàhàw mawisiga. Ama lagonay kà, vaw vok aŋkul à Zəzagəla aŋa dikiɗiki. Dahàw dziriga, ŋgaha kà madz à ahəŋ aŋkul aŋa magay sətaka.

²⁰ Dagay uwarà, à mok uwana kalègàw azlamayà aŋa tsakana, tatak la ahəŋ afà à akul leri à gəl, kà manəf dziriga aŋa Zəzagəla aw. ²¹ Mok uwana kadàhàhàw azlatatak ziruwi gə uwaga ma mana kabəzàwwal la abà lagwa zlà mi? Lakana kà kakəlàw ziruwi à azlatatak mawisiga uwaga à gəl mədàtsalah à gay, kà uwana madəv à gay aŋa uwaga kà mamətsay. ²² Lagonay kà, kapələwla la tsakana la abà, kagaw azlamayà aŋa Zəzagəla. Lagwa tatak delga uwana kabəzàwwal la abà, kà madz à ahəŋ aŋkul adəgay sətaka la huma Zəzagəla, ŋgaha aya, akul kadàbəzawwal sifa adəv à gay aw la makəɗ gəl à ahəŋ. ²³ Ndzer, masik aŋa tsakana kà uwaga mamətsay, ama mavəy deyday aŋa Zəzagəla kà sifa adəv à gay aw, kà uwana mədahama gay à vok la Sufəl gami Yesu Kristu.

7

Ndzəɗa aŋa mapəhay la ahəŋ lakəl gami aw

¹ Azladedə gulo, gəpəh à akul kà, kà uwana kasəlaw mapəhay, kasəlaw kà mapəhay kà la ndzəɗa lakəl aŋa dza, uwana la sifa dadàŋ. ² Bokuba magoɗay, baŋa mis adada à zil. La mok uwana zil aŋha aləg la sifa kà, tetəvi la ahəŋ kà aŋa mad à zil anik aw, kà uwana mapəhay avà à tetəvi aw. Ama baŋa zil aŋha adamətsay kà, tetəvi la ahəŋ adagay, kà mad à zil anik. ³ Kay, ama baŋa zil aŋha aləg la sifa, nəma pəra ada à zil anik aya, masla azaɓ zil. Ama baŋa zil adamətsal à akəl ala masla la tetəvi, baməraka ada aŋha à zil, agay masla mazaɓ zil aw, kà uwana kà akəlla mapəhay ala aw. ⁴ Kiya uwaga kà, aŋkul babay azladedə. Kadzaw à ahəŋ la ahəl aŋa mapəhay kà, bokuba akul azlamamatsay gə, kà uwana kamətsaw la slaka gə la Yesu Kristu. Kità akul azlaaŋha, masla la uwana Zəzagəla awùlla à uda la mamətsay. Kà anu aŋa madàhallan sləray uwana akəsa à vok gesina. ⁵ Mok uwana uwarà kà, mədza à ahəŋ kà bokuba uwana asà à gəl gami, ama mapəhay aŋa Zəzagəla la uwana: Uwanay la uwanay kà tsakana, agoɗàh à anu. Kiya uwaga à uwana apəh à anu ala tsakana, uwana mədahahəŋ tekidik. Azlatatak mawisiga uwaga takor gəl aŋatà la anu la abà, ŋgaha tadək anu à mamətsay à abà. ⁶ Uwarà kà, mapəhay afà à anu à ahəŋ bokuba azladaŋay. Lagonay kà, mədamətsal à adi ala à mapəhay uwaga, ndzəɗa aŋha la ahəŋ lakəl gami aya aw. Lagonay adagay kà, mədàh sləray aŋa Zəzagəla la madz à ahəŋ mawga la abà, la tetəvi aŋa Masasəɗok aŋha la ama, awkà la tetəvi maviyaga, uwana tatsetsər à mapəhay à abà aya aw.

Mapəhay apəhanula tsakana

⁷ Kakay gəgoɗay mi? Mapəhay aŋa Zəzagəla ma tsakana takay? Awan, tsakana dikiɗiki aw. Ama agayŋa mapəhay agay la ahəŋ, awkà naka gəsəl tsakana aw. Agayŋa mapəhay agoɗay: Kadàhaw adi aw, awkà naka gəsəl adi aw. ⁸ Hay, ama la mok uwana gətsənəŋ mapəhay uwaga kà, tsakana abəzà gi à tsəh, ŋgaha gədzəkà madàh adi à azlatatak gesina à tsəh. Mok uwana mapəhay la ahəŋ aw kà, tsakana kà agà tsaftsaf. ⁹ Mok uwana uwarà gəsəl mapəhay à dadàŋ aw kà gəgoɗ kà: 'Gi la sifa.' Ama mok uwana gədatsən mapəhay kà, tsakana aŋazà gay ala. ¹⁰ ŋgaha gəsəl kà tsa gi mamətsayga. Zəzagəla avà mapəhay uwaga kà, kà mapəhgəla tetəvi sifa, ama adàla gi kà à mamətsay. ¹¹ Mok uwana gətsənə mapəhay uwaga kà, tsakana abəzà gi à tsəh, apapàt gi, kà gi aŋa madàh tsakana, ŋgaha agəɗ kà uwana gəɗàh tsakana.

¹² Kiya uwaga kà, mapəhay atsa à waŋ kà la ahàl aŋa Zəzagəla, ŋgaha kəla mapəhay aŋha bay kà tsikasla gesina, dziriga. ¹³ Baŋa kiya uwanay ma, tatak uwana delga la uwana adapaka gi matsapa vok takay? Awaŋ masla aw! Uwaga kà tsakana la uwana apaka matsapa kà makəɔf gi. Tsakana abəz gi à tsəh kà makəɔf gi ala, tatak delga uwaga kà masəlay, kà tsakana kà bə tsakana ndzer, ŋgaha kà uwana mapəhay la ahəŋ, tsakana apəhla tsakana ala kà mawisiga la tetuwa.

Dza kà tsakana adafal à asik à gəl

¹⁴ Məsəl kà mapəhay kà atsa à waŋ kà la slaka Zəzagəla, ama gi kà gi dza deyday gə pəra, gəgə bokuba mayà aŋa tsakana. ¹⁵ Gətsənà uwana gəɔfehəŋ aw, gəɔfehəŋ kà uwana asà à gi aw, hərəzka aŋa uwana asà à gi aw, la uwana gəɔfehəŋ aya. ¹⁶ Baŋa gəɔfehəŋ, kà uwana asà à gi aŋa madəhəŋ aw, uwaga apəhla ala kà mapəhay aŋa Zəzagəla kà delga. ¹⁷ Ama mawisiga uwaga kà gi la uwana gəɔfehəŋ aw. Tsakana uwana la gi la abà la uwana adəh uwaga. ¹⁸ Gəsəl kà delga la ahəŋ la gi la abà aw, à gi dza uwana gi dza asik aw. Kay kà, asa à gi madəhəŋ delga nəma, ama gəslala vok aw, kà uwaga. ¹⁹ Tatak delga, uwana asa à gi madəhəŋ kà, gəɔfehəŋ aw, ama tatak mawisiga uwana asa à gi madəhəŋ aw, la uwana gəɔfehəŋ. ²⁰ Baŋa gəɔfehəŋ kà tatak, uwana asa à gi aw kà, uwaga kà gi la uwana gəɔfehəŋ aw, tsakana uwana la gi la abà, la uwana adəhəŋ.

²¹ Kiya uwaga à uwana gəɔfehəŋ koksikoksi, baŋa gəɔhəŋ delga zlà, gi gəgəɔday kà, tsakana la uwana atsavok gi à huma. ²² La madzugway gulo la abà kà, mapəhay aŋa Zəzagəla kà akəs à gi gəl ndzer. ²³ Ama la madz à ahəŋ gulo la abà kà, gənəŋəŋ kà tatak anik la ahəŋ à uwana apa guvəl la madzugway delga uwana la gi la abà. Tatak mawisiga uwaga la gi la abà kà, asal mapak gi ala kà mayà aŋha. ²⁴ Yayatsiya, uwa à uwana adəpəl gi ala la madz à ahəŋ mawisiga gulo uwanay la abà, adala gi à mamətsay uwa? ²⁵ Kikay gəgəɔf à Zəzagəla la ləv tekula, kà uwana masla la uwana adapəl gi ala kà ahàl aŋa Sufəl gami Yesu Kristu.

Gəgəɔf la madzugway gulo la abà kà, gəɔfehəŋ kà mapəhay aŋa Zəzagəla. Ama dza sləb vok kà, asal kà gənəfay kà tsakana.

8

Sifa uwana Masasəɔfok Zəzagəla av à azladza

¹ Lagwa kà Zəzagəla adədukw seriya à azladza uwana à gel, tahama gay à vok la Yesu Kristu aya aw. ² Kà uwana ndzəɔfa aŋa Masasəɔfok Zəzagəla uwana avà à anu sifa la ahàl aŋa Yesu Kristu, adapəl gi ala la ndzəɔfa aŋa tsakana la abà la mamətsay. ³ Mapəhay aŋa wakitə seriya asla mav sifa à azladza aw, kà uwana anu azladza asik məslala vok aŋa madəhəŋ uwana asa à mapəhay aw. Ama uwana mapəhay aslala vok aw kà, Zəzagəla kà ahənəŋ ala. Zəzagəla adəhəŋ uwaga la masləl Kona aŋha à waŋ à gudəŋ à vok, la sləb vok kiya aŋa aŋami azlaməna tsakana. Masla asà à waŋ aŋa mazəb anu tsakana lakəl ala. Kiya uwaga Zəzagəla adukwə seriya aŋa tsakana aŋa azladza à gəl aŋha. ⁴ Zəzagəla adəhəŋ uwaga, kà anu aŋa maslala vok, kà madəhəŋ delga uwana mapəhay ayahay kà uwana məkəsə gəl à ahəŋ la tsəh aŋa uwana asa à Masasəɔfok Zəzagəla, awkà uwana asa à sləb vok gami aw. ⁵ Azlauwana tadzadzar vok bokuba uwana asa à gəl aŋatà kà, tatuway kà à uwaga à tsəh koksikoksi. Ama azlauwana tadzadzar vok bokuba uwana asa à Masasəɔfok kà, atà bay tatuway kà à uwana à tsəh, asa à Masasəɔfok uwaga bay. ⁶ Baŋa anu mətuw à uwana à tsəh asa à sləb vok gami kà, abiyən mamətsay à gəl, ama baŋa mətuway kà à uwana à tsəh asa à Masasəɔfok kà, mədàbəza sifa la lapiya. ⁷ Azlauwana tatuway kà à uwana à tsəh, asa à vok aŋatà kà azlaməna məzam aŋa Zəzagəla. Atà tanəfa mapəhay aŋa

Zəzagəla diki diki aw. Ndzer kà, taslala vok aña makəsay aw. ⁸ Azlauwana tadzadzar vok bokuba uwana asa à gəl aña tà kà, taslala vok aña mahəf à Zəzagəla à adi aw.

⁹ Ama akul kà kadzadzaraw vok kà la makəs gəl à ahəŋ la tsəh aña Masasəfok Zəzagəla, kà uwana Masasəfok uwaga aga la ahəŋ la ləv aña kul la tsəh. Dza uwana la Masasəfok uwaga aw kà, masla kà dza aña Yesu Kristu aw. ¹⁰ Baña Yesu Kristu la akul la abà kà, baməraka kamətsaw kà madegolay tsakana babay kà, bə Masasəfok aña uwana avà à akul adzadzar akul, kà uwana Zəzagəla adapakakulla dziriga la huma aña. ¹¹ Baña Masasəfok aña Zəzagəla uwana awulla ala Yesu Kristu à uda la mamətsay la akul la abà, la kità bay ndzer kà, Zəzagəla uwaga adawulla ala akul à uda la mamətsay babay. Adəfah uwaga kà la ndzəfa aña Masasəfok aña, uwana la akul la abà.

¹² Azladedə, tsa kiya uwanay kà, goder aga anu lakəl, kà aña madzadzar vok, bokuba uwana Masasəfok Zəzagəla ayahay, awkà bokuba uwana asa à sləb vok gami aw. ¹³ Baña kanəfaw kà tetəvi uwana asa à vok aña kul kà, kadəmətsaw. Ama baña kavəw tetəvi à Masasəfok Zəzagəla, kasaw à uda la azlatatak mawisiga uwaga la abà kadəhawwan kà, kadəbəzaw sifa. ¹⁴ Azlauwana takəsà gəl à ahəŋ la tsəh aña Masasəfok Zəzagəla, gesina kà azlabəza aña Zəzagəla. ¹⁵ Masasəfok uwana Zəzagəla avà à akul kà, apəkakulla kà azlamayà, ŋgaha avà à akul guba aya aw. Ama apəkakulla kà azlabəza aña. Avà à anu gay kà magəfay à Zəzagəla: “Baba, kak tsuŋulo!” ¹⁶ Kiya uwaga Masasəfok uwaga abəfanumà la ləv la tsəh: Ndzer, anu azlabəza aña Zəzagəla. ¹⁷ Tsa bə uwana anu azlabəza aña Zəzagəla adagay kà, mədəbəza azlatatak dzəba aña səla aw gə, uwana adafa à anu à ahəŋ. Ama kà Yesu Kristu la uwana mədəbəza azlatatak uwaga, kità mədəbəza mazləbay uwaga, kà uwana məs ŋgərpa anina la slaka gə bay.

Gay lakəl aña mazləbay uwana mədəbəzal

¹⁸ Aganay gəgəf à akul kà, ŋgərpa uwana məsəy la abanay la vədəh la sa uwanay kà, uwaga kà apaka kà bokuba tatak deyday. Tetuwa adətsizilla à mazləbay aña Zəzagəla, uwana à huma adavà à anu aw. ¹⁹ Tatak gesina uwana Zəzagəla adəhəŋ, takuday la tsetsi dadəŋ à mavakay uwana Zəzagəla adəpəhla à azlabəza aña ala la dazuwaya, kà masla aña mapəhla mazləbay aña tà ala. ²⁰ Azlatatak uwana Zəzagəla adəhà à atà kà, tagahay kà bokuba azlatatak deyday. Atà la gəl aña tà kà, tawoyəŋ kiya uwanay aw. Zəzagəla la gəl aña la uwana asakətəla à ahəl la tsəh ala, ama atà tafə manəwəŋ aña tà à azlatatak anik à tsəh gotənaŋ. ²¹ Kà uwana vərđi anik kà, Zəzagəla adətəf azlatatak uwana adəhà à atà, ŋgaha tadəgay kiya azlamayə aya aw. Tadəzinla aya aw. Atà babay tadəkor gəl, tadəbəza mazləbay bokuba uwana azlabəza aña Zəzagəla tadəbəzal bay suwan. ²² Məsəl kà dagay madzəka tsərah à lakana kà, kəla tatak uwana Zəzagəla adəhəŋ kà, tabəs vok bokuba mis uwana huđ bəzi azəŋ ay ŋuwəfaw? ²³ Atà kəkuđə gəl aña tà pəra tabasay aw, baməraka anu, uwana Zəzagəla avà à anu Masasəfok aña bokuba tatak matapiŋ aña diŋa kà, məbas vok la ləv gami la tsəh bay. Məkuday la iyaw tugwi la adi, kà Zəzagəla aña madəpaka anu ala, kà anu azlabəza aña, adəsəlla anu à uda la mabas vok gami la abà aña tetuwa. ²⁴ Ndzer mədəbəlay lagwa, ama mədənəŋ azlatatak gesina dadəŋ aw, anu la manəwəŋ lakəl aña aña manəŋəŋ. Ama mok uwana mədənəŋ azlatatak uwaga mənawəŋ la yewđi gami kà, mədənewəŋ aya aw. Uwa à uwana anaw tatak uwana adənəŋəŋ la yewđi aña zlə ma uwa? ²⁵ Hadəy gə, mənaw tatak uwana mədənəŋiŋ dadəŋ aw. Kità məkuday la tsetsi dadəŋ kiya uwanay. ²⁶ Kiya uwaga bay Masasəfok Zəzagəla atsà à wan kà mazlak anu, anu uwana anu azlaguđguđ la tetəvi aña Zəzagəla la tsəh, kà uwana məsəl madəv kuđə, bokuba uwana naka akəs vok aw. Masasəfok la gəl aña abəf à huma kà aña mi, adəv kuđə à Zəzagəla la makəs aña f la adi ala. Dađuwa à gay madəv kuđə la gay. ²⁷ La paraka kà, Zəzagəla asəl uwana la

tsəh ləv aŋa azladza, ŋgaha babay asəl uwana Masasəfok aŋha adzugway, kà uwana Masasəfok abəd à huma kà aŋa azladza aŋha, adəv kudà à Zəzagəla bokuba uwana akəsəl à gəl.

²⁸ Azladza uwana tawoya Zəzagəla kà, azlauwana masla azala atà kà atà madfahalla tatak uwana ahəfal à adi, məsəl kà dèwdèw tatak uwana abəza atà, kà Zəzagəla adàh tatak uwaga à ahəŋ, kà makəf gəl à ahəŋ aŋha aŋa magay delga. ²⁹ Azlauwana Zəzagəla adatsatsamani atà dagay uwarà kà, adabək atà, afà atà awtày kà magay bokuba azlabəza aŋha, kà bəzi gay ləv aŋha aŋa magay malkwoy la tataka aŋa azlabəza dəŋ la abà. ³⁰ Abək atà, afà atà à awtày pəra aw, azalà atà pəra aw, apakà atà ala kà azladziriga la huma aŋha. Babay kà, atà aŋa magay azladza aŋha. Azalà atà pəra aw, apakà atà ala kà azladziriga la huma aŋha, ŋgaha avà à atà mazləbay aya.

Zəzagəla kà, awoya anu

³¹ Tsa aŋa kiya uwanay ma, mana à uwana atəm kà anu à ahəŋ aŋa mapəhay ma? Tsa Zəzagəla kà awùl kà à anu ma, uwa à uwana adàvədzah anu gəl aya uwi?

³² Zəzagəla kà akweslà bəzi aŋha aw, asləl à waŋ kà masla aŋa mamətsay kà, kà aŋami gesina. Tsa Zəzagəla avà à anu Kona aŋha ma, sakoraka azlatatak anik la uwana avà à anu aw takay? ³³ Uwa à uwana aslala vok kà mat kaf à azladza uwana à gəl, Zəzagəla adatsatsamani atà uwa? Kà uwana Zəzagəla adapaka atà ala kà azladza dziriga la huma aŋha. ³⁴ Uwa à uwana aslala vok aŋa madukw à atà seriya à gəl uwa? Yesu Kristu la gəl aŋha aməts kà aŋami, Zəzagəla awùlla à uda la mamətsay, adzanə madzay la ahəl kaf aŋha lakəl, ŋgaha masla la uwana abəfà à humù gami, la huma Zəzagəla. ³⁵ Uwa à uwana adàvah anu ala la Yesu Kristu kà masla aŋa mawoy anu aya aw uwa? Matərabay à uwana adàvah anu ala ay, awma mabas vok ay? Awma azlauwana tasa à anu zladfa la uwana adàvah anu ala ay? Awma may la uwana adatugw anu ala ay? Awma kudà ay? Bamərika anu la zlamtsa la abà, amiyaka katsakar, awma mamətsay la uwana adàvahanula la Yesu Kristu ay? Awaŋ, tatak la ahəŋ, à uwana adəf gay à masal aŋha ahəŋ, kà aŋa makweska anu aw. ³⁶ Úwaga kà bokuba uwana tatsetsər à wakità Zəzagəla à abà kà:

'Kà uwana anu azlaaŋak à kak Zəzagəla, à uwana anu la zlamtsa aŋa mamətsay la abà, kà uwana azladza tayàh makad anu koksikoksi. Anu kà mədagay la yewdi aŋa azladza kà kalkal la azlatuwaŋ, uwana tadala atà makad atà.'[☆]

³⁷ Ama mədaf asik à azlamatərabay uwaga à gəl gesina, mədafuw atà la ndzəfa aŋa dza uwana awoya anu. ³⁸ Ndzer, gəsəl kà tatak la ahəŋ à uwana avàhanula la masla, kà masla aŋa mawoy anu aw, aw. Amiyaka baŋa məmətsay, amiyaka anu la adi taslala vok aŋa madəf à anu gay à ahəŋ aw. Azlamalika la azlatatak uwana takor ndzəfa la zagəla gesina bay kà, taslala vok, kà madàh tatak kà masla aŋa mawoy anu aw, aw. Azlatatak uwana abəza anu lagonay, la azlatatak uwana adabəza anu la huma la gay bay kà, taslala vok madəf à anu gay à ahəŋ aw. ³⁹ Azlauwana, la ləv zagəla la abà, ŋgaha azlauwana la tsəh iyaw bay kà, taslala vok aŋa madàh tatak aw. Dèwdèw tatak uwana Zəzagəla adahəŋ taslala vok aŋa madedf gay à Zəzagəla à ahəŋ kà aŋa mawoy anu aw. Mawoy dza uwaga kà apəhanula kà la ahəl aŋa Sufəl gami Yesu Kristu.

9

Zəzagəla la azla Yahudiya

¹ Uwanay gəpəhay lagwa kà dziriga, kà uwana gi aŋa Kristu, gəfàh fida aw. Masasəfok tsikasla la madzugway gulo taza sayda aŋa uwaga babay. ² Gi la mazaw

[☆] 8:36 8.36 Mahabay 44.22

la gəl gə kaykay la ləv gulo la tsəh, ŋgaha la mazay mən̄ga ³ kà tsəhay gulo Isərayel, uwana gəwoyan̄. Agayŋa Zəzagəla akəf à atà gi à uda la tataka kà aŋatà ŋuləm, la mavahanula la Kristu, kà uwana azladeda gulo. ⁴ Atà mayyi à tsəh ala aŋa Isərayel. Zəzagəla atsatsàmàni atà, kà atà aŋa magay azlabəza aŋha, apəhatàla mazləbay aŋha, ŋgaha akəs vok slawda la atà, avà à atà mapəhay. Ŋgaha apəhatàla tetəvi kà masləkawla masla, ŋgaha apəh à atà azlagay, uwana avà à vok aŋatà abà, asal kà madehəŋ bay. ⁵ Atà mayyi à tsəh ala aŋa Abəraham la azlabəza aŋha, Isak la Yakuba uwana tadzà à ahəŋ uwarà. Yesu Kristu la sləf vok aŋha la abà kà mayyi à tsəh ala aŋatà bay. Kristu uwanay kà Zəzagəla agəŋ lakəl aŋa tatak gesina məzləba masla koksikoksi. Amen.

⁶ Mədzugw kà uwana Zəzagəla apəh à azlatsəhay aŋha à ahəŋ, adəhəŋ kiya uwatà mөгod aw. Ama kəla kà, azla Isərayel gesina la uwana taga tsəhay aŋha aw, say aŋa gay gə pəra. ⁷ Mayyi à tsəh ala aŋa Abəraham kà dəŋ, ama atà tagà azlabəza gay ləv aŋha gesina aw. Zəzagəla apəh à Abəraham à vok à abà dagay uwarà:

'Fofulo aŋak dziriga kà, adàsa à uda kà la mayyi à tsəh ala aŋa Isak la abà.'^{*}

⁸ Uwaga asal magodəy kà, azlabəza aŋa Abəraham gesina kà, atà tagà azlabəza aŋa Zəzagəla aw. Zəzagəla agəf kà, azlabəza aŋha dziriga kà, say azlauwana pəra tayyà à vok la uwana la afik, apəh à ahəŋ. ⁹ Uwana Zəzagəla apəh à ahəŋ kà:

'Baŋa mavakay uwana gəpəh à ahəŋ adəslay kà, gədəwul à awtəy, ŋgaha la mok uwatà la uwana Sara adəyya bəzi zilga',^{*}
agəf.

¹⁰ Ŋgaha kà uwaga pəra aw, ama mənərez lakəl aŋa vəgal, uwana Rebeka ayyà bay. Baba aŋatà kà la baba gami madzidziga Isak. ¹¹ Mok uwana aləg mayyàh atà kà Zəzagəla agəfal:

'Madəvla à ahəŋ adəduw uwana adatsa vok à ahəŋ.'

Mok uwana apəh kiya uwanay kà, tadəh tatak delga baməraka tatak mawisiga dadəŋ aw, Rebeka bay adəyyah atà aw. ¹² Zəzagəla adəhəŋ kiya uwanay kà, kà uwana zagəla aŋha kà madəh uwana asal. Akəsàni dza aŋha la tataka azladza anik la abà, kà huma à gay sləray delga aŋha uwana adəhəŋ aw.^{*} ¹³ Uwaga apakà vok bokuba uwana tatsesər à wakità à abà, Zəzagəla agəf:

'Gi Zəzagəla, la uwana gəkəsàni Yakuba, ŋgaha gi la uwana gəkweska Esaw bay.'^{*}

¹⁴ Baŋa kiya uwanay ma, mana mədəgodəy zlà ma? Kità ma Zəzagəla kà adədehəŋ kà la tetəvi aŋha aw mөгod ay? Tetuwa kiya uwaga aw. ¹⁵ Hadəy dagay uwarà agəf à Musa:

'Gədəfah delga à dza, uwana asa à gi madəhalla ala delga, vok mahamay adəkəsa à gi kà aŋa dza uwanay vok adəhama gi kà masla.'^{*}

¹⁶ Kiya uwaga, baŋa Zəzagəla akəsàni dza kà, bə akəsàni pəra, kà uwana asal madəhalla ala delga. Awkà kà, à huma à gay dza la mawad vok à uda aŋha, ŋgaha sləray aŋha pəra aw. ¹⁷ Kità mədzenəy la wakità Zəzagəla la abà babay kà, Zəzagəla agəf à Faruna:

'Gəfà ka à sufəl à abà kà deyday aw, ama kà gi aŋa mapəhla ndzəfa gulo ala la kak la abà, ŋgaha kà sləm gulo aŋa matsinla la gudəŋ la vok gesina.'^{*}

¹⁸ Ŋgaha Zəzagəla adəh delga à dza uwana asal, ŋgaha adzadzəŋ gəl ala la dza uwana asal babay.

Mapak ləv la vok mahamay aŋa Zəzagəla

¹⁹ Zlahaw tagəf à gi: 'Baŋa Zəzagəla akəsəŋ azladza kiya uwanay ma, kà mana ma masla apakàtəla kà azlamawisiga aya mi? Uwa la uwana atsizlliya à mawoyəŋ aŋha à huma uwi? Say azladza tadəhəŋ kà uwana afà à ahəŋ la gəl aŋha pəra.' ²⁰ Kayyà, zil!

^{*} 9:7 9.7 1Musa 21.12 ^{*} 9:9 9.9 1Musa 18.10 ^{*} 9:12 9.12 1Musa 25.23 ^{*} 9:13 9.13 Malaki 1.2-3 ^{*} 9:15 9.15 2Musa 33.19 ^{*} 9:17 9.17 2Musa 9.16

'Gi uwa', kagodf, kà mabay vok gay la Zəzagəla uwa? Tak ma abisl mañalay gə, agodf à dza uwana añal kà, 'Kà mana kañal gi kiya uwanay mi ay?', agodfay takay? ²¹ Masla mañal masik kà, aga la ndzəɔfa lakəl aña abisl aña aw takay? La abisl tekula aslala vok mañalàh masik səla, añal anik uwana asa à ləv aña kaykay, ñgaha anik bay añalay bokuba azlamasik anik anik gesina.

²² Iyay, agayña Zəzagəla asal magay bokuba masla mañal masik uwaga ma abəz kakay? Asal kà azladza tasəlay kà masla la mapak ləv gə lakəl aña azlaməna tsakana, ñgaha masla la maslay. Kità abasàtəñ baməraka tadəhəhla ləv à Zəzagəla à hudf, kay, kà atà kà azlayla à atà à mamətsay. ²³ Adəhəñ kiya uwanay kà, kà azladza aña masəlay, kà masla la mazləbay məñga, ñgaha kà masla aña mahəl atà à mazləbay uwaga à abə suwan, atà uwana asal madəha à atà delga. Masla adəha à atà à ahəñ dagay uwarà, kà atà aña mad à mazləbay aña à abə. ²⁴ Gesina gami kà Zəzagəla adazalla anu adagay kà mad à mazləbay aña à abə. Akəsàni kà azla Yahudiya à uda pəra aw, ama azalà azlatsəhay gesina. ²⁵ Uwaga bokuba uwana masla agodf la wakità aña Hosəya la abə kà:

'Azladza uwaga tagə azladza gulo aw uwarà, lagwa akul azladza gulo gədəgodf à atə.

Azlauwanay gəwoyà atə uwarà aw kà, tadəgay azlabəza gay ləv gulo adagay.

²⁶ La slaka uwana la abə: 'Akul, azlatsəhay gulo aw', tagodf à atə kà, zwek la huma la gay tadəzala atə ala 'Azlabəza aña Zəzagəla uwana la sifa.'✠

²⁷ Yesayya apəh la paraka lakəl aña azla Isərayel kà:

'Baməraka tsəhay Isərayel aņuvaw kiya wuyyan, uwana la mukwà la tsəh kà, sələw kà, azlauwana Zəzagəla adəbəl atə kà, atə dəñ aw.

²⁸ Sufəl Zəzagəla kà anəl gəl à ahəñ, kà mas à wañ à gudəñ à vok, kà madəh uwana apəh gesina, aw.'✠

²⁹ Kiya uwanay Yesayya uwanay adapəhay uwarà:

'Baña Sufəl Zəzagəla uwana akor tatak gesina kà, asakà azlauwana tsəhay gami anik la uda aw kà, mədəməts à gay bokuba azladza la gudəñ Sodom la Gomor!'✠

Yesu kà akur uwana atsala matekwidf à azla Isərayel

³⁰ Mana məgodfay lagwa ma? Azladza uwana azla Yahudiya aw kà, tayəh tetəvi kà magay dziriga la huma Zəzagəla aw, ama lagonay kà tagahay dziriga la huma aña, kà uwana tadin gəl à masla à vok. ³¹ Kà aña azla Yahudiya kà tayəh madək vok à mapəhay à afik kà atə magay dziriga la huma aña la uwatə, ama taslala vok kà makəɔfal gəl à ahəñ aw. ³² Kay, kà mana takəɔfal gəl à ahəñ aw ma? Kà uwana tadzugw kà 'Mədəgay dziriga la madəhəñ gami', tagodf. Ñgaha tadin gəl à Zəzagəla à vok aw. Kità kà, akur uwatə atsala atə matekwidf. ³³ Bokuba uwana tatsətsər à wakità Zəzagəla à abə:

'Nərəzàw, gətsəb akur matsəhla matekwidf à azladza à ahəñ la Siyon. Dzəgla uwaga la uwana adəduk w à azladza à ahəñ. Ama azladza uwana tadin gəl à dzəgla uwaga à vok kà, adəvavar atə aw.'✠

10

¹ Azladedə, asa à gi kà azlatsəhay gulo azla Yahudiya tabəlay gesina, gəsak à madəv kudə à Zəzagəla kà atə aw. ² Kà aņatə kà gi la uwana gəza sayda lakəl aņatə. Asa à atə ndzer mav vok aņatə à Zəzagəla, ama tetəvi uwana tavəlla vok aņatə kà masla aw. ³ Atə, tatsənə godega aña tetəvi uwana Zəzagəla apəkla azladza dziriga ala la huma aña aw, tanəfà kà tetəvi aņatə anik. Kità kà tavəlla à Zəzagəla à ahəñ lakəl à adi, kà uwana takəs tetəvi uwana Zəzagəla asal mapakla azladza ala kà azladza dziriga la huma aña aw. ⁴ Uwana gəpəhay kiya uwanay kà, à mok uwana Yesu, uwana mafal

✠ 9:26 9.26 Hosəya 1.10; 2.23 ✠ 9:28 9.28 Yesayya 10.22-23 ✠ 9:29 9.29 Yesayya 1.9 ✠ 9:33 9.33 Yesayya 28.16

dzakwa à gəl gà, asà à wanj kà, anatsà ndzəda aña mapəhay ala. Uwana adfahən kiya uwanay kà, kà azladza uwana tadinj gəl à masla à vok kà, kà atà la uwana Zəzagəla apakà atà ala kà azladziriga la huma aña.

Zəzagəla abəl azlauwana tadinj gəl à Yesu à vok gesina

⁵ Musa atsetsèr lakəl aña manəf mapəhay dagay uwarà. Kakay mədəgay dziriga la manəf uwaga mi? Agòd:

'Dza uwana anəfa mapəhay uwaga gesina adəbəz sifa kà uwaga. Kəla kà, say baña dza anəfa uwaga la denjan'✠

agòd. ⁶ Ama tetəvi aña mapakla dziriga la huma Zəzagəla, la madijal gəl à vok kà, gərgər: Tatsetsèr à wakità Zəzagəla à abà lakəl aña tetəvi uwaga kà:

'Kadzugw la ləv aňak la tsəh, 'Uwa à uwana adàda à zagəla à uwi?', kagod aw.' (Bokuba magodfay: Uwa à uwana adàda mazalla Kristu uwana à ahəj, mafal dzakwa à gəl uwi?)

⁷ 'Kadzugw babay la ləv aňak la tsəh, 'Uwa à uwana adàda à mezewi uwa'', (Bokuba magodfay: kà mazalla Kristu à uda la tataka azlamazimnekid la abà), kagod babay aw.

⁸ Mana wakità Zəzagəla agod ma?

'Nekwa la kak à gay uwaga, la paňaw aňak la awtəy, ngaha la ləv aňak la tsəh!'✠

Gay uwaga kà, gay uwana məziň à azladza la magodfay: "Diňaw gəl à Zəzagəla à vok", məgòd à atà. ⁹ Baña dza apəhay la dazuwaya: "Yesu kà, dza uwana Zəzagəla afal dzakwa à gəl", agodfay, ngaha adinjal gəl à vok kà, Zəzagəla awùlla Sufəl Yesu à uda la mamətsay, Zəzagəla adəbələj. ¹⁰ Baña mədiň gəl à Yesu à vok la ləv gami, ngaha məziň la paňaw gami kà masla kà Sufəl, Zəzagəla adəpaka anu ala azladza dziriga la huma aña, ngaha adəbəl anu. ¹¹ Haday, kiya uwaga tatsetsèr à wakità à abà:

'Uwabeyuwi uwana adinjal gəl à masla à vok kà, adəts gay à ahəj aw.'✠

¹² Adəgay zil Yahudiya adəgay tsəhay anik, Sufəl uwaga kà, masla Sufəl aña azladza gesina. Apis gay à azladza uwana à vok, tadəval kuďa gesina. ¹³ Uwaga bokuba uwana tatsetsèr à wakità Zəzagəla à abà:

'Uwabeyuwi uwana adəv kuďa à Sufəl Zəzagəla, adəbəlaj.'✠

¹⁴ Kay, gay kà aganay zlakoda: Kakay mədəval kuďa, kokuďa madiň gəl à masla à vok ma? Ngaha kakay mədiň gəl à masla à vok, kokuďa matsən gay lakəl aña ma? Ngaha aya kakay mədətsənəj, à baña masla mapəh à anu gay uwaga la ahəj aw ma? ¹⁵ Ngaha à baña azlaməna gay Zəzagəla tasləl à atà azladza aw, la tetəvi ma uwala azladza taday aña mapəhatàla gay la? Uwaga kalkal bokuba uwana tatsetsèr à wakità Zəzagəla à abà:

'Nərəzàw, marabay aña azladza uwana tarab lakəl aña azladza, uwana tasà à wanj aña maz à atà gay marabəj tsi.'

¹⁶ Ama la tataka azlaməna matsəb sləm à gay uwanay kà, dza dəj à uwana takəs gay uwaga aw. Masla mapəhal gay ahəl Yesayya agòd kà:

'Sufəl, uwa à uwana adinjal gəl à mapəhay gami à vok uwa? Dza dəj aw!' ✠

agòd. ¹⁷ Kità, sələw kà, dza atsən gay marabəj dadəj la uwana adinjal gəl à vok. Ama kà dza aña matsən gay marabəj kà, say dza anik apəhal lakəl aña Yesu Kristu dadəj. ¹⁸ Aganay manavay gulo: La dziriga kà, azla Yahudiya kà, tatsənə gay uwaga aw takay? Ndzer, tatsənəj! La wakità Zəzagəla la abà tatsetsèr, tagòd kà:

'Azladza tadəh kà mapəh gay Zəzagəla la gudəj la vok gesina, mapəhay aňatà atsən ala gesina, tsərəh à makəf gəl à ahəj gudəj à vok!'

✠ 10:5 10.5 3Musa 18.5 ✠ 10:8 10.8 5Musa 30.12-14 ✠ 10:11 10.11 Yesayya 28.16 ✠ 10:13 10.13 Yoyel 2.32

✠ 10:16 10.16 Yesayya 52.7; 53.1

19 Bà gotənanə gənavà akul manavay anik aya: La dziriga ma, azla Yahudiya tatsənà gay uwatà aw takay? Tatsənən, ama asa à atà matsəbal sləm aw pəra. Teraña dən Musa apèh à atà:

'Zəzagəla agòd: 'Gədàpaka akul ala kà azlamanor lakəl aña tsəhay uwana madziyikw atà gə. Gədàpaka akul ala ləv gə lakəl aña tsəhay uwana tasəl gəl aw', agòd.'[✧]

20 Nğaha la lig aña uwaga la ahən, guba akəs Yesayya kà mapəhay aw. Kiya uwana mapəhay aña Zəzagəla, uwana apèh, Yesayya agòd:

'Ağanay azladza uwana tayàh gi aw kà, tanən gi nğaha gədəpəhatàla vok à azladza uwana tadəv gi kuða aw.'

21 Ama kà aña azla Isərayel kà Zəzagəla apèh la pañaw aña Yesayya kà:

'Lis gəvak à mafatakàh à atà gəl kà mazala atà kà, ama tasa à wañ aw. Takəs gay gulo aw, takwes gi à gəl.'[✧]

11

Vok mahamay aña Zəzagəla lakəl aña azla Isərayel

1 Kità kà, gənavà manavay anik aya: Tsa kiya uwanay ma, Zəzagəla aməl azla Isərayel ala ay? Awan, aməl atà ala aw. Gi la aslasl gəl gulo bay kà, gi zil Isərayel. Gəsà à uda la tsəhay aña Benyamin uwana mayyi à tsəh ala aña Abəraham.

2 Zəzagəla aməl azladza aña uwana ala, atsatsàmàni atà dagay madzəka aw. Kasəlaw kà tatsetsèr kiya uwaga à wakità Zəzagəla à abà lakəl aña Eliya aw ay? Apuwà gudzi à azla Isərayel à gəl, la huma Zəzagəla agòd:

3 'Sufəl, azladza uwana takəđàh azlaməna mapəh à atà gay ahəl aña, tabazllàh azlaslaka makəđ tatak à ahən. Say gi kokuða gəl gulo pəra à uwana gətəm à ahən aña manəf ka, nğaha asa à atà makəđ gi bay.'[✧]

4 Mana Zəzagəla awùlla ala ma? Agòdàl:

'Kak kokuða gəl aña pəra aw. Gəbək à ahən azladza dəbow məđəf, uwana atà kà takəđəđ à Bal à ahən aw.'

Zəzagəla agòdàl. 5 Lagwa kà, kasəlaw gay uwanay təga aw ay? Kà aña mi kà kiya uwanay babay zlà, atəm à ahən azladza uwana Zəzagəla atsatsàmàni atà la vok mahamay aña. 6 Baña Zəzagəla atsatsàmàni atà kà, kà sləray aña atà uwana tafahən aw. Tsa baña kità aw kà, vok mahamay aña kà, adagay kà vok mahamay aya aw.

7 Uwaga asal magòđay kà, azla Isərayel tabəza uwana tayàh aw, say azlauwana Zəzagəla atsatsàmàni atà la uwana tabəzal. Ama azlauwana tatəm à ahən kà tadza-dzàñàhà gəl aña atà ala. 8 Uwaga kà bokuba uwana tatsetsèr à wakità Zəzagəla à abà: 'Zəzagəla apakà atà ala dadəgzləka bokuba azlamadagazlam, atsəkàh à atà à yewdi à ama, anakàh atà à sləm à ama tsərah à lakana kà: 'Təh sləm', agòd à atà aw.'

9 David agòd babay kà:

'Mazuw tatak may aña atà kà adàpaka atà maləkaw à ahən, adàtsahla à atà matekwid, nğaha adàdukw atà à ahən. Kità à uwana Zəzagəla adàv à atà nğərpa.

10 Zəzagəla atsəkàh à atà à yewdi à ama, kà atà aña manəñla ala aya aw, kà atà aña madz à ahən la nğərpa la abà koksikoksi, kà makalàh atà à vəđah,'[✧]

David agòd.

11 Tsa kiya uwanay kà, gənavà akul manavay anik aya. Mok uwana matekwid atsàla à azla Yahudiya ma, tatəđ à ahən aña tetuwa takay? Awan, aña tetuwa aw. Ama kà uwana matekwid atsàla atà la uwana azlatsəhay anik tabəzà gəl aña atà, tabəl. Zəzagəla adfahən kiya uwanay kà, kà azla Yahudiya aña makəđ ala yewdi à tsəh.

✧ 10:19 10.19 5Musa 32.21; Mahabay 19.4 ✧ 10:21 10.21 Yesayya 65.1-2 ✧ 11:3 11.3 1 Sufəl 19.10,14,18

✧ 11:10 11.10 5Musa 29.4; Mahabay 69.22-23

¹² Mok uwana matekwidf atsàla azla Yahudiya kà, azladza gudəŋ à vok gesina, tabəzà mabəlay kà madegolay uwaga. Mok uwana azla Yahudiya tatəd à ahəŋ la tetəvi aŋa Zəzagəla la tsəh, Zəzagəla avà mabəlay à azlatsəhay anik. Kay, baŋa Zəzagəla adafah dzəba aŋha səla aw à azladza anik la kaslā uwatà, adafahataŋ ma dafuwa à gay uwaga aw takay, la mok uwana azla Yahudiya tadawul à waŋ à tetəvi aŋha à tsəh?

Kakay Zəzagəla abəl azlatsəhay anik ma?

¹³ Lagonay kà, gəpəhay kà akul, uwana akul azla Yahudiya aw. Gi kà, gi masləlay aŋa Zəzagəla uwana asləl gi à slaka aŋkul, uwana akul azla masla Yahudiya aw. Kà uwaga à uwana, gədèd gay ləv kà sləray uwana avà à gi. ¹⁴ Kità, asa à gi kà tsəhay gulo, azla Yahudiya, tanəŋ gi, kà azlaanik la tataka aŋatà aŋa makəd atà à adi, kà atà aŋa mas à waŋ, kà Zəzagəla mabəl atà la sləray gulo. ¹⁵ Haday, mok uwana Zəzagəla aməl azla Yahudiya ala, asəl vok à azladza gudəŋ à vok. Ama mok uwana Zəzagəla adawulla atà à tsəh aya, ma adəgay ma, kakay ma? Uwaga kà adəgay kà dzəba aŋha səla aw, adavà sifa à azladza mamatsay gə.

¹⁶ Mats kaf matera, uwana dza atsəkay à fəta à awtəy tsikasla kà aŋa Zəzagəla, ŋgaha kaf gesina kà tsikasla bay. Baŋa godega ahəf aŋa Zəzagəla azlasləm gə bay kà, azlaaŋha. ¹⁷ Ahəf delga la abatà takədəval sləm anik la vok ala, ŋgaha tahəd kà makədəvani tsəhay aŋa ahəf uwatà la fəta kà mabədla à slaka uwana à abà, takədəvalla vok ala. Uwaga kà apəhay kà à kak, uwana kak zil Yahudiya aw. Kà uwana tatak delga uwana azla Yahudiya tabəzəl kà, lagonay kà, kak babay kabəzal bokuba azlasləm ahəf uwana tabəzal ndzəda kà madegolay iyə gə. ¹⁸ Kà uwaga zlà kà, kapəsew azlasləm ahəf uwana takadaval à vok ala aw. Kà mana kats zlapay ma? Kak kà, sləm ahəf pəra, ndzəda aŋa sləm ahəf kà atsa à uda kà la iyə gə la abà pəra, awkà sləm ahəf avà ndzəda à iyə gə aw.

¹⁹ Zlahaw, dza la tataka aŋkul la abà agodf: “Zəzagəla adakadaval azlasləm ahəf anik la vok ala, ŋgaha kà mabədla gi à abà la abatà”, agoday. ²⁰ Haday, uwaga kà kità, Zəzagəla akədəvalla vok ala, kà uwana tadiŋ gəl à masla à vok aw. Ama kà aŋak kà, avà à ka slaka, kà uwana kadiŋ gəl à masla à vok, kità kà. Kazigəna gəl aw, hōy yewdi aŋa Zəzagəla! ²¹ Kà uwana baŋa Zəzagəla asək azlasləm ahəf dziriga gə, uwana asəlla à uda la vok aw, adəsak à kak babay, à kak aw. ²² Kay, fəl sləm lela, Zəzagəla kà delga, ŋgaha dzaŋdzaŋ babay. Masla kà dzaŋdzaŋ lakəl aŋa azladza, uwana tatəd à ahəŋ la tetəvi aŋha la tsəh, ama kà aŋak kà, adafahà à ka delga à kak uwana kada à huma à gay la madfah uwana ahədəl à adi, tsa baŋa kità aw, adənats ka à ahəŋ babay. ²³ Ama azla Yahudiya kà, baŋa tadza à ahəŋ la dzaŋdzaŋ aŋatà la abà aw, Zəzagəla adətsəv atà à gəl məŋ aŋatà à gay, kà uwana masla la maslay kà matsəv atà à gəl məŋ aŋatà à gay aya. ²⁴ Kak uwana kak zil Yahudiya aw kà, kak bokuba kak sləm ahəf fəta manatsin à waŋ gə, uwana tatsəv à ahəf delga à gay la mtəga. Baŋa Zəzagəla adehəŋ kiya uwaga ma, kadzugw kà zlazladfa kà aŋha aŋa mawulla azla Yahudiya à gəl məŋ aŋatà, uwana à gay uwarà takay? Atà uwana azlasləm ahəf dziriga gə?

Mawul ləv aŋa Isərayel

²⁵ Azladedə, asa à gi kà kasəlaw nasiri dziriga uwana Zəzagəla afətəlla à ama ala, kà akul aŋa magay azlazlapay aw. Gəgòd kà, azlaanik la tataka azla Isərayel la abà kà, asà à atà madiŋ gəl à Zəzagəla à vok aw bə la dziriga. Say baŋa azlatsəhay dza anik, uwana azla Yahudiya aw, uwana Zəzagəla atsatsəmàni atà, tadiŋ gəl à Zəzagəla à vok dən, ŋgaha la lig la ahəŋ azla Isərayel tadadiŋal gəl à vok. ²⁶ ŋgaha Zəzagəla adəbəl Isərayel. Bokuba uwana tatsetsər à wakità Zəzagəla à abà:

'Masla mabəl azladza kà, adàsa à uda kà la Siyon. Adàzəb tsakana à mayyi à tsəh ala aña Yakuba lakəl ala.

²⁷ Uwanay la uwana makəs vok slawda gulo la atà, à mok uwana gədàzəb atà tsakana lakəl ala, [☆]

Zəzagəla agòd. ²⁸ Kiya uwaga kà, azla Yahudiya, kà takweskà gay marabəñ, gay gə la uwaga à uwana, tapakà azlaməna məzam aña Zəzagəla. Uwaga apakà vok kà, kà akul uwana akul azla Yahudiya aw, aña mabəz gəl la abà. Ama kà aña babay kà, Zəzagəla atsatsàmàni atà, ñgaha awoyà atà, kà uwana apəh à azlababa aña madzidziga à vok à abà dagay uwarà. ²⁹ Zəzagəla kà, baña adazalla ka kà, bə adazalla ka. Ñgaha baña adavà à ka kà bə adavà, abədfa vok aw. ³⁰ Akul uwana azla Yahudiya aw kà, kakwesàwkà pañaw aña Zəzagəla dagay uwarà. Ama lagonay kà azla Yahudiya takweskà Zəzagəla, gay gə la uwaga kabəzàw vok mahamay aña. ³¹ Ama azla Yahudiya kà, kiya uwaga babay, lagonay kà takweskà Zəzagəla, ñgaha kabəzaw à gəl la slaka aña aña la abà. Ama uwaga apakà vok kà, kà atà mabəz vok mahamay babay. ³² Zəzagəla asàkla à ahəl à azladza la tsəh ala gesina, kà atà aña makweska masla, adahəñ kiya uwaga kà, kà vok aña mahamal kà atà gesina.

Zəzagəla kà mənğa, məzləba

³³ Kay ndzer, dzəba aña səla aw aña Zəzagəla kà mənğa, matsihila aña kà zəñzəñ, aduwa azlatatak gesina, asəl tatak gesina bay. Madzugway aña kà dza abəz kà aw. Zlazladfa kà dza matsən madəhəñ aña. ³⁴ Uwaga bokuba uwana tatsətsər à wakità Zəzagəla à abà:

'Uwa asəl, uwana Sufəl Zəzagəla adzugway uwi, 'Dahà uwanay!', ma uwa à uwana agodfal uwi? Dza la ahəñ aw.

³⁵ Uwa adavəl tatak à adi uwi, kà masla aña magay la goder aña la vok uwi? 'Dza la ahəñ aw', tagòd. [☆]

³⁶ Haday ndzer kà, dza la ahəñ aw, kà uwana masla la uwana adahə tatak gesina. Tatak uwaga gesina tadza à ahəñ la sifa kà, kà masla, masla la uwana Sufəl lakəl aña. Məzləbà masla aña koksikoksi. Amen!

12

Maday delga aña masla sləray aña Zəzagəla (1 Korintiya 12.1-11; 14.1-25)

¹ Azladedə, tsa aña kiya uwanay vok adahama à Zəzagəla kà aña zlà kà, gədəv à akul kudfa: Vəwwal vok aña kul la deñdəñ. Vəw vok aña kul à masla, bokuba tatak uwana takəd à Zəzagəla la ləv tekula, bamərika akul la sifa babay. Gəw azlaaña kà makəsəl à gəl. Uwaga la uwana tetəvi dziriga kà masləkawla Zəzagəla. ² Kanəfaw madz à ahəñ aña azladza gudəñ à vok aw. Ama la uwaga kà, vəw tetəvi à Zəzagəla, avà à akul azlamadzugway mawga kà masla aña mabədfa akul. Kiya uwaga kà, kadəsəlaw tatak uwana asa à Zəzagəla, uwana delga, uwana ahəfal à adi, ñgaha akəsa à vok la tetəvi aña la ama bay. ³ Ndzədfa aña Zəzagəla, uwana avà à gi kà mapəhakulla kà à aganay; gəgod à kəla uwabeyuwi aña kul kà kazigəñaw gəl aw, ama sələw madz à ahəñ aña kul. Nərəzəw kà mavəy uwana Zəzagəla avà à akul aña masəl slaka uwana akul la abà. ⁴ Vok aña dza kà tekula pəra gesina, ama vok uwaga kà la azlamabay anik anik, ñgaha kəla manabay kà la sləray aña. ⁵ La anu babay kà kità. Anu dəñ, ama kiya anu la sləb vok tekula, kà uwana mədahama gay à vok la Kristu. Anu gesina kà mədanab vok à gay bokuba manabay aña vok. ⁶ Zəzagəla avəhə à anu mavəy aña sləray aña kà la aña, la aña. Kiya uwana asal mav à anu uwabeyuwi adahə sləray la mavəy uwana Zəzagəla avəl. Kasəl kà, baña Zəzagəla

[☆] 11:27 11.27 Yesayya 59.20; Yeremiya 31.33-34 [☆] 11:35 11.35 Yesayya 40.13; 55.8; Job 41.11

avà à ka mavày aña mapəh gay aña kà: Zàñ, bokuba kasəl, kà uwana Zəzagəla avà à ka maslay. ⁷ Baña Zəzagəla avà à ka maslay aña madfəh sləray à azladza: Zlāk à atà. Baña Zəzagəla avà à ka mavày aña matapla à azladza, kiya uwaga tapatàla, la tetəvi aña. ⁸ Baña Zəzagəla avà à ka à mavày kà madzərəfəh azladza ala, dzərəfəhatàla. Baña Zəzagəla avà à ka à mavày kà mavəh tatak à azladza, vəh la ləv tekula. Baña Zəzagəla avà à ka à mavày kà manəñla azladza, nəñla atà la tetəvi aña. Baña Zəzagəla avà à ka à mavày kà madfəhla delga à azladza, fəhà uwaga la marabay.

⁹ Kawoyaw dza la gay gə pəra aw, wòyàw dza la ləv tekula, hòyàw à mawisiga à ahəl. Nəfəw kà uwana delga. ¹⁰ Wòyàw vok akul azlaməna manəfay, kà uwana akul azlaməna huɸ gày tekula, sləkàwàw azladeda aɲkul ɸafuwa à gay gəl aɲkul. ¹¹ Vəw vok à sləray la ləv aɲkul gesina, kagaw azlaməna mas aw, zlākàw Sufəl Zəzagəla la ləv aɲkul gesina. ¹² Fəw yewdi kà à uwana à gay Zəzagəla apəh à akul à ahəñ. Kità kà, rabàw koksikoksi. Basàw ɲgərpa uwana kasaw. Dəvəw kuɸa à Zəzagəla kokuɸa masakal. ¹³ Baña azlaməna madiɲal gəl à vok anik la kuɸa la abà kà, kàləw tatak uwana tanəkudə aña. Kəsàw azlaməlok dza uwana tatsa à mtəga aɲkul la ahəl səla.

¹⁴ Dəvəw kuɸa à Zəzagəla kà azladza uwana tatəreɸ akul, katsafaw la atà aw. ¹⁵ Rabàw la slaka gə la azladza uwana tarabay. Tawàw la slaka gə la azladza uwana tataway babay. ¹⁶ Tsənàw vok gay la azlaməna magay aɲkul, kazigənaw gəl aw, baməraka sləray uwali ɸahəñ bəziga aña sləray la ahəñ aw. Kadzugwaw aw 'Anu azlaməna matsihilaga', kagofaw aw.

¹⁷ Baña dza aɸahakulla mawisiga à vok kà, kawulawwalla mawisiga à adi aw. Dahàw hanəkəli kà madfəhəñ, kà uwana ahəɸ la slaka azladza gesina. ¹⁸ Wəɸàw vok à uda la uwana la abà kaslaw gesina, kà akul aña madz à ahəñ la lapiya la abà, la kəla uwabeyuwi à baña akəsa à vok. ¹⁹ Akul azlaməna gay ləv gulo kawulawla mawisiga à azladza à adi aw, ama sàkàwla kà la Zəzagəla la ahəl, à mapak ləv uwaga kokuɸa gəl aña pəra. Kà uwana tatsəser à wakità Zəzagəla à abà:

'Tatak mawisiga uwana azladza taɸahakullañ à vok kà, gi la uwana gədəpəlla à akul goder aña', Sufəl Zəzagəla agòɸ.'✧

²⁰ Wakità Zəzagəla agòɸ aya kà:

'Baña masla məzam aɲak la may gə, vəl tatak may, baña la nəlay gə, təɸalla iyaw. Baña kaɸahalañ kiya uwaga, masal aɲak adəɸahalla sləray ɲgaha adəpəh gay la ləv ala.'✧

²¹ Kavà tetəvi à mawisiga kà makəɸasl à ka aw, kəɸasl à mawisiga la madfəh delga.

13

Mawulla gəl à vəɸah la huma aña azlaməna makor kutso

¹ Kəsàw gay aña azlaməna makor kutso, kà uwana azlauwana la ndzəɸa gesina kà Zəzagəla la uwana avà à atà, ɲgaha masla la uwana abək atà à ahəñ. ² Kità kà, dza uwana adzadzañ gəl ala la huma aña azladza, uwaga kà adzadzaña gəl ala kà la tatak uwana la afik Zəzagəla afà à ahəñ, azlauwana taɸehəñ kiya uwanay kà taɸəbiy seriya à gəl aɲatà. ³ Ama baña azladza, uwana taɸəh delga kà, guba aza atà kà azlaməna makor kutso aw, say azlaməna madfəh mawisiga la uwana guba az atà pəra. Baña asa à akul kà guba aña maz akul la huma aɲatà aw kà, ɸahàw delga, kà akul aña mahəɸ à atà à adi. ⁴ Kà uwana azlauwana takoray kà, taɸehəñ kà sləray uwana Zəzagəla afà à atà à ahəl kà mazlak ka aña madfəh delga. Baña kaɸaɸahaw mawisiga kà, guba akəs akul kà atà, kà uwana ndzəɸa uwana Zəzagəla avà à atà kà, avà à atà kà deyday aw. Atà kà, azlaməna sləray aña Zəzagəla, kà mapəhla mapak

löv aña Zəzagəla ala lakəl aña azlauwana tadəh mawisiga, kà madəh à atà seriya à gəl. ⁵ Tsa baña kiya uwanay kà, say məkəsay gay aña azlaməna makor kutso, kà huma yewdi pəra aw, ŋgaha la seriya uwana la abà atəf anu à gəl aw. Ama kəsàw gay aña, kà uwana kasəlaw la löv la tsəh kà, tetəvi uwaga kà asa kà à Zəzagəla babay.

⁶ Gay gə la uwaga à uwana, kapəlaw hadama babay. Zəzagəla abək à azlaməna mazəb hadama à ahəŋ, kà atà aña madəhla sləray uwaga lela. ⁷ Pələw à azladza uwaga gesina tatak uwana tanava à akul. Pələw hadama à azlaməna mazəb hadama, pələw duwan à azlaməna mazəb duwan. Kəsàw gay à azladza uwana la ahəl ala takor kutso lela.

Mawoy vok kà anu kà anu

⁸ Kadzaw à ahəŋ la goder aña dza la vok aw. Goder aŋkul kəla kà, say mad à huma à gay la mawoy à azladza anik la abà. Kà uwana dza uwana awoya azlaməna magay aña kà, anəfa mapəhay aña Zəzagəla lela. ⁹ Hadəy, Zəzagəla agodf à anu: 'Kada à gəl gaw aw, kakəf dza aw, kada gəl aw, kakəfa yewdi à azlatatak aña azladza anik à vok aw.'

Azlamapəhay uwaga, la azlaanik gesina kà, tahama à abà à uwana agodf:

'Wəyən masla magay aña, bokuba uwana kawoya gəl aña bay.'[☆]

¹⁰ Dza uwana awoya masla magay aña kà, adəhalaŋ mawisiga à vok aw. Kità kà baña kawoya azlaməna magay aña kà, kanəfa mapəhay à uda gesina.

Mawul à waŋ aña Kristu kà nekwa

¹¹ Wəfəw vok à uda, tsa kasəlaw mavakay uwaga lagwa kà, tsənəwla adagay kà uwana kaslə uwana Zəzagəla adəbəl anu aña tetuwa kà nekwa. Uwaga kà kərkər bokuba la mavakay uwana mədŋ gəl à Yesu Kristu à vok dadəŋ aw. ¹² Vəf la uwaga adà à lig, afats la uwaga atsa à afik. Lagwa kà mənəfa à sləray aña mələs aya aw. Mətsokw azlatatak guvəl uwana à abà, məpala guvəl la afats. ¹³ Məhəd lela, azlauwana taday la udəka la abà. Məgə azlaməna mas guzu aw, mələlim lakəl aña tatak may aw, mədəhà mabila baməraka la mana mi aw, mədəhà magazlay la azladza aw, ŋgaha məkəfə yewdi à tatak aña azladza anik à vok aw. ¹⁴ Mətsokw Yesu Kristu à vok bokuba tatak guvəl gami. Kadzugwaw à azlatatak mawisiga, uwana asa à vok aŋkul kà madəhəŋ aw.

14

Azlaməna ndzəfa gə la azlaməna maruw vok à ahəŋ gə

la tetəvi aña Zəzagəla la ama

¹ Kəsàw azlauwana taruw vok ahəŋ la tetəvi aña Zəzagəla la tsəh la ahəl səla, kadzedzinaw madzugway aña aw. ² Uwaga gəpəh à akul kà, lakəl aña tatak may kaykay. Azladza anik kà, tatak may uwanay kà, asləh kà mazuway tasəl magodəy aw bə mazuway pəra, ama dza uwana aləg mahənaŋ la tetəvi aña Zəzagəla la tsəh kà, apəf sləb aw, azuway kà bəsla agər à abà pəra. ³ Ama dza uwana amanay gesina kà, apəsew dza anik uwana apəf sləb uwaga aw. ŋgaha dza uwana apəf sləb aw kà, adziyukw à masla mapəf sləb babay aw, kà uwana Zəzagəla kà akəs masla maman tatak uwaga gesina. ⁴ Kak ma, kak uwa, kagodf kà madziyukw à magamza aña dza anik, uwana adəh sləray mawisiga uwa? Say mənəga aña la uwana apəhaalla, à baña adəhəŋ kà delga aw ma mana aña la abà ma? Adətəf à ahəŋ aw kà uwana mənəga aña la afik, adəhəŋla kà masla aña matəfəy à tetəvi aña la tsəh ala aw. ⁵ Azladza anik tadzugway kà mavakay anik adəwa azlaanik la huma yewdi

☆ 13:9 13.9 2Musa 20.13-15,17; 3Musa 19.18; 5Musa 5.17-19.21

aṅatà, ama la yewdi aṅa azladza anik mavakay gesina kà kalkal. Say dza asèl uwana adzugway la lèw aṅha la tsèh la paraka. ⁶ Dza uwana adzugway kà, mavakay anik aduwa azlaanik adzugw kiya uwanay kà, aslèkawlà Sufèl Yesu. Dza uwana apad slèb taslèkaw, kikay agodfiya à Zèzagèla lakèl aṅa uwana azuway. Dza uwana apad slèb bay adahan kiya uwaga kà maslèkaw Sufèl babay, ṅgaha kikay agod à Zèzagèla lakèl aṅa uwana azuway babay. ⁷ Kità kà dza la ahèṅ, adza à ahèṅ kà aslasl gèl aṅha aw ṅgaha dza la ahèṅ amètsay kà aṅa aslasl gèl aṅha babay aw. ⁸ Kà uwana baṅa anu la sifa kà, anu la sifa kà aṅa mēdāh slèray aṅa Sufèl, uwana aṅal anu, ṅgaha baṅa mēmètsay kà, mēmètsay mamètsay gesina kà, kà anu azlaaṅa Sufèl Yesu Kristu. ⁹ Kà uwana Sufèl Yesu Kristu amèts, ṅgaha awùl à uda la mamètsay, kà masla aṅa magay Sufèl aṅa azlamazimnekid la azladza uwana la sifa bay. ¹⁰ Tsa aṅa kiya uwanay ma, kak ma kak uwa, à uwana kapèsew deda magay aṅak uwa? ṅgaha ma kak ma kak uwa? Mèsèl gesina gami kà, mēdāda à huma seriya aṅa Zèzagèla. ¹¹ Uwaga kà bokuba uwana tatsètsèr à wakità Zèzagèla à abà. Sufèl Zèzagèla agòd:

'Gègod la dziriga: Kèla dza adàkèded à ahèṅ la huma gulo.

ṅgaha kèla uwabeyuwi adàpèhay la paraka kà: Kak Zèzagèla la uwana la maslay gesina,[☆]
tadàgodfay. ¹² Uwabeyuwi adàtugw uwana adahàhàn la huma Zèzagèla, la paṅaw aṅha la paraka.

Mēdaha haṅkèli kà azladedà gami maruw vok à ahèṅ gà

¹³ Tsa baṅa kiya uwanay kà, mèsak à madziyukw à vok à dagay. Dahàw haṅkèli kà akul aṅa madāh uwana atsala matekwid à deda aṅkul, ṅgaha kà madukw masla à tsakana à abà aw. ¹⁴ Gi dza aṅa Sufèl Yesu, ndzer kà, tatak gesina kà maslèhay gà la ahèṅ aw, ama baṅa dza anik adzugway kà, tatak anik maslèhay gà la ahèṅ, kità uwaga kà, afa à gay aw, kà uwana kà aṅha kà, aslèh hadfay. ¹⁵ Baṅa katafad lèw à deda aṅak la tatak may, uwana kazuway kà, kiya kawoyaṅ aw. Kà uwana Yesu Kristu kà amèts kà aṅha babay. Sèl kà, uwana kazuway kà, atafadalla lèw la tetèvi aṅa Zèzagèla la tsèh aw. ¹⁶ Ama kà aṅak kà, tatak gesina kà maslèhay gà la ahèṅ la huma aṅak aw, ama baṅa kasèl kà azladza tadàpèh mawisiga lakèl aṅha kà sàkal, ṅgaha kà atà aṅa matugw mawisiga aw. ¹⁷ Makoray Zèzagèla kà gay aṅa mazuway la masay aw. Ama uwaga kà gay aṅa dziriga ṅgaha la marabay, uwana Masasèdòk Zèzagèla avà la lapiya, awkà gay aṅa tatak uwaga la abà aw. ¹⁸ Dza uwana adāh slèray aṅa Yesu Kristu kiya uwanay kà, Zèzagèla adàwoyèṅ, ṅgaha azladza tadàslèkaway babay. ¹⁹ Tsa baṅa kiya uwanay kà, mēwàd vok à uda kà madāh uwana azlaka à azladza kà madz à ahèṅ la lapiya, la maham à gay à vok gami la abà, ṅgaha uwana adazigèṅ azladza anik la tetèvi aṅa Zèzagèla la tsèh. ²⁰ Kawisà slèray aṅa Zèzagèla ala la tatak uwana kà manay aw. Kay kà, tatak maslèhay gà la ahèṅ noma kà, ama baṅa azladedà aṅak tadàsokw à tsakana abà kà, uwaga kà delga kà manay aw. ²¹ Ama uwana delga kà, kadaha tatak uwana adàdukw deda aṅak à ahèṅ, adàgay mapad slèb uwaga bamèraka adàgay mas guzu, adàgay bà mana beyimi uwana adukw deda aṅak à ahèṅ kà, kafa gay aw. ²² Uwana kasèl lakèl aṅa uwaga kà, fà uwaga à tsèh kuvèl aṅak, uwaga kà la tataka aṅkul la Zèzagèla pèra. Marabay agay la dza uwana adahan tatak la kokudà mabèk gèl à ahèṅ sèla. ²³ Ama dza, uwana abèk gèl à ahèṅ sèla, lakèl aṅa tatak may, azuway la mabèk gèl à ahèṅ, sèlā kà seriya adàkèsay, kà uwana bà la mabèk gèl à ahèṅ sèla aṅha kà, asakal à tsèh ala kà mazuway aw. Kà uwana kèla tatak uwana mēdèhèṅ la mabèk gèl à ahèṅ sèla la huma Zèzagèla kà tsakana.

☆ 14:11 14.11 Yesayya 45.23

15

Madàh uwana azlak azlamagabədf gə

¹ Anu uwana mədahənay la tetəvi aña Zəzagəla la tsəh kà, məzlaka azlauwana tahənay dadənj aw, mədahanj kà uwana akəsa à anu à gəl pəra aw. ² Say mədahanj kà uwana akəsa vok kà aña azladedə gami, məzlak atà kà atà aña mazigənay la tetəvi aña Zəzagəla la tsəh. ³ Yesu Kristu la gəl aňha bay kà, ayàh tetəvi kà madàh uwana asà à gəl aňha aw. Ahənà gay uwana ala, tatsetsèr à wakità Zəzagəla à abà: 'Magodəhay aña azlaməna matsək à ka magodəhay à gəl kà, awul à gəl gulo,'[☆] agòdf. ⁴ Tekedik, kəla tatak uwana tatsetsèr à wakità Zəzagəla à abà kà, tatsetsèr uwaga kà matapanula dziriga, kà anu aña makədf yewdi à uwana à abà, Zəzagəla apəh à ahənj kà madəhənj kà uwana la wakità Zəzagəla la abà adzərədfəh anu ala, ŋgaha kà anu aña matsizilla à ahənj lela. ⁵ Zəzagəla adzərədfəh anu ala kà uwana apakənula kà anu magay mazlaməna mabasiŋ, ŋgaha anu aña magay la paŋaw tekula, bokuba uwana Yesu Kristu adəhənj bay, ⁶ kà akul gesina aña mazləb Baba aña Sufəl gami Yesu Kristu la paŋaw tekula.

Kəsaw vok kà akul à akul

⁷ Kità kà, kəsaw vok kà akul à akul bokuba uwana Yesu Kristu akəs akul. Da-hàwwənj kiya uwaga, kà azladza aña mazləb Zəzagəla. ⁸ Gi, gəpəh à akul la paraka, Yesu Kristu apakə magamza aña azla Yahudiya, kà masla aña mapəhatàla kà Zəzagəla kà adəh fida aw. Asàl mahən uwana ala Zəzagəla apəh à azlababa aňatà à ahənj. ⁹ Asà à waŋ babay, kà azlauwana azla Yahudiya aw aña mazləbay, kà azlatatak dzəba aňha səla aw gə uwana adəhənj. Uwaga kà bokuba uwana tatsetsèr à wakità Zəzagəla à abà lakəl aňha:

'Kà gay uwanay gədəzləb kà la tataka azladza la abà, gədəzləb kà la azlamahabay.'[☆]

¹⁰ Gay Zəzagəla agòdf aya kà:

'Akul uwana akul azla Yahudiya aw, rabəw la slaka gə, la azlatsəhay aña Zəzagəla uwana akəs atà dagay uwarà.'

¹¹ La slaka anik la abà aya tagòdf:

'Akul uwana akul azla Yahudiya aw, zləbəw Sufəl Zəzagəla. Dza atəm à uda aw, zləbəw masla gesina.'[☆]

¹² Yesayya, masla mapəhal gay ahəl aña Zəzagəla agòdf babay:

'Dza anik adəsa à uda la tsəhay aña Yese la abà, adəsa à waŋ kà makor azladza uwana azla Yahudiya aw, tadəfay manəwənj aňatà à masla à afik kà mabəl atà.'[☆]

¹³ Zəzagəla uwana av manəwənj, ahənəkulla la marabay, ŋgaha akul aña mabəz lapiya la ləv la tsəh, kà uwana kadiŋaw gəl à masla à vok kà, manəwənj aňkul lakəl aňha adahən ala pawasla, la ndzəfa aña Masasədfok tsikasla.

Pol apəh gay lakəl aña sləray aňha uwana adəhənj

¹⁴ Azladedə gulo, gi la aslasl gəl gulo kà, gəsəl kà kadəhəwwənj kà la tetəvi aňha, kasəlaw dziriga gesina, ŋgaha kasələw tetəvi aña mawalla kà vok haŋkəli à gəl.

¹⁵ Ama bə la uwaga, la azlaslaka anik la wakità uwanay la abà, gətsetsèr à atà kà, la maz kuda à zagəla lakəl aña azlatatak anik anik, kà aña mavika akul aw. Gətsetser bokuba uwanay, kà dzəba aňha səla aw uwana Zəzagəla adəhəgənj. ¹⁶ Bokuba magodəy kà, afə gi à ahənj kà magamza aña Yesu Kristu la tataka azladza uwana azla Yahudiya aw. Gəvə vok gulo à Zəzagəla tetuwa, kà maz gay marabənj, gay gə à uwana atsà à waŋ la slaka aňha. Gəziŋ kà à azlauwana azla Yahudiya aw, kà atà aña madiŋ gəl à masla à vok, ŋgaha kà uwana Masasədfok tsikasla afə à fəta à awtəy

☆ **15:3** 15.3 Mahabay 69.9 ☆ **15:9** 15.9 2 Samuyel 22.50; Mahabay 18.49 ☆ **15:11** 15.11 5Musa 32.43; Mahabay 117.1 ☆ **15:12** 15.12 Yesayya 11.10

kà aṅha. ¹⁷ Kà sləray aṅa Zəzagəla uwana gədehən kà, gəfədf gay ləv, kà uwana gi la ahəl aṅa Yesu Kristu. ¹⁸ Kà uwana gəpəhay lakəl aṅa tatak anik aw, say uwana Yesu afà à gi à ahəl. Masla avà à gi ndzəda, kà madla azladza uwana azla Yahudiya aw à huma Zəzagəla, kà atà aṅa makəs masla. Adahən kiya uwanay kà, kà azlagay uwana gəpəh, ṅgaha azlatatak uwana gəfahan. ¹⁹ Adahà azlanadzipo tsəhay anik anik la ndzəda aṅa Masasəfok tsikasla babay. Kiya uwaga gəsləhà gay marabən à azladza ala gesina lakəl aṅa Yesu Kristu, adzəkà à vok dagay la Urusalima tsərah à gudən Iliriya. ²⁰ Ama gi kà gəhika kaykay maz gay marabən kà la slaka uwana azladza tatsən gay lakəl aṅa Yesu Kristu dadən aw, kà uwana asa à gi maziṅ la slaka uwana azladza tatsənən aw kà gi asa à gi mabədf sləray aṅa dza anik à gay dzəgov aw. ²¹ Gi kà, gədehən bokuba uwana tatsətsər à wakità Zəzagəla à abà: 'Azlauwana tapəh à atà tatak lakəl aṅha aw kà, atà kà tadənənən. Azlauwana tatsən tatak lakəl aṅha aw bay tadatsən gay marabən,' Zəzagəla agədf.

Pol adzugw mad à Rom

²² Asik dən gədaβərzi ala kà manən akul à gay, ama gəbəzà tetəvi aw. ²³ Mavay dən à uwana gədayah tetəvi la iyaw tugwi kà manən akul à gay, ama sləray akəs à gi à ahən. Lagwa kà, sləray gulo la kutso uwanay la abà kà, adakədf gəl à ahən. ²⁴ Gədzugw mad à awtəy à slaka aṅkul, gədadza à ahən ṅuv la slaka aṅkul kà manən vok. La lig la ahən kà pəra, gədàda à Espaniya. Asa à gi kà kadàzlakaw gi la mauguzahay gulo uwaga la abà gədafehən. ²⁵ Ama lagonay kà, gəwul à Urusalima dadən, kà madla tatak mazlakay à azladza aṅa Zəzagəla la abatà. ²⁶ Kà uwana azlaməna gay Zəzagəla uwana la abanay la Makeduniya, la azlauwana la Akayya tarəb kà maham gay à sili à vok kà masləl à azlaməna kuḍa la tataka maham à ahən mənə gay Zəzagəla la Urusalima. ²⁷ Uwaga kà, atà tadzūgw la gəl aṅatà, ama uwaga kà azlayla kà vok aṅa madfehən kiya uwaga. Haday, kà uwana azla Yahudiya tazlāk azladza uwana azla Yahudiya aw, kà atà aṅa mabəz mapis gay à vok aṅa Zəzagəla mənəga. Kità kà delga, kà azladza uwana azla Yahudiya aw, tazlaka atà la azlatatak uwana tabəzəl la gudən la vok babay suwan. ²⁸ Baṅa gədàdəv uwaga à gay, gədaβək atà tatak uwana tabək gi à ahəl gesina, gədàwul à lig, kà mad à Espaniya, ama gədaḡuway kà la gudən aṅkul, la Rom dadən. ²⁹ Gəsəl kà aṅa gədàzlanjal à slaka aṅkul kà, Yesu Kristu adəpis anu gay à vok mənəga, la maham gay à vok gami la abà. ³⁰ Azladedə, kamkam, gəgədf à akul la sləm aṅa Yesu Kristu, kà uwana Masasəfok tsikasla apakà anu ala kà mənə mawoy vok kà anu à anu. Kamkam zlakəw gi la madəv kuḍa à Zəzagəla, dəvəwwal kuḍa kà aṅulo la ləv tekula, ³¹ kà azlaməna kutso Yahudiya uwana tasəl Yesu Kristu aw, kà gi aṅa mad à ahəl aṅatà aw. Dəvəw kuḍa à Zəzagəla babay, kà tatak uwana la ahəl gulo aṅa makəs à vok à azladza la abatà la Urusalima. ³² Kità kà, baṅa asa à Zəzagəla kà, gədàsa à wan à slaka aṅkul kà la hazlakhazlak. ṅgaha mədàhama gay à vok la marabay mənəga la abà. ³³ Zəzagəla masla aṅa mavəh lapiya afa à akul sləm. Amen!

16

'Ayyi' aṅa Pol uwana adahan à azladza anik

¹ Iyay, gəpəh à akul lakəl aṅa deda gami misga, Febe, uwana adahà sləray la tataka maham à ahən mənə gay Zəzagəla la abà la Kenkeriya. ² Kamkam, mok uwana adəbəza à slaka aṅkul kà, dfakəsəw masla la ahəl səla la sləm Sufəl gami Yesu, bokuba uwana azlayla azlaməna gay Zəzagəla tadfehahən. Zlakəw masla la azlatatak uwana anəkudə aṅha gesina, kà uwana masla kà, azlakà à azladza aṅuvaw baməraka gi babay.

³ ‘Ayyi’ gəgod à Pərəskila atà la zil anha Akilas. Atà uwana mədàhà sləray anja Sufəl gami Yesu Kristu la slaka gə. ⁴ Mok uwana uwarà azladza tatə̀ə̀bà gi kà, tasà à waŋ kà anja matəf gi, tafà à gəl anjatà aw, ‘Kikay’ gəgod à atà mənğa, gi pəra à uwana ‘Kikay’ gəgod à atà aw, azlaməna madiŋal gəl à vok, uwana azla Yahudiya aw gesina babay kà: ‘Kikay’, tagod à atà. ⁵ ‘Ayyi’ gəgod à azlaməna gay Zəzagəla uwana tahamàh gay à vok kà madəv kuda la mtəga anjatà aya. ‘Ayyi’ gəgod à slawda gulo Epaynet, uwana atsəv vok à madiŋal gəl à Yesu à vok à abà la kutso Asəya. ⁶ ‘Ayyi’ gəgod à Mariyama, uwana adàhà sləray mənğa kà ankul. ⁷ ‘Ayyi’ gəgod babay à Andəronikus atà la Yuniyas uwana la tsəhay gulo. Mədzà à ahəŋ la danay anina. Atà uwana azlazə̀bzə̀b gə la tataka anja azlaməna matapla la abà. Atà la uwana tatsəv vok à madiŋ gəl à Yesu à vok kà gi.

⁸ ‘Ayyi’ gəgod à slawda gulo Ampəliyatus uwana anu tekula la ahəl anja Sufəl. ⁹ ‘Ayyi’ gəgod à Urban, slagama gami la sləray anja Yesu Kristu la abà atà la Sətakəs slawda gulo. ¹⁰ ‘Ayyi’ gəgod à Apel, uwana asà ŋgərpa kà sləm anja Yesu Kristu, ŋgaha agəf à afik ndzer, ŋgaha ‘Ayyi’ gəgod à huf gày anja Arisətobul. ¹¹ ‘Ayyi’ gəgod à tsəhay gulo Herodiyon, ‘Ayyi’ gəgod à azlaməna gay Zəzagəla la huf gày anja Nartsəs. ¹² ‘Ayyi’ gəgod à Tərifən atà la Tərifos, azladedə gami misga uwana tadàh sləray anja Sufəl Yesu. ‘Ayyi’ gəgod aya babay à Persəda, deda gami misga uwana adàh sləray la ndzəda kà anja Sufəl. ¹³ ‘Ayyi’ gəgod à Rufus, dza dziriga gə, uwana la tetəvi anja Sufəl la tsəh. ‘Ayyi’ gəgod à iyà anha uwana afà à gi sləm bokuba gi bəzi manədal aniz à gəl anha bay. ¹⁴ ‘Ayyi’ gəgod à Asənkərit, à Felegon, à Herməs, à Patərobas, à Hermas, la azlaməna madiŋal gəl à vok anik gesina, uwana atà nna la abà gə. ¹⁵ ‘Ayyi’ gəgod babay à Filolog atà la Yuliya, Nere misga atà la deda anja duguga. ‘Ayyi’ gəgod à Olimpas la azlaməna gay Zəzagəla anik gesina uwana atà nna la abà gə bay.

¹⁶ Dahàhàw vok ‘Ayyi’ kà akul à akul. Maham à ahəŋ dza gesina uwana tadiŋ gəl à Yesu Kristu à vok, ‘Ayyi’, tagod à akul.

Hèlàw à ahəŋ kà azlaməna gay Zəzagəla fida gə

¹⁷ Azladedə, ‘Kamkam’ gəgod à akul, dahàw hanəkəli kà azladza uwana tatsəf gay à gay uwana à tsəh tatəpakulla. Kà atà tatsəlla kà mavàhla à waŋ, ŋgaha tanis akul à ahəŋ la tetəvi la tsəh, atà kà kagagamawla vok ahəl akul nna aw. ¹⁸ Kà uwana tsəhay dza uwaga kà, tadàh sləray anja Sufəl gami Yesu Kristu aw, tatuway kà vok anjatà pəra. Tapapat azladza la azlagay namnamga, uwana atsa à waŋ la paŋaw anjatà la awtày. Kità à uwana tavavar azladza uwana kokudə masəl godega anja gay uwaga. ¹⁹ Kà ankul kà, dza gesina tasəlay kà, kakəsàw gay anja Sufəl gami. Gi la marabay mənğa kà akul, ŋgaha asa à gi babay kà kagaw azlamahanay gə, kà madàh uwana delga kà akul anja mahoy à mawisiga à ahəl. ²⁰ Zəzagəla masla mavàh lapiya à azladza, adàdzam gəl à seteni ala la tsəh à asik ankul la huma la gay.

Sufəl gami Yesu Kristu apis akul à gay à vok.

²¹ Bə gotənaŋ kà ‘Ayyi’ Timotawus, uwana mədàh sləray anu səla, agod à akul. Azlatsəhay gulo Lutsəyus la Yason la Sosəpatər kà ‘Ayyi’, tagod à akul babay.

²² ‘Ayyi’ gəgod à akul, à gi Tertəyus uwana gətsetser gay anja Pol uwanay à wakità uwanay à abà, ‘Ayyi’ gəgod à akul babay, la sləm anja Sufəl gami.

²³ ‘Ayyi’ Gayyus agod à akul babay. Gi la azlaməna gay Zəzagəla gesina madz à ahəŋ kà la mtəga anha la abanay. Erastus, masla makəs sahar anja huf gudəŋ uwanay, atà la deda gami Kwartus tadàha à akul ‘Ayyi’.

((²⁴ Sufəl gami Yesu Kristu apis à akul gay à vok lela! Amen.))

Pol azləb Zəzagəla

²⁵ Məzləbə Zəzagəla uwana avà à akul ndzəɸa kà madz à ahəŋ lela la tetəvi aŋha la tsəh. Bokuba uwana apəh à azladza la mok uwana gəzà à atà gay marabəŋ lakəl aŋa Yesu Kristu. Gay mahad vok à ahəŋ gə aŋa Zəzagəla bay kà, apəhay à anu kà kalkal la uwaga. Kà uwana tatak uwaga kà, Zəzagəla afətàla à azladza la adi ala dagay uwarà aw. ²⁶ Ama lagonay kà, Zəzagəla adafətala à azladza la adi ala la dazuwaya. Apəhatàla kà la maz à atà uwana azlaməna mapəh à atà gay à ahəl tatsetsèr lakəl aŋa Yesu Kristu. Zəzagəla uwana adəv à gay aw kà, asal kà azladza tsəhay gesina tadiŋal gəl à masla à vok, takəs gay aŋha.

²⁷ Məzləbə Zəzagəla aŋa tsərəh à awtày. Masla kokudfa gəl aŋha la uwana akor matsihila dziriga, məzləbə masla la sləm aŋa Sufəl gami Yesu Kristu. Amen!

MATERA ANJA WAKITÀ UWANA POL ATSETSÈR À AZLA KORINTIYA Première Lettre de Paul aux Corinthiens

Ayyi

¹ Gi Pol uwana Zəzagəla akəsàni gi, la mawoyəŋ aŋha, kà gi aŋa magay masləlay aŋa Yesu Kristu, gətsetser wakità uwanay la ahəl gulo la slaka gà, anu la Sostenus, deda gami.

² Mətsetseray kà akul azlaməna masla gay Zəzagəla, uwana la Korintiya, azlauwana matsatsamani atà gà, kà atà aŋa madz à ahəŋ kà ahəl aŋa Zəzagəla Baba, ŋgaha uwana azlaaŋa la Yesu Kristu la abà, ŋgaha azlauwana tatsəl sləm aŋa Sufəl gami Yesu Kristu à gay gesina, uwana Sufəl gami babay suwaŋ. ³ Zəzagəla Baba gami, la Sufəl Yesu Kristu tapis à akul à gay à vok la mav à akul lapiya.

Tatak dzəba aŋha səla aw gà, uwana tabəzal la Korintiya

⁴ Kikay gəgodf à Zəzagəla gulo koksikoksi lakəl aŋkul, kà vok mahamay uwana avà à akul la Yesu Kristu la abà. ⁵ Ama la maham gay à vok aŋkul la abà la Yesu Kristu, kabəzàw à gəl la azlatatak delga delga gà uwana la abà, tavà à akul gesina, haday, la azlamavəy aŋa tatak, aŋa gay aŋha, ŋgaha la masəlay aŋha gesina. ⁶ Ndzer, gay lakəl aŋa Kristu uwana tazəŋ kà, adàla slilih la akul la abà. ⁷ Kà uwaga mavəy aŋa Zəzagəla gesina kabəzəwwal, akul uwana kakudaw kaslà mas à waŋ aŋa Sufəl gami Yesu Kristu. ⁸ Masla kà aga la ahəŋ azlaka akul, kà akul magay matsizl à ahəŋ gà tsərəh à mavakay uwatà, kà dza aŋa mabəz tetəvi aŋa masləh akul à vok, la vudf seriya aŋha aw. ⁹ Zəzagəla la gəl aŋha, la uwana azalà akul, kà akul magay tekula la Kona aŋha la abà, Yesu Kristu, Sufəl gami. Zəzagəla la uwana dziriga.

Mavəhla la tataka azlaməna madiŋal gəl à vok

¹⁰ Azladedə gulo, gədəv à akul kuɖa la sləm aŋa Sufəl gami Yesu Kristu: Dzàw à ahəŋ la matsən vok gay la abà, mavəhla apaka vok la tataka aŋkul la abà aw, gəw la maham gay à vok la abà, la madzugway tekula la abà ŋgaha la paŋaw tekula. ¹¹ Azladedə gulo, gəpəh à akul kiya uwanay kà, kà uwana azlaməna hudf gəy aŋa Kəlowe, misga, tasà à waŋ kà mapəh à gi kà magazlay la ahəŋ la tataka aŋkul la abà, tagòd à gi. ¹² Uwana gəpəh à akul uwanay kà, kà uwana kəla uwabeyuwi aŋkul kà, apəhay kà paŋaw gərgər. Anik agodf: ‘Gi aŋa Pol’, anik: ‘Gi aŋa Apolos’, anik aya: ‘Gi aŋa Piyer’, ŋgaha anik aya: ‘Gi aŋa Kristu’. ¹³ ŋgaha ma, kadzugwaw ma, vok aŋa Kristu ma aslaha vok ala gərgər dəŋ, kagodfaw takay? Awma Pol la uwana aməts à ahəf à adi kà aŋkul takay? Awma tadəhəkulla batem la sləm aŋa Pol kəla ay? ¹⁴ Kay, kikay gəgodfay à Zəzagəla, kà uwana gəɖahà batem à dza aw, say Kirəspus atà la Gayyus pəra. ¹⁵ ŋgaha à dza agəɖiŋ à afik kà adəhà batem la sləm gulo aw. ¹⁶ Iyay, haday təga, avikà gi, gəɖahà batem à hudf gəy aŋa Estefanas təga, ama gəɖahəŋ à dza anik aya, gəl agodf à gi aw. ¹⁷ Ama gi kà, Zəzagəla asləl gi à waŋ kà madəh batem aw, asləl gi à waŋ kà maz gay marabəŋ, ŋgaha gəzəŋ kà la kokudə haŋkəli aŋa sləb vok, ŋgaha gi aŋa mapəsew mamətsay aŋa Kristu la ahəf à adi aw.

Ndzəɖa aŋa Zəzagəla la matsihila aŋha

¹⁸ Gay lakəl aŋa maməts à ahəf à adi aŋa Kristu apakà bokuba tatak deyday la huma yewdi aŋa azladza, uwana takəs tetəvi aŋa gəy akəl. Ama kà aŋami uwana Zəzagəla abəl anu kà, məsəl kà gay uwaga kà la ndzəɖa aŋa Zəzagəla. ¹⁹ Bokuba uwana

tatsetsèr à wakità Zəzagəla à abà, agòd kà: “Gədakalàh hančkəli aña azlaməna masəl tatak à ahəj, gədawits masəlay aña azlaməna matsihila ala.”✧ ²⁰ Tsa kiya uwaga ma, mana azlaməna hančkəli tapəhay aya zlà ma? Bañaw azladza mawur gəl gà, la azlaməna mats gay la gudəj uwanay la vok ma? Zəzagəla apəhla ala kà, masəlay aña gudəj à vok uwanay kà magay kusoñu.✧ ²¹ Azladza gudəj à vok la hančkəli, tanəja tatak uwana Zəzagəla adəhəj la matsihila aña, ama tasəl masla aw. Gay gà la uwaga à uwana, Zəzagəla adəhla sləray la azlagay uwana məpəhay, kà uwana atà tagod kà: “Uwanay kà azlatatak kusoñu gà pəra.” Zəzagəla akəs kà uwaga kà, mabəl azlauwana tadinj gəl à masla à vok. ²² Azla Yahudiya kà, asa à atà manəj azlanadzipo, ŋgaha kà atà aña masəlay kà sayda gami kà dziriga. Azla Gərək kà, tayàh kà atà masəl Zəzagəla la aslasl gəl aña. ²³ Kà aña kà, məziñ kà lakəl aña Yesu Kristu uwana tazləl à ahəf à adi. Baña azla Yahudiya tatsən uwaga kà, azin à atà à gəl, ŋgaha azladza anik kà tagod: “Kà gay kusoñu!” ²⁴ Ama azladza uwana Zəzagəla atsatsəmàni atà, kà atà aña magay azlaaŋha kà, amiyaka tadagay azla Yahudiya, amiyaka tadagay azlatsəhay azla Yahudiya aw bay, kà aña kà, gay uwanay kà gay deyday aw, kà uwana tasəl kà Yesu Kristu kà apəhla ndzəda aña Zəzagəla la matsihila aña ala babay. ²⁵ Azlaanik tagod kà, uwana Zəzagəla adəhəj kà kusoñu, ama tasəl kà kusoñu uwaga aduwa hančkəli aña dza la kaykay aw. Tadzugw kà guɓguɓ uwaga aduwa ndzəda aña kà la kaykay gesina aw.

²⁶ Azladedə, nərəzàw gəl aŋkul, akul uwana Zəzagəla azalà akul tsi. La yewdi aña azladza kà akul məna makor hančkəli, la maslay, la masləkaway la ahəj mənğa aw. ²⁷ Ama Zəzagəla atsatsəmàni azlauwana azladza tazalà à atà ala azlakusoñu, kà atà aña makəl ziruwì à azlamatsihila gà à gəl. Atsatsəmàni azlaguɓguɓga, kà makəl ziruwì à azlandzəda-ndzəda aña gudəj à vok uwanay à gəl. ²⁸ Atsatsəmàni aya azlauwana, azladza gudəj à vok tanəja atà bokuba azlatatak mapəsew atà gà, kà atà makəl ziruwì à azlamənğa à gəl. ²⁹ Kiya uwaga kà dza la ahəj: ‘Gi’, agoday la huma Zəzagəla kà mats zlapay aw. ³⁰ Ama akul kà, Zəzagəla azalà akul, kà maham gay à vok la Yesu Kristu la abà. Kà uwana Kristu la uwana aga matsihila gami, uwana asà à ahəj la zagəla la afik, mədapaka azladza aña Zəzagəla, sà sətaka adagay, mədapəlla la ndzəda aña mamətsay la abà babay. ³¹ Asa à Zəzagəla kà uwaga apakà vok bokuba uwana tatsetsèr à wakità aña à abà:

'Baña dza asal mats zlapay kà, atsa zlapay kà, kà azlatatak uwana Zəzagəla adəhəj.

✧

2

Gay uwana Pol azəj la Korintiya

¹ Azladedə gulo, uwarà uwana gəda à awtəy kà maz à akul ala gay mahəfəj à ahəj gà, uwana Sufəl Zəzagəla afətə à anu à ama ala, gəpəh uwaga la azlagay namnamga aw, ŋgaha babay gəpəh la hančkəli aña dza aw. ² La kaslā uwana gəda à mtəga aŋkul kà, gəgəfəj à afik kà gi aña mapəhay kà lakəl aña Yesu Kristu pəra, gədapəhay lakəl aña azlatatak anik aw, ama gəpəh kà lakəl aña mamətsay, uwana aməts à ahəf à adi pəra. ³ Mok uwana gəgə la Korintiya, gəgə guɓguɓ, guba akəs gi, gəsukùlāh. ⁴ Mapəh gay Zəzagəla gulo la sayda gulo uwana gəzəj kà, agà kà la maslay aña azladza aña gudəj à vok aw. Ama la mapəhla ala aña Masasədok Zəzagəla, ŋgaha la maslay aña, ⁵ kà madinjal gəl à vok aŋkul aña matsizl à masəlay aña azladza à afik aw, say à maslay aña Zəzagəla à afik pəra.

Matsihila aña Zəzagəla

✧ **1:19** 1.19 Yesayya 29.14 ✧ **1:20** 1.20 Job 12.17; Yesayya 19.12; 33.18; 44.25 ✧ **1:31** 1.31 Yeremiya 9.24

⁶ Aña azladza uwana tasafay la tetëvi aña Zëzagëla la tsëh, gëtàpakulla matsihila dziriga à uwana hanjëkëli aña gudëj à vok uwanay aw, ngaha hanjëkëli aña azlamëna makoray la gudëj à vok uwanay, uwana tadàmats à gay aw. ⁷ Matsihila uwana gëpëhay kà, matsihila aña Zëzagëla. Uwaga kà tatak mahad vok à ahëj gà, uwana Zëzagëla atsatsàmànì dagay uwarà, à mok uwana gudëj à vok uwaga la ahëj dän aw, kà anu aña mad à slaka mazlëbëy anha à abà. ⁸ Aga la ahëj, amiyaka tekula, la tataka aña azlamëna makor gudëj à vok uwanay la abà, asël uwaga tetuwa aw. Agay tasëlay kà, anaka tazlël Sufël gami, uwana la mazlëbëy, à ahàf à adi kà makëdfay aw. ⁹ Ama bokuba uwana tatsësër à wakità Zëzagëla à abà, la uwana adahàn:

'Uwana dza adanëj adatsënëj didi aw, tatak uwana adada à aresl aña dza à abà dadàn aw, la uwana Zëzagëla adahàn à ahëj, kà aña azlauwana tawoya masla.'

¹⁰ Hadfay, anu la uwana Zëzagëla apëhanula nasiri uwaga la Masasëdfok tsikasla anha. Ndzer Masasëdfok aslala vok aña masël madzugway aña Zëzagëla uwana la gël anha la afik. ¹¹ Ama dza asël uwana dza anik adzugway aw, say masasëdfok aña dza uwatà përa asël. Kiya uwaga babay, dza la ahëj asël madzugway aña Zëzagëla aw, say Masasëdfok Zëzagëla kokudà gël anha përa asël. ¹² Anu la Masasëdfok, uwana gudëj à vok avà à anu aw, asà à ahëj kà la slaka Zëzagëla. Zëzagëla la uwana aslël à anu uwaga à ahëj la gël anha, kà anu aña masël dëwdëw tatak uwana avà à anu gesina. ¹³ Gi kà, gëpëh gay uwana azladza tapëhgëla aw. Ama gëpëh à akul, kà uwana Masasëdfok Zëzagëla apëh à gi. Ngaha gëtàpla à azlauwana tatsëb slëm à Masasëdfok uwaga.

¹⁴ Dza uwana la Masasëdfok Zëzagëla aw kà, aslala vok aña mabëz dziriga aña Masasëdfok uwaga aw. Kà anha kà, uwaga apakà kà bokuba azlatatak kusonju gà, masla aslala vok aña matsën godega anatà aw, say la mazlakay aña Masasëdfok la uwana atsenëj. ¹⁵ Dza uwana la Masasëdfok Zëzagëla, aslala vok aña mavàh tatak gesina ala, ama dza aslala vok aña madfahalla seriya à gël aw. ¹⁶ Bokuba uwana tatsësër à wakità Zëzagëla à abà:

'Uwa à uwana asël madzugway aña Sufël Zëzagëla uwa? Uwa à uwana aslala vok aña mawulla ala matsihila uwa? Ama anu, anu la madzugway aña Kristu.'^{*}

3

Mavàhla kà delga aw

¹ la dziriga azladedà gulo, mok uwana gi la Korintiya, gëslàla vok aña mapëh à akul bokuba uwana gëpëhay à azladza, uwana la Masasëdfok Zëzagëla aw. Gëpëh à akul kà bokuba uwana gëpah à azladza gudëj à vok, bokuba azlabëza uwana la madinjal gël à vok la abà. ² Kà uwaga à uwana, gëvähà à akul kà awà, awkà tatak may dzanđzanğa aw, kà uwana la mok uwaga kà kaslaw dadàn aw. Bà lagonay babay kà, kaslaw aw. ³ Kà uwana tsëräh à lakana kà, kanëfaw kà madëhëj aña gudëj à vok. Kadfahaw vok manor à vok, kagazlahaw, tsa baña kiya uwaga ma, kanëfaw kà madëhëj aña gudëj à vok kiya aña azladza anik aw takay? ⁴ Baña dza agod: 'Gi aña Pol', dza anik aya: 'Gi aña Apolos', uwaga kà manëf madëhëj aña azladza aw takay?

⁵ Uwa Apolos uwa? Ngaha ma, gi Pol ma gi uwa? Anu sëla nna, kà anu azlamëna slëray aña Zëzagëla përa, uwana Zëzagëla aslël à akul atà à wan, kà akul aña madinjal gël à Kristu à vok. Anu kà mëdäh slëray uwana: 'Dahàwwan', Zëzagëla agod à anu. ⁶ Gi gëslëkà, Apolos atäfal iyaw, ama Zëzagëla la uwana azigën uwaga. ⁷ Hadfay, dza uwana aslëkay, la dza uwana atäfal iyaw kà, atà tasla tatak aw, Zëzagëla la uwana asla tatak, kà uwana masla la uwana azigën uwaga. ⁸ Dza uwana aslëka, la dza uwana atäfal iyaw kà, atà kà kalkal. Zëzagëla adavà à këla uwabeyuwi anatà masik aña

^{*} 2:16 2.16 Yesayya 40.13

sləray, la madəhəŋ aŋha uwana adfahàŋ, ⁹ anu kà anu tekula la sləray aŋa Zəzagəla la abà, ama akul kà, akul kà bokuba guf uwana Zəzagəla apəsay.

Ŋgaha aya kà, akul bokuba gày, uwana Zəzagəla aŋalay. ¹⁰ La maslay uwana Zəzagəla avà à gi, gədzəkà la sləray la slaka aŋkul. Gəgà bokuba dza uwana aŋal gày, uwana asəl maf matatukway à ahəŋ lela. Gətətəkwàŋ lela, lagonay azladza anik taŋal gày uwaga. Delga kà azlauwana taŋalay, tadàh haŋkəli kà atà aŋa maŋal gày lela. ¹¹ Zəzagəla afà Kristu à ahəŋ kà bokuba masla la uwana matatukway. Dza aslala vok aŋa madàh matatəkw gày anik aya aw. ¹² La matatukway uwatà la gay, azladza tadzəkà maŋalahal à gày, azladza anik la luwàluwà, azlaanik la gursu, azlaanik la azlaakur uwana sləm aŋatà la ahəŋ kà maŋalàhla à matatukway uwaga à gay. Azlaanik tadəhəŋ la azlaahàf, azlaanik la kəsaf, ŋgaha azlaanik la veviz. ¹³ Ama kəla sləray aŋa uwabeyuwi adàpəhla vok ala la huma seriya, kà uwana la mavakay uwatà la uwana, Zəzagəla adəgur sləray aŋa uwabeyuwi la akàl, ŋgaha anu la gəl gami mədànəŋ sləray gami à baŋa delga. ¹⁴ Baŋa dza aŋal à matatukway uwana à gay, ŋgaha atəf akàl la gay ala kà, dza uwatà adàbəza masik aŋha. ¹⁵ Ama baŋa dza uwana akàl apəf sləray aŋha à gay kà, dza uwatà kà, adàbəza masik aŋha aw, ama masla la gəl aŋha kà adàbəlay, ama bokuba dza uwana atəfa à akàl la gay ala la zlahha à masla.

Məŋ gày aŋa Zəzagəla

¹⁶ Kasəlaw kà akul kà kagaw bokuba məŋ gày Zəzagəla, à uwana Masasəfok Zəzagəla adzà à ahəŋ la aku aw takay? ¹⁷ Iyay zlà, baŋa dza akal məŋ gày Zəzagəla à ahəŋ kà, Zəzagəla adàkalah dza uwaga à ahəŋ suwaŋ. Kà uwana məŋ gày Zəzagəla kà tsidəŋa, ŋgaha məŋ gày Zəzagəla kà akul.

¹⁸ Tsa kità zlà kà, dza avavara gəl aŋha zlà ma aw! Baŋa dza la tataka aŋkul la abà, asal aŋa magay masla haŋkəli aŋa gudəŋ à vok uwanay kà, say agay bokuba dza masəl tatak aw gà dadəŋ, la uwana agay masla haŋkəli la tetəvi dziriga la ama. ¹⁹ Uwana gəpəh kiya uwanay kà, azlatatak uwana azladza gudəŋ à vok uwanay asa à atà magay la haŋkəli, uwaga kà, azlatatak deyday la yewdi aŋa Zəzagəla pəra. Uwaga kà bokuba uwana tatsetsèr à wakità Zəzagəla à abà, tagòf kà:

'Zəzagəla adàbəza azlamatsihilaga uwaga à tsəh la dəmdəm aŋatà la abà.'✧

²⁰ La slaka anik babay aya kà, tatsetsèr kà:

'Zəzagəla asəl madzugway aŋa azladza, asəl kà deyday.'✧

²¹ Kà uwaga à uwana gəgof à akul kà: Dza atsa zlapay la dza anik la afik aw, kà uwana azlatatak gesina kà, akul kakoraw. ²² Gi Pol, Apolos, Piyer, anu gesina gami kà, anu azlaaŋkul. Amiyaka azlatatak lakana, la azlauwana taləg aw à waŋ la huma la gay gesina kà, azlaaŋkul. ²³ Akul kà, akul azlaaŋa Kristu, ŋgaha Kristu babay kà aŋa Zəzagəla.

4

Azlaməna masləlay aŋa Kristu

¹ Asa à gi kà azladza tasəlay kà anu azlaməna sayda aŋa Yesu Kristu, kà anu azlaməna sləray aŋha. Zəzagəla afà à anu nasiri dziriga aŋha uwana à ahəl uwarà, kà anu aŋa masəlla à udfaka ala. ² Akul kà, sələw uwaga adagay, dza, uwana məŋ dza afal tatak à ahəl kà, masla kà say dza dziriga pəra. ³ Kà aŋulo kà, bamərika kakəlaw gi gay à vok, bay kà dagədawali gəgofay aw, amiyaka bə azladza takəl gi gay à vok lakəl aŋa azlatatak anik anik babay kà dagədawali, gəgofay aw. Bə gi babay kà, gəfàh seriya aŋa gəl gulo aw. ⁴ Gəsəl tatak mawisiga gulo dadəŋ aw. Ama uwaga asal magofay kà, gi sətaka dadəŋ magay aw. Sufəl Zəzagəla la uwana masla

madàh à gi seriya à gəl pəra. ⁵ Kà uwaga kà, kadahaw seriya à azladza à gəl dadàñ aw, say kakudaw mavakay uwana Zəzagəla akədèv à ahəñ dadàñ. La vudf uwana Sufəl Kristu adàzlanalay, adàsəlla à uda à udfaka ala azlatatak uwana la mələs la abà lakana. Uwana azladza tadzugway la ləv anjatà la tsəh kà, adàsəlla à uda babay. Kiya uwaga kà, Zəzagəla adàzləb kəla uwabeyuwi lakəl anja sləray anja uwana adahəñ. Baña dza adahəñ mənğa, azləb masla mənğa suwan, ama baña dza adahəñ kay aw, mazləbay atsəhal suwan.

⁶ Azladedə gulo kà, akul la uwana gəpəh uwaga gesina, lakəl gulo, ngaha lakəl anja Apolos. Asa à gi kà kasəlaw la slaka gami uwana gay uwanay asal magodəy. Dza atsəd à makwi uwana lakəl ala tatsətsèr aw: Dza anik ankul akədəf à dza anik à ahəñ, ngaha kà mapəseyaw dza anik. ⁷ Kak uwana: 'Gəduwa azladza anik', kagod, kak uwa? Awma Zəzagəla la uwana avà à ka azlatatak uwaga gesina aw takay? Baña Zəzagəla la uwana avà à ka uwaga, ma kà mana katsala zlapay zlà ma? Kà mana kagod kà: Gəbəzà uwaga kà la aslasl gəl gulo zlà ma?

⁸ Kayyà, kadabəzaw tatak gesina. Akul azlagorobu adagay la tetəvi anja Zəzagəla la tsəh, kazàwàw sufəl, bə amiyaka anu kà mədàzuw sufəl dadàñ aw. Naka agay delga à baña akul azlasufəl ndzer, la yewdi anja Zəzagəla, ngaha anu azlaməna maz gay anja məpakàh azlasufəl babay suwan. ⁹ Ama anu azlaməna masəlay kà, gədzugw kà Zəzagəla kà adagolla anu la lig. Anu kà mədagay kà bokuba azladza uwana seriya mamətsay adatəf à atà à gəl, la yewdi anja azladza la vadavaday la afik. Bokuba marəzlay uwana azladza gesina tanəñan gesina la gudəñ uwanay la vok, la slaka azladza, ngaha la slaka azlamalika babay. ¹⁰ Azladza tadzugw kà anu azlakusonju, tagod, kà uwana məz gay lakəl anja Yesu Kristu. Ama kà akul kà, azlamatsihilaga, kà uwana kahamàw gay à vok la Kristu. Anu kà, azladza tadzugw kà anu azlagubguḅ, ama akul kà, akul azlandzəḃa ndzəḃa. Anu kà azladza tapəseyaw anu, ama akul kà, azladza tasləkaw akul. ¹¹ Tsəràh à lakana may la nəlay aza anu babay, lukut aga anu la vok babay aw, ngaha tazləbàh anu aya, ngaha gəy gami la ahəñ aw. ¹² Mədàh sləray kà anuf dà à uda la guday, kà mazlakla gəl gami, la mok uwana azladza tadzək à anu magodəhay à gəl kà, mədəv kuḃa à Zəzagəla kà mapis atà à gay à vok. La mok uwana azladza tatəreb anu babay kà, məbasin. ¹³ La mok uwana tatugw à anu gay mawisiga à vok kà, məwulatàla kà la ləv tələmna. Tapakànula lagonay kà bokuba anu azlaàläh anja gudəñ à vok, bə tsəràh à lakana babay kà bokuba anu azlahuyiv anja gudəñ à vok uwanay.

¹⁴ Uwana gətsetser kiya uwanay kà, kà anja makəlakulla ziruwu à gəl lakəl anja uwana kadahàwwàñ, gəgod magay aw. Uwana gətsetser à akul uwanay kà, kà gi anja masləhakulla vok pəra, akul azləbəza gay ləv gulo. ¹⁵ Amiyaka baña kabəzaw azlaməna matapakulla dəbow kulo, azlauwana tadala akul la tetəvi anja Kristu la ama, baba ankul kà bə tekula pəra. La mok uwana gəsa à akul ala sifa uwana kahamaw à gay à vok la Yesu Kristu la abà. ¹⁶ Kà uwaga à uwana gədəv à akul kuḃa: Kamkam pakàw bokuba gi. ¹⁷ Kà uwaga à uwana gəsləl Timotawus à slaka ankul babay. Masla kà bəzi gay ləv gulo, uwana ahoy yewdi anja Sufəl Zəzagəla. Masla adàwulakulla azlatatak uwana à gəl, gəpəhakulla la tetəvi anja azlaməna manəf Yesu la tsəh, la tataka azlaməna madinjal gəl à vok la abà gesina.

¹⁸ Azladza anik anik la tataka azladza ankul la abà tats zlapay, tadzugw kà, gəda à awtəy aya aw, gəl agod à atà. ¹⁹ Ama baña asa à Sufəl Zəzagəla kà, gəda à awtəy kà nekwa. Baña gədàda à awtəy, asa à gi anja masəl azlaməna zlapay uwaga, ama gay anjatà pəra aw, ama maslay anja ndzəḃa anjatà babay. ²⁰ Kà uwana makoray anja Zəzagəla kà anja gay pəra aw, ama la ndzəḃa anja Zəzagəla. ²¹ Mana à uwana asa à akul lagwa ma? Gəda à awtəy ma la azəva la ahəl ay, awma la masal ngaha la ləv tələmna ay?

5

*Makudək masla mabila gà à uda la maham gay à vok**la azlaməna gay Zəzagəla*

¹ Kəla slaka gesina gətsən tapəhay gay lakəl aña mabila uwana la tataka aņkul la abà, mabila uwana amiyaka azlauwana tasəl Zəzagəla aw bay kà, tadəhəŋ aw. Gətsənəŋ azladza tapəhay kà dza anik la tataka aņkul la abà kà, adabədf mis aña baba aña à gəl.✧ ² Nğaha aya kà, akul azlazlapay aya! Kayyà, ŋuləm naka kagaw la mazaw la gəl la abà, ŋgaha zil uwana adàh tsəhay gà uwaga la tataka aņkul la abà kà, kəsàw à uda la tataka aņkul la abà. ³ Gi kà kərkər la akul la sləb vok la abà, ama la masasədfok la abà kà, gi nekwa la akul, ŋgaha gədadàh seriya à dza, uwana adàh tsəhay sləray mawisiga uwaga la tataka aņkul la abà à gəl bokuba gi nekwa la akul. ⁴ Gədadəv seriya uwaga à gay, la sləm aña Sufəl gami Yesu. Gəgodf à akul kà, la mok uwana kadàhamaw gay à vok kà, madzugway gulo adàgay la tataka aņkul la abà, ŋgaha ndzəfa aña Sufəl gami Yesu adàgay la tataka aņkul la abà babay. ⁵ La mok uwana kahamaw gay à vok kà, vaw dza uwaga à ahəl aña seteni, kà seteni aña mawisəŋ ala. Kà uwana seteni kà, aga la ndzəfa kà lakəl aña sləb vok pəra. Nğaha Zəzagəla adàbəl masasədfok aña, la makədf gəl à ahəŋ, aña mavakay uwana Sufəl adàwul à waŋ.

⁶ Tatak la ahəŋ, à uwana katsawla zlapay aw. Kasəlaw kà tatak makəsl tatak ŋuv, akəsl magol pəhàw à gay aw uwà? ⁷ Zəbàw tatak makəsl tatak maviyaga à uda la tataka aņkul la abà, uwaga kà tsakana, kà akul aña magay sətaka kokudà tsakana. Gəw kalkal bokuba pəhaw mawga uwana tatak makəslin la tsəh aw, kiya uwaga à uwana kagaw, kà uwana Kristu magadzaw aña madəvaday Paska aga makədfayga kà aņami.✧ ⁸ Kità kà, məhab madəvaday Paska. Ama mətà Pain la tatak makəslin aw, məgà kuzakaka, mənəfà tetəvi aña Zəzagəla la ləv tekula. Məsək azlatatak mawisiga, uwana taga bokuba azlatatak makəslin, uwaga kà tsakana, ŋgaha kà mabila. Ama mətà Pain la tatak makəslin aw, uwaga Pain aña sətaka, ŋgaha aña dziriga.✧

⁹ La teraŋa aña wakità gulo, uwana la abà gətsetsər à akul kà, gəgòdf à akul kà: ‘Kahamaw gay à vok aw la azladza uwana tadza à ahəŋ la mabila la abà aw’, gəgòdf à akul. ¹⁰ Baŋa gəpəh kiya uwanay kà, gəpəhay kà azladza uwana tasəl Zəzagəla aw, kagodaw aw. Awaŋ, ama gəpəhay kà akul uwana kasəlaw. Azladza uwana tadàh mabila, la azlaməna mawoy tatak aña azladza anik, la azlaməna madàh gəl, la azlaməna manəf mazlazlay, uwana à ahəŋ la gudəŋ la vok, məhəlla à ahəŋ kà azlatatak uwaga gesina, ŋuləm mas à uda la gudəŋ à vok uwanay la abà. ¹¹ Asa à gi kà magodf à akul kà: ‘Kahamaw gay à vok la azlatsəhay dza uwaga aw’. Baŋa dza agodf kà: ‘Gi masla madiŋal gəl à vok’, ama adàh mabila, baŋaw masla agay masla mawoy tatak aña azladza anik, baŋaw masla manəf mazlazlay, baŋaw masla agay masla matsak magodəhay à azladza anik à gəl, baŋaw agay masla guzu, ŋgaha agay masla gəl, kadzaw à ahəŋ la slaka gà la masla aw, amiyaka tatak may bay kà, kazuwaw la slaka gà aw.

¹² Gi kà gəslala vok aña madàh seriya à azlaməna à uda à gəl aw, akul kadəhaw seriya kà azlaməna huđ gày à gəl. ¹³ Kà uwana azlaməna à uda kà, Zəzagəla la uwana adəfaha à atà seriya à gəl. Kudəkàw à uda dza uwana adàh mawisiga la tataka aņkul la abà, bokuba uwana wakità Zəzagəla apəhay.✧

6

Kapaw gudzi à masla madiŋal gəl à vok à gəl la huma azladza à uda aw

✧ **5:1** 5.1 5Musa 22.30 ✧ **5:7** 5.7 2Musa 12.5 ✧ **5:8** 5.8 2Musa 13.7; 5Musa 16.3 ✧ **5:13** 5.13 5Musa 13.5; 17.7

¹ Baña dza la tataka ankul la abà tabay vok gay la dza anik, ma delga à baña apuwla gudzi à gəl kà la huma azladza uwana tasəl Zəzagəla aw takay? Akəsa à vok kà apuwla gudzi à gəl kà la huma aña azlaməna madijal gəl à vok. ² Kasəlaw kà, azladza aña Zəzagəla la uwana tadəfah seriya à azladza gudəŋ à vok uwanay à gəl aw takay? Iyay, hadfay zlà, baña ndzer kadəfahaw seriya à gudəŋ à vok uwanay à gəl ma, kakay, kaslawwalla vok aña matàh azlabəza gay uwana ala la tataka ankul la abà aw zlà ma? ³ Kasəlaw babay kà mədəfah seriya à azlamalika à gəl aw takay? Tsa kiya uwaga, ma baməraka azlatatak bəzaga aña gudəŋ à vok uwanay zla ama uwà? ⁴ Ama akul, baña akul la magazlay lakəl aña tatak anik la tataka ankul la abà ma, kakay kaslawwalla vok aña mapəh tatak uwaga à azlaməna à uda, uwana atà la matsən vok à gay anina aw ma, kà atà aña madəh seriya aña tatak uwaga ma? ⁵ Ziruwu aza à akul aw takay? Aga la ahəŋ la tataka ankul la abà à bà dza hanəkəli gə, bà tekula aña matahəh azlabəza gay uwana alaa la tataka ankul la abà, akul azlaməna madijal gəl à vok aw takay? ⁶ Iyay zlà, uwaga ma, akəsa vok ndzer kà mapuw gudzi à deda ankul anik à gəl, la huma aña azladza uwana tasəl Zəzagəla aw takay?

⁷ Baña tatak mapuwla vok gudzi à gəl la ahəŋ, la tataka ankul la abà, uwaga la uwana adukwakulla tsakana à gəl, uwana kadəfahaw à waŋ. Kà mana kabasaw vok tsakana aw ma? Kà mana kasakawwal ada à akul à gəl à tsəh pəra aw ma? Nuləm mabasiŋ. ⁸ La dziriga kà, akul la uwana kanəfaw mawisiga la mad à gəl, ŋgaha kadəfahaw uwaga kà la slaka azladedə ankul məna madijal gəl à vok aya bay. ⁹ Sələw la dziriga kà, azlaməna makəsafər tadàda à makoray Zəzagəla aw. Akul, kavavaraw gəl ankul aw. Azlaməna mabila, azlaməna manəf mazlazlay la azlaməna gəl gaw, ŋgaha la azlaməna matsatsəl vok kà atà kà atà zil zil kà, tadàda à makoray Zəzagəla tetuwa aw. ¹⁰ ŋgaha la azlaməna gəl aña tatak aña azladza anik, la azlaməna makad yewdi à azlatatak aña azladza anik à tsəh, la azlaməna guzu, la azlaməna matsak magodəhay à azladza anik à gəl, ŋgaha la azlaməna mazaḅ tatak aña azladza anik la ndzəda, azlatsəhay dza uwaga gesina kà, tadəbək asik à abatà babay aw. ¹¹ Kiya uwaga à madz à ahəŋ aña azladza anik ankul uwarə. Ama lagonay kà, Masasədok Zəzagəla uwana mənəfay kà adapal akul la tsakana gami la abà gesina sətaka adagay, akul mabək akul à fəta à awtəy gə, kà ana Zəzagəla, kagaw dziriga la huma Zəzagəla kà sləm aña Sufəl Yesu Kristu uwana kasəlaw, ŋgaha kà Masasədok aña Zəzagəla gami.

Maday uwana akəs à Zəzagəla à gəl

¹² Iyay, azladza anuwaw la tataka ankul la abà tagodf kà: 'Tatak gesina kà, tetəvi la ahəŋ kà anami', tagodf. Iyay dziriga nəma, ama tatak gesina kà, akəsa à akul vok aw. Ama gi kà, asa à gi kà tatak anik afà à gi asik à gəl, kà gi aña magay mayà anha aw. ¹³ Madzugway anətà bay kà: 'Zəzagəla adəha tatak may kà aña hudf', tagodf. 'ŋgaha hudf babay kà aña maf tatak may à abà', tagodf aya. Iyay nəma. Ama Zəzagəla adəkalah à ahəŋ vərđi anik səla nna. Ama kà aña mabila kà, Zəzagəla adəhà vok gami kà aña uwaga aw, ama Zəzagəla adəhà kà anu aña madəhla sləray, uwana asa à Sufəl Yesu, kà uwana masla la uwana akor vok gami. ¹⁴ Zəzagəla awulla Sufəl Yesu à uda la mamətsay, ŋgaha masla adəwulla anu à uda la mamətsay la ndzəda anha aya babay.

¹⁵ Kasəlaw kà vok ankul kà manəbay aña vok aña Yesu Kristu aw takay? Gəsləhəni manəbay aña vok aña Yesu, ŋgaha gi aña madla à slaka aña masla mazaḅ zil takay? Awan! Akəs vok aw! ¹⁶ Kasəlaw kà baña dza agagamla à vok maləv la masla mazaḅ zil kà, tagay sləḅ vok tekula aw takay? Hadfay, tatsetsər à wakitə à abà kà: 'Atə səla nna, tagay sləḅ vok tekula.'✧

¹⁷ Ama dza uwana avà vok anha à Sufel Yesu kà, masla la Yesu kà, atà tekula suwan.

¹⁸ Tsa kità zlà kà, kahoyaw à mabila à ahà! Azlatsakana anik anik uwana azladza tafa à ahən gesina kà, abəz à hudf gà aw. Ama dza uwana adàh mabila kà, awis vok anha ala la gəl anha. ¹⁹ Kasəlaw kà, vok ankul kà hudf gày anə Masasədok Zəzagəla aw takay? Zəzagəla la uwana avà à akul Masasədok uwanay à uwana la ləv ankul la tsəh, kà uwana vok ankul kakoraw aw, Zəzagəla akoray. ²⁰ Zəzagəla apəl tatak kà mənğa anə mavavarla akul. Kiya uwaga dəhəw sləray la vok ankul kà mazləbla Zəzagəla pəra.

7

Gay lakəl anə mazəb vok

¹ Lagwa kà, gəwula à gay anə manavay ankul uwana à tsəh, kanəvəw à gi, la wakitə ankul la abà zlà. Gədzugw kà delga nəma, kà dza anə mazəb mis aw. ² Ama la madzugway gulo la abà aya kà, nələm mazəb mis, gəl agodf à gi, kà dza anə matəf à mabila à abà. Delga kà uwabeyuwi anə magay la mis, nğaha kà azlamis bay tagay kità. ³ Kiya uwaga kà, zil avà à mis anha à tatak uwana mis anha ayahay, nğaha bay, mis avà à zil anha à tatak uwana zil anha ayahay. ⁴ Mis aslala vok anə mahən, uwana ala asa à vok anha aw: Say zil anha. Zil babay aslala vok anə mahən, uwana ala asa à vok anha bay aw, say mis anha la uwana ahənallaŋ ala. ⁵ Kiya uwaga zlà kà, kakwesawla kà vok mahən à ahən kà akul à akul aw, say akul katsənaw vok à gay kà anə kaslā nɔv lakəl anha, kà akul anə mazəb kaslā anə madəv kudfa à Zəzagəla. Ama la lig la ahən haməw gay à vok aya. Tsa baŋa kità aw kà, kadəslawwalla vok anə masləh vok à vok ankul aya aw, kà akul anə mav tetəvi à seteni kiga aw.

⁶ Ama: ‘Dahəwwəŋ uwanay’, gəgodf à akul, la magay zlà ma, aw. Ama agayŋa kadəhawwanə kiya uwanay kà naka delga, gəgodf pəra. ⁷ Kəla kà, agay la madzugway gulo kà, naka delga azladza tadza à ahən kokudfa mis bokuba gi, gəgodf. Ama kəla uwabeyuwi kà, abəzə mavəy gərgər la slaka Zəzagəla. A azladza anik kà, avà à atə maslay anə madz à ahən kiya uwanay kokudfa mis, à dza anik avəl maslay anə madz à ahən la mis.

⁸ Lagonay kà, gədəgola à huma kà à slaka azlamagamza la azlamis kudfa kà mapəh à atə gay. Gəgodf à atə, kà delga, kà atə tadza à ahən bokuba gi. ⁹ Ama baŋa kaslaw aw, kazəbaw mis. Nələm kà mis, kà akul anə mahəl gəl à ahən la madzugway ankul la abà.

¹⁰ Lagwa kà, gəpəhay kà azlauwana la azlamis adagay zlà, la tataka anə azlaməna madiŋal gəl à vok la abà. Mapəhay uwanay kà gi gəpəh aw, ama Sufel Zəzagəla la uwana apəh. Mis uwana adada à zil, aslala vok anə mavəh vok ala la zil anha aya aw, ama baŋa avəh vok ala kà, ada à zil anik aya aw, tsa baŋa kətə aw kà, tawul à vok à tsəh la zil anha. ¹¹ Nğaha bay zil aslala vok anə makudək mis anha aw.

¹² Lagonay kà, gəpəhay kà à azlaməna à uda adagay zlà, uwanay kà gay gulo, awkə gay anə Sufel Yesu aw. Baŋa masla madiŋal gəl à vok la mis, uwana adiŋal gəl à vok aw, ama asal madz à ahən la zil anha, uwaga kà akudək aw. ¹³ Kà anə mis uwana masla madiŋal gəl à vok babay kà, kiya uwanay bay. Baŋa zil anha adiŋal gəl à vok aw, ama asal madz à ahən atə səla kà, ada anha aw. ¹⁴ Uwana gəpəh uwanay kà, kà uwana zil masla madiŋal gəl à vok aw gə uwanay kà, Zəzagəla akəs kà, kà mis anha, uwana masla madiŋal gəl à vok. Nğaha mis masla madiŋal gəl à vok gə aw gə, uwanay aya kà Zəzagəla akəs kà, kà zil anha uwana adiŋal gəl à vok aya suwan. Tsa anə kità aw kà, naka azlabəza anətə kà, naka tagay kà bokuba azlabəza anə azladza uwana tasəl Zəzagəla aw gə zla, ama lagwa kà Zəzagəla adakəs atə. ¹⁵ Ama dza uwana adiŋal gəl à vok aw, asal mavəhla la masla madiŋal gəl à vok kà, vəwwal tetəvi. Nğaha kà masla madiŋal gəl à vok uwaga, adagay zilga, adagay misga kà, aga

la mapëlla la abà adagay zlà. Zëzagëla azalà akul kà, kà madz à ahëj la lapiya, la tëlëmma la abà. ¹⁶ Kak mis, kasël ma kadàtëf zil anjak ay? Nğaha kak zil babay ma kadàtëf mis anjak tak ay? Kasëlaw aw!

Dzàw à ahëj bokuba uwana la abà Zëzagëla azalà akul

¹⁷ Uwaga kà kësàw, say këla uwabeyuwi anëf madz à ahëj anja uwana Zëzagëla avàl lela, nğaha manëf madz à ahëj anja uwana uwarà Zëzagëla azalàl la abà lela. Uwaga la uwana gëpëhay à azlamaham à ahëj mëna gay Zëzagëla gesina. ¹⁸ Baña dza makëdëv à uda gà, la mok uwana Zëzagëla azalàl kà: Kà mana mi, agod aw. Baña dza kokudfa makëdëv à uda gà, à mok uwana Zëzagëla azalàl kà, ayàh makëdëv à uda aya aw. ¹⁹ Magay makëdëv à uda banaw magay kokudfa makëdëv à uda kà tatak tekula, makës vok anjata la ahëj aw. Tatak uwana akës vok kà, say makës mapëhay anja Zëzagëla përa. ²⁰ Akësa vok, kà këla uwabeyuwi adza à ahëj la uwana la abà uwarà, la slaka uwana la abà Zëzagëla azalàl à mok uwana atsënë mazalal anja Zëzagëla. ²¹ Iyay, mayà uwana Zëzagëla azalàl kà, adzugw gël aya aw, ama banja mas à afik la ahàl apëhla vok ala, kà anjak anja magay la makor gël la abà babay kà bà delga, ²² mayà uwana Zëzagëla azalàl adagay à makor gël la abà, kà uwana adagay tekula la Sufël gami Yesu Kristu. Kiya uwaga babay, dza makor gël gà, uwana Zëzagëla azalàl, adagay mayà anja Zëzagëla, kà uwana adagay anja aya. ²³ Zëzagëla avavarà akul la tatak mënga, kità kà, kagaw azlamayà anja azladza aya aw. ²⁴ Azladede gulo, kamkam, këla uwabeyuwi adza à ahëj la slaka Zëzagëla bokuba uwana adzà à ahëj à mok uwana Zëzagëla azalàl.

Gay lakël anja azlamagamza, la azlamis kudfa

²⁵ Lakël anja azlamagamza kà, gi la gay anja Sufël kà mapëh à atà aw. Ama madzugway gulo la uwana gëpëh à akul, delga katsëbaw slëm à gay gulo, kà uwana gi kà, gi masla mabëdfla gay aw, kikay kà maslay anja Sufël Yesu Kristu. ²⁶ Madzugway gulo tëbà: Baña dza adazëb mis didi aw kà, nülëm kà masla adza à ahëj à kà matërëbay anja lakana uwanay. ²⁷ Baña kak la mis bay kà, kakudëk aw. Baña kak magamza gà babay kà, dzà à ahëj kiya uwaga, kayàh mis aw. ²⁸ Iyay zlà, amiyaka gëpëh kiya uwanay babay kà, banja kazëb mis kà tsakana, gëgodf magay aw. Nğaha banja dugu ada à zil babay kà, tsakana, gëgodf aw. Ama sëlàw kà, azlauwana la azlamis la uwana tas nğërpa mënga la gudëj uwanay la vok lakana, nğaha kà asa à gi kà akul anja mad à mas nğërpa uwaga à abà aw.

²⁹ Aganay uwana asa à gi mapëhay zlà, azladede: Kaslà kà desl adagay. Dagay lakana kà, azladza uwana la azlamis kà, taga kà bokuba atà la azlamis aw këla. ³⁰ Azlauwana tataway kà, taga bokuba atà la iyaw tugwi la adi aw, azlauwana la makëdaslay la gay kà, tanërëz kà bokuba atà la makëdaslay la gay aw, azlamëna masukw tatak babay kà, tanërëz kà bokuba takor tatak uwana tasukw aw. ³¹ Azladza uwana takës vok la azlatatak anja gudëj à vok uwanay kà, tanërëz kà bokuba takës vok la uwaga aya aw, kà uwana gudëj à vok uwana kanëjawanj lagonay kà, adàzila, tuwiz.

³² Lagwa kà, asa à gi kà kahëlaw gël à ahëj kà madzugw gël. Dza uwana azëb mis aw kà, afa gël kà à slëray anja Sufël Zëzagëla përa, ayàh mahëdfay kà Sufël à adi përa. ³³ Ama dza uwana adazëb mis kà, afa gël kà azlatatak anja gudëj à vok uwanay, asal mahëdfay kà à mis anja à adi suwanj. ³⁴ Kiya uwaga lëv anja adavahla sëla, kiya uwaga la mis babay. Mis uwana zil anja la ahëj aw banaw dahalay uwana la zil aw kà, tafa gël kà à slëray anja Sufël Zëzagëla. Tavà vok anjata la lëv anjata gesina à Zëzagëla, ama mis uwana la zil kà, adzugway kà lakël anja azlatatak anja gudëj à vok uwanay, kà uwana asal madf à ahëj kà uwana akës à zil anja à gël.

³⁵ Uwana gəpəh uwanay kà, kà uwana asa à gi mazlak akul. Gəyàh madəf akul gay à ahəŋ aw, asa à gi kadahawwan kà uwana delga, dahàw sləray aŋa Sufəl Zəzagəla la ləv tekula.

³⁶ Lagwa, gədzugw lakəl aŋa azlamawudfa uwana asa à atà mazəb vok aya aw. Baŋa dahalay atà la mawudfa aŋha, tadzugw kà atà aŋa mazəb vok aya aw, la lig la ahəŋ kohana adzugway aya kà à mawudfa aŋha, ŋgaha kà madzugway aŋha gesina kà la masla la tsəh kà, akəsa vok kà mazəbay kà, tazəb vok bokuba uwana asa à atà, uwaga kà tsakana aw. ³⁷ Ama baŋa agədaŋ à afik kà, uwala tatak la ahəŋ atərəbəŋ aw, ŋgaha mabila azəŋ aw kà, kità kà, agəf à madzugway aŋha à afik, azəb mawudfa aŋha uwaga aw. ³⁸ Dza uwana azəb mawudfa aŋha kà, adaha delga, ama dza uwana azəb aw adaha sləray kà dzəba aŋha səla aw, aduwa vok kaykay aya.

³⁹ Mis uwana la zil, masla aga la sasala la abà, kà uwana zil aŋha la ahəŋ la sifa. Ama baŋa zil adamətsay, mis adapəlla. Baŋa asal, ada à zil anik, ama say aday kà à mtəga masla madiŋal gəl à vok. ⁴⁰ Ama baŋa adza à ahəŋ kokudfa aŋa mad zil kà, marabay aŋha kà ada à zagəla. Kəla kà, uwaga kà madzugway gulo zlà. Ama gi babay kà, gi la Masasəfok aŋa Zəzagəla à uwana apəhgəla.

8

Sləb uwana takəf à azlamazlazlay à ahəŋ

¹ Lagwa mənərəz gay lakəl aŋa azlasləb uwana takəf à azlamazlazlay à ahəŋ zlà: Akul kà kagodaw kà: ‘Anu gesina la haŋkəli’, kagodaw. La dziriga kà, haŋkəli tsəhay gə uwaga kà adala dza kà à zlapay à abà pəra. Masal la uwana adzərəfəh azlaməna madiŋal gəl à vok ala. ² Dza uwana: ‘Gəsəl tatak’, agəf kà, asəl tatak bokuba uwana anaka, asəl dadəŋ aw. ³ Ama dza uwana awoya Zəzagəla kà, Zəzagəla asəl masla.

⁴ Aganay gay gə uwana: Dza aslala vok aŋa mapad sləb, uwana takəf à azlamazlazlay takay? Məsəl kà, mazlazlay kà tatak deyday la gudəŋ uwanay la vok. Məsəl kà say Zəzagəla kokudfa gəl aŋha tekula pəra. ⁵ Haday gə, azlatatak la ahəŋ la zagəla ŋgaha la vədah à uwana azladza tasləkaw tatak uwatà bokuba zəzagəla. Azlata-tədiya la ahəŋ, kiya uwaga à uwana azladza tasləkaway, tapakahatàla kà azlaməŋga aŋatà bokuba zəzagəla. ⁶ Ama kà aŋami kà, Zəzagəla kà tekula ahəl pəra. Masla la uwana Baba gami. Tatak uwana la gudəŋ la vok gesina kà, aguwa à uda kà la ahəl aŋha. Adahà anu babay, kà anu aŋa magay azlaaŋha. Sufəl gami babay kà tekula pəra, uwaga kà Yesu Kristu. Tatak gesina atsà à uda la ahəl aŋha, məbəzà sifa babay kà la ahəl aŋha.

⁷ Ama azladza gesina tasəl dziriga uwaga aw. Kà uwana azladza aŋuvaw tadfəhla slilih kà la manəf azlamazlazlay, ŋgaha lakana aya baŋa tapad azlasləb uwana takəf à mazlazlay à aya kà, ndzer tanərəz bokuba sləb aŋa mazlazlay la dziriga, kà uwana tabəz ndzəfda la tetəvi aŋa Zəzagəla la tsəh dadəŋ aw, guba aza à atà, kà madah àläh à vok aŋatà à vok la mapad sləb uwaga. ⁸ Ama la dziriga kà, tatak may adaha à anu àläh la slaka Zəzagəla aw. Baŋa məzuw azlatatak anik aw babay kà məgogolay aw, baŋa məzuw babay kà, agagis anu aw.

⁹ Ama kamkam dahàw haŋkəli, kà uwana akul la makor gəl la abà, kà mazuw tatak gesina. Ama zlahaw kà, uwaga adala dza, uwana azlaguɓguɓ la tetəvi aŋa Zəzagəla la tsəh, à tsakana à abà, kà delga aw. ¹⁰ Haday kà, baŋa dza anik guɓguɓga anəŋa ka, à kak uwana kasəl tatak, kadadza madzay la gəy mazlazlay la aku kà mazuw tatak kà, masla bay kà, adəzuway suwan, kà uwana kadəkadfalla gəl à vok. ¹¹ ŋgaha deda aŋak maruw vok à ahəŋ gə, uwana Kristu aməts kà aŋha kà, masla azila la tsəh aŋa masəl tatak aŋak uwana kadahəŋ. ¹² Madəh tsakana tsəhay uwaga kà, delga aw. Katsalla matekwid à deda aŋak, azəŋ la madzugway aŋha la abà, ŋgaha bay

kà, kadàh tsakana kà à Kristu à vok la gəl aṅha babay. ¹³ Tsa baṅa tatak may la uwana atsala matekwid à deda gulo kà, kà mad à tsakana à abà kà, ṅuləm gəpəɸ azlasləb uwana takəɸ à azlamazlazlay à ahəṅ ɸikiɸiki aw, ṅgaha kà, gi aṅa matsala matekwid à deda gulo aw.

9

Gay lakəl aṅa azlaməna masləlay

¹ Gi kà, gi la makor gəl la abà aw takay? Gi masləlay aw ay? ṅgaha gənəṅà Yesu Kristu la yewdi gulo. Akul uwanay kà akul mayyi à tsəh aṅa sləray gulo uwana gəɸahəṅ aw takay? ² Iyay, amiyaka azladza anik takəs gi bokuba gi masləlay aw kà, akul kà, kasəlaw gi, kà gi masla masləl gi gə, kà maham gay à vok aṅkul, uwana la Yesu la abà, apəhla kà, gi masləlay ndzer, kà uwana gi la gəl gulo la uwana gəpəh à akul gay marabəṅ.

³ Aganay tatak uwana gəpəh à azladza uwana taslaha gi məl à gəl. ⁴ Azlayla gi kà gəbəzal tatak may la tatak masay kà aṅa sləray gulo aw takay? ⁵ Azlayla gi kà, gi aṅa mazəb mis masla madiṅal gəl à vok gə, kà mauguzahay anu səla, bokuba uwana azlaməna masləlay anik, la azladedə aṅa Sufəl gami, la Piyer aw takay? ⁶ Awma anu la Barnabas la uwana məɸàh sləray kà anu aṅa madzadzər gəl gami pəra takay? ⁷ Slodzi uwana la guvəl la gay, ma masla adzadzər gəl aṅha takay? Awma dza ma uwala à uwana azuw mayyay tatak aṅa guf aṅha, uwana asləka aw la? Masla manəṅla azlaləmana, ma asa awà aṅatà aw takay?

⁸ Ama kadzugwaw kà mapəhay gulo kà, apəhay aṅa azladza pəra, kagodəw aw, awaṅ, wakità seriya aṅa Zəzagəla babay kà apəh kiya uwaga. ⁹ Aganay uwana tatsetsər à wakità Zəzagəla à abà:

'Kawadəw gay à kokur uwana à ahəṅ, azləb hi aw.'^{*}

Zəzagəla ma adzugw ma lakəl aṅa kokur, kagodəw takay? ¹⁰ Kasəlaw kà, la dziriga kà, apəh kà anu aw takay? La dziriga kà, gay uwatà kà tatsetsər kà aṅami, akəsà vok kà masla mapəs guf, la masla mazləb tatak kà, say tadəv sləray aṅatà à gay lela kəla, la maf madzugway aṅatà à ahəṅ kà humà gə aṅatà la tatak uwaga la abà suwaṅ. ¹¹ Anu mətsəɸ makəs vok aṅa tatak gudəṅ à vok la slaka aṅkul, ma uwaga ma tatak delga aw takay? ¹² Baṅa azlawla azlaanik kà məbəz tatak la ahəl aṅkul ma, anu la uwana azlawla anu kaykay aw takay?

Adagay kiya uwaga babay kà anu, kà məɸahəṅ kiya uwaga aw, bə kəla ṅgərpa uwana abəz anu kà, anu kà məbasin kà anu aṅa madəh tatak uwana adəɸ gay à azladza anik à ahəṅ aṅa matsən gay marabəṅ lakəl aṅa Yesu Kristu aw. ¹³ Sələw la dziriga kà, azlauwana tadəh sləray la mən gəy Zəzagəla la aku kà, tabəz tatak may aṅatà la aku la abatà. ṅgaha azlaməna makəɸ tatak la aku la abatà, tabəz humà gə aṅatà la azlatatak uwatà la abà takəɸay.^{*} ¹⁴ Kiya uwaga babay, Sufəl Yesu apəh kà azlauwana taz gay marabəṅ kà, tadzadzər vok la uwatà suwaṅ, agəɸ.

¹⁵ Amiyaka adagay kiya uwanay babay kà, gəɸa à ahəṅ kiya uwaga aw. Gətsətsər kà masləl gi tatak à awaṅ, gəgəɸ à akul, aw. Kà uwana ṅuləm gəməts kà manav tatak à kà dza aṅa makəl gi marabay gulo ala aw. ¹⁶ Gi, gəts zlapay kà maz gay marabəṅ aw, kà uwana kà leri gə kà aṅulo kà madəhəṅ. Baṅa gi gəz gay marabəṅ uwaga aw kà, mətərebəy agay la gi. ¹⁷ Agayṅa gi la uwana gəkəsəni sləray uwaga la ahəl gulo kà madəhəṅ kà, naka gəkud məbəz masik. Iyay, tsa uwaga kà, sləray gulo kà madəhəṅ kà, say gəduw yewdi kà à abà sləray, uwana Zəzagəla afà à gi à ahəl la gəl aṅha. ¹⁸ Gi ma mana à masik gulo zlə ma? Aganay masik gulo: Gəz gay marabəṅ

^{*} 9:9 9.9 5Musa 25.4 ^{*} 9:13 9.13 5Musa 18.1

kà deyday, kà uwana gënava anjuf anja slëray sayda uwana gëdehënj aw, ama naka azlayla gi nëma.

Asa à gi masëlla azladza à slaka Zëzagëla përa

¹⁹ Gi la makor gël la abà, gi mayà anja dza aw. Ama gi la gël gulo la uwana gëpakà gël gulo ala kà mayà, ngaha gi anja masëlla azladza à slaka Kristu. ²⁰ Mok uwana gëdàh slëray la tataka azla Yahudiya la abà kà, gëdzà à ahënj bokuba gi zil Yahudiya, kà gi anja mabëz atà, ama gi la gël gulo kà, gi la tsëh anja mapëhay anja Musa aw. Gëdzà à ahënj la tataka azlauwana tanëfa mapëhay, gëdzà à ahënj bokuba anjatà, kà gi anja mabëz atà. ²¹ Kiya uwaga, mok uwana gëdza à ahënj la tataka azlauwana la abà tasël mapëhay anja Musa aw, gëdza à ahënj bokuba anjatà, la kokudà maf gël à mapëhay uwaga, kà gi anja mabëz atà la kokudà maf gël à mapëhay uwaga, kà gi anja mabëz atà suwanj. Ama uwaga kà, asal magoday kà, gëkës mapëhay aw, magay aw, awan, gënëfa mapëhay anja Yesu Kristu. ²² La huma anja azlauwana atà maruw vok à ahënj gà kà, gi babay gëga anja mabëz atà. Uwaga gëdehënj gesina kà, kà gi anja mabëz atà, ngaha atà anja mabëlay, amiyaka tekula anjatà anja mazilaw. ²³ Uwana gëdàh uwaga gesina kà, kà gay marabënj anja mad à huma à gay lela, kà gi anja mabëz masik la azladza anik bay.

²⁴ Kasëlaw la dziriga kà, azladza uwana tagor mahoyay, gesina anjatà tahoyay, ama dza tekula la uwana adàbëza masik uwana tapëh përa. Kità kà, gëràw mahoyay, kà akul anja mabëz masik. ²⁵ Dza uwana asal magor mahoyay kà, say atsëtsëh vok ala dagay uwarà dadan, kà masla anja mabëz masik. Ama masik uwatà adàbëzal la gudënj uwanay la vok, kà adàwisla. Këla kà, kà anjami kà, mëtsetsëh vok ala kà, kà anu anja mabëz masik uwana adëv à gay aw, akàl adàsàl à adi ala aw. ²⁶ Kà uwaga à uwana gëdàgay la matsëk yewdi, kà say à huma à gay kabaw. Kà uwaga à uwana gëdàgay kà bokuba masla madëf kotëpa uwana azlaß afad deyday aw. ²⁷ Gësal vok gulo lela, kà gi anja makor vok gulo, kà la marabënj makëf gël à ahënj, kà Zëzagëla anja magolla gi la lig à gi uwana gëzà gay marabënj anja à azladza anik aw.

10

Kahamaw gay à vok la azlamazlazlay aw

¹ Azladedà, delga awul à akul à gël, lakël anja azlababa gami madzidziga uwana tauguzàh la Musa. Zëzagëla adëk à atà magudu gudu à gël gesina, atsakà atà à ama, ngaha gesina anjatà taguwà à uda la mukwà mativga la abà aya.* ² Atà gesina anjatà kà tabëzà batem la magudu gudu, ngaha la mukwà mativga la abà. Atà gesina anja tahamà gay à vok la Musa. ³ Atà gesina anjatà tazùw tatak may uwana asà à ahënj la slaka Zëzagëla babay. ⁴ Tasàh iyaw uwana akalàh à uda la dzëgla la abà, uwana Zëzagëla avàh à atà dzëgla, uwana Zëzagëla avà à atà kà, kà Yesu Kristu uwana aguwà à huma.* ⁵ Bà la uwaga gesina kà, Zëzagëla akweskà madëhënj anjatà, kà uwaga à uwana gesina anjatà tamàts à kësaf à abà.

⁶ Azlatatak uwaga kà tazlaka anu lakana, kà anu anja madàh à adi la mabila mawisiga uwana atà tafahàhàn aw. ⁷ Kaslëkawaw azlamazlazlay bokuba uwana azlaanik anjatà tafahàhàn aw. Wakità agod lakël kà:

'Azladza tadzà madzay, tazùw tatak, tasàhàh tatak, ngaha tasà à afik kà mahab dës azlamazlazlay.*

Kamkam, kà anjukul kà kaslëkawaw azlamazlazlay aw. ⁸ Kadahaw mabila bokuba azlaanik anjatà, uwana dza dëbow dzik sëla gël anja makër tamatsà à gay la mavakay tekula la tsëh aw. ⁹ Digiya katapaw Sufël Zëzagëla, bokuba azladza anik anjatà aw.

* 10:1 10.1 2Musa 13.21-22 * 10:4 10.4 2Musa 16.35; 17.6 * 10:7 10.7 2Musa 32.6

Atà tamatsàh à matsàh atà aña bebi à abà. ¹⁰ Kañonuzaw lakèl aña Zəzagəla bokuba azlaanik aña atà uwana tadahàhàn aw. Malika aña mamətsay azahà atà ala. Akul kà kadfahawwan kiya aña atà aw.

¹¹ Uwana Zəzagəla adahàhà azlatatak uwaga gesina kà, kà azladza aña masəl azlatatak la uwaga la abà, ngaha kà atà aña madàh hanjəli. Tatsetsər uwaga à wakità à abà, kà atà aña matapanula azlatatak à anu azladza aña zamana uwanay azladəv à gay. ¹² Kà uwaga, dzàw à ahənj dzawwa. Dza uwana adatsizilla à ahənj kà, say adaha hanjəli kà masla aña matəf à ahənj aw. ¹³ Azlamatərabay uwana tabəza akul kà, tabəza azladza gesina babay. Ama Zəzagəla, uwana agəfɪnj dziriga aña à afik kà, asak à matərabay kà matərab akul la azlatatak uwana la abà, aduwa ndzəfa anjul aw. Masla adàvə à akul ndzəfa kà mabasiñ, ngaha kà mas à uda la abà aya babay.

¹⁴ Kà uwaga azladedə gay ləv gulo, hòyàw à azlamazlazlay à ahəl. ¹⁵ Gəpəhay kà akul azladza matsən sləm gə, nərəzàw lakèl anjul à uwana gəpəhay tsi, kà uwana dziri à uwana gəpəhay. ¹⁶ Akul dzùgwàw lakèl aña tatak may aña Sufəl uwana məzuwahay tsi. La mok uwana məzuway la slaka gə, à tatak may aña Sufəl, kasəlaw kà anu la Kristu mədahama gay à vok la aniz tekula la abà aw takay? Mok uwana mətək kaf ala kà mazuway kà, kasəlaw kà mədaham gay à vok la sləb vok aña Yesu Kristu la abà tekula aw takay? ¹⁷ Kaf kà tekula pəra à uwana anu gesina məzuway, kaf tekula gə uwaga kà apəhla ala kà mədagay tekula, kà uwana məzùw kà kaf tekula uwatà.

¹⁸ Dzùgwàw lakèl aña tsəhay Isərayel dadənj tsi. Takəfəh azlatatak à Zəzagəla kà, azlauwana tapəfəh sləb uwaga kà, atà tekula la Zəzagəla.✧ ¹⁹ Mana à uwana mafafəf bəga la gay uwaga la abà ma? Sləb uwana dza akəf à azlamazlazlay la azlamazlazlay ma, tatak dziriga takay? Awanj! ²⁰ Ama uwana azlaməna makəf tatak uwana tasəl Zəzagəla aw kà, takəfəy kà à azlamazlazlay, awkà à Zəzagəla aw ama à seteni. Ngaha asa à gi kà kahamaw gay à vok la azlamasəsəfok mawisiga aw. ²¹ Kà uwana kaslawwalla vok aña matsəp gay à masakwa aña Sufəl la abà la aña azlamasəsəfok mawisiga la abà aw. Ngaha babay kaslawwalla vok aña madz madzay la tatak may aña Sufəl Yesu la adi, ngaha kadzaw madzay la aña masəsəfok mawisiga la adi aya babay aw. ²² Awma asa à anu madla ləv à Sufəl Zəzagəla à huɔf takay? Ngaha ma məduwa masla la ndzəfa takay?

Madz à ahənj kà matsala matekwif à azladza anik aw

²³ Hadəy, azladza anik la tataka anjul la abà tagof kà: ‘Anu la makor gəl la abà kà tatak gesina’. Iyay nəma, ama tatak gesina kà azlaka anu aw pəra. Tagof aya kà: ‘Anu la tetəvi kà madàh tatak gesina’, ama la azlatatak anik kà, mədəzigənjla magay la tetəvi aña Zəzagəla la tsəh aw. ²⁴ Kayahaw kà azlatatak uwana akəsa akul à vok pəra aw, ama yàhàw kà uwana akəsa vok à azladza anik babay suwanj.

²⁵ Kəla tatak uwana tadàw ala la kasukwa, bokuba azlasləb kapəfəw, kokufə mabək gel à ahənj səla la ləv anjul la tsəh. ²⁶ Hadəy, bokuba uwana tatsetsər à wakità Zəzagəla à abà kà, agof kà:

‘Sufəl Zəzagəla la uwana akor gudənj à vok gesina, la azlatatak uwana la abà gesina.’✧

²⁷ Baña masla madɪnal gəl à vok aw anik, azala akul kà mazuw tatak may la mtəga aña kà, zùwàw kəla tatak gesina uwana adəfa à akul à huma à gay, la kokufə manaval lakèl aña mabək gəl à ahənj səla anjul. ²⁸ Ama kəla kà, baña dza agof à akul kà, sləb uwanay kà sləb mazlazlay kà, uwaga kà kazuwaw zlə ma aw, kà uwana adapəhakulla, ngaha kà kak aña makadla gəl à vok, la ləv aña la tsəh aw. ²⁹ Madzugway aña ləv anjul gəgod aw, ama aña ləv aña. La dziri madzugway aña ləv aña dza aslala vok aña madàh seriya à madzugway aña makor gəl aña ləv gulo

à gël aw. ³⁰ Baña kikay gëdagod à Zëzagëla kà tatak may gulo aya ma, kakay dza apësew gi lakël aña tatak may uwana kikay gëgòd à Zëzagëla gulo aya ma?

³¹ Uwana gëpëh kà kiya uwanay, kadàzuw mana babey mi, kadàsa mana babey mi, kadàcfah mana babey mi, cfahàn kà la tetëvi uwana slëm aña Sufël Zëzagëla aña maday à huma à gay la mazigënay përa. ³² Kadahawwan kà la makad gël à azladza à vok aw: Adagay zil Yahudiya, adagay zil Yahudiya aw, adagay azlamëna madinjal gël à Zëzagëla à vok. ³³ Dahàwwàn bokuba uwana gi gëcfahëj. Gi gëdawad vok à uda, kà gi aña mawoy uwabeyuwi gesina, gëyàh uwana akës gi vok aw, say uwana akës vok à azladza, kà atà aña mabëlay.

11

¹ Dzàw à ahëj bokuba uwana gëdza à ahëj, nëfàw gi, bokuba uwana gënëfa Kristu.

Azlazil la azlamis la huma aña Zëzagëla

² Azladedda gëzlëb akul, kà uwana kadzugwaw lakël gulo koksikoksi, ngaha kà uwana kanëfaw azlatatak uwana gëtàpakulla gesina aya. ³ Ama bà la kità kà, asa à gi kà kasëlaw uwanay: Sëlàw kà Kristu kà Sufël gà aña azladza gesina. Zil kà mënnga aña mis, ngaha Zëzagëla kà masla kà mënnga aña Kristu. ⁴ Kà uwaga baña zil adëv kudfa, bañaw apëha gay Zëzagëla la gày la aku la maf tatak à gël gà kà, kiya uwaga kà masla apësew mënnga aña. ⁵ Kiya uwaga babay baña mis adëv kudfa bañaw apëh gay Zëzagëla la gày la aku la gël deyday gà kà, apësew zil aña. Apakay kà bokuba masla mafëts gël à ahëj gà. ⁶ Tsa baña mis awad nalbët à gël aw, ma kà mana afëts gël à ahëj përa aw zlà ma? Ama masl anidz aña mis la mafëts gël à ahëj kà uwaga kà ziruw, say awadcfah nalbët à gël. ⁷ Ama zil kà afa tatak à gël aw, kà uwana masla maftsa vok aña Zëzagëla. Masla apëhla mazlëbay aña Zëzagëla ala, ama mis kà apëhla kà mazlëbay aña zil aña ala suwan. ⁸ Hadfay kà, zil kà asà à uda kà la mis la abà aw, ama mis la uwana, asà à uda la zil la abà. ⁹ Zëzagëla anjal zil kà aña mis aw, ama anjal mis kà aña zil. ¹⁰ Kà uwaga à uwana mis ahad gël à ahëj la nalbët, kà maslëkaway zil aña, ngaha kà azlamalika babay. ¹¹ Amiyaka adagay kiya uwanay kà, kà anjami uwana mëdagay tekula la Sufël Yesu Kristu kà, mësël kà mis aslala vok aña madz à ahëj la aslasl gël aña aw, ngaha zil babay aslala vok aña madz à ahëj la aslasl gël aña babay aw. Say atà sëla nna. ¹² Iyay, bokuba uwana mis kà asa à uda kà la zil la abà kà, kiya uwaga kà, lakana mis la uwana ayyi zil lagwa, ama atà sëla nna kà tasà à wan la slaka Zëzagëla, masla manjal tatak gesina.

¹³ Nërëzàw la gël ankul dadàn: Baña mis adëv kudfa à Zëzagëla la gày madëv kudfa la aku la gël deyday, ma akësa vok takay? Wùllàw à gi ala tsi! ¹⁴ Bà la madz à ahëj la abà kà, ziruw kà aña zil kà masak anidz zinzinga lakël. ¹⁵ Ama baña mis azigënëj anidz aña à gël kà, uwaga kà tatak dzëba aña sëla aw gà. Abëz anidz aña zinzinga bokuba tatak mahadfa gël à ahëj. ¹⁶ Ama baña dza asal mats gay lakël aña uwaga kà, sëlàw kà, anu kà mësël madz à ahëj anik aw, amiyaka azlamëna gay Zëzagëla babay kà tasël tetëvi anik babay aw.

Mazuw tatak may aña Sufël Yesu Kristu

(Mata 26.26-29; Mark 14.22-25; Luka 22.15-20)

¹⁷ Tatak uwana asa à gi aña mapëh à akul kà mazlëb anu kagodfaw aw. Kà uwana mok uwana kahamaw gay à vok kà aña maslëkaw Zëzagëla kà, tatak delga kadahawwan aw, ama kadahahawwan kà mawisiga, delga aw, gëgod à akul. ¹⁸ Teraja kà, mok uwana kahamahaw gay à vok, kà aña maslëkaw Zëzagëla kà, katsakahawla gërgër, tagod à gi, uwaga ma dziri ay? Wùllàw à gi ala tsi! ¹⁹ (Duli matsakla agay la tataka ankul la abà, ngaha kà masëlla ala azlauwana azlaaña Sufël Yesu dziriga)

✧ 11:9 11.9 1Musa 2.18-23

²⁰ Uwana kamahaw gay à vok kà kazawaw tatak may aña Sufël aw. ²¹ Kà uwana kèla uwabeyuwi aňkul kà av vok aña mazuw aňha, ñgaha azlaanik tagəd à ahəñ la may gà, ñgaha azlaanik aya kà guzu adakad atà zlà, gəgod. ²² Tsa baña kiya uwaga kadahawwan, ma kà mana kazawaw tatak may la mtəga aňkul aw ma? Asa à akul aña mapəsew maham à ahəñ məna madiñal gəl à vok kèla ay? Awma kà, makəl ziruwi à azlauwana à gəl tatak may aňatà la ahəñ aw, kagodaw kèla ay? Mana gəpəh à akul lagwa zlà ma kagodaw ma? Gəzləb akul, kagodaw ay? Awan, gəzləb akul aw!

²³ Aganay matapla uwana Sufël Yesu atəpgəla, à uwana gətəpakulla: Sufël Yesu la vəd uwana tatəl kaf à gəl kà mavày à ahəl aña azladza kà, azəb kaf à ahəl, ²⁴ kikay agod à Zəzagəla kà kaf, atsəkà kaf uwaga ala, agod: 'Uwanay kà vok gulo uwana aga matsəkəñ ala gà kà aňkul, zùwàw uwaga kà gi aña mawul à akul à gəl.'

²⁵ La lig aña mazuw tatak may aňatà la ahəñ, azəb kətsaw à ahəl, agod: 'Tatak masay uwana la kətsaw uwanay la abà kà, makəs vok slawda mawga la aňiz gulo, uwana adəsokw à vədah. Kèla kaslà uwana kadəsahaw uwanay kà, kà gi aña mawul à akul à gəl.'*

²⁶ Mapəhay aña Sufël Yesu uwanay apəhla ala kà, la kèla kaslà uwana kazuwaw kaf uwanay, la mas tatak masal à gəl uwanay kà, kapəhaw kà gay mamətsay aňha à azladza, tsərəh à kaslà uwana Sufël adàwul à wan.

²⁷ Kà uwaga kà baña dza azuw kaf, ñgaha as tatak masay à uda la kətsaw aña Sufël Yesu la abà la kokudə, mavəh gəl aňha ala kà, adəh tsakana à vok aña Sufël Yesu à gəl, ñgaha à aňiz aňha à gəl aya. ²⁸ Kità kà, kèla uwabeyuwi agur gəl aňha dadəñ, ñgaha masla aña mazuw kaf, la mas tatak à uda la kətsaw uwaga la abà.

²⁹ Kà uwana baña avaha uwaga ala la tatak may deyday gà aw kà, abiy seriya à gəl aňha la mazuway aňha la masay aňha. ³⁰ Kà uwaga à uwana aňuvaw la tataka aňkul la abà takàläh à vədah, tapakəh magudu, tapakəh azlaməna d'uvats ñgaha aňuvaw taməts à gay aya bay. ³¹ Baña anu məgur gəl gami dadəñ kà, Zəzagəla adəfaha à anu seriya à gəl aw. ³² Baña Sufël Yesu asləha à anu à vok kà, kà matsatsəh anu ala la tatak uwana la abà kà, seriya aña madəkəs anu kiya aña azladza anik aw.

³³ Kà uwaga azladedə gulo, baña kadəhamaw gay à vok, kà mazuw tatak may aña Sufël kà, kudəhaw vok kà akul aña magay la ahəñ gesina. ³⁴ Baña dza la may gà kà, say azuw kaf à hud la mtəga aňha, kà maham gay à vok aňkul aña mabiyakulla seriya aña Zəzagəla à gəl aw.

Kà aña azlagay anik, say baña gədàda à awtày la uwana, gədədəvəñ à gay zlà.

12

Mavày uwana Masasədok Zəzagəla avày kà madəhla sləray (Rom 12.1-11; 1 Korintiya 14.1-25)

¹ Lagwa adagay kà məpəh gay aña mavày aña Masasədok Zəzagəla. Azladedə gulo, asa à gi kà kasəlaw uwaga lela. ² Azladedə, mok uwana kaləgaw aña madiñ gəl à Yesu à vok kà, kanəfəhəw azlamazlazlay badaga uwana takərəh akul. ³ Kà uwaga à uwana, asa à gi kà kasəlaw uwaga: Baña Masasədok Zəzagəla adəkəs dza kà, dza uwatà kà aslala vok aña magodəy kà: 'Yesu kà matsafla gà!', agodəy aw. Kiya uwaga babay: 'Yesu kà Sufël Zəzagəla', dza agodəy aw, say baña Masasədok Zəzagəla la masla la abà.

⁴ Aga la ahəñ azlamavày anik anik gərgagər aňuvaw, ama Masasədok tekula la uwana avà à atə tetəvi gesina aňatà. ⁵ Aga la ahəñ azlatatak anik anik aňuvaw, ama Sufël Yesu tekula, la uwana avà à atə tetəvi aña mavày uwaga gesina. ⁶ Aga la ahəñ

* 11:25 11.25 2Musa 24.6-8; Yeremiya 31.31-34

azlamaslay aña madfàh sləray anik anik gərgagər aņuvaw, ama Zəzagəla kokudə gəl aņha la uwana avà à kəla uwabeyuwi maslay aña sləray uwaga. ⁷ Masasəđok apəhla ala kà, aga la kəla uwabeyuwi aņkul la abà, kà akul aña mazlakla maham à ahəņ məna gay Zəzagəla la mavày uwaga. ⁸ Masasəđok avà à dza matsihila, ŋgaha bə la Masasəđok uwaga avà à dza anik aya maslay aña mapəhla madzugway aña Zəzagəla ala. ⁹ Kà aña dza anik aya kà, Masasəđok avà ndzəđa kà madiņ gəl à Yesu à vok la dziriga. Ŋgaha avà à dza anik maslay kà mawar azlaməna đuvats ala. ¹⁰ Uwaga avà à azladza anik maslay kà madfàh azlanadzipo, à azladza anik aya avà à atà maslay kà mapəh paņaw aña Zəzagəla, uwana apəh à atà, à azladza anik aya avà à atà maslay kà mabadma la azlagay anik anik, à azladza anik aya avà à atà maslay kà mapalla godega aña azlagay uwaga ala. ¹¹ Uwaga kà bə Masasəđok tekula gə, gə la uwaga à uwana adfàh uwaga gesina, masla avà maslay à dza gərgagər bokuba uwana asal.

Maham à ahəņ məna madiņal gəl à vok kà,

aga kà bokuba vok aña dza

¹² Məsəl kà vok aña dza kà tekula, ama azlamanabay la ahəņ gərgagər. Amiyaka azlamanabay la vok aña dza kà gərgagər ama vok kà tekula pəra. La Kristu bay kà kità. ¹³ Ŋgaha anu azla Yahudiya la azlauwana azla Yahudiya aw, azlamayə baņaw azladza uwana takor gəl, tadafàh anu batem kà, kà anu aña magay vok tekula la Masasəđok tsikaslaga uwaga la abà, ŋgaha Zəzagəla avà à anu maslay la Masasəđok tekula uwaga la abà.

¹⁴ Vok kà, aga la manabay tekula pəra aw, ama manabay dəņ. ¹⁵ Iyay zlahaw kà, asik agodfay kà: ‘Gi manabay aña vok à gi aw, kà uwana gi ahəl aw’, agodfay, ‘Kità kà, gi aña vok aw’, bə la uwaga gesina kà masla manabay aña vok, ndzer. ¹⁶ Zlahaw sləm agodfay kà: ‘Gi kà gi yewdi aw, gay gə la uwaga gəga manabay aña vok aw’, agodfay, bə la dziriga uwaga adəđ gay à sləm à ahəņ aña magay manabay aña vok aw. ¹⁷ Agayña vok gesina kà naka agay kà yewdi pəra, ma naka kakay atsən sləm ma? Ŋgaha agay, agay kà sləm, pəra ma naka kakay azin tatak ma? ¹⁸ Ndzer, Zəzagəla abək azlamanabay à vok à vok bokuba uwana asal. ¹⁹ Agayña vok gesina agay kà manabay tekula pəra kà, uwaga kà naka agay vok aw. ²⁰ Ama lagwa kà, azlamanabay aņuvaw la vok tekula la vok.

²¹ Kiya uwaga kà, yewdi aslala vok aña magodf à ahəl kà: ‘Gəyah ka aw!’, agodfal aw. Ŋgaha takasagəl babay aslala vok aña mapəhay uwaga à asik babay aw. ²² Tetuwa kiya uwaga aw! Azlamanabay aña vok, uwana kanəņ atà, bokuba takəsa kà vok aw, kà atà la uwana takəsa kà vok ndzer. ²³ Azlamanabay uwana takəsa à anu vok aw, məgodf kà, atà la uwana məfa à atà sləm kaykay, manabay ziruwi gə uwana məhadf atà à ahəņ la huma yewdi aña azladza kà, məkəs atà kà la ahəl səla. ²⁴ Azlamanabay uwana takəs anu à gəl kaykay, atà kà mənəkudə aña mahadf atà à ahəņ aw. Zəzagəla ahamà gay à vok à vok gesina, avàh à azlamanabay bəzaga masləkaway gesina. ²⁵ Kà uwana asal kà maņoņuzay aña magay la ahəņ la vok aw. Ama kà matsən vok gay aña magay la ahəņ la tataka azlamanabay aña vok la abà gesina aņatà. ²⁶ Baña manabay tekula azay kà, azlamanabay gesina tazay la slaka gə. Baña tekula aņatà la marabay la abà, gesina aņatà tarabay la slaka gə suwaņ, bay.

²⁷ Akul gesina kà, akul vok aña Kristu, ŋgaha kəla uwabeyuwi aņkul kà manabay aña vok uwaga. ²⁸ Kiya uwaga à uwana, Zəzagəla avàh sləray à azladza la maham à ahəņ məna gay Zəzagəla. Teraña: azlaməna masləlay, masəla: azlaməna mapəh à atà gay à ahəl aña Zəzagəla, kà mapəh à azladza, ŋgaha mamakər aņha: azlaməna matapla tatak à azladza anik, la lig la ahəņ: azlaməna madfàh azlanadzipo, ŋgaha: azlauwana la maslay kà mawar azlaməna đuvats ala, ŋgaha: azlaməna mazlak à azladza anik anik, ŋgaha: azlauwana tadala azladza anik anik la tetəvi delga la ama,

ngaha: azlauwana la maslay kà mapəh azlagay məlok gə, uwana azladza anik tasəl aw. ²⁹ Gesina aṅatà kà azlaməna masləl atà, baṅaw azlaməna mapəh à atà gay à ahəl aw, baṅaw azlaməna matapla à azladza aw. Gesina aṅatà kà atà la maslay kà atà aṅa maḍahàh azlanadzipo aw, ³⁰ baṅaw kà mawar azlaməna dʉvats ala, ngaha la mapəh azlagay məlok gə aw, baṅaw la masàh ala godega aṅa azlagay uwaga à uda aw. ³¹ Kiya uwaga kà yàhàwàni mavà y uwana aduwa vok zlà.

Ama lagonay kà, gəpəhakulla tetəvi uwana aduwa vok gesina.

13

Tatak uwana aduwa vok gesina kà: Masal

¹ Iyay, agayṅa gəsəl azlagay gudəṅ aṅa azladza gesina, amiyaka bà aṅa azlamalika, ngaha mawoy dza gulo la ahəṅ aw kà, kiya uwaga kà gəpaka kà kalkal la mahohumay aṅa dewdew uwana azay la sləm la abà pəra. ² Amiyaka gədàgay la maslay kà maz paṅaw aṅa Zəzagəla à azladza, amiyaka bà gədàsəlay tatak gesina, gədàsəlay godega aṅa nasiri aṅa Zəzagəla, gədàdiṅ gəl à Zəzagəla à vok la tsəhay gə, uwana gəslala vok aṅa magodfay à gudəṅ: Bəḍa vok ala la abanay, ama baṅa gəwoyaṅ azladza anik aw kà, gədàpaka tatak deyday pəra. ³ Gədàvəh azlatatak gulo à uda gesina babay, amiyaka bà gəl gulo bay kà mabək à gay la akəl, ama baṅa gəwoyaṅ azladza anik aw kà, makəs vok gulo la ahəṅ aw, gədàpaka tatak deyday.

⁴ Dza uwana la masal, masla abasiṅ azladza anik, masla adah delga, adah adi aw, ats zlapay aw, azigəṅ gəl aw. ⁵ Masla masal kà, adah sləray ziruwi gə aw, masla afa à gəl kà vok aṅha pəra aw, masla ləv aw, apəh gay lakəl aṅa mawisiga aṅa dza aw, la maf dza à ləv aw. ⁶ Masla arabay kà sləray mawisiga aw, ama arabay kà, kà sləray delga. ⁷ Masla uwana la masal kà, abas tatak gesina, maḍiṅal gəl à vok aṅha, la manewəṅ aṅha, la mabasiṅ aṅha atetuway dikiḍiki aw.

⁸ Masal kà adəv à gay aw, mapəhay aṅa Zəzagəla uwana apəh à azladza à ahəl kà mapah à atà kà, adədəv à gay à baṅa məlo aṅha adəslay. Azlagay gudəṅ aṅa azladza gesina, uwana məpəhay kà, adədəv à gay babay, bà masəl tatak gami uwana məsəl tatak babay kà adəzahla. ⁹ Kà uwana masəlay gami, la mapəhay gami kà uwana məz paṅaw aṅa Zəzagəla uwana apəh à anu à ahəl kà ahən ala babay aw. ¹⁰ Ama mok uwana tatak ahən ala gə adəsa à waṅ kà, tatak uwana ahən ala aw kà, adəziyla gesina.

¹¹ Mok uwana gi bəziga kà, gəpəhəh gay bəzi, gədzügwəh ngaha gənawəhəṅ mabəzi bəzi, ama mok uwana gədagay magolga, gəsək à tatak azlabəza la tsəh ala gesina. ¹² Lagonay kà, mənəṅəṅ kà bokuba fatew uwana la kutərum la abà, mənəṅəṅ la dziriga aw. Ama kaslā adəslay à uwana mədənəṅ Zəzagəla yewdi la yewdi. Lagonay kà, gəsəl kà gəl gə gəl gə pəra, ama la kaslā uwatà kà, gədàsəlay la lela bokuba uwana masla uwana asəl gi babay.

¹³ Lagonay kà, tatak makər uwaga la uwana tagədəṅ à afik: Maḍiṅal gəl à vok, manewəṅ, ngaha masal. Ama masal la uwana aduwa azlatatak anik anik gesina la kaykay.

14

Gay anik lakəl aṅa mavà y aṅa Masasəḍok Zəzagəla (Rom 12.1-13; 1 Korintiya 12.1-11)

¹ Wəḍəw vok à uda kà akul aṅa magay la masal, wòyàwwəṅ la ləv tekula! Mavà y uwana Masasəḍok Zəzagəla avàhà à azladza, kà akul aṅa mabəzal suwaṅ. Uwana wòyàwwəṅ, gəgod à akul, kaykay kà, maslay aṅa mapəhla gay Zəzagəla à azladza uwana Zəzagəla apakullaṅ. ² Masla mapəh gay məlok gə, uwana azladza anik tasəl

aw kà, say apèhay kà à Zèzagèla pèra, kà uwana dza asèl gay uwaga aw. La ndzèdèfa aña Masasèdòk Zèzagèla dza apèh nasiri. ³ Ama dza uwana az pañaw aña Zèzagèla, uwana apèhal kà, azigènonèj kà azladza la madiñal gèl à vok la abà, kà madzèrèdèh atà à uda, ñgaha kà mataslàh atà à gay à ahèj. ⁴ Dza uwana abadma la azlagay mèlok gè, uwana azladza anik tasèl aw, adzèrèdèj kà madiñal gèl à vok aña à uda pèra. Ama dza uwana az pañaw aña Zèzagèla, uwana apèhal kà mapàh à azladza kà, avà ndzèdèfa à mèna madiñal gèl à vok la maham à ahèj mèna gay Zèzagèla gesina.

⁵ Asa à gi, kà akul gesina kà kavatsaw gay la azlagay mèlok gè, uwana azladza anik tasèl aw. Ama uwana gèyahay kaykay aya kà, akul aña mabèz maslay aña maz pañaw aña Zèzagèla uwana apèh à azladza à ahèl. Haday kà, dza uwana av sayda uwaga kà, uwaga la uwana akèsa vok à dza, uwana asèl azlagay mèlok gè, ñulèm kà say masla mawulla à uda aga la ahèj, kà madzèrèdè azlamèna madiñal gèl à vok ala. ⁶ Azladedè, gènavà akul: La mok uwana gèdàdà à awtày à slaka aña kul, la mana gèdàkès à akul à vok, à baña gèdàvats gay kà la azlagay mèlok gè uwana azladza tasèlaw ma? Gèdàkès akul à vok aw, say baña gèdàsa akul à uda dziriga aña Zèzagèla, bañaw gèpèhakulla tatak anik anik, bañaw masèlay anik anik, bañaw sayda uwana mabèzal gè la slaka Zèzagèla, bañaw matapla anik anik.

⁷ Dzùgwàw lakèl aña azlatatak matsay kà aña marèzlay tsi, bokuba talakway bañaw ñizij, baña masla matsay la masla madèdèy tava kuda aña aw ma kakay dza asèl mahabal à tsèh lela ma? ⁸ Bañaw, baña masla mats mazlazlij aña guvèl atsay lela aw ma, uwa ada à guvèl uwa? ⁹ Kiya uwaga la slaka aña kul babay, baña kapèhaw gay mèlok gè, uwana dza asèl aw, kakay dza atsèn uwana kapèhaw ma? Aña kiya uwaga, kà gay aña kul uwana kapèhaw kà, adagay gay deyday bokuba madèdèy aña afad. ¹⁰ Aga la ahèj azlagay gèrgagèr la gudèj la vok, kèla tsèhay uwala beyli kà la gay aña. ¹¹ Ama baña gètsèna gay uwana dza apèh à gi aw kà, dza uwana apèh à gi gay uwaga kà gèdàpakiñ ala kà, kà dza mèlok gè la slaka gulo, ñgaha gi babay gèdàgay mèlok gè la huma aña suwan. ¹² Tsa akul kà, kavàw ndzèdèfa à azlamavày uwaga zlà kà, yàhàw aña magay gorobu kà aña azlauwana tadala maham à ahèj mèna gay Zèzagèla à huma à gay la madiñal gèl à vok la abà zlà.

¹³ Kà uwaga baña dza la maslay kà mavats gay la azlagay mèlok gè, uwana azladza anik tasèl aw kà, say dza uwaga anav maslay la slaka Zèzagèla, kà mav maslay kà masèlla godega aña azlagay uwaga à uda kèla babay suwan. ¹⁴ Baña gèdèv kuda la gay mèlok gè uwaga kà, lèv gulo adèv kuda ndzèr, ama hanjèli gulo adèv kuda aw. ¹⁵ Tsa baña kiya uwaga ma, mana gèdèhèj zlà ma? Gèdèv kuda la masasèdòk gulo, gèhab uwaga kà la hanjèli gulo babay aya. ¹⁶ La kità, baña kadèv kuda à Zèzagèla la masasèdòk ma, kakay dza masla matsèbal slèm uwana la maham gay vok aña kul la abà, adàslala vok à magodèy: 'Amen!' à madèv kuda aña k ma? Kà uwana asèl à uwana kapèhay tetuwa aw. ¹⁷ Amiyaka madèv kuda aña k adagay dzèba aña sèla aw babay kà, akèsa la vok aw.

¹⁸ Kikay gègod à Zèzagèla kà uwana gèduwa akul gesina la masèl gay mèlok gè, uwana azladza anik tatsènañ aw. ¹⁹ Ama la huma maham à ahèj mèna gay Zèzagèla kà, asa à gi mapàh gay zlo uwana tatsèna, kà gi aña madzadzan azladza anik ala, à kà mapèh gay dèbow dèbow, uwana azladza anik tasèl aw.

²⁰ Azladedè, kadzugwaw bokuba akul azlabèza aw, à uwana dzùgwàw bokuba akul azlamagol dza. Kà madèh mawisiga kà, gèw bokuba azlabèza uwana tasèl madèh mawisiga aw. ²¹ Agay uwana tatsètsèr à wakità Zèzagèla à abà:

'La azlagay mèlok gè uwaga à uwana gèdàsahla à tsèhay gulo à uda. Ama bà la uwaga kà, tatsinjèj la ahèl aw',^{*}

^{*} 14:21 14.21 Yesayya 28.11-12

Sufəl Zəzagəla agòd. ²² Kà uwana mabədfma la azlagay mələk gə kà, adəpakay kà bokuba nadzipo la slaka azladza uwana tadinjal gəl à vok aw, kà atà anja masəlay kà, atà la maham gay à vok la abà, la azlaməna madinjal gəl à vok aw. Ama maz gay Zəzagəla, kà mapəhla paŋəe anja Zəzagəla ala la slaka anja azlaməna madinjal gəl à vok, ama kà anja azladza gesina suwan babay aw.

²³ Bokuba magodfay kà, maham à ahəŋ məna gay Zəzagəla gesina adahama gay à vok, ŋgaha gesina anjatà tadzəka mavats gay kà la azlagay mələk gə pəra: Baŋa azladza deydayga, uwana tadinjal gəl à vok aw, tada à awtəy à maham gay à vok ankul à abà, ŋgaha tatsən uwaga kà, tanərəz akul kà bokuba akul azlakusonju aw, takay? ²⁴ Ama baŋa kəla uwabeyuwi az sayda anja Zəzagəla, ŋgaha dza deydayga, uwana masla madinjal gəl à vok aw, ada à awtəy babay kà, kiya uwaga kà, kəla gay uwana adətsənəŋ kà, adəpəhla tsakana anha. Gay uwaga gesina kà, adəkəsəy lakəl. ²⁵ ŋgaha madzugway uwana la tsəh ləv anha gesina, adəsa à uda à udfaka ala, ŋgaha adəwulla à gəl à vədfah kà masləkaw Zəzagəla la magodfay kà: 'Ndzer, Zəzagəla la ahəŋ la tataka ankul la abà!', agodfay.

Uwana akəsa vok la maham gay à vok la abà.

²⁶ Azladedə, mana à uwana gəpəh à akul lagwa ma? Mok uwana kahamaw gay à vok la slaka gə, dza anik azəb mahabay, ahab. Dza anik atəpla gay Zəzagəla à azladza anik. Dza anik atsala à atə tatak uwana à uda, Zəzagəla apəhla. Dza anik aya à masla mabədfma la azlagay mələk gə, ŋgaha dza anik atsala godega anja gay uwaga à uda apəhay. Kəla tatak uwana kadəhawwan kà, say agay delga, azlaməna gay Zəzagəla tazigənay la masla kəla. ²⁷ Kà anja azlagay mələk gə kà, səkəw kà azladza səla pəra tapəh, ama dza awulla à uda uwana tapəhay, ŋgaha la manəf vok lela, aduwa dza makər anja mapəhay aw. ²⁸ Ama baŋa masla mawulla gay uwaga à uda la ahəŋ aw kà, masla mabədfma uwaga adza à ahəŋ titi, apəh uwaga kà la ləv anha la tsəh, atə la Zəzagəla anha pəra. ²⁹ Ama kà anja azlaməna maz paŋaw anja Zəzagəla, uwana apəh à atə kà, azladza səla baŋaw makər tapəh gay uwaga, ama say azladza tamədzedəŋ ala uwana tapəhay. ³⁰ Zlahaw kà, la kaslə uwana dza abədfma la uwana, dza anik uwanay abəza gay la slaka Zəzagəla kà, ŋuləm matera adza à ahəŋ dadəŋ. ³¹ Akul gesina kaslawwəla vok anja maz gay anja paŋaw anja Zəzagəla la manəf vok la tekula tekula, ŋgaha azlaməna madinjal gəl à vok gesina anja masəlay, ŋgaha madinjal gəl à vok anja uwabeyuwi anja mazigənay. ³² Azlaməna mazəh paŋaw anja Zəzagəla tanəŋla gəl anjatə la huma anja Masəsəfok, uwana Zəzagəla avə à atə. ³³ Zəzagəla kà asal anu mədza à ahəŋ la sehseh la abà aw, ama mədza à ahəŋ la lapiya la abà.

Bokuba uwana adapaka zagəla à azlaməna madinjal gəl à Zəzagəla à vok gesina, ³⁴ kiya uwaga la maham gay à vok ankul la abà babay. Say azlamis tadza à ahəŋ titi, atə la tetəvi kà mavats gay aw, bokuba uwana tatsətsər à wakitə mapəhay anja Zəzagəla à abà: Say tasləkaway pəra. ³⁵ Baŋa asa à atə matsən tatak anik kà, say tanəvəh à zil anjatə la mtəga, kà uwana uwaga kà, ziruwi kà anja mis anja mavats gay la huma maham à ahəŋ məna madinjal gəl à Zəzagəla à vok.

³⁶ Iyay, awma la slaka ankul la uwana gay Zəzagəla asa à uda kagodfaw takay? Awma kà ankul pəra à gay uwanay kagodfaw ay? ³⁷ Baŋa dza adzugw kà masla anja magay masla maz sayda anja Zəzagəla, baŋaw adzugw kà, kà adabəza ndzəfa anja Masəsəfok Zəzagəla, delga, masla asəlay kà uwanay gətsetser à akul, kà mapəhay anja Sufəl Zəzagəla. ³⁸ Ama baŋa asəl aw kà, kafaw sləm à masla aya aw.

³⁹ Kiya uwaga azladedə gulo, mawoyəŋ ankul kà aga kà anja maz sayda anja Zəzagəla. Ama kasakawwəla tsəh ala anja mapəh azlagay mələk gə aw. ⁴⁰ Say tatak gesina ada à vok la tetəvi anha, bokuba uwana akəsa vok lela.

15

Mawul à uda aña Kristu

¹ Azladede gulo, vaw gi tetəvi kà gi aña mawulla à akul ala gay marabəŋ uwana à gəl gəzakullan, kakəsaw uwaga, madiŋal gəl à vok aŋkul atsizl kà à uwaga à afik.

² La uwaga la uwana kabèlàw, baŋa kakəsawwan bokuba uwana gəzakulan aw kà, madiŋal gəl à vok aŋkul apakay kà tatak deyday pəra.

³ Gay uwana aga la gi lakəl kà, gədapəha à akul à vok à abà suwan. Aganay gay uwana gəpəh à akul dadən: Kristu kà aməts kà, kà à ahəl tsakana gami bokuba uwana tatsetsèr à wakità à abà. ✧ ⁴ Tallà masla, ŋgaha awul à uda la mamətsay la mahənay mamakər, bokuba uwana tatsetsèr à wakità Zəzagəla à abà aya. ✧ ⁵ Masla apəhla vok à Piyer, ŋgaha à azlaməna matapla kulo gəl aŋha səla uwatà bay. ⁶ La lig la ahəŋ apəhla vok à azlaməna asik, uwana aduwa dadərmokw zlo. Azlaanik aŋatà kà atà la ahəŋ tsərəh à lakana, ama azlaanik aŋatà kà tamatsay. ⁷ La lig aña uwaga la ahəŋ, apəhla vok à Yakuba, ŋgaha à azlaməna matapla gesina.

⁸ ŋgaha la lig aŋatà la ahəŋ gesina, apəhgəla vok bay, à gi uwana gəga bokuba bəzi mahənay aw gə. ⁹ Aya gəga matsihila gə aña azlaməna matapla anik uwanay gesina. La dziriga kà, gəsla aña magay masla matapla aŋha aw, kà uwana gi la uwana gətərəbàhà azlaməna matsalah sləm aña Sufəl Zəzagəla à gay gesina. ¹⁰ Ama la vok mahamay aña Zəzagəla adapakagəla, à dza uwana kanəŋəwwəŋ lagwa, la vok mahamay aŋha lakəl gulo kà apakà deyday aw. Gəfahà sləray aŋuvaw d'aduwa à gay aña azlaməna matapla anik gesina, uwaga kà gi gəfahəŋ aw, ama vok mahamay aña Zəzagəla uwana la gi la abà. ¹¹ Adagay gi, adagay atà, anu azlaməna matapla gesina, anu məzà gay marabəŋ bokuba uwana gəpəh à akul, kiya uwana kadinəwwalla gəl à vok babay.

Mawul à uda gami la mamətsay

¹² Aganay maz sayda gami uwana məpəhay. Zəzagəla awulla Yesu à uda la mamətsay. ŋgaha ma kakay azlaanik aŋkul tagodfay kà: Azlamazimnekid tadawul à uda aw, tagodf ma? ¹³ Baŋa mawul à uda la mamətsay la ahəŋ aw kà, kità kà Yesu Kristu babay kà awul à uda zlà ma aw. ¹⁴ Baŋa Kristu awul à uda aw kà, məpəhay gami babay kà apakà tatak deyday, ŋgaha madiŋal gəl à vok aŋkul babay kà deyday suwan. ¹⁵ Uwana azay aduwa uwaga kà, madfah fida gami à Zəzagəla à vok, à uwana məgodf kà, awulla Kristu à uda la mamətsay. Hadfay, baŋa azlamazimnekid tawul à uda aw kà, kità kà awulà à uda suwan zlà ma aw. ¹⁶ Kà uwana baŋa azlamamatsay tawul à uda aw kà, kità kà Kristu kà awulà à uda babay aw. ¹⁷ Kà uwana baŋa Kristu awulla à uda aw kà, madiŋal gəl à vok aŋkul akəs sləray aw, akul azlamazəhla gə la tsakana aŋkul la abà, tsərəh à lakana. ¹⁸ Tsa kità kà, azlauwana taməts à madiŋal gəl à vok à abà babay kà, tazəhla. ¹⁹ Baŋa manewəŋ gami kà lakəl aña Yesu, kà aña sifa uwanay anu la abà lakana kà, kità kà, anu la uwana vok ahama azladza anik uwanay gesina, kà anu.

²⁰ La dziriga kà, Kristu awulà à uda la mamətsay, kà uwaga à uwana azladza gesina tadawul à uda. ²¹ Kiya uwaga à uwana mamətsay asà à wan à gudəŋ à vok kà dza tekula, kiya uwaga babay mawul à uda la ahəŋ kà dza tekula aya suwan. ²² Azladza gesina tamatsay, kà uwana anu tekula la Adama. Gesina aŋatà tadawul à uda kà maham gay à vok aŋatà la Yesu suwan. ²³ Ama kəla mana beymi la tetəvi aŋha: Kristu la uwana aga matera aña mawul à uda. La mok uwana adasa à wan, azlaməna madiŋal gəl à vok gesina tadawul à uda. ²⁴ Kiya uwaga kà, makəd gəl à ahəŋ adasa à wan: Kristu adakalah azlandzəfə ala la maslay gesina, ŋgaha la

azlamaslay aña azlaməna məzam aña Zəzagəla gesina bay. Ngaha adàvə makoray à ahəl aña Zəzagəla Baba, ²⁵ kà uwana leri Kristu adàkoray kà say baña Zəzagəla adàbək azlaməna məzam à tsəh aña dən. ✧ ²⁶ Masla məzam makəf gel à ahəñ, kà uwana Zəzagəla adàkalah à ahəñ, kà uwaga kà mamətsay. ²⁷ Kà uwana tatsetsèr à wakità Zəzagəla à abà, tagòf kà:

'Zəzagəla abək tatak gesina à tsəh asik, kà maf asik à afik aña. '✧

Başa tagòf kiya uwanay kà, ndzer kà, Zəzagəla kà aga la tsəh aña Kona aña aw, kà uwana masla la uwana abək azladza à tsəh asik aña Kristu. ²⁸ Başa Kona aña Zəzagəla adagay masla makoray à azlatatak gesina kà, masla aga la tsəh aña Baba aña, uwana afəl tatak gesina à ahəl, kiya uwaga kà Zəzagəla Baba adàkoray tatak gesina

²⁹ Dzùgwàw lakəl aña azlagay anik tsi. Azladza anik la ahəñ la maham à ahəñ aña kul la abà, uwana tadfahà à atà batem kà aña azlamazimnekid uwana tamatsay tsi. La dziriga, başa azlamazimnekid tadawul à uda aw, ma mana madfah batem uwaga akəs vok ma? ³⁰ Anu ma, kà mana mēda à huma à gay koksikoksi la ahəl aña mamətsay zlà ma? ³¹ Azladedə gulo, gəzləb akul kà, kà uwana akul la ahəl aña Sufəl gami Yesu Kristu, ama gi kà, kəla mavakay gesina kà, gi la kuda mamətsay. ³² La gudəñ Efesus kà, gəpə slagəla mənğa bokuba map slagəla la azlatatak fəta makəsafərga. Agayña gəgay la manewəñ aña mawul à uda aw kà, naka uwaga akəs gi vok aw, haday! Başa azlamazimnekid tadawul à uda aw kà, nüləm mənəfa tetəvi uwanay:

'Məzùw, mēsà kà uwana lebəñ kà mamətsay atsa à wañ. '✧

Gay la gay la abà agodf.

³³ Kapapataw gəl aña kul aw, mēdza à ahəñ la dza mawisiga awis madz à ahəñ delga aña kul ala. ³⁴ Wulàw à wañ à dziriga à abà bokuba uwana Zəzagəla ayahay, ngaha sàkàw à madfah tsakana, gəpəh uwaga kà ziruwi aña makəs akul, uwana gəpəh uwanay kà, azladza anik la ahəñ la tataka aña kul la abà tasəl Zəzagəla aw.

Vok aña azlauwana tawul à uda la mamətsay

³⁵ Zlahaw dza anavay: 'Kakay azlamamatsay tadawul à uda ma? Vok ma uwala tadàkoray la?' ³⁶ Kayyà, kak la hanjëli aw! Başa kaslək fofulo, ngaha fofulo uwatà amətsay dadəñ, la uwana à uwana atsa à uda. ³⁷ Fofulo uwana kasləkay adagay hi, adagay uwala beyli, kasləka kà fofulo gə pəra, awkà kasləka kà mas à uda gə aw. ³⁸ Ngaha Zəzagəla atsalla à uda, av tsəhay à fofulo gesina tsəhay bokuba uwana asal. Kəla fofulo gesina abəza tsəhay vok aña.

³⁹ Sləb vok aña azlatatak uwana la sifa kà gərgəgər. Vok aña azladza kà gərgər la vok aña azlatatak fəta, ngaha babay vok aña azlatatak mahoyay kà gərgər la vok aña azlatatak fəta, ngaha babay vok aña azlatatak mahoyay kà gərgər la aña azlakilfi.

⁴⁰ Azlatatak uwana la zagəla la afik la azlauwana la wəfah babay la ahəñ. Mazləbay aña azlatatak uwana la zagəla kà gərgər la aña azlatatak uwana la wəfah babay. ⁴¹ Afats kà la mahəfay aña kokudə gəl aña, təla babay la aña, ngaha azlatsetsilin babay la aña, ama azlamahəfay aña kà gərgəgər.

⁴² Kiya uwaga la uwana adapaka vok la azlaməna mawul à uda la mamətsay. Uwana tala kà azinla, ama uwana awul à uda kà azinla aya aw. ⁴³ Uwana talà kà manjəratata gə ngaha mawisiga. La mok uwana adawul à uda kà la ndzəfa ngaha la mahəfay kaykay. ⁴⁴ Uwana talà kà vok uwana la sləb vok, ama uwana awul à uda, kà vok aña Masasəfok. Başa sləb vok aña vok la ahəñ, vok aña Masasəfok la ahəñ babay. ⁴⁵ Kà uwana wakità Zəzagəla agòf kà:

'Adama terəña, aga la sifa', ✧

ama Adama masèla, uwaga kà Kristu, aga Masasèdòk uwana avà sifa. ⁴⁶ Uwana aña Masasèdòk la uwana atsa vok à wañ aw, ama aña vok. La lig la ahèñ aña Masasèdòk asa à wañ. ⁴⁷ Adama matera kà, agà mañalay gà kà la kiriniñ aña kutso, ama Adama masèla kà, asà à ahèñ kà la zagèla. ⁴⁸ Azladza aña vèdàh kà kalkal bokuba Adama, uwana asa à uda la kiriniñ aña kutso la abà. Azladza aña zagèla kà, atà kalkal la dza uwana asà à ahèñ la afik babay suwañ. ⁴⁹ Lagwa kà mèdebani à vok la dza uwana tañal la kutso, kiya uwaga bay mèdebani à vok la dza uwana asà à ahèñ la zagèla la afik.

⁵⁰ Aganay uwana asa à gi mapèhay azladedà: Tatak uwana tafahàñ la slèb vok, ñgaha la añiz taslala vok aña mad à makoray aña Zèzagèla aw, ñgaha vok uwana amètsay babay, aslala vok aña madz à ahèñ la sifa aw.

⁵¹ Gèpèh à akul nasiri anik: Gesina gami mèdeamèts à gay aw, ama mèdeàghla vok pèra. ⁵² La katskats, la kirim yewdi, à mok uwana mazlazliñ adàtsèñay, hadày, la mok uwana adàtsèñay, azlamazimnekiđ tadàwal à uda kà aña sifa la vok, uwana amètsay aya aw. Ñgaha anu uwana la sifa bay mèdeabèdfla vok. ⁵³ Bokuba magođay kà, vok gami mamètsay gà uwanay, kà adàtsokw vok, uwana à abà amètsay aya aw. ⁵⁴ Baña uwaga adàpaka vok kiya uwanay kà, gay aña masla mapèhal gay ahàl adagèđ à afik: 'Mamètsay la ahèñ aya aw, takèđasl à mamètsay adagay, tsewwa.

⁵⁵ Kak mamètsay aña ndzèđà aña uwana la?

Kak mamètsay aña ndzèđà aña matsàh gi aña uwana ala?'

⁵⁶ Ndzèđà aña mamètsay kà la tsakana la abà, ñgaha ndzèđà aña tsakana kà asa à uda, kà la mapèhay la abà. ⁵⁷ Ama mazlèbay aga la Zèzagèla uwana avà à anu maduwiñ la Sufèl gami Yesu Kristu.

⁵⁸ Kiya uwaga zlà, azladedà gay lèw gulo, tsizllàw à ahèñ lela lela, rèđ kagođaw aw, fàw gèl à slèray aña Sufèl Zèzagèla koksikoksi, kà uwana kasèlaw kà, mabasiñ añkul uwana la Sufèl Zèzagèla la abà kà, adàtèđ à vèdàh deyday aw.

16

Matsatsàh sili

kà mazlakla azlamèna madiñal gèl à vok la Urusalima

¹ Lagwa kà, gèzalan à gèl gay ñuv, lakèl aña sili uwana mètsatsàh kà aña azladedà gami la Urusalima: Bokuba uwana gèpèh à azlamèna manèfay la kutso Galatiya bay. ² Kèla ladu gesina, delga, kà kèla uwabeyuwi añkul afa sili à fèta à awtày bokuba uwana asla. Dahàwwañ à ahèñ lela tsèràh à uwana gèdà à awtày. Kiya uwaga kà, mèdeànèkudà aña mahamala gay à vok la kaslà uwatà aya aw. ³ Baña gèdàda à awtày gèdàslèl azladza añkul uwana katsatsamawani atà à Urusalima la wakità la ahàl, kà madla sili uwana kazlakawla atà. ⁴ Baña mazlakay añkul kà asla kà gi aña maday la gèl gulo kà, mèdeàday anina pèra zlà.

Manewèñ aña Pol

⁵ Kà mabèz à slaka añkul kà, gèdzugw maguway la Makeduniya dadàn, kà manèñ azladedà anik à gay la abatà. ⁶ Zlahaw gèdàdzan à ahèñ la slaka añkul ñođegi la tèla awkusa gesina, kiya uwaga kà, kadàzlakaw gi la tatak uwana gènèkudà aña gesina, asa à gi maday. ⁷ Gi kà, asa à gi aña madz à ahèñ la slaka añkul, awkà asa à gi aña manèñ akul la tetèvi la ama pèra aw. Gèdzugw madz à ahèñ la tataka añkul la abà, à baña asa à Zèzagèla.

⁸ Kəla kà, asa à gi madz à ahəŋ la abanay la Efesus tsərəh à mavakay aŋa Penta-kosta, ✧ ⁹ kà uwana la abanay kà, gəbəzà maslay kà madəh sləray uwana akəs vok. Bə amiyaka azlaməna məzam la ahəŋ aŋuvaw babay.

¹⁰ Baŋa Timotawus adàda à awtày kà, kəsàw masla la ahəl səla, kà masla aŋa madz à ahəŋ la tataka aŋkul la abà kokudə guba. Kà uwana masla babay masla sləray aŋa Sufəl Zəzagəla bokuba gi. ¹¹ Kamkam, dza apəsew aw, zlakàw tsərəh à uwana adəv mauguzahay aŋha à gay gesina, ŋgaha kà masla aŋa mawul à waŋ à slaka gulo la marabay. Gi, la azladedə la abanay kà, məkud mas à waŋ aŋha.

¹² Ama kà aŋa deda gami Apolos kà, gədədzərədəŋla kayakay, kà masla la azladedə anik aŋa mad à awtày à slaka aŋkul, ama asal mad à awtày lagonay aw, say la huma à gay ŋuv, à baŋa adəbəza kasla.

Ayyi aŋa makəd gəl à gay

¹³ Kadzewhal aw, dzàw à ahəŋ la adi lela la madiŋal gəl à vok la abà. Gəw mabəlafə la ndzəda. ¹⁴ Uwana kadəhawwaŋ gesina kadəhawwaŋ kà la masal.

¹⁵ Azladedə kasəlaw Estefanas la hudf gəy aŋha. Atà kà azlaməna madiŋal gəl à vok teraŋa la kutso Akayya. ŋgaha atà tadəh sləray aŋa Sufəl Zəzagəla la ləv tekula, kà mazlak azlaməna madiŋal gəl à vok. ¹⁶ Kamkam azladedə, gədəv akul kudə, kà akul aŋa makəs azlaməna sləray uwaga la ahəl səla. Atà la azladza uwana tadəh sləray atà nna kasləkawaw atà.

¹⁷ Gi la marabay məŋga kà mas à waŋ aŋa Estefanas la Fortunatus, ŋgaha Akay-yikus à slaka gulo. Baŋa gədanəŋ atà, kà bokuba akul gesina aŋkul la slaka gulo.

¹⁸ Atà tadjukwəŋ ləv à ahəŋ, bokuba uwana tadjukwakullaŋ à ahəŋ babay. Kəsàw tsəhay dza uwaga la ahəl səla.

¹⁹ Azlaməna madiŋal gəl à vok la makoray aŋa Asəya gesina 'Ayyi', tagodf à akul. Akilas la Pərəskila, la maham à ahəŋ məna gay Zəzagəla, uwana tahaməh gay à vok atà nna tadəhakulla 'Ayyi', la sləm aŋa Sufəl gami Yesu. ²⁰ Azladedə uwana la abanay gesina tadəhakulla 'Ayyi'.

Dahəhəw vok 'Ayyi', kà akul à akul gesina la məŋga məŋga, ŋgaha la ahəl səla.

²¹ Aganay uwana gətsetseray la ahəl gulo à gi Pol, 'Ayyi', gəgodf à akul.

²² Baŋa dza awoya Sufəl Yesu aw kà, matsafla gə!

Marana tha, (Asal magodfay: Sufəl gami: Sà à waŋ!) ²³ Sufəl Yesu Kristu avà à akul vok mahamay aŋha.

²⁴ Mawoy akul gulo gesina agay koksikoksi la akul, akul uwana la Yesu Kristu la abà.

MASƏLA AŇA WAKITÀ UWANA POL ATSETSÈR À AZLA KORINTIYA Deuxième Lettre de Paul aux Corinthiens

Ayyi

¹ Gi Pol uwana Zəzagəla akəsàni gi, kà gi aŇa magay masləlay aŇa Yesu Kristu kà, gi la uwana gətseter wakità uwanay la ahəl gulo, anu la deda gami Timotawus, à akul məna gay Zəzagəla uwana la Korintiya, ŋgaha à azlaməna masla madıŇal gəl à vok anik anik gesina, uwana la kutso Akayya la abà. ² Zəzagəla Baba gami, atà la Sufəl gami Yesu Kristu tapis akul gay à vok la mav à akul lapiya.

Zəzagəla adzərəd anu ala

³ Kikay à Zəzagəla Baba, la Yesu Kristu, Sufəl gami. Masla Baba aŇa vok mahamay, masla madzərədàh azladza ala koksikoksi la mataslaha atà ləv ala. ⁴ Amiyaka mədàgay la ŋgərpa məŋga la abà kà, masla kà adzərədàhanula koksikoksi. Kà uwaga à uwana məslala vok aŇa madzərədàh azladza anik uwana ala, atà la azlaŋgərpa anik anik la abà suwaŋ, mətəslatàla bokuba uwana anu məbəzəl la slaka Zəzagəla. ⁵ Aganay uwana gəpəh à akul: Kristu kà asà ŋgərpa kà məŋga, kiya uwaga anu babay kà, məsa ŋgərpa məŋga. La kità kà, Zəzagəla adzərədàhanula kaykay, kà uwana anu la maham gay à vok la Kristu la abà. ⁶ BaŇa məsa ŋgərpa kà, kà akul aŇa madzərədàh ala, ŋgaha Zəzagəla aŇa məbəl akul. BaŇa Zəzagəla adavà à anu mawad vok à uda kà, kà akul aŇa madzərədàh vok ala, kà akul aŇa məbas tsəhay ŋgərpa uwanay məsay. ⁷ Məsəl ndzer kà, akul la maday kokudə maruw vok à ahəŋ la tetəvi aŇa Zəzagəla la tsəh, ŋgaha mədahama à ŋgərpa à abà anina la slaka tekula, ama bə la uwaga bay kà, Zəzagəla adzərədàh akul ala bokuba anu suwaŋ.

⁸ Azladedə, la kità bay kà, asa à anu kasələw lakəl aŇa tsəhay ŋgərpa, uwana məsà la kutso Asəya la abà. Ŋgərpa uwatà kà, azà à anu hadəy, kà uwaga aga kà bokuba məŋ dzəgla la kuda gami, ndzer, uwatà kà mədzugw kà mətəfay la abà aw. ⁹ La abatà mədzugw la ləv gami la tsəh kà mavakay gami adadəv à gay la abanay lakana, məgəð. Ama uwaga atəp à anu kà, kà anu aŇa maf mədzugway gami à gəl gami à afik aw, ama kà anu aŇa maf mədzugway gami kà à Zəzagəla uwana à afik, masla mawulla azladza à uda la mamətsay. ¹⁰ Kà uwana masla la uwana apəlla à anu ala la zlamtsa aŇa mamətsay zlazladəga la abà, ŋgaha bay kà, masla la uwana adəpəlla anu ala aya gotənaŋ. Ndzer, à masla la uwana adəpəlla anu ala. ¹¹ Akul kà, kadəztrakaw anu kiya uwaga, kà azladza aŇuvaw tadəv kudə kà anu, kiya uwaga kà, la mok uwana Zəzagəla adatsən madəv kudə uwaga kà: ‘Kikay’, azladza aŇuvaw, tadəgəfal, kà vok mahamay aŇha uwana avà à azladza aŇuvaw.

Pol abədla mədzugway aŇha

¹² Mədzugway aŇa ləv gami az sayda lakəl aŇa madz à ahəŋ gami la gudəŋ uwanay la vok, agay la ləv tekula la maduwal Yesu, ŋgaha ma baməraka la tataka aŇkul la abà zlə ma ay? La dziriga, uwana akəs Zəzagəla à gəl kà, mənəfa masələy aŇa dza aw, say vok mahamay aŇa Zəzagəla uwana azlaka anu. ¹³⁻¹⁴ La hadəy gə, kà tatak mahadəŋ à ahəŋ gə la ahəŋ la matsetseray gami la abà aw, uwaga bokuba uwana kadzeŋaw pəra, amiyaka katsənawwaŋ babay aw kà. Mədzugw kà, la huma la gay kà, kadətsənawwaŋ lela gesina, bə uwana katsənawwaŋ gəl gə gəl gə lagonay babay kà. Ama mok uwana Sufəl gami Yesu Kristu adəsa à waŋ kà, akul kadəsələw tatak gesina, ŋgaha kadərabaw kà anu, bokuba anu uwana mədərabay kà akul.

15-16 Hadfay la teraṅa kà, gøyàh mad à awtày à slaka aṅkul dadàṅ, ṅgaha kà gi aṅa mad à Makeduniya. Mok uwana gèdàtsizlla ala la Makeduniya, naka gèwul à slaka aṅkul, kà aṅkul aṅa mazlak gi la mauguzahay gulo la abà, bamèraka la mana beymi gesina, kà maday à kutso Yahudiya. Kiya uwaga kà, naka asik sèla gèpis à slaka aṅkul, la abatà kà naka gèzlaka akul kà masèla. Ama gèbèzà à awtày aw. 17 Mok uwana gèdzùgw uwaga, ma gèdzùgw ma la haṅkèli gulo aw takay? Awma la paṅaw deyday, bokuba aṅa azladza gudəṅ à vok pèra takay? Awma 'Iyay', gègod tsa 'Awan', tatak? 18 Ndzer kà, Zèzagèla kà, masla masèlay, masla dziriga. Uwana gèpèh à akul kà, 'Iyay' la baṅaw la 'Awan', gèpèh tatak la paṅaw sèla kèla ay. 19 Yesu Kristu Kona aṅa Zèzagèla uwana mèpèhakulla, Silas, Timotawus ṅgaha gi babay kà, 'Iyay', mègod, baṅaw 'Awan', aw, mègod aw, say 'Iyay' pèra. 20 Hadfay gè kà, masla aga 'Iyay', à Yesu uwana agèd à map à ahəṅ aṅa Zèzagèla à afik gesina. Tsa kità kà, la Yesu Kristu la uwana, 'Amen' mègodfay, kà anu aṅa mazlèb Zèzagèla. 21 Zèzagèla la gèl aṅha la uwana adzèrèdàhànula la tetəvi aṅa Yesu Kristu la tsəh, ṅgaha adzèrèdàhakulla babay, masla la gèl aṅha la uwana atsatsàmànì anu, abèk anu à fèta à awtày, 22 kà anu magay azlaaṅha. Dadàṅ kà, avà à anu Masasèdòk aṅha kà anu masèlay kà masla adàvə à anu azlatatak anik anik gesina à uwana afà à ahəṅ, kà masla aṅa mav à anu.

23 Baṅa fida la uwana gèdèhəṅ kà, Zèzagèla la uwana masla masèlay, adaha à gi seriya à gèl, à baṅa fida gèpèhay. Kà mana à uwana gèdada à awtày à Korintiya aw mi, kagodaw takay? Kà uwana agayṅa gèdada à awtày kà, naka gèbasakullaṅ aw. 24 Kà uwana asa à anu aṅa maf leri à madiṅal gèl à vok aṅkul à gèl aw, ndzer katsizlaw kà à madiṅal gèl à vok à afik hadfay. Ama asa à anu mèdàh sləray anina kà akul aṅa mabèz namnam la ləv aṅkul la tsəh.

2

1 Kà uwaga à uwana gøyàh kà mad à awtày à slaka aṅkul, kà matazakulla iyaw tugwi à adi aya aw. 2 Baṅa gèdatazakulla iyaw tugwi à adi kà, gi babay kà iyaw tugwi adataz à gi à adi suwaṅ, kiya uwaga kà, dza la ahəṅ adadzèrèdègèla aya aw, kà uwana akul gesina akul la iyaw tugwi la adi. 3 Kà uwaga à uwana gètsetser à akul bokuba uwana gèdàhəṅ. Uwana asa à gi mad à awtày à slaka aṅkul la kaslà uwatà, awkà naka iyaw tugwi ataz à gi à adi kà akul. Tsa naka akul la uwana karabaw gi, la dziriga, uwana gèfà madzugway gulo à afik gesina, kà uwana gèsèl kà baṅa gi la marabay la abà kà, akul gesina babay kà akul la marabay la abà. 4 Iyay, wakità gulo uwatà kà, gètsetser kà la iyaw tugwi la adi məṅga, la matèrəbay məṅga, ləv aza à gi kaykay. Ama gètsetser kà, kà matazakulla iyaw tugwi à adi aw. Kèla kà, kà akul aṅa masèlay kà gèwoya akul kaykay.

Mamatsiṅ à masla madàh mawisiga ala

5 Baṅa dza abèk mazaw la gèl à azladza kà, abèk mazaw la gèl kà à gi aw, ama à akul gesina, awma az à azladza anik anik la tataka aṅkul la abà. Ama asa à gi aṅa mapèh uwaga məṅga aw. 6 Gay məṅga aṅkul, tadahalla seriya à gèl kiya uwaga kà diga adagay. 7 Lagonay kà, say kamatsawwalla kà taslawla gay à ahəṅ kà ləv aṅa mavalal à gay aw, kà masak tetəvi la tsəh aw. 8 Kà uwaga à uwana, kamkam gègod à akul kà: Pèhàwwalla mawoy vok aṅkul! 9 Uwana gètsetser à akul kà, kà akul aṅa masèl dziriga aṅha, kà gi aṅa masèlay à baṅa kakəsaw gay gulo aṅa tetuwa. 10 Baṅa akul kadamatsawwaṅ à zil uwaga ala kà, gi babay gèdàmatsalaṅ ala suwaṅ, -à baṅa gi la gay aṅa mamatsiṅ ala- la dziriga, gèmətsallaṅ ala la dziriga, kà madegolay akul, uwana la huma aṅa Sufèl Yesu Kristu. 11 Kà seteni aṅa makèdàsl anu aw, kà uwana mèsèl kà, la azladabaray anik anik gesina.

Pol apèh gay lakèl aṅa madz à ahəṅ aṅha la Tərowas

¹² Gətsizilla ala la abatà kà mad à Tərowas, kà maz gay marabəñ lakəl aña Yesu Kristu. Mok uwana gəbəzà à abatà kà, gənəñəñ kà Sufəl Yesu adafahgəñ tetəvi à ahəñ, kà maz gay marabəñ. ¹³ Ama la abatà kà, gədzà à ahəñ la titi aw, kà uwana gəbəzà Titus la abatà aw. Kà uwaga à uwana: 'Mad añulo', gəgòd à azlaməna madiñal gəl à vok la abatà, ñgaha gəhəd à kutso Makeduniya.

Maduwiñ la Yesu Kristu

¹⁴ Kiya uwaga mazləbay agay la Sufəl Zəzagəla, kà uwana masla adàla anu à maday aña maduwiñ aña à abà, ñgaha kikay kà maham gay à vok gami la Kristu la abà, kà uwaga abək anu à sləray aña à abà, kà anu aña mapəhla gay lakəl aña Kristu ala, la azlaslaka gesina. Masəlay aña adahən gudəñ à vok ala bokuba tatak uwana slaslərri azinay. ¹⁵ Mədagay bokuba tatak mazinay gə uwana slaslərri, Kristu adakəf à Zəzagəla. Slaslərri aday à slaka azladza la tetəvi aña mabəlay la tsəh, azladza uwana atà la tetəvi aña mazila la tsəh gesina. ¹⁶ Kà aña azladza uwana Zəzagəla adabəl atà kà, slaslərri uwaga kà delga, tabəzà sifa uwana adəv à gay aw la abà. Ama kà aña azladza uwana tazəhla kà, slaslərri uwaga kà delga aw, atsa à atà ala kà mamətsay à wañ. Lagwa ma uwa à uwana asla kà aña sləray uwaga uwa? ¹⁷ Azladza añuvaw tanərəz gay Zəzagəla kà bokuba tatak matsakalay, uwana tabəza riba la abà, ama anu kà kiya uwaga aw. Kà uwana Zəzagəla la uwana asləl anu aña mapəhay kà la ləv tekula la huma aña, kà uwana anu mədahama gay à vok la Kristu la abà.

3

Makəs vok slawda mawga

¹ Lagwa ma mədzəka mazləb gəl gami takay? Awma mənəkudə bokuba azladza anik uwana tapəhakulla wakitə aña sayda, uwana apəhla dza ala ay, awma məbəz tsəhay gə uwaga la slaka añkul dadəñ takay? ² Akul la gəl añkul la uwana kadapakaw azlawakitə sayda gami, uwana matsetseray gə la ləv gami la tsəh, ñgaha kà azladza gesina aña masəl madz à ahəñ gami gesina la Sufəl la abà. ³ Iyay, uwaga kà adzaf ala kà, akul la uwana akul azlawakitə gami, uwana Kristu atsetsər à ləv gami à tsəh, ñgaha asləlla anu. Atsetsər uwaga la tatak matsetseray aw, ama la Masasəfok aña Zəzagəla uwana la sifa. Atsetsər uwaga à akur kəslatsats gə à adi aw, ama à ləv aña azladza à tsəh.*

⁴ Məpəh uwaga kà, kà uwana məgəfəñ à afik la huma Zəzagəla kà madəgolay Yesu Kristu. ⁵ Haday, kà anu la gəl gami kà, məsla kà madəh sləray uwanay aw, kà uwana maslay gami gesina kà, atsa à wañ kà la slaka Zəzagəla. ⁶ Kà uwana masla la uwana avà à anu maslay kà mapəhla ala makəs vok slawda mawga aña ala la slaka gesina. Uwaga agəf kà à mapəhay uwana à afik tatsetsər aw, ama à Masasəfok aña à afik, kà uwana mapəhay uwana tatsetsər kà adàla dza kà à mamətsay, ama Masasəfok kà adala dza à sifa à abà.

⁷ Uwarə kà, tatsetserəh mapəhay kà à akur kəslatsats gə à adi, la mok uwana adahəhəñ uwaga kà, azladza tanəñə mazləbay aña kà, udfaka aña à uwana audə huđ adi aña Musa ala, kà udfaka uwatə kà, azla Isərayel taslala vok aña manərəz huđ adi aña aw, kà uwana añərəzl atà à adi. Tekedika kà, udfaka uwatə asəf aw. Mapəhay kà adàla azladza kà à mamətsay à abà. Baña mapəhay uwaga adàla azladza à mamətsay à abà, apəhla à mazləbay məñga aña Zəzagəla kà à azladza ala, à mok uwana adapəhla vok ala.* ⁸ Adaməraka sləray aña Masasəfok, uwana adala dza à sifa à abà takay, masla adəpəlla mazləbay uwana ala aduwa uwanay gesina. ⁹ Mapəhay kà, asal kà Zəzagəla akəs azladza la seriya. Tsa baña tatak uwaga adàla anu à seriya, la uwana apəhanula mazləbay aña Zəzagəla, ma adaməraka makəs

* 3:3 3.3 2Musa 24.12 * 3:7 3.7 2Musa 34.29

vok slawda mawga, uwana agèñ anu dziriga la huma aña Zəzagəla ay, apəhanula mazləbay aña Zəzagəla, uwana aduwa uwana gesina aw takay? ¹⁰ Mazləbay aña mapəhay maviya gə kà ndzəɖa aña la ahəñ aya aw, kà uwana mazləbay aña mapəhay mawga adapəhla vok ala, uwana aduwa aña maviyaga. ¹¹ La dziriga kà, makəs vok slawda maviyaga kà, Zəzagəla avà kà aña kaslè ñuv pəra, à uwana apəhla mazləbay aña ala. Tsa baña kiya uwaga zlà ma, makəs vok slawda mawga, uwana adza à ahəñ aña koksikoksi ma aduwan aw ay?

¹² Məpəhay la dazuwaya la huma azladza gesina, kà uwana məfa manewəñ gami à azlatatak uwanay à afik kà, uwaga kà dziriga. ¹³ Anu kà mədehəñ bokuba aña Musa, uwana ahaɖà huɖ adi aña à ahəñ la gabaga, kà azla Isərayel aña manəñ madəv à gay aña mawutsəɖay la huɖ adi aña aw. ¹⁴ Bə hañkəli añaatà kà aslala vok kà matsənəñ aw. Baña tadzəñ gay aña makəs vok slawda maviyaga kà, gabaga uwatà atsək atà à ama tsərəh à lakana. Uwaga kà, adəv à gay aw, say baña tagola vok à slaka Kristu. ¹⁵ Bə tsərəh à lakana babay, baməraka mbaw, uwana tadzəñ mapəhay aña Musa kà, tatsənəñ aw, kiya gabaga uwatà adzakəhà atà à hañkəli añaatà à ama. ¹⁶ Ama baməraka mbaw, baña dza apəh gay la ləv ala, atsà à wañ à slaka Sufəl kà, gabaga uwaga adəv à gay la adi aña.* ¹⁷ Kà uwana kà Sufəl Kristu, kà atà tekula la slaka gə, la kətsaw tekula la abà, la Masasəɖok Zəzagəla. La slaka uwana Masasəɖok aña Sufəl la ahəñ kà, azladza uwana la abatà kà, atà la makor gəl la abà, awkà azlamayà aya aw. ¹⁸ Haɖay, anu gesina uwana mədiñ gəl à masla à vok kà, məwad gabaga uwaga à adi aw. Mənəñ mazləbay aña Sufəl Yesu, ñgaha mazləbay uwaga abəɖla anu koksikoksi tsərəh à uwana məgay bokuba masla. Sufəl la uwana adəh sləray uwanay la Masasəɖok aña tsikaslaga.

4

Anu kà anu azlagubgub, ama Zəzagəla kà, masla ndzəɖa

¹ Kà uwaga kà məy vok aw, kà uwana la dziriga aña vok mahamay aña, la uwana avà anu sləray uwanay. ² Məɖakweska sləray à gəl la ziruwì gə gesina; məɖəh sləray la ɖemɖem, məgola gay Zəzagəla babay aw. Ama məpəhla godega aña dziriga aña ala, kà kəla uwabeyuwì uwana av ləv aña à Zəzagəla kà, adəgəɖ anu à afik. ³ Azladza anik kà, tatsənə gay marabəñ uwanay məzətəñ aw. Kiya gabaga atsək atà à yewdi à ama. Sələw kà, uwaga kà, kà aña azlauwana la tetəvi aña mazila la tsəh. ⁴ Atà kà, seteni sufəl aña gudəñ à vok uwanay, adaguləfəh atà ala la madzugway añaatà la abà, ñgaha kà atà aña makəs uɖaka uwana auɖay lakəl añaatà aw. Uɖaka uwaga kà, apəhla kà mazləbay aña Kristu ala. La Kristu la abà kà, Zəzagəla apəhla vok ala. ⁵ Məpəhay kà gay aña aslasl gəl gami aw, say gay aña Yesu Kristu. Masla la uwana Sufəl, anu kà, anu kà azlaməna maɖahal à akul sləray, kà madegolay Yesu Kristu. ⁶ Mok uwana Zəzagəla adəhə gudəñ à vok kà, agəɖ kà: “Uɖaka apaka vok, aza mələs ala.” Bə Zəzagəla gə la uwaga, asək uɖaka aña aña maɖay la ləv gami la tsəh bay. Uɖaka uwaga apəhanula mazləbay aña Zəzagəla la huɖ adi aña Yesu Kristu.

⁷ Anu kà bokuba anu azlamasik abisl deydayga pəra, ama tatak dzəba aña səla aw gə uwaga kà, aga la anu la abà. Uwaga apəhla ala kà maslay mənğa, uwaga atsà à wañ kà la slaka aña, awkà la slaka gami aw. ⁸ Məs ñgərpa anik anik, ama taɖuw anu aw, gəl akəɖ anu à vok, ama məbas ləv. ⁹ Azladza tatəreɖ anu, ama Zəzagəla asakənula à ahəl la tsəh ala aw, tasəpərəh anu la vəɖah, ama takəɖanula aw. ¹⁰ Koksikoksi kà mokfak aña mamətsay aña Yesu uwana aməts kà, aga la anu la vok, ñgaha sifa aña aña mapəhla vok ala la anu la abà la dziriga. ¹¹ La madz à

* 3:16 3.16 2Musa 34.34

ahəj gami la abà gesina kà, anu la zlamtsa aña mamətsay aga anu la vok, kà uwana mənəfa Yesu. Vok gami kà guɓguɓ, ama məmətsay dadəj aw, ɲgaha uwaga la uwana apəhla à azladza ala kà, Yesu la ahəj la sifa. ¹² Uwaga asal magofay kà mamətsay aña Yesu adəhà sləray la anu la abà, ama sifa aña adəh sləray la akul la abà.

¹³ Tatsetsèr à wakità Zəzagəla à abà, agòd kà:

'Gədiɲ gəl à Sufəl Zəzagəla à vok, kà uwaga à uwana gəpəh gay marabəj!'[☆]
Mədiɲ gəl à Zəzagəla à vok babay kà, kità anu babay kà maz gay marabəj. ¹⁴ Məsəl kà Zəzagəla awùlla Sufəl Yesu Kristu à uda la mamətsay, adəwulla anu à uda babay, kà uwana mədagay tekula la Yesu. Masla la uwana adəpəhla anu ala la huma aña Zəzagəla la gəl aña. ¹⁵ Uwaga gesina kà adapaka vok kà aɲkul, ɲgaha vok mahamay aña Zəzagəla aña mabəz à slaka azladza gesina, ɲgaha kà matugway aña azladza aña mazala vok à gəl kaykay. Kiya uwaga à uwana, azlauwana 'Kikay', tagofay à Zəzagəla, tasləkaw masla aña mazigənay.

Madza à ahəj la madiɲal gəl à vok la abà

¹⁶ Kà uwaga à uwana madzugway gami aruw vok à ahəj aw. Məsəl kà vok gami kà agogolay la ɲuv ɲuv, ama sifa uwana Zəzagəla avà à anu kà, aday kəla mavakay la anu la abà. ¹⁷ La dziriga kà, ɲgərpa uwana lagonay kà, adədəv à gay vərđi anik, uwanay kà aña disa pəra. La lig aña azlaɲgərpa uwaga la ahəj kà, adəfah anu à mazləbay mənğa uwana à ahəj, uwana adədəv à gay aw kà madəgolay azlaɲgərpa uwanay. Mazləbay uwaga kà, aduwa tatak gesina. Baña mədzugway lakəl aña mazləbay uwatà kà, ɲgərpa kà bokuba tatak deyday la gay yewđi gami. ¹⁸ Məfa madzugway gami à azlatatak aña vədah uwanay à gəl aw, azlatatak uwana mənəjə atà la vədah kà, tadədza à ahəj aw, ama azlauwana mənəjə atà aw kà, atà la uwana tadədza à ahəj aña koksikoksi.

5

¹ Məsəl kà, baña gəy gami aña lakana, uwana vok kutso adəkəl à ahəj kà, gəy gami anik la ahəj la zagəla uwana Zəzagəla la gəl aña la uwana aña. Gəy uwatà kà adədza à ahəj aña koksikoksi. ² Mok uwana la gudəj uwanay la vok kà, məbas vok la madzugway la abà, mətuw à gəy gami uwatà à tsəh kà mad à agu la zagəla. ³ Baña mədəbəza vok mawga kà, ɲgaha masasədok gami auguzahay kokudə sləb vok aw. ⁴ Mok uwana mədza à ahəj la vok kutso aləg anu la vok kà mətəərbay, məbas vok, kà huma à gay asà à anu vok uwanay aw, ama asà à anu, kà avà à anu vok mawga, ɲgaha kà vok mawga uwaga adugw vok maviyaga à gay. ⁵ Zəzagəla la uwana adəh sləray la anu la abà la gəl aña kà uwaga aña mapak vok kiya uwanay, avà à anu Masasədok tsikasłaga aña kà mapəh à anu à vok à abà kà, adəfah dzəba aña səla aw aña uwana apəh à ahəj.

⁶ Kà uwaga à uwana, anu məruw vok à ahəj aw. Məsəl kà mok uwana anu la sləb vok uwanay la abà dadəj kà, anu kərkər la Sufəl Zəzagəla. ⁷ Məslala vok aña manəj masla dadəj aw, ama məda à huma à gay kà la madiɲal gəl à vok. ⁸ Ama mədahənla la mabəłafa, ɲgaha asa à anu masak sləb vok uwanay à ahəj, kà mad à madz à ahəj nekwa la Zəzagəla. ⁹ Ama terəjə dadəj kà, asà à anu kà məkəsəl à gəl, amiyaka mədəgay la abanay amiyaka mədəgay la slaka aña. ¹⁰ Kà uwana uwaga kà leri gami, kà anu aña magay la huma aña Kristu, kà madəhla à anu seriya à gəl, kà kəla uwabeyuwi aña mabəz humà masik aña, lakəl aña uwana adəhəj gesina, adagay mawisiga, adagay delga, à mok uwana agə la vok uwanay la abà.

Kristu la uwana asəlla anu vok la Zəzagəla

[☆] 4:13 4.13 Mahabay 116.10

¹¹ Kà uwaga kà, mēhoy guba aṅa Sufəl Zəzagəla, ṅgaha mēyah mabəz azladza à tsəh, la gay dziriga uwanay mēzàtəṅ babay. La paraka kà, Zəzagəla asəl anu, ṅgaha gədzugw kà, bə akul la madzugway aṅkul kà, kasəlaw anu babay. ¹² Asà à anu mēzləb gəl gami la huma aṅkul aw. Asa à anu kà katsənaw godega aṅa tatak uwana asa à akul masləkawla anu, ṅgaha kà akul aṅa mawulla à azlauwana tadzidziṅ akul, la tatak uwana la vok tanəṅəṅ la uda gə, awkà uwana la ləv la tsəh aw. ¹³ Uwana anu azlakusonju, kagodəw kà, kà uwana mədavà vok gami à Zəzagəla. Ama anu azlakusonju aw, kà uwana asà à anu mazlak akul pəra. ¹⁴ Kristu apəhanula masal aṅha, masal uwaga kà lakəl aṅa sləray gami gesina. La dziriga kà, baṅa dza aməts kà ahəl aṅa azladza gesina kà, ¹⁵ gesina aṅatà kà tagahay kà bokuba azlamamatsay gə. Aməts kà, kà aṅatà, kiya uwaga atà takor sifa la gəl aṅatà aya aw. Ama tadza à ahəṅ la sifa kà, kà ahəl aṅha, aməts babay kà aṅatà, awul à uda la mamətsay bay kà aṅatà.

¹⁶ Tsa baṅa kiya uwanay kà, məkàsàni dza makasay la manərəzay huɖ adi aya zlə ma aw. Uwarà kà, məpakà Kristu ala kà kiya uwaga, ama lagonay kà, mədahəṅ kiya uwatà aya aw. ¹⁷ Baṅa dza la Kristu la abà kà, adapakay maṅalay mawga, madəhəṅ maviyaga adada à lig, dēwdēw tatak adapaka mawga. ¹⁸ Tatak uwaga gesina kà, atsà à waṅ kà la slaka Zəzagəla, uwana asəlla anu vok la Kristu la abà la masla. Avà à anu sləray à ahəl, kà anu aṅa madla à azladza anik à masəlla atà vok à abà la masla. ¹⁹ Bokuba magodəy kà: Zəzagəla asləl Kristu à waṅ, kà masəlla anu à vok, anu azladza gesina, la masla. Atugw tsakana aṅatà aya aw. Afà anu sləray matsidəyga uwanay à ahəl kà maziṅ à azladza.

²⁰ Kà uwaga à uwana mədapakah azlaməna masləlay aṅa Kristu. Zəzagəla azəl azladza la magoy la paṅaw gami la awtəy. Kamkam, mədəv akul kuɖa, la sləm aṅa Yesu Kristu: 'Kəsəw makəs vok slawda, uwana Zəzagəla adəhəṅ la akul!' ²¹ Kristu kà adəhəṅ tsakana tetuwa aw. Ama Zəzagəla adükwla tsakana gami à gəl gesina, kà anu aṅa mabəz vok mahamay la maham gay à vok la Kristu, la uwana Zəzagəla aḡəṅ anu azladziriga.

6

Sləray aṅa Pol

¹ Iyay, anu kà anu azlaməna madəh sləray la Zəzagəla, lagwa kà mēgod à akul kà: 'Kabəzəw vok mahamay aṅa Zəzagəla, ama dəhəw haṅkəli kà uwaga aṅa matəfa kà akul aw.' ² Tatsetsər à wakità Zəzagəla à abà, aḡod à tsəhay aṅha kà: 'Mok uwana kaslə adaslay kà, gi aṅa madəh delga à azladza kà, gətsəb à ka sləm, ṅgaha la mok uwana kaslə asla kà, mabəl azladza kà gəzlak à ka.'^{*} Azladedə, lagonay la uwana kaslə uwana asà à Zəzagəla kà madəha à anu delga, lagonay la uwana asal mabəl azladza.

³ Asa à anu kà dza atsəd gay à sləray gami à tsəh aw, kà uwaga à uwana mədəh haṅkəli, kà anu aṅa madəd gay à madinjal gəl à vok aṅa dza à ahəṅ aw. ⁴ Ama la tatak la abà gesina kà, məpəhla ala, kà anu azlaməna sləray aṅa Zəzagəla. Mədəgay la matərəbay la abà, mədəgay la mazaw la gəl la abà amiyaka azlanḡərpa taduw à anu bay kà, məbasiṅ kiya uwaga pəra. ⁵ Azladza taslahahanula, tawats anu à daṅay, tamaham à anu azladza à gəl. Sləray babay kà aduwa anu, vərđi anik babay kà mədzehahal aw, məbaza tetəvi kà mazuw tatak may babay aw. ⁶ Mapəhla uwaga ala, kà anu azlaməna madəh sləray aṅa Zəzagəla la ləv tekula, məsəl dziriga, anu azlaməna mabasiṅ, anu azlahayhay. La mazlakay aṅa Masasədok tsikaslaga kà, məwoy azladza anik la ləv tekula. ⁷ La maz sayda dziriga, Zəzagəla avà à anu ndzəɖa

^{*} 6:2 6.2 Yesayya 49.8

aŋha. Maday lela gami kà bokuba kazlaŋa guvèl, uwana mēpalla guvèl la huma azlamēna mēzam gami, kà mahèlla à ahēŋ. ⁸ Azladza anik taslèkaw anu, ŋgaha azlaanik tapēsew anu babay. Tapēh gay delga lakèl gami, ŋgaha tapēh mawisiga babay aya. Azladza anik tanērēz anu bokuba anu azlamēna fida, bamēraka dziriga mēpēhay. ⁹ Tanērēz anu kà bokuba tasèl anu aw, ama la dziriga kà, tasèl anu. Tanērēz anu bokuba anu azlamazimnekid, ama anu la sifa. Taslèhàhanula, ama taslala vok aŋa makadfanula aw. ¹⁰ Amiyaka mēdagay la mazaw la gèl la abà mēŋga kà, mēda à huma à gay la marabay. Mēkor tatak mēŋga la gudēŋ uwanay la vok aw, ama aŋuvaw mēpak azladza ala kà azlagorobu la tetēvi aŋa Zēzagèla la tsèh. Hadfay kà, bokuba mēkor tatak aw, ama tatak gesina kà, anu mēkoray la huma aŋa Zēzagèla.

¹¹ Akul azla Korintiya, mēpēh à akul uwanay, kà bà la paraka, tatak la ahēŋ mēhadfan à ahēŋ la tsèh lēv gami aw. ¹² Anu kà mēwoy akul la lēv tekula, ama akul la uwana kawoyaw anu aw. ¹³ Gēpēh à akul gay bokuba akul azlabēza gulo: Dahàwnēŋ bokuba uwana mēfahakullaŋ suwaŋ, pōkwàw lēv aŋkul la paraka.

Mēham gay à vok la azladza à uda aw

¹⁴ Azladza, uwana tasèl Zēzagèla aw kà, kahamaw à slēray à abà akul nna aw, maham gay à vok uwaga kà akēsa vok aw. Kakay dziriga aham gay à vok la mawisiga ma? Kakay udfaka aham gay à vok la mēlēs ma? ¹⁵ Kakay azla Kristu la seteni taslala vok aŋa matsēn vok gay la slaka gè ma? Tsa baŋa kità ma, kakay masla madīŋal gèl à vok, atsēn vok gay la dza uwana adīŋal gèl à vok aw ma? ¹⁶ Mana ma à uwana aham gay à mēŋ gày Zēzagèla, uwana la sifa à vok, la gày mazlazlay ma? La dziriga kà, anu kà, anu azlamēŋ gày aŋa Zēzagèla. Kà uwana Zēzagèla agòd: 'Gèdàdza à ahēŋ la tataka aŋatà la abà, gèdàgay la atà, gèdàgay Zēzagèla aŋatà, tadàgay azladza gulo.'*

¹⁷ Kà uwaga à uwana Sufèl Zēzagèla agòd à azladza aŋha:

'Sàw à uda la tataka aŋatà la abà, kadzaw à ahēŋ akul la atà nna aw. Katapaw ahèl à tatak àlèhga aŋatà, uwana à vok tadehēŋ aw, kiya uwaga kà, gèdàkēs akul.

¹⁸ Gèdàpaka Baba aŋkul, akul babay kadàpakaw azlakohana gulo la azladègam gulo.'*

Kiya uwaga à uwana Zēzagèla uwana asla à tatak gesina à vok, agòd à atà.

7

¹ Azlamanalay gulo, Zēzagèla apēh à anu tatak uwanay à ahēŋ gesina, kà uwaga kà, mēgà gèl gami sètaka, mēbèd tatak uwana à uda, adfahànula àlèh à vok. Madzugway gami la abà kà say mēgay kà azlasètaka aŋa ndzer, kà uwana mēslèkaw Zēzagèla.

Marabay la mazaw la gèl aŋa Pol

² Wōyàw anu la lēv tekula. Kà uwana mēdadfah à mawisiga à dza anik aŋkul à vok aw, mēdàtsla matekwid à dza anik aŋkul aw, ŋgaha kà mēdapapat tekula aŋkul à bada à abà babay aw. ³ Uwana gēpēh kiya uwaga kà, kà mapuwakulla gudzi à gèl kà makèlakulla ziruwì à gèl, kagodfaw aw. Awaŋ, bokuba uwana gēgòd à akul kà, mēwoy akul kà aŋuvaw. Tatak la ahēŋ avahanula anina aw. Mēdàmētsay, mēdàgay la sifa kà anu la slaka gè. ⁴ Gēnawà akul manaway aw, gi la marabay mēŋga kà akul. Gèdasa ŋgērpa mēŋga, ama lēv adaval gi à gay aw, bà la uwaga bay kà, gi la marabay mēŋga.

⁵ Uwana asa à gi mapēhay kà, amiyaka mok uwana mēdabēza à Makeduniya kà, mēbēza kaslā kà anu aŋa maduw lēv aw. Mēgagamàh la azlaŋgērpa anik anik uwana tabēzà anu la azlaslaka gesina. Azladza tadzàh kà magazlay, ŋgaha vok gami bay kà

* 6:16 6.16 3Musa 26.12 * 6:18 6.18 2 Samuyel 7.14; Yesayya 43.6; 52.11

adzà à ahəŋ la huyuk huyuk, guba akàs anu. ⁶ Ama Zəzagəla uwana atasläh gay à azladza uwana à ahəŋ, gəl adàkad atà à vok kà atàsl anu ləv à ahəŋ la mas à waŋ aŋa Titus. ⁷ Mas à waŋ aŋha pəra atàsl anu gay à ahəŋ aw, ama masla la uwana apəh à anu gay madzərədəhla aŋkul. Masla la uwana apəh à gi kà katàwàw gi à tsəh kà manəŋəŋ gi babay, ŋgaha bay kà kadzikwàw madfehəŋ aŋkul uwana uwarà, kawàdàw vok à uda, kà mazlak gi babay, uwaga la uwana aràb gi kaykay.

⁸ Gəsəl kà, wakità gulo uwana gətsetsèr à akul kà, abək à akul mazaw la gəl la dziriga, naka gədzugway nəma. Ama, dğəgəf à uwali gəgəf aw, kà uwana gəsəl kà gəbək à akul mazaw la gəl la wakità uwatà, kà aŋa kaslā ŋuv. ⁹ Ama lagonay kà, gi la marabay la abà, kà uwana gətsetsèr à akul wakità uwaga, gərabay kà, kà uwana gəbək à akul mazaw à gəl aw, gərabay kà, kà uwana katùwàw lakəl aŋa madfehəŋ mawisiga aŋkul, ŋgaha kà kadapəhaw gay la ləv ala. Mazawla gəl aŋkul kà, apakà kà mawoyəŋ aŋa Zəzagəla, kà akul aŋa mapəh gay la ləv ala, kiya uwaga kà wakità gami adahakulla mawisiga à vok aw. ¹⁰ Kà uwana baŋa anu la mazaw la gəl uwana la abà, asà à Zəzagəla kà, mazaw la gəl uwaga kà adàla anu à mapəh gay la ləv ala à abà, kiya uwaga kà Zəzagəla atəfà dza la tsakana uwana la abà adahəŋ. Tsəhay mazaw la gəl uwaga kà, aza anu aw, ama tsəhay mazaw la gəl aŋa azladza gudəŋ à vok uwanay kà adala dza à mamətsay la huma yewdi aŋa Zəzagəla. ¹¹ Nəŋàw uwana Zəzagəla adahəŋ la mazaw la gəl aŋkul tsi. Nəŋàw mabədlà vok aŋkul tsi, nəŋàw maval vok aŋkul la madzugway aŋkul tsi. Lagonay kà, asa à akul mapəhla ala kà kakwesaw kà mawisiga aŋkul kà, kapakàhàw vok ləv à gəl kà akul à akul. Guba adakəs akul kà azlatatak uwana adapaka vok lakəl aŋa uwana naka abəzà akul. Asa à akul manəŋəŋ gi la iyaw tugwi aya, kavàw vok aŋkul kà madfehəŋ uwana asa à Zəzagəla, ŋgaha kadahàw seriya à mawisiga à gəl, ŋgaha kapəhàwla ala kà kadapallaw ahəl aŋkul la mawisiga la abà.

¹² Gətsetser wakità uwanay kà, kà dza uwana adahà tsakana, baŋaw kà aŋa masla madàh tsakana magay aw. Ama gətsetser uwanay kà, kà masləhakulla sləm ala, kà mapəhla masəlay aŋkul ala kà kawadaw vok à uda la huma Zəzagəla kà aŋami. ¹³ Kà uwaga à uwana madfehəŋ akul adzərədənula.

Iyay, uwana adzərədənula kaykay kà uwaga pəra aw. Məràb kaykay kà la manəŋ Titus, uwana agà la marabay, kà uwana akul gesina kà kadzərədəwla ləv ala. ¹⁴ Gətsà zlapay lakəl aŋkul la huma aŋha, akul babay kà kakəlàw à gi ziruwi à gəl aw. Uwana məpàh à akul gesina kà dziriga. Kiya uwaga tatak uwana gətsàlla zlapay la huma aŋa Titus kà, agà dziriga, apakà vok kiya uwaga. ¹⁵ Mok uwana adà à awtày à slaka aŋkul kà, kakəsàw masla la ahəl səla, kasləkàwàw gesina aŋkul, kakəsàw gay aŋha. Baŋa adzugway lakəl aŋa uwaga kà, mawoy akul aŋha kà azalà vok à gəl. ¹⁶ Gi la marabay kà akul kà, kà uwana gəŋawà akul manaway aw.

8

Mav sili aŋa azlaməna madiŋal gəl à vok la Urusalima

¹ Azladedà, asa à anu mapəhakulla vok mahamay aŋa Zəzagəla uwana apakà vok la slaka azladza la kutso Makeduniya. ² Madiŋal gəl à vok aŋatà kà adzəkà vok kà la matap atà aŋa azlaŋgərpa la afik məŋga, ama bà la uwaga bay kà, tagà la marabay məŋga məŋga, baməraka takor tatak aw babay kà tahamà gay à tatak à vok məŋga. ³ La dziriga kà, tavà bokuba uwana taslàla vok. Uwana tavà kà, aduwà à vok; kà uwana tavà kà, kà la mawoyəŋ aŋatà. ⁴ Kamkam tagòf à anu, tadəv à anu kuđa kà atà aŋa mabəz tetəvi aŋa mad maham gay à vok aŋa mazlakay à abà babay kà aŋa azlaməna madiŋ gəl à Zəzagəla à vok, la kutso Yahudiya. ⁵ Tatak uwana tahàmla gay à vok kà, aduwà madzugway gami uwana mədzügw. Terəŋa dadəŋ kà tavà vok

aṅatà à Sufəl Yesu, ṅgaha takès kà anu aṅa maham gay à vok babay, uwana Zəzagəla ayàh babay. ⁶ Kà uwaga à uwana mədzerəfà Titus ala kà maf sləm à sləray uwaga, adzəkà la tataka aṅkul la abà, lagwa masla adadəv sləray uwaga à gay la tataka aṅkul à sləray dzəba aṅha səla aw uwaga. ⁷ Akul kà kagaw azlagorobu la azlatatak gesina la abà, akul la madiṅal gəl à vok, la maslay aṅa azlagay anik anik, la maslay la mawad vok à uda, ṅgaha la mawoy anu aṅkul. Asa à anu kà, kà kagaw azlagorobu la sləray uwanay la abà babay.

⁸ Gəpəh à akul uwanay kà, bokuba la leri aw, ama la gay mawad vok à uda aṅa azladza anik, la uwana asa à gi: Magur sətaka aṅa masal aṅkul. ⁹ Kasəlaw vok mahamay aṅa Sufəl gami Yesu Kristu. Masla kà gorobu, ama akəs magay kudfa kà akul. Uwana adfahà, uwaga apakà gəl aṅha ala, kà masla kudfa kà, kà akul aṅa magay azlagorobu la madiṅal gəl à vok la abà gesina.

¹⁰ Iyay, uwanay gəpəh à akul kà madzugway aṅa gəl gulo, koksi kà kagaw azla-teraṅa la sləray aṅa sili uwaga la abà, lagonay kà. hənàw sləray gə uwana ala.

¹¹ Dahàwwàṅ la marabay uwana kadzaw kəla, bokuba uwana kawadaw vok à uda la madzəka, kiya uwaga babay kà wàdàw vok à uda kà madəvla à gay, vaw bokuba uwana ndzəda aṅkul aslay. ¹² Baṅa kawadaw vok ala kà aṅa mav tatak à Zəzagəla la marabay kà, Zəzagəla akəs mavay aṅkul la ahəl səla, bokuba uwana kakoraw kà mavay. Ama baṅa tatak la ahəṅ aw kà, Zəzagəla kà asəl.

¹³ Ama asa à gi aṅa magodəy kà, kapakahaw azlaməna kudfa magay aw, ṅgaha azladza aṅa mafəz gəl gəgod aw. Ama asa à gi kà kagaw kalkal gesina. ¹⁴ La kaslā uwanay kà, azlayla vok kazlakaw atà la kudfa aṅatà la abà. La huma la gay kà, baṅa kadānawkudfa suwaṅ kà, tadəzlak akul. Kiya uwaga la uwana kadəgaw tekula la slaka gə. ¹⁵ Uwaga kà kalkal la uwana tatsetsər à wakitā à abà:

'Dza uwana ahəmla gay à vok məṅga kà, aduwà vok aw, ṅgaha dza uwana ahəmla gay à vok ṅuv babay kà aslal.'[☆]
tatsetsər.

Titus la azlaslagama aṅha

¹⁶ Kikay, məgod à Zəzagəla uwana avà mabəlafa à Titus kà mazlak akul, bokuba uwana məyàh bay. ¹⁷ Titus akəs manavay gami kà mawulay à slaka aṅkul. Ama kà uwaga pəra aw, kà mawad vok à uda aṅha à uwana akəs mawulay à slaka aṅkul la gəl aṅha. ¹⁸ Məsləl à awtày, atà la deda anik à uwana azlaməna madiṅal gəl à vok tasəl gesina, kà uwana az gay marabəṅ la tetəvi aṅha, ¹⁹ kà uwaga pəra uwana məsləl à awtày aw, ama maham à ahəṅ məna madiṅal gəl à vok la uwana akəsàni masla, kà masla aṅa mauguzahay anina, la kaslā uwana mədala sili uwanay à Yahudiya. Sləray delga uwaga adəpəhla mazləbay aṅa Sufəl Zəzagəla ala, ṅgaha adəpəhla ala kà məwoya azladza haday.

²⁰ Haday kà, sili uwana tavà à anu à ahəl kà məṅga, say məfal sləm kà azladza aṅa matsəd anu gay à tsəh lakəl aṅha, la madz à ahəṅ gami la abà babay aw. ²¹ Asa à anu madəhəṅ kà uwana delga la huma aṅa Sufəl Zəzagəla, ṅgaha la huma aṅa azladza gesina babay.

²² Məsləl atà deda anik à tsəh aya. Masla kà mədagur mawad vok à uda aṅha asik dəṅ, ṅgaha mənəṅəṅ kà masla kà azlaka dza. Lagonay kà, asal mazlak akul aya babay, kà uwana afła kà gəl à ahəṅ la akul. ²³ Titus kà, masla kà manalay gulo la sləray la abà, kà masla aṅa mazlak akul. Ama azladza anik səla uwanay tanəfa Titus à awtày kà, maham à ahəṅ məna gay Zəzagəla la uwana tasləl atà à awtày, kà uwana baṅa azladza tanəz sləray aṅkul kà, tazlèb Zəzagəla la Yesu Kristu. ²⁴ Pəhàw atà ala mawoy atà aṅkul la ləv tekula, ṅgaha maham à ahəṅ məna gay Zəzagəla tasləl

☆ 8:15 8.15 2Musa 16.18

atà à awtày aña magəđəŋ à afik ndzer, ŋgaha kà atà aña masəlay kà azlayla anu mats zlapay la akul la afik, kà uwana məpəh dziriga.

9

Zəzagəla awoya dza uwana avà y la ləv tekula.

¹ La madzugway gulo la bà kà, gay la ahəŋ aña matsetser akul lakəl aña mazlakay, uwana tazlakla azlaməna madiŋal gəl à vok la kutso Yahudiya aya aw, kà uwana kasəlaw uwaga gesina. ² Gəsəl kà, akul la gəl aŋkul babay kà, asà à akul mazlak atà. Lakəl aŋkul la uwana gəts zlapay la huma azlaməna Makeduniya, la magođ à atà: Azladedə la gudəŋ uwana la kutso Akayya kà, tadəh vok à ahəŋ kà dagay koxi, kà mazlak azlaməna madiŋal gəl à vok la Yahudiya. Mawođ vok à uda aŋkul uwaga, kà atsənà azladza ala kaykay la tataka aŋatà la abà aya. ³ Lagonay bay kà, gəsləl azladedə makər uwaga à awtày, kà maham gay à tatak à vok, bokuba uwana: 'Dahəwwəŋ', gəgođ à azladza anik, kà atà aña mədàbəza à awtày kà, kà tatak uwana gətsə zlapay lakəl aŋha kà adəpaka vok. ⁴ Agayŋa azlaməna Makeduniya tanəfa gi à awtày, ŋgaha məbəza akul à vok kà kadəfahaw vok à ahəŋ aw kà naka aŋidz ahama anu à gəl la huma aŋatà, kà uwana məgođ kà mənawa akul manaway aw, tadəh vok à ahəŋ, məgođ kaykayga, ma kakay adəpaka vok la akul ma? Akul babay kà aŋidz adəhama à akul à gəl. ⁵ Gədzùgw dziriga kà, azladedə uwaga tatsa vok à awtày à slaka aŋkul, kà tatak gesina uwana à ahəŋ tavà la ləv tekula. ŋgaha kà, la mok uwana mədàda à awtày tatak uwaga adəfah vok à ahəŋ lela, kà bà la dziri kà mavà y la ləv tekula aña dza, awkà la leri aw.

⁶ Gəpəhakulla la gay la gay la abà uwanay: Dza uwana asləkay ŋuv yewdi kà, adətsəđay babay kà ŋuv yewdi, ama dza uwana asləkay mənŋa kà, adətsəđay mənŋa babay. ⁷ Tsa baŋa kiya uwaga kà, dza avà bokuba uwana ləv aŋha arab kà mavà y. Vəw la ləv tekula awkà la leri aw, kà uwana Zəzagəla arabay lakəl aña dza, uwana avà y la marabay, ŋgaha la ləv tekula. ⁸ Zəzagəla la maslay kà mav à akul tatak gesina, kà akul aña mabəz kəla tatak, uwana kanawkuđa aŋha gesina, ŋgaha atəm akul à ahəl aya aña madəhla sləray dzəba aŋha səla aw gə kiya uwanay. ⁹ Uwaga kà bokuba uwana tatsətsər à wakità Zəzagəla à abà:

'Dza delga av tatak à azlaməna kuđa la ləv tekula. Mawoy dza aŋha kà, aga la ahəŋ koksikoksi.'*

¹⁰ Zəzagəla la uwana masla mav fofulo à masla masləkay, ŋgaha la tatak may aña madzadzarla akul. Adavà à akul fofulo gesina uwana kanəwkuđa aŋha, ahənəŋ kà fofulo masigla, ŋgaha masəl dza aŋkul aña magay mənŋa. ¹¹ Adəpis akul gay à vok la tatak gesina la abà kà masəl dza aŋkul, ŋgaha azladza aŋuvaw aña 'Kikay', kà magođ à Zəzagəla, kà sili uwanay kafəw anu à ahəl, mədala. ¹² Ndzer, mavà y aŋkul uwanay kà, adəzlaka azladza aŋuvaw la sləray aña Zəzagəla la abà. Ama uwana aduwa uwaga kà, 'Kikay', azladza aŋuvaw tadəgođ à Zəzagəla. ¹³ Kà uwana mavà y uwanay kà, adəpəhla madz à ahəŋ dziriga aŋkul ala, kiya uwaga kà, azladza tadəsləkaw Sufəl Zəzagəla, kà uwana kakəsaw mapəhay aña gay marabəŋ aña Yesu Kristu, ŋgaha tadəsləkaway aya kà masəl dza aŋkul, uwana katsakaw tatak la slaka gə la azladza gesina. ¹⁴ La mok uwana tadənəŋ vok mahamay aña Zəzagəla adəgay mənŋa lakəl aŋkul kà, tadədəv kuđa kà aŋkul, ŋgaha tadəwoy akul mənŋa. ¹⁵ Lakəl aña uwanay gesina kà, 'Kikay', məgođ à Zəzagəla kà mavà y aŋha, uwana aduwa vok gesina.

* 9:9 9.9 Mahabay 112.9

10

*Gay uwana Pol awulla**à azlaməna matsəf gay à mapəhay aŋha à tsəh*

¹ Gi Pol la uwana asa à gi mapəh à akul gay aŋa aslasl gəl gulo lagwa, azladza anik kà: 'Gi tələmma à baŋa gi la tataka aŋatà la abà', tagodf, ama: 'Gi dzaŋdzaŋ', tagodf, 'A baŋa gi kərkər la atà.' Kamkam gədəv à akul kudfa la sləm aŋa Yesu Kristu à masla uwana tələmma, ŋgaha dziriga. ² Kamkam bədfəwla madzugway aŋkul kadəfaw gi leri à gəl, kà gi aŋa madəpəhla à akul ala ndzəda gulo à baŋa gədàda à awtày à slaka aŋkul aw. Kà uwana aŋuvaw azladza la slaka aŋkul tagodf kà, gədàh sləray kà bokuba aŋa dza uwana asəl Zəzagəla aw, tasəl kà, gəsla kà mapəhatàla ndzəda gulo nəma. ³ La dziri kà, anu kà anu azladza asik nəma pəra, ama məpay kiya aŋa azladza asik aw, say la tetəvi aŋa Zəzagəla la tsəh. ⁴ Kà uwana kazlaŋa guvəl uwana məpala guvəl kà aŋa sləb vok aw. Ama kazlaŋa guvəl aŋa Zəzagəla, uwana la ndzəda. La masla la uwana məbazlähla azlazlagam uwana à ahəŋ, azlaməna mazam aŋa Zəzagəla tahədfəh vok à abà, ŋgaha la azlamadzugway fidaga aŋa azladza gesina. ⁵ Uwana dza atsalla zlapay lakəl aŋa matsihila aŋa Zəzagəla kà, mədəkwəŋ à ahəŋ gesina, mədətsərkwah azlamadzugway mawisiga aŋa azladza gesina aŋa makəs gay aŋa Kristu. ⁶ Anu kà mədədfəh vok à ahəŋ kà matsərkwəh azlauwana takəs gay aw, à baŋa akul kà akul azlaməna makəs dziriga aŋa Zəzagəla.

⁷ Nərəzàw dadəŋ tsi. Baŋa dza afa gəl aŋha à azladza aŋa Kristu à adi kà, say adzugway lela kəla zlà, kà uwana anu babay kà, anu azladza aŋa Kristu. ⁸ Ndzer, kà uwana ziruwi akəs gi aw, gədats zlapay la Sufəl Yesu Kristu kà, kà uwana masla la uwana avà à gi ndzəda, kà madla akul à huma à gay la madiŋal gəl à vok la abà, awkà kà mazəhakulla aw. ⁹ Ama asa à gi kà kadzugwaw kà gətəw akul la wakità gulo aw, ¹⁰ kà uwana azladza aŋuvaw tagodf kà, wakità aŋa Pol kà zlazlada ŋgaha dzaŋdzaŋ. Ama baŋa gəl masla la tataka gami la abà kà, aruw vok à ahəŋ, asəl mapəh gay aw. ¹¹ Dza uwana adzugw kiya uwaga kà, aganay à uwana gəpəhal: Tatak gesina uwana gətsetsər à akul kà, gədəpəh à akul aya, à mok uwana gədəgay la tataka aŋkul la abà.

¹² La dziriga kà, məslala vok aŋa magazləla gəl gami la azlaməna mazigən gəl aŋatà, uwana tagur gəl aŋatà kà la aslasl gəl aŋatà aw, uwana tagur gəl aŋatà kà la aslasl gəl aŋatà kà azlakusoŋu. ¹³ Ama anu kà, məts zlapay kiya uwaga aw, anu kà mədəw makwi uwana Zəzagəla akədəv à anu à ahəŋ aw. Abəzla anu à slaka aŋkul la gay marabəŋ aŋa Yesu Kristu, uwaga la uwana makwi aŋa sləray gami. ¹⁴ Baŋa kità kà, mədəwla makwi aw, kà uwana la dziriga məbəzàwəŋ kà la tetəvi aŋa gay marabəŋ lakəl aŋa Yesu Kristu. ¹⁵ Ama anu kà, məts zlapay lakəl aŋa azladza anik uwana tadzəkà aw, kà uwana uwaga kà gay gami aw. Ama kəla kà, madzugway gami kà, kadəw à huma à gay la madiŋal gəl à Yesu à vok la abà, ŋgaha kà sləray gami, uwana la tataka aŋkul la abà aŋa mad à huma à gay, la makwi gami uwana la abà Zəzagəla akədəv à anu à ahəŋ babay. ¹⁶ Zlahaw la huma la gay kà, mədəbəza tetəvi kà maz gay marabəŋ à kutso anik, uwana la abà kərkər la akul. Uwaga kà məslala vok aŋa mats zlapay la slaka uwatà aw, kà uwana slaka uwatà adagay guf aŋa dza anik.

¹⁷ Ama bokuba uwanay à uwana tatsetsər à wakità Zəzagəla à abà:

'Baŋa dza asal mats zlapay kà, atsa zlapay kà la azlatatak uwana Sufəl adəhəŋ kəla.'✧

¹⁸ Iyay ndzer kà, dza agay masəlay gə la huma aŋa Sufəl kà, kà uwana Zəzagəla awoyà masla, awkà la mazləb gəl aŋha la gəl aŋha aw.

11

Pol la azlaməna matapla fida gə

¹ Lagwa kà, asa à gi kà basəwğəñ, kavàw à gi tetəvi gəbadma ñuv makusonju kusonju gulo uwatà. La kità kà, kamkam basəwğəñ. ² Mañor aza à gi lakəl aña akul, azlauwana tavavàr akul bokuba uwana azà à Zəzagəla, kà uwana gədafa akul mawfa à ahəñ la Kristu, ñgaha asa à gi kà kadzaw à ahəñ la sətaka, kà gi aña mapəhla akul ala, kiya dahalay uwana tavà à zil sətaka. ³ Gi la guba vok la abà, kà uwana gədzugway lakəl añkul, kà dza aña marəhla akul à uda, kà masak à Yesu Kristu la tsəh ala aw. Dzùgwàw lakəl aña uwana bebi asà à wañ arəhèla Hawwa à uda la demdem aña tsi. ⁴ Baña masla matapla fidaga anik asà à wañ à slaka añkul, kà mapəhakulla Yesu anik, gərgər la uwana məzəkuləñ, ayyà kagodəw. Ama masasəfok uwana apəhay kà uwaga kà, masasəfok Zəzagəla uwana kabəzəwwal uwarà aw, ñgaha babay kà, azəñ kà gay marabəñ uwana kadiñəwwal gəl à vok aw. Ama bà la uwaga kà katsəbàwwal sləm!

⁵ La madzugway añkul la abà kà, dza uwanay kà: ‘Məñ dza’ kagòdəw, ndzer. Ama la dziriga kà, aduwa gi aw. ⁶ Iyay, zlahaw kà gəsəl mabadma kiya aña aw. Ama kà aña dza hanəkəliga kà, gi la hanəkəli, kà uwana asik dəñ dəñ, gədapəh à akul uwaga la dazuwaya.

⁷ Dagay uwarà, mok uwana gəzəkulla gay marabəñ aña Zəzagəla kà, gənəv akul tatak bà ñuv babay aw. Gəzīgənà gəl aw, kà uwana asa à gi kà akul kazīgənəw, gəgodf. Ngaha ma uwaga ma, gəfahəñ ma mawisiga takay? ⁸ Mok uwana gədàh sləray la tataka añkul la abà kà, gəbazà à tatak uwana gənukudfa aña la slaka aña azladza gudəñ anik ndzer, gədàla atà à kudfa à abà kà akul. ⁹ Mok uwana gi anina la abà gə kà, gəfà mahanay à dza anik añkul à gəl aw, kà uwana azladeda mənə madiñal gəl à vok dagay la Makeduniya tanañàh à gi à adi la kudfa gulo la abà, kà uwana asà à gi maf à akul mahanay à gəl aw, bà tsərəh à huma à gay babay kà, asà à gi tetuwa aw. ¹⁰ La dziriga kà, gəgodf à akul kà, gi la madəf gay ləv, kà uwana gəfà tatak añkul à gay, añkul uwana la kutso Akayya tetuwa aw. La dziriga kà, fida gəpəh aw, kà uwana Kristu la gi la abà ñgaha masla kà fida aw. ¹¹ Kà mana à uwana apəh uwaga mi kagodəw takay? Kà uwana gəwoya akul aw, kagodəw ay? Awan! Zəzagəla kà asəl kà, gəwoya akul la ləv tekula.

¹² Lagonay kà, gəda à huma à gay la madəhəñ kiya uwaga, kà maham añidz à azlaməna matapla fida gə uwaga à gəl, uwana asa à atà mazəb à anu humà ala, la mazləb gəl aña tətà, ñgaha kà atà aña masəlay kà sləray gami kà gərgər la aña tətà. ¹³ Kà uwana atà kà, azlaməna masləlay dziriga aw, azlaməna fida, ñgaha azlademdem uwana tapəkəh gəl aña tətà ala bokuba azlaməna masləlay dziriga aña Kristu. ¹⁴ Uwaga kà nadzipo aw, kà uwana seteni babay kà, apaka gəl aña ala kà malika aña ufaka. ¹⁵ Uwaga kà, apaka tatak maval anu ləv à gay aw, à baña azlaməna sləray aña tagoday kà: ‘Anu azlaməna masləlay dziriga’. Ama la vudf makəf gəl à ahəñ kà, tadàbəza seriya kəla aña sləray aña tətà uwana tadfahəñ.

Pol adəf gay ləv kà ñgərpa aña

¹⁶ Bà gotənañ gəpəhay aya, asa à gi kà dza aña manərəz gi bokuba gi kusonju aw. Ama baña asa à akul kà aña mapəgəla kiya kusonju, kità zlə kà, fəw à gi à ahəñ bokuba gi kusonju, kà gi aña mats zlapay makusonju kusonju suwan zlə. ¹⁷ La dziriga kà, uwana gəpəh la abanay kà, mapəhay aña Sufəl aw. Baña gədəkəs mats zlapay, gəbadma makusonju kusonju zlə. ¹⁸ Tsa azladza añuvaw tats zlapay kà azla-tatak uwana la gudəñ uwanay la vok kà, tsa kətà gi babay kà, gəts zlapay suwan kiya aña tətà. ¹⁹ ‘Anu kà anu azlaməna hanəkəli’, kagodəw, kà uwaga à uwana kabasawwan azlakusonju aw ay! ²⁰ Iyay, akul kà kakəsaw kà azladza tafa à akul asik à gəl, bokuba

akul azlamayà, tazaw akul à gay tsèràh à aslasl adi, takad à akul dèmfem à gəl, tapəsew akul ngaha tadafa à akul ahàl à gəl, tatəərb akul. ²¹ Haday, la dziriga kà, anjdz ahama gi à gəl kà mapəhay kiya uwaga, ndzer kà, gi guɓguɓ.

Ama lagonay kà, tsa anjdz aham azladza à gəl anja mapəhay makusonju kusonju aw, kà gi babay kà, kità gədəpəhay suwan. ²² Tadayay azla Ibəranənkowen, gi babay kà bà gi atà, tadabay azla Isərayel, gi babay bà gi atà aya, tadabay mayyi à tsəh ala anja Abəraham, gi babay kà bà gi mayyi à tsəh ala anja suwan, ngaha ma taduwa gi ma la mana zlà ma? ²³ 'Anu azlaməna sləray anja Yesu Kristu', tagodf. Gi babay kà, gədàh sləray anja bay, gədàh sləray uwaga la maduw atà aya. Iyay, uwaga gəpəhay kà, kamkam bokuba gəl à gi la vok aya aw. Ama ndzer kà, gədàh sləray daduwa à atà zewk à zewk, tadaw gi à daɗay daduwa à atà. Tazlabàh gi daduwa à atà, mamətsay kà gi gəuzuzàhla kà la gay gəl ahàl. ²⁴ Asik zlo azlamasiga anja azla Yahudiya taslahgəla la kurpi, kəla maslahgəla kà, tapəs gi la kurpi dzik makər gəl anja ladəga, ladəga. ²⁵ Asik makər azla Rom tazlab gi la azəva. Tatsàh gi la akur kà makədf gi asik tekula. Asik makər kəslah iyaw aguwaḡgəla à gəl à abà aya. Asik tekula gəvək à iyaw à abà gəhən à abà. ²⁶ La mauguzahay gulo uwana la abà, anjvaw kà gəsàh ngərpa la azlamukwà la abà, la ahàl anja azlaməna gəna, la ahàl anja azlatsəhay anik anik, amiyaka bà la ahàl anja tsəhay gulo babay. Gəsàh ngərpa la azlaslaka gesina, la azlahudf gudəɗ gesina la abà, ngaha la ahàl anja azlauwana: 'Anu azladedà anjak', tagodf à gi, ama kà anja gay gə. ²⁷ Gədàh sləray dəgdəgga tsèràh à uwana naka gəməts à abà, bà madzəhal babay kà, gədzhəhàh aw. Gəbàz tatak may la tatak masay aw, zwek à zwek gəkəs nəlay, anasl akədfàh gi, kà uwana gəgàh la vok deyday. ²⁸ Nodəgi kà, azlatatak anik anik la ahəɗ babay kà, gəslala vok anja matugw uwaga à uda aya aw. Ama tatak tekula la ahəɗ atəərb gi kəla mavakay: Gi la madzugway la abà kà lakəl anja azlaməna madiɗal gəl à vok la kəla maham à ahəɗ mənə gay Zəzagəla, kà masla gə. ²⁹ Magay guɓguɓ anja dza kà, apakgəla kà guɓguɓ suwan. Baɗa dza atədf à tsakana à abà kà, ləv aza à gi mənɗa.

³⁰ Azlayla vok kà gəts zlapay, ama kəla kà, gəts zlapay kà lakəl anja tatak uwana apəhla guɓguɓ gulo ala. ³¹ La haday kà, Zəzagəla Baba anja Sufəl gami Yesu Kristu asəl kà gədàh fida aw, mazləbay agay kà la masla koksikoksi. ³² Mok uwana gi la Damas kà, lawan anja mənə sufəl Aretas, abək azladza à gay gamagəy anja hudf gudəɗ gesina, kà atà anja makəs gi. ³³ Ama la abatà kà, azladedà anik tafà gi à takosà à abà, tadzilà gi à ahəɗ la gəl zlagam uwana takəsla gay à hudf gudəɗ à adi. Kiya uwaga la uwana gətəf la ahàl anjatà.

12

Uwana Sufəl Zəzagəla apəhla à Pol la masesinay

¹ Amiyaka bà akəsa vok la slaka azladza aw, babay kà say gəts zlapay kà mapəhay lakəl anja tatak uwana Sufəl apəhgəla ngaha la azlauwana masesinay apəh à gi gesina. ² Gəsəl masla madiɗal gəl à vok anik uwana la Kristu la abà, dagay uwatà kà adadàh mavay kulo gəl anja ufaɗ, masla kà ahàd à zagəla mamakər matsekakaday gə uwatà à afik. (Adà à afik ma la sləb vok kà, à bi masesinay pəra asasiɗla à mənɗa kà, gəsəl aw, say Zəzagəla kokudə gəl anja pəra asəl) ³ La dziriga kà, dza uwatà kà ahàd kà à slaka mazləbay uwana à abà la slaka Zəzagəla. (Bi la sləb vok à uwana Sufəl adala masla à abà kà, gəsəl aw, masla masəl uwaga kà say Zəzagəla pəra) ⁴ La abatà la uwana atsanà azlagay nasiriga, uwana azladza taslala vok anja mabəɗal à tsəh aw, uwaga kà tetəvi la ahəɗ kà anja dza la sləb vok anja mapəhay babay aw. ⁵ Lakəl anja dza uwatà la uwana gəts zlapay, awkà la ndzəfa anja gəl gulo aw. Kiya

✧ 11:24 11.24 5Musa 25.3

uwaga la uwana kà, gəpəhla guɓguɓ gulo ala. ⁶ Baɗa asa à gi mats zlapay aw, gəhəl à ahəŋ kà uwaga, kà uwana asa à gi kà, dza asləkaw gi lakəl aɗa tatak uwana anəŋəŋ la uwana atsənəŋ la slaka gulo aw.

⁷ Naka azlayla gi gətsa zlapay, kà uwana Zəzagəla apəh à gi azlatatak dzəɓa aɗha səla aw gə aɗuvaw. Kiya uwaga babay kà avà à gi tatak anik aya, uwana azà à gi, kà gi aɗa magay zlapay aw. Tatak uwaga kà Zəzagəla agòlla la ahəl aɗa seteni kà matsəhla gi yəs kà gi aɗa magay zlapay aw. ⁸ Asik makər gədəv kuda à Sufəl Zəzagəla lakəl aɗa dɗvats uwaga, kà masla aɗa mapəlgəla la uwaga la abà. ⁹ Ama masla awùlgəla agòf: 'Vok mahamay gulo kà diga kà aɗak gesina. Mok uwana kak guɓguɓ kà, ndzəɗa gulo aɗahà sləray la kak la abà.' Lagonay kà, gi la marabay kà mabas guɓguɓ gulo kà uwana ndzəɗa aɗa Kristu la gi la abà. ¹⁰ Kà uwaga à uwana, gəvalàh à zagəla lakəl aɗa guɓguɓ gulo, amiyaka azladza tatsək à gi magoɗahay à gəl, tatərəb gi babay kà, gəbasin kà Kristu. Baɗa azlamatərəbay anik la mazaw la gəl tawəɗàh gi à ahəŋ kà, la mok uwatà la uwana gəbəza ndzəɗa.

Madzugway aɗa Pol lakəl aɗa azla Korintiya

¹¹ La dziriga kà, gəpəh kà gay makusonju kusonju, ama akul la uwana kafaw gi gasa à gəl aɗa mapəhay kiya uwaga. Kà uwana naka akul la uwana katsàw zləbàw gi, amiyaka bà gədagay tatak aw, babay kà azlaməna masləlay mawga uwaga kà tadɗuw gi la magay nəma aw. ¹² Sləray uwana apəhla ala kà gi masləlay kà, aɗahàhà vok la tataka aɗkul la abà, gəpəhakulla la mabasin uwana akəɗ gəl à ahəŋ aw, gəɗahàhà azlanadzipo la azlatsəhay tatak anik anik, uwana la ndzəɗa gesina la huma aɗkul. ¹³ Awma tatak anik la ahəŋ gəɗahəŋ à azlaməna masla gay Zəzagəla anik, masla gəɗahəkulləŋ aw takay? 'Vàw gi tatak', gəgodf à akul magay aw: 'Basəwŋəŋ kamkam!'

¹⁴ Lagwa kà, gəzlàdà à awtày à slaka aɗkul ka mamakər adagay. Baɗa gədàda à awtày kà, gəɗàfa à akul mahanay à gəl aw. Akul la uwana gəyàh akul awkà sili aɗkul aw. La haɗay gə kà, azlabəza la uwana tadzadzar baba aw, ama baba la uwana adzadzar azlabəza. ¹⁵ Gi kà la marabay, gəvə à tatak uwana gəkoray gesina, adagay aslasl gəl gulo babay, kà gi aɗa mazlak akul. Lagwa ma katetuwwaw mawoy gi, à kà uwana gəwoya akul kaykay takay?

¹⁶ Gəfa à akul mahanay à gəl aw gadzewi la abà aw. Zlahaw kà, dza gə agodf à akul kà, gəɗahəkulla dɛmɛm à vok, la maɓəz akul à tsəh, la dabaray agodfay kà, haɗay zlə ma aw. ¹⁷ Azladza gulo uwana gəslàlah atà à awtày ma, tazawàh akul à uda kəla ay? ¹⁸ Gəsləl Titus la azladedà anik à slaka aɗkul. Lagwa ma, Titus la uwana azùw akul à uda zlə ma ay? Tsa, gəgodf kà, anu səla kà məɗàh sləray kà tekula, madzugway la manəfay gami kà tsa tekula ma, kakay zlə ma aw gə ma?

¹⁹ Zlahaw dagay uwarà kà akul la madzugway uwaga, 'Asa à anu matsadf gəl gami ala la huma aɗkul', kagodfaw. Awan! Kiya uwaga aw. Məpəh uwaga kà la dziriga aɗa Zəzagəla, kà uwana anu azlaaɗa Kristu. Azladedà gami, uwana məwoya akul uwaga gesina kà, kà uwana asa à anu kazigənaw la madiɗal gəl à vok la abà. ²⁰ Guba aza à gi kà, kà mok uwana gədàda à awtày à slaka akul babay, kadənəŋaw gi bokuba uwana kayhaw babay kəla. Guba aza à gi, kà maɓəz akul à gəl la magazlay, la maɗor, la mapak ləv, la matsən vok a gay aw, la azlagay wadzaw wadzawga, la azlakaskas, la azlazlapay ŋgaha la azlamasàh gəl anik anik la abà gesina, à uwana asa à gi aw. ²¹ Baɗa gədàda à awtày kà, asa à gi kà Zəzagəla gulo awulgəla gəl à vəɗah, kà gi aɗa matuway lakəl aɗa azlaməna madz à ahəŋ la tsakana la abà, kà uwana, la haɗay gə kà, tapəh gay la ləv ala aw. Tasak tatak mawisiga la tsəh ala aw, tadàh mabila la dèwdèw tatak mawisiga.

13

Gay makəf gəl à ahəŋ, la Ayyi

¹ Mamakər aŋha la uwaga gəda à awtày à slaka aŋkul. Iyay, bokuba uwana tatsetsèr à wakità Zəzagəla à abà kà:

'Kəla dza uwana apuw gudzi kà, say agay la azlaməna sayda səla baŋaw makər.'[☆]

² Gay aŋa mapəh à azladza uwana à vok à abà tadəhəŋ tsakana la tataka aŋkul la abà, ŋgaha azlamatəm à ahəŋ gə gesina kà, gəpəh à akul bokuba uwana gəpəh à akul dagay la madzəka à mok, uwana gəgà la slaka akul kà masəla. Baŋa gədàda à awtày kà, gədàdəfaha à atà seriya à gəl la paraka. ³ Kiya uwaga kadàbəzaw sayda uwana kayahaw. Kasəlaw kà Kristu apəh gay la gi la abà təga aw uwa. Ŋgaha səlāw kà, Kristu uwana adəh sləray la tataka aŋkul la abà kà, guɓguɓ aw, ama apəhla maslay aŋha ala la akul la abà. ⁴ La mok uwana tatatəsl à ahəf à adi kà, la mok uwatà kà, agà guɓguɓ. Ama lagwa kà, aga la ahəŋ la sifa kà ndzəda aŋa Zəzagəla. Kà maham gay à vok gami la Kristu, anu bay kà anu azlaguɓguɓ, ama kà maslay aŋha kà anu la sifa bay, ŋgaha la mok uwana mədàda à awtày la slaka aŋkul kà, mədədəfah sləray la maslay aŋa Zəzagəla.

⁵ Lagonay kà gürəw gəl aŋkul dən zlà. Akul la madiŋal gəl à vok la abà nəma ay? Say kasəlaw uwaga la aslasl gəl aŋkul: Kasəlaw ma, Yesu Kristu ma aga la akul la abà nəma ay? Tsa baŋa kità aw kà, kazawla. ⁶ Ama la hadəy kà, baŋa akul kagədfawwan afik kà kadiŋaw gəl à Yesu à vok kà, gəsəl la dziriga kà, kadəsəlaw kà anu azlaməna masləlay aŋa Kristu hadəy. ⁷ Mədəv kudə à Zəzagəla kà akul aŋa madəh mawisiga aw. 'Ama məyah magədf dziriga gami à afik pəra', kagodaw aw. Awan, ama kəla kà, asa à anu kadəhawwan kà say uwana akəs à vok pəra, amiyaka məsla kà madəh delga babay aw. ⁸ Anu kà məslala vok aŋa matsak dziriga aŋa Zəzagəla à ama aw, say mədza à ahəŋ kà, kà ahəl aŋha pəra. ⁹ Anu kà, anu la marabay à baŋa anu azlaguɓguɓ, ŋgaha akul la ndzəda. Kà uwaga à uwana mədəv kudə à Zəzagəla, kà masla aŋa mapakakulla kà azlazil. ¹⁰ Wakità uwanay gətsetser kà, la mok uwana gələg mabəz à slaka aŋkul dadəŋ. Kà uwana baŋa gədàda à awtày kà, asa à gi aŋa matsətsəhakulla la gay dzaŋdzaŋga aw. Kà uwana Sufəl Zəzagəla avà à gi ndzəda aŋha kà makaləhla akul à vədəh aw, ama say kà matsizilla akul ala pəra.

Ayyi

¹¹ Iyay zlà azladedə, lagonay kà: 'Dzàw à ahəŋ wurwur zlà', gəgodf à akul. 'Gàw azlamahanay gə la tetəvi aŋa Zəzagəla la tsəh, kəsàw gay gulo uwana gəpəh à akul, tsənàw vok gay, dzàw à ahəŋ la lapiya la abà, kà Zəzagəla uwana awoya dza, ŋgaha avəh lapiya, adza à ahəŋ la akul la abà aŋa tsərəh à awtày!'

¹² Dahəw vok 'Ayyi', kà akul à akul, la ləv tekula! 'Ayyi!' azlaməna madiŋal gəl à vok la abanay gesina tagodf à akul.

¹³ Vok mahamay aŋa Sufəl gami Yesu Kristu, la masal aŋa Zəzagəla, ŋgaha la maham gay à vok aŋa Masasədok Zəzagəla agay la akul gesina.

WAKITÀ UWANA POL ATSETSÈR À AZLA GALATIYA Lettre de Paul aux Galates

¹ Wakità uwanay asa à uda kà la ahàl gulo à gi Pol, maslèlay aña Yesu Kristu. Dza asik taslèl gi aw. Zèzagèla Baba, uwana awùlla Yesu Kristu à uda la mamètsay, la Yesu Kristu la gèl aña, la uwana taslèl gi. ² Gi la azladedà uwana la abanay gesina, 'Ayyi', mөгođ à akul, akul azlamèna masla madiñal gèl à vok la kutso Galatiya gesina. ³ Zèzagèla Baba gami, la Sufèl Yesu Kristu tavà à akul vok mahamay, la lapiya. ⁴ Yesu Kristu avà sifa aña kà tsakana gami, ñgaha kà Zèzagèla aña mamatsinèña. Kà tatak mawisiga aña gudèñ à vok uwanay aña magay la ndzèđa lakèl gami aw. Adfahàn kiya uwana asa à Baba Zèzagèla kà madèhèñ. ⁵ Mazlèbay agay la Zèzagèla aña koksikoksi. Amen.

Gay marabèñ anik la ahèñ aw

⁶ Kà kadàw gi gèl à vok. Zèzagèla azalà akul la vok mahamay, kà akul aña magay azlaaña. Ama katskats kasàkàw uwaga la tsèh ala, kanèfaw tetèvi anik uwana: 'Delga kà la uwatà', kagodaw. ⁷ La dziriga kà, tetèvi delga anik la ahèñ aw. Ama azladza anik la ahèñ, à uwana takàđ akul ala gèl vok. Tayàh maβèđla gay marabèñ aña Kristu kiga. ⁸ Baña dza anik azakulla gay marabèñ gèrgèr, la uwana mèzàkullàn kà, masla kà matsaflaga la slaka Zèzagèla. Adagay anu, adagay malika anik uwana asa à ahèñ la zagèla bay. ⁹ Mèdapèh à akul tèga aw kà, lagonay gèwulla akul ala à tsèh aya: Baña dza azakulla gay marabèñ gèrgèr la uwanay mèpèhakulla ala kà, Zèzagèla asafla ala seriya à gèl. ¹⁰ Haday, la matsetser gay uwanay kà, asa à gi kà, azladza tazlèb gi aw. Asa à gi, kà Zèzagèla pèra azlèb gi. Awma kadzugwaw ma, kà gi aña mahèđ azladza à adi takay? Awan, agay asa à gi kà azladza aña mazlèb gi kà, naka gègay masla slèray aña Kristu aw.

Pol abèz tetèvi kà magay maslèlay aña Kristu

¹¹ Azladedà gulo, asa à gi mapèhakulla ala la paraka kà, gay marabèñ uwana gèzàkullàn kà, aguwà à wan la slaka dza asik aw. ¹² Gèbèza uwaga la slaka dza aw, dza atàpgèla uwaga babay aw. Ama Yesu Kristu la uwana apèhgèla, ñgaha afètàgèla uwaga à ama ala.

¹³ Kasèlaw madz à ahèñ aña uwarà gulo, à mok uwana gènèfa tsèhay manèfay aña azla masla Yahudiya. La kaslà uwatà la uwana, gètèrèbàhà azlamèna gay Zèzagèla kaykay. Gèyàh mazàh atà ala gesina. ¹⁴ Gènèfà mapèhay aña makoray, ñgaha la mapèhay aña azlababa gami madzidziga la lèv tekula, đadúwa à gay azlamanalay gulo gesina.

¹⁵ Ama vok ahamà à Zèzagèla, akèsà gi dagay uwana talèg mayyi gi. Azala gi, kà gi aña madàhla slèray, bokuba uwana akèsal à gèl. ¹⁶ Kiya uwaga apèhgèla Kona aña, kà gi aña maz gay aña la tataka azladza uwana azla Yahudiya aw. La kaslà uwatà kà, gèhàđ à slaka dza kà manav matsihila la slaka aña aw. ¹⁷ La kità, gèhàđ à Urusalima babay, kà madz à ahèñ la azlamèna maslèlay teraña à gi aw, ama gèvà vok kà mapiyay kà à kutso Arabiya, dagay la abatà la uwana gèwùl à Damas. ¹⁸ Uwana mavay makèr adada à lig kà, gèwùl à Urusalima kà gi aña manèñ à Piyer à gay. Kasukwa sèla mèdzà à ahèñ anu sèla pèra. ¹⁹ La abatà kà, gènèñà azlamèna maslèlay anik aw, say Yakuba à deda aña Sufèl Yesu pèra.

²⁰ Uwanay gètsetser akul kà fida la abà aw, Zèzagèla asèl kà gèđàh uwaga aw.

²¹ La lig aña uwaga la ahəŋ, gəhəd, gəuguzàh la kutso aña Səriya, ŋgaha la Səlisəya. ²² La mok uwaga, azlaməna madiŋ gəl à Kristu à vok la makoray aña Yahudiya, tasəl huɔf adi gulo dadəŋ aw. ²³ Tatsənəŋ kà uwana azladza tapəhay pəra: 'Kay, masla matərabàh anu uwana uwarà, lagwa kà, masla az madiŋal gəl à vok, uwana lakəl aña Yesu à azladza adagay, kay kà, ayàh maβəzləŋ à abà uwarà.' ²⁴ Kà uwaga kà, tazləbà Zəzagəla kà azlatatak uwana gəɔfahəŋ.

2

Pol la məŋ maham gay à vok la abà la Urusalima

¹ Kiya uwaga à uwana, mavay kulo gəl aŋha ufaɔf adada à lig, gəwùl à Urusalima aya, Barnabas anəfà gi, ŋgaha gəkəs Titus à tsəh aya babay. ² Gəwùl à abatà kà, kà uwana Zəzagəla agòɔf à gi: 'Hàd à abatà.' Məhamà gay à vok kokuɔfa gəl gami la azlamadzahaga aña azlaməna manəfay, gəpəh à atà gay marabəŋ uwana gəzàh à azladza, uwana azla Yahudiya aw, kà uwana asa à gi kà sləray gulo aña mawis à vəɔfah aw. ³ Masla mazlak gi, Titus, masla kà zil Gərək, ama tafàl ndzəɔfa à gəl, kà makədəv à uda aw. ⁴ Ama azlaməna magolla dza la ahəŋ tasà à tataka gami à abà la dabaray la magoɔfay: 'Masla mamakədəv à uda gə takay?' Asà à atà masəl madz à ahəŋ gami, uwana anu la makor gəl la abà, kà uwana mədagay tekula la Kristu. Asà à atà aña mawulla anu à mayà aña mapəhay aŋatà à abà. ⁵ Ama məkəs atà gəl à ahəŋ, amiyaka ŋuv aw, kà uwana asa anu kà gay marabəŋ dziriga, adza à ahəŋ kiya uwanay kà akul aña masəlay.

✧ ⁶ Iyay, azlauwana tazala atà ala azlaməŋga uwarà ndzer, -gay gulo la abà aw, kà uwana Zəzagəla avàh azladza ala aw-, uwana tazala atà ala azlaməŋga, uwaga abəɔɔla madiŋal gəl à vok gulo aw, ŋgaha matapla gulo kà uwala delga aw, tagòɔf aw.✧ ⁷ Tasəl pəra kà, kà Zəzagəla afa à gi à gay marabəŋ à ahəl kà maziŋ azladza uwana makədəv atà à uda gə aw, bokuba uwana Zəzagəla afa à gay marabəŋ à Piyer à ahəl kà maziŋ à azla Yahudiya babay. ⁸ Zəzagəla agəɔfà Piyer à afik, kà masla aña magay masləlay à tataka azla masla Yahudiya à abà, bokuba uwana agəɔfà à gi afik kà gi aña magay masləl gi à tataka azlatsəhay anik à abà suwaŋ. ⁹ Haɔfay, Yakuba, Piyer ŋgaha Yuhana, -tanərəz atà kà bokuba azlamanəɔləv gə la tataka azlamaham à ahəŋ la abà-, atà tasəl kà Zəzagəla la uwana avà à anu sləray uwanay. Gay gə la uwaga tavà à anu matsən vok gay la Barnabas, kà anu aña maɔfàh sləray la tataka azlatsəhay anik la abà, ŋgaha atà aña maɔfàh sləray la tataka azla Yahudiya la abà. ¹⁰ Ama tadəv à anu kuɔfa kà maɔfəhəŋ kà tatak tekula pəra: Maf sləm à azlaməna kuɔfa, uwana la maham à ahəŋ dza la abà la Urusalima. Uwaga la uwana məwəɔf vok à uda kà maɔfəhəŋ.

Pol aslèh vok à Piyer la Antiyews

¹¹ Mok uwana Piyer adasa à waŋ à Antiyews, gəsləhal məlo à gəl la huma aña azladza, kà uwana aɔfahà sləray la tetəvi aŋha aw. ¹² Terəŋa dadəŋ, tazùw tatak may la slaka gə, la azladza uwana kokuɔfa makadav atà à uda gə. La lig la ahəŋ, mok uwana azladza aña Yakuba tasà à waŋ, atà uwana tadàla slilih la makədəv vok à uda la abà, guba akəs Piyer, avahà ala la azladedə uwatà, asək à mazuw tatak may atà nna. ¹³ La abatà azla Yahudiya anik tabək gəl à ahəŋ səla səla, bokuba aña Piyer babay. Bamərəka Barnabas bay kà, anəfà maɔfəhəŋ aŋatà. ¹⁴ Mok uwana gənəŋəŋ, kà tawis tetəvi aña gay marabəŋ ala kà, gəgòɔf à Piyer la huma aña azladza uwatà gesina: 'Kak, uwana kak zil Yahudiya, kadzà à ahəŋ la abanay kà bokuba kak zil Yahudiya aw, kadzà à ahəŋ kiya kak zil Yahudiya aw, kayyà, kà mana kagoɔf à azladza uwana azla Yahudiya aw kà tadza à ahəŋ bokuba azla Yahudiya zla ma?'

✧ 2:5 2.5 Mahabay 143.2 ✧ 2:6 2.6 5Musa 10.17

Mabəlay kà say la madiṅal gəl à vok pəra

¹⁵ Ndzer, anu kà, anu azla Yahudiya dziriga, kà uwana azlababa gami kà azla Yahudiya dagay la silih, anu azlatsəhay dza à uda aw, anu azlaməna masəl tetəvi aṅa Zəzagəla aw aw. ¹⁶ Amiyaka adagay bokuba uwaga, məsəl kà, dza uwana dziriga la huma Zəzagəla kà, say dza uwana adiṅ gəl à Yesu Kristu à vok, awkà dza uwana anəfa mapəhay aṅa azla Yahudiya aw. Mədiṅ gəl à Yesu Kristu à vok bay kà, kà Zəzagəla aṅa mav à anu tetəvi kà anu magay sətaka la huma aṅha kà, kà uwana mədiṅ gəl à masla à vok, awkà, kà uwana mənəfa mapəhay aṅa azla Yahudiya aw. Dza aslala vok aṅa magay sətaka la huma Zəzagəla la manəf tetəvi aṅa mapəhay aw. ✧ ¹⁷ Kiya uwaga babay anu azla Yahudiya, məhoy guba aṅa Kristu bay, anu məbèz dziriga la huma Zəzagəla kà uwana anu la maham gay a vok là Kristu la abà, ama anu azlaməna tsakana kalkal la aṅa azlatsəhay anik gesina. Baṅa kiya uwaga ma, Kristu adzərədə tsakana ala takay? Awan, tetuwa kiya uwaga aw! ¹⁸ Naka agay kiya uwaga nəma, ama mapəhay aslala vok kà mag gi sətaka aw, ṅgaha gəgola aya, gənəf mapəhay bokuba tatak uwana akəsa vok aya, aṅa kità kà, gədədəh mawisiga la huma aṅa Zəzagəla. ¹⁹ Ama kà aṅulo kà, lakəl aṅa mapəhay kà, gi mamətsay gə. Mapəhay kà, kà aṅulo kà, adapaka tatak deyday, uwaga gesina kà adada à lig, kà gi aṅa magay la sifa la huma aṅa Zəzagəla. Dagay uwana tatatəsl Kristu à ahəf à adi, gəga tekula la masla, məməts à slaka gə à abà anu səla. ²⁰ Gi kà, sifa uwanay gədza la ahəṅ kà, la gəl gulo aw, Kristu la uwana adza à ahəṅ la gi la abà. Sifa uwana gədza la ahəṅ la gudəṅ uwanay la vok kà, gədalla kà la madiṅ gəl à Kristu à vok, à masla uwana Kona aṅa Zəzagəla, uwana awoya gi, ṅgaha uwana avà vok aṅha kà aṅulo. ²¹ Tetuwa, gədəpəsew delga aṅa Zəzagəla dikiḍiki la mawulay à mapəhay à abà aw. Baṅa dza adagay dziriga la huma aṅa Zəzagəla kà, kà uwana adəh tatak uwana mapəhay apəhay la manəf mapəhay kà, baṅa kiya uwaga kà, Kristu kà aməts kà deyday pəra zlà.

3

Mapəhay baṅaw madiṅal gəl à vok

¹ Azla Galatiya, kusoṅu aṅkul uwanay haday! Uwa adasləb akul aresl lakəl ala uwa? Tsa gəpəhakulla Yesu Kristu, uwana aməts à ahəf à adi uwi? ² Wùlāw gi ala gay tekula pəra: Zəzagəla avà à akul Masasədok aṅha ma kà uwana kanəfəw mapəhay ay, awma kà uwana katsənəw gay marabəṅ, ṅgaha la madiṅ gəl à Kristu à vok takay? ³ Kà mana katsənəw sləm aw ma? Uwana Masasədok adzəkà la vok aṅkul ma, asa akul madəv uwaga à gay la ndzədə aṅa vok aṅkul takay? ⁴ Uwana apəkakulla vok gesina ma, uwaga ma deyday takay? Tetuwa tatak mənṅga bokuba uwanay apakay deyday aw! ⁵ Zəzagəla avà à akul Masasədok aṅha, ṅgaha adəh azlanadzipo la tataka aṅkul la abà babay. Adəh uwaga ma, kà uwana kakəsəw gay aṅa mapəhay ay? Awma kà uwana katsənəw gay marabəṅ ṅgaha kadiṅəw gəl à Kristu à vok ay?

⁶ Iyay, dzùgwàw lakəl aṅa Abəraham bokuba uwana wakità apəhay, agòd: 'Abəraham afà madzugway aṅha à Zəzagəla à afik, kà uwaga à uwana agə dziriga la huma aṅha.' ✧

⁷ Tsa baṅa kiya uwanay kasəlaw kà, say azladza uwana tadiṅ gəl à Zəzagəla à vok la dziriga, la uwana tadəgay mayyi à tsəh ala aṅa Abəraham. ⁸ Dagay uwarə tatsetsər à wakità Zəzagəla à abà kà, azlauwana azla Yahudiya aw, tadəpaka dziriga la huma aṅha, kà la madiṅal gəl à vok aṅatà. Gay gə la uwaga mapəhiya à Abəraham à vok à abà dagay uwarə à gay marabəṅ:

'Zəzagəla adəpis gay à azladza gudəŋ à vok gesina kà, kà kak à kak Abərahəm.'[✧]

⁹ Abərahəm adin gəl à Zəzagəla à vok. Azlaməna madin gəl à Zəzagəla à vok bokuba aŋa Abərahəm tadəbəza mapis gay à vok bokuba aŋha uwana abəzəl babay.

¹⁰ Ama kà aŋa azlauwana tadzugway kà tadagay dziriga la huma Zəzagəla kà, kà uwana tadəh uwana mapəhay apəhay kà, Zəzagəla adəkəs atə la seriya. Kiya uwaga tatsetsər à wakitə Zəzagəla à abə kà:

'Kəla dza, uwana anəfa azlamapəhay gesina uwana tatsetsər à wakitə Zəzagəla à abə aw kà, seriya aŋa Zəzagəla adətəf à atə à gəl.'[✧]

¹¹ Ama bə la uwaga gesina kà, dza la ahəŋ dziriga la huma Zəzagəla la manəf mapəhay aw, kà uwana wakitə agod babay:

'Masla madin gəl à Zəzagəla à vok abəza dziriga, adza à ahəŋ la sifa.'[✧]

¹² Ama mapəhay kà, abəza kà madinjal gəl à vok aw, bokuba uwana matsetserayga:

'Dza uwana akəs mapəhay lela kà, adədzə à ahəŋ kà la masla.'[✧]

¹³ Kiya uwaga kà, Zəzagəla adukwan seriya à gəl, kà uwana məkəs gay aŋa mapəhay tetuwa aw. Ama Kristu asə à ahəŋ, abəf à slaka gami à abə, kà Zəzagəla aŋa madukw ala seriya à gəl. La madəhəŋ kiya uwanay, avavarə anu la seriya uwaga la abə. Uwaga bokuba uwana tatsetsər à wakitə Zəzagəla à abə:

'Dza uwana tatətəsl à ahəf à adi kà, matsafla gə.'[✧]

¹⁴ Kristu adəhəŋ kiya uwanay kà, kà azlatatak delga uwana Zəzagəla apəh à Abərahəm à ahəŋ, kà azladza uwana azla Yahudiya aw aŋa mabəzal la ahəl aŋha suwan. Ŋgaha kà anu aŋa mabəzal Masasəfok, uwana Zəzagəla apəhəhə à ahəŋ aŋa mav à anu, kà uwana mədavəl ləv gami.

Mapəhay awis tatak uwana ala Zəzagəla apəh à ahəŋ aw

¹⁵ Azladedə, say gəpəh à akul la gay la gay la abə, bokuba uwana zagəla aŋa azladza. Baŋa azladza səla tahamə gay à vok ŋgaha tatsən vok gay, ŋgaha tafə à ahəl à afik, kiya uwaga kà, dza aslala vok aŋa mazalan à gəl babay aw. ¹⁶ Haday, Zəzagəla akəs vok slawda la Abərahəm kà aŋha, ŋgaha la mayyi à tsəh ala aŋha. Ama wakitə Zəzagəla agod: Azladza dəŋ, agod aw, ama à mayyi à tsəh ala aŋha, dza tekula pəra: Kristu. ¹⁷ Tatak uwana asa à gi aŋa mapəhay kà, bokuba uwana Zəzagəla akəs vok slawda la Abərahəm, agəfəŋ à afik. Mavay dadərmokw ufađ bəzi aŋha dzik makər la lig aŋha la ahəŋ, la uwana mapəhay azlanjal. Uwaga aslala vok aŋa mapəl makəs vok slawda uwaga ala, ŋgaha la tatak uwana Zəzagəla apəh à Abərahəm à ahəŋ aw.[✧]

¹⁸ Agayŋa Zəzagəla avə tatak à azladza, kà uwana tanəfə mapəhay kà, uwaga asal magoday kà: Avə kà, kà uwana apəh à ahəŋ aw, tsa tekefik kà, Zəzagəla apisə gay à Abərahəm à vok, kà uwana apəhal à ahəŋ kiya uwaga pəra.

Godega aŋa mapəhay

¹⁹ Tsa baŋa kiya uwanay ma, kà mana Zəzagəla avə mapəhay à azla Yahudiya ma? Zəzagəla avə à anu, kà anu aŋa masəlay azlatatak ma, uwala mawisiga la huma Zəzagəla la? Avə kà aŋa dəŋŋa pəra, tsərah à uwana mayyi à tsəh ala aŋa Abərahəm tatsəw à wan à masla à uwana Zəzagəla apəhal azlatatak uwaga à ahəŋ. Zəzagəla apəh uwaga à azlamalika, tazəŋ à azladza, masla masəlla anu vok la ahəŋ la tataka gami la abə la Zəzagəla. ²⁰ Masla masəlla vok à azladza kà, adza à ahəŋ kà, la tataka aŋa azladza səla la abə. Ama la mok uwana Zəzagəla apəh à azlatatak uwaga à Abərahəm, masla la gəl aŋha adəhəŋ bokuba masla masəl vok à azladza.

Kà mana mapəhay asə à wan ma?

✧ 3:8 3.8 1Musa 12.3 ✧ 3:10 3.10 5Musa 27.26 ✧ 3:11 3.11 Habakuk 2.4 ✧ 3:12 3.12 3Musa 18.5 ✧ 3:13 3.13 5Musa 21.23 ✧ 3:17 3.17 1Musa 12.7; 2Musa 12.40

²¹ Iyay, uwaga ma asal magoɗay, kà mapəhay kà awoya tatak uwana Zəzagəla apəh à ahəŋ aw, takay? Tetuwa kiya uwaga aw! Agayŋa mapəhay tekula uwana naka aslala vok, avà sifa à azladza kà, naka agəŋ dziriga la huma Zəzagəla babay. Ama mapəhay la ahəŋ kiya uwaga aw. ²² Tekedfika wakità Zəzagəla agod kà: Azladza gudəŋ à vok gesina kà, atà la tsəh aŋa tsakana, uwaga bokuba makəɗ gəl à ahəŋ aŋha, à uwana Zəzagəla apəh à azlauwana à ahəŋ, tadin gəl à Yesu Kristu à vok. Avà à atà kà, kà uwana tadin gəl à masla à vok.

²³ Dagay uwarà, mok uwana tetəvi la ahəŋ dadəŋ kà azladza aŋa madin gəl à Kristu à vok dadəŋ aw kà, mapəhay aga bokuba masla manəŋla, uwana anəŋla anu la daŋay aŋha la abà. Mənəfà masla tsərəh à uwana Zəzagəla apəhanula tetəvi kà anu aŋa madin gəl à Yesu à vok. ²⁴ Kiya uwaga mapəhay aga masla manəŋla anu, tsərəh à uwana Kristu asà à waŋ. Zəzagəla agəhà anu azladziriga la huma aŋha, kà uwana madin gəl à masla à vok. ²⁵ Lagonay kà, tetəvi la ahəŋ, kà anu aŋa madin gəl à Kristu à vok, anu la tsəh aŋa mapəhay aya aw.

²⁶ Akul gesina kà, akul azlabəza aŋa Zəzagəla, kà uwana kadinaw gəl à Yesu Kristu à vok, bokuba magoɗay kà, akul la ahəl aŋa Yesu Kristu adagay. ²⁷ Təɗfahəkulla batem, kà akul aŋa maham gay à vok la Kristu. Lagonay kà, kazəbàw madz à ahəŋ aŋa Kristu babay. ²⁸ Kadəgay zil Yahudiya, kadəgay zil Yahudiya aw, kadəgay mayà, kadəgay mayà aw, kadəgay zilga, kadəgay misga, -gay la ahəŋ aw-, akul kalkal gesina. Akul gesina kà, kahamàw à Yesu à abà, kapakàw tekula. ²⁹ Baŋa akul azlaaŋa Kristu, akul azlamayyi à tsəh ala aŋa Abəraham. Kità kà, kadəbəzaw azlatatak uwana Zəzagəla apəh à ahəŋ gesina, uwana: 'Gədàvə à Abəraham la mayyi à tsəh ala aŋha', agod.

4

¹ Uwana asa à gi aŋa mapəhay kà kiya uwanay: Bəzi uwana adəzuw gày baba aŋha, mok uwana aləg bəzi dadəŋ, kà bokuba mayà, bamərika masla adəzuw gày. ² Mok uwana aləg bəzi dadəŋ kà, atsəb sləm à gay aŋa azlaməna mafal sləm uwana tanəŋla azlatatak tsərəh à kaslā, uwana baba aŋha akəɗəval à ahəŋ. ³ Kà aŋami babay kà, apakà vok kiya uwaga, mok uwana məgà bokuba azlabəza dadəŋ, mədza à ahəŋ la ahəl aŋa azlamasəɗok mawisiga, uwana takor gudəŋ à vok uwanay. ⁴ Kaslā uwana Zəzagəla anəts à ahəŋ adaslay, Zəzagəla asləl Bəzi aŋha à ahəŋ à gudəŋ à vok, agolla la huɗ aŋa mis, kà masla aŋa makəs mapəhay aŋa azla Yahudiya. ⁵ Ngaha kà masla aŋa mapəlla azlauwana ala, atà la tsəh aŋa mapəhay uwaga, kà Zəzagəla aŋa mapakanula kà azlabəza aŋha.

⁶ Iyay, tatak uwaga apəhanula, kà akul azlabəza aŋha. Zəzagəla asləl Masasəɗok aŋa Kona aŋha à ləv gami à tsəh, awiya: 'Abba, Baba gulo!' ⁷ Uwaga kà asal magoɗay kà: Akul azlamayà aya aw, akul kagaw azlabəza aŋa Baba. Tsa kagaw azlabəza aŋha kà, adàvə à akul tatak gesina, uwana afà à ahəŋ kà aŋa azlabəza aŋha.

Pol adzugw à azlaməna gay Zəzagəla la kutso Galatiya

⁸ Uwarà, à mok uwana kasəlāw Zəzagəla dadəŋ aw kà, kagahàw mayà aŋa azlama-zlazlay. ⁹ Ama lagonay uwana kadasəlāw Zəzagəla, bokuba uwana Zəzagəla asəl akul, kayyà, kà mana kawulāw à azlatatak deydayga aŋkul uwana à abà, kadəhàwwəŋ aya ma? Kà mana asa à akul magay azlamayà aŋatà aya, tsa ndzəɗa aŋatà la ahəŋ aw ma? ¹⁰ Kafàw madzugway aŋkul kà azlamavakay anik à afik, la azlatəla, ngaha azlamavay anik à afik babay. ¹¹ Kay, guba akəs gi kà akul, kà sləray gulo aŋa mapakay deyday la tataka aŋkul la abà.

¹² Azladedə, gədəv akul kuɗa kamkam, pəkàw bokuba gi, gi babay gəpakay bokuba akul. Tetuwa kadəhàw à gi mawisiga à vok aw. ¹³ Kasəlāw, à mok uwana gədza à ahəŋ la tataka aŋkul la abà kà, dɗuvats akəɗ gi. Bə la kità bay kà, gəzəkulla gay

marabəŋ. ¹⁴ Iyay kay kà, kasàw gi la maɔfəkgəla vok ala aw. Ama kakəsàw gi kà la ahəl səla, bokuba uwana kakəsàw malika aŋa Zəzagəla, ŋgaha kakəsàw gi bay bokuba uwana kakəsàw Yesu Kristu. ¹⁵ La kaslà uwatà kà, kahənàwla la marabay. Lagwa ma aŋala zlà à ama la? Gəsəl la dziriga kà agay, kabəzàw tetəvi kà, naka bà yewdi aŋkul babay kà naka kabaɔfàw à gi. ¹⁶ Ŋgaha ma lagwa ma kapakàwngəla ma, bokuba gi masla məzam aŋkul, kà uwana gəpəh à akul dziriga takay?

¹⁷ Azladza uwaga kà, asa à atà kà akul aŋa manəf maɔfehəŋ aŋatà. Ama madzugway aŋatà kà delga aw. Asa à atà kà mavàhanula anina, kà akul aŋa makəs gay aŋatà. ¹⁸ Delga kà, azladza takəs vok gay la azladza anik, à baŋa madzugway aŋatà kà delga. Gəɔəgay la akul, baməraka gəɔəgay la akul aw, kà uwana gəpəhay la uwana dziriga pəra. ¹⁹ Azlabəza gay ləv gulo, gəs ŋgərpa bokuba mis uwana huɔ bəzi adakəsay, say gəsa ŋgərpa kiya uwanay tsəràh à uwana asa à gi kà kagaw azlaməna masləlay aŋa Kristu. ²⁰ Lagonay asa à gi madz à ahəŋ la slaka aŋkul, kà ma uwala kà vok gay à gəl. Gəl adakaɔ gi à vok, gəsəl uwana gəɔəhakullan aya aw.

Gay lakəl aŋa Agar atà la Sara

²¹ Iyay, akul kà, asa à akul aŋa madz à ahəŋ la tsəh aŋa mapəhay, gəna va akul: Katsənàw uwana mapəhay aŋa Musa apəhay aw takay? ²² Tatsetsər à wakità Zəzagəla à abà kà:

'Abərahəm kà, azlabəza aŋha kà atà səla. Bəzi tekula kà aŋa dugu mayà, anik uwanay kà aŋa mis makor gəl gə.

²³ Bəzi aŋa dugu mayà kà, ayyà kà bokuba uwana tayyàh azlabəza anik, ama mis makor gəl gə uwanay kà, ayyà kà kiya uwaga aw. Zəzagəla apəhal gay mayyi bəzi aŋha à ahəŋ dagay uwarà. ✧

²⁴ La gay uwaga la abà, Zəzagəla asal mapəhanula gay anik bokuba uwanay, azlamis səla uwaga, Agar atà la Sara, apəhanula gay makəs vok slawda gərgər səla uwana Zəzagəla aɔəhàŋ. Agar dugu mayàga, apəhla ala kà makəs vok slawda uwana Zəzagəla aɔəhàŋ la Musa la gudəŋ Sənayyi la afik, bəzi aŋha kà ayyà kà à mayà à abà.

²⁵ Baŋa tapəhay lakəl aŋa Agar kà, tapəhay kà lakəl aŋa gudəŋ Sənayyi la kutso aŋa Arabiya la abà, masla babay kà, bokuba Urusalima aŋa lakana. Kà uwana azladza uwana tadza à ahəŋ la abà gesina kà, azlamayà aŋa mapəhay. ²⁶ Ama Urusalima dziriga aŋa Zəzagəla, uwana la zagəla la afik kà, masla la makor gəl la abà, masla la uwana bokuba iyà gami. ²⁷ Bokuba uwana wakità Zəzagəla agəɔf:

'Ràb, à kak dəgər, uwana kadaslah godega ala aw, wiyà la marabay à kak, uwana katsən mazay aŋa huɔ bəzi à adi aw, kà uwana mis makuɔəkay gə, aɔəgay la azlabəza aŋuvaw ɔəɔəwa à gay aŋa mis uwana la zil la tsəh. ✧

²⁸ Azladedə, akul kà, akul azlabəza uwana tayyàh atà à tsəh aŋa makəs vok slawda aŋa Zəzagəla, akul gesina bokuba Isak. ²⁹ Dagay uwarà, bəzi uwana Agar ayyà bokuba azlabəza anik kà, atəɔəb bəzi uwana Sara ayyà, la ndzəɔə aŋa Masasəɔək. Lakana babay kà bà kiya uwaga aya gotənaŋ. ³⁰ Ama mana wakità agəɔf ma?

'Kudək dugu mayàga la bəzi aŋha gesina, kà uwana bəzi aŋa dugu mayàga kà, azuw gəy aw, say bəzi aŋa mis makor gəl gə pəra. ✧

³¹ Azladedə gulo, anu, anu azlabəza aŋa dugu mayàga aw, ama kà anu azlabəza aŋa mis makor gəl gə.

5

Makor gəl aŋa masla maɔiŋal gəl à vok

¹ Kristu apèlla anu ala la tsəh aña mapəhay aña azla Yahudiya, kà anu aña madz à ahəŋ la makor gəl la abà aña tetuwa. Kità kà, wàdɔw vok à uda, kavàw tetəvi à dza awulla akul à mayà à abà aya aw.

² Lagwa, gi Pol gəpəh à akul la paraka, kà baña dza asal makədəv vok à uda kà, kà uwana Kristu adəhəŋ kà aŋkul kà, adəpakay kà deyday zlà! ³ Gəpəh à akul aya kà, kəla dza uwana asal makədəv vok à uda kà, akəsa vok kà manəf mapəhay la tetəvi aña gesina. ⁴ Iyay, akul azladza, uwana kadzugwaw kà Zəzagəla adaga akul dziriga la huma aña, à kà uwana kanəfaw mapəhay aña azla Yahudiya kà, akul la Kristu kà kavàhəw ala, kaslawalla vok aña maβəz tatak delga aña Zəzagəla aya aw. ⁵ Ama anu kà, məfa manəwəŋ gami kà à Zəzagəla uwana à afik adəga anu dziriga la huma aña, la ndzəda aña Masasəfok tsikasla, uwana adəh sləray kà madiŋal gəl à vok gami. ⁶ Tatak uwana agəd à anu ŋuləm kà, say madiŋ gəl à masla, madiŋ gəl à vok uwaga la uwana, avà à anu ndzəda kà mawoy azladza anik babay.

⁷ Haday, kadzàw kà tetəvi aŋkul delga. Uwa adəd à akul gay à ahəŋ aña manəf dziriga uwa? ⁸ Uwana tapəh à akul kà maβəz akul à tsəh uwaga kà, aguwà à wan kà la slaka Zəzagəla, uwana azalà akul, aw. ⁹ Tatak makəslin ŋuv akəsl pəhəw, bokuba uwana azladza tapahay. ¹⁰ Kà uwana anu gesina kà, anu la Sufəl Yesu Kristu la abà. Ndzer, ŋodəgi kà, kadəzugwaw bokuba aŋulo, ŋgaha gəsəl babay kà, dza uwana akəfakulla gəl à vok, adəgay uwi kà, Zəzagəla adədukəw ala seriya à gəl.

¹¹ Azladedə, kà aŋulo kà, gəda à huma à gay kà maziŋ gay makədəv à uda ŋgaha kà Zəzagəla aña makəs anu aw. Agayña gəziŋ kà kiya uwaga kà naka azladza tatərəb gi aw, ŋgaha naka takweska mamətsay aña Kristu la ahəf la adi aw. ¹² Azladza uwaga takəd à akul ala gəl à vok la makədəv vok à uda kà, tadəfəslah vok aña, vəhəwla akul nna tetuwa.

¹³ Azladedə, akul kà, tazalà akul, kà akul aña madz à ahəŋ la makor gəl la abà. Baña akul la makor gəl la abà, kiya uwanay kà, kadzugwaw kà madəh tatak uwana asa à vok aŋkul pəra aw, ama wəyàw vok kà akul à akul, ŋgaha zləkəw vok kà akul à akul. ¹⁴ Mapəhay gesina ahamà mafəh akur ahəŋ tekula à afik:

'Wəyà masla magay aŋak, bokuba gəl aŋak.'*

¹⁵ Ama baña katsahaw vok, kapadəhaw vok à gay bokuba akul azlatatak fəta kà, dəhəw haŋkəli kà akul aña mawas vok ala kà akul à akul aw.

Vàw tetəvi à Masasəfok Zəzagəla adala akul

¹⁶ Aganay à gay uwana asa à gi mapəh à akul: Səkəw à Masasəfok Zəzagəla akor akul, kanəfaw mabila aña vok aŋkul aw. ¹⁷ Tatak uwana asa à sləb vok aña dza adəhəŋ kà, asa à Masasəfok Zəzagəla aw, ŋgaha tatak uwana Masasəfok adəhəŋ bay kà, asa sləb vok aña dza aw. Guvəl la ahəŋ la tataka aña, kiya uwaga kà, məslala vok mədəh, uwana asa gəl gami aw. ¹⁸ Ama baña Masasəfok Zəzagəla adala akul kà, mapəhay aga la ndzəda lakəl aŋkul aya aw.

¹⁹ Azlatatak uwana asa à sləb vok aña dza kà madəhəŋ kà, adzəd ala: Mabila, sləray àləh gə, kəla sləray mawisiga, ²⁰ tasləkəw azlamazlazlay, tasəh nalkokodzi, fəh vok guvəl à adi, tagazlay, azlamaŋor, azlaməna ləv, tadzugw kà à gəl aña, kiya uwaga kà, məslala vok mədəh, uwana asa gəl gami aw. ²¹ ŋgaha azlaməna à adi, azlaməna guzu, azlaməna marazlay mawisiga la azlasləray anik tsəhay gə uwaga. Gəpəh à akul à vok à abà bokuba uwana gədapəh à akul dagay uwarà kà: Azlaməna madəh tsəhay gə uwaga kà, tadəbəza slaka la makoray aña Zəzagəla aw.

²² Ama mayyay aña Masasəfok tsikasla kà: Masal, marabay, lapiya, mabasiŋ delga, dzəba aña səla aw, madəh delga à dza anik, azladza dziriga, ²³ ləv tələmna, makəs ləv. Mapəhay adəd gay à uwaga à ahəŋ aw. ²⁴ Azladza uwana azlaaŋa Kristu kà,

* 5:14 5.14 3Musa 19.18

azlatatak mawisiga gesina uwana tatuwal à tsəh, uwaga bokuba tatatasl à ahàf anja Kristu à adi. ²⁵ Masasəđok Zəzagəla avà à anu sifa, say məkəs gay anja Masasəđok uwaga, la sifa gami babay gesina. ²⁶ Məđahà zlapay aw, mətafəđəhà ləv à azladza anik aw, məfə maņor à azladza anik à adi aw.

6

Mazaḅ vok mahanay

¹ Azladedə gulo, baņa kanəņaw dza anik uwana adada mađəh mawisiga à abə kà, akul uwana akul la Masasəđok Zəzagəla kà zlakəwwəņ, kà masla anja mawulay à tetəvi à tsəh ala, ama đəhəwwəņ kà la ləv tələmmaga. Gəgod à kəla uwabeyuwi anjul, đəhəw haņkəli kà akul la gəl anjul anja matəđal à tsəh bay suwaņ aw. ² Zəbəw vok mahanay kà akul à akul, kiya uwanay la uwana kà, kakəsay mapəhay anja Kristu. ³ Baņa dza anərez gəl anja ‘Gi məņga’, agodəy, ama dza məņga aw, kiya uwaga kà adəz gəl anja ala. ⁴ Say kəla uwabeyuwi anərez sləray anja. Baņa ada à vok kà, aslala vok azləḅ uwana ađəhəņ la gəl anja. Manəkudə magagazləla la ahəņ la sləray anja dza anik aw, ⁵ kà uwana leri, kəla uwabeyuwi azəḅ mahanay anja.

⁶ Dza uwana atapla gay Zəzagəla, aslala vok mav à ahəņ dèwdèw tatak delga la masla matapla.

⁷ Kapapataw gəl anjul aw! Zəzagəla kà, asaka dza uwana ađəhla marazlay aw. Kəla tatak uwana dza asləka, la uwana atsəđay suwaņ. ⁸ Baņa dza asləka mawoyəņ anja vok anja kà, mawoyəņ anja vok anja uwaga la uwana adətsəđay, uwaga mamətsay. Ama baņa asləkay kà uwana asa à Masasəđok kà, adətsəđay kà sifa adəv à gay aw, Masasəđok avà uwana. ⁹ Tetuwa məsak à mađəh delga la tsəh ala aw, kà uwana baņa məwadə vok à uda kà, mədətsəđay la vudə uwana kaslə adəslay. ¹⁰ Lagonay kà, məđəhà delga à azladza gesina, ama kaykay kà, à azlauwana azlaanja Yesu Kristu.

Makəđ gəl à gay anja Pol

¹¹ Nərezəw uwana gətsetsə akul lagonay, gətsetsəray kà məņga məņga la ahəl gulo dziri. ¹² Azladza uwana asa à atə mahəđay à azladza à adi la sləray anja vok deyday, la uwana tatəreḅ akul la gay anja makadav vok à uda, ama tađəh uwaga gesina kà, kà azla Yahudiya anja matəreḅ atə, à baņa taza Kristu uwana la ahəf la adi aw. ¹³ Bamərika tadagay azlamakadav à uda gə bay kà tađəjal gəl à mapəhay à vok aw. Asa à atə kakadav vok à uda kà, kà atə anja mamats ala zlapay la akul pəra. ¹⁴ Gi kà, gəts zlapay, kà la ahəf anja Sufəl Yesu, uwana amətsal à adi. Gəts zlapay la tatak anik aw. Kà mamətsay anja uwana aməts à ahəf à adi kà, tatak anja gudəņ à vok gesina kà, adapakay kà mamətsay gə la slaka gulo, gi bay kà, gədapakay kà bokuba mamətsay gə la huma tatak anja gudəņ à vok. ¹⁵ Baņa dza makadəv à uda gə, adagay makadəv à uda gə aw kà, gərgər la ahəņ aw. Tatak məņga kà, magay dza mawga, uwaga la uwana ađəwa à vok. ¹⁶ Dèwdèw dza, uwana tanəf maw tetəvi uwaga, ŋgaha azladza uwana tsəhay anja Zəzagəla la dziriga babay kà, Zəzagəla avà à atə lapiya, ŋgaha ađəha à atə delga.

¹⁷ La huma la gay kà, dza adəpapata gi aw. Gi kà gi mayə anja Yesu, azlamokfak, uwana la vok gulo kà, tapəhla uwaga ala.

¹⁸ Azladedə gulo, vok mahamay anja Sufəl gami Yesu Kristu, agay la akul gesina. Hađay gə! Amen.

WAKITÀ UWANA POL ATSETSÈR À AZLA EFESƏYA Lettre de Paul aux Eph'esiens

Ayyi

¹ Gi Pol la uwana gətsətsər wakitə uwanay, à gi uwana Zəzagəla akəsàni gi, kà gi ana magay masləlay aña Yesu Kristu. Gəsləl à akul à awtày, akul azlaməna masla gay Zəzagəla la Efesus, akul uwana kadiñaw gəl à Yesu Kristu à vok, ñgaha akul uwana kagaw tekula la masla la abà. ² Zəzagəla Baba gami, la Sufəl gami Yesu Kristu tapisakulla gay à vok ñgaha la mav à akul lapiya.

Tatak delga uwana Zəzagəla avà à tsəhay aña.

³ Məzləbà Zəzagəla Baba aña Yesu Kristu gami! Uwana apis à anu gay à vok la mav à anu tatak gesina, uwana la zagəla, la makoray aña la abà, avà à anu uwana kà, kà uwaga mədahama gay à vok la Yesu Kristu. ⁴ Zəzagəla atsatsəmàni anu la Yesu Kristu dagay uwarà, à mok uwana aləg madəh gudəñ à vok kà, kà anu aña magay azlaaña, kokudə mawisiga la huma aña bay. ⁵ Kà uwana awoya anu, akəs kà mapakanula kà azlabəza aña kà sləray uwana Yesu Kristu adəhəñ. Akəsəl à gəl, à uwana adəhəñ kiya uwaga. ⁶ Adəhəñ kiya uwanay kà, kà anu aña mazləbay kà vok mahamay aña, kà uwaga dzəba aña səla aw. Avà à anu kà deyday pəra, kiya uwaga kà, uwana mədagay tekula la bəzi gay ləv aña ndzer.

⁷ Kà uwana adapalla anu la aña Kona aña uwaga, adamatsan tsakana gami ala, ñgaha apəhanula məñ vok mahamay aña. ⁸ Avà à anu vok mahamay la mahənla la pawasla, bokuba magodəy kà, apakənula kà azlaməna matsihila gə, adəhəñ kiya uwaga kà, kà anu aña masəlay hanjəli aña à tsəh. ⁹ Apəhanula tatak mahadə vok à ahəñ gə, uwana uwarà asəl madəhəñ, tatak uwana adzəgw madəhəñ la Yesu Kristu. ¹⁰ Madzugway aña kà, mok uwana kaslā adəslay kà, adahama gay azlatatak uwana à vok la zagəla la uwana la vədəh, kà Yesu Kristu aña magay Sufəl lakəl aña.

¹¹ Zəzagəla adəhəñ azlatatak gesina bokuba uwana asal madəhəñ, kiya uwaga atsatsəmàni anu dagay uwarà, bokuba uwana asa à gəl aña, kà anu aña magay azlaaña. Kiya uwanay mədahama gay à vok la Kristu, mədabəza humə mazuw gəy gami, ¹² kà azladza aña mazləb mənğa aña. Anu, anu azladza matera uwana məvə ləv gami à Yesu Kristu, ¹³ kà añkul kà, kiya uwaga babay. Katsənəw gay dziriga, uwana gay marabəñ, la uwana Zəzagəla abəlla akul, kavəw ləv añkul à Yesu Kristu, kadəhəwwəñ kiya uwaga kà, kà uwana kahaməw gay à vok la masla. Zəzagəla adəhəñ à akul masəlay aña à vok, masəlay uwaga kà, kà Masasədok tsikasla uwana apəh à ahəñ uwarà. ¹⁴ Avà à anu Masasədok dagay uwarà, ñgaha apəlla ala kà mədabəz dèwdèw tatak, uwana apəh à azlatsəhay aña à ahəñ. Mədabəzal la vudə uwana Zəzagəla adəbəl anu aña tetuwa. Məzləbà Zəzagəla uwana mənğa!

Madəv kudə aña Pol

¹⁵ Kà uwaga à uwana, kikay gəgodəy à Zəzagəla kà añkul. Gətsənə mad à huma à gay añkul la madiñ gəl à Sufəl Yesu Kristu à vok à abà, gətsənə mawoy azlaməna madiñ gəl à Zəzagəla à vok añkul bay. ¹⁶ 'Kikay', gəgodəy à Zəzagəla koksikoksi kà añkul, à baña gədəval kudə. ¹⁷ Gədəv kudə à Zəzagəla Baba mənğa, Zəzagəla gə, la uwaga à uwana Sufəl Yesu Kristu adəhəla sləray aña, gədəval kudə, kà masla aña matapakakulla matsihila aña, ñgaha masla aña mav à akul maslay la ñuləm aña

masəl masla. ¹⁸ Gədəv kudfa à Zəzagəla kà masla mapəzl akul hanjkəli ankul la udfaka anha, kà akul anja manəñ makəf gəl à ahəñ anja tetəvi, uwana akul kadəbəzaw à abata, katsənaw magay mənğa anja makoray anha, la azlanadzipo uwana adəhən à ahəñ, kà anja azladza anha gesina. ¹⁹ Asa à gi babay kà, kasəlaw mənğa anja ndzəda anha, kà aduwa tatak gesina, bokuba uwana ndzəda anha adəh sləray la anu la abà, anu uwana mədiñ gəl à masla à vok. Ndzəda kà bə uwatà. ²⁰ A uwana adəh sləray la Yesu la abà, awùlla à uda la mamətsay. Mok uwana adawùlla à uda la mamətsay kà: “Adzà madzay la ahəl kaf gulo lakəl”, Zəzagəla agədfal “la zagəla.” ²¹ Kagay Sufəl lakəl anja azlatatak gesina, lakəl anja azlamalika la azlasufəl anjatà, nğaha lakəl anja azlatatak gesina, uwana atà la ndzəda la zagəla bay.” Masla la uwana aduwa atà. Aga Sufəl lakəl anja azladza gesina, baməraka tadagay azlauwi, aga lakəl anja azlauwana la gudəñ uwanay la vok babay, nğaha lakəl anja gudəñ à vok, uwana adəsa à wañ la huma aya bawbaw. ²² Zəzagəla abək tatak gesina à tsəh asik anha, apakəñ ala kà Sufəl lakəl anja tatak gesina, nğaha agəñ madzahaga anja azlaməna gay Zəzagəla. ²³ Maham à ahəñ mənə gay Zəzagəla kà, vok anja Kristu, la uwaga la abà la uwana, masla apəhla vok ala la paraka, nğaha azlatatak delga gə gesina kà, aga kà la masla la abà.

2

Dagay mamətsay tsərəh à sifa

¹ Mok uwana uwarà kà, akul kà bokuba akul azlamamatsayga la sifa ankul la abà, kà uwana kadəhəhəwwən kà tsakana. ² Kanəfəw madəhəñ anja azladza gudəñ à vok uwanay, kanəfəw sufəl anja azlamasədfok mawisiga uwana seteni, aga la ndzəda la tataka anja zagəla la abà la kutso. Masla la uwana adəh sləray la azladza uwana la abà takweska Zəzagəla. ³ Anu gesina kà, məgə bokuba atə babay à uwarà, mədfahən kà dèwdèw tatak mawisiga, uwana asà à ləv gami koksikoksi. Məzləbəh kà gəl gami pəra. Kà uwana məgə kiya uwaga kà, anaka seriya anja Zəzagəla atədf à anu à gəl bokuba à azladza anik babay.

⁴ Ama lagwa kà, kiya uwaga aya aw. Hərəz kà, vok ahamə Zəzagəla mənğa kà, anu kà mapəlla vok mahamay anha ala. ⁵ Baməraka mədagay bokuba azlamamatsayga la tsakana gami la abà, masla kà avà à anu sifa adəv à gay aw, uwana la Yesu Kristu la abà. Abəl akul kà deyday pəra. ⁶ Kà uwana mədagay tekula la Yesu Kristu, awùlla anu à uda la mamətsay, abək anu à zagəla, kà anu anja makoray la slaka gə la Kristu. ⁷ Adəhən dzəba anha səla aw, kiya uwanay kà, kà ahəl anja Yesu Kristu, kà mapəlla ala la azlakaslà uwana la abà, adəsa à wañ la huma la gay, kà vok mahamay anha kà mənğa. Aduwa tatak gesina. ⁸ Zəzagəla abəl akul, kà uwana kadiñaw gəl à masla à vok. La madəhəñ kiya uwaga, abəl anu deyday, awkà kà madəhəñ ankul aw. Avà à akul mapis gay à vok anha deyday aya. ⁹ Zlahaw kagodaw kà, kà uwana mədfahən sləray delga, kagodaw zlə kà. Avà kà deyday, dza atsa zlapay aw. ¹⁰ Aga kiya uwanay, kà uwana masla la uwana adəhə à anu. Avà à anu sifa mawga la Yesu Kristu, kà azlatatak delga la sifa gami la abà, delga uwana adəhən à ahəñ kà dagay uwarà kà anu anja madəhəñ.

Mədəhama gay à vok la Yesu la abà

¹¹ Kà uwaga kà, gəwulla à akul à gəl, akul azladza uwana azla Yahudiya aw, dagay la mayyi akul, à akul, azladza uwana makadav atə à uda gə kà, tazala à akul ala kà: Akul azlamakadav à uda gə aw. Ama tapəhay kà lakəl anja tatak uwana la uda gə pəra, à uwana azladza tadehəñ à vok anjatà à vok pəra. ¹² Awul akul à gəl kà, la kaslā uwatà, kagəw kərkər la Kristu, uwana mafal dzakwa à gəl gə, kagəw azla

✧ 1:20 1.20 Mahabay 110.1 ✧ 1:22 1.22 Mahabay 8.6

Isərayel aw. Zəzagəla akəs vok slawda la tsəhay anha, la uwana la abà apəh à atà à ahəj kà anja madəfehəj, ama akul kà, tatüğw la akul aw, kà uwana akul azladza à uda, tatak la ahəj, à uwana kafawal yewdi à tsəh la uwaga la abà aw. Kagaw la gudəj la vok, ama kasəlàw Zəzagəla aw. ¹³ Uwarà kà, kagaw kərkər la Zəzagəla. Ama lagonay kà, kahamaw gay à vok la Kristu. A masla uwana asòkw aniz anha à vədah kà akul, kità kà, akul kərkər la masla aya aw. ¹⁴ Kikay kà masla à uwana masəl vok la ahəj la tataka gami la abà. Dagay uwarà azla Yahudiya la azladza uwana azla Yahudiya aw tavàhàla. Ama masla la uwana apakànula tsəhay tekula, madəguva la ahəj uwarà la tataka gami la abà, bokuba zlagam. Masla akalàh à ahəj, la mamətsay anha. ¹⁵ Mapəhay anja azla Yahudiya agod: ‘Dahəj uwanay, uwanay’, ama masla azəj ala. Adahəj kiya uwaga kà, kà masla anja maham gay azla Yahudiya à vok la azladza uwana azla Yahudiya aw. Tagay tekula la masla la abà tadasəl vok, ¹⁶ kà uwana aməts à ahəf à adi, madəguva la ahəj la tataka anjatà la abà aya aw, adazəb à uda. Kikay kà masla adapakatàla kà tsəhay anha, ngaha adasəl atà vok. ¹⁷ Asà à wanə à gudəj à vok, kà mazakulla gay marabəj, akul uwana akul azla Yahudiya aw kagaw kərkər la Zəzagəla uwarà, lagonay kà kabəzəwwal lapiya. Ngaha à anu azla Yahudiya, uwana məgà nekwa la slaka Zəzagəla mədabəz lapiya babay. ¹⁸ Gəgod kà anu azla Yahudiya, la akul uwana azla Yahudiya aw, kà anu ngaha akul bay, mədabəz tetəvi la Kristu la abà kà anu anja maz vok à slaka Zəzagəla. Masasədok tsikasla azlak à akul, bə Masasədok gə la uwaga azlak à anu babay.

¹⁹ Kità kà, akul azlaməlok aya zlà ma aw. Akul azlaməna mas à wanə la uda aya aw. Akul azladza gudəj adagay, bokuba azladza anik, uwana azla anja Zəzagəla, akul la huđ gəy anha adagay. ²⁰ Akul kà bokuba akul azla akur uwana tahazlla gəy, matatukw gəy kà azlaməna asik, la azlaməna mapəh à atà gay ahəl kà mapahàh à azladza, ngaha Yesu Kristu la gəl anha kà, akur mawad gəy, akəs azlaanik. ²¹ Kà masla la uwana, gəy adza à ahəj la afik, ngaha azala vok à gəl akul la azladza anik babay kà, kagaw kà bokuba gəy uwanay Sufəl Zəzagəla adza à ahəj la aku. ²² Kà uwana kahamaw gay à vok la Yesu Kristu, akul babay la azladza anik kà, bokuba gəy uwanay la uwana la aku Masasədok Zəzagəla adza à ahəj la aku.

3

Zəzagəla ayàh kà Pol az gay marabəj à azladza uwana azla Yahudiya aw

¹ Kà uwaga à uwana gəpəh à akul kà, gi Pol gədav kuđa à Zəzagəla kà ankul. Gi la danay kà Yesu Kristu, tawəđà gi kà akul, uwana azla Yahudiya aw. ² Təga kà, katsənəwwəj kà Zəzagəla afà gi à ahəj, kà gi anja madàh sləray kà ankul. Kà vok mahamay anha à uwana gədehəj kiya uwanay. ³ Zəzagəla apəhgəla tatak mahadəj à ahəj gə, nasiri uwana uwarà, kà gi anja masəlay. Gədatsetser à akul lakəl anja nasiri uwaga nıv. ⁴ Anjə, kadzenaw uwaga kà, kadatsenaw nasiri uwana gəsəl lakəl anja Yesu Kristu. ⁵ La məl uwana la abà, adada à lig kà, Zəzagəla apəhla tatak uwaga à azladza aw. Ama lagonay kà, adasləl Masasədok anha à wanə kà mapəhla à azlaməna maz gay anha, la à azlaməna mapəh à ata gay ahəl kà mapəh à azladza uwana abək atà à fəta à awtəy kà azla anja. ⁶ Aganay tatak uwana mapəhla ala gə: Uwana Zəzagəla avà à azla Yahudiya bokuba ləmana kà, akul uwana akul azla Yahudiya aw kà, kadəbəzəwwal babay suwanə: Akul la azla Yahudiya kà, kagaw tekula. Tatak uwana Zəzagəla apəh à ahəj, kà mav à azladza, uwana azla anja Yesu Kristu kà, adavà à akul babay. Azlatatak uwaga kà, tasà à uda kà la gay marabəj la abà.

⁷ Vok ahamà Zəzagəla, azəb gi à sləray anha à abà, kà gi anja maz gay marabəj uwanay à azladza. Adhà uwaga kà la maslay anha. ⁸ Gi masla mazəb dagum anja

azlaməna madiŋal gəl à vok anik gesina, bà la uwaga bay kà, Zəzagəla akəs à gi, kà gi aŋa maz gay marabəŋ, uwana asà à uda la ahəl aŋa Yesu Kristu, à azladza uwana azla Yahudiya aw. Ləmana uwaga kà, mənŋa zəŋzəŋ, kà matsənəŋ à uda aŋa azladza. ⁹ Masla la uwana avà à gi tetəvi kà mapəhla à azladza gesina lakəl aŋa tatak mahadəŋ à ahəŋ gə, uwana uwarà Zəzagəla apəh, adapaka vok. Zəzagəla la uwana aŋaləh azlatatak gesina, adəhà tatak uwaga à ahəŋ la yewdi aŋa azladza, tsərəh à lakana. ¹⁰ Lagonay kà, Zəzagəla adapəhla ala la tataka azlaməna madiŋal gəl à vok la abà, kà azlamalika la azlasufəl aŋatà tadənəŋ azlaməna madiŋal gəl à vok, ŋgaha atà aŋa masəl matsihila aŋa Zəzagəla. Kà uwana matsihila aŋa kà gərgər la azlatetəvi anik anik. ¹¹ Kiya uwaga adəhəŋ bokuba uwana ayəh madəhəŋ, à mok uwana gudəŋ à vok aləg madzəka à vok dadəŋ. Apəhla uwaga ala la magola la ahəl aŋa Sufəl gami Yesu Kristu. ¹² Kà uwana anu azlaaŋa Yesu Kristu, ŋgaha mədiŋ gəl à masla à vok kà, mədàza vok à slaka Zəzagəla la kokudə kurit yewdi. ¹³ Tsa Zəzagəla adəhəŋ kiya uwanay kà, gədəv à akul kudə, kà ləv aŋa mavalay akul à gay, kà uwana gəs ŋgərpa kà akul, aw. Azlauwala kà à vok, kà akul karabaw kà dza uwana as ŋgərpa kà akul, hadəy.

Masal aŋa Yesu

¹⁴ Kà aŋa azlatatak uwanay gədapəh à akul kà, gədəv kudə à Zəzagəla la makədəf à ahəŋ, ŋgaha la iyaw tugwi kà aŋkul. ¹⁵ Ndzer, Baba uwanay kà, Baba aŋa azladza gesina uwana la zagəla, ŋgaha la azlauwana la vədəh. ¹⁶ Ndzer kà, masla kà la mazləbay, akoray gesina. Kità kà, gədəval kudə kà, kà Masasədok aŋa aŋa mav à akul ndzəfə, kà akul aŋa magay la ndzəfə la ləv aŋkul la tsəh. ¹⁷ Gədəval kudə babay, kà Yesu Kristu aŋa madz à ahəŋ la ləv aŋkul la tsəh, kà uwana kadiŋaw gəl à masla à vok. Gədəval kudə babay, kà akul aŋa mawoy vok akul à akul. Baŋa kawoyaw vok kà akul à akul, mawoy vok aŋkul adəgay la ndzəfə, bokuba ahəf uwana adəhàla slilih aŋa à tsəh iyaw, ŋgaha bokuba gəy uwana atsizl à matatukway à afik lela. ¹⁸ Kiya uwaga akul, la azlaməna gay Zəzagəla anik gesina kà, sələw kà Yesu Kristu awoya anu kaykay. Baməraka kadədaw à uwali, kadədaw à zagəla, kadədaw à afik à agu kà, mawoy akul aŋa kà, bà aga la ahəŋ la abatà. ¹⁹ Gədəv kudə à Zəzagəla kà, kà akul aŋa masəl mawoyəŋ aŋa, uwana məslala vok aŋa matsənəŋ la paraka dadəŋ aw. Kà azlatatak uwana təhəŋ Zəzagəla ala, aŋa mahəŋ ləv gami ala suwaŋ.

²⁰ Zəzagəla kà, aslala vok aŋa madəh tatak gesina. Adəwa gesina, uwana mənəval kà madəhəŋ, adəwa madzugway gami gesina, adəhəŋ kà la maslay aŋa, uwana adəh sləray la anu la abà. ²¹ Məzləbà masla, anu azlaməna maham à ahəŋ mənə gay Zəzagəla gesina, ŋgaha Yesu Kristu bay. Məzləbà masla koksikoksi aŋa tsərəh à awtəy! Amen.

4

Vok aŋa Yesu Kristu kà tekula

¹ Tsa kiya uwanay kà, gədəv à akul kudə, kà uwana tadəw gi à daŋay kà sləray aŋa Sufəl Yesu Kristu, uwana gəfəhəŋ. Kamkam gətuwa à akul à vok kà matuway kà, nəfəw maday delga à uwana Zəzagəla azaləkulla. ² Gəw tələmma lela, gəw azladza delga, gəw azlaməna mabasiŋ, wəyàw vok akul à akul, ŋgaha basəwwəŋ vok kà akul à akul babay. ³ Wədfəw vok à uda kà madz à ahəŋ la tekula la abà, bokuba uwana Masasədok apakənula tekula, ŋgaha dzəw à ahəŋ la lapiya la abà la tataka aŋkul la abà, kà akul aŋa magay tekula. ⁴ Maham à ahəŋ mənə madiŋal gəl à vok bokuba vok aŋa Kristu, vok tekula pəra. ŋgaha Masasədok bay, kà tekula pəra. Tatak uwana Zəzagəla azalənula kà, anu aŋa maduwal à adi kà tekula pəra babay aya. ⁵ Sufəl

gami Yesu kà tekula, madiṅal gəl à vok gami kà tekula, ṅgaha tetəvi aṅa batem bay kà tekula. ⁶ Zəzagəla kà tekula pəra, uwana masla Baba aṅa azladza gesina. Akoray lakəl aṅa tatak gesina, aga la slaka gesina, aga la azlatatak gesina la abà babay.

⁷ Kəla uwabeyuwi gami gesina aḃəzal mavəy la aṅha la aṅha, bokuba uwana asa à Yesu Kristu, avà à anu. ⁸ Uwaga bokuba uwana tatsetsèr à wakità Zəzagəla à abà, tatsetsèr lakəl aṅa Kristu kà:

'Mok uwana adada à afik à zagəla kà, akəḃəsl azlaməna məzam aṅha, ahahay atà à tsəh, adàla atà à afik bay. La lig la ahəṅ avəh azlamavəy à azladza la gudəṅ la vok.'^{*}

⁹ Haday, la magodəy: Maday à zagəla, mana asal magodəy ma? Uwaga asal magodəy kà, asà à vəḃəh tsərah à kutso à abà dadəṅ. ¹⁰ Dza uwana asà à abanay à vəḃəh kà, bə dza gə la uwana ahəd à zagəla. Amatsikakadəy aṅa zagəla à afik, kà masla aṅa makoray lakəl aṅa azlatatak gesina. ¹¹ Masla la uwana avəh azlamaslay à azladza. A azlaməna masləlay anik avà à atə maslay, kà mad maz gay aṅha. A azlaanik mapəh à atə gay ahəl aṅa Zəzagəla, kà mapəh à azladza, à azladza anik bay, avà à atə maslay kà maz gay aṅha à azladza uwana tasəl Zəzagəla aw. A azladza anik bay, avà à atə maslay kà manəṅla azlamaham à ahəṅ məna gay Zəzagəla, ṅgaha azlaanik babay kà, avà à atə maslay kà matapla azladza anik. ¹² Avəh sləray uwaga kiya uwaga, kà masla aṅa madəh azlaməna gay Zəzagəla à ahəṅ, kà madəh sləray aṅha, kà maham à ahəṅ məna gay Zəzagəla uwatə à vok aṅa Kristu aṅa mad à huma à gay. ¹³ Ada à huma à gay la mawad vok à uda kà, tsərah à uwana anu mədəgay tekula, kà uwana mədav ləv gami à Yesu gesina, ṅgaha gesina gami məsəl masla. Kiya uwaga mədəgay azlazil, mədəgay sətaka bokuba Kristu bay. ¹⁴ Kitə kà, la kaslə uwaga mədəgay azlabəza aya aw. Azlaməna mapapatəh dza uwana tapapatəh à azladza la demdəm aṅatə kà, la azlagay aṅatə uwana tapapatanula, tadəza anu à tetəvi à tsəh la matapanula aṅatə aw, bokuba uwana afad abəlak kəslah iyaw, wulə à abanay, wulə à abanay lakəl iyaw aw. ¹⁵ Məga kiya uwaga aw, məwoya vok kà anu à anu, ṅgaha məpəh vok dziriga la tataka gami la abà, kà anu aṅa magay bokuba Yesu ndzer, à masla uwana lakəl gami la afik gesina. ¹⁶ Masla la uwana abək azladza à ahəṅ gesina, kà atə aṅa magay tekula bokuba vok aṅa dza uwana atsə vok la azlaamil. La vok aṅa dza kà kiya uwaga babay. Baṅa azlamanabay aṅa vok tadəh sləray aṅatə lela kà, vok gesina azigənay lela. Kiya uwaga babay la maham à ahəṅ məna gay Zəzagəla, baṅa azladza tawoya vok kà atə kà atə kà, maham à ahəṅ uwana vok aṅa Kristu kà, agay la ndzəḃa kaykay.

Sifa mawga la Kristu la abà

¹⁷ Tatak uwana asa à gi mapəhay kà gəpəhay la sləm aṅa Sufəl, gi gəḃəṅ à afik la magodəy kà, kanəfaw tetəvi uwana azlauwana tasəl Zəzagəla aw tanəfay aw, kà uwana atə kà tadzugway kà azlatatak deydayga pəra. ¹⁸ Madzugway aṅatə kà mələs gə. La huma aṅa sifa mawga, uwana Zəzagəla avəy kà, atə kà bokuba azlaməlokga, kà uwana atə la gəl dzəṅdzəṅga hawhahaw, ṅgaha kiya uwaga kà tasəl tetəvi aṅa Zəzagəla aw. ¹⁹ Zirui aṅatə la ahəṅ aw, tavə vok aṅatə kà azlatatak mawisiga pəra, ṅgaha tatsizl à ahəṅ aw.

²⁰ Kà aṅkul kà, Kristu atəpakulla kiya uwanay aw. ²¹ Masla la uwana kakəsəwwalla gay la ahəl ala aw takay? Akul uwana kahaməw gay à vok la Kristu kà, tatəpakulla azlatatak delga, uwana apəhənula uwaga aw takay? ²² Tsa baṅa kiya uwanay kà, kanəfaw tetəvi, uwana kanəfəhəw uwarə aya aw. Tsəkəw vok ala, kiya matsokw makatsekatsa la vok ala, kà uwana tetəvi uwaga kà awis akul ala, kà uwana kawòyàhəw azlatatak mawisiga la mapapat gəl aṅkul. ²³ Vəw tetəvi à Zəzagəla, kà mazəḃ madzugway aṅkul, ṅgaha la ləv aṅkul aṅa magay mawga. ²⁴ Nəfəw tetəvi

^{*} 4:8 4.8 Mahabay 68.18

mawga uwana Zəzagəla adfahəŋ à ahəŋ kà aŋa magay kiya masla. Kiya matsokw lukut mawga à vok, kà uwana tetəvi uwatà kà dziriga, akəs à Zəzagəla à gəl.*

²⁵ Kiya uwaga kà, kadahaw fida aya aw, pəhàw kà dziriga la azladza anik pəra, kà uwana anu gesina mədagay tekula.* ²⁶ Baŋa kapakàw ləv kà, dəhàw haŋkəli kà mapak ləv adala akul à madəhəŋ mawisiga à abà aw. Baŋa kadapakaw ləv, kədzaw à ahəŋ tsərəh à matəf à ahəŋ afats aw.* ²⁷ Kavàw tetəvi à seteni aw. ²⁸ Azlaməna gəl tasaka à gəl, tadaha sləray la ahəl aŋatà, kà atà aŋa mazlak azlauwana tanəkudə tatak babay. ²⁹ Pəhàw kà azlagay uwana tazigəŋ azladza anik, awkà kapəhaw azlagay deydayga aw; la tetəvi aŋa Zəzagəla la ama kà, pəhàw kà azlagay uwana azladza taslay kà aŋa matsəbal sləm lela. ³⁰ Kavàw ŋərpə à Masasəfok Zəzagəla, uwana la ləv aŋkul la tsəh aw. Masasəfok uwaga kà, masəlay uwana Zəzagəla afà à akul à vok, kà masla mapəhla ala kà akul azlaaŋha. Apəhla ala babay kà bawbaw, kà adəbəl anu aŋa tetuwa. ³¹ Səwla azlatatak dəhakakga à uda la ləv aŋkul la tsəh gesina la maf dza à ləv à abà la mapak ləv. Kabayaw vok gay aw, katsakaw vok magodəhay à gəl aw, ŋgaha bay, kagaw azlaməna makəsəfər aw. ³² Gəw tələmma la slaka azladza anik, dəhàw delga à azladza anik babay aya, matsahawwaŋ à vok ala, kà à akul à akul, kà tatak uwana Kristu adfahəŋ kà aŋkul.

5

Maday la uƒaka la abà

¹ Lagonay, kagaw azlabəza aŋa Zəzagəla, uwana awoya akul. Tsa kiya uwanay kà, gəw bokuba masla. ² La azlatatak gesina uwana la abà kadahaw à waŋ kà, wəyàw azlaməna magay aŋkul bokuba uwana Kristu awoya anu. Mamətsay uwana akəs kà, kà masla mapakay bokuba tatak matuwulla à anu à gəl, uwana akəs à Zəzagəla à gəl.*

³ Lagwa kà, kagaw azladza aŋa Zəzagəla. Kadahaw mabila la azlatatak mawisiga anik anik babay aya aw. Kafaw yewdi à tatak aŋa azladza à tsəh aw. Bamərika bə mapəh gay lakəl aŋha kà, kapəhaw aw, ziruwi. ⁴ Delga kà aŋa mapəh azlagay ziruwiga aw, kusoŋu, ŋgaha la azlamatsakasl à gay deydayga kà delga aw. 'Kikay', gədfəw kà à Zəzagəla pəra kà tatak uwana adfahəŋ. ⁵ Sələw kà, azlaməna mabila, ŋgaha la azlaməna madəh tsəhay tatak mawisiga uwaga, azlauwana tafa yewdi à tatak aŋa azladza à vok, la azlaməna masləkaw mazlazlay, la azlaməna huŋwa kà atà babay, tadəbəza makoray aŋa Zəzagəla la aŋa Kristu tetuwa aw, kà uwana azlatatak uwaga tahəf à atà à adi dəfəwa gay Zəzagəla.

⁶ Azladza tavavara akul la azlagay deydayga aw, kà azlatatak mawisiga uwaga la uwana Zəzagəla apakà ləv, ŋgaha apaka ləv gesina lakəl aŋa azlauwana takweska gay aŋha. ⁷ Kità kà, katapaw ahəl à kəsəf à abà akul nna aw. ⁸ Uwarà kà akul la mələs la abà. Ama lagonay kà, akul la uƒaka la abà, kà uwana akul azlaaŋa Sufəl Yesu. Kiya uwaga kà, nəfəw maday aŋa azlauwana atà la uƒaka la abà. ⁹ Uwana gəgodf uwaga kà, kà uwana uƒaka kà avə azlatatak delga gesina, azlatatak dziriga, ŋgaha azlatatak dzəba aŋha səla aw gə. ¹⁰ Wədfəw vok à uda, kà akul aŋa masəl azlatatak uwana akəs à Sufəl Zəzagəla à gəl. ¹¹ Kafaw ahəl aŋkul à sləray aŋa azladza uwana à abà, tadəh sləray mələs aw. Ama pəhəwatəla sləray mawisiga aŋatà, uwana tadəhəŋ la dazuwaya. ¹² Azlatatak uwana tadəhəŋ la gəl la gəl kà kiya katsal à gay aw, ziruwi. ¹³ Baŋa tapəhla azlatatak uwaga ala gesina la paraka kà, kanəŋaw madz à ahəŋ aŋatà. ¹⁴ Kà uwana dəwdəw tatak uwana adapəhla vok ala, kà uƒaka. Gay gə la uwaga à uwana tagəf:

'Tsən ala à kak uwana kadzehəl,

* 4:24 4.24 1Musa 1.26 * 4:25 4.25 Zakari 8.16 * 4:26 4.26 Mahabay 4.4 * 5:2 5.2 2Musa 29.18; Mahabay 40.6

Sà à afik la mamətsay la abà,
Kà Kristu aña mav à ka ufaka!'

¹⁵ Kiya uwaga kà, akul kà dəhàwwàŋ kà delga pəra, kəla kaslà gesina, dəhàw haŋkəli la maday aŋkul, kadaw bokuba maday aña azladza uwana tasəl tatak aw aw, ama dàw kà bokuba azladza matsihilaga. ¹⁶ La məlo uwanay azladza tađàh azlatatak mawisiga aŋuvaw kà, akul kà, dəhàwàŋ kà delga pəra kəla kaslà gesina. ¹⁷ Kagaw azlakusonju aw, ama fàw sləm à ahəŋ kà matsən tatak uwana asa à Sufəl gami kà madəhəŋ.

¹⁸ Guzu akad à akul aw, kawisaw vok aŋkul ala aw. Gàw kà say mahənlaga la Masasəđok Zəzagəla pəra. ¹⁹ Həbàw azlamahabay aña Zəzagəla, ŋgaha azlamahabay anik, uwana Masasəđok avà à akul. Həbàw uwaga à Sufəl gami, zləbàw masla la ləv aŋkul gesina. ²⁰ Kikay, gòdàw à Zəzagəla Baba, kà azlatatak gesina la sləm aña Sufəl gami Yesu Kristu. Kikay, gòdàwwal la kaslà gesina.

Azlamis la azlazil

²¹ Akul uwana kadiŋaw gəl à Yesu Kristu à vok, kəsàw vok gay la ahəl ala kà akul à akul, bokuba uwana kadəhàwwàŋ à Kristu.

²² Akul azlamis, kəsàw gəl à ahəŋ la huma aña azlazil aŋkul, kiya uwana kakəsaw gay aña Sufəl Yesu. ²³ Kà uwana zil kà sufəl aña mis aŋha, bokuba Kristu uwana Sufəl aña maham à ahəŋ məna madiŋal gəl à vok. Kristu la uwana gəl gə, maham à ahəŋ məna madiŋal gəl à vok kà, kà vok aŋha, ŋgaha masla la uwana masla abəl atà. ²⁴ Tsa baña kiya uwanay kà, azlamis takəsa gəl à azlazil aŋatà à ahəŋ lela bokuba maham à ahəŋ məna gay Zəzagəla, uwana akəs à gəl à Yesu Kristu à ahəŋ.

²⁵ Akul azlazil, wòyàw azlamis aŋkul babay, bokuba Yesu Kristu uwana awoya azladza aŋha, ŋgaha aməts kà aŋatà. ²⁶ Aməts, kà maham à ahəŋ məna gay Zəzagəla aña magay aña Zəzagəla aña tetuwa. Apallàŋ ala la iyaw ŋgaha la gay aŋha. Kiya uwaga taga tsikaslaga kà Zəzagəla. ²⁷ Kà uwana asal kà atsa à waŋ à huma aŋha, la mazləbay kokudə aləh, tsidfaŋa lela, kokudə mawisiga, sərđaka kokudə madəbani à tatak anik. ²⁸ Azlazil à bay kà kiya uwaga. Akul azlazil, wòyàw aŋkul bokuba uwana kawoyaw gəl aŋkul, dza uwana awoya mis aŋha kà, awoya gəl aŋha babay. ²⁹ Dza la ahəŋ, aslala vok apəsew vok aŋha aw, say avəl tatak may, afal sləm lela bokuba uwana Kristu afa sləm à azlaməna maham à ahəŋ məna gay Zəzagəla. ³⁰ Kà uwana anu gesina, mədagay bokuba vok aŋha, bokuba uwana tatsətsər à wakità Zəzagəla à abà: ³¹ 'Kà uwaga zil asak baba aŋha la iyà aŋha, kà atà aña maham gay à vok la mis aŋha, atà səla aya aw, tapakà vok tekula.'* ³² Gay uwanay kà atapànula tatak dzəba aŋha səla aw gə. Apəhay kà lakəl aña Kristu la maham à ahəŋ məna madiŋal gəl à vok aŋha. ³³ Kiya uwaga kà, aŋkul babay. Kəla uwabeyuwi aŋkul awoya mis aŋha, bokuba uwana awoya gəl aŋha. Azlamis kəsàw gay aña azlazil aŋkul.

6

Azlabəza la azlababa aŋatà

¹ Azlabəza, kəsàw gay aña azlababa aŋkul la azlaiyà aŋkul. Delga kà azlauwana tahamà gay à vok la Sufəl Yesu tađəhəŋ kiya uwanay. ² Tekula aña azlamapəhay agod:

'Kəs gay aña baba la iyà aŋak!'

Mapəhay uwaga kà mapəhay matera, uwana Zəzagəla azàŋ à uwana à adi, apəh à ahəŋ. ³ Uwaga agòd kà:

'Baña kasləkaw atà kà, adagay delga kà aŋak, kadàsafay məŋga la gudəŋ uwanay la vok.'*

⁴ Akul azlababa aña azlabəza, kadàhawla ləv à azlabəza aņkul à hud' aw, dzadzaraw atà lela. Tapawatàla azlatatak, tsetsehawatàla, bokuba uwana Sufəl Yesu apəh à akul ala tetəvi.

Azlamayà la azlaməŋga aņatà

⁵ Azlamayà kəsaw gay aña azlaməŋga aņkul la gudəŋ uwanay la vok. Tsənaw atà. Ŋgaha hōyàw yewdi aña atà, sèklàw la huma aņatà, dāhàw sləray la ləv tekula. Aņhà kiya uwaga kà, kakəsaw Kristu. ⁶ Kadāhaw sləray kà huma yewdi aņatà pəra bokuba aña azlauwana asa atà kà azladza aña mazləb atà aw. Sèlāw kà, akul azlaməna sləray aña Kristu, ŋgaha dāhàw azlatatak uwana asa à Zəzagəla gesina la ləv tekula. ⁷ Dāhàw sləray la ləv tekula bokuba uwana naka kadāhaw sləray aña Kristu, awkà bokuba uwana kadāhaw sləray aña azladza aw. ⁸ Sèlāw kà, kəla azlatatak delga, uwana dza afehəŋ kà, Sufəl Yesu Kristu adəpəlal. Adəgay mayà, adəgay masla makor gəl. ⁹ Akul azlaməŋga aña azlamayà, dāhàw delga à azlamayà aņkul babay, kafaw atà gasa à gəl aw, kà uwana kasəlaw kà, gesina aņkul kà, akul aña madzahaga tekula uwana la zagəla la afik. Masla kà avah dza mavəhay aw.*

Kazlaŋa aña guvəl

¹⁰ Gay gulo uwana asa à gi makəfəlla gəl kà, gəw la ndzəfa la ahəl aña Sufəl gami, la ndzəfa məŋga aņha la abà. ¹¹ Hèlāw kazlaŋa aña guvəl uwana Zəzagəla abək à akul gesina, kəsəwwəŋ la ahəl, kà akul aña mapəlla guvəl la seteni, kà aña seteni apapat akul, kà akul aña mahəl la ahəŋ la masla. ¹² Guvəl uwana məpay kà, məpay kà la azladza aw, məpay kà la azlamasəsəfok mawisiga, ŋgaha la azlasufəl aņatà, uwana takor gudəŋ à vok mawisiga uwanay, məpa guvəl la azlatatak mawisiga gesina, uwana atà la ndzəfa la afad' la abà la zagəla. ¹³ Hèlāw kazlaŋa aña guvəl, uwana Zəzagəla abək à akul gesina, baŋa guvəl uwana akəl akəl gə, kà akul aña mahəl la ahəŋ. Atà aña magəf' ndzəfa à afik, ŋgaha kà aņkul aña masakala slaka aw. ¹⁴ Kità kà, dāhàw vok à ahəŋ, gəw azladza dziriga, azlatatak dziriga kà kalkal la parapara, uwana kawad'la vok ala nəts, kà akul aña mad'ah vok à ahəŋ lela. Dəw la tetəvi dziriga aña Zəzagəla la ama, kà uwana baŋa kadāhawwəŋ kiya uwaga kà, adapakay kà bokuba slarəpay makəla, uwana kawad'ahawla vok ala, kà madz akul à ama. ¹⁵ Zəw gay marabəŋ, uwana av lapiya à azladza kokud'ə may vok, uwaga kà kalkal bokuba uwana kabəkaw kwimik à asik kà maday la lela la tetəvi aña Zəzagəla la tsəh. ¹⁶ Vəw ləv aņkul à Sufəl Yesu la kaslā gesina, bokuba uwana guloku aga akul la ahəl, kà godam uwana seteni amal à wəŋ, aña mabəz akul aw. Bamərika magur adəgay la godam uwaga lakəl bay, kà guloku adzalla à ama. ¹⁷ Tatak uwana Zəzagəla atəfla à akul kà kalkal huməz gəl aña guvəl, uwana tafa à gəl kà madz à gəl à ama, ŋgaha zəbàw katsakar aña Masasəfok, uwana Zəzagəla avà à akul babay, uwaga kà gay Zəzagəla.* ¹⁸ Dəvəw kud'ə à Zəzagəla la ləv tekula la kaslā gesina, kəlāw gay la ndzəfa aña Masasəfok. Dzəw à ahəŋ la adi, karuwaw vok ahəŋ aw, dəvəw kud'ə koksikoksi, kà azladza aña Zəzagəla gesina. ¹⁹ Dəvəw kud'ə à Zəzagəla kà aņulo babay, kà Zəzagəla aña mav à gi gay dziriga uwana gədəpəhay, ŋgaha kà gi aña maz gay marabəŋ kokud'ə guba, kà gi aña mafətal à adi ala la paraka. ²⁰ Kà gay marabəŋ uwaga Yesu Kristu afə gi à ahəŋ, kà masla masləl gi aņha, kà gi aña mad maziŋ à azladza anik, bamərika gədəgay la dəŋay bay kà, kà guba aña makəs gi aw, kà gi aña mapəhay la dazuwəya, bokuba uwana asa à Zəzagəla gəpəhay.

Ayyi makəf' gəl à ahəŋ

²¹ Tisik, deda gami uwana məwoyaŋ, ad'ah sləray aña Sufəl gami la ahəl səla, adəpəh à akul madz à ahəŋ gulo, kà akul aña masəl uwana gəfəhəŋ gesina. ²² Uwana

* 6:9 6.9 5Musa 10.17 * 6:17 6.17 Yesayya 11.5; 52.7; 59.17

gəsləl masla à slaka aṅkul kà, kà akul aṅa masəl madz à ahəṅ gami, ṅgaha kà masla aṅa madzərədfàh akul à uda babay.

²³ Zəzagəla Baba, la Sufəl gami Yesu Kristu tavà à akul lapiya, à akul azladedə gesina kà, kasəlaw mawoy vok kà akul à akul, ṅgaha kadiṅaw gəl à Yesu Kristu à vok. ²⁴ Vok mahamay aṅa Zəzagəla agay la azladza uwana tawoya Sufəl gami Yesu Kristu, la masal uwana adəv à gay aw.

WAKITÀ UWANA POL ATSETSÈR À AZLA FILIPIYA Lettre de Paul aux Philippiens

Ayyi

¹ Gi Pol anu la Timotawus uwana anu azlaməna sləray aŋa Yesu Kristu, à uwana mətsetser à akul wakità uwanay.

Mətsetseray kà akul azlaməna madiŋal gəl à Zəzagəla à vok la Filipiya, akul gesina uwana akul la ahəl aŋa Yesu Kristu. Mətsetser babay à azlamasiga, ŋgaha à azla-uwana tadàh sləray la tataka aŋkul la abà, à akul məna madiŋal gəl à vok babay. ² Zəzagəla Baba la Sufəl gami Yesu Kristu tapisakulla gay à vok la mav à akul lapiya.

'Kikay', Pol agod à Zəzagəla kà aŋatà

³ Kəla uwana gədzugw à akul, 'Kikay', gəgodàh à Zəzagəla kà akul. ⁴ Kəla uwana gədəw kufa à Zəzagəla kà aŋkul kà, gəvalàh à zagəla. ⁵ 'Kikay', gəgod à Zəzagəla, kà uwana mədaham gay à vok anina dagay la madzəka à mok uwana kapakàw azlaməna manəfay tsərəh à lakana. ⁶ Ndzer, gəsəl kà Zəzagəla, uwana adzəkà madfàh sləray delga la ləv aŋkul la tsəh, adakedal gəl à ahəŋ, adahənəŋ ala la mavakay, uwana Yesu Kristu adàwul à waŋ. ⁷ Delga à uwana gədzugway kiya uwanay lakəl aŋkul, kà uwana gəwoya akul la ləv tekula, kà uwana anina kà, Zəzagəla adahəŋ delga kà akul aŋa mazlak gi la kaslā uwana gəga la daŋay, à mok uwana gəpəh gay marabəŋ la huma aŋa masla seriya, gəgəd à dziriga à afik. ⁸ Zəzagəla asəl kà gəpəh fida aw, gəwoya akul kaykay, Yesu Kristu la gəl aŋha, uwana la gi la abà, la uwana awoya akul.

⁹ Gədəw kufa à Zəzagəla kà akul aŋa mawoy vok kà akul à akul kaykay, ŋgaha kà kadəsəlaw dziriga, kà akul aŋa masəl azlatatak delga gə la azlatatak mawisiga. ¹⁰ Kasàwàni azlatatak delga gə kiya uwaga, ŋgaha kadəgaw sətaka, ŋgaha dza aŋa maslèh à akul ala vok la mavakay uwana Kristu adàwul à waŋ aw. ¹¹ Kadàdāhahaw azlatatak delga gə la ndzəda aŋa Yesu Kristu pəra. Azladza uwana tadənəŋ uwaga kà, tadəzləb Zəzagəla tadəsləkaway babay.

Tatak uwana aduwan gesina kà: Say Yesu Kristu

¹² Azladedə gulo, asa à gi kà kasəlaw, kà azlatatak uwana tabəz à gi, adala gay marabəŋ à huma à gay haday, uwaga kà akəsəŋ à ahəŋ aw. ¹³ Kà uwaga à uwana azlaslodzi uwana tanaŋla gəy aŋa sufəl aŋa azla Rom, la azladza anik gesina tasəl kà: Gi la daŋay kà Yesu Kristu. ¹⁴ ŋgaha aya adzərədəh azlaməna madiŋal gəl à vok ala aŋuvaw la tetəvi aŋa Sufəl gami Yesu la tsəh, kurit yewdi agod à atà aw, taslala vok aŋa mapəh gay Zəzagəla la dazuwaya.

¹⁵ Azladza anik aŋatà tapəhay lakəl aŋa Yesu Kristu kà, kà uwana maŋor aza à atà kà gi, asa à atà mas à gi ŋgərpa. Ama kà aŋa azladza anik kà, taza gay Zəzagəla la ləv tekula. ¹⁶ Tadəhəŋ kiya uwanay kà, kà uwana tawoya gi, kà uwana tasəl kà Zəzagəla la uwana asləl gi à waŋ à abanay, kà maz gay marabəŋ à azladza la dziriga. ¹⁷ Ama azladza anik uwaga kà, tapəh gay aŋa Yesu Kristu kà, kà uwana asa à atà magay mənğa kà gi, tapəhay kà la matsəp gay à gay, tayàh maz à gi à ŋgərpa à abà la daŋay.

¹⁸ Kà madəhəŋ kiya uwanay kà, aza à gi aw. Amiyaka tadəpəhay la ləv delga, baməraka la ləv mawisiga, taziŋ kà gay aŋa Yesu Kristu: ŋgaha gərabay kà uwaga. Bə la dziri gəda à huma à gay la marabay kà uwaga. ¹⁹ Kà uwana gəsəl kà azlatatak

uwaga gesina adàpaka à vok, Zəzagəla adətəf gi la uwaga, kà uwana kadəvaw kufa kà gi, ngaha aya Masasəfok aña Yesu azlak gi babay. ²⁰ Tatak uwana gəfa madzugway gulo à afik, à gəkuday kà, kà makəlla gi ziruwı à gəl tetuwa aw, ama kà gi aña madzərəf ala la abà, ngaha asa à gi kà lagonay, banaw la kaslà gesina, banə gi la sifa, baməraka gədamətsay, azladza aña masləkaw Yesu Kristu kà gi. ²¹ Kà añulo kà, baməraka gədàgay la sifa, Yesu Kristu aduwan, ngaha mamətsay kà masik gulo. ²² Banə gədza à ahəñ la sifa kà, gədàfah sləray uwana adàzlaka azladza. Lagwa kà, gəsəl tetəvi uwana gəkəsani aw. ²³ Azlatatak səla uwaga tagazlla gi à gəl. Gi kà, gəwoyan kaykay kà say mamətsay, kà gi aña mad manəñ Yesu Kristu uwaga la uwana aduwa vok kà madz à ahəñ la sifa. ²⁴ Ama banə gədza à ahəñ la sifa, uwaga akəsa vok kà akul. ²⁵ Gəgəfan à afik kà kiya uwanay gəgod à gi, gəsəl babay kà gədàdza à ahəñ la sifa, ngaha mədàdza à ahəñ anina. Ngaha madz à ahəñ la tetəvi aña Zəzagəla la tsəh aña mad à huma à gay, ngaha kà akul aña marabay. ²⁶ Kità kà, banə gədasa à uda la danay, la mok uwana mədàgay anina aya kà, kadàzləbaw Yesu Kristu mənğa kà gi.

²⁷ Aganay à tatak uwana akəsa à vok, nəfàw tetəvi bokuba uwana gay marabəñ aña Kristu apəh. Baməraka gədàda à awtày à slaka aņkul, baməraka gədàda à awtày aw, gətsenəñ kà kadzaw à ahəñ la pañaw tekula, ngaha kà kadəhaw sləray la ləv tekula, kà gay marabəñ aña mad à huma à gay. ²⁸ Guba akəs akul kà azlaməna məzam aņkul aw. Banə guba aza à akul aya aw kà, atà tadəsəlay kà tadàzila, ama akul kà, Zəzagəla adaəəl akul, masla la uwana adapəhatàla uwaga. ²⁹ Zəzagəla avà à akul tetəvi kà madin gəl à Yesu Kristu à vok, ngaha kà mas ngərpa kà Yesu. ³⁰ Kanəñaw guvəl uwana gəpəh. Lagonay aya katsənawwan kà gəpay aya, ngaha akul babay kadadaw à abà aña mapay.

2

Nəfàw madz à ahəñ aña Yesu

- ¹ Tsa khamaw gay à vok la Yesu, kà akul la ndzəfa, tsa awoya akul kà, akul la ndzəfa. Tsa khamaw gay à vok la Masasəfok Zəzagəla la abà kà, wòyàw vok kà akul à akul, ngaha vok ahamà akul kà akul à akul babay. ² Tsa banə kiya uwanay kà, wòyàw vok kà akul à akul, gəw la madzugway tekula, hamàw gay à vok, ngaha gəw la pañaw tekula, banə kadəhawwan kiya uwaga, gədàfəf gay ləv. ³ Kadzugwaw kà à gəl aņkul pəra aw, kadəhaw zlapay aw, wùlāwla gəl à vəfah, nəñəwwəñ azladza anik kà bokuba taduwa akul. ⁴ Kəla uwabeyuwi adəha delga à azladza anik, awkà kanərezaw gəl aņkul pəra aw. ⁵ Dzàw à ahəñ bokuba uwana Yesu Kristu adzà à ahəñ. ⁶ Haday kà, masla kà tekula la Zəzagəla, ama mañor akəs, kà masla aña magagazləla gəl aña la Zəzagəla aw.
- ⁷ Asàk à uwaga gesina, apakà mayà la tatak gesina la abà, apakà dza. Uwana adapaka dza kà,
- ⁸ awùlla gəl à vəfah, akəs mapəhay aña Zəzagəla, akəs mamətsay zlazladaga, amətsay à ahəf à adi.
- ⁹ Gay gə la uwaga, Zəzagəla afà à slaka mazləbay gə à abà, avəl sləm uwana aduwa azlasləm anik gesina.
- ¹⁰ Kà azlatatak uwana la zagəla, la azlauwana la vəfah, la azlauwana la tsəh iyaw gesina, la mok uwana tadətsən sləm aña Yesu, gesina aņatà tadàsa à wan, tadəkədəfal à ahəñ.
- ¹¹ Ngaha gesina aņatà tadəpəhay la dazuwaya, kà Yesu Kristu kà Sufəl lakəl aña tatak gesina. Kiya uwaga tadàzləb Zəzagəla Baba.*

* 2:11 2:11 Yesayya 45:23

Udàw bokuba azlatsetsiliŋ la gudəŋ la vok

¹² Azlaməna gay ləv gulo, kəsəw gay Zəzagəla. Uwarà, mok uwana mөгà la slaka gə, kakəsaw gay aŋha. Lagwa kəsəw gay aŋha dafuwa à gay, uwana gi la slaka aŋkul. Uwaga asal magodəy, kà Zəzagəla adahəl akul, dahàw sləray la masəkulay, la dziriga. ¹³ Kà uwana Zəzagəla adadzəka madəh sləray la akul la abà, kà akul aŋa mawoy azlatatak uwana akəs à masla à gəl, ŋgaha kà akul aŋa madəh atà.

¹⁴ Kəla sləray gesina uwana kadahawwəŋ kà, kaŋoŋuzaw, kagazlaw aw. ¹⁵ Kà akul aŋa magay sətaka, lela, ŋgaha akul aŋa magay azlabəza aŋa Zəzagəla kokudə tatak mawisiga la akul la abà. Akul la tataka aŋa azlaməna fida la abà, la azlamawisiga, gəw la tataka aŋatà bokuba azlaudəka uwana taudəy.✧ ¹⁶ Baŋa kadahawwəŋ kiya uwaga kà, akul kapəhaw atà gay uwana av sifa. Ŋgaha la mavakay uwana Yesu Kristu adàsa à ahəŋ kà, gəfədəf gay ləv la huma aŋha kà akul, kà uwana apəhla sləray dzaŋdzaŋga uwana ala, gədahəŋ kà apaka deyday aw.

¹⁷ Ləv uwana kavəw à Yesu, kà kalkal bokuba makəf tatak uwana kakəfaw à Zəzagəla: Zlahaw tadəkəf gi, ŋgaha aŋiz gulo adəhama à makəf tatak delga aŋkul uwaga à abà. Baŋa apaka kiya uwaga kà, gədagay la marabay, mədədəf gay ləv la slaka gə. ¹⁸ Gəw la marabay ŋgaha mərəb anina babay.

Timotawus atà la Epafərodit

¹⁹ Baŋa 'Ayyà', Sufəl Yesu agod kà, gədəsləl Timotawus à awtəy à slaka aŋkul, ŋgaha masla adədzərədgəla bokuba uwana adzərəfakulla bay. ²⁰ Dza la ahəŋ la slaka gulo, uwana adzugway bokuba aŋulo aw, say masla pəra. Masla kà, adzugway kà akul pəra. ²¹ Azladza anik kà, tadzugway kà à gəl aŋatà pəra, awkà tadzugw lakəl aŋa azlatatak aŋa Yesu Kristu aw. ²² Timotawus kà masla kà, kasəlaw maday aŋha kà delga. Anu, anu səla kà mədəh sləray la slaka gə kà aŋa gay marabəŋ, masla azlaka gi à azlasləray à abà, bokuba uwana bəzi azlaka Baba aŋha à sləray à abà. ²³ Gəfa kəla gəl à ahəŋ, kà seriya gulo adədəv à gay, kà gədəsləlla à awtəy à slaka aŋkul katskats. ²⁴ Gi babay kà, baŋa asa à Zəzagəla kà, gədàda à awtəy à slaka aŋkul zewk.

²⁵ Deda gulo Epafərodit, masləlay aŋkul, uwana kaslələw à gi à wəŋ, kà mazlak gi la azlatatak uwana gənəkudə aŋha, mədəh sləray la slaka gə, məpa guvəl la tsəh ala, gədzugw lagonay kà delga, kà gi aŋa mawul à akul à awtəy aya. ²⁶ Kà uwana atəw akul à tsəh kà manəŋ akul. Gəl adakadəl à vok, kà uwana asəl kà, katsənəwəŋ kà agə la dufats. ²⁷ Hadəy kà, dufats akəd kudə kudə, awkà naka amətsay. Vok ahamà à Zəzagəla kà aŋha, ama kà masla pəra aw, ama kà gi babay, à uwana awurəŋ ala kà gi aŋa mazaw la gəl aw. ²⁸ Kà uwaga à uwana asa à gi kayakay kà gəwulla à slaka aŋkul, kà akul aŋa manəŋ masla la marabay, ŋgaha ləv gulo aŋa mataslla. ²⁹ Baŋa adàda à awtəy kà, kəsəw masla la ahəl səla, kà uwana masla kà, deda aŋkul la tetəvi aŋa Sufəl gami la tsəh. Sləkəwəw tsəhay dza uwaga. ³⁰ Kà uwana aləg kà ŋuv ŋuv, awkà naka amətsay à sləray aŋa Kristu à abà. Atəw sifa aŋha aw kà, kà masla aŋa mahən uwana ala atəm à ahəŋ la slaka aŋkul la abà kà aŋulo.

3

Tetəvi uwana adala dza à dziriga aŋa Zəzagəla à abà

¹ Azladedə gulo, aganay tatak uwana gəkəfla gəl à gay gulo, vələhəw à zagəla, kà uwana akul azlaaŋa Sufəl Yesu. Gəy vok aw, gay uwana gəpəh à akul uwarə gəwəllal à tsəh aya, ŋgaha uwaga adəzlaka à akul kà tatak madəhakullaŋ mawisiga à vok aw.

² Dahəw haŋkəli la azlakəda, kà uwana azladza uwaga tadəhəŋ kà sləray mawisiga, takad gəl à azladza à vok. Tadzugway kà lakəl aŋa makadav azladza à uda pəra.

³ Anu la uwana, anu azlaməna makadav vok à uda dziriga, awkà atə aw. Kità kà,

✧ 2:15 2.15 5Musa 32.5

anu la uwana anu tsəhay aña Zəzagəla. Anu la uwana mədəv kuda à Zəzagəla la ndzəfa aña Masasəfok tsikasla, ngaha məzləb Yesu Kristu, mēfà madzugway gami à madz à ahəŋ aña azladza à abà aw. ⁴ Agayña azlatatak aña gudəŋ à vok uwanay akəs vok kà, naka gəslala vok aña maf madzugway gulo à uwaga à afik bay. Baña dza aslala vok aña madh, uwana azladza gudəŋ à vok tadehəŋ, gi kà, gəsəl kà, dziriga gulo aduwan aña. ⁵ Gi kà, kà uwana gəgəfəŋ à afik kà, gi zil Ibəranəŋkowen slilihga, uwana azla Ibəranəŋkowen tayyà gi. Ngaha aya kà, gi zil Isərayel, gəsà à uda la tsəhay aña Benyamin. Mok uwana tayyì gi, la lig mahənay mtəgis, takədəv gi à uda, mayahudiya à Yahudiya. Gi tekula aña azla Farisəya. ⁶ Gənəfà mapəhay gami lela, tsərəh à uwana gətərəbàhà azlaməna madinjal gəl à Yesu à vok, ama mapəhay aña azla Yahudiya kà, gəpəsəw amiyaka tekula aw, ndzer, gəgà matsizlla à ahəŋ gə la uwaga la abà la lela. ⁷ Gənərəz kà azlatatak uwaga kà apakà kà bokuba mazəb sili təla gulo, ama lagonay kà, kà Yesu Kristu gədasəlay kà, uwaga apakay bokuba azlatatak deyday. ⁸ Ndzer gəpakà azlatatak uwaga ala gesina kà deyday, kà uwana gədasəl Sufəl gulo Yesu Kristu uwana aduwan azlatatak anik gesina. Kà masla la uwana gədakweska uwaga gesina. Gədapaka azlatatak uwaga ala, bokuba azlaaləh, kà gi aña mabəz Yesu Kristu, ⁹ ngaha kà gi aña magay aña aña tetuwa. Gi dziriga la huma Zəzagəla, kà uwana 'Gəkəs mapəhay aña azla Yahudiya', gəgod aya aw. Tatak uwana agà à gi dziriga la huma aña kà, kà uwana gədiŋ gəl à Yesu Kristu à vok. Zəzagəla la uwana apakagəla dziriga, kà uwana gədiŋ gəl à masla à vok. ¹⁰ Uwaga asa à gi kà tatak tekula pəra, uwaga kà masəl Kristu, ngaha ndzəfa aña uwana awulla à uda la mamətsay, kà asa à gi babay kà, gəsa ngərpa bokuba uwana asəh, ngaha gəkəs gəl à ahəŋ bokuba aña uwana akəsà gəl à ahəŋ, akəsa mamətsay. ¹¹ Baña asa à Zəzagəla kà, awulla gi à uda la mamətsay bokuba aña bay.

Mahoyay à gay kabaw

¹² Gəgod magay kà: 'Gədabəza azlatatak uwana gəkuday', gəgod aw ngaha: 'Gi masla tsakana aya aw', gəgod aw, ama kà aña uwaga kà: 'Gəda à huma à gay kà azlatatak uwaga aña magay azlaanulo. Kà uwana Yesu Kristu adazəba gi à ahəl aña.' ¹³ Azladedə, gəgod kà: 'Azlagulo gədabəzal adagay', gəgod aw. Tatak tekula uwana gəfahəŋ kà, tatak uwana la ləv gulo gesina avika gi, gəwad vok à uda, kà mabəz tatak uwana akud gi la huma. ¹⁴ Gəda à huma, kà mabəz à gay kabaw, kà gi aña mabəz masik, uwana Zəzagəla azalla anu aña mabəzal. Masik uwaga madz à ahəŋ la zagəla la masla, kà Yesu Kristu. ¹⁵ Anu uwana mədapakəh makoz la tetəvi aña Zəzagəla la tsəh kà, delga mədzugway kiya uwanay. Baña mədzugway anik la ləv ankul la tsəh, kà Zəzagəla adəpəhakulla la dazuwaya. ¹⁶ Tatak mənğa kà, məda à huma à gay la tetəvi uwana la tsəh anu la ama, tsərəh à lakana.

¹⁷ Azladedə gulo, nərəzəw maday gulo, nərəzəw kà azladza uwana taday lela, bokuba uwana kanəŋaw maday gami. ¹⁸ Azladza anuvaw la ahəŋ, à uwana maday anətà apəhla ala kà, kà atə azlaməna məzam aña Kristu, uwana aməts à ahəf à adi. Gədapəh à akul uwanay kà asik dəŋ, lagwa kà gəpəh à akul aya, gəpəh à akul kà la iyaw tugwi la adi. ¹⁹ Baña kaslā anətà adədəv à gay kà, tadàda à akāl à abà, kà uwana tanəfà tatak ziruwì gə, ama tarabay lakəl aña uwaga, tadzugway kà azlatatak aña gudəŋ à vok uwanay pəra. ²⁰ Ama anu kà, anu azlaməna gay aña Zəzagəla, məkud Sufəl gami Yesu Kristu, masla mabəl anu, uwana atsa à ahəŋ la zagəla. ²¹ Baña adəsa à ahəŋ kà, adəbədla vok gami gubgubga uwanay, kà vok gami aña mabəz ndzəfa bokuba aña. Adədah uwanay kà la ndzəfa aña masəlay, uwana abək tatak gesina à tsəh à asik aña.

4

Sawaray makədf gəl à ahəŋ

¹ Azladede gay ləv gulo, baŋa kiya uwanay kà, dzàw à ahəŋ la titi la abà, tsa akul azlaaŋa Sufəl. Azladede gəwoya akul kà kaykay, asa à gi mədànəŋəŋ akul aya. Gədfəf gay ləv kà akul, akul la uwana kapəhawla kà sləray gulo ala kà delga, à uwana gəts zlapay.

² Evodiya atà la Səntis, kamkam gəgod à akul tsa akul azlaaŋa Sufəl Yesu kà, tsənàw vok gay lela. ³ Kak deda gulo uwana mədfahàw sləray la slaka gà, kamkam, zlakà azlamis uwana anina, kà mədfàh sləray məŋga la məs ŋgərpa kà gay marabəŋ aŋa mad à huma à gay. Anina la azla Kələment ŋgaha la azlaməna sləray anik, mədfàh sləray la slaka gà. Zəzagəla atsetseràh sləm aŋatà à wakità aŋa sifa adəv à gay aw à abà. ⁴ Tsa akul azlaaŋa Sufəl Yesu kà: Vələhàw à zagəla la kaslà gesina! Gəgod à akul aya: Vələhàw à zagəla!

⁵ Pəhàwla dzəba aŋha səla aw aŋkul ala la huma, kà azladza aŋa masəlay kà Sufəl kà nekwa atsa à ahəŋ! ⁶ Kadzugwaw à azlatatak deyday aw, ama lakəl aŋa tatak uwana aga la ahəŋ aw kà, pəhàwla à Zəzagəla à uwana asa à akul la madəv kuɗa kà mazlak akul, 'Kikay', gədfəwwal bay. ⁷ Baŋa kadahawwəŋ kiya uwaga, Zəzagəla adàvə à akul lapiya. Lapiya uwaga kà, aduwa azlatatak uwana azladza tatsənà. Adənəŋla ləv aŋkul la madzugway aŋkul, ŋgaha kà tatak aŋa maβəz akul aw, kà uwana akul azlaaŋa Yesu Kristu.

⁸ Azladede, tatak uwana gəkəɗla à gəl kà aganay: Dzùgwàw kà lakəl aŋa azlatatak uwana delga kà azladza masləkaway. Uwaga kà azlatatak dziriga à uwana məkəs atà, azlatatak uwana dziriga la tetəvi aŋha, sətaka, la azlatatak uwana akəs à azladza à gəl məsləkaw kà atà pəra. ⁹ Azlatatak uwana gətəpakulla, ŋgaha kakəsàw atà, uwana katsənàwwəŋ la paŋaw gulo, ŋgaha uwana kanəŋàwwəŋ kà gədfəhəŋ, ɗahàwwəŋ kiya uwaga! Ŋgaha Zəzagəla uwana avàh à anu lapiya adàdza à ahəŋ la akul.

'Kikay', Pol agoɗf à azla Filipiya kà tatak uwana tazlakà

¹⁰ 'Kikay', gəgod à Sufəl Yesu la marabay məŋga, kà uwana kadzùgwàw à gi gotənaŋ. Ndzer dagay uwarà kà, kadzùgwàw à gi, ama kaβəzàw à tetəvi kà mazlak gi aw, la kaslà uwana ada à lig. ¹¹ Uwana gəpəh uwaga kà, kà uwana azlatatak anik taləg kà gi à wəŋ aw, ama kà uwana gədatapla madz à ahəŋ la marabay la abà, baməraka adagay bà la kaslà uwala beyli. ¹² Gəsəl uwana gəɗza à ahəŋ, à baŋa tatak adadəv à gay, gəsəl madz à ahəŋ babay, à baŋa tatak gulo la ahəŋ. Gədatapla madz à ahəŋ la kuɗa la abà, gəɗàgay la tatak may, amiyaka gəɗàgay la may aw, baməraka tasləka gi aw, amiyaka adàsləka gi. ¹³ Gəslala vok aŋa madəhəŋ à azlatatak uwanay gesina, la ndzəɗa aŋa Yesu Kristu, uwana adzərəɗgəla. ¹⁴ Ama kadahawwəŋ kà delga, kà uwana kazlakàw gi, la matərəβay gulo la abà.

¹⁵ Akul azla Filipiya, kasəlaw la kaslà uwana gəɗzəkà mazakulla gay marabəŋ la kutso aŋkul la abà, la Makeduniya, ŋgaha gəwul aŋulo la slaka aŋkul, kà akul la uwana kazlakàw gi pəra. Akul mahəm à ahəŋ mənə maɗiŋal gəl à vok, à uwana məbàɗla kà vok tatak uwana mənàhkudə aŋha pəra. ¹⁶ Mok uwana gi la Tesaloniki kà, kaslələw gi azlatatak uwana à wəŋ gənàhkudə aŋha kà asik dəŋ. ¹⁷ Uwaga asal magoday kà, asa à gi maβəz tatak aŋkul pəra aw. Gi la marabay kaykay kà, kà uwana gəsəl kà Zəzagəla adapisakulla gay à vok kà azlatatak uwana kavàhàw. ¹⁸ Gəβəzà tatak gesina uwana kaslələw gi à wəŋ ɗaɗuwa à gay uwana gənàkuɗa aŋha. Mok uwana gəɗaβəzal tatak uwaga Epafərodit aseɗəla à wəŋ kà, tatak gesina uwana gənəkuɗa la ahəŋ. Ŋgaha bay kà, azlatatak aŋkul kà bokuba tatak uwana takəɗf à Zəzagəla slaslərra, azinal lela, akəsəl à gəl. ¹⁹ Zəzagəla uwana gəsləkaway

kà, akor ləmana aṅuvaw. Adàvə à akul kəla tatak uwana kanàwkudə aṅha, adàvə à akul la magola la ahəl aṅa Yesu Kristu. ²⁰ Mazləbəy agay la Zəzagəla Baba gami, tsərəh à awtəy! Amen.

Ayyi makəd gəl à ahəṅ

²¹ 'Ayyi', gòdāw à maham à ahəṅ mənə gay Zəzagəla, uwana azlaaṅa Yesu Kristu. Azladza uwana la abanay anina tadəhakulla 'Ayyi' babay. ²² Azlaməna madiṅal gəl à vok gesina 'Ayyi', tagodf à akul, azlauwana tadəhakullaṅ 'Ayyi' kaykay kà, azlaməna huđ gəy məṅ sufəl aṅa azla Rom.

²³ Sufəl gami Yesu Kristu apisakulla gay à vok.

WAKITÀ UWANA POL ATSETSÈR À AZLA KOLOSƏYA Lettre de Paul aux Colossiens

Ayyi

¹ Gi Pol uwana Zəzagəla akəsàni gi, kà gi aña magay masləlay aña Yesu Kristu, gətsetser à akul wakità uwanay, wakità aguwa à uda la ahàl aña Timotawus, uwana masla bay kà deda gami la madiḡal gəl à vok la abà. ² ‘Ayyi’, məgodf à akul, akul tsəhay aña Zəzagəla, uwana akul la ahàl aña Yesu Kristu, uwana kanəfaw la ləv tekula. Zəzagəla Baba gami apis à akul gay à vok, ḡgaha avà à akul lapiya.

Pol adəv kuḡa à Zəzagəla kà aña azla Kolosəya

³ ‘Kikay’, məgodf, à Zəzagəla, Baba aña Sufəl gami Yesu Kristu, kəla kaslà gesina uwana mədəv kuḡa kà akul. ⁴ Kikay məgodf, kà uwana mətsənəḡ kà kavàw ləv aḡkul à Yesu Kristu, ḡgaha kawoyaw azlatsəhay aḡha gesina babay. ⁵ Kadəhawwanḡ kiya uwanay kà, kà uwana kafàw yewdi à tatak delga uwana à gay, Zəzagəla adadəhəḡ à ahəḡ kà aḡkul la zagəla, uwana katsənàwwəḡ ḡgaha adabəzawwanḡ tsərəh à slaka aḡkul. ⁶ Gay marabəḡ uwaga aslèh gəl à ahəḡ gesina la gudəḡ la vok, apakay bokuba məḡ ahàf uwana av mayyay, ḡgaha aḡzilà kaykay. Kiya uwaga à gay marabəḡ uwaga, ada à huma à gay la tataka aḡkul la abà, dagay la mavakay terəḡa uwana katsənàw tapèh lakəl aña gay aña vok mahamay aña Zəzagəla dadəḡ la dziriga, tsərəh à lakana. ⁷ Katapawla tatak uwaga kà la slaka aña Epafəras, uwana məwoyanḡ. Anina kà, anu azlaməna madəh sləray aña Yesu Kristu. Adəh sləray la ləv tekula, adəh sləray la slaka aḡkul kà madəgolay anu. ⁸ Masla la uwana apèh à anu gay aḡkul, bokuba uwana Masasəḡok Zəzagəla avà à akul ndzəḡa kà mawoy azlaməna magay aḡkul.

⁹ Kà uwaga, dagay mavakay uwana mətsənà uwaga, mədavəh kuḡa à Zəzagəla kà aḡkul la kaslà gesina. Mədəv kuḡa à Zəzagəla kà akul aña masəlay la paraka, uwana akəsəl à gəl, ḡgaha kabəzaw matsihila uwana Masasəḡok aḡha avəy, ḡgaha akul aña matsən azlatatak la tetəvi aḡha la tsəh. ¹⁰ Kà uwaga kadəbəzaw maday delga, uwana akəsə à vok kà aña Sufəl Yesu Kristu, ḡgaha kadəḡahawla uwana akəsəl à gəl gesina, maday aḡkul adàda à huma à gay la madəh delga, ḡgaha kadəsəlaw Zəzagəla kaykay. ¹¹ Mədəv kuḡa babay kà masla adzərəḡḡhakulla aña deyday, ḡgaha akul aña madz à ahəḡ la mabasiḡ la abà la ləv tələmma. ¹² ‘Kikay’, gəḡḡaw à Zəzagəla Baba, uwana apèzl à akul tetəvi, kà akul aña mabəz tatak uwana adəhəḡ à ahəḡ, kà aña tsəhay aḡha la zagəla la afik babay, la slaka uwana udəka aḡha la ahəḡ. ¹³ Zəzagəla Baba atəfanula à makoray aña mələs la abà, masla la uwana abək anu à makoray aña Kona aḡha uwana à abà, awoyanḡ. ¹⁴ Masla la uwana apèlla anu ala, ḡgaha amatsən tsakana gami ala.

Yesu kà Sufəl lakəl aña tatak gesina

¹⁵ Dza adanəḡ Zəzagəla la yewdi aw, ama Yesu Kristu uwana azladza tanəḡḡḡ kà, masla la uwana maftsa vok aña Zəzagəla, à masla uwana malkwoy aḡha, uwana aduwa azlatatak gesina, uwana Zəzagəla adəhəḡ. ¹⁶ Zəzagəla adəhə tatak gesina kà la ahàl aḡha, azlatatak uwana la zagəla la afik, la azlatatak uwana la kutso la abà la vəḡah, la azlatatak uwana yewdi anəḡḡḡ, la azlauwana yewdi anəḡḡḡ aw babay. La ahàl aña Yesu adəhə uwaga, kəla azlatatak gesina, uwana atà la ndzəḡa la zagəla, bamərika sufəl aña azlamalika bay. Kəla azlatatak gesina uwana tasafay, la

azlauwana tasafay aw. Zəzagəla adəhà atà la magolla à uda la ahàl anja Kona anja, ngaha abək atà à ahàl anja. ¹⁷ Masla kà, aga la ahən dagay uwarà, à mok uwana gudən à vok adzəka à vok dadən aw, tatak dēwdēw kà la ahàl anja, masla la uwana akəs atà la slaka anətà la abà. ¹⁸ Masla la uwana madzahaga anja maham à ahən mənə gay Zəzagəla gesina. Maham à ahən mənə gay Zəzagəla kà, apakà kà bokuba vok anja. Masla la uwana adzəkà sifa mawga. Babay kà, masla la uwana matera anja mawul à uda la mamətsay, kà masla anja maduwən azladza gesina, la azlatatak gesina. ¹⁹ Akəs à Zəzagəla à gəl kà madz à ahən anja kà, agay kà madz à ahən anja Kona anja. ²⁰ Zəzagəla akəs kà, masləl Kona anja à ahən, kà masla anja masəl vok, à masla la azlatatak gesina, azlatatak uwana la vədah la azlatatak uwana la zagəla la afik, ngaha afà masəl vok à tataka anja à abà la azladza, adəhà uwaga kà la aniz anja Kona anja uwana akəlla à ahən la ahàf la adi.

²¹ Uwarà kà, akul kərkər la Zəzagəla, kagàw azlaməna məzam anja, kà uwana kadzugwaw kà azlatatak mawisiga, kadəhəwwən kà azlatatak mawisiga babay aya. ²² Ama lagonay kà, Zəzagəla adasəl vok la anu la mamətsay anja Kona anja, uwana apakà dza sləb vok anja, uwana akəs mas ngərpa, kà akul anja magay azladziriga. Ngaha kà masla mapəhla à akul ala la huma anja Zəzagəla, kokudə mawisiga, sətaka, kà dza anja madukw à akul ala seriya à gəl aw. ²³ Iyay, dəw à huma à gay la mav ləv anjul à Yesu, dzəw à ahən titi kà fafələw aw. Fəw sləm kà azlagay uwana à afik katsənəwwən la gay marabən la abà. Gay marabən uwaga kà, tazən à kəla dza la gudən la vok gesina. Gi Pol babay, sləray gulo kà maz gay marabən uwaga babay.

Pol azlak azlaməna madiḡal gəl à vok

²⁴ Lagonay, gi la marabay la ləv gulo la tsəh, kà ngərpa uwana gəsay kà anjul, bokuba uwana uwarà Yesu Kristu asà. Gəsa ngərpa la vok gulo babay kà maham à ahən mənə gay Zəzagəla, uwana vok anja. Gəs ngərpa kiya uwanay kà, kà sləray anja anja mahənla. ²⁵ Zəzagəla afà gi à ahən, kà masla sləray anja azlaməna anja, kà gi anja mazlak akul. 'Zà gay uwanay à azladza gudən à vok gesina!', agəd à gi. ²⁶ La məl uwarà kà, ahadə gay uwaga à ahən dadən, azladza tasəl aw. Ama lagonay kà, adasəlla à azladza uda la dazuwaya. ²⁷ Asà à Zəzagəla mapəhla à azladza kà uwana asal madəhən, kà aduwa azlatatak gesina. Gay mahad à ahən gə uwaga, adasa à uda la dazuwaya, kà uwana Yesu Kristu la ləv anjul la tsəh. Kà uwana kasəlaw kà, Zəzagəla adədala akul à mazləbay anja à abà. ²⁸ Uwaga ka Yesu Kristu uwana məpəhla à azladza, məpəh à azladza à vok à abà gesina. Mətəpatəla tatak la matsihila uwana Zəzagəla avà à anu. Asa à anu kà azladza gesina uwana la tetəvi anja Yesu Kristu la tsəh kà, tadəgay azlazilga. ²⁹ Kiya uwaga gədəgədən à afik kà, gəwad vok à uda la ndzəda uwana Yesu Kristu avà à gi, kà gi anja madəvla sləray uwanay à gay.

2

¹ Asa à gi, kà kasəlaw kà, gədadəh sləray mənəga kà anjul azla Koloseya, ngaha kà anja azla Lawodikiya babay, ngaha kà anja azladza anik gesina, uwana tanən gi la yewdi aw bay. ² Gədəhən kiya uwanay, kà ləv anjul anja magay la ndzəda, ngaha kà akul anja mawoy vok akul à akul, la ləv tekula. Asa à gi babay kà, kasəlaw dziriga uwana Zəzagəla afətəl à ama ala, lakəl anja Kristu, kà akul anja madz à ahən la abà lela, ngaha Zəzagəla anja mapisakulla gay à vok kà anja uwaga. Tatak uwana Zəzagəla afətanula à ama ala kà, kà Yesu Kristu. ³ Yesu Kristu uwaga kà apəzl à anu tetəvi, kà anu anja magay anu azlamatsihilaga, ngaha kà anu anja matsən tatak uwaga. Matsihila uwaga kà bokuba ləmana.

⁴ Gəpəh à akul kiya uwanay kà, kà dza aña mavavar akul la azlagay namnamga aw. ⁵ Baməraka gədagay kərəkər la akul, koksikoksi gədzugway kà akul. Gi la marabay kà uwana à uwana kadəhàwwànə gesina kà la tetəvi aña, ɲgaha la uwana kavàw ləv aɲkul à Kristu, kadzàw à ahəŋ lela.

Sifa aña azlauwana tahamà gay à vok la Yesu Kristu

⁶ Lagonay kà, kakəsàw kà Yesu Kristu kà Sufəl aɲkul. Kiya uwaga kà, dàw la maham gay à vok la abà la masla. ⁷ Dzàw à ahəŋ la ahəl aña bokuba ahəf uwana adàla silih à kutso à agu kərəkər. Dàw kà à huma à gay. Gəďàwànə à afik à maval ləv aɲkul bokuba uwana tatəpakulla. Kikay gəďàw à Zəzagəla koksikoksi babay.

⁸ Dahàw haɲkəli kà dza aña mavavar akul la matsihila deydayga aw. Matsihila uwaga kà, asa à uda kà la madzugway aña dza la abà, ɲgaha la azlamasasəfok mawisiga, uwana atà la vəďah la gudəŋ uwanay à vok. Asa à waɲ kà la slaka Kristu aw. ⁹ Katsəbaw à atà sləm aw, kà uwana madz à ahəŋ aña Zəzagəla kà, aga la Yesu Kristu la abà gesina. Ndzer madz à ahəŋ aña Zəzagəla gesina, Yesu Kristu adzà à ahəŋ kiya uwaga babay hadəy. ¹⁰ Tsa akul kahamàw gay à vok la masla kà, akul kabəzaw sifa aña la dziriga babay. Masla kà, aga lakəl aña tatak gesina, la azlamasasəfok uwana atà la maslay bay.

¹¹ La maham gay à vok la masla la abà kà, Zəzagəla adafa à akul masəlay aña à vok, uwana apəhla à azladza kà akul azlaaɲha. La zamana uwarà kà, agəď à azla Yahudiya kà takadav vok à uda, kà masəlay kà azlaaɲha Zəzagəla. Ama kà aɲkul kà, masəlay uwana afà à akul à vok kà, asa à uda kà la ahəl aña dza aw, asa à uda kà la ahəl aña Yesu Kristu, səlàw kà, masla la uwana azəb à akul à vok ala madz à ahəŋ aña uwarà. ¹² Mok uwana tadəhàkulla batem, uwaga apəhla ala kà talà akul, akul la Kristu la slaka gə. Mok uwana kasàw à uda la iyaw la abà, uwaga apəhla ala, kà akul la Kristu, akul kawùllaw à uda la slaka gə la masla aya, kà uwana kadɲàwwal gəl à vok, kà Zəzagəla à uwana awùlla Yesu à uda la mamətsay, kà masla la maslay kà mawulla akul à uda babay. ¹³ Dagay uwarà kà, kagàw bokuba azlamazimnekid kà uwana kadəhàhàw tsakana, kà uwana kagàw azladza aña Zəzagəla aw. Lagonay kà, Zəzagəla adavà à akul sifa mawga la Yesu Kristu, ɲgaha adamatsan tsakana ala, adamatsakullaɲ ala, ɲgaha adamatsanunə ala suwaɲ. ¹⁴ Uwarà kà, seriya akəs anu, kà uwana məďahà uwana ‘Dahàwwànə’, Zəzagəla agəď aw, la lig la ahəŋ Zəzagəla azəb anu tsakana lakəl ala. Apəl guma, uwana agà la anu lakəl, afà uwaga à gəl aña Yesu Kristu, à mok uwana aməts à ahəf à adi. ¹⁵ Mok uwana Yesu Kristu aməts à ahəf à adi kà, azəbà maslay aña azlamasasəfok mawisiga ala, ɲgaha la azlasufəl aɲatà gesina babay, akəďàsl atà, ahahay atà à tsəh, apəhla atà ala la slaka azladza, la paraka kà, aduwa atà gesina.

¹⁶ Tsa baɲa kiya uwaga kà, dza asləha à akul à vok lakəl aña azlatatak uwana kazuwaw la uwana kasaw aw, dza aslaha à akul à vok aya bay la magəďay: ‘Sləkàwàw madəvaday la azlamavakay anik anik, ɲgaha la azlamanəŋla təla la azlavud maduw ləv aw.’ ¹⁷ Azlatatak uwaga kà maftsa à vok aña uwana apahàh à azladza tatak uwana adəpaka vok. Ama dziriga aña tatak uwaga kà Yesu Kristu la gəl aña. ¹⁸ Kavàw tetəvi à azladza kà madfukw akul à uda la masik aɲkul la abà aw. Azladza uwaga tagəď kà, say mawoy mas ɲgərpa, ɲgaha la masləkaw azlamalika. Atà tapəhay kà azlatatak uwana tanəŋəŋ la masasiɲay la abà. Azlatsəhay dza uwaga kà azlazlapay deyday, tadzugw lakəl aña azlatatak aña gudəŋ à vok uwanay pəra. ¹⁹ Atà la maham à gay à vok la abà la Sufəl Kristu aw. Kà uwana masla kà gəl gə, ɲgaha maham à ahəŋ məna gay Zəzagəla la uwana vok aña. Azlauwana tahamà gay à vok la masla, avà à atà azlatatak uwana tanəkudə aña, kà masla la uwana tahamà gay à vok tekula, kiya uwaga tazigənay la tetəvi aña la tsəh, bokuba uwana asa à Zəzagəla.

Masla ahamà gay azladza uwaga à vok la slaka gà, kà masla la atà aña magay tekula, bokuba vok aña dza, uwana tadza à ahəŋ la slaka gà la azlaamil ŋgaha la sləb vok.

Mamətsay la Kristu

²⁰ Kasəlaw kà, akul gesina kamatsàw la Kristu. Kiya uwaga kà akul la tsəh aña azlamasasəđok uwana la gudəŋ la vok aw. Kayyà, tsa baña kiya uwanay kà, kakay à maday aŋkul ma? Kiya aña azladza uwana tasəl Yesu Kristu dadəŋ aw takay? Kay, kà mana kanəfaw mapəhay aŋatà uwana apəhay: ²¹ ‘Katap ahəl à azlatsəhay tatak uwaga à abà aw, katap tatak uwaga aw, kadəbani tatak uwaga aw’, ma? ²² Tsəhay mapəhay uwaga kà matapla deyday aña azladza, azlatatak uwaga gesina azladza tadəhla sləray kà tadəzahla. ²³ La madzəka, say madəv kuđa à Zəzagəla, la manəf maslhay aña, ŋgaha la mawoy sləb vok aw, ŋgaha la mas ŋgərpa à vok. Ama bə la uwaga manəfay aña mapəhay uwatà, azlaka dza tetuwa aw, kà dza aña magay la maslay lakəl aña azlatatak mawisiga uwana abiy dza aw.

3

Mawul à uda la Kristu

¹ Kasəlaw kà, akul gesina kawùllaw à uda la mamətsay la Kristu. Tsa kiya uwanay kà, fəw yewdi aŋkul kà à azlatatak uwana agay la zagəla la slaka uwana Yesu Kristu adza à ahəŋ, adadza madzay la ahəl kaf aña Zəzagəla.✧ ² Koksikoksi dzùgwàw kà à azlatatak uwana la zagəla la afik, awkà azlatatak uwana la gudəŋ la vok aw. ³ Kasəlaw kà akul kamətsàw. Zəzagəla awùlla akul à uda, avà à akul sifa mawga, uwaga à ahəl aña Yesu Kristu, uwaga kà Zəzagəla anəŋla la slaka aña. ⁴ Kristu la uwana sifa, ŋgaha masla dziriga aŋkul. Mok uwana adəwul à waŋ aya kà, akul bay, kadəpəhawla vok ala la masla, kəla uwabeyuwi adənəŋ mazləbay uwana avà à akul.

Madz à ahəŋ mavivaga la mawga

⁵ Kiya uwaga kà, kanəfaw tsəhay maday mawisiga aŋkul, uwana la gudəŋ la vok aw, azlatatak uwaga kà tapakəh kà bokuba azlatatak deyday la yewdi aŋkul. Səkàw à mabila, kagaw la maday mawisiga aya aw, azlatatak mawisiga uwana takəđ à akul ala à yewdi, atà tadza à ahəŋ la akul la abà aya aw, kayahaw azlatatak mawisiga aw, kakəđaw yewdi à azlatatak à abà aw, kà uwana baña kakəđaw yewdi à abà kawoyaw, atà đadūwa Zəzagəla. ⁶ Kà azlatatak mawisiga uwaga à uwana Zəzagəla apakà ləv lakəl aña azladza uwana takəs gay aña aw. ⁷ Uwarà, à mok uwana kadzàw à ahəŋ la azlatatak uwaga la abà, maday aŋkul kà agəh kà kiya uwaga babay.

⁸ Lagonay kà, səkàw azlatatak uwaga gesina. Kapakaw ləv aw, kaslahaw məl la tsəh ala aw, kadəhaw mawisiga à azladza anik à vok aw, kadawla sləm aña azladza la gay aw. Azlagay mawisiga tasa à waŋ la gay aŋkul aya aw. ⁹ Kavavarahaw vok kà akul à akul aw, kà uwana kasakaw maday mawisiga aŋkul uwana uwarà, ŋgaha la azlatatak uwana kadəhəhəwəwəŋ uwarà. ¹⁰ Nəfəw madz à ahəŋ mawga. Zəzagəla la uwana avà à akul maday mawga, adəhla sləray koksikoksi, kà masla aña mapakəŋ ala kiya aña, kà akul aña masəl masla la dziriga. ¹¹ Kiya uwaga kà, tatak la ahəŋ avəh azla Yahudiya ala la azlatsəhay anik aw, ŋgaha tatak la ahəŋ avəh azlauwana takadav atà à uda ala la azlauwana kokuđa makadav atà à uda gà, ŋgaha azladza uwana la kəsaf la abà, ŋgaha azladza uwana tasəl tatak aw, ŋgaha azlamayà la azlauwana takor gəl aŋatà, gesina aŋatà kà kalkal, gərgər la ahəŋ la huma Zəzagəla aw, kà uwana məŋga aŋatà kà say Yesu Kristu tekula pəra, ŋgaha aga la ləv aña azlauwana la tsəh azlaaŋha gesina.

¹² Awul akul à gəl kà, Zəzagəla atsatsəmənì akul, kà akul aña magay azlaaŋha, awoya akul. Tsa kiya uwanay kà, đahəw azlatatak uwanay: Vok ahamà akul kà

✧ 3:1 3.1 Mahabay 110.1

azladza anik, gaw la lev delga, gaw telomma, la mabasiŋ gesina babay. ¹³ Tsənaw vok gay ka akul a akul. Baŋa dza adahakulan mawisiga a vok matsawallan ala. Matsahawwan a vok ala ka akul a akul, bokuba uwana Sufel gami amatsakullan ala. ¹⁴ Tatak uwana aduwa azlaanik gesina ka, woyaw vok ka akul a akul, ka uwana mawoy vok akəs azlatatak delga gesina. ¹⁵ Vaw tetəvi ka a lapiya uwana Kristu afā a akul a lev a tsəh, akor lev ankul. Awul akul a gel ka Zəzagəla azala akul, ka akul anja magay tekula, ŋgaha akul anja magay la lapiya. 'Kikay', godawwal koksikoksi babay. ¹⁶ Faw gay anja Kristu a lev a tsəh lela, dzugwaw ka a gay anja Kristu. Tapawla ka vok akul a akul, wulawla ka vok matsihila ka akul a akul. Zləbaw Zəzagəla la lev ankul gesina la azlamahabay anik anik. ¹⁷ Uwana kadahawwan la uwana kapəhaw bay, dahaw uwaga la sləm anja Sufel Yesu. 'Kikay', godaw a Zəzagəla Baba ka Yesu babay.

Maday anja azlaməna madiŋal gel a vok la huma azladza anik

¹⁸ Gəpəhay ka akul azlamis, gəgod a akul ka: 'Kəsaw gay anja azlazil ankul, bokuba azlauwana tanəf Sufel gami tadehəŋ.'

¹⁹ Akul azlazil bay ka: 'Woyaw azlamis ankul, kagaw dzaŋdzaŋ la atā aw.'

²⁰ Akul azlabəza uwana gəpəh a akul ka a aganay: 'Tsəbaw sləm a paŋaw anja azlababa ankul la tatak gesina la abā, ka uwana akəs a Sufel a gel, ka kadahawwan kiya uwanay.'

²¹ Ka ankul azlababa ka: 'Kadawla lev a azlabəza a hud, ka atā anja mapak lev aw.'

²² Akul azlamayā: 'Kəsaw gay anja azlaməŋga ankul la ahāl ala la gudəŋ uwanay la vok la azlatatak gesina la abā, kakəsaw atā gay la ahāl ala la huma yewdi anata pəra, ka atā anja masləkaw akul aw. Ama dahaw sləray la lev tekula, ka uwana kasləkawaw ka Sufel Yesu. ²³ Kəla sləray gesina uwana tava a akul, dahaw uwaga la lev tekula, ka uwana sləray anja Sufel la uwana kadahawwan, awka anja dza asik aw. ²⁴ Sələw ka Sufel la uwana adanəŋ akul a adi, adavā a akul tatak uwana adadehəŋ a ahəŋ la zagəla ka anja azladza anja. Madzahaga ankul uwana kadahawla sləray, uwaga ka Yesu Kristu.'

²⁵ Ama azladza uwana tadehəŋ mawisiga, Zəzagəla adawulla a atā ala mawisiga uwana tadahəŋ. Adah tatak a azladza gesina la lev tekula.

4

¹ Gəpəhay ka a azlaməŋga babay, gəgod a akul ka: 'Gaw dziriga la huma anja azlamayā ankul, dzaw a ahəŋ la atā, bokuba uwana akəs a vok, sələw ka, akul azlaməŋga la azlamayā gesina ka: Madzahaga ankul aga la zagəla la afik, aduwa akul gesina.'

Azlamapəhay anik

² Dəvaw kuḍa a Zəzagəla koksikoksi, kadəvaw kuḍa la guḅguḅ aw. 'Kikay', godaw a Zəzagəla babay. ³ Dəvaw kuḍa ka anjami babay, ka Zəzagəla anja mapəzl anu tetəvi delga, ka maz gay anja a azladza, ŋgaha məpəhatāla godega anja gay anja Kristu la makor gel la abā, ka gay marabəŋ uwaga a uwana gi la daŋay. ⁴ Dəvaw kuḍa a Zəzagəla ka gi anja mapəhla ala la paraka bokuba uwana akəs a vok lela.

⁵ Dahaw hankeḷi la madz a ahəŋ ankul la tataka azladza uwana la abā, tasəl Zəzagəla aw, dzugwaw la kaslə gesina ka mazlak atā. ⁶ Sələw ka say kagaw la gay namnamga, uwana akəs a vok. ŋgaha sələw babay gay uwana kadawulawla a azladza, uwana tanava akul manavay gesina.

Ayyi makəḍ gel a ahəŋ

⁷ Tisik, deda gay ləv gami uwana la tetəvi aña Sufəl la tsəh, masla adəh sləray aña la ləv tekula. Anu səla, anu azlaməna masləlay aña aña. Masla adəpəh à akul gesina lakəl gulo. ⁸ Kà uwaga à uwana gəsləl à akul à awtəy kà masla mapəh à akul gay gami, ngaha kà masla madzərədəhakulla babay. ⁹ Onesəm, deda gay ləv gami ada à awtəy atə səla. Masla babay anəfa Yesu Kristu la ləv tekula, masla, tsəhay aña. Atə səla nna tadəpəh à akul azlatatak uwana ada à vok la abanay.

¹⁰ Arəstarkus, uwana anu la dañay anu səla, adəfa à akul ala: 'Ayyi'. Mark duguməñ aña Barnabas adəfa à akul ala 'Ayyi', babay. Baña tabəz à awtəy à slaka aña kà, kəsaw atə la ahəl səla. Dagay uwarə gədapəh à akul uwaga. ¹¹ Yesu uwana tazaləl ala Yustus adəhakulla 'Ayyi' bay, azla Yahudiya makər uwaga pəra, à uwana mədəh sləray anina la abanay kà aña makoray Zəzagəla. Atə la uwana tadzərədəhəgəla kaykay.

¹² Epafəras, uwana tsəhay aña adəhakulla 'Ayyi' babay, masla kà, masla sləray aña Yesu Kristu. Koksikoksi adəv kudə à Zəzagəla kà aña, kà akul aña madz à ahəñ lela, kà akul aña magay azlazil la tetəvi aña Zəzagəla la tsəh, ngaha kà akul aña masəl uwana akəs à Zəzagəla à gəl ndzer. ¹³ Hadəy, gəsəl kà, masla as ngərpa la sləray la abə kà akul, ngaha kà azla Lawodikiya, ngaha kà azla Hiyerapoləs bay. ¹⁴ Luka, dokwtar uwana məwoya, atə la Demas tadəhakulla: 'Ayyi'.

¹⁵ 'Ayyi', gədəw à azladza la Lawodikiya. 'Ayyi', gədəw à Nimfa, ngaha la azlaməna madiñal gəl à vok uwana tahaməhəh gay à vok la mtəga aña, kà ahəl gulo.

¹⁶ Baña kadadzeñaw wakitə uwanay kà, slələw à azlaməna madiñal gəl à vok la Lawodikiya, kà atə aña madzeñay babay. Ngaha atə azla Lawodikiya bay tasləl à akul à wañ wakitə uwana gətsetser à atə kà, akul aña madzeñay suwañ. ¹⁷ Gədəw à Arsip kà: 'Wəfə vok à uda kà madəv sləray uwana à gay Sufəl Yesu Kristu afal à ahəl.'

¹⁸ Gi Pol, la ahəl gulo la uwana gətsetseray kà madəhakulla 'Ayyi' la abanay. Avika akul aw kà gi la dañay.

Zəzagəla apis à akul gay à vok.

MATERA ANJA WAKITÀ UWANA POL ATSETSÈR À AZLA TESALONIKI Première Lettre de Paul aux Thessaloniens

¹ Gi Pol la uwana gøtsetser wakità uwanay, anu la Silas ngaha la Timotawus bay. Møtsetser à maham à ahøj møna gay Zøzagøla la Tesaloniki, uwana azlaanja Zøzagøla Baba, ngaha anja Suføl Yesu Kristu. Zøzagøla apis à akul gay à vok la lapiya anja.

Madiñal gøl à vok anja azla Tesaloniki

² Koksikoksi, 'Kikay', mөгod à Zøzagøla la matsal akul à gay la madøv kudfa gami la abà babay. ³ Baña mødøv kudfa à Zøzagøla Baba gami, mødzugw à madàh sløray ankul, uwana kadahàwwàn, kà uwana kadiñaw gøl à Yesu Kristu à vok la sløray dzañdzañga, kà uwana kawoyaw masla la mawad vok à uda ankul la abà lela la Suføl Yesu Kristu. ⁴ Kiya uwaga akul azladeda, møsøl kà, Zøzagøla awoya akul, ngaha atsatsàmànì akul, kà akul anja magay azladza anja. ⁵ Hadfay, mok uwana mözàkulla gay marabøj, uwaga apakà gay deyday pøra aw. Ama Zøzagøla apøhla ndzødfa anja ala la gay uwaga, la mazlak anu anja Masasødok tsikasla, ngaha la uwana møsøl kà gay gami kà ndzer. Kasølaw madz à ahøj gami, à mok uwana mødza à ahøj la tataka ankul la abà. Mødahà uwaga kà, kà mazlak akul. ⁶ Akul, kanøfaw madz à ahøj gami, ngaha la anja Suføl Yesu babay, kasàw ngørpa møjga kà gay uwaga, ama kakèsaw gay anja Zøzagøla la løv ankul la tsøh la marabay uwana Masasødok tsikasla avà à akul. ⁷ La kità kà, akul kapakàw maftsa vok anja azlamøna madiñal gøl à vok la kutso Makeduniya, la kutso Akayya gesina. ⁸ Kà akul la uwana, gay anja Zøzagøla atsøn ala la slaka gesina, la Makeduniya ngaha la Akayya pøra aw. Azladza gesina tasøl gay madiñ gøl à Zøzagøla à vok ankul. Kiya uwaga kà, mønøkudfa à mapøh gay uwanay aya aw. ⁹ Atà tapøh à anu gay manøjla anu ankul, la uwana kakwesàwkà azlamazlazlay, kà akul anja manøf Zøzagøla uwana la sifa ngaha dziriga, ¹⁰ la makud mas à ahøj anja Kona anja la zagøla. Yesu uwana Zøzagøla awùlla à uda la mamøtsay, masla adàtøf anu la mapak løv anja Zøzagøla la vuđ seriya, uwana adàsa à wañ.

2

Sløray uwana Pol adfahøj la Tesaloniki

¹ Azladeda, sèlàw kà madz à ahøj gami la slaka ankul kà deyday aw, kà uwana kakèsaw gay marabøj. ² Mok uwana møløg mabøz mtøga ankul kà, azlamøna møzam gami tatøreb anu møjga la matsøk anu magodahay à gøl la Filipiya. Akul kà, kasølaw uwaga babay. Mok uwana mødabøz à slaka ankul la Tesaloniki kà, azlamøna møzam gami la ahøj babay. Ama Zøzagøla adzøredà anu à uda, kà anu anja mapøh à akul gay marabøj anja. ³ Møpøhla à azladza kà tetøvi delga kà manøfay, møpøh fida aw ngaha møpøh mawisiga aw. Møpapatà azladza babay aw. ⁴ Ama møpøh kà gay uwana Zøzagøla apøh à anu à ahàl, kà anja mapøhay à azladza pøra. Kà uwana mok uwana Zøzagøla agür anu, akès anu ndzer, ngaha avà à anu maz gay marabøj. Møyah kà anu anja mahøday à azladza à adi aw, ama à Zøzagøla à adi, masla uwana asøl madzugway anja løv gami. ⁵ La lela kasølaw kà, møpøh gay anja mavavar akul, ngaha gay anja mayàh tatak la slaka ankul aw, Zøzagøla à masla masølay. ⁶ Møyah masløkaw anu anja azladza aw, møyah masløkaw anu ankul aw, amiyaka anja azladza anik aw. ⁷ Møslàla vok anja mapøhla gøl gami ala kà anu azlamagolga, kà uwana anu azlamøna maslølay anja Yesu Kristu nøma, ama mødzugw kiya uwaga aw. Møfà à

akul slëm bokuba iyà, uwana af slëm à azlabèza anha. ⁸ Kiya uwaga la mawoy akul gami kà, mөгà nekwa anja mazakulla, kà gay marabəŋ anja Zəzagəla pəra aw, ama sifa gami babay kà mөvà à akul, kà uwana kagaw azlabəza gay ləv gami. ⁹ Hadfay azladedə, kasəlaw la mok uwana məzəkulla gay marabəŋ kà, mөyahà vok la sləray zlazladəga uwana la abà mөdahaàhəŋ mahənay la mavakay kà, kà anu anja maf mahanay à azlaməna gay Zəzagəla à gəl aw.

¹⁰ Iyay zlà, akul azlaməna madiŋal gəl à vok kasəlaw, ŋgaha Zəzagəla asəl uwaga babay: Maday gami la tataka ankul la abà kà delga, tərta, ŋgaha sətaka. Dza la ahəŋ asləha à anu à vok lakəl anha aw. ¹¹ Kasəlaw kà mөdahaàkulləŋ bokuba uwana baba adəhəŋ à azlabəza anha. ¹² Ama mөdөv akul kufə koksikoksi, kà akul anja maday bokuba uwana akəs à Zəzagəla à gəl. Zəzagəla uwana azalà akul, kà akul anja mad à makoray anha à abà, ŋgaha à mazləbay anha à abà.

¹³ Kikay, mөгodf à Zəzagəla koksikoksi babay, kà uwana mok uwana katsənəw gay Zəzagəla, uwana məzəkulləŋ, kakəsəw uwaga bokuba gay anja azladza aw, ama bokuba gay Zəzagəla. Uwaga ndzer, gay Zəzagəla, uwana adahà sləray la tataka ankul la abà, akul azlaməna madiŋal gəl à vok. ¹⁴ Uwana apakà vok la maham à ahəŋ məna gay Zəzagəla la kutso Yahudiya, uwaga apakà vok la akul bay, akul azladedə kabəsəw matərbəy bokuba uwana tasà la ahəl anja tsəhay anətà, azla Yahudiya bay. ¹⁵ Kiya uwaga azladza uwaga takədf Sufəl Yesu, ŋgaha la azladza uwana tapəh gay Zəzagəla à azladza uwarà, atà bay tatərbə anu, kiya uwaga tahədf à Zəzagəla à adi aw, atà kà azlaməna məzam anja azladza gesina. ¹⁶ Gay gə la uwaga tayəh madədf anu gay à ahəŋ, kà anu anja maz gay mabəlay à azladza uwana tasəl Zəzagəla aw, gay gə la uwaga tsakana anətà adahən ala, seriya anja Zəzagəla abəz atà.

Pol ayah manəŋ azla Tesaloniki aya

¹⁷ Azladedə, mok uwana mөvahà vok ala anina kà, gəl gami adà akul à tsəh, kà manəŋ ankul. Mədà anjami pəra, ama gəl gami agədf à akul à tsəh. ¹⁸ Mөyah mawul à slaka ankul aya. Gi Pol la gəl gulo gəyàh tetəvi anuvaw kà mad à awtəy, ama seteni adədf gi gay à ahəŋ. ¹⁹ Mədzugway kà lakəl ankul, akul azlaməna madiŋ gəl à Zəzagəla uwana à vok kadzərdəfəhəwanula, ŋgaha apəhanula kà gay marabəŋ kà la ndzəda. Akul bay kà, akul la tataka anja azladza uwaga la abà. Akul la uwana karəbəw ləv gami babay. Akul la uwana kapəhəwla ala, kà sləray gami kà delga à uwana mədzà à ahəŋ hahalakanna, kà masla la huma anja Sufəl gami Yesu, la kasla uwana adəsa à ahəŋ. ²⁰ La hadfay gə kà akul la uwana kavəw anu madz à ahəŋ la hahalakanna ŋgaha la marabay.

3

Mawoyəŋ asal magodfay: Mas ŋgərpa kà anja azladedə

¹ La kiya uwaga kà, gəl akədf anu à vok, kà uwana məbəzà à wakitə ankul aw. Gay gə la uwaga, məsləla vok anja mabasiŋ aw, masla mədzəgw anja masləl akul Timotawus à awtəy à slaka ankul, ŋgaha anu anja madz à ahəŋ la Atena disa. ² Kiya uwaga məsləl akul deda gami Timotawus à awtəy, uwana mөdàh sləray anja Zəzagəla la slaka gə anina, kà uwana anu məziŋ gay marabəŋ lakəl anja Yesu Kristu la slaka gə. Kiya uwaga məsləlla akul à awtəy kà masla anja madzərdəfəh akul à uda la madiŋal gəl à vok la abà. ³ ŋgaha kà dza ankul anja mawul à lig, kà ŋgərpa aw. Kà uwana uwaga kà, agay tatak gami, anu azlaməna manəfay bay. ⁴ Ndzer, mok uwana mөлəg la tataka ankul la abà kà, mөpəh à akul gay anja ŋgərpa uwaga à vok à abà dagay uwarà, lagwa kà masla gə la uwaga adabəza akul. Sələw la lela! ⁵ Gay gə la uwaga à uwana, məsləla vok anja mabasiŋ aya aw, à uwana məsləl Timotawus à awtəy kà

masəlay lakəl aña madiñal gəl à vok aņkul, ŋgaha kà gi aña masəlay babay. Guba azà à gi kà seteni aña madukw akul à ahəŋ, ŋgaha sləray gami aña mapakay deyday.

Ləv gami adatas ala, kà uwana akul la tetəvi delga la ama

⁶ Kay, ama lagonay kà Timotawus adawul à waŋ, adaraba à anu ləv, la gay madiñal gəl à vok aņkul, la masal aņkul uwana kapəhàwla ala. Agòf à anu kà, kadzugwaw kà lakəl gami koksikoksi, asa à akul manəŋ anu bokuba uwana asa à anu manəŋ akul. ⁷ Haďay azladedə, mədzà à ahəŋ la iyaw tugwi la adi məŋga, ama à mok uwana mədatsən gay aņkul kà, kadiŋaw gəl à Yesu à vok kà adzəredəh anu à uda. ⁸ Lagonay kà, bə uwana akul la tetəvi aña Zəzagəla la tsəh kà, ləv gami adatasl ala adagay. ⁹ Iyay zlà, madəv kudfa gesina la kikay uwana məgod à Zəzagəla kà aņkul ma asla takay? Mədəval kudfa kà marabay məŋga uwana karəbàw anu la huma aňha. ¹⁰ La mok uwana mədəv kudfa mahənaŋ la mavakay kà, kà masla aña mav à anu tetəvi aña mad manəŋ akul à gay. Asa à anu kà anu mətəpakulla gay uwana aləg à akul, à gay aña matapla la madiñal gəl à vok la abà.

¹¹ Gay gə la uwaga mədəv, kudfa à Zəzagəla Baba gami la Sufəl gami Yesu, kà atə aña mapəzl anu tetəvi aña mad à awtəy kà manəŋ akul à gay. ¹² Delga kà Sufəl azigən mawoy vok aņkul, ŋgaha kawoyaw azladza gesina kalkal bokuba uwana məwoya akul. ¹³ Kiya uwaga masla adàvə à akul ndzəďa à ləv aņkul à tsəh, kà akul kadəgaw sətaka la huma Zəzagəla Baba, la mok uwana Sufəl Yesu adàwul à waŋ à gudəŋ à vok la azlaaňha.

4

Maday uwana akəs à Zəzagəla à gəl

¹ Ŋgaha zlà, azladedə, aganay gay uwana atəm kà anu à ahəŋ aya aña mapəhakulla. Mok uwana anu la slaka aņkul kà, katapawla gay maday dziriga uwana akəs à Zəzagəla à gəl la slaka gami, kà kiya uwaga la uwana kadəhàwwəŋ. Lagonay kà, gədəv akul kudfa: ‘Kamkam’, gəgod à akul la sləm aña Sufəl gami Yesu, kà akul aña mad à huma à gay koksikoksi la manəfay la abà aya. ² Mədətapakulla tatak uwana mətəpla la slaka Sufəl Yesu lagwa zlà, ŋgaha babay kà kadasəlaw adagay ³ Uwana asa à Zəzagəla kà, delga kà akul aña magay sətaka, ŋgaha akul aña makəs gəl aņkul kà mabila. ⁴ Gay gə la uwaga gəgod à akul gesina: ‘Tsənəw vok à gay la azlamis aņkul. Baňa katsənaw vok à gay kà, kagaw sətaka la tetəvi aña Zəzagəla la ama, ŋgaha azladza tatsəď akul gay à tsəh aw. ⁵ Kà uwana baňa kadzaw à ahəŋ la mabila la abà kà, kapakaw bokuba azladza uwana tasəl Zəzagəla aw.’ ⁶ Tsa bə kiya uwaga kà, dza adəha tsakana à masla magay aňha à vok lakəl aña azlamis aw, kà uwana ndzer, kasəlaw kà, Zəzagəla adəh seriya à tsəhay dza uwaga à gəl, kà uwana mədəpəh à akul à vok à abà lakəl aña uwaga. ⁷ Zəzagəla azalə anu à mabila à abà aw, ama aña madz à ahəŋ la sətaka la abà. ⁸ Gay gə la uwaga, azladza uwana takweska la mapəsew gay uwanay kà, takweska kà dza aw, ama takweska kà Zəzagəla, uwana avə à akul Masasəďok tsikasłaga aňha.

⁹ Azladedə, baňa lakəl aña mawoy vok kà, anu la gay aña matsetser à akul, akul azlaməna madiñal gəl à vok, aw, kà uwana Zəzagəla adapəhakulla tsəhay tetəvi uwaga adagay. ¹⁰ Iyay ndzer, kiya uwaga la uwana kadəhàwwəŋ à azlaməna madiñal gəl à vok la kutso Makeduniya gesina. Ama akul kà, ‘Duwàwla uwanay aya’, məgod à akul azladedə. ¹¹ La kità kà akul kà, yàhàw madz à ahəŋ la lapiya la abà, fàw gəl à uwana kanawkudfa aňha, kà akul aña madzadzər gəl aņkul, bokuba uwana məpəh à akul à vok à abà uwarə. ¹² Ŋgaha baňa akul azlaməna gay Zəzagəla kà, dəhàwwəŋ kiya uwanay, kà azladza uwana la uda tasəl Zəzagəla aw, tadəkəs gay aņkul, ŋgaha kà akul aña mahan dza anik aw.

Kaslà mawul à waŋ aŋa Sufəl Yesu

¹³ Azladede, asa à anu kà kasəlaw azlatatak lakəl aŋa azlauwana tamatsay, kà akul kagaw la mazaw la gəl la abà aw, bokuba azladza anik uwana tasəl gay lakəl aŋa mawul à uda aŋa Yesu aw. ¹⁴ Ama anu kà məsəl kà Yesu aməts, ŋgaha Zəzagəla awùlla à uda la mamətsay, kiya uwaga babay məsəl kà azlauwana taməts à tetəvi aŋha à tsəh kà, Zəzagəla adàwulla atà à uda la mamətsay babay, ŋgaha adàhama atà gay à vok la Yesu. ¹⁵ Anu uwana mələg la sifa dadəŋ, à mok uwana Sufəl Yesu adàwul à waŋ kà, azladza uwana taməts à madiŋal gəl à vok à abà kà, tadətsəvka magagamay la Yesu kà anu. Hadəy, gay uwaga gəpəh à akul lagonay kà, gay uwana asà à waŋ la slaka Sufəl.

¹⁶ Kiya uwaga la mavakay uwatà, mədətsən masləh məl aŋa dza uwana akoray, kuda aŋa sufəl aŋa azlamalika, la mahohumay aŋa mazlazliŋ aŋa Zəzagəla, ŋgaha Sufəl gami Yesu Kristu la gəl aŋha adàsa à ahəŋ la zagəla. ŋgaha teraŋa azlauwana taməts à madiŋal gəl à vok à abà tadətsəv vok à uda la mamətsay. ¹⁷ ŋgaha la lig la ahəŋ, anu uwana mələg la sifa aya la mok uwaga, Zəzagəla adàhəl anu à habaga à abà, kà anu aŋa magagamay la Sufəl Yesu à tataka zagəla à abà. ŋgaha mədədzə à ahəŋ koksikoksi la masla. ¹⁸ La gay uwanay kà, taslahaw vok gay à ahəŋ kà akul à akul.

5

Madz à ahəŋ la adi

¹ Azladede, lakəl aŋa mavakay baŋaw la kaslè aŋa azlatatak uwanay adəpaka vok kà, mənəkudə aŋha aŋa matsetser à akul aw. ² Mavakay uwatà kà, akul la gəl aŋkul bay kà kasəlaw lela, kà uwana Sufəl adàsa à ahəŋ la magorəh azladza, bokuba masla gəl, uwana atsa à waŋ la vəd. ³ Mok uwana azladza tadəgodəy: ‘Gudəŋ à vok la lapiya, magogutsay la ahəŋ aw’, tadəgodəy. Katskats la mok uwaga la uwana matərabəy mənŋa adədzəka à vok, bokuba mis uwana hudə bəzi agur à ahəŋ. ŋgaha azladza tadətəfay la uwaga la abà diki diki aw.

⁴ Azladede, kà aŋkul kà, akul azlaməlok aŋa gay uwanay aw. La kità kà, mavakay uwatà adəgorəh akul bokuba masla à gəl uwana agorəh azladza aw. ⁵ Gesina aŋkul, akul azlaməna maday la udəka aŋa mavakay la abà, awkà anu azlaməna maday la mələs aŋa vəd la abà aw.

⁶ Tsa baŋa kiya uwanay kà, mədzehal bokuba aŋa azladza anik uwana tasəl gay uwanay aw aw, ama say mədza à ahəŋ la adi la manəŋla gəl gami. ⁷ Iyay zlə, la vudə la uwana azladza tadzehal aw takay? ŋgaha aya kà, guzu akəd atà la vəd bay. ⁸ Ama anu kà, anu azladza aŋa vəd aw, anu azlaməna aŋa mavakay, kà uwaga say mənəŋla vok gami, mədūw madiŋal gəl à vok la mawoyəŋ bokuba slarapay. Məf manewəŋ aŋa mabəlay gami à gəl, bokuba huməz gəl. ⁹ Mədzugw lela, Zəzagəla afà à anu à ahəŋ, kà anu aŋa matap ŋgərpə aŋa mapak ləv aŋha aw. Ama kà anu aŋa mabəlay, kà à ahəl aŋa Sufəl Yesu uwana mafal dzakwa à gəl gə. ¹⁰ Masla aməts kà anu. La mok uwana adàwul à waŋ baŋa anu la sifa, amiyaka baŋa mədətamatsay kà anu aŋa madz à ahəŋ la sifa la masla. ¹¹ Kà uwaga ndzərədəfàhàw vok ala, taslahaw vok gay à ahəŋ bokuba uwana kadəfàhàwwəŋ.

Gay makəd gəl à ahəŋ

¹² Azladede azlauwana Sufəl Zəzagəla apakatàla kà azlaməŋga lakəl aŋkul kà aŋa matapakulla sləray kà, sləkàwàw atà, la makəs atà gay la ahəl ala. ¹³ Sləkàwàw atà, ŋgaha pəhàwatàla mawoy atà aŋkul, kà sləray mənŋa uwana tadəhəŋ, tsənàw vok gay kà akul à akul.

¹⁴ Azladede, kamkam, slèhàw mël à azlamèna mas à gël, kà atà aña madàh slèray, ndzèrèfàhàw azlamèna guba gà ala, ñgaha zlàkàw azlamèna kokudà ndzèdà, basàwwàn azladza gesina. ¹⁵ Dahàw hanjëli kà akul aña mawulla matsak vok mawisiga à adi koksikoksi aw, yàhàw madz à ahèj la delga la abà kà akul à akul, ñgaha la azladza à uda babay.

¹⁶ 'Ràbàw koksikoksi! ¹⁷ Dèvàw kudà à Zèzagèla kokudà masakal.' ¹⁸ 'Kikay', mægòf à Zèzagèla kà kèla tatak uwana avà à anu gesina. Aganay tatak uwana sifa gami la abà, anu azladza aña Yesu Kristu.

¹⁹ 'Kadèdàw gay à Masasèdòk Zèzagèla à ahèj aña madàh slèray aw. ²⁰ Kapèsewaw gay aña azladza, uwana Zèzagèla apèh à atà à ahàl aña mapàh à azladza aw. ²¹ Ama mèdzèdàw nèrèzàw lela, kèsàw kà uwana la tetèvi aña Zèzagèla la ama.' ²² Ñgaha nèñàwla gël ankul lakèl aña tatak mawisiga gesina.

²³ Zèzagèla uwana avà à anu lapiya agèj akul sètaka. Ñgaha kà Zèzagèla anèjla vok ankul gesina, masasèdòk ankul, sifa ankul la slèb vok ankul gesina kà aña kaslà uwana Sufèl Yesu Kristu adàwul à wàn kà kadàgaw kokudà tsakana. ²⁴ Zèzagèla uwana azalà akul kà akul aña magay azlaañha, adàhà uwaga kà aña magèf gay anha à afik.

Ayyi makèf gël à ahèj

²⁵ 'Dèvàw kudà kà anami, azladede.' ²⁶ 'Ayyi', gægòf à azladede gesina. ²⁷ 'Kamkam', gægòf à akul la slèm aña Sufèl kà. 'Dzèjàw wakità uwanay la huma aña azlamèna madiñal gël à vok gesina.'

²⁸ Vok mahamay aña Sufèl gami Yesu Kristu agay la akul.

MASƏLA ANA WAKITÀ UWANA POL ATSETSÈR À AZLA TESALONIKI Deuxième Lettre de Paul aux Thessaloniens

Ayyi

¹ Gi Pol la uwana gətsetser wakità uwanay, anu la Silas ngaha la Timotawus bay. Mətsetser à maham à ahəŋ mənə gay Zəzagəla la gudəŋ Tesaloniki, uwana azlaanə Zəzagəla Baba, ngaha anə Sufəl Yesu Kristu. ² Zəzagəla Baba la Sufəl Yesu Kristu tapis à akul gay à vok, la lapiya.

Aganay seriya uwana adəpaka vok

la kaslā uwana Yesu adāsa à waŋ

³ Azladedə, ‘Kikay’, məgodf à Zəzagəla kà akul koksikoksi, mədah uwaga ndzer, kà uwana madiŋal gəl à vok ankul, uwana kadiŋawwal gəl à vok, adāla slilih mənəga, ngaha mawoy vok ankul uwana kawoyaw vok ada à huma à gay. ⁴ Gay gā la uwaga, baŋa anu la huma à azlaməna gay Zəzagəla anik kà, hahalakanna à gāy ləv gami, kà uwana amiyaka azladza tasa à akul ngərpa, tapəsew akul kà, kabasawwan, katsizllaw à delga à afik, ngaha kadiŋawwal gəl à vok, amiyaka la matərəbay uwaga la abà gesina.

⁵ Azlatatak uwanay gesina apəhanula, kà Zəzagəla adədah seriya la dziriga. Kasaw ngərpa kà makoray Zəzagəla, la uwaga la uwana adəzlayla akul anə mad à slaka makor gəl à abà. ⁶ Ndzer, Zəzagəla adəgodf dziriga à afik. Bokuba magodfay, adətərəb azladza uwana tatərəb akul suwan. ⁷ Lagonay kà kasaw ngərpa, ama Zəzagəla adəzəb akul ngərpa lakəl ala, amiyaka anu babay. Adədah uwaga la vudf uwana Sufəl Yesu adāsa à ahəŋ la zagəla, la azlamalika anəha, uwana tazləb masla. ⁸ Kiya uwaga Sufəl gami Yesu adāsa à ahəŋ la magol akəl la abà, kà madədahla seriya à azladza uwana à gəl tapəsew Zəzagəla, ngaha azlauwana à gəl takweska gay marabəŋ lakəl anəha. ⁹ La abatà la uwana tadədah à atə seriya dzaŋdzanəga à gəl, tuwiz tadənəŋ huf adi anə Zəzagəla tetuwa, amiyaka mazləbay, ngaha la ndzəda anəha aw.* ¹⁰ Uwaga adəpaka vok la mavakay uwatà, adāsa à waŋ kà, kà masləkaway anə azladza anəha, azlaməna madiŋal gəl à vok tadawoy masla. Akul bay kadəgaw la atə, kà uwana kadiŋawwal gəl à gay gami uwana à vok, məpəh à akul.

¹¹ Gay gā la uwaga mədəv kuɖa koksikoksi kà ankul. ‘Kamkam’, məgodf à Zəzagəla gami, kà mapakakulla sətaka, kà akul anə madz à ahəŋ la sifa uwana azalà akul, ngaha ahən sləray anə madiŋal gəl à vok ankul ala, mənəval kà masla anə mazlak à akul la maslay anəha. ¹² La kiya uwaga kà, sləm anə Sufəl gami Yesu adəgay masləkaway gā la slaka ankul, ngaha akul kadəgaw masləkaway gā kà masla. Uwaga gesina adəpaka vok kà vok mahamay anə Zəzagəla, ngaha la Sufəl gami Yesu.

2

Gay lakəl anə masla məzam anə Zəzagəla

¹ Azladedə, gəpəh à akul lakəl anə mavakay anə mas à waŋ anə Sufəl gami Yesu, ngaha la maham gay à vok gami la slaka anəha. ‘Kamkam’, məgodf à akul azladedə, ² kiya uwaga kà baŋa dza adəgodf à akul kà, afats mas à waŋ anə Sufəl kà adəslay kà, gəl adəkəɖf akul à vok katskats aw, guba adəkəs akul babay aw. Zlahaw, dza

* 1:9 1.9 Yesayya 2.10

adàpèhla uwaga ala bokuba gay aña azladza uwana Zəzagəla apèh à atà gay à ahàl aña mapàh à azladza anik, bañaw aza akul gay Zəzagəla, bañaw agod à akul kà anu la uwana mətsetsèr uwaga. ³ Amiyaka la kakay mañ kà, kasakaw dza apapatakula gay aw. Kà uwana mavakay uwaga adàsa à wañ kiya uwaga pəra aw. Say azladza tadəzigən gəl añaatà lakəl aña Zəzagəla dadàñ, ngaha masla məzam uwana masla kà aña mazila tetuwa, adàpèhla vok ala. ⁴ Masla kà kəla tatak uwana azladza tanəfay la masləkaway kà, adàdəfal gay à ahəñ amiyaka à Zəzagəla, la tatak uwana tasləkaway gesina kà adàdəfal gay à ahəñ. Adəzigən gəl aña lakəl aña tatak gesina, adàday kà madz à ahəñ la məñ gəy Zəzagəla la aku. La abatà kà: ‘Gi la uwana gi Zəzagəla’, adàgodəy.*

⁵ Awul akul à gəl à uwana gəpəh à akul uwaga gesina, à mok uwana gələg la tataka aña kul la abà aw ay? ⁶ Kà uwana lagonay kà, tatak anik la ahəñ adəfal gay à ahəñ kà mas à wañ. Kasəlaw uwana adəfal gay à ahəñ: Kà uwana baña kasla aña adəslay kà, masla məzam uwaga adàpèhla gəl aña ala. ⁷ Iyay, lagonay ndzəfa aña mazigən gəl uwaga adəfah sləray la slaka azladza, mətəñ tatak uwaga kà la mapəhanula aña Zəzagəla. Ama tatak uwaga kà apaka vok la dazuwaya aw, say baña dza uwana adzala à ama, az vok aña la uwana adəbəza tetəvi. ⁸ La lig aña uwaga la ahəñ kà, masla məzam uwaga adàpèhla vok ala. La vudə uwana Sufəl Yesu adəsa à ahəñ la mazləbay aña, adəkəfay la afadə gay aña, adəziñ ala la mapəhla vok aña ala la abà.* ⁹ Masla məzam uwaga adəsa à wañ la ndzəfa aña seteni, adəfahəñ azlatsəhay sləray mavaləh ləv à azladza à gay anik anik, ngaha la azlanadzipo fida gə. ¹⁰ Adəpapatah azlamazehlaga gesina, la azlagay la azlasləray mawisiga aña anik anik gesina. Tadəzehla, kà uwana takweska gay marabəñ, uwana naka abəl atà, la uwaga takweska dziriga. ¹¹ Gay gə la uwaga, Zəzagəla la gəl aña adəvə à atà ndzəfa, kà atà aña madinəl gəl à fida uwaga à vok. ¹² Kiya uwaga kəla dza uwana adinə gəl à dziriga à vok aw, ama arab la mawisiga la abà, Zəzagəla adəfahalla seriya à gəl.

Zəzagəla atsatsəmàni akul kà magay azlaaņa

¹³ Say ‘Kikay’, məgod à Zəzagəla koksikoksi lakəl aña kul azladedə. Zəzagəla awoya akul, atsatsəmàni akul kà dagay madzəka gudəñ à vok kà aña mabəl akul. Kabələw kà la Masasəfok aña, uwana apəkakulla kà azladza aña, ngaha kabələw kà, kà uwana kakəsəw dziriga babay. ¹⁴ Zəzagəla azalà akul à uwaga à abà la gay marabəñ uwana məzakulañ. Azalà akul kà akul aña magay la mazləbay, uwana Sufəl gami Yesu Kristu agə la abà la gəl aña. ¹⁵ Tsa baña kiya uwaga kà, azladedə, wəfəw vok à uda la gay Zəzagəla la abà. Kiya uwaga kəsəwwəñ la ləv azlatatak uwana mətəpakulla amiyaka uwana mətəpakulla la gay amiyaka uwana mətsetser à akul matsəteray.

¹⁶ Sufəl gami Yesu Kristu la gəl aña, ngaha Zəzagəla Baba uwana tawoya anu, tapis à anu gay à vok, ngaha tavə à anu ndzəfa, kà anu aña manəfay kà uwana delga pəra, la mapəhay kà uwana dziriga pəra. ¹⁷ La vok mahamay aña, adzərəfəkulla koksikoksi, ngaha masla azlaka akul aña maf manewəñ à tatak uwana à afik adəsa à ahəñ.

3

Dəvəw kudə à Zəzagəla kà aña mi

¹ Ngaha zla, azladedə, aganay à uwana atəm, kà anu à ahəñ aya aña mapəh à akul: ‘Dəvəw kudə à Zəzagəla kà gay aña aña mad à huma à gay katskats, ngaha azladza aña masləkaway bokuba uwana apakə vok la tataka aña kul la abà babay. ² Ngaha aya,

* 2:4 2.4 Daniyel 11.36; Hezəkiyel 28.2 * 2:8 2.8 Yesayya 11.4

dèwàw kudfa à Zəzagəla kà masla aṅa manəṅla anu, kà azlaməna maɗfàh mawisiga la azlaməna makəsafər, kà uwana azladza gesina takəs dziriga aw!

³ Ama Sufəl gami kà, masla kà dziriga, adàdzərəɗfah akul à uda ṅgaha adànəṅla akul la azlamawisiga la abà. ⁴ Gay gà la uwaga kà, Sufəl gami avà à anu manewəṅ lakəl aṅkul babay, kà uwana məsəl kà, kadàfahwawəṅ uwana məpèh à akul, bà la huma la gay bay kà, kadàfahaw uwaga.

⁵ Awoyaṅ kà Sufəl Zəzagəla, azlaka akul, kà akul aṅa mawoyəṅ kaykay, kà akul aṅa mabas matərəbay bokuba uwana Yesu Kristu abasaṅ.

Makəs vok aṅa sləray

⁶ Azladedə, 'Kamkam', məgodf à akul la sləm aṅa Sufəl Yesu Kristu, kadzaw à ahəṅ la azlaməna masa la slaka gà aw, kà uwana takəs matapatla gami uwana məzàtəṅ aw. ⁷ Hadfay, akul la gəl aṅkul kasəlaw madz à ahəṅ gami, uwana mədza à ahəṅ la tataka aṅkul la abà lela, nəfàw slaka asik gami, kà uwana anu azlaməna masa aw.

⁸ Kiya uwaga məzàw tatak may aṅa azladza deyday aw. Məyà vok məkəs aṅuf la adi ala məɗfahàhà sləray mahəṅay la mavakay, kà anu aṅa madzadzər gəl gami, ṅgaha kà anu maf mahanay à azlaməna gay Zəzagəla à gəl aw. ⁹ Ndzer, məsà mazlak anu aṅkul nəma. Ama məɗfahàhà kiya uwanay kà, kà akul aṅa manəfay madz à ahəṅ gami. ¹⁰ La dziriga kà, mok uwana mələg la tataka aṅkul la abà kà, məpèh à akul la dazuwaya kà, dza uwana asal sləray aw kà, azuw tatak may suwəṅ aw.

¹¹ Uwana məpèh à akul kiya uwanay kà, kà uwana mətəsnəṅ kà aṅuvaw la tataka aṅkul la abà kà azlaməna masa, taɗfah sləray aṅatà aw, say mavalàh à gəy aṅa azladza anik à abà pəra. ¹² Tsəhay dza uwaga kà, gənav à akul, ṅgaha gəfaha à akul akur à lig la sləm aṅa Sufəl Yesu Kristu: 'Kà atà taɗfahà sləray aṅatà la tetəvi aṅha, kà atà aṅa madzadzər gəl aṅatà!'

¹³ Azladedə, akul kà kayàw vok aṅa maɗfàh delga ɗikiɗiki aw. ¹⁴ Kiya uwaga baṅa dza akəs matapla gami, uwana mətsetsər à akul à wakità uwanay à abà aw kà, dùwàwwalla à adi, kafawwal sləm aw, kà ziruwɪ aṅa makəsay. ¹⁵ Ama kanərəzaw masla bokuba masla məzam aw, say kawullawla matsihila bokuba deda aṅkul.

Ayyi makəd gəl à ahəṅ

¹⁶ Sufəl, masla aṅa makor lapiya, avà à akul lapiya la kaslà gesina. A bà la mana beymi bay. Awoyaṅ kà Sufəl adza à ahəṅ la akul gesina.

¹⁷ Gi Pol, la uwana gətsetsər wakità uwanay la ahəl gulo: 'Ayyi'. Nəṅàwwəṅ bokuba uwana gəfà ahəl à wakità gulo uwana à afik gesina.

¹⁸ Mapis gay à vok aṅa Sufəl Yesu Kristu agay la akul gesina.

MATERA ANA WAKITÀ UWANA POL ATSETSÈR À TIMOTAWUS Première Lettre de Paul à Timoth'ee

Ayyi

¹ Gi Pol, la uwana gətsetser wakità uwanay, gi masləlay anja Yesu Kristu, bokuba uwana asa à Zəzagəla Baba. Masla məbəl anu, ngaha la Yesu Kristu uwana məfa madzugway gami à masla à afik.

² A kak Timotawus, kak kona gulo dziriga, uwana la madiṅal gəl à vok la abà. Zəzagəla Baba gami, atà la Yesu Kristu Sufəl gami, tapis à ka gay à vok la mabasakan, ngaha la mav à ka lapiya.

Mahəl à ahəṅ kà azlamatapla uwana akəs vok aw

³ Uwana gənavà ka, à mok uwana gədà à kutso Makeduniya, 'Dzà à ahəṅ la Efesus', gəgəf à ka, kà uwana azladza tapəhla azlamatapla mawisiga ala la ahəṅ la abatà, ngaha kà asà à gi kà: 'Dzàw à ahəṅ', kagəf à atà. ⁴ Gəf à atà kà: 'Sàkàw mapəh azlagay anja azlababa ankul maviyaga, ngaha la azlawakitə anja azlasləm anjatà deydayga. Kà uwana azlagay uwaga kà, tatsalla magazlay à waṅ deyday pəra, uwaga kà adəh sləray à Zəzagəla la uwana la abà, məsəl la madiṅal gəl à vok la abà aw.

⁵ Uwana akəs vok!' Kapəh à atà, kà tawoy azladza anik, ngaha la masal uwana asa à uda la ləv sətaka la tsəh, la madzugway delga, ngaha la madiṅal gəl à vok, uwana kaskas la tsəh aw. ⁶ Azladza anik tasək à tetəvi dziriga la tsəh ala, ngaha tanəfa à azlatatak deydayga, kusonuga. ⁷ Tanərez gəl anjatà kà kiya atà, kà azlaməna matapla azladza anik lakəl anja Zəzagəla. Ama tasəl uwana tapəhay aw, tasəl tatak uwana tawadfa gəl à afik aw.

⁸ Anu kà, məsəl kà mapəhay anja Zəzagəla kà delga, à baṅa dza adəhla sləray bokuba uwana akəs vok. ⁹ Baṅa uwaga avika ka aw: Mapəhay kà tadəhəṅ kà anja azladza dziriga aw, ama kà anja azlaməna tsakana, la azlauwana tapəsew Zəzagəla, la azlauwana takəs gay Zəzagəla aw, la azlauwana takweska Zəzagəla, la azlauwana tadəh mawisiga, la azlauwana tavəl à Zəzagəla à ahəṅ lakəl à adi, la azlauwana takəf azlababa anjatà la azlaiyà anjatà, ngaha la azlaməna makəf dza gesina. ¹⁰ Ngaha aya kà anja azlaməna à gəl gaw, la azlaməna matsatsəl vok kà atà kà atà zil zil, la azlaməna madaw dza ala, la azlaməna fida, la azlaməna mazaw mawadəy fida gə, ngaha la azlaməna madəh tatak gesina uwana la tetəvi anja aw. ¹¹ Matapla uwanay kà, asà à uda kà la gay marabəṅ uwana la abà kafà à gi à ahəl, ngaha uwana lakəl anja Zəzagəla, uwana mazləbəy gə, uwana barka gesina atsa à uda la masla la abà koksikoksi.

Kikay kà vok mahamay anja Zəzagəla

¹² 'Kikay', gəgəf à Sufəl gulo Yesu Kristu uwana ahəṅagəla la ndzəfa gesina kà anja sləray anja. 'Kikay', gəgəfal kà uwana anəṅ gi à adi, ngaha afà à gi à sləray anja à abà. ¹³ Kay, nəma kà, gəpəh mawisiga lakəl anja, dagay uwarə gədatərəbəṅ la matsəkəl magəfəhay à gəl babay. Ama kà, vok ahamà à Zəzagəla kà gi, kà uwana mok uwatà kà, gi la madiṅal gəl à vok aw, ngaha bay kà, gəsəl uwana gəfəhəṅ aw aya. ¹⁴ Sufəl gulo adapis à gi gay à vok mənṅa mənṅa, ayyà agəf à gi, kà mav à gi madiṅal gəl à vok, ngaha la masal uwana ahamà à anu gay à vok la masla. ¹⁵ Aganay à gay uwana akəs vok kà azladza gesina takəsay: Yesu Kristu kà asà à waṅ à gudəṅ à vok kà məbəl azladza gesina uwana azlaməna tsakana. Gi la uwana gəfəw à atà

gesina la tsakana la tataka aṅatà la abà. ¹⁶ Uwaga à uwana, vok ahamà à Zəzagəla kà gi: Asal kà Yesu Kristu apəhla ala la gi la abà, kà gi la uwana gi masla tsakana kaykay. Mabasiṅ aṅha gesina uwana adefəṅ lakana kà, kà aṅa à huma à gay gesina babay, azlauwana tadinṅ gəl à masla à vok, tadàbəza sifa adəv à gay aw. ¹⁷ Zəzagəla la uwana Sufəl uwana amətsay aw, dza anəṅəṅ aw, masla kokudfa gəl aṅha, la uwana maslay la masləkaway la mazləbay agay la masla aṅa koksikoksi. Amen.

¹⁸ Timotawus, kona gulo, gəpəh à ka gay uwanay à ahəl: Awul à ka à gəl à gay uwana azlaməna mapəh à atà gay à ahəl tapəh lakəl aṅak uwarà. Gay aṅatà kà apakà ka tatak mapalla guvəl delga. ¹⁹ Kəsà madiṅal gəl à vok la madzugway delga. Ama azladza anik kà takweska manəf madzugway delga aṅatà, ṅgaha kà uwaga à uwana tadinṅ gəl à azlatatak dziriga à vok aya aw. ²⁰ La tataka aṅatà la abà Himene atà la Alekəsander la ahəṅ, uwana gəbək atà à seteni à ahəl kà atà aṅa maguray, ṅgaha kà atà aṅa mabəz tetəvi aṅa mawisiga lakəl aṅa Zəzagəla aya aw.

2

Matapla lakəl aṅa madəv kudfa

¹ Terəṅa dadəṅ, gəfaha à akul akur à lig, kà akul aṅa manavay la slaka Zəzagəla la madəv kudfa, la 'Kamkam', ṅgaha la 'Kikay' kà aṅa azladza gesina. ² Say madəv kudfa kà aṅa azlaməṅ sufəl, ṅgaha kà aṅa azlaməna makoray gesina, kà anu aṅa madz à ahəṅ la titi la abà la lapiya, la manəb vok gami la Zəzagəla, la maday delga ṅgaha mawoyəṅ gə, kà la muwulla gəl à vədah la huma Zəzagəla, ³ aganay tatak uwana ahəd, ṅgaha akəs à Zəzagəla gami masla mabəl anu à gəl. ⁴ Asal kà azladza gesina tabəlay, tatsa à waṅ kà masəl gay dziriga aṅha, ⁵ uwana apəh à azladza kà, kà Zəzagəla kà tekula pəra, ṅgaha masla masəl anu vok la Zəzagəla kà tekula pəra, uwaga kà Yesu Kristu, uwana apakà dza la sləb vok. ⁶ Uwana asà à waṅ, avà gəl aṅha, kà anu gesina aṅa magay azlaaṅha la makor gəl la abà. Kiya uwaga agədà madzugway aṅa Zəzagəla à afik la kaslā uwana Zəzagəla akədəv à ahəṅ, asal mabəl azladza gesina. ⁷ Kà uwaga à uwana Zəzagəla apakəgəla kà masləlay aṅha. Gi masla matapla à maham à ahəṅ dza, kà gi aṅa mazəh gay matsidəyga à azlauwana azla Yahudiya aw, kà atà tadinṅal gəl à vok. Gəpəhay kà dziriga, gədəh fida aw.

⁸ Asa à gi kà, kəla slaka gesina azladza tadəv kudfa, tadziyla ahəl aṅatà à slaka Zəzagəla kà madəv kudfa la ləv tekula, la kokudfa mapak ləv ṅgaha la kokudfa magazlay.

Azlamis la maham à ahəṅ məna gay Zəzagəla la abà

⁹ Asa à gi babay kà azlamis taduw lukut uwana à vok akəsà à vok, la mazlayla kà vok, ṅgaha la mawulla gəl à vədah, awkà tadəfaha vok la zlazladfa, la azlamatsaha à gəl dzadzakwaga aw, baṅaw la kəsaf sləm luwəluwə gə, baṅaw la azlatatak bədə anik anik, baṅaw la lukut uwana tsakalay aṅha məṅga aw. ¹⁰ Ama tatak uwana ahəd à atà kà, tadəfahla sləray dzəba aṅha səla aw gə. Azlamis uwana: 'Məkəs Zəzagəla' tagod kà, say tadəhəṅ kiya uwaga. ¹¹ Say azlamis takəs matapla la titi ṅgaha la mawulla gəl à vədah. ¹² Gəvə tetəvi à mis kà matapla baṅaw aṅa makoray lakəl aṅa azlazil aw, say tadza à ahəṅ titi. ¹³ Kà uwana terəṅa kà taṅəl kà Adama dadəṅ, ṅgaha la lig la ahəṅ Hawwa.☆ ¹⁴ ṅgaha aya kà, seteni apapət kà Adama aw, ama apapət kà mis. Kiya uwaga à uwana mis akweska mapəhay aṅa Zəzagəla.☆ ¹⁵ Ama mis adəbəlay kà la mayyi bəzi, à baṅa awəf vok à uda la madiṅal gəl à vok la abà, la masal, la tsikasla ṅgaha la mawulla gəl à vədah.

☆ **2:13** 2.13 1Musa 2.7,21-22 ☆ **2:14** 2.14 1Musa 3.1-6

3

Azlamasiga aña maham à ahəŋ məna gay Zəzagəla

¹ Aganay à gay uwana akəs vok: Baŋa dza ayàh kà masla aña magay masla manəŋla azlaməna manəfay anik kà, ayahani kà sləray delga gà. ² Masiga aña azlaanik kà, say agay kà dza uwana dza aslala vok aña matsəfal gay à tsəh aw kəla. Agay zil aña mis tekula, agay dza tələmmaga, agay masla makəs gəl aŋha, agay dza uwana sləm aŋha la ahəŋ, agay masla makəs azlaməlok dza la ahəl səla, agay masla masəl matapla à azlaanik babay. ³ Aga masla guzu aw, masla magazlay aw, ama aga kà masla mabasɪŋ, agay masla gay baŋaw masla mawoy sili aw. ⁴ Kəla kà, agay la maslay kà manəŋla huɖ gày aŋha lela, agay masla mawulla haŋkəli à azlabəza aŋha, kà atà aña matsən gay aŋha, ŋgaha kà atà aña mazləb masla. ⁵ Uwana gəpəh kiya uwanay kà: Kà uwana baŋa dza aslala vok aña makoray huɖ gày aŋha aw, ma kakay aslala vok aña manəŋla maham à ahəŋ məna gay Zəzagəla ma? ⁶ Dza mawga la madiŋal gəl à vok la abà kà, kapakawwan ala kà masiga la katskats aw, kà uwana baŋa mawga kà, zlahaw zlapay adal à gay, ŋgaha seriya atəfal à gəl bokuba aña seteni uwana aga. ⁷ Say agay mawoyəŋ gà la huma à azladza, uwana tasəl Zəzagəla aw babay, kà masla aña magay mapəseway gà aw, ŋgaha masla aña matəf à melkaw aña seteni à abà aw.

Azlaməna mazlakay la maham à ahəŋ məna gay Zəzagəla la abà

⁸ Azlaməna mazlak maham à ahəŋ məna gay Zəzagəla kà, say tagay mawoy atà gà, tagay azlaməna magolla dza la mas guzu aw, baŋaw azlaməna mawoy sili la tetəvi mawisiga aw. ⁹ Say tatsizllay kà à dziriga aña madiŋal gəl à vok uwana à afik, Zəzagəla apəhatàla, takəsay uwaga la madzugway dziriga la ləv tekula. ¹⁰ Kəla kà, say maham à ahəŋ anərəz atà dadəŋ suwan, à baŋa gay aga à atà la vok aw kəla, ŋgaha tada à sləray à abà. ¹¹ Azlamis aŋatà babay kà taga azlamis delga, taga azlaməna masàh gəl aw, taga azlatələmmaga, taga azladziriga la azlatatak gesina la abà. ¹² Say azlaməna mazlak à maham ahəŋ məna gay Zəzagəla, tagay la mis tekula tekula, tagay azlaməna manəŋla azlabəza aŋatà lela, la huɖ gày aŋatà gesina. ¹³ Kà uwana baŋa tadəh sləray aŋatà kà tabəza gəl aŋatà la madz à ahəŋ lela la abà, ŋgaha tadəpəhay la magədəŋ à afik aña madiŋal gəl à vok, uwana anu la abà la maham gay à vok la Yesu Kristu.

Godega aña madiŋal gəl à vok

¹⁴ Amiyaka gi la manewəŋ la abà kà mad à awtày, kà manəŋ ka nekwa kà, gətsetser à ka wakità uwanay aya. ¹⁵ Kà uwana amiyaka gəda à awtày katskats aw babay kà, wakità uwanay adətapakalla madz à ahəŋ delga, lakəl aña huɖ gày aña Zəzagəla, uwana maham à ahəŋ məna gay Zəzagəla, uwana azlaaŋa Zəzagəla uwana la sifa. Maham à ahəŋ uwaga kà maŋuləv aña matapla dziriga. ¹⁶ La tetəvi aña matapla uwaga, Zəzagəla apəhlan ala, ŋgaha apəhanula maday gami la tetəvi aŋha la tsəh. Gay uwaga kà aduwa tatak gesina ndzer, uwaga lakəl aña dza, uwana apəhla vok ala, bokuba dza la sləb vok.

Masasəfok tsikasla apəhla masla ala, kà dza dziriga, ŋgaha azlamalika tanəŋəŋ. Azladza tatsənəŋ mapəhay aŋha, tazàhà gay aŋha à azladza uwana tasəl Zəzagəla aw, ŋgaha azladza gudəŋ à vok tadiŋ gəl à masla à vok.

La lig aña uwaga la ahəŋ kà, Zəzagəla azəb à zagəla à slaka mazləbay gà à abà.

4

Azlaməna matapla fida

¹ Masasəfok Zəzagəla apəhay la paraka kà, la makəf gəl à ahəŋ kà, azladza anik tadəsaka madiŋal gəl à vok la tsəh ala. Tadəsakay kà gay aña azlamasasəfok

mavavar dza, la azlatatak uwana azlamasasəfok mawisiga, tapàhla ala. ² Azlaməna matapla uwaga kà, azlaməna magolla dza, à uwana tadàzah dza ala. Madzugway aṅatà kà mamatsay. ³ Azladza uwaga kà tadàvarah gay kà mazəb mis la mazuw azlatatak anik anik. Tekedika Zəzagəla adahàhà azlatatak uwaga kà, kà azlaməna madiṅal gəl à vok, uwana tasəl dziriga aṅa mazuway. A baṅa: 'Kikay', tagodal kà uwaga gesina kà, mawisiga aya aw. ⁴ Kà uwana dèwdèw tatak uwana Zəzagəla adahàṅ kà delga. Tatak məzla gà la abà amiyaka tekula aw, ama say məbəza uwaga kà la 'Kikay', la magod à Zəzagəla. ⁵ Kà uwana gay Zəzagəla la madəv kuḍa gami la uwana taguwaga tsikasla.

Masla sləray dziriga aṅa Yesu Kristu

⁶ Baṅa katapla azlatatak uwanay à azladedə gami anik kà, kadəgay masla sləray dziriga aṅa Yesu Kristu, la uwaga kadəpəhla vok ala, kà kadzadzə vok la masasəfok dziriga aṅa madiṅal gəl à vok, ṅgaha la matapla dziriga uwana kanəfa gesina. ⁷ Ama matugway aṅa azladza deydayga, uwana akəs à Zəzagəla à gəl aw kà, wùts ala. Nəṅla gəl aṅak la guba aṅa Zəzagəla la abà, la mawad vok à uda. ⁸ Makəs uwana asa à vok, kà la azlaslaka anik kà, akəs vok ṅuv ṅuv, ama mahoy guba aṅa Zəzagəla akəs vok kaykay, kà uwana uwaga kà adala anu à sifa à abà lagonay, ṅgaha bawbaw la huma la gay bay aya. ⁹ Uwaga la uwana gay makəs vok gà, à uwana naka kəla uwabeyuwi akəsay la ləv tekula. ¹⁰ Kà uwaga à uwana məfah sləray la mawadàh vok à uda, kà uwana məfa manewəṅ gami kà à Zəzagəla uwana à afik la sifa, kà masla məbəl kà kaykay, kà azladza uwana tadin gəl à masla à vok gesina.

¹¹ Sləhalla vok à azlaməna madiṅal gəl à vok tatak uwanay kà, təpatàla uwaga lela. ¹² Kak bəzi dən nəma, ama kasak à dza apəsew ka aw. Gà la huma aṅa azlaməna madiṅal gəl à vok gesina la gay aṅak uwana la abà kapəhay, kà bokuba kak tetəvi aṅatà la maday aṅak la abà, la madz à ahəṅ aṅak la abà, la masal aṅak la abà, ṅgaha la madiṅal gəl à vok aṅak la abà gesina. ¹³ Wad vok à uda kà matapatàla kà uwana la wakità Zəzagəla la abà la mapəh à atà gay matsidəyga, tsərəh à mok uwana gədàda à awtəy. ¹⁴ Kapəsew mavəy aṅa Zəzagəla, uwana avà à ka la məbəkla ahəl à gəl aṅa azlamasiga, uwana tapəh à atà gay ahəl lakəl aṅa mavəy, uwana kabəzal kà aṅa sləray, aw. ¹⁵ Fə sləm à sləray uwaga la tetəvi aṅha, kà uwabeyuwi aṅa manəṅ kà, kà kaday kà à huma à gay pəra. ¹⁶ Kəsà gəl aṅak, dəhà haṅkəli la matapla aṅak babay. Baṅa kanəfa mədehəṅ delga kà, kadàbəlay, ṅgaha la azladza uwana tatsəb à ka sləm.

5

Maday aṅa azlaməna madiṅal gəl à vok

¹ Iyay zlà, gəgod à ka aya kà, kaslah məl à makoz zil à gəl la ndzəda aw, ama kapəhal gay, kà bokuba uwana kapəh à baba aṅak. ṅgaha aya kasləha vok à azlamedega babay kà bokuba uwana kadehəṅ à azladedə aṅa gəl aṅak. ² Kəs azlagəl mis babay, kà bokuba azlaiyà aṅak, ṅgaha azlaiyaw mis babay, kà bokuba azladedə aṅak dəgam gà la ləv sətaka.

³ Fə sləm à azlamis kuḍa deṅdaṅga, sləkàw atà! ⁴ Ama kəla kà, baṅa mis kuḍa anik la bəzi amiyaka la bəzi aṅa bəzi aṅha bay kà, say asəl madəh sləray, manəfay aṅha la huma azlaməna huḍ gəy aṅha, akəs iyà aṅha la ahəl səla, baṅaw iyà madzidziga aṅha, kiya uwaga la uwana akəs à Zəzagəla à gəl. ⁵ Mis kuḍa deṅdaṅga ndzer, uwana masla mafal sləm la ahəṅ aw, afə madzugway aṅha kà à Zəzagəla à afik pəra, asak à madəv kuḍa à Zəzagəla mavakay la mahanay aw, kà masla aṅa mazlakay. ⁶ Ama mis kuḍa, uwana adza à ahəṅ la matsidəy la abà kà, masla kà bokuba məmətsay gà, amiyaka adagay la sifa aṅa lakana. ⁷ Maslà gà la uwaga à uwana kapəh à atà, kà dza

aŋa maβəz atà à tsəh la gay anik anik la abà aw, kà masləh à atà ala vok. ⁸ Baŋa dza afa à sləm à mayyi à tsəh ala aŋa baba aŋha aw, ŋgaha kayakay gà à məna huɸ gày aŋha aw kà, masla kà akweska maɸiŋal gəl à vok, masla kà ŋuləm dza uwana aləg maɸiŋal gəl à vok.

⁹ Lagwa kà, katsetser sləm aŋa mis kuɸa à sləm aŋa azlamis kuɸa anik à adi la wakità la abà, kà say à baŋa adagay la mavay dzik mukwa dadàŋ. Ŋgaha bay kà, say baŋa adà à zil kà asik tekula à ahəl pəra. ¹⁰ Ŋgaha babay kà, say agay masəlay gà la azlasləray delga uwana la abà, aɸahàŋ, azigəna azlabəza aŋha la tetəvi delga la tsəh, ŋgaha akàs azlaməlok dza uwana tasàh à mtəga aŋha la ahəl səla, ŋgaha apalàh asik à azlaməna maɸiŋal gəl à vok, ŋgaha à baŋa azlakàhà à azlauwana la matərabay la abà, ŋgaha la madz à ahəŋ aŋha la abà kà, aɸahàhà kà say sləray delga pəra, kà tsetsər sləm aŋha.

¹¹ Ama kweskà matsetser sləm aŋa azlamis kuɸa meɸega à wakità aŋa sləm à afik, kà uwana la kaslà uwana madzugway aŋatà adàda à zil à tsəh kà, tadàgola vok à tetəvi aŋa Kristu la tsəh ala kà mad à zil. ¹² Kiya uwaga kà, tadàgay azlamawisiga, kà maɸəzl makəs vok aŋatà uwana ala la maɸiŋal gəl à vok la abà. ¹³ Ŋgaha aya kà, tadàzah kaslà aŋatà ala, kà madahay gày la gày. Ama uwana zlazladfa kà: Tagay azlaməna gay zlawzlaw, ŋgaha la mavalàh à gay uwana à abà, abəza kà atà aw aya, bokuba azlamavdzagogur, ŋgaha la azlagay uwana azlayla atà aŋa maɸəhay aw, bay kà tapahay. ¹⁴ Kà uwaga à uwana gəgof à ka: Asa à gi kà azlamis kuɸa meɸega kà tadah à zil, tayyàh bəza, ŋgaha taf sləm à huɸ gày aŋatà suwaŋ. Ŋgaha kà anu aŋa mav tetəvi à masla məzam gami, kà masla aŋa maɸəh mawisiga lakəl gami aw. ¹⁵ Gəpəh kiya uwanay kà, kà uwana azlamis kuɸa meɸega la ahəŋ, tawulla à tetəvi dziriga la tsəh ala kà manəf seteni. ¹⁶ Baŋa azlamis kuɸa la ahəŋ la tsəhay aŋa mis maɸiŋal gəl à vok gà kà, say masla la uwana azlaka à atà. Awkà ayahla mazlakay aŋa maham à ahəŋ məna gay Zəzagəla aw, kà uwana uwaga kà mahanay məŋga. Say maham à ahəŋ məna gay Zəzagəla kà azlakay kà uwana dza aŋha la ahəŋ aw.

¹⁷ Azlamasiga uwana tanəŋla maham à ahəŋ məna gay Zəzagəla lela kà, azlayla à atà aŋa maβəz mazləbay huɸ səla, zləbàw azlauwana taziŋ gay Zəzagəla kayakay, la azlauwana tatapla tatak à azladza anik, ¹⁸ kà uwana wakità Zəzagəla agof kà: Kafa zagoma à kokur uwana à gay à baŋa azlab hi aw. Kà uwana masla sləray kà azlayla kà vok, abəza masik aŋha. ✧ ¹⁹ Baŋa tapuwa gudzi à masiga à gəl kà, kakəs la katskats aw, say baŋa azladza səla tapəh baŋaw məna sayda makər dàŋ kəla. ✧ ²⁰ Sləh à atà à vok la dzuwaya à azladza uwana tadàh mawisiga, kà guba akəs azlaanik kà maɸàh mawisiga uwaga.

²¹ ‘Kamkam’, gəgof à ka la huma aŋa Zəzagəla, ŋgaha la huma aŋa Yesu Kristu, ŋgaha la huma aŋa azlamalika uwana matsatsamanatà gà, kəs maɸəhay uwanay, kà kasani azladza makasay, la sləray aŋak uwana la abà kaɸəhəŋ gesina aw. ²² ‘Kamkam’, kavà vok aŋa maβək ahəl aŋak à dza à gəl, kà masla aŋa maɸàh sləray aŋa masla mazlakay aw. Kada à tsakana aŋa azladza anik à abà aw, nəŋla gəl aŋak la sətaka la abà.

²³ Kasah bà iyaw pəra aw, ama ŋuləm kasah iyaw matavəruk ŋuv ŋuv babay kà, kà huɸ aŋak uwana akaɸ ka.

²⁴ Tsakana aŋa azladza anik kà, adàpəhla vok ala batsewya kokuɸa maβəz maɸàh seriya. Ama aŋa azladza anik kà adàpəhla vok ala kà bawbaw la huma la gay vuɸ seriya. ²⁵ Kiya uwaga babay à uwana, sləray dziriga adàpəhla vok ala. Amiyaka uwana dza anəŋaŋ lakana babay aw kà, ndzer adàpəhla vok ala.

6

¹ Azlamayà gesina kà, takəs gay aña azlaməŋga aŋatà la masləkaw atà lela, kà dza aña mapəh mawisiga lakəl aña Zəzagəla, ŋgaha lakəl aña matapla gami babay aw. ² Kəla mayà uwana məŋga aŋha kà masla madiŋal gəl à vok kà, apəsew masla kà uwaga aw, la magoday kà: Anu səla kà tekula, kà uwana anu la deda. Ama bà la uwaga kà, adaha sləray uwana dafuwa à gay uwana uwarà, kà uwana adaha sləray kà aña dza uwana adav ləv aŋha à Kristu, ŋgaha awoya masla.

Matapla fidaga

Aganay tatak uwana katapla à azladza anik. Dzərədàhàtala kà madəhəŋ. ³ Baña dza asəla matapla anik à waŋ, à baña anəfa kà azlagay dziriga aña Sufəl gami Yesu Kristu aw, ŋgaha akəs matapla gami lakəl aña madz à ahəŋ delga la huma aña Zəzagəla aw, ⁴ masla kà adazigəŋ gəl aŋha, asəl tatak aw, masla kà, asəl kà matsigay, ayah kà magazlay lakəl aña azlagay. Aganay tatak uwana atsa à uda la uwaga la abà: Maŋor, magazlay, la azlagay matafad ləv, la madzugway mawisiga lakəl aña azlaməna magay. ⁵ Masla kà agazlahay pəra, kà uwana madzugway aŋha kà mawisiga, asəl dziriga aya aw. Adzugw kà baña anəfa tetəvi aña Zəzagəla kà: 'Gədəgay gorobu', agod.

⁶ Ndzer kà, manəf tetəvi aña Zəzagəla kà uwaga riba məŋga à baña dza akəsa madz à ahəŋ aŋha. ⁷ La dziriga kà, tatak la ahəŋ məsəlla à waŋ la ahəl à gudəŋ uwanay à vok aw, ŋgaha tatak la ahəŋ mədàdala la ahəl aya babay aw. ⁸ Baña anu la tatak may, ŋgaha la lukut kà, uwaga kà dəŋ aŋami. ⁹ Ama kà aña azlauwana tayah magay gorobu kà, azlamavavaray tavavar atà, tasokw à madiŋay aña mavavaray à abà. Tawoya azlatatak kusoŋuga uwana tadala azladza à mazila ŋgaha à akəl à abà. ¹⁰ Kà uwana adi aña sili kà slilih aña tsakana gesina. Azladza tafa yewdi à uwaga à gay, kà uwaga à uwana tazahla la tetəvi aña madiŋal gəl à vok la tsəh, tabiya matərabay à gəl aŋatà kaykay.

Sawaray makəd gəl à ahəŋ

¹¹ Ama kak, à kak dza aña Zəzagəla, həl à ahəŋ la azlatatak uwaga la abà gesina. Yàh kà dziriga, la masləkaw Zəzagəla, la madiŋal gəl à vok, la masal, la mabasiŋ, ŋgaha la tələmna aña ləv. ¹² Pà slagəla dziriga aña madiŋal gəl à vok, kà kak aña mabəz sifa adəv à gay aw. Zəzagəla la uwana azalà à ka à sifa uwaga à abà, la mok uwana kazà gay sayda aña madiŋal gəl à vok aŋak, dzəba aŋha səla aw, la huma aña azladza aŋuvaw. ¹³ La huma Zəzagəla uwana av sifa à azlatatak gesina, ŋgaha la huma aña Yesu Kristu uwana azà sayda dziriga la huma aña PontsəyusPilatus, à uwana, gəfahakala akur à lig: ¹⁴ Kəs mapəhay, ŋgaha gəŋ sətaka la kokudfa ŋazla aña àläh tsərəh à mavakay uwana Sufəl gami Yesu Kristu adəzlanjalay, hazlan. ¹⁵ Adəwul à waŋ, la kasla uwana Zəzagəla akədəv à ahəŋ. Masla Zəzagəla kà, aga la maslay gesina, masla kokudfa gəl aŋha la uwana Zəzagəla. Adza à ahəŋ la marabay la abà. Masla la uwana Sufəl aña azlasufəl, ŋgaha Məŋga aña azlaməŋga. ¹⁶ Masla kokudfa gəl aŋha la uwana amətsay dikiidiki aw. Masla adza à ahəŋ la ufaka uwana la abà, dza aslala vok aña mad à awtəy aw. Dza la ahəŋ adanəŋ hudf adi aŋha tetuwa aw. Mazləbay la maslay, uwana adəv à gay aw, aga la masla aña koksikoksi. Amen.

¹⁷ Fàhà à akur à azlaməna gorobu aña gudəŋ à vok uwanay à lig, kà atà aña magay azlazlapay aw, sləh à atà à vok la magodf à atà kà, tafa madzugway aŋatà à ləmana uwana à afik, adədəv à gay pəra aw, ama kikay tagodf à Zəzagəla, uwana avà à anu tatak uwaga gesina la maduw vok, ŋgaha kà anu aña magay la marabay. ¹⁸ Fàhà à atà à akur à lig, kà atà aña madfah delga la ləmana aŋatà, kà atà aña magay azlagorobu la sləray delga aŋatà uwana la abà tadəhəŋ. Say tavəh tatak aŋatà la azladza anik, taga azlahuŋwa aw. ¹⁹ Kiya uwaga kà, tadəhadf ləmana aŋatà à ahəŋ la slaka delga,

kà atà aṅa maḅəz sifa dziriga. Uwaga kà bokuba dza uwana atadukw gày aṅha à ahəṅ.

²⁰ Kak, Timotawus, nəṅla tatak uwana tafà à ka à ahàl lela. Həl à ahəṅ kà azlagay deydayga, ṅgaha à uwana la tetəvi aṅa maḅḅal gəl à vok aw, la azlamatsigay badaga, la azlauwana azladza tazalalla masəlay zəṅzəṅga, ama tsa uwaga kà, masəlay dziriga aw. ²¹ Azlaanik tasləkaw uwaga la huma azladza, ama tasak à tetəvi aṅa maḅḅal gəl à vok la tsəh ala.

Vok mahamay aṅa Zəzagəla aga la akul.

MASƏLA ANA WAKITÀ UWANA POL ATSETSÈR À TIMOTAWUS Deuxième Lettre de Paul à Timoth'ee

Ayyi

¹ Gi Pol, la uwana gətsetser wakità uwanay, gi la uwana masləlay anja Yesu Kristu bokuba uwana asa à Zəzagəla Baba. Masla asləl gi à wan, kà gi anja mapàh à azladza, lakəl anja sifa uwana Zəzagəla apəh à ahəŋ, kà anja azlauwana azlaan̄ha, la Yesu Kristu la abà.

² A kak Timotawus, uwana kak bəzi gay ləv gulo. Zəzagəla Baba la Sufəl gami Yesu Kristu tapis à ka gay à vok la mamatsakan̄ ala, la mav à ka lapiya aya.

Pol adzərəd Timotawus ala

³ ‘Kikay’, gəgodf à Zəzagəla gulo kà kak. Gəsləkaw masla bokuba uwana azlababa gulo madzidziga tasləkàwàh. Gədəv kuɗa mavakay la mahəna gesina. La madəv kuɗa gulo la abà gesina kà gədzugway kà à kak pəra. ⁴ Awula gi à gəl à iyaw tugwi an̄ak, ŋgaha gədàya an̄a kà gəl à tsəh kà kaykay kà an̄a manəŋ, kà gi an̄a magay la marabay. ⁵ Gədzugway lakəl an̄a madiŋal gəl à vok an̄ak, uwana kaskas la tsəh aw la Yesu Kristu la abà. Teran̄a kà, iyà an̄ak madzidziga Loyəs, la uwana adiŋal gəl à vok dadən̄, la lig la ahəŋ iyà an̄ak Yuniya adiŋal gəl à vok aya babay. Ŋgaha gəsəl ndzer kà, kak la madiŋal gəl à vok uwaga la abà suwan̄. ⁶ Kà uwaga à uwana, gəgodf à ka kà, kəsən̄ lela, kasakal à tsəh ala à mavày uwana Zəzagəla avà à ka ndzəɗa kà madəhəŋ aw. Zəzagəla avà à ka uwaga la mok uwana gəbək à ka ahəl à gəl. Dahà uwaga la ləv tekula. ⁷ Kà uwana Masasədok, uwana Zəzagəla avà à anu kà, agubgubanula aw, ama Masasədok an̄ha la uwana ahənəŋnula la ndzəɗa, la masal ŋgaha aslèhà anu vok babay.

⁸ Kiya uwaga zlà kà, guba akəs ka kà maz sayda lakəl an̄a Sufəl gami aw, ziruwì akəs ka kà gi, uwana la dan̄ay bay aw, gi la dan̄ay kà Yesu. Ama kəs mas ŋgərpa kà gay marabəŋ bokuba an̄ulo babay, ɗahən̄ kiya uwaga la ndzəɗa uwana Zəzagəla avà à ka. ⁹ Masla la uwana abəl anu, ŋgaha azalà anu, kà anu an̄a magay tsəhay an̄ha, awkà la sləray uwana məɗahən̄ aw, ama la dabaray an̄a gəl an̄ha, la vok mahamay an̄ha bay. ‘Ayyà’, agodf à anu, kà vok mahamay an̄a Yesu Kristu, la mok uwana gudəŋ à vok aləg madzəka vok dadən̄. ¹⁰ Lagonay kà, vok mahamay uwaga kà, adasa à uda la paraka, kà uwana masla mabəl anu, Sufəl gami Yesu Kristu, adasa à wan̄. Azəb anu ndzəɗa an̄a mamətsay la kəl ala. La maz gay marabəŋ uwana apəhla ala kà sifa uwana adəv à gay aw.

¹¹ Zəzagəla afà à gi à gəl kà maz gay marabəŋ uwanay, à gi uwana gi masləlay an̄ha, ŋgaha gi masla matapla à azladza uwana la uda. ¹² Kà uwaga à uwana gəs ŋgərpa mən̄ga la dan̄ay uwanay la abà. Ama bə la uwaga kà, ləv aval à gi à gay aw, kà uwana gəsəl ndzer kà, masla la ndzəɗa kà manəŋla gay marabəŋ uwana afà à gi à ahəl, tsəràh à makəɗf gəl à ahəŋ. ¹³ Kəsà gay uwaga katsənən̄ la slaka gulo, nəfà uwaga, bokuba maftsa à vok kà mapahla ala kiya uwaga, dzà à ahəŋ la madiŋal gəl à vok la abà, ŋgaha la masal la abà, kadəhəŋ kiya uwaga, kà uwana kahamà gay à vok la Yesu Kristu la abà. ¹⁴ Kəsà azlatatak delga uwana tafà à ka à ahəl, la mazlak an̄a Masasədok Zəzagəla, uwana adza à ahəŋ la anu la abà.

¹⁵ Bokuba uwana kasəl kà, azlaməna gay Zəzagəla la kutso Asəya takweska gi gesina, Fizel la Hermozen la tataka an̄atà babay. ¹⁶ Ama Onisəfor kà, koksikoksi

adzərèd̀fàhà gi à uda, ziruwi akès la huma azladza kà uwana gi la danjay aw. Gədəv kudfa à Sufəl Zəzagəla kà mad̀h delga à huf gày anha. ¹⁷ Ama bà la uwaga kà, mok uwana adabəza à Rom kà, adzəkà mayàh gi la abatà la ləv tekula, tsəràh à uwana abəzà gi. ¹⁸ Sufəl Zəzagəla azlakàh la mavàl vok mahamay anha la vud seriya. Mok uwana gi la gudəh Efesus kà, azlakà gi mənğa, kak bay kà, kasəl uwaga lela.

2

Mafay madzugway à Yesu Kristu à afik, kà magay slodzi anha

¹ Iyay, kà kak bəzi gulo kà, wàd vok à uda kà Yesu Kristu anja mav à ka ndzəfa, la vok mahamay anha, la maham gay à vok la masla la abà. ² Uwana katsənàh kà gay Zəzagəla, uwana gəzàh la paṇaw gulo, gay uwaga gəzàh la huma anja azladza anjuvaw kà, həl, dàla à azladza dziriga anik, uwana atà la maslay kà matapla à azladza anik babay suwan.

³ Kùdà masik anak la ṅgərpa la abà, bokuba slodzi dziriga anja Yesu Kristu, uwana abas ṅgərpa. ⁴ Baṇa dza ada à guvəl, à baṇa asal kà makəs à mənğa anha à gəl, kà ada à gay anja azladza à uda à abà aw, bà kà kiya uwaga kà kak babay. ⁵ Dzùgw babay à baṇa dza agur mahoyay, kà à baṇa ahoy la tetəvi la tsəh aw, masla adàbəz masik aw. ⁶ Masla mapəs guf babay kà as ṅgərpa mənğa. Kiya uwaga kà akəs vok, kà masla atsa à vok à mazuw mayyay anja guf anha kəla. ⁷ Dzùgw lakəl anja uwana gəpəh à ka la abanay, kà uwana Sufəl Zəzagəla adavà à ka maslay kà matsən uwaga gesina.

⁸ Awul à ka à gəl lakəl anja Yesu Kristu, mayyi à tsəh ala anja sufəl David. Masla aməts, ṅgaha awul à uda la mamətsay. Bokuba uwana gay marabəh uwana gəzàh agod. ⁹ Kà gay marabəh uwanay gəziṅ, la uwana tatsərkwà gi, à gəsa ṅgərpa bokuba masla mad̀h mawisiga. Ama gay Zəzagəla kà matsərkwəṅga aw. ¹⁰ Kà uwaga à uwana gəkəs mabasiṅ gesina. Gəbasiṅ kà, kà azladza uwana Zəzagəla atsatsàmàni atà, kà atà babay anja mabəz tetəvi uwana Zəzagəla adàbela à atà, ṅgaha kà atà mad à abà anja madz à ahəh la slaka mazləbay anha uwaga à abà anja koksikoksi. ¹¹ Ndzer, gay uwana gəpəhay kà dziriga:

Səl kà, baṇa məməts la masla kà, mədàdza à ahəh la sifa la masla aya.

¹² Baṇa anu məbasiṅ la magəfəh à afik kà, mədàkoray la slaka gə la masla.

Baṇa anu məkweska masla kà, masla babay kà, adəkweska anu.

¹³ Ama baṇa anu azladza dziriga la huma anha aw, tsa masla kà adza à ahəh kà la dziriga la abà.

Kà uwana masla aslala vok anja mawis gəl anha ala aw, masla kà agəf uwana à afik apəh.

Məfah sləray kà anu anja makəs à Zəzagəla à gəl

¹⁴ Wulà uwana gəpəh à ka à azlaməna madiṅal gəl à vok, kà atà anja madzugway, pəh à atà à vok à abà la huma Zəzagəla, kà atà anja magazlahay lakəl anja azlagay deydayga aw, kà uwana azlamagazlay uwaga kà, azlaka anu aw, ama awis ləv anja azlauwana ala tatsəbal sləm. ¹⁵ Ama kak kà, wàd vok à uda, kapəhla vok ala la huma Zəzagəla, kiya uwana akəs à Zəzagəla à gəl, bokuba masla sləray uwana ziruwi azəh kà sləray anha aw. Tàpla gay dziriga à azladza anik bokuba uwana akəsa vok.

¹⁶ Ama kà azlagay deydayga uwana akəs à Zəzagəla à gəl aw, kada à abà aw, kà uwana azladza uwana tapəhay kiya uwaga kà tawis vok ala la tetəvi anha la tsəh kaykay. ¹⁷ Matapla anjatà kà, adagay kà bokuba gorodzu uwana akufla aya aw, ahadz sləb vok. La tataka azladza uwaga la abà kà, Himene atà la Filet la abà, ¹⁸ tasàk à tetəvi dziriga la tsəh ala, ṅgaha tawəs madiṅal gəl à vok anja azladza anik ala, la magodfay kà: Mawul à uda la mamətsay kà tsewwa adagay. ¹⁹ Tekedika matatukway

uwana Zəzagəla atatukw kà, aga la ahəŋ la ndzəda lela. Aganay uwana matsetseray gə lakəl aŋha: Sufəl Zəzagəla asəl azladza aŋha. Ŋgaha bay kà: Kəla uwabeyuwi uwana agoɗay kà: ‘Gi aŋa Zəzagəla, asakà à madàh mawisiga.’✧

²⁰ La mənɗ gày la aku kà, azlatasà luwàluwà la azlaaŋa gursu pəra la aku aw, uwana tapàɗ mapàɗay la ahàf la ahəŋ, ŋgaha la uwana tanjàláh maŋalay la abisl. Matera kà aŋa madəvaday pəra, ama azlaanik kà aŋa kəla mavakay. ²¹ Baŋa dza ag gəl aŋha tsidəŋa la azlatatak mawisiga uwanay la abà, gəpəh kà, masla kà tadàɗahla sləray kà aŋa ləvamay. Kiya uwaga adàgay aŋa mənɗa aŋha aŋa tetuwa, masla kà akəsla vok, masla aga nekwa aŋa madàhla sləray delga gesina. ²² Hòy à azlamadzugway bəzi aŋak à ahàl, yàh magay tərɗa, madiŋal gəl à vok, masal ŋgaha lapiya, la azlauwana la ləv tekula tazalà à Sufəl Zəzagəla. ²³ Ama kweskà azlagay deydayga la azlagay kusoŋuga, kà uwana uwaga kà atsala magazlay à waŋ. ²⁴ Haɗay, masla sləray aŋa Sufəl Zəzagəla kà aga masla magazlay aw. Masla aga mawoyəŋ gə la slaka azladza gesina, aslala à vok kà matapla azladza, ŋgaha aga masla mabasiŋ bay. ²⁵ Matapla à azlaməna matsəɗ gay la ləv tələmmaga, ŋgaha zlahaw kà, Zəzagəla adàvə à atà ndzəda kà aŋa mabəɗla vok la madz à ahəŋ aŋatà la abà, ŋgaha kà atà aŋa masəl dziriga. ²⁶ Kiya uwaga kà, tadàbəz haŋkəli aŋatà, ŋgaha tadətəf à malkaw aŋa seteni uwanay la gay ala, adəkəs atà à gay, adəpakatàla kà azlaməna manəf masla.

3

Makəɗ gəl à ahəŋ gudəŋ à vok

¹ Səl azlagay uwanay gəpəhkala lela: La makəɗ gəl à ahəŋ gudəŋ à vok kà, azlakaslà zlazladfaga adəgahay la ahəŋ. ² La haɗay gə kà, azladza tadəgahay azlaməna mawoy gəl aŋatà pəra, azlaməna mawoy sili, azlaməna mazigəŋ gəl, azlaməna zlapay. Tadəvatsah gay à Zəzagəla à vok, ŋgaha tadəkasaŋ gay aŋa azlababa aŋatà aw. ‘Kikay’, tadəgoɗ à azladza uwana tazlak atà aw, atà tadəsləkaw azlatatak dziriga aŋa Zəzagəla aw. ³ Tadəgahay dzaŋdzaŋ, vok mahamay aŋatà adəgay la ahəŋ aw, tadəgahay azlaməna masàh gəl, ziruwi aŋatà adəgahay la ahəŋ aw, tsetsi dadəŋ aŋatà la ahəŋ aw, tadəgay azlaməna məzam aŋa dziriga. ⁴ Tadətah kaf à azladza anik à gəl, tadəɗahah azlatatak kusoŋu gə, tadəgahay azlaməna zlapay, tawoya à ahəŋ kà uwana asa à vok aŋatà pəra kà Zəzagəla. ⁵ La huma yewdi aŋa azladza kà: ‘Anu azlaməna manəf Zəzagəla’, tagoɗ. Ama tsa tadəpəsew ndzəda aŋha. Hòy à azlatsəhay dza uwaga à ahàl. ⁶ Azladza anik aŋatà tadəha à huɗ gày aŋa azladza, ŋgaha tatapahla azlamis guɓguɓga aŋatà, kà manəf atà. Azlamis uwaga tadəha tsakana mənɗa, tanəfa à azlatatak mawisiga gesina uwana tatawwal à tsəh. ⁷ Azlamis uwaga, asa à atà matapla azlatatak, ama tasla aŋa masəl tatak dziriga tetuw aw. ⁸ Kà uwana azladza mawsiga uwaga kà, tatsəɗ gay à dziriga à tsəh, kiya uwana uwarə Yanes atà la Yambərəs tadəhəŋ à Musa à vok. Madzugway aŋatà kà mawisiga, tavə ləv aŋatà à Zəzagəla la dziriga aw.✧ ⁹ Ama tadada à huma kərkər aw, kà uwana azladza gesina tadəsəl atà azlakusoŋu. Kiya uwana apakà vok kà la Yanes atà la Yambərəs uwaga.

Sawaray makəɗ gəl à ahəŋ

¹⁰ Ama kak kà, kanəfa gi la matapla gulo la abà, la maday, la madz à ahəŋ, la madiŋal gəl à vok, la mabasiŋ, la masal ŋgaha la matsizlla à ahəŋ gulo la abà gesina, ¹¹ la matərabay ŋgaha la mas ŋgərpa gulo la abà babay. Kak, kasəl gesina tatak uwana abəzà à gi, mok uwana gi la Antiyews, la Ikoniyum, la Lisətəra, à ŋgərpa uwana gəsàh. Ama Sufəl Zəzagəla apəlla gi ala la uwaga la abà gesina. ¹² Haɗay gə, kəla uwabeyuwi uwana asal madz à ahəŋ la dziriga, la maham gay à vok la Yesu

Kristu la abà kà, agay la ahàl aña azladza kà matèrəbəŋ. ¹³ Ama azlaməna magolla dza tadàda à huma à gay kà kaykay, kà mavavarəh azladza anik à bada à abà, atà la aslasl gəl aŋatà, kà tadəvavarəh gəl aŋatà. ¹⁴ Ama kak kà, dzà à ahəŋ la uwana la abà katapla, la uwana kabəzal la ləv tekula. Nəfà azlatatak uwaga, kà uwana kasəl dza uwana atapàkala kà masla atapàkala ala lela. ¹⁵ Dagay la bəzi gə, kasəl wakità Zəzagəla lela, masla la uwana avà à ka haŋkəli uwana adala ka à mabəlay à abà la madiŋ gəl à Yesu Kristu à vok. ¹⁶ Dəwdəw uwana tatsetsèr à wakità Zəzagəla à abà kà, uwaga kà afad' gay aña Zəzagəla, kà mapəhla dziriga ala, kà madukwla mawsiga la vok ala kà matsizilla anu ala, ŋgaha kà mapəhanula maday dziriga uwana akəs à Zəzagəla à gəl. ¹⁷ Uwana Masasədok Zəzagəla adəhəŋ kiya uwanay kà: Kà kəla dza uwana anəfa Zəzagəla aña magay madəh vok à ahəŋ gə, ŋgaha mahənlə gə, kà aña sləray delga gesina.

4

¹ Gənavə ka la huma aña Zəzagəla, ŋgaha la huma aña Yesu Kristu uwana adəfah seriya à azladza uwana à gəl taləg la sifa la azlauwana tadamatsay, gənavə ka la sləm aña Sufəl Yesu uwana adəwul à waŋ kà makoray la dziriga. ² Kà uwaga pəh gay Zəzagəla à azladza la magəfəŋ à afik, amiyaka adəgay la kaslā matsidəyga, amiyaka la matèrəbəy la abà kà. Pəhla mawisiga aŋatà à azladza, dzərəcfəhatàla, kà madəh delga koksikoksi ŋgaha təpatàla la mabasiŋ dziriga. ³ Kà uwana kaslā adəsa à waŋ à uwana azladza tadadiŋ gəl à dziriga uwana à vok, uwana tatəpatàla aw, kà tadəwoyəŋ kà madəh mawisiga, kiya uwaga kà, tadəkəsa azlaməna matapla fida aŋuvaw, tadətsən uwana asal ləv aŋatà. ⁴ Tadətsəb sləm à dziriga aya aw, tadəgola vok kà aña maf sləm à mapəhay aña azladza fida gə à abà. ⁵ Ama kak kà, dà à huma à gay la masləh vok à vok aŋak koksikoksi, basà azlaŋgərpa, zəŋ gay marəbəŋ à azladza, hənə sləray aŋak ala la tetəvi aña Zəzagəla la tsəh.

⁶ Kà aŋulo kà, kaslā adaslay kà aña mamətsay, adaslay kà makəd' gi, bokuba tatak uwana takəd' à Zəzagəla. ⁷ Gəfahə sləray aña Yesu Kristu kà la ləv tekula, bokuba dza uwana ap slagəla lela. Gədəvla uwana: ‘Dahəŋ’, Zəzagəla agəd' à gi, bokuba dza uwana adəv magur mahoyay à gay. Ama kà aña azlatatak uwana mədiŋal gəl à vok kà, gənəfà la dziriga. ⁸ Lagonay kà, gəsəl kà, Zəzagəla adadəha à gi tatak aña masik gulo à ahəŋ la zagəla, kà uwana gəfahəŋ kà uwana dziriga. Sufəl uwana adəh seriya à azladza la tetəvi aŋha, la uwana adəvə à gi masik uwatà, la vud' seriya. Adəvay kà à gi pəra aw, ama adəvə à azlauwana asa à atə makuday gesina babay.

Madz à ahəŋ aña Pol

⁹ Wədf' vok à uda kà kak aña mabəz à gi à vok katskats. ¹⁰ Kà uwana Demas kà aməlgəla, kà uwana masla kà asəl matsidəy aña lakana uwanay, adiy aŋha à Tesaloniki. Kərəsan, masla kà ahəd à Galatiya, Titus ahəd à Dalmatiya bay. ¹¹ Luka pəra la abanay. Mok uwana kadəsa à waŋ kà, kadəsəlla Mark à waŋ la tsəh, kà uwana masla kà adəkəs gi vok la sləray aña Sufəl Zəzagəla la abà. ¹² Tisik kà gədasləl à Efesus. ¹³ Mok uwana kadəsa à waŋ kà, dəguwà la Tərowas, la mtəga aña Karpus, kadəhəl gi lukut anasl gulo, uwana gəsəkəl à ahəŋ la abatà, la azlawakitə gulo babay, kaykay gə, kà azlawakitə zlap uwana matsetseray la vok.

¹⁴ Alekəsander, masla gəzla adəh à gi mawisiga à vok kà mənğa. Sufəl Zəzagəla adəfahalla seriya à gəl kəla aña mawisiga aŋha, uwana adəhəgəŋ à vok suwaŋ. ¹⁵ Həyal à ahəl à kak, kà uwana awoyà gay gami aw kà aña tetuwa.

¹⁶ Terəŋə uwana gəpəh gay gulo la huma seriya kà, dza la ahəŋ kà mazlak gi aw, azladza gesina, takweskə gi. Delga kà Zəzagəla aməts à ata tsakana aŋatà ala. ¹⁷ Ama Sufəl Zəzagəla adzà à ahəŋ la gi, avà à gi ndzəfa, kà gi aña madəv sləray gulo uwana

maz gay marabən à gay, kà azladza gudəŋ à vok gesina tatsənàŋ. Zəzagəla la uwana gətəf à sikalaveri la gay ala. ¹⁸ Gəsəl kà, Sufəl Zəzagəla adəpəlgəla, la azlatatak mawisiga la abà gesina, ŋgaha adənəŋla gi, kà gi aŋa mad à makoray aŋha à abà la zagəla babay. Məzləbà masla koksikoksi! Amen.

Ayyi makəf gəl à ahəŋ

¹⁹ Dàh gi ‘Ayyi’ gulo à Pərəskila atà la Akilas. ‘Ayyi’, gəgod babay à hudf gay Onisəfor. ²⁰ Erasətus kà, agəf à Korintiya, ŋgaha gəsək Tərofim à ahəŋ la Milet, kà uwana đuvats azən. ²¹ Mərə vok kà mas à waŋ à abanay à mok uwana təla awkusa aləg madzəka à vok dadəŋ.

Ebulus, Pudın, Linus ŋgaha Kəlodiya uwana misga la azladza uwana la abanay gesina, đadfaħà à ka: ‘Ayyi’.

²² Sufəl Zəzagəla anəŋla ka!

Mapis gay à vok agay la akul gesina!

WAKITÀ UWANA POL ATSETSÈR À TITUS Lettre de Paul à Tite

Ayyi

¹ Gi Pol, la uwana gətsetser wakità uwanay, gi mayà aña Zəzagəla, ngaha gi masla matapla la slaka Yesu Kristu. Zəzagəla asləl gi, kà gi aña mazəŋ azladza, uwana Zəzagəla adatsatsamani atà, kà atà aña madiŋ gəl à masla à vok, ngaha tatapla dziriga kà mapəhanula maday, uwana akəs à Zəzagəla à gəl. ² Gəđahəŋ kiya uwanay kà, kà azladza aña masəlay kà atà la sifa adəv à gay aw la Zəzagəla, uwana adəh fida aw. Amiyaka gudəŋ à vok kà adadzəka vok dadəŋ, à uwana Zəzagəla apəh gay aña sifa uwaga à azladza à ahəŋ aw. ³ La kaslà uwana anəts à ahəŋ, apəhanula sifa uwaga, uwana la gay aŋha la abà. Zəzagəla uwana masla mabəl anu, afà à gi gay uwaga à ahəl, afà à gi à gəl, kà gi aña matapla à azladza.

⁴ Gətsetseray kà à kak Titus, kà uwana kagay kà bokuba kak bəzi huđ gulo, kà uwana anu səla nna mədiŋaw gəl à Yesu Kristu à vok. Zəzagəla Baba, la Yesu Kristu, uwana abəl anu, tapis à ka gay à vok la mav à ka lapiya.

Sləray uwana Titus adəhəŋ la Kəreta

⁵ Gəsakà ka la Kəreta la gudəŋ uwana la tataka iyaw la abà, kà kak aña madəhəh azlatatak uwana taləg madəhəh vok à ahəŋ la tetəvi aŋha. Ngaha kà kak aña matsatsamani azlamasiga, kà atà aña magay məna manəŋla məna gay Zəzagəla, la kəla huđ gudəŋ gesina, bokuba, uwana gətəpkala.

Uwa à uwana azlayla kà magay masiga uwa?

⁶ Dza uwana kakəsani kà magay masiga kà, say agay zil gəy, uwana tasləhàla vok aw, agay zil aña mis tekula, azlabəza aŋha tagay azlaməna madiŋ gəl à Yesu Kristu à vok, maday aŋatà agay delga kà azladza aña manərez atà, tadəh mawisiga aw, ngaha tagay azlaməna makəs gay aña azlababa aŋatà koksikoksi. ⁷ Masiga aña azlaməna gay Zəzagəla kà mayà aña Zəzagəla. Kiya uwaga kà, say agay kokudə mawisiga tetuwa. Agay zlapay aw, agay masla ləv aw, agay masla guzu aw, agay masla mayəh gay aw, ngaha bay, agay masla mawoy sili aw. ⁸ Ama agay kà masla makəs azlaməlok dza la ahəl səla, awoyəŋ kà madəh azlatatak delga pəra, aga masla masləh vok à vok aŋha agay dzirirga, aga dza aña Zəzagəla lela, aga masla mabasiŋ. ⁹ Say adəh haŋkəli la gay marabəŋ, uwana mətapla à azladza. Baŋa adəhəŋ kiya uwanay kà, adəbəz tetəvi kà matapla gay uwaga à azladza anik, ngaha adədzərəđəh atà à uda la gay uwaga babay. Ngaha adəpahla ala la paraka, kà azlaməna maf gasa à gay marabəŋ à gəl kà, azlayla atà aw.

¹⁰ Bək azlamasiga à ahəŋ kiya uwaga, kà uwana azladza aŋuvaw tadədzadzaŋah gəl ala, koksikoksi tapəhay kà azlatatak uwana takəs vok aw, tavavar azladza babay. Azlauwana tadəhəŋ kiya uwaga kà kaykay gə, kà tsəhay Yahudiya, uwana kadavəw vok à uda tagod. ¹¹ Delga kà, azlamasiga aña azlaməna gay Zəzagəla tadəđ à atà gay à ahəŋ, kà aña matapla azlatatak uwaga à azladza aw, kà uwaga la uwana tawis huđ gəy aña azladza anik ala, la tatak uwana tatapla à azladza, tasla nəma aw, ama asa à atà mabəz sili la tsəhay matapla ziruwi gə uwaga. ¹² Dza anik la ahəŋ, uwana zil gudəŋ Kəreta bokuba atà, apəh à ahəŋ uwarə, uwana adəpaka vok, apəh la paŋaw aŋha: ‘Koksikoksi azlaməna gudəŋ Kəreta tapahay kà fida, tasəl gəl aw, bokuba azlatatak fəta, azlaməna masa, tadzugw kà à huđ aŋatà pəra.’ ¹³ Ndzer kà, gay

uwanay kà dziriga, kiya uwaga kà, slèh à atà à vok la mapèh à atà à vok à abà lela, kà atà aña manəf tetəvi aña Zəzagəla lela. ¹⁴ Pèh à atà à vok à abà lela kà atà aña manəf azlagay deydayga aña azla Yahudiya, uwana tapahahay aw, ngaha tanəfa gay aña azladza uwana takweska dziriga aw. ¹⁵ Baña la ləv tsədaña la huma Zəzagəla, dèwdèw adagay sətaka kà aña. Ama kà aña azladza uwana la ləv səla, ngaha tadin gəl à Zəzagəla à vok aw kà, tatak la ahəŋ sətaka kà aña atà aw. Kà uwana atà kà tadzugway kà azlatatak mawisiga aña madəhəŋ pəra, ziruwi aza à atà aw. ¹⁶ Tagəf la paraka kà: ‘Məsəl Zəzagəla’, ama tatak mawisiga uwana tadəhəŋ apəhla ala, kà tasəl masla aw. Tadzadzəŋəh gəl aña atà ala kaykay la azlamawisiga, taslala vok kà madəhəŋ tatak delga aya aw.

2

Kakay à sləray aña masla mapèh gay Zəzagəla ma?

¹ Ama kà aña kà, kapəl à azladza kà tatak uwana akəs vok kà aña tetəvi aña Zəzagəla. ² ‘Guzu akad akul aw’, gəf à azlamakoz zilga. ‘Dahàw tatak gesina kà la tetəvi aña, slèhàw vok à vok aña kul, dìnəw gəl à Zəzagəla à vok lela, wòyàw azladza anik la ləv tekula, basàwwəŋ azlanğəpa koksikoksi!’ ³ Pèh à azlamakoz mis bokuba uwanay babay: ‘Dahàwwəŋ kà uwana la tetəvi aña Zəzagəla la tsəh lela. Kakaləhàw sləm aña azladza anik ala aw, kagaw azlamayà aña guzu aw, ngaha tapawla azladza anik, uwana akəs vok lela!’ ⁴ Baña tadəhəŋ kiya uwanay kà, tadətapla azlaiyaw mis babay, kà mawoyəŋ azlazil aña atà, la azlabəza aña atà. ⁵ Ngaha tatapla azlaiyaw mis uwaga, kà masləh vok à vok aña atà, ngaha kà atà aña mazaḅ zil aw, ngaha tadəh sləray lela la huḅ gəy aña atà la madəhəŋ azlatatak delga, ngaha la makəs gay aña azlazil aña atà. Baña tadəhəŋ kiya uwaga, azladza tadətuğw mawisiga lakəl aña gay Zəzagəla aw.

⁶ Pèh à azlabəza kohana kiya uwaga babay. Gəf à atà kà: ‘Slèhàw vok à vok aña kul lela!’ ⁷ Gəpèh à ka babay kà kadəh tatak delga pəra, kà azlabəza kohana anik aña matapla tatak la uwaga la abà. Baña katapatàla tatak, tàpatàla la ləv tekula, kapa azlatatak deydayga aw. ⁸ Tàpatàla kà azlagay uwana tagəf à afik, dza aslala vok aña matsəḅal gay à tsəh aw, ngaha kà azladza uwana asa à atà matugw à ka mawisiga à vok kà, atà aña mabəz mawisiga la abà aw, ngaha ziruwi makəs atà.

⁹ Kà aña azlamayà kà, gəf à atà kà: ‘Kəsəw gay aña azlaməŋga aña kul koksikoksi, dəhəwwəŋ kà uwana akəs azlaməŋga aña kul à gəl, kabayaw vok gay akul nna aw. ¹⁰ Ngaha babay kà, katsatsakw ahəl la azlatatak aña kul la vok aw, dəhəwwəŋ kà azlatatak delga pəra, kà azlaməŋga aña kul aña masəlay kà akul azladza dziriga hadəy’, pèh à atà. Baña azlamayà tadəhəŋ kiya uwaga kà, azladza tadəsləkaw azlatatak uwana mətapla à azladza lakəl aña Zəzagəla, masla mabəl anu.

¹¹ Delga kà azlaməna gay Zəzagəla tadəh uwanay gəpəh lagwa, kà uwana Zəzagəla adəpəhla ala la paraka, kà vok mahamay aña à azladza gesina, kà masla aña mabəl atà. ¹² Bə uwana Zəzagəla adəḅəhəŋ kiya uwanay kà, məsəl kà, mənəfa tetəvi mawisiga aya aw, mənəfa azlatatak aña gudəŋ à vok, uwana takəf à anu à adi aya aw. Uwaga kà mok uwana anu la gudəŋ la vok la uwana, məslala vok kà masləh vok à vok gami. Məḅaha uwana akəs vok, ngaha mənəfa tetəvi uwana akəs Zəzagəla à gəl. ¹³ Məḅahəŋ kiya uwanay, kà maf gəl gami à mavakay uwana à afik, Yesu Kristu Sufəl gami adəzlanjalay la mazləḅay aña, uwana adəpəhanula Yesu masla Sufəl Zəzagəla gami məŋga. ¹⁴ Avə gəl aña, aməts à slaka gami à abà, kà masla aña mapəlanula la tsakana la abà, ngaha kà masla aña magəŋ anu sətaka la huma aña, kiya uwaga kà anu aña magay azladza aña, kà anu aña madəhəŋ azlatatak uwana delga koksikoksi.✠

✠ 2:14 2.14 2Musa 19.5; 5Musa 4.20; 7.6; 14.2; Mahabay 130.8

¹⁵ Tàpla à azladza azlatatak uwanay tadzərəfahatàla, pèh à atà à vok à abà, kà uwana asa à atà matsənəŋ aw, pèh à atà la maslay uwana Zəzagəla avà à ka. Ayà kagođ à azladza kà mapəsew ka aw.

3

Maday delga aŋa masla madiŋal gəl à vok

¹ Wulà à azlaməna gay Zəzagəla à gəl kà, takəs gay à azlasufəl la ahəl ala, la azlagumna aŋatà la mađàh uwana tapəhatàla. Tawoya mađàh azlatatak delga. ² Gòđ à atà babay kà tatsəđ gay mawisiga à azladza à tsəh aw, tagazlla aw, taga tələmna, takəs gay à azladza anik la ahəl ala babay. ³ Pèh à atà kiya uwaga, kà uwana anu babay uwarà məga azlakusoŋu babay, mədzadzàŋàhà gəl gami ala. Tetəvi dziriga aŋa Zəzagəla azà anu à adi, kà uwana mətawàh kà mađàh azlatatak mawisiga à tsəh pəra, mēgà kà azlamawisiga, tetuw tetuw mēfàhà à adi à tatak aŋa azladza anik à tsəh. Azladza tapəsèwàh anu, ŋgaha anu babay mēpəsèwàh atà suwaŋ. ⁴ Baməraka mēđàh kiya uwanay kà, kaslà anik, Zəzagəla uwana abəl anu, apəhla ala kà ađàh delga à azladza, ŋgaha awoya anu kaykay. ⁵ Abəl anu kà deyday, awkà abəl anu kà kà sləray delga gami uwana mēđahàŋ aw, ama abəl anu kà, kà vok mahamay uwana akəs kà anu. Azəb anu tsakana gami lakəl ala, ađahà uwaga kà la ndzəđa aŋa Masasəđok tsikasla, kiya uwaga mēgà mayyi vok mawga la maβəz sifa mawga. ⁶ Zəzagəla ahənanula pawaslwasl la Masasəđok tsikasla, la ahəl aŋa Yesu Kristu uwana maβəl anu. ⁷ Ađahàŋ kiya uwaga kà, kà anu aŋa maβəz sifa, ŋgaha mēsəl kà masla adàvə à anu sifa uwana adəv à gay aw, uwana apakà vok kiya uwanay kà, Zəzagəla ađahà delga, ŋgaha apakànula tsidfaŋa la huma aŋha. ⁸ Gay uwanay gəpəh à ka, kà dziriga.

Ŋgaha asa à gi kà katapla à azladza uwaga koksikoksi, kà azlauwana tadiŋ gəl à Zəzagəla à vok makəs azlatatak delga uwanay. Gay uwana mēpəhla ala kà dzəba aŋha səla aw, azlaka azladza babay. ⁹ Baŋa azladza tabay vok gay deydayga kà, kada à abà aw. Baŋa tapəhay lakəl aŋa azlababa madzidziga aŋa uwarà, kada à abà aw, kabay vok gay lakəl aŋa mapəhay aŋa Musa bay aw, kagazllaw akul nna aw, uwaga kà tatak kusonuga deyday gə pəra. ¹⁰ Baŋa dza atsalla mavàhla à tataka azlaməna gay Zəzagəla à abà kà, sləhal ala vok asik tekula, baŋa atsənà aw kà, kafal sləm aya aw, gòlla à lig à gay. ¹¹ Kasəl kà azladza uwana tavàh azlaməna gay Zəzagəla ala kiya uwaga kà, atà kà, tasakà tetəvi mawisiga, tsakana aŋatà adəpəhla vok ala la paraka.

Ayyi makəđ gəl à ahəŋ

¹² Gədàsləl dza anik à slaka aŋkul, zlahaw Arətemas, baŋaw Tisik, à uwana gədàsləl à awtày. Baŋa adàbəzà à awtày kà, wəđ vok à uda la katskats kà mad à maβəz gi vok la Nikopoləs. Gədzugw kà, la təla awkusa kà, gədàday kà madz à ahəŋ la abatà. ¹³ Zlakà Senas masla masəl mapəhay, ŋgaha zlakà Apolos babay, và à atà tatak uwana akəs vok kà aŋa mauguzahay aŋatà uwana tadàday lagwa, kà atà aŋa manəkudfa aŋa tatak aw. ¹⁴ Azlauwana tadiŋ gəl à Yesu à vok bokuba anu tasəlay babay, kà atà aŋa mađàh azlatatak dzəba aŋha səla aw gə uwaga kà, atà mazlakàh azlauwana la kudfa la abà. Baŋa tadəhəŋ kiya uwaga kà, madz à ahəŋ aŋatà adəgay deyday aw.

¹⁵ Azladza uwana anina la abanay, tadəha à ka: ‘Ayyi’ gesina. ‘Ayyi’, mēgođ à azladedə uwana tawoya anu la madiŋal gəl à vok la abà, ŋgaha vok mahamay aŋa Zəzagəla apis à akul à gay à vok gesina.

WAKITÀ UWANA POL ATSETSÈR À FILEMON Lettre de Paul à Phil'emon

Ayyi

¹ Gi Pol, la uwana gètsetser à ka wakità uwanay, gi la danjay kà Yesu Kristu. Gi Pol, anu la deda gami Timotawus, la uwana mètsetser à ka wakità uwanay, à kak slawda gami Filemon, uwana mɔdàh sləray gami anina. ² Mètsetser à maham à ahəŋ mənə gay Zəzagəla, uwana tasaha à waŋ à mtəga aŋak kà madəv kudfa à Zəzagəla, ŋgaha à deda gami duguga Appia la Arsip, uwana məpay anina kà aŋa Sufəl gami Yesu. ³ Zəzagəla Baba gami, la Sufəl gami Yesu Kristu tapis à akul gay à vok, ŋgaha tavà à akul lapiya aya.

Masal la madiŋal gəl à vok aŋa Filemon

⁴ Baŋa gədəv kudfa à Zəzagəla kà aŋak, ‘Kikay’ gəgodfahàh à Zəzagəla koksikoksi, ⁵ kà uwana gətsənaŋ kà kawoyàh azlaməna gay Zəzagəla ndzer, ŋgaha bay kà, kadiŋ gəl à Sufəl Yesu Kristu à vok. ⁶ Gədəv kudfa à Zəzagəla babay kà, kà maham gay à vok aŋak la azladza anik uwana tadiŋ gəl à Yesu Kristu à vok mad à huma à gay, ŋgaha kà kak aŋa masəl azlatatak delga gesina, uwana məbəzal kà masləkawla Kristu. ⁷ Deda gulo, tsəhay mawoyəŋ uwana kawoya azlaməna gay Zəzagəla anik arabà gi, ŋgaha adzərədfəgəla bay, kà uwana kà kak à uwana ləv aŋa azlaməna gay Zəzagəla anik atəslla ala.

Pol awula Onesəm à slaka Filemon

⁸ Bokuba uwana kawoya azlaməna madiŋal gəl à vok anik kà, ‘Kamkam’, gədəv à ka kudfa kà madfàh uwana gəpəh à kà. Tsa gi masla matapla la slaka Kristu kà, gi la maslay kà mapəh à ka, ‘Dahàŋ kà azlatatak delga!’ ⁹ Ama gəpəhay bokuba uwanay aw! ‘Kamkam’, gənavà ka, kà madfəhəŋ uwanay, kà uwana kawoya azlaməna gay Zəzagəla. Gi Pol, uwana gi makoz zil, la uwana gəpəh uwaga, ŋgaha lagwa bay kà, gi la danjay kà Yesu Kristu. ¹⁰ ‘Kamkam’, gəgodf à ka lakəl aŋa Onesəm. Agay masla madiŋ gəl à Yesu Kristu à vok, masla kà adagay bokuba bəzi hudf gulo. Gi, gədagay baba aŋha la danjay. ¹¹ Uwarà kà, akəs ka vok aw, ama lagonay kà, akəs gi vok, ŋgaha akəs ka vok bay

¹² Gəwulakala à awtəy, ama madzugway gulo kà lakəl aŋha. ¹³ La kaslà uwana gi la danjay kà gay marabəŋ kà, asa à gi kà madz à ahəŋ anu səla la abanay, kà masla mabədf à slaka aŋak à abà, kà mazlak gi. ¹⁴ Ama asa à gi madfəhəŋ kiya uwanay aw. Asa à gi, kà uwana asa à ka dadàŋ suwaŋ, ŋgaha la lig la ahəŋ asa à gi. Asa à gi maf à ka gasa à gəl, kà madfahgəŋ delga aw. Uwana gəwoya kaykay kà, kazlaka gi la ləv tekula.

¹⁵ Zlahaw kà, Zəzagəla avà tetəvi kà Onesəm mad madz à ahəŋ la slaka gà kà aŋa kaslà ŋuv, ŋgaha kà masla aŋa mawul à slaka aŋak, ŋgaha kà akul aŋa madz à ahəŋ la slaka gà, akul səla aŋa koksikoksi. ¹⁶ Lagonay masla kà mayà pəra aya aw, dafuwa à gay mayà, kà uwana masla kà bəzi gay ləv gami. Gi kà, gəwoya Onesəm kaykay, ŋgaha ŋodfegi kà mawoyəŋ aŋak kà aduwa aŋulo, kà uwana mayà aŋak, ŋgaha aya kà, kà uwana deda aŋak la Kristu la abà.

¹⁷ Baŋa kanərəz gi bokuba manalay aŋa madiŋal gəl à vok aŋak kà, kəs à mtəga aŋak, bokuba uwana naka kakəs gi suwaŋ. ¹⁸ Baŋa awis à ka tatak ala, baŋa kanəfay la goder, pəh à gi, kà gi aŋa mapəlla à ka. ¹⁹ Gi Pol, la uwana gètsetser uwanay la ahəl gulo, kà gədəpəl à ka. Ama naka kaslala vok kà manav gi aŋa mapəl à ka nəma aw, kà uwana kikay kà mapəh à ka sayda gulo à uwana kabəzà sifa adəv à gay aw, uwaga

kakoray lagwa. ²⁰ Kità kà, deda kà, gədəv à ka kudfa la sləm aɲa Sufəl Zəzagəla: ‘Dahəgəɲ tatak dzəba aɲha səla aw gà, uwana atasl à gi ləv ala, kà uwana anu səla nna mədahamaw gay à vok la Yesu Kristu la abà.’

²¹ La matsetser wakità uwanay, gəsəl la dziriga kà, kadàɗah uwana gənavà ka madəhəɲ. ²² Baɲa kadəkəs Onesəm à mtəga aɲak ɗahəgəɲ slaka à ahəɲ babay, kà uwana gəsəl kà Zəzagəla adàtsən tatak uwana kanavawwal, ɲgaha adàvə à gi tetəvi kà mad à awtày à mtəga aɲak.

Ayyi makəd gəl à ahəɲ

²³ Epafəras uwana aga la daɲay anu səla kà Yesu Kristu kà: ‘Ayyi’, agod à kak. ²⁴ Mark, Arəstarkus, Demas, Luka ɲgaha gi uwana mədàh sləray aɲa Zəzagəla la slaka gà, mədaha à ka: ‘Ayyi’.

²⁵ Vok mahamay aɲa Sufəl Yesu Kristu agay la kak.

WAKITÀ UWANA MASLA MATAPLA ANIK ATSETSÈR À AZLA IBƏRANƏṂKOWEN Lettre aux H'ebreux

Yesu la uwana aduwa azlaməna mapəh à atà gay à ahàl

uwana uwarà gesina

¹ Dagay uwarà, aṅuvaw Zəzagəla apəhàhàh à azlababa gami madzidziga, aslàläh à atà azlaməna mapəh à atà gay à ahàl à waṅ, apəh à atà gay la azlatetəvi anik anik gesina. ² Zəzagəla apəhay tsəràh à lakana uwana makəɸ gəl à ahəṅ aṅa mas à waṅ aṅa Yesu. Ama lakana avà à anu Kona aṅha. Aguwà à uda kà la ahàl aṅa Kona aṅha, à uwana Zəzagəla apəh à anu, adfahəṅ gudəṅ à vok. Zəzagəla afà à ahəṅ agəɸəṅ à afik kà masla aṅa makoray lakəl aṅa tatak gesina, ³ kà masla la uwana mənəṅa mazləbay aṅa ndzəɸa aṅa Zəzagəla. Masla kà kalkal la Baba aṅha Zəzagəla. La gay aṅha tsikaslaga akəs dèwdèw tatak uwana la gudəṅ la vok. Adfahà tetəvi anik à ahəṅ la uwatà la uwana Zəzagəla azəɸ tsakana à azladza lakəl ala gesina, kà atà aṅa magay sətaka. La lig aṅa uwaga la ahəṅ, ahàd, adzà madzay la ahàl kaf aṅa Zəzagəla lakəl, kà makoray la masla.

Yesu kà aduwa azlamalika gesina

⁴ Gay gà la uwaga, Zəzagəla adfahəṅ Kona aṅha, aduwa azlamalika gesina, kà uwana sləm uwana avà à Kona aṅha kà, aduwa aṅa azlamalika uwanay gesina.

⁵ Tetuw tetuw Zəzagəla apəh à azlamalika kiya uwanay aw:

"Kak Kona gulo, dagay lakana azladza tadəsəlay la paraka."✠

Malika la ahəṅ tetuwa à uwana:

"Gədàgay Baba aṅak, ṅgaha kadàgay Kona gulo",

agòɸal aw. ⁶ Ama la kaslà uwana Zəzagəla asal masləl Kona aṅha à waṅ, uwana lakəl aṅa tatak gesina la gudəṅ la vok agòɸ:

"Akul azlamalika gulo gesina sləkàwàw masla!"

⁷ Lakəl aṅa azlamalika kà, Zəzagəla agòɸ:

"Adfahà atà kà afad gà, ṅgaha azlamayà aṅha, azlaaläh akəl aya babay."

⁸ Ama lakəl aṅa Kona aṅa Zəzagəla kà, tatsetsèr à wakità Zəzagəla à abà lakəl aṅha kà:

"Kak la uwana Zəzagəla, kadàkoray aṅa koksikoksi, kadàkor tsəhay aṅak lela.

⁹ Azlatatak dziriga gà uwana awoyaṅ, ama azlamawisiga kà, asa à ka atà aw, kapəsew atà aṅa tetuwa. Gay gà la uwaga, Baba aṅak Zəzagəla azalà ka, ṅgaha apakà-kala mənəṅa gà la mav à ka maslay mənəṅa ɸaduwa à gay aṅa azladeda aṅak."✠

¹⁰ Zəzagəla agòɸ aya lakəl aṅa Kona aṅha:

"Kak Sufəl dagay la madzəka, kak la uwana kadfahà gudəṅ à vok la ahàl aṅak, la uwana kadfahəṅ zagəla babay.

¹¹ Dèwdèw tatak uwana kadfahəṅ kà, adàdəv à gay, ama kà aṅak kà, kadàdza à ahəṅ bokuba uwana kak la ahəṅ la uwaga kiya uwaga uwanay aṅa koksikoksi. Azla-tatak uwaga gesina tadàpakahay makoz bokuba azlalukut uwana atsəkway.

✠ 1:5 1.5 2 Samuyel 7.14; Mahabay 2.7 ✠ 1:9 1.9 5Musa 32.43; Mahabay 45.6-7; 104.4

- 12 Bokuba uwana kakəl lukut à abà, kiya uwaga la uwana kadàkəl à abà aña mafay aslələf à gəl. Ama kak kà, kak la ahəj bawtawta madz à ahəj aňak adàkəf gəl à ahəj aw."*
- 13 Aga la ahəj amiyaka tekula aña azlamalika à uwana Zəzagəla apəhal gay kiya uwanay aw:
 'Dzà madzay la ahəl kaf gulo lakəl, tsərah à uwana gəduw azlaməna məzam aňak! Gəpaka azlaməna məzam aňak bokuba azlatatak maf asik à afik aňak.'*
- 14 Azlauwa azlauwana tapakà azlamalika uwa? Atà kà azlaməna sləray aña Zəzagəla. Zəzagəla asləl atà kà mad mazlak azladza uwana adəbəl atà.

2

Məpəsew tatak uwana Zəzagəla apəh à anu aw

1 Tsa Zəzagəla aɓaɓanumà la Kona aňha kà, məpəzl sləm gami à gay uwana apəh à anu à ahəj, kà anu aña maz à tetəvi delga la tsəh ala dogdogog aw. 2 Məsəl kà gay uwana azlamalika tasəlla à waň kà, agəf à afik. Azlauwana tafəl sləm aw, ŋgaha la azlauwana takəs aw kà, seriya uwana Zəzagəla adükwatəň à gəl, kà azlawla atà ndzer. 3 Kakay mətəfay à baña mapak gay aña mabəlay ala kà gay deyday ma? Gay aña mabəlay uwana Sufəl Yesu azəň kà, azlaməna mazəň la uwana tagəfəň à afik: 'Fida la abà aw', Zəzagəla agəf. 4 Zəzagəla la gəl aňha babay apəhla ala kà gay uwaga kà ndzer, la madəhəj azlamasəlay anik anik, ŋgaha la azlatatak nadzipo gə, avà maslay kà à Masasəfok tsidəña, kà atà aña madəh azlatatak bokuba uwana asal.

Yesu apəhanula tetəvi uwana anaka məbəl ala

5 Uwaga kà azlamalika à uwana Zəzagəla aɓək atà à ahəj, kà aña makor gudəň uwana adàsa à waň aw, ŋgaha à uwana məpəhay babay la abanay aw. 6 Tekedika la wakità Zəzagəla la abà kà tatsətsər kà:

'Mana à dza asik kà mafal sləm la mazlakəň ma.

7 Kazəň à vəfah la tsəh aña azlamalika, kà aña kaslè ŋuv la lig la ahəj kà, kavəl masləkaway bokuba uwana tasləkawla məň sufəl.

8 Kà madəgolay uwaga à uwana, tafə tatak gesina à tsəh asik aňha.*

Uwaga kà apəhay kà lakəl aña Yesu uwana Kona aña dza. Kà uwana tapəh kà kiya uwanay, Zəzagəla afə tatak gesina à tsəh aňha. Uwaga asal magəday kà, tatak gesina kà la tsəh aňha pəra. Ama aña lagonay kà, mənəña akor azlatatak uwaga la dazwaya dadəň aw. 9 Ama məsəl kà Yesu akor azlatatak gesina uwarə. Kà aña kaslè ŋuv, Zəzagəla afə à tsəh aña azlamalika kà, la vok mahamay aña Zəzagəla aməts kà aña azladza gesina, kà mas ŋgərpa. La mamətsay aña Yesu la uwana, Zəzagəla avəl məňga, kiya masləkaw sufəl. 10 Tatak gesina kà aguwa à waň kà la slaka Zəzagəla, adəhà à atà kà kà aňha. Kiya uwaga asal kà mapakYesu ala sətaka la ŋgərpa uwana asə, ŋgaha azladza aňuvaw aña magay azlabəza aňha, ŋgaha kà atà aña mad à slaka mazləbəy aňha à abà. Uwaga kà Yesu la uwana aga atà la huma kà məbəl atà.

11 Yesu la gəl aňha apaka azladza ala sətaka, atà la Baba tekula, Zəzagəla la uwana Baba aňatə. Gay gə la uwaga Yesu azala atà ala: Azladedə. Ziruwi azəň kà aña uwaga aw. 12 Gay gə la uwaga agəf:

"Gədəpəhla sləm aňak ala la slaka azladedə gulo, ŋgaha la huma maham à ahəj aña tsəhay aňak kà mazləb ka."

13 Ŋgaha kà:

"Gədəfa vok gulo à kak Zəzagəla à afik."

Ŋgaha aya kà:

“Gi la uwanay la azladza uwana asakà, kà gəbəl atà.”[✧]

¹⁴ Azladza uwana apəhay la abanay kà, uwaga kà anu uwana la sləb vok. Kà uwaga Yesu la gəl aŋha adapakay babay bokuba dza la sləb vok, ŋgaha kà la mamətsay aŋha kà aslala vok aŋa makalàh ndzəda aŋa seteni à ahəŋ, uwana aga la maslay kà makad azladza. ¹⁵ Yesu adahàŋ kiya uwanay, kà guba makəs azladza kà mamətsay aya aw. Dagay uwarà tadzadzàràhà vok la guba aŋa mamətsay la abà, la abà gà kà, masla azəb guba uwaga ala. ¹⁶ Ndzer, wakità Zəzagəla apəh kà azlamalika la uwana tasà à waŋ kà aŋa mapəhay aw, ama asà à waŋ aŋa mazlak mayyi à tsəh ala aŋa Abəraham. ¹⁷ Bamərika akəs vok kà apakay kiya azladede aŋha gesina, kà magay məŋ madzahaga uwana adàh sləray kà aŋa Zəzagəla, kà masla aŋa mazəb tsakana à azladza lakəl ala, ŋgaha asəlla atà vok la masla. Uwaga məŋ madzahaga delga gà ŋgaha masla vok mahamay gà. ¹⁸ Lagwa aslala vok azlak azlauwana mapapatay apapat atà, kà uwana asà ŋərpa, ŋgaha agà mapapatayga.

3

Yesu kà aduwa Musa

¹ Azladede, la kità Zəzagəla babay atsatsəmàni akul kà akul aŋa magay tsəhay aŋha. Bamərika la uwaga kà, fəw vok aŋkul à Yesu à afik, masla la uwana Zəzagəla asləl à waŋ kà masla aŋa magay məŋ madzahaga aŋa madiŋal gəl à vok gami, uwaga masla la uwana, masla masəlla anu vok la Zəzagəla, uwanay la uwana məziŋ la dazuwaya. ² Yesu kà dza delga la slaka Zəzagəla, uwana akəsàni kà madfehəŋ sləray uwanay, bokuba Musa uwana agà delga la sləray aŋha la abà uwana adahàŋ, kà aŋa azladza huɸ gày aŋa Zəzagəla babay. ³ Tazləb dza uwana aŋəl gày dafuwa à gay gày la gəl aŋha. Lakəl aŋa Yesu la Musa babay kà kiya uwanay. Masləkaway uwana məsləkaw Yesu kà, aduwa aŋa Musa. ⁴ Ndzer, azlagày gesina kà, dza la uwana aŋalàh atà, ama dza uwana adahà tatak gesina kà Zəzagəla. ⁵ Haday, Musa kà aŋa masla sləray aŋa Zəzagəla uwana adahàhàŋ lela la huɸ gày aŋha gesina kà, sləray aŋha kà apahla à azladza azlatatak uwana Zəzagəla adapəhay la huma la gay. ⁶ Ama aŋa Kristu kà, ndzer masla Kona aŋha, uwana anəŋla huɸ gày aŋa Baba, bokuba magoday, masla kà lela la tsəhay sləray aŋatà uwana la abà, adfehəŋ babay. Anu tsəhay aŋha, anu babay kà anu azlaməna huɸ gày aŋha, à baŋa məda à huma à gay la mawad vok à uda, məfa madzugway gami à azlatatak uwaga à afik la marabay, tsəràh à makəɸ gəl à ahəŋ

Zəzagəla adav maduw ləv à tsəhay aŋha

⁷ Gay gà la uwaga Masasəɸok Zəzagəla agòɸ:
 “Lakana baŋa katsənaw kuda aŋa Zəzagəla kà,
⁸ Tsəbàwwal sləm. Kadzadzəŋaw gəl ala, bokuba uwana uwarà azlababa aŋkul madzidziga tadahàhàŋ aw, la kaslā uwatà, atà la fəta la abà, tadzà à ahəŋ la abà mavay dzik ufaɸ. Atà kà, tapəsəw Zəzagəla, ŋgaha tagùr masla.
⁹ Tanəŋà azlatatak dzəba aŋha səla aw gà uwana adahàhàŋ, dagay mavay dzik ufaɸ bay, tagùrla.
¹⁰ Gay gà la uwaga, ləv azàŋ à gi lakəl aŋa azladza uwaga. Gəl adakad à atà à vok, tatsən tetəvi gulo dadàŋ.
¹¹ Kà uwaga à uwana gəfàh akur à ahəŋ, la magod à azladza uwaga kà: Tetuw kadàdiya à slaka maduw ləv gulo à abà aw!”[✧]
 Zəzagəla agòɸ. ¹² Azladede gulo, dāhàw haŋkəli kà dza la tataka aŋkul kà aŋa magay la ləv mawisiga, ŋgaha kokuda madiŋal gəl à Zəzagəla à vok aya, kà masla aŋa masakiya à masla uwana la tsəh ala la sifa aw. ¹³ Ama tsatsəhàhàw vok ala kà akul

à akul koksikoksi, kà seteni aŋa mavavar akul à mawisiga à abà aw, ŋgaha kà akul aŋa magay azlaməna mapəseway babay aya aw. Dàw à huma à gay la madfehəŋ kiya uwanay koksikoksi, kà uwana lakana kà, Zəzagəla asal mabəfma à anu à ama aya. ¹⁴ Baŋa anu məda à huma à gay la makəs azlatatak uwana mədiŋal gəl à vok, dagay la madzəka tsərəh à makəf gəl à ahəŋ kà, kiya uwaga haɗay, mədàgay azladza aŋa Kristu.

¹⁵ Aganay à uwana tatsetsèr à wakità Zəzagəla à abà:

'Baŋa katsənaw kuda aŋa Zəzagəla lakana kà, kadzadzaŋaw gəl ala, bokuba uwana kadadzadzaŋawwanla uwarà.'^{*}

¹⁶ Azlauwa azladza uwana tatsənà kuda aŋha, ŋgaha tapəsèw uwa? Ndzer, azladza gesina uwana dagay uwarà Musa aguwà à atà à huma kà masəlla atà à uda la gudəŋ Misəra. ¹⁷ Kà madegolay ma, uwa à uwana Zəzagəla agà magurayga mavay dzik ufaɗ uwa? Ndzer kà, atà azladza uwana tafahà tsakana. Kà uwaga à uwana tamàts à fəta à abà. ¹⁸ Kà azlauwa? Kà azladza uwaga à uwana: 'Gəfàha akur à ahəŋ kà la tetuwa tadəbək asik à slaka gulo uwana à abà gədàduw ləw aw', agòf. Ndzer uwaga kà, kà azlauwana takweskà gay aŋha. ¹⁹ La kiya uwanay kà, azladedə gulo, mənəŋaŋ kà tabək asik à slaka maduw ləw à abà aw kà, kà uwana tadìŋ gəl à Zəzagəla à vok aw.

4

¹ Dagay uwarà, Zəzagəla apèh à azladza kà adəv tetəvi à azladza kà madla atà à slaka maduw ləw aŋha uwana apèh à ahəŋ kà agèf à afik, kiya uwatà kà uwaga kà, məfàh haŋkəli kà tekula la tataka aŋami aŋa magəf à lig, ŋgaha kà masla aŋa mad à abà aw aw. ² Tapèh à anu gay matsidəyga, bokuba uwana uwarà à azlababa madzidziga tatsənəŋ babay. Ama gay matsidəyga, uwaga azlakà atà aw, tadà à slaka maduw ləw uwatà à abà aw, kà uwana takəs gay uwatà aw. ³ Uwaga kà anu la uwana mədàda à slaka maduw ləw uwatà à abà, anu uwana məkəs gay uwaga. Agòf lakəl aŋa azlauwana takəs gay uwaga aw kà:

'Gəpək ləw lakəl aŋatà, gəfàha akur à ahəŋ kà tetuwa tadədiya à slaka maduw ləw uwatà à abà aw!'^{*}

Zəzagəla adəv sləray aŋha à gay dagay uwarà, à mok uwana adəfahà gudəŋ à vok. Kiya uwaga kà, maduw ləw kà aga la ahəŋ ndzer. ⁴ La azlaslaka anik, la wakità Zəzagəla la abà, tapèh lakəl aŋa mahənay məfəf:

'Zəzagəla adəvə sləray aŋha à gay la mavakay mukwa. La maməfəf gə kà, aduw ləw.'^{*}

⁵ La azlaslaka anik Zəzagəla agòf aya babay:

'Tetuwa tadədiya à slaka maduw ləw gulo à abà aw.'

⁶ Azladza uwana tatsənà gay matsidəyga teraŋa bay, tadà à abà aw, kà uwana takəs gay uwaga aw. Uwaga kà adzàdla: Slaka maduw ləw kà aga la ahəŋ, ŋgaha azladza anik tadàda à abà. ⁷ Gay gə la uwaga, Zəzagəla adəfahà zamana anik uwana anu la abà lakana. Uwaga adəfahà mavay dəŋ la lig la ahəŋ, mok uwana apèh azlagay uwanay à David à ahəl kà, azlagay uwana mədatsetseray adagay kà:

'Lakana baŋa kadatsənawwan kuda aŋha kà, fəwwal sləm, kadzadzaŋaw gəl aŋkul ala aw.'^{*}

⁸ Agayŋa Josu'e abəzla azlababa gami à slaka maduw ləw uwaga à abà, ndzer kà, naka Zəzagəla apəhay lakəl aŋa zamana maduw ləw anik aya aw. ⁹ Uwanay asal magəfay kà, azladza aŋa Zəzagəla kà, atà la tetəvi la ama aŋa madiya à slaka maduw ləw aŋa Zəzagəla à abà, bokuba uwana aduw ləw mahənay maməfəf. ¹⁰ Dza uwana adiyà à slaka maduw ləw aŋa Zəzagəla à abà kà, masla kà adəfah sləray aya aw, masla kà sləray aŋha adadəv à gay, aduw ləw suwan, bokuba uwana Zəzagəla aduw ləw la

^{*} 3:15 3.15 Mahabay 95.7-8 ^{*} 4:3 4.3 Mahabay 95.11 ^{*} 4:4 4.4 1Musa 2.2 ^{*} 4:7 4.7 Mahabay 95.7-11

sləray aŋha la abà bay. ¹¹ Tsa baŋa kiya uwanay kà, məwad vok à uda, kà anu aŋa madiya à slaka maduw ləv uwatà à abà. Məfaha haŋkəli kà anu aŋa magəf à lig bokuba azlababa madzidziga uwana takweska Zəzagəla aw.

¹² Kà uwana Zəzagəla avà sifa dziriga gà à azladza, adəh sləray la ndzəfa. Gay uwana atsà à waŋ la paŋaw aŋha la awtəy kà la ndzəfa, ŋgaha kiya katsakar uwana azuway gay səla nna. uwana aday tsərəh à aslasl à adi. Masla kà bokuba katsakar uwana anats aslasl ala tsərəh à tsəh zəmaw, uwana asa à dza kà madehəŋ. ¹³ Tatak la ahəŋ ahəf vok à Zəzagəla à adi aw. Tatak gesina uwana adəhəŋ kàdazlazla lela la huma aŋha. La huma aŋha la uwana mədəsəlla à uda tatak uwana mədəhəhəŋ gesina.

Yesu məŋ Madzahaga gami

¹⁴ Anu la məŋ Madzahaga, uwaga kà Yesu, Kona aŋa Zəzagəla, uwana adà à zagəla à afik. Kà uwaga kà, məwad vok à uda lakəl aŋa azlatatak uwana mədiŋal gəl à vok ŋgaha məzahaŋ uwaga la dazuwaya. ¹⁵ Məŋ Madzahaga gami kà, vok ahəmal kà maruw vok à ahəŋ gami. Asà ŋgərpa tsəhay anik anik gesina bokuba aŋami, tapapət masla, ama atəd à tsakana à abà aw. ¹⁶ Kà uwaga kà: Səw à waŋ à slaka Zəzagəla uwana avəhəhə vok mahamay aŋha à azladza. Məzə vok à slaka aŋha la ləv tekula, kà anu aŋa məbəzal vok mahamay, ŋgaha kà masla mav à anu dziriga aŋha uwana adəzlaka anu la mok aŋa ŋgərpa!

5

¹ Kəla məŋ madzahaga gesina kà, Zəzagəla atsatsamahani la tataka azladza la abà. Masla afà à ahəŋ kà masla aŋa madəhə sləray aŋa Zəzagəla kà aŋa gəl aŋha, ŋgaha kà masla aŋa mavəl tatak kà aŋa mazəbatəla tsakana lakəl ala. ² Azladza uwana tasəl tetəvi delga aw, ŋgaha la azlauwana tawul tetəvi la tsəh ala kà, məŋ madzahaga kà asəl kakay à madəhə delga la atə mi, kà uwana masla babay kà guβguβ, bokuba atə. ³ Kà madegolay uwaga kà, say atsa aŋiz à vədah kà aŋa tsakana aŋa azladza anik pəra aw, ama kà aŋa gəl aŋha babay. ⁴ Dza azəb vok la gəl aŋha kà magay məŋ madzahaga aw, say Zəzagəla la uwana azəlalla bokuba uwana uwarə azalə Haruna.

⁵ Kiya uwanay la Kristu babay. Masla azəb gəl aŋha la gəl aŋha kà magay məŋ madzahaga aw. Zəzagəla la uwana azaləl, agədəl:

'Kak bəzi gulo, dagay lakana azladza tadasəl kà ndzer.'*

⁶ La azlaslaka anik anik aya, la wakitə Zəzagəla la abà tagəd kà:

'Kak kadəgay Məŋ Madzahaga aŋa tetuwa bokuba aŋa Melkisdaka.'

⁷ Mok uwana Yesu aləg la gudəŋ la vok kà, masla kà asəl, kà Zəzagəla la maslay kà mawulla à uda la mamətsay, adəval kudə la iyaw tugwi, ŋgaha azə kuda à zagəla. Zəzagəla atsənəŋ, ŋgaha awulla à uda la mamətsay kà akəs gay aŋha. ⁸ Ama ku bə masla bəzi aŋa Zəzagəla kà, atəpla kà makəs gay à Zəzagəla ala la ahəl, la mas ŋgərpa. ⁹ Mok uwana adəfah sləray aŋha kà, apakə masla məbəl azladza, uwana takəs gay aŋha, ŋgaha abəl atə kà aŋa tetuwa. ¹⁰ Zəzagəla afə masla à ahəŋ Məŋ Madzahaga bokuba Melkisdaka.

Dahəw haŋkəli

kà akul aŋa masak tetəvi aŋa Zəzagəla la tsəh ala aw

¹¹ Anu la gay lakəl aŋuwaw, kà mapəh à akul lakəl Melkisdaka. Ama zlazladə kà mapəh à akul, kà uwana sləm aga la akul lakəl aw. ¹² Akul lagwa kà, kaslawwalla vok aŋa magay azlaməna matapla azladza anik, kà uwana kadatapawla azlatatak dagay uwarə, ama kay kà, kasəlaw azlatatak uwaga lela dadəŋ aw kà, akəs vok

* 5:5 5.5 Mahabay 2.7 ☆ 5:6 5.6 Mahabay 110.4

kà azladza anik tatsawaŋ aŋa matapakulla aya azlatatak uwana katàpàwla dagay la madzəka lakəl aŋa gay Zəzagəla. Kasəlaw mazuw tatak may dzaŋdzaŋga dadəŋ aw, akul kalkal la azlabəza vərna uwana tasa awà dadəŋ. ¹³ Ama kəla kà, dza uwana asa awà kà, masla kà bə bəzi vərna, asəl mavəh delga ala la mawisiga dadəŋ aw. ¹⁴ Tatak may dzaŋdzaŋga kà aŋa azlamagol dza tasəl madzugway adagay, atà kà tatapla mavəh tatak delga ala la mawisiga.

6

¹ Tsa kiya uwanay zlà kà, mēhəd à huma à gay, mətapla tatak uwana aŋa azlamagol dza, məduwa tatak teraŋaga, uwana mətapla lakəl aŋa Kristu, mədà à huma à gay la tatak məŋga, bokuba dza uwana adadzəka matatukw gəy, mətatukw aya aw, ama məŋal à zagəla la madla à huma à gay. Mapəh gay la ləv ala, madəh azlatatak mawisiga uwana adala dza à mamətsay à abà aya, la madiŋ gəl à Zəzagəla à vok aya, mədàpa à akul aya aw. ² Məslala vok matapakulla matapla akul teraŋa aya aw. Uwaga la uwana batem dziriga, kakay à mapəs gay à dza à vok la mabək atà à ahəl à gəl la sləm aŋa Zəzagəla mi? Ngaha Zəzagəla adəwulla azladza à uda la mamətsay mi, ngaha kakay adəfaha atà seriya à gəl, la kaslə makəf gəl à ahəŋ mi? ³ Məsak azlatatak uwaga gesina, mēhad à huma à gay la mazlak anu aŋa Zəzagəla ngaha mədəfehəŋ kiya uwanay.

⁴ La dziriga ma, kakay akəs vok à azladza uwana tasəkw à tetəvi mawisiga à ama mi? Kay kà, tadzà à ahəŋ la udfaka aŋa Zəzagəla la abà. Tatəp mavəy aŋa Zəzagəla, ngaha tabəzal Masasəfok Zəzagəla tekedik. ⁵ Atà tatapəŋ kà gay Zəzagəla kà delga, tatəp maslay aŋha uwana adəgay la zamana uwana la abà adàsa à waŋ. ⁶ Ngaha tawul à lig, tetəvi la ahəŋ kà mawulla atà à waŋ aŋa mapəh gay la ləv ala aw, kà uwana azladza uwanay tatatəsl Kona aŋa Zəzagəla, à ahəf à adi kà masəla tatsəkəl magəfahay à gəl la dazuwaya.

⁷ Dzùgwəw lakəl aŋa kutso, baŋa iyaw asuw à guf à abà kà, tatak may atsa à uda, ngaha azlaka azlaməna mapəsay, uwaga asal magəfay kà Zəzagəla apis gay à guf uwatà à vok. ⁸ Tekedika la guf la abà kà, atək la kəsaf mawisiga atsa à uda la abà, kutso kà tatak deyday. Zwek la huma la gay kà Zəzagəla adətsafla adəgay mabaəh gay gə aŋa tetuwa.

⁹ Akul, uwana akul azlaməna gay ləv gulo kà, amiyaka məpəh kiya uwanay kà, məsəl akul, məsəl kà kanəfaw tetəvi delga gə, ngaha kà Zəzagəla adabəl akul. ¹⁰ Masla kà dziriga, hadəy gə, kà sləray aŋkul uwana kadəhawwaŋ kà avikaŋ aw, bokuba magəfay, uwana kazlakahaw azladedə aŋkul məna gay Zəzagəla, ngaha zləkəw atà kiya uwaga aya, ngaha uwaga apəhla ala kà: Kawoyaw Zəzagəla. ¹¹ Uwana mətəwal à tsəh kaykay kà, kawadəw vok à uda, kà kadaw à huma à gay kà akul aŋa mabəzal tatak uwana kadəwawwal yewdi. ¹² Asa à anu kà kagaw azlaməna may vok aw, kiya uwaga kà: Gəw kà bokuba azlauwana tadiŋ gəl à Zəzagəla à vok, tafa manewəŋ aŋatà kà à Zəzagəla à afik. Atà la uwana tadəbəzal tatak uwana Zəzagəla apəh à ahəŋ.

Uwana Zəzagəla apəh à ahəŋ kà, agəfəŋ à afik

¹³ Kasəlaw kà, dagay uwarà kà Zəzagəla apəh à Abəraham à ahəŋ. Mok uwana apəh uwaga kà, afahà akur à ahəŋ la dziriga. Dza la ahəŋ adəwaŋ Zəzagəla aw. Kà Zəzagəla aŋa mazuwal mawadəy aw, kiya uwaga afahà akur à ahəŋ kà la gəl aŋha.

¹⁴ Agəf:

‘‘Ndzer, gəpəs à ka gay à vok, gədəvə à ka mayyi à tsəh ala uwana dza atugway aw.’’✧

¹⁵ Abərahām awadà ləv ala la tsetsi dadəŋ aŋa Zəzagəla, ŋgaha la mabasiŋ. Kiya uwaga akudà azlatatak uwana Zəzagəla apəhal à ahəŋ. ¹⁶ Baŋa azladza tazùw mawadəy kà la sləm aŋa dza mənŋa uwana aduwa atà. Mawadəy kà uwana adəv à gay la tataka azladza la abà. ¹⁷ Gay gà la uwaga à uwana, Zəzagəla azùwal mawadəy. Asàl kà azladza uwana apəh à atà gay à ahəŋ kà, tatsən tatak uwana apəh à ahəŋ kà madagəfɪŋ à afik. Gay gà la uwaga apəhal à ahəŋ dadəŋ à tatak uwana adavàl, la lig la ahəŋ azùwal mawadəy.

¹⁸ Kiya uwaga azlatatak səla la ahəŋ uwana dza aslala vok mabəɸdla aw, uwana Zəzagəla apəh à ahəŋ, ŋgaha la uwana afàhàh akur à ahəŋ lakəl aŋha kà, adàh fida aw, uwana məyahay la slaka Zəzagəla, kà anu aŋa mabəzal slaka, kà anu aŋa mahadɸ vok à ahəŋ, uwaga adzərəɸ anu à uda kaykay, kà anu aŋa maf manewəŋ gami kà à tatak uwana à tsəh Zəzagəla afà à anu à huma à gay. ¹⁹ Tatak uwana məfa manewəŋ gami à afik kà, Zəzagəla akəs anu dzəkka, kà anu aŋa madz à ahəŋ titi la huma Zəzagəla, bokuba kəslah iyaw uwana tawadəŋ à ahəŋ lela la iyaw la abà la gay dərəv. Gay gà la uwaga à uwana, bafta uwana atsàk à slaka tsikaslaga, ama afətamalla ala la huma gami, kà anu aŋa mad à gày à huf gà, à slaka uwana Zəzagəla la ahəŋ. ²⁰ Yesu kà adagay la abatà la huma gami, masla la uwana abəɸ à huma kà anu, kà uwana masla apàk Məŋ Madzahaga mənŋa gà, bokuba Melkivadaka adagay mən madzahaga aŋa koksikoksi.

7

Melkivadaka madzahaga aŋa Zəzagəla

¹ Melkivadaka uwaga uwarà kà agà sufəl aŋa gudəŋ Salem, agà babay madzahaga la huma Zəzagəla uwana kərkər la afik. La zamana anik Abərahām ahàd à guvəl, akəɸ azlasufəl anik anik à gay. Mok uwana adawul à warə la guvəl kà, Melkivadaka ahàd kà magagamay la masla, apisalla gay à vok. ² Abərahām avà à Melkivadaka makulo aŋa kəla tatak uwana azùw la guvəl la abà. Melkivadaka uwaga kà, sləm aŋha asal magodəy kà, teraŋa kà: Sufəl uwana dziriga. ŋgaha babay agà sufəl aŋa lapiya kà uwana agà sufəl aŋa Salem, ŋgaha Salem asal magodəy kà: Lapiya. ³ Dza la ahəŋ asəl baba aŋha la iyà aŋha bay aw, baməraka azlababa aŋha madzidziga bay aw. Məsəl mok mayyay aŋha bay aw, amiyaka bà mamətsay aŋha babay. Masla agà magagazləlaga la Yesu, Kona aŋa Zəzagəla, kà uwana sləray aŋa mav tatak aŋha akəɸ gəl à ahəŋ aw.

⁴ Dzùgwàw lakəl aŋa mənŋa aŋha tsi. Abərahām baba gami madzidziga kà, ahəl tatak uwana azùw la guvəl la abà gesina, avàhàŋ ala madziga kulo kulo, avàhal tekula tekula la gay aŋa kulo kulo gesina. ⁵ Azlaanik la mayyi à tsəh ala Levi kà, mənə makadɸ tatak à Zəzagəla la tataka aŋatà la abà, atà kà azlamadzahaga aŋa wakità seriya aŋa Musa. Tagòɸ à atà: ‘Dàw à slaka azladza, kà tavàhà à akul tekula la gay aŋa kəla tatak kulo, kà akul aŋa madzadzarlaka vok.’ Hadəy, məsəl kà tabəzàhal tatak uwaga la ahəl aŋa azladedə aŋatà, bà atà dagay mayyi à tsəh ala aŋa Abərahām bay. ⁶ Ama Melkivadaka kà agà mayyi à tsəh ala aŋa azlaməna mavàh tatak à Zəzagəla uwaga aw, baməraka la kità bay kà, abəzal tatak la ahəl aŋa Abərahām. Abərahām kà masla kà Zəzagəla apəhal azlatatak uwaga à ahəl. Melkivadaka uwaga la uwana apis gay à Abərahām à vok. ⁷ Hadəy, məsəl kà baŋa dza apis gay à dza anik à vok, kà masla la uwana mənŋa. Kità kà, Melkivadaka la uwana aduwà Abərahām. ⁸ Azlamadzahaga uwana la huf gày aŋa azlaməna makadɸ tatak à Zəzagəla, uwana tabəzàh à makulo aŋa tatak la ahəl aŋa azladedə aŋatà tamàtsàhàh. Ama Melkivadaka kà aməts aw, agà la ahəŋ aŋa koksikoksi, bokuba uwana wakità Zəzagəla agodɸ à anu. ⁹ Lagwa məslala vok aŋa magodəy kà, Levi uwana abəzàhà tatak la slaka azladza anik kà,

atà babay kà tavà makulo aŋa tatak à Melkisdaka suwaŋ, kà uwana baba aŋha Abərahām avà tatak à Melkisdaka la gəl aŋha. ¹⁰ Bokuba magodəy kà, mok uwana Abərahām avà tatak à Melkisdaka, kà Levi kà təyyay dadəŋ aw, la lig la ahəŋ mayyi à tsəh ala aŋha avàhal babay. Uwaga adzadənanəŋ ala kà Melkisdaka aduwaŋ huđ gəy aŋa Levi gesina la kaykay.

Yesu kà aduwa Melkisdaka

¹¹ Sləray aŋa azlaməna mav tatak à Zəzagəla la huđ gəy aŋa Levi kà, taslala vok kà mahənəŋ ala uwana asa à Zəzagəla aw. Agayŋa taslala vok kà mahənəŋ ala kà, naka delga kà aŋa mas à waŋ aŋa Məŋ Madzahaga anik uwana aduwaŋ Melkisdaka aya aw, naka azlaməŋ madzahaga tagay kà mayyi à tsəh ala aŋa Levi pəra bokuba Haruna. Uwaga kà aga kà la ahəl aŋa madzahaga aŋa azlaməna mav tatak à Zəzagəla, uwana tagə la huđ gəy aŋa Levi à uwana Zəzagəla avà mapəhay aŋha à azlaməna gudəŋ Isərayel à ahəl. ¹² Baŋa Zəzagəla abədla azlamadzahaga kà, məsəlay bay kà mafàh akur à ahəŋ aŋha abədla vok babay. ¹³ Lagonay kà, məsəl kà tsəhay madzahaga abədla vok. Masla à Sufəl gami Yesu, uwana məpəhay la abanay kà, asà à uda kà la tsəhay anik. Masla kà tsəhay aŋa Levi aw. Dza la ahəŋ la tsəhay aŋha la abà madzahaga, uwana masla makad tatak aw, ŋgaha à uwana tetuwa adakəd tatak à Zəzagəla, kà tsakana aŋa azladza aw. ¹⁴ Hadəy, masla à Yesu kà, asà à uda la tsəhay aŋa Yahuda la abà. Mok uwana Musa apəhəh lakəl aŋa azlaməna makad tatak à Zəzagəla kà, apəh kà lakəl aŋa tsəhay uwaga aw.

¹⁵ Azlaməna makad tatak la huđ gəy aŋa Levi kà, taslala vok kà madla azladza à slaka Zəzagəla aw. Aganay à tatak uwana adzəd gay uwaga ala: Madzahaga anik aŋa azlaməna mav tatak à Zəzagəla, uwana bokuba Melkisdaka kà adazlanəlay. ¹⁶ Dza uwatà kà məŋ madzahaga aŋa makad tatak à Zəzagəla la mapəhay aŋa azladza aw. Ama masla kà Məŋ Madzahaga, kà uwana aga la maslay kà madz à ahəŋ la sifa aŋa koksikoksi. ¹⁷ Lakəl aŋa dza uwaga tatsətsər à wakità Zəzagəla à abà kà: "Kak kà, kadəgay Məŋ Madzahaga aŋa koksikoksi bokuba Melkisdaka."✠

¹⁸ Zəzagəla abədla azlamapəhay aŋha uwarà, kà uwaga tagə la ndzəda aw, tazlakəh azladza babay aw. ¹⁹ Mapəhay aŋa Musa kà aslala vok magəŋ azladza sətaka la huma Zəzagəla aw. Lagonay kà tatak anik la ahəŋ, à uwana aduwa mapəhay aŋa dza uwaga. Məfa manewəŋ à uwana à afik, avà məsəlay kà maz vok à slaka Zəzagəla.

²⁰ ŋgaha aya kà: Mok uwana Zəzagəla asal maf Yesu à ahəŋ kà Məŋ Madzahaga kà, afəhà akur à ahəŋ dadəŋ, à mok uwana tsəhay Levi apakà məŋ madzahaga kà Zəzagəla, afəhà akur à ahəŋ kiya uwanay aw. ²¹ Ama Zəzagəla azu w mawadəy à Yesu la magodəy kà:

"Gi, gi Sufəl Zəzagəla gədəbədla tatak uwanay aw: Gədəzuw à ka mawadəy, kà kadəgay Məŋ Madzahaga aŋa koksikoksi."✠

²² Uwanay kà asal magodəy, kà makəs vok slawda uwana Zəzagəla adəhəŋ la anu kà, uwaga duduwa à gay makəs vok slawda maviyaga uwatà uwarà. Yesu la uwana adzadə tatak uwaga ala.

²³ A babay kà tatak anik la ahəŋ aya, kà azlamadzahaga aŋa makad tatak la huđ gəy aŋa azla Levi kà tagəh dəŋ, kà uwana tamətsəh, baŋa anik adamətsay kà, anik abəd à slaka aŋha à abà. ²⁴ Ama Yesu kà kiya uwaga aw, masla kà amətsay aw aŋa koksikoksi, sləray aŋa magay madzahaga aŋha kà adəkəd gəl à ahəŋ aŋa tetuwa aw.

²⁵ Kà uwaga à uwana aga la maslay lakəl aŋa tatak gesina kà mabəl azladza uwana tatsa à waŋ à slaka Zəzagəla, kà madəgolay masla uwana aga la ahəŋ la sifa aŋa koksikoksi. Abədəh à huma kà madəv kudu à Zəzagəla kà anu.

²⁶ Masla kà Məŋ Madzahaga uwana məwoyaŋ. Masla kà tsikaslaga, mawisiga aŋha la ahəŋ à masla aw, adəh tsakana aw. Masla kà kiya azlaməna tsakana aw, Zəzagəla afà à fəta à awtəy tsikasla. Afà aslələf aŋha à gəl la zagəla la afik, ²⁷ kà aŋa azlamadzahaga anik, uwana kà say takəday tatak à Zəzagəla kəla mahənaŋ. Baŋa taday kà makad tatak kà, say takəday kà aŋa gəl aŋatà dadəŋ, ŋgaha atà aŋa makaday kà aŋa tsakana aŋa azladza anik. Ama kà aŋa Yesu kà, adəhəŋ kiya uwaga aw. Masla kà, avà kà asik tekula pəra, ŋgaha asla kiya uwaga. Mavəy uwaga kà vok aŋha uwana avà. ²⁸ Azlamadzahaga uwana mapəhay aŋa Musa abək atà à ahəŋ kà, tagà kà azladza deydayga. Tadəhəhə tsakana. Ama mok uwana Zəzagəla afəha akur à ahəŋ kà, abədla Kona aŋha à abà kiya Məŋ Madzahaga, uwana akəd gəl aŋha bokuba uwana asal. Adadza à ahəŋ kiya uwanay aŋa koksikoksi.

8

Yesu kà Məŋ Madzahaga gami

¹ Gay uwana aduwà à vok kà aganay: Mədadzəka mapəhay: Məŋ Madzahaga gami uwana adadza madzay la kəslah asik la afik la ahəl kaf aŋa Zəzagəla lakəl la zagəla, uwana akor tatak gesina, ² masla kà Məŋ Madzahaga la slaka tsikaslaga, uwana la Zəzagəla la abà. Azlamadzahaga tadəhəhə sləray aŋatà la gəy lukut uwana la aku, ahəl aŋa azladza adəhəŋ. Ama slaka uwana Yesu adəh sləray aŋha kà la zagəla, slaka dziriga uwana Zəzagəla adəhəŋ.

³ Azlaməŋ madzahaga gesina kà tabək atà à ahəŋ, kà atà aŋa mavəh tatak à Zəzagəla, ŋgaha bay kà atà makad tatak. Gay gə la uwaga, Məŋ Madzahaga gami akor tatak kà mavəy suwaŋ. ⁴ Mədzugw, mok uwana agə la ahəŋ la gudəŋ la vok kà, apakà Məŋ Madzahaga aw. Kà uwana azlamadzahaga aŋa azlaməna mav tatak à Zəzagəla la ahəŋ, uwana takəd tatak bokuba uwana mapəhay aŋa Zəzagəla agəd à azla Yahudiya. ⁵ Azlaməna mav tatak à Zəzagəla uwaga kà tadəhəhə sləray aŋatà kà la məŋ gəy madəv kudə à Zəzagəla la aku. Ama gəy uwaga kà maftsa vok aŋa gəy dziriga uwana la zagəla la afik. Mok uwana Musa ahəd kà madəh gəy lukut uwatà kà Zəzagəla agəd:

'Nərəz lela, ŋgaha həd, kadaŋal bokuba uwana gəpəhkala la gudəŋ uwanay la afik.'*

⁶ Kətà haday, mənəŋəŋ kà sləray aŋa Yesu Kristu aduwaŋ sləray aŋa azlamadzahaga anik gesina la kaykay, makəs vok slawda uwana akəs anu vok slawda la Zəzagəla, ŋgaha la azladza kà, aduwaŋ makəs vok slawda aŋa uwarà, uwatà bay, kà uwana tatak uwana Zəzagəla apəhəŋ la makəs vok slawda uwanay la abà kà, aduwaŋ azla-tatak uwana məbəzal uwarà.

⁷ Agayŋa makəs vok slawda teraŋaga agay delga kà, naka Zəzagəla adəh makəs vok slawda anik aya aw. ⁸ Ama mənəŋəŋ kà aslə aw, kà uwaga Zəzagəla apəhla tsakana aŋatà à azladza, ŋgaha agəd à atà:

'Fəw sləm à abà. Zamana anik adəsa à waŋ à uwana gədəh makəs vok slawda mawga la Isərayel, ŋgaha à azladza tsəhay Yahuda.

⁹ Dagay mok uwana gəkəs ahəl aŋa azlababa aŋatà madzidziga kà masəlla atà à uda la gudəŋ Misəra la abà kà, gəkəs vok slawda la atà.

Ama makəs vok slawda mawga uwana gədəfehəŋ lagwa, adəgay kà bokuba makəs vok slawda uwatà aya aw.

Tawisə makəs vok slawda maviyaga ala, à uwana gədəhəŋ.

Gay gə la uwaga à uwana, gəguwatəla à lig à gay. Gi Sufəl Zəzagəla aŋkul la uwana gəpəhay kiya uwanay.

* 8:5 8.5 2Musa 25.40

- 10 Makəs vok slawda uwana gədàdehəŋ la azladza Isərayel la zamana uwatà kà aganay:
 Gədàfa à atà mapəhay gulo à ahəl,
 Gədətsetserah mapəhay gulo à ləv aŋatà à tsəh babay.
 Gədàgay Zəzagəla aŋatà,
 Ŋgaha tadàgay azladza gulo suwaŋ.
- 11 Dza la ahəŋ adàda à slaka azladede aŋha kà matapatàla gay gulo matapay aya aw,
 Kà magodf à atà kà:
 Səlàw Sufəl Zəzagəla aya aw,
 Kà uwana dza gesina tadəsəl gi azlabəziga baməraka azlamagolga bay.
- 12 Vok adàhama à gi kà tsakana aŋatà, gədàmatsatəŋ ala adàgay.
 Gədàfa à atà à ləv à abà aya aw.[✧]
 Kiya uwaga Sufəl Zəzagəla agodf.
- 13 Uwana Zəzagəla apəh kiya uwanay kà lakəl aŋa makəs vok slawda mawga, uwaga asal magodfay kà, uwana adahəŋ teraŋa kà, apakà maviya tatak. Məsəl hadfay kà, tatak uwana adapaka maviya tatak kà, uwaga kà azlaka dza aya aw, iyaw aŋha adadəv à gay adagay.

9

Tetəvi delga kà masləkaw Zəzagəla

1 La makəs vok slawda teraŋa la abà kà, mafàh akur à ahəŋ aŋa Zəzagəla la ahəŋ à uwana naka azladza tasləkaw masla. Agà la ahəŋ babay slaka uwana azladza tanəl, kà masləkaway la aku. 2 Azladza tadəhà gày lukut huđ səla, mad à gày teraŋa slaka tsikasłaga, la gày uwatà la aku kà fənəs la aku, table la aku, uwana tabək kaf aŋa Zəzagəla à afik. 3 La gay gamagày aŋa gày uwatà tanəlaŋ ala la bafta kà huđ gày uwatà kà, slaka tsikasłaga kaykay. 4 Tabək tatak məbək ahəf matərsin luwəluwəga à agu. Tafà sahar aŋa makəs vok slawda à agu la abatà. La sahar uwatà la abà, tatak may uwana Zəzagəla aslələh à ahəŋ la zagəla kà agəh la abà la abatà, sləm aŋha Manu. Azəva aŋa Haruna uwana awuratət bay kà, agà la sahar uwatà la abà, ŋgaha azlaakur səla uwana Zəzagəla atsetsəral mapəhay kulo aŋha à adi babay kà agà la abà la abatà.[✧] 5 La sahar uwatà la afik kà, maftsa à vok aŋa azlamalika səla la ahəŋ, uwana asa à atà kà mapəhla à azladza, kà Zəzagəla la ahəŋ la abatà, tabatàhà gogozläh à sahar uwatà à gəl, kà matsak à slaka uwana à ama takədf tatak à Zəzagəla kà aŋa mamats tsakana ala. Ama asa à gi kà mapəh gay uwaga à uda lagonay la dazuwaya aw.

6 Mok uwana sləray adəfah vok à ahəŋ gesina kà, azlaməna makədf tatak tadəhàhà sləray aŋatà la gày teraŋaga la aku koksikoksi. 7 Huđ gày masəla kà, say məŋ madzahaga aŋa azlaməna makədf tatak à Zəzagəla, la uwana adəh à agu pəra, kəla mavay kà asik tekula pəra adəhà à agu, say la aŋiz la ahəl kà mav à Zəzagəla, kà aŋa gəl aŋha, ŋgaha kà, kà aŋa azladza babay kà mamats tsakana aŋa azladza, uwana ala tadəhəŋ gesina kà, kà uwana atà azladza asik pəra. 8 Masasədok Zəzagəla apəhanula, kà tetəvi uwana adala dza à slaka tsikasłaga kaykay kà adapəzl vok dadəŋ aw, uwana huđ gày matera à lig dadəŋ. 9 Uwaga kà maftsa à vok, uwana apəhanula uwaga kà, asal magodfay kà azlatatak uwana adapaka vok, la uwaga la mas à waŋ aŋa Yesu uwana tavəh, ŋgaha la uwana takədf à Zəzagəla kà aslala vok aŋa mag ləv aŋa azladza uwana tanəfa tetəvi uwaga sətaka aw. 10 Atapatàla kà lakəl aŋa tatak may, ŋgaha lakəl aŋa azlatatak masay, ŋgaha lakəl aŋa mapaləh tatak may, ŋgaha lakəl aŋa azlatatak masay, ŋgaha lakəl aŋa mapaləh tatak pəra. Uwaga kà azlatatak

✧ 8:12 8.12 Yeremiya 31.31-34 ✧ 9:4 9.4 2Musa 30.1-6; 3Musa 17.8-10; 5Musa 10.3-5

aŋa gudəŋ à vok, uwana tadza à ahəŋ kà aŋa dənŋa pəra, tsərah à uwana Zəzagəla adàbədla azlatatak gesina à ahəŋ.

¹¹ Lagonay kà, ndzer Kristu kà adasa à waŋ. Masla kà Məŋ Madzahaga uwana asəlla azlamapis gay à vok à waŋ, la azlatatak delga uwana mədabəzal la ahəl aŋha. Adəh sləray aŋha la gəy anik la kay, uwana dafuwa à gay azlagəy lukut, uwana tafahàhəŋ uwarà, ŋgaha dzəba aŋha səla aw. Uwaga maŋalayga la ahəl aŋa azladza aw, Zəzagəla la uwana aŋəl la gəl aŋha, gəy uwaga kà la gudəŋ uwanay la vok babay aw. ¹² Ama adàla kà aŋiz aŋa gəl aŋha à gəy la ahəl, ŋgaha avà kà asik tekula pəra, la uwaga la uwana abəlla anu à uda la tsakana gami la abà aŋa tetuwa. ¹³ Dagay uwarà kà, takəfal azlabahu ŋgaha la azlakokur, takotsekwəh aŋiz à azladza, uwana azlasətaka la huma aŋa Zəzagəla aw. Takəsəh vəlik tatələh à gay, ŋgaha masəka akəl akəlga kà tatsəh à azladza aya babay. Kiya uwaga azladza uwana tawisə mapəhay aŋa Zəzagəla ala kà, tapakəh sətaka la huma aŋa mapəhay aŋa Zəzagəla. ¹⁴ Kayyà, baŋa kiya uwanay kà, aŋiz aŋa Kristu aduwaŋ gesina, kà uwana aŋiz aŋa Kristu kà daduwa à gay aŋa azlatatak asik, kà uwana masla adəh tsakana aw. Masla kà avà gəl aŋha à Zəzagəla la ndzəfa aŋa Masasədok tsidəŋa, kà anu aŋa madəh azlatatak mawisiga uwana adala anu à mamətsay à abà aw, ama mədəh sləray aŋa Zəzagəla uwana avà à anu sifa adəv à gay aw.

¹⁵ Kà uwaga à uwana apakə masla makəsa anu vok slawda la Zəzagəla. ŋgaha kà azladza uwana Zəzagəla azalà atà kà, tadəbəza tatak delga uwana Zəzagəla apəh à atà à ahəŋ, kà atà tadəkoray aŋa koksikoksi. Uwaga adəhəhə vok kiya uwaga kà, kà uwana Kristu aməts, la mamətsay aŋha asukw azladza à uda la tatak mawisiga aŋatà uwana la abà tafahàhəŋ la mok uwana atà la tsəh aŋa makəs vok slawda maviyaga.

¹⁶ Məsəl kà dza azuw gəy, kà say dza amətsay dadəŋ, la uwana dza azuw gəy aŋha. ¹⁷ Baŋa dza la sifa kà, mapəhay uwana apəh kà, mavəh tatak kà godega aŋha la ahəŋ dadəŋ aw, say baŋa adamətsay la uwana pəra. ¹⁸ Kità bay, uwana Zəzagəla adəhəhə makəs vok slawda maviyaga baməraka la mawga kà, say la mats aŋiz à vədəh. ¹⁹ Dagay uwarà Musa apəh mapəhay aŋa Zəzagəla à azladza gesina dadəŋ. La lig la ahəŋ atsəh aŋiz aŋa azlavəlik, la azlabahu ŋgaha ahohodla la iyaw uwana tatadəh. Asləhəni babasl à ahəl dats babay, ŋgaha la slewzi aŋa pada tuwaŋ mativga kize akotsekwəh à wakitə aŋa Zəzagəla, ŋgaha à azladza gesina babay. ²⁰ ŋgaha agədf: ‘Uwanay kà aŋiz uwana Zəzagəla akəsla vok slawda la akul. Tsizlləw à makəs vok slawda uwanay à afik’, agədf à akul. ²¹ Musa akotsekwəh aŋiz à gəy lukut babay, ŋgaha à azlatatak gesina uwana adəhla sləray à Zəzagəla. ²² La mapəhay aŋa Zəzagəla la abà kà, gay mənŋa aŋa azlatatak kà, tagahəŋ sətaka kà la aŋiz, kokudə aŋiz kà, Zəzagəla aməts tsakana à azladza ala aw, say baŋa aŋiz adanədf à vədəh.

Aŋiz aŋa Yesu aməts tsakana aŋa azladza ala

²³ Tetəvi uwana Musa atəpla à azladza dagay uwarà kà, agə kà bokuba maftsa vok aŋa azlatatak dziriga la zagəla pəra. Naka magəhəŋ azlatatak uwaga gesina tsidəŋa, kiya uwaga à uwana mapəhay aŋa Musa apəh. Ama baŋa kà aŋa manəfay dziriga kà, asal makəfal tatak uwana aduw aŋiz aŋa azlatatak, uwaga kà mavəy uwana Yesu Kristu akədf, avà gəl aŋha. ²⁴ Məsəl kà masla kà ahəd à huf gəy tsikaslaŋa uwana à agu, azladza taŋəl la ahəl aw. Uwaga kà maftsa vok aŋa slaka uwana Zəzagəla la abà pəra. Ama ahəd kà à zagəla, à slaka uwana Zəzagəla la ahəŋ, kà masla mawulla anu à tsəh la slaka Zəzagəla. ²⁵ Azlaməŋ madzahaga aŋa azla Yahudiya tadəhəhə à agu à slaka tsikaslaŋa kaykay gə à agu, kà asik tekula kəla mavay, tadəhəhə à gəy la aŋiz la ahəl, aŋiz aŋa gəl aŋatə aw. Ama Kristu kà avà kà aŋiz aŋa gəl aŋha, masla kà avà gəl aŋha kà asik tekula, awkə asik dəŋ aw. ²⁶ Agayŋa agay kiya uwanay, awkə naka asa ŋərpa mənŋa dagay uwana gudəŋ à lig madzəka vok. Ama asə ŋərpa kà

asik dënj aw. Asà à wañ kà asik tekula, nekwa la mok makəf gəl à ahəj përa. Avà vok aŋha à Zəzagəla kà mazəb tsakana à azladza lakəl ala aŋa koksikoksi. ²⁷ Azladza gesina tamətsay kà asik tekula përa. La lig la ahəj kà, kəla uwabeyuwi tada à huma Zəzagəla kà masla madàh à atà seriya à gəl. ²⁸ Kristu kà agà kiya uwaga babay, asik tekula përa, asòkw aŋiz aŋha à vədah kà masla aŋa mazəb tsakana aŋa azladza aŋuvaw. Adàwula à wañ kà masəla aya. Ama la kaslà uwatà kà, adàsa à wañ kà, kà mazəb tsakana aŋa azladza aya aw, ama kà mabəl azladza uwana takud masla.

10

¹ Azlamapəhay aŋa Musa kà, tagà kà maftsa vok aŋa azlatatak delga uwana tadàsa à wañ la huma la gay përa. Atà kà azlatatak makəf gəl à ahəj aw. Azlamadzahaga aŋa azlaməna mav tatak takàdàh tatak à Zəzagəla kà kəla mavay. Azladza uwaga asà à atà maz vok à slaka Zəzagəla la tetəvi uwaga, ŋgaha ma la tetəvi ma uwala makəf tatak uwaga apakatàla sətaka la? ² Agayŋa tapakà sətaka kà uwana takəf tatak asik tekula kà, anaka tsakana aŋatà kà avikan, naka takəfal tatak aya aw. ³ Ama kiya uwaga aw. Baməraka la makəf tatak uwaga bay kà, tapəhatàla tsakana aŋatà kəla mavay. ⁴ Kà uwana aŋiz aŋa azlabahu la azlavəlik la azlakokur aslala vok kà mazəb atà tsakana aŋatà lakəl ala aw.

⁵ Kà uwana mok uwana Kristu asal mas à wañ à gudəj à vok kà, agòf à Zəzagəla kà:

‘‘Asa à ka məkəf à ka azlatatak aw, baməraka mav à ka azlatatak aw. Ama kadàhà à gi, kà gi aŋa mawulkala.

⁶ Azlatatak uwana takəfay aŋa mabakay la uwana akəs à ka gəl aw, mats aŋiz à vədah kà aŋa tsakana kà, akəs à ka gəl babay aw. Kawoyan kà: Makəs gay aŋak përa.

⁷ Haday gəgod à ka: Iyay, gi la uwanay Zəzagəla, gəda à awtày à gudəj à vok, kà gi madàh uwana asa à ka, gədàdèhəj bokuba uwana tatsətsər lakəl gulo la wakitə mapəhay la abà’’,^{*}

agòfal. ⁸ Gay teraŋaga uwana Kristu apəh kà aganay:

‘‘Haday, Zəzagəla gulo, asa à ka kà takəf à ka tatak kà mav à ka aw, baməraka mav à ka azlatatak anik bay aw. Asa à ka babay aŋa mabak à ka azlatatak aw, ŋgaha asa à ka tatsàhà à ka aŋiz kà mamats tsakana ala babay aya aw.’’

Apəh uwanay kiya uwaga kà, kà uwana azlatatak uwaga tanəfa slaka asik aŋa mapəhay. ⁹ Agòf: ‘Gi la uwanay, gəda à awtày à gudəj à vok, kà gi aŋa madàh uwana akəs à kak à gəl.’ Uwaga apəhla ala, kà Zəzagəla akweska madz à ahəj maviyaga la matsàh aŋiz à vədah, ŋgaha abəfla à abà la mamətsay aŋa Yesu Kristu. ¹⁰ Kà uwana Yesu Kristu kà, adàhà uwana akəs à Zəzagəla à gəl, avà vok aŋha deyday, mədàgay tsikasla la huma Zəzagəla. La azlamanəfay anik anik kà, akəs vok aya tetuwa aw.

¹¹ Azlamadzahaga aŋa azla Yahudiya tadàhàhà sləray aŋatà kəla mahənay la slaka matsizlla koksikoksi, takàdàhàhal tatak, ama azlatatak uwaga kà aslala vok aŋa mazəb tsakana aŋa azladza aw. ¹² Ama Yesu Kristu kà, kà akəf gəl aŋha, uwana agà la maslay kà mazəbla tsakana aŋa azladza gesina aŋa tetuwa. ŋgaha adzà madzay la ahəl kaf aŋa Zəzagəla lakəl. ¹³ Lagwa kà akuday kà kaslà uwana Zəzagəla adàbək azlaməna məzam aŋha à tsəh asik aŋha.^{*} ¹⁴ La mav gəl aŋha asik tekula apakà azladza aŋha ala dzandzanga la huma Zəzagəla, abək atà à slələf à gəl, apakatàla sətaka aŋa koksikoksi.

¹⁵ Masasəfok tsikasla babay kà, apəhanula azlatatak uwaga la dazuwaya, uwaga kà dziriga, agòf kà:

^{*} **10:7** 10.7 Mahabay 40.6-8 ^{*} **10:13** 10.13 2Musa 29.38; Mahabay 110.1

16 "Sufël Zëzagëla gami agòd kà: Makës vok slawda, uwana mëdadehënj anina kà, la mok uwatà kà gëdafa mapëhay gulo à lëv anjata à tsëh. Gëdätsetser à lëv anjata à tsëh aya babay."*

17 Ngehaha agòd aya: 'Gëdädzugway lakël anja tsakana anjata à tsëh aya aw, bamëraka lakël anja azlatatak mawisiga uwana tadehënj gesina.' 18 Tsa banja Zëzagëla adamats tsakana anja azladza ala kà, azladza tanëkudfa anja makad tatak anik anik aya kà mazëbay mawisiga anja azladza aw.

Makës gay Zëzagëla lela

19 Azladede gulo, tsa banja kiya uwanay kà, kà mamëtsay anja Yesu la makëlay anja aniz anha kà anu mënéfa tetëvi delga anja mad à slaka tsikasliga, uwana Zëzagëla la abà. 20 Yesu akwohà bafta uwatà ala, à uwana mëpëh gay anha uwarà, apëzlla anu tetëvi la uwatà, kà mad à huf gà gà. Uwaga kà tetëvi mawga uwana mëbëz sifa la ama. Bafta uwana akwohànj ala kà, asal magodfay kà vok anha, uwana tatatàsl à ahàf à adi. 21 Anu la Mënj Madzahaga uwana af slëm à azlamëna gay Zëzagëla. 22 Kà uwaga à uwana, mëf madzugway gami à Yesu à afik anja denënj, mëzà vok à slaka Zëzagëla la lëv tekula, kà uwana aniz anja Yesu Kristu adag lëv gami sëtaka, ngehaha adapal anu la iyaw tsifanaga. 23 Zëzagëla apëh à anu, kà mav à anu tatak anik uwana apëh à ahënj. Mëhad à huma à gay la mapëhay la dazuwaya, kà anu anja madin gël à uwana à vok, Zëzagëla agodf: Mëdzërükwàw! 24 Mëfà vok slëm, kà anu anja madàh delga koksikoksi. 25 Mëkweskà maham gay à vok la slaka gà bokuba anja azladza anik, uwana takwesahay aw. Mëdzëdàhàhà vok ala kà anu, anu dafuwa à gay uwaga aya, kà uwana kasëlaw, kà kaslà uwana Yesu Kristu adàsa à wan kà nekwa à dagay.

26 Banja mësel dziriga anja Zëzagëla nëma, masla mëda à huma à gay la madàh tsakana kà, mësel kà, dziriga, makodf tatak anik adàgay la ahënj aya à uwana adàg anu sëtaka la huma anja Zëzagëla aw. 27 Dza uwana adëhënj kiya uwaga kà guba akës, kà uwana Zëzagëla adàdukwlà seriya à gël, seriya uwaga kà adàgay kà bokuba akàl nêdfeh nêdfehga, uwana adàbabëh azlamëna mëzam anja Zëzagëla à gay. 28 Kasëlaw kà, banja dza uwana awis mapëhay anja Musa ala kà, banja azladza sëla, banja aw makër tatsàl yewdi à vok kà, bamëraka takodf babay kà vok, ahamà à azladza kà masla aw. 29 Tsa kiya uwanay la mapëhay anja Musa la abà ma, amëraka dza uwana akweska Kona anja Zëzagëla la uwana as ngerpa aw ay? Banja adakweska kà Baba, akweska aniz anja Zëzagëla uwana akësatàla vok slawda la mapakënjla tsifanaga babay, uwaga kà adagodfah à Masasëdök Zëzagëla uwana av mapës gay à dza à vok, dzëba dza uwaga kà, adàsa ngerpa kaykay. 30 Zëzagëla la gël anha agodf: 'Gëdàpëlay lakël anja azladza uwana takweska gi, gëdàwulla à atà ala azlatatak mawisiga anjata uwana tadahàgënj à vok.' Ndzër, mësel kà adàdah uwana apëh. Agodf aya kà: 'Gi Sufël Zëzagëla, gëdàdah seriya à azladza gulo à gël.' Apëh uwaga kà la gël anha. 31 Zëzagëla uwana aga la ahënj anja koksikoksi, banja adàh seriya à dza à gël, ngehaha anënj kà, azlawla aw kà, zlazlada kà anja dza uwaga.

32 Awul akul à gël, bokuba uwana agà la akul dagay uwarà, kanënjàwwànj teranja ufaka anja Zëzagëla. Kasàw ngerpa mënja la mok uwatà la huma anja azladza, ama kabàsàwwànj. 33 La azlakaslà anik tatsëk akul magodfahay à gël, la huma azladza anuwaw. La azlakaslà anik kazlàw à ngerpa à abà la azladza anik kiya uwanay.

34 Kagàw la slaka gà la azladza uwana tagà la danay kà Yesu. Mok uwana azladza takàsàh tatak ankul, bà la uwaga kà karàbàw, kà uwana kasëlàw kà kadàkoraw tatak anik uwana delga aduwa tatak gesina, ngehaha uwana adàdza à ahënj anja koksikoksi.

35 Kà uwaga: Dàw à huma à gay, la maf madinjal gël à vok ankul à Zëzagëla à afik,

* 10:16 10.16 Yeremiya 31.33

baṅa kadaw à huma à gay la madfehəṅ kiya uwanay koksikoksi kà, kadàbèzaw masik anṅkul mənṅga gə. ³⁶ Delga kà mabasiṅ anṅkul agay la ahəṅ, kà akul anṅ madfàh uwana akəs à Zəzagəla à gəl, kiya uwaga la uwana kà, kadàbèzaw tatak uwana apəh à akul à ahəṅ. ³⁷ Gay gə la uwaga Zəzagəla agòd:

'Kaslà ṅuv kà, dza uwana adàsa à waṅ kà adàsafay aya aw.

³⁸ Dza uwana adfàh dziriga la huma gulo kà, adàdza à ahəṅ la sifa anṅ koksikoksi à baṅa adiṅ gi gəl à vok anṅ tsərah à awtày. Ama baṅa dza awula à lig, masla kà akəs gi à gəl aw.'[✧]

³⁹ Ama anu kà, anu azlaməna mawul à lig kà mazila aw, məga kà anu azladza uwana tadinṅ gəl à Zəzagəla à vok pəra. Kiya uwaga kà mədàbèza sifa adəv à gay aw.

11

Məfa madiṅal gəl à vok gami à Zəzagəla à afik

¹ Maf gəl à afik, asal magodəy kà: magədeṅ à afik à tatak uwana takuday adəpaka à vok tanəṅəṅ la yewdi aw, tadinṅal gəl à vok kà aga la ahəṅ ndzer. ² Azladza uwana uwarà tadinṅ gəl à Zəzagəla à vok, kà kiya uwanay à uwana takəsəl à gəl.

³ La madiṅ gəl à Zəzagəla à vok la uwana məsəlay kà Zəzagəla adfahà gudəṅ à vok la afad gay anṅa. Uwaga asal magodəy kà, kəla tatak gesina uwana kanəṅawwaṅ la gudəṅ la vok kà, Zəzagəla adfahəṅ uwaga la gay anṅa, uwana mənəṅəṅ aw.

⁴ Kà uwana Abel afà madiṅ gəl à Zəzagəla à vok, avəl tatak delga gə, dafəduwa à gay anṅ Kaynu, kà uwana adiṅ gəl à Zəzagəla à vok. Zəzagəla anəṅà masla kà bokuba dza dziriga la huma anṅa. Abel asəl uwaga kà Zəzagəla akəs tatak uwana akədal. Lagwa kà, Abel adamətsay à uwana Zəzagəla apəh à anu gay lakəl anṅa, kà uwana adiṅ gəl à Zəzagəla à vok à uwana apəh à anu gay lakəl anṅa gotənaṅ.

⁵ Kà uwana Henok afà madiṅ gəl à Zəzagəla à vok à uwana aməts aw, Zəzagəla azəb à zagəla la adi. Dza la ahəṅ anəṅəṅ aw, Zəzagəla azəb. La wakità Zəzagəla la abà tatsətsər kà: Mok uwana Zəzagəla aləg mazəb à zagəla kà, masla kà, akəs à Zəzagəla à gəl. ⁶ Dza la ahəṅ akəs à Zəzagəla à gəl bokuba madiṅal gəl à vok aw, say məkəs masla dadəṅ, kà uwana baṅa asa à anu maz vok à slaka Zəzagəla kà, say məfa gəl à masla à afik kà aga la ahəṅ. Delga kà dza avəl madzugway anṅa babay, av masik à azladza uwana tayàh masla.

⁷ Kà uwana Nuhu afà madiṅ gəl anṅa à Zəzagəla à vok kà, atsəb sləm à gay anṅa, apəhal lakəl anṅ azlatatak uwana adapaka vok. Azlatatak uwaga kà adanəṅ atà la yewdi anṅa dadəṅ aw, ama akəs gay anṅa. Adfahà magol kəslah iyaw, bokuba uwana agòdal: 'Həd à kəslah iyaw à agu la azlahud gəy anṅak.' La kità, Zəzagəla atəfà atà. Apəhla ala kà madz à ahəṅ anṅ azladza anik kà agə mawisiga, kà uwana atà kà tadinṅ gəl à masla à vok aw. Masla la gəl anṅa kà, Zəzagəla apakà masla ala bokuba dza dziriga kà uwana afà gəl à masla à afik.

⁸ Kà uwana Abəraham adiṅ gəl à Zəzagəla à vok, akəs gay anṅa à mok uwana: 'Həd à gudəṅ anik à abà', Zəzagəla agòdal, à uwana asəl mavəl. Ahəd à abata baməraka asəl slaka uwatà babay aw. ⁹ Kà uwana adiṅ gəl à Zəzagəla à vok lakəl anṅ tatak uwana Zəzagəla apəhal à ahəṅ kà anṅ mavəl, baməraka adagay mələkga bay, amiyaka adzà à ahəṅ la gəy uwana la aku tafahəṅ la lukut bay. Isak, Yakuba mayyi à tsəh ala anṅa, uwana Zəzagəla avà à atà gudəṅ uwatà babay kà, tadzà à ahəṅ la gəy lukut la aku, bokuba masla babay. ¹⁰ Abəraham adfahəṅ kiya uwanay kà, kà uwana akuda, gudəṅ, uwana Zəzagəla adfahəṅ, uwana matatukway gə lela. Masla la gəl anṅa la uwana anəh, ṅgaha anṅalàh.

✧ 10:38 10.38 Habakuk 2.3-4

¹¹ Kà madiŋal gəl à vok aŋa Abèraham à uwana, agà baba aŋa azlabəza gurdza gurdza. Ama mis aŋha Sara ayyàl bəzi zilga, amiyaka masla dəgərga, manatslaga bay. Uwaga apakà vok kà, kà uwana Abèraham asəl kà Zəzagəla adfaha fida aw. Adfaha tatak uwana apəh à ahəŋ uwarà. ¹² Kà uwana masla kokudfa aŋha kà, apakà makoz gurdza gurdza, kaslā aŋa mayyi bəzi adəkàŋ à lig, ama ayyà bəzi tekula, uwana ayyà à tsəh aŋuvaw bokuba azlatsetsiliŋ uwana la zagəla, ŋgaha bokuba wuyyaŋ uwana la mukwà la tsəh, uwana dza aslala vok aŋa matugway aw.

¹³ Azladza uwaga gesina tadiŋ gəl à Zəzagəla à vok, tsəràh à mamətsay aŋatà. Atà kà tabəzà tatak uwana Zəzagəla apəh à ahəŋ aw, ama tasəl kà tatak uwaga adəpaka vok, ŋgaha taràb kà uwaga. Tapəh la dazuwaya, kà tagà azlaməlokga, slaka madz à ahəŋ aŋatà la ahəŋ la gudəŋ uwanay la vok aw. ¹⁴ Azladza uwana tapəh kiya uwanay kà, tapəhla ala la dazuwaya, kà tayàh slaka kà aŋatà. ¹⁵ Tadzùgw lakəl aŋa slaka uwana tasa à uda la abà aya aw. Agayŋa tayàh slaka uwana tasà à uda la abà kà, naka tabəzà tetəvi mawul à abatà. ¹⁶ Ama aga kiya uwaga aw. Atà tawoyà mayàh slaka uwana aduwaŋ uwana tasàkal à ahəŋ la lig, bokuba magodfay kà zagəla, kà uwaga à uwana akəs à Zəzagəla à gəl kaykay. Gay gà la uwaga à uwana Zəzagəla azalàtala azlaməna aŋha la dazuwaya. Nəŋàwəwəŋ bokuba uwana adfahà à atà slaka à ahəŋ babay tsi.

¹⁷ Zəzagəla apəh gay à Abèraham à ahəŋ, agòdfal kà: ‘Mayyi à tsəh ala aŋak adəguwa à uda la Isak la abà.’ Lagonay kà asəl magur Abèraham. ¹⁸ ‘Kèdf à gi Isak’, agòdfal, ‘Bəzi aŋak tekula gə uwaga’, agòdfal. Kà uwana masla adiŋ gəl à Zəzagəla à vok, azəb bəzi uwatà, adàlla à makədfal. ¹⁹ Asəl kà Zəzagəla la maslay kà mawulla Isak à ləv. Hadfay, apakà vok kiya uwanay, Isak kà, agà bokuba mamətsay gə, ŋgaha awulà à uda la mamətsay.

²⁰ Kà uwana adiŋ gəl à Zəzagəla à vok, à uwana Isak apis gay à azlabəza aŋha səla à vok, Esaw atà la Yakuba. Apəhatàla gay uwana adəbəza à atà la huma la gay.

²¹ Kà aŋa Yakuba kà, aga kiya uwanay babay, kà uwana masla adiŋ gəl à Zəzagəla à vok, la kaslā uwana azlamətsay kà, apis gay à azlabəza aŋa Yusufu à vok səla nna, asà à afik, atsizilla à agəla aŋha à gay dzawwa, azləbà Zəzagəla.

²² Kà uwana Yusufu babay kà adiŋ gəl à Zəzagəla à vok, mok uwana azlamətsay kà, apəh gay à azla Isərayel, agòdf à atà la huma la gay, kà tadàsa à uda la gudəŋ Misəra la abà. Tatak uwana anaka tafəhəŋ la azlaaslasl aŋha, à mok uwana adamətsay kà apəh à atà gay aŋha.

²³ Kà uwana azlababa aŋa Musa tadiŋ gəl à Zəzagəla à vok, mok uwana tayyi Musa kà, tahàdfàŋ à ahəŋ təla makər. Tanəŋəŋ bay kà bəzi kà ahədf, guba akəs atà aw, tafà gəl à mapəhay aŋa sufəl mənŋa aŋa azla Misəra uwana: ‘Gəkədfay’, tagòdf, aw. ²⁴ Mok uwana Musa adazigəŋay, asəl kà tazalàlla kona aŋa dugu aŋa sufəl mənŋa aŋa azla Misəra aw, kà uwana masla kà adiŋ gəl à Zəzagəla à vok. ²⁵ Akəs kà mas ŋgərpa la azlaməna gay Zəzagəla, awkà asəl marabay la azlaməna madfàh mawisiga aw, kà uwana tsəhay marabay uwaga kà asafay aw. ²⁶ Ahikà mapəseway aŋa azladza la manəf Kristu uwana Zəzagəla adəfal dzakwa à gəl, kà aduwà ləmana uwana la gudəŋ Misəra gesina. Kiya uwaga à uwana adiŋ gəl à Zəzagəla à vok, la masik uwana naka masla aval.

²⁷ Kà uwana Musa afà madzugway aŋha à Zəzagəla à afik, à uwana asà à uda la gudəŋ Misəra. Sufəl aŋa Misəra apakà ləv, ama guba akəs aw. ²⁸ Kà uwana afà madzugway aŋha à Zəzagəla à afik, apəhalla ala madəvaday uwana tazalalla Paska. Agòdf à azla Isərayel kà tasəfàhàh aŋiz aŋa azlatatak à gamagày aŋatà, kà malika aŋa Zəzagəla uwana atsàlla mamətsay à waŋ aŋa makədf azlamalkwoy aŋatà aw. Kà uwana mamətsay uwaga la ahàl kà aŋa makədfà azlamalkwoy à gay.

²⁹ Kà uwana azla Isərayel tafà madzugway aŋatà à Zəzagəla à afik, à uwana dərəw uwana tazalalla dərəw mativga, adəzlla ala la huma aŋatà, bəta, ama azla Misəra kà, mok uwana: ‘Məduw à uda suwaŋ kà’, iyaw akəs atà gəl à abà, tuwiz.

³⁰ Kà uwana azla Isərayel tafà madzugway aŋatà à Zəzagəla à afik à uwana tanu-
dàhà gudəŋ Yeriko à abà, bokuba uwana Zəzagəla apəh à atà. Mok uwana tanuwid
Yeriko à abà, mavakay mədəf, zlamgam aŋa gudəŋ abəzl à ahəŋ gesina. ³¹ Kà uwana
Rahab, mis masla mazaḅ zil gà, afà madzugway aŋha à Zəzagəla à afik, ŋgaha akəs
azlaməna matsəḅ sləm à mtəga aŋha, ahəf à atà à ahəŋ, kà uwana mok uwana
azlaməna gudəŋ Isərayel takəf azladza uwana takweska gay Zəzagəla kà, tasakà
masla kà makəḍay.

³² Mana gəslala vok aŋa mapəhay lakəl aŋa azladza anik ma? Dabaray la ahəŋ
aw, kasla la ahəŋ kà mapəh à akul lakəl aŋa Gideyyon, Barak, Samson, Yafet, David,
Samuyel bokuba aŋa azlaməna mapəh à atà gay à ahəl anik anik aŋa Zəzagəla aw.

³³ Kà uwana tadiŋ gəl à Zəzagəla à vok, à uwana tapəh guvəl la azladza gudəŋ anik,
ŋgaha tadawà atà, takòr azladza la tetəvi aŋha, tabəzà tatak uwana Zəzagəla apəh
à atà à ahəŋ, takàs, ŋgaha tatsàkàh à gay aŋa azlasikalaveri à ama, kà madàh à atà
amik à vok aw. ³⁴ Tamàtsàhà akəl uwana ala ababəhà gəmgagəm. Mok uwana asà à
azladza kà makəf atà la katsakar bay kà tatəf. Tagà la ndzəḍa aŋa gəl aŋatà aw, ama
Zəzagəla avà à atà maslay. Tapakàh azlaməna guvəl mənŋa, tadawà azlaməna guvəl
məlokga, azlaməna guvəl uwatà tahòyàh atà à ahəl. ³⁵ Kà uwana azlamis tadiŋ gəl
à Zəzagəla à vok babay, à uwana tanəŋà azladza aŋatà mamətsay gà, uwana tawul
à uda.

Azladza anik tasàhàh ŋgərpa aŋuvaw. Agayŋa tadiŋ asik à gay aŋa Zəzagəla à gəl
kà naka tasakà atà, ama takəs tetəvi aŋa matəfay aw. Takəs mamətsay à ŋgərpa
à abà pəra, kà Zəzagəla aŋa mawulla atà à uda la mamətsay, ŋgaha kà atà aŋa
mabəz sifa dāḍuwa à gay uwanay. ³⁶ Azladza anik kà, tatsàk atà magodahay à gəl,
ŋgaha taslàhàh atà ala. Tawəḍàh atà la mazakazak, tadawàh atà à daŋay, taba-
sàhàŋ kiya uwaga. ³⁷ Azladza anik takəf atà la akur, azladza anik tanatsàhà atà ala
denela denela, azladza anik takəf atà la katsakar. Azladza anik aya gəy aŋatà agàh
la ahəŋ aw, tauguzàhàh kəla slaka gesina, tagàh azlaməna kuda tadawàh kà zlap à
vok. Azladza tatəḗbàh atà, ŋgaha tadaha à atà mawisiga à vok. ³⁸ Tadzàh à ahəŋ la
kəsaf la abà, ŋgaha la gudəŋ la afik, tahaŋh à tsakur à agu la azlaafək uwana talàh.
Azladza uwaga kà, azladza delga. Akəs vok kà atà aŋa madz à ahəŋ la mawisiga la
abà aw.

³⁹ Azladza uwaga gesina kà, takəsà Zəzagəla à gəl, kà uwana tadiŋ gəl à masla à
afik. Ama atà kà tabəzà tatak dzəḅa aŋha səla aw gà, uwana Zəzagəla apəh à azladza
aŋha à ahəŋ, uwaga kà Yesu. ⁴⁰ Kà uwana Zəzagəla agòḍ à anu gesina kà, naka avà à
anu tatak uwana aḍuwa uwanay. Masla kà asəl mahən atà ala, uwatà kokudā aŋatà
pəra aw, say anu gesina gami la slaka gà.

12

Zəzagəla Baba gami

¹ Kà aŋami kà, azladza uwaga gesina tahamà anu à adi, tapəhanula tadiŋ gəl à
Zəzagəla à vok babay, kà uwaga delga kà məkəs kà tetuwa azlatatak uwana adala à
anu à gay à ahəŋ kà mad à huma à gay la azlatatak mawisiga, uwana akəs anu à ahəŋ,
məhoy bokuba uwana Zəzagəla agòḍ à anu, kà mahoyay, məya vok aw. ² Mənəŋ à
huma à slaka Yesu, kà uwana masla aḍahəŋ kà anu aŋa maf madzugway gami à
masla à afik, masla la uwana adàla anu tsəràh à makəḍ gəl à ahəŋ. Masla akəs kà
makəḍ à ahəf à adi, ziruwī akəs kà mamətsay à ahəf à adi aw, kà uwana adzəgw

lakəl aŋa marabay uwana Zəzagəla adàvəl. Lagonay kà adadza madzay la ahəl kaf aŋa Zəzagəla, akoray lakəl aŋa tatak gesina.

³ Mədzugw lakəl aŋa Yesu uwaga, kakay azladza mawisiga tapəsèw tak ma? Bokuba uwana abasà magol ŋərpa uwana tadahàllàn à vok kà, mədzugw lakəl aŋha kà anu aŋa maruw vok à ahəŋ aw, ŋgaha kà akul aŋa may vok aw. ⁴ Haday, akul kà, pàw slagəla la tsakana, ama dza la ahəŋ la tataka aŋkul adamətsay dadən kà uwaga aw. Kità ma, kà mana karùwàw vok à ahəŋ ma? ⁵ Avika akul azlagay uwana Zəzagəla adzərèdàhla akul ala ay? Azalaàkulla azlabəza aŋha.

'Bəzi gulo, baŋa Sufəl Zəzagəla atapakla à azlanŋərpa kà, kazəb uwaga bokuba tatak deyday aw. Baŋa agur kà, kà kararabla aw.

⁶ Zəzagəla awula matsihila kà à dza uwana awoyaŋ. Dza uwana adapaka bəzi aŋha la uwana atsetsihəŋla.'*

⁷ Kità kà, say kaslawwal vok mas ŋərpa kà akul aŋa matapla tatak ala uwaga la abà. Ŋərpa uwaga apəhla ala, kà Zəzagəla adakəs akul bokuba azlabəza aŋha. Bəzi la ahəŋ baba aŋha awulalla matsihila aw tatakay? Awaŋ, aga la ahəŋ aw. ⁸ Zəzagəla adəhəŋ kiya uwaga gesina la azlabəza aŋha. Kiya uwaga baŋa atàpakulla à ŋərpa aw, kà kasəlaw kà akul azlabəza aŋha aw, akul azlabəza gəl gaw. ⁹ Tatak anik la ahəŋ aya, azlababa gami la gudəŋ la vok tatàpanula matsihila, məkəs gay aŋatà, ŋgaha ma sakoraka Baba gami uwana la zagəla la afik ay? Baŋa məsləkaw gay aŋha, adàvə à anu sifa adəv à gay aw. ¹⁰ Azlababa gami la gudəŋ la vok kà tatàpanula kà aŋa kaslà ŋuv, bokuba uwana akəs à atà à gəl. Ama Baba gami uwana la zagəla kà atàpanula, kà anu maham gay à vok la tsikasla aŋha la abà aŋa koksikoksi. ¹¹ La kaslà uwana tatàpanula uwaga kà aza à anu, uwaga kà akəs anu à gəl bokuba dal tatak aw. Ama baŋa ŋərpa adada à lig, azlauwana tatapla tatak la abà la abatà kà, madz à ahəŋ aŋatà kà adahəday la ləv tələmmaga.

Məkweska vok mahamay uwana Zəzagəla atapanula aw

¹² Tsa baŋa kità kà, biyàw ahəl aŋkul ala, ŋgaha bəyàw azlaasik guɓguɓga ala babay aya.* ¹³ Azladza anik la ahəŋ la tataka aŋkul la abà kà, azlaguɓguɓga, kiya uwaga kà nəfàw tetəvi tərrega, kà asik aŋkul aŋa mapiyay à tetəvi la tsəh ala aw, kà aŋa uwaga kanəfaw Zəzagəla lela, kà azlauwana azladeri aŋa mawur ala kəla.

¹⁴ Wədfàw vok à uda ŋgaha kà lapiya aŋa madz à ahəŋ la akul la abà la azladza gesina. Wədfàw vok à uda, akul babay, kà akul aŋa magay sətaka la huma Zəzagəla, kà uwana baŋa dza aga tsidfaŋa, awkà, adənəŋ Zəzagəla aw. ¹⁵ Dahàw haŋkəli kà dza aŋa makweska mapis gay à vok aŋa Zəzagəla aw! Dahàw haŋkəli babay kà dza la tataka aŋkul la abà aŋa magay dəhakak aw, aŋa kità aw kà, adala dəhakak à azladza anik à vok babay. ¹⁶ Dahàw haŋkəli kà dza aŋa magay mabila gə aw, kà masla aŋa makweska azlatatak delga aŋa Zəzagəla bokuba Esaw, uwana akweska magay malkwoy aŋha gesina, kà mabəɗla tatak may à gay aŋa mavakay tekula. ¹⁷ Kasəlaw kà la lig aŋa uwaga la ahəŋ kà, asal kà baba aŋha akəs aw. Atuw babay, ama dabaray la ahəŋ kà mabəɗla tatak uwana adahàllàn à ahəŋ aya aw.

¹⁸ Səlàw, kà slaka uwana akul katsizllaw à abà la huma Zəzagəla kà, uwaga kà bokuba gudəŋ Sənyayi, kiya aŋa azla Isərayel uwana tatsəzllàh à abà uwarà. Taslàla vok aŋa madəbani gudəŋ uwatà la ahəl aw. Tanaŋàhà akəl uwana ababəhàh la afik ŋadzaŋa ŋadza mələs agàh tabadamma, tanaŋàhà kular. ¹⁹ Tatsənà matsənyay aŋa mazlazliŋ ŋgaha tatsənà kuda aŋa Zəzagəla kà Zəzagəla aŋa mabəɗatàma aya aw.* ²⁰ Kà uwana tatak uwana apəh à atà kà aduwà ndzəfa aŋatà. Agòɗ à atà kà: 'Baŋa dza adəbani gudəŋ uwanay amiyaka bə tatak fəta adəbani kà, kəɗfàw la matsahay

* 12:6 12.6 Job 5.17; Haŋkəli 3.11-12 ✧ 12:12 12.12 Yesayya 35.3 ✧ 12:19 12.19 2Musa 19.16-22; 5Musa 5.22-27

la akur!' ²¹ Azlatatak uwana tanənjəŋ la abatà ararabàh atà la kayak. Musa la gəl anja agòd: 'Guba aza à gi, gəsukulay.'

²² Ama kà anjul kà kiya uwanay aw, akul kà kazàw vok à slaka gudəŋ uwaga à uwana sləm anja Siyon, la abatà gudəŋ anja Zəzagəla uwana la sifa. Tazalalla Uru-salima: Gudəŋ la zagəla la afik. Azlamalika anjувaw tahamà gay à vok la abatà, dza aslala vok anja matugway aw, dəmdadəm. ²³ Akul la maham gay à vok anja azlabəza anja Zəzagəla la abà, uwana tahàb madəvaday, Zəzagəla adatsetser sləm anjatà à wakità anja sifa anja azladza à abà. Kabəzàw à huma anjatà uwana atà dziriga la huma Zəzagəla, ngaha Zəzagəla masla la uwana masla seriya anja azladza gesina. Ngaha apakatàla sətaka. ²⁴ Kasàwwəŋ à slaka Yesu, kà masla la uwana Zəzagəla adəhəŋ makəs vok slawda mawga la azladza aya, Akul kazàw vok à wəŋ kà makotsekw akul aniz anja Yesu, uwana apakàkulla sətaka. Aniz uwaga apəh à anu lakəl anja tatak uwana aduwanəŋ gesina, aniz anja uwana Abel apəh à anu.

²⁵ Tsa banja kiya uwanay kà: Dahàw hanjəli, kakwesàwkà paŋaw anja Yesu aw. Zamana uwarà kà azladza takweskà kà matsəb sləm à dza uwana apəhatàla mapəhay anja Zəzagəla la vədəfah. Kiya uwaga tabəzà dabaray kà matəfay la ngərpa la abà aw. Anu uwana mətəsb sləm à kuda anja Yesu, uwana asà à ahəŋ la zagəla aw, banja məkweska kà, mədàslala vok anja matəfay la abà aw. ²⁶ Zamana uwarà kà, mabədfma anja Zəzagəla abələkàhà kutso, ama lagonay kà apəh à ahəŋ kà: 'Asik tekula aya gədàbədla gudəŋ à vok la zagəla babay.' ²⁷ Gay uwaga: Asik tekula aya, apəhanula kà dèwdèw tatak uwana adəhəŋ adəbəlaka vok, ngaha adəzahla, kà azlatatak uwana abəlaka vok aw anja madz à ahəŋ tsərəh à awtəy.

²⁸ Kiya kà, kikay məgod à Zəzagəla kà uwana avà à anu makoray uwana abəlaka vok aw. Məzləba Zəzagəla bokuba uwana akəsəl à gəl, məsləkaw, ngaha məhoy yewdi anja, ngaha mədfaha sləray anja bokuba uwana ahəfal à adi. ²⁹ Hadfay gə kà, Zəzagəla uwana mədəval kufə kà masla kà bokuba akəl, uwana ababəh tatak uwana à gay, akəsà gəl anja aw.

13

Maday uwana akəs à Zəzagəla à gəl

¹ Akul uwana akul azladeda la Kristu la abà, dəw à huma à gay la mawoy vok kà akul à akul. ² Avika akul anja makəs azladza anik aw, azladza anik tadəhəŋ kiya uwaga, takəs azlaməlok dza, ngaha azlaməlok dza uwaga kà azlamalika. Uwala tasəl atà aw. ³ Dzùgwàw lakəl anja azladza uwana la danəy, gəw kà bokuba akul nna, la uwana kadzàw à ahəŋ gesina la slaka gə. Dzùgwàw babay lakəl anja azladza uwana tasà atà ngərpa, bokuba uwana kasàw ngərpa la slaka gə akul nna.

⁴ Kasaw gay lakəl anja mis la zil anja. Kak mis kazaɓ zil aw. Kak zil kadəfaha à gəl gaw babay aw. Səlàw kà Zəzagəla adədfah seriya à azladza uwana à gəl, tadəhəŋ kiya uwaga, ngaha adədfah seriya à azladza mabilaga à gəl gesina.

⁵ Kawoyaw sili pəra aw. Delga kà tatak uwana kakoray asla akul, karabawwal la kəl, kà uwana Zəzagəla: 'Kadəvika gi aw, gədàməlkala dikiidiki aw.' ⁶ Gay gə la uwaga, kəla uwabeyuwi awaf vok à uda, kà kəla dza anik gami anja magofay kà:

"Sufəl masla kà uwana azlaka gi,
Guba akəs gi, kà tatak anik aya aw.
Ma dza asik adəhəŋ aya ma?"[✧]

⁷ Dzùgwàw lakəl anja azladza uwana tadəla akul la tetəvi anja Zəzagəla la tsəh. Terəŋa uwana tazəkulla gay Zəzagəla. Dzùgwàw lakəl anja madz à ahəŋ anjatà la mamətsay anjatà uwana taməts. Dìŋəw gəl à Zəzagəla à vok bokuba anjatà uwana

tadiṅal gəl à vok. ⁸ Bokuba Yesu uwana dagay uwarà, lakana bay bà masla, masla aya adàbèdfla vok aw, adàdza à ahəṅ uwaga aṅa tsərəh à awtày. ⁹ Dahàw hanḱəli kà uwana azlatsəhay dza anik tapahla azlatatak anik ala gərgər. Zlahaw tadàzakulla tetəvi à adi. Tadàgəfay: ‘Nəfàw azlatatak anik la azlamapəhay anik lakəl aṅa mazuw tatak may, kà ləv aṅkul aṅa maḡay ndzəfa ndzəfa.’ Kadàtsəbaw sləm à uwana tadapəhay aw, kà uwana uwaga kà mapəs gay vok aṅa Zəzagəla, uwana adzadzəṅ ləv aṅa azladza ala kà uwaga kà la tatak may aw. Akəs vok, kà apaka vok kiya uwanay: Azladza uwana tanəfa mapəhay kà madegolay tatak may kà, tadàbəza tatak delga gə aṅa mapəhay uwaga tetuwa aw.

¹⁰ Yesu Kristu avà vok aṅha deyday, tekedfika azlaməna mav tatak à Zəzagəla aṅa azla Yahudiya, uwana takàdàhàh tatak la gày lukut la aku kà, mav vok aṅa Yesu uwana avà vok aṅha kà, akəs à atà vok aw. ¹¹ Kasəlaw ndzer kà, baṅa mənḡa aṅa azlaməna mav tatak à Zəzagəla aṅa azla Yahudiya ats aṅiz kà aṅa mav à Zəzagəla kà, adà à gày, kà la aṅiz la ahəl pəra, à slaka tsikasla kaykay gə, ṅgaha gəl sləb gə uwana kà tazəb à uda la huf gudəṅ kà madla matəl gay. ¹² Yesu kà kiya uwaga babay à uwana takəd à lig gudəṅ Urusalima à uda. Kiya uwaga asà ṅgərpə bay la ahəl la adi kà masla aṅa mazəb tsakana à azladza lakəl ala la aṅiz aṅha. ¹³ Tsa baṅa kiya uwanay zlà kà, mədza à ahəṅ bokuba aṅa Yesu uwana adzà à ahəṅ zlà, məhəd à uda à slaka aṅha. ṅgaha tapəsew anu la slaka gə la masla. ¹⁴ Kà uwana anu la gudəṅ uwana adàdza à ahəṅ aṅa koksikoksi aw. Məfà madzugway gami à gudəṅ aṅa Zəzagəla uwana à afik adàdza à ahəṅ aṅa koksikoksi. ¹⁵ Kità kà, məzləbə Zəzagəla aṅa koksikoksi, kà uwana Yesu adàhəṅ kiya uwanay kà, mahabay uwana məzləbəla kà apaka bokuba tatak uwana məkəfal. La dzəba gə uwanay, gay gami adàzləb sləm aṅha koksikoksi la huma azladza. ¹⁶ Dahàw delga à azladza anik, vəhàw uwana kakoraw la azladza anik. Gay uwaga kà avika akul aw, kà uwana tsəhay mavày uwaga la uwana akəs à Zəzagəla à gəl.

¹⁷ Hòyàw yewdi aṅa azlamənḡa aṅkul, kəsàw gəl à vədah la huma aṅatà, kà uwana tafà akul sləm, kà uwana tadapəhay lakəl aṅkul la huma Zəzagəla lakəl aṅa tatak uwana tanəfla akul. Baṅa kà, kəsàw gay aṅatà, tadàdàh sləray aṅatà la marabay. Tsa baṅa kità aw kà, tadàgay la mapak ləv gə. Baṅa atà la mapak ləv gə kà, adàkəs akul vok tetuwa aw.

¹⁸ Dàw à huma à gay la madəv kuḡa à Zəzagəla kà masla aṅa mazlak anu. Məsəl kà seriya akəs anu deyday aw, məwoya madəhəṅ kà uwana delga koksikoksi pəra. ¹⁹ Uwana gənavà akul kaykay kà, dèvəw kuḡa à Zəzagəla, kà la masla aṅa mav à gi tetəvi kà mawul à slaka aṅkul katskats.

Gay makəd gəl gəl à ahəṅ

²⁰ Zəzagəla uwana av lapiya à azladza à ləv aṅatà à tsəh, awùlla Yesu à uda la mamətsay, adàhəṅ bokuba mənḡa aṅa masla manəṅla azlatuwaṅ, uwana afà anu sləm. Kà uwana aməts kà aṅami, anu azlatuwaṅ aṅha. Zəzagəla azəb aṅiz aṅha, akəsà anu la vok slawda mawga, uwana adəv à gay aw. ²¹ Tsa baṅa kità kà, Zəzagəla avà à akul ndzəfa, kà akul aṅa madàh uwana akəsəl à gəl, kà masla aṅa madàh sləray aṅha la anu la abà la ndzəfa aṅa Yesu Kristu, kà anu aṅa mapakay bokuba uwana asal. Mazləbay aga la Yesu Kristu aṅa koksikoksi. Amen.

Ayyi makəd gəl à ahəṅ

²² Azladedə gulo, gətsetser akul wakità uwanay, kà madzərədàhəkulla, ṅgaha bay, gətsetser akul kà ṅuv pəra. Haday, gəgəf à akul, kà akul aṅa makəs azlagay uwanay à gəl aṅkul.

²³ Sèlàw kà, deda aṅkul Timotawus kà, aga la daṅay aya aw, tadùwal gəl adagay. Baṅa abəz gi à vok katskats kà, gədàdalla à awtày la tsəh, à mok uwana gədàda à awtày à slaka aṅkul.

²⁴ Dahàw ‘Ayyi’ gulo, à azlaməna manəṅla akul. Ngaha la azladza anik aṅkul babay. Azlaməna madiṅal gəl à Yesu à vok la gudəṅ Italiya tadahakulla: ‘Ayyi’ babay.

²⁵ Vok mahamay aṅa Zəzagəla aga la akul gesina. Amen.

WAKITÀ UWANA YAKUBA ATSETSÈR Lettre de Jacques

Ayyi

¹ Gi Yakuba, uwana gi mayà aña Zəzagəla, la Sufəl Yesu Kristu, la uwana gətsetser wakitə uwanay la ahəl gulo: “Ayyi”, gəgod à akul, akul azladza tsəhay aña Zəzagəla uwana kasləhaw gəl à ahəŋ gesina.

Zəzagəla atapla matsihila aŋha à azladza

uwana tafa gəl à masla à afik

² Azlabəza gay ləv gulo, baŋa azlamaguray anik anik tabəza à akul kà, rabəw kaykay. ³ Kà uwana kasəlaw lela, kà baŋa tagur madiŋal gəl à vok aŋkul, ŋgaha atsizilla à afik lela kà, madiŋal gəl à vok aŋkul adàvə mabasiŋ. ⁴ Tsizilləw à ahəŋ lela kà mabasiŋ aŋkul aña mapəhla vok ala tsərəh à makəf gəl à ahəŋ, kà akul aña mapak sətaka aña tetuwa, ŋgaha ləv aŋkul aña magay kokudə mawisiga. ⁵ Baŋa dza uwana matsihila aŋha la ahəŋ aw kà, anava à Zəzagəla uwana avəhahay la ləv tekula, uwala akwesla à dza aw. Ndzer kà, av matsihila à dza, uwana anaval kokudə masləhal à vok. ⁶ Ama baŋa dza anava tatak anik la slaka Zəzagəla kà adiŋal gəl à vok ndzer, kà Zəzagəla avəl, kokudə maβək gəl à ahəŋ səla. Kà uwana dza uwana abək gəl à ahəŋ səla kà, bokuba maganŋtsay aña iyaw, uwana afaβ abəlakəŋ la dərəv la afik. ⁷ Kà aña tsəhay dza uwaga adzugw kà: “Gedəbeza tatak la slaka Zəzagəla”, agod aw. ⁸ Kà à uwana abək gəl à ahəŋ səla, anəfa tetəvi aŋha.

Gay lakəl aña ləmana la kudə

⁹ Dza kudə gə uwana anəfa Yesu Kristu, uwana tafa à matugway à abə aw kà arab, kà uwana Zəzagəla atugw à makoray aŋha à abə. ¹⁰ Ama dza uwana galepi gə, aga la matugway uwana la abə, masla bay kà arab kà uwana. Zəzagəla apəhla ala kà ləmana aŋha kà uwana asafay aw. ŋgaha amətsay la vərđi anik, bokuba azlamawuratatay uwana tanisay. ¹¹ Afats avəđay la ndzəđə, ŋgaha agul azlakəsaf ala. Azlamawuratatay tanisla, mahəđay aŋatə adəv à gay. Dza galepi gə adəmətsay bokuba azladza anik gesina la sləray aŋha la abə bay suwan.✧

Gay lakəl aña azlamatərəbay

¹² Marabay agay la dza uwana abasa azlamaguray uwaga lela gesina, adəbəza sifa adəv à gay aw, uwana Zəzagəla apəh à ahəŋ kà aña azlauwana tawoya masla. ¹³ Dza atəđ à mapapatay à abə kà, adzug kà: “Zəzagəla la uwana apapat gi”, agod aw, kà uwana dza aslala vok mavavar Zəzagəla kà mađəh mawisiga aw, ŋgaha bay Zəzagəla apapat dza bay aya aw. ¹⁴ Madzugway mawisiga uwana la ləv aña dza la tsəh, la uwana adək dza à mađəh mawisiga à abə. ¹⁵ Azlatatak mawisiga uwana adzugway la ləv aŋha la tsəh kà, la huma la gay ŋuv kà, adəhəŋ la dazuwaya. Mok uwana tsakana uwaga adanazila kà ayyi mamətsay.

¹⁶ Azlabəza gay ləv gulo, dza avavar akul aw. ¹⁷ Azlatatak dziriga gə kà, tatsa à ahəŋ la slaka Zəzagəla Baba gami, uwana adəhə uwaga gesina la zagəla la afik. Azlatatak dzəba aŋha səla aw gə kà, uwaga tatsa à ahəŋ la slaka Zəzagəla Baba, uwana adəhə afats, təla la azlatsetsiliŋ. Maβəđla vok la ahəŋ aw. Aday bokuba afats uwana aday kà maβəđla vəđ à waŋ la afats aw. ¹⁸ Avə anu sifa kà la gay aŋha dziriga gə. Gesina

✧ 1:11 1.11 Yesayya 40.6-7

adaha uwaga la mawoyən anha, kà anu anja magay azlateranja la azlatatak uwana la abà adahàhàn.

Məkəs gay anja Zəzagəla lela

¹⁹ Azlabəza gay ləv gulo, dzügwàw à uwanay. Kəla kà, kəla uwabeyuwi ankul afa sləm à gay anja azladza anik, uwana tapəhay kà, tapəh katskats la zlawzlaw aw, tagəh azlaməna mapak ləv katskats babay aw. ²⁰ Kà uwana dza masla ləv gə kà, aslala vok anja madəh tatak uwana akəs à Zəzagəla à gəl aw. ²¹ Tsəhay gə uwaga kà, sàw à uda la abà, kadahaw tsakana aya aw, məsləkaw Zəzagəla ngaha məfa sləm à gay uwana afa à ləv gami à tsəh. Gay uwaga kà la ndzəfa, kà mabiy akul à tsakana ankul la gay ala. ²² Say kadahaw tatak uwana wakità Zəzagəla apəhakulla, awkà katsəbawwal sləm pəra aw, kà uwana banja katsəbawwal sləm pəra la kokufa madehən kà, kavavaraw gəl ankul. ²³ Banja dza atsəb sləm à gay uwaga pəra, ngaha masla adaha uwaga aw, kà masla kà adəpakay kalkal la dza uwana anənà hudf à adi anha la kutərum la abà, ngaha anərəz vok anha. ²⁴ La lig manərəz hudf à adi anha la ahən, adiy anha, ngaha katskats madz à ahən anja hudf à adi anha avikan. ²⁵ Ama kà anja dza uwana anərəz azlamapəhay anja Zəzagəla, uwana tavà à anu makor gəl kà, ngaha anəfa tetəvi anja mapəhay uwaga lela, Zəzagəla adəpislə gay à vok kà sləray uwaga. Dza uwana atsəb sləm à azlamapəhay uwaga ngaha avikan aw kà, akəs gay anja lela. Kità kà, Zəzagəla apislə gay à vok la sləray uwana la abà, adəhən gesina.

²⁶ Banja dza adzugw kà masla kà masla manəf Zəzagəla, ama banja asləh vok aləh anha aw, ngaha banja azlagay mawisiga pəra, tatsa à wan la paŋaw anha la awtəy, kiya uwaga kà, avavar gəl anha, manəf Zəzagəla anha kà deyday pəra, gay anha kà kalkal la madəfay afad. ²⁷ Manəfay delga uwana akəs à Zəzagəla Baba gami à gəl kà, maf sləm à azlabəza matawan, ngaha la azlamis kufa, uwana tasa ngərpa. Ngaha dza la gəl anha asləh vok à vok anja babay, kà tatak mawisiga anja gudən à vok uwanay anja mavavaray, ngaha madahalla mawisiga à vok aw.

2

Azladza gesina kà kalkal la huma Zəzagəla

¹ Azladedə gulo tsa kadiŋawwal gəl à Sufəl gami Yesu Kristu à vok, kà uwana masla kà mənğa, aduwa azlatatak gesina la mazləbay kà. Kità kà akul kà, kayahawani dza mayahay aw! ² Zlahaw azladza səla tatsawan à maham à gay à vok ankul à abà. Tekula anətà atsokw à lukut delga gə à abà, la azladzedə anja luwəluwə la ahəl aya. Dza anik uwanay kà kufa gə, azlamakatsekətse pəra adadaw à vok. ³ La abatà: ‘Ayyi’, kagodaw kà à masla madaw à lukut delga gə à vok, kagodawwal: “Sà anjak à abanay, dzà anjak à madzay la kursi la afik!” Ama masla kufa kà: “Tsizlla à abà gə”, banaw kagodawwal, “Tsehür à makəla asik gami la abanay.” ⁴ Banja kadahawan kiya uwanay kà, kayàhàwànì dza mayahay aw takay? Kay kazinàw vok à dza anik uwanay ala, azlatatak uwana kadzugwaw kà mawisiga. ⁵ Azlaməna gay ləv gulo, fəwal sləm lela, kasəlaw kà Zəzagəla atsatsəmànì azlaməna kufa anja gudən à vok uwanay, kà atà anja madiŋ gəl à Yesu à vok aw, takay? Ngaha kà atà anja mabəzal ləmana dziriga gə. Atsatsəmànì atà, kà atà anja mabəzal makoray, uwana apəh à ahən kà mavəy azlauwana tawoya masla. ⁶ Ama akul ma, kà mana à uwana kazinàw vok à azlaməna kufa ala ma? Azlagorobu la uwana tasàhàh tatərəbàh akul aw takay? Ngaha atà la uwana tabayàh akul à huma seriya aw, uwà? ⁷ Atà la uwana tatsad gay à sləm anja Yesu Kristu uwana à tsəh, Zəzagəla avà à akul aw takay?

⁸ Makəs mapəhay anja makoray uwana aduwa azlaanik dèwdèw, uwana tatsetsèr à wakità Zəzagəla à abà kà, kà delga. Mapəhay uwanay agodf:

'Wòyà masla magay anjak kalkal bokuba uwana kawoya gəl anjak.'[✠]
 Anja kiya uwaga kà, delga kadahawwanj. ⁹ Ama baña kayàhàwàni dza kà mayahay kà, kadahàwwànj kà mawisiga, mapəhay adàslinid' akul, kà uwana kapəsewaw masla. ¹⁰ Amiyaka baña dza akəs mapəhay anja Zəzagəla gesina, ama apəsew kà tekula anjatà pəra, dza uwaga kà adəpəseway kà gesina anja la huma anja Zəzagəla. ¹¹ Kà uwana masla uwana agòd: "Kada à gəl gaw aw", agòd aya babay: "Kakədf dza aw." Baməraka kada à gəl gaw aw, kakədf dza, kà bà kakweska mapəhay anja Zəzagəla.[✠] ¹² Kà uwaga gəgod' à akul, la azlatatak uwana la abà kapəhaw gesina, ngaha la azlatatak uwana la abà kadahawwanj gesina bay: Sèlàw kà: Zəzagəla adàhakullanj seriya à gəl. Adàguray à baña kakəsaw mapəhay uwana avà à anu makor gəl. ¹³ Baña dza la vok mahamay kà azladza anik aw, la mok seriya kà, vok adàhama à Zəzagəla kà masla babay suwanj aw. Ama baña vok ahama à ka, kà azladza anik, Zəzagəla adàdukw à ka seriya à gəl suwanj aw.

Dza uwana avà ləv anja à Yesu kà, adfahaha sləray babay

¹⁴ Azladede, baña dza apəhay la gay kà: "Gədinj gəl à Zəzagəla à vok", agodəy, uwala adfah uwana: 'Dahàwwànj', Zəzagəla agòd' aw kà, gay anja kà akəs vok aw. Madinjal gəl à vok tsəhay gə uwaga kà abələn aw, dabaray la ahən aw. ¹⁵ Zlahaw masla gay Zəzagəla la ahən, uwana anəkudə anja lukut ngaha anəkudə anja tatak may babay. ¹⁶ Baña dza la ahən la tataka ankul la abà agod' atà: "Zəzagəla apis à akul gay à vok. Anasl akədf' akul aw, may azakul aw", uwala avà à atà tatak, uwana tanəkudə anjatà aw, gay anja ma akəs à atà vok takay? Awanj. ¹⁷ Madinjal gəl à Zəzagəla à vok kà kalkal la uwaga babay suwanj. Baña dza agod' kà: Gədinj gəl à Zəzagəla à vok, ama uwala adfahàh uwana Zəzagəla anavay aw, kiya uwaga kà, madinjal gəl à vok anja kà mamətsay gə. ¹⁸ Zlahaw baña dza agodəy kà: Gədinj gəl à Zəzagəla à vok, dza anik agodəy aya kà: Gədfahàh sləray delga delga gə. Tatak uwana gədapəh à ka kà kiya uwanay: "Pəhgəla tsəhay mav ləv anjak à Zəzagəla, ngaha sləray delga gə anjak uwana kadahàhànj tsi!" Ngaha gədapəhkala azladal sləray gulo, kà kak anja manəhən kà, gəvə ləv gulo à Zəzagəla kà, uwana sləray uwaga apəhla ala kà, gəvə ləv gulo à Zəzagəla. ¹⁹ Kasəl kà Zəzagəla kà tekula pəra. Delga. Amiyaka azlamazlazlay babay kà tasəl masla babay, ngaha guba akəs atà kà uwaga. ²⁰ Gəl anjak kà dzanjanj, tsəb gi sləm: Gəpəh à ka, baña kadinj gəl à Zəzagəla à vok, ngaha kadahàh sləray delga gə aw kà, uwaga kà tatak uwana akəs vok aw, deyday pəra. ²¹ Baba gami madzidziga Abəraham agə dziriga la huma Zəzagəla. Agə dziriga kà la azlatatak uwana adfahànj, uwana akəs bəzi anja Isak kà makədfay à Zəzagəla aw uwà?[✠] ²² Lagonay kasəl kà Abəraham adinj gəl à Zəzagəla à vok, ngaha adfahà azlasləray delga gə babay. La madəhən kiya uwanay avà ləv anja à Zəzagəla anja tetuwa. ²³ Tatak uwaga kà adəbəza à wanj bokuba uwana tatsetsər à wakità Zəzagəla à abà:

'Abəraham afa madzugway anja à Zəzagəla à afik, kà uwaga à uwana Zəzagəla apakànj ala dziriga la huma anja.'[✠]

Abəraham apakà slawda anja. ²⁴ Iyay zlà, kanəhànj aw ay? Dza aga la dziriga la huma Zəzagəla kà madegolay sləray anja uwana adfahànj babay, awkà la madinjal gəl à vok pəra babay aw.

²⁵ Dzùgwàw lakəl anja Rahab, masla mazaḃ zil gə babay tsi, agə kiya uwaga babay. Mok uwana azlaməna matsəḃ sləm anja azla Isərayel tahàd à slaka anja kà, azlakà à atà, apəhatàla tetəvi anik kà atà manəfay. Kà uwana adfahànj kiya uwanay la uwana, Zəzagəla agənj dziriga la huma anja.[✠] ²⁶ Baña sifa la dza la vok aya aw kà, dza uwaga

[✠] 2:8 2.8 3Musa 19.18 [✠] 2:11 2.11 2Musa 20.13-14; 5Musa 5.17-18 [✠] 2:21 2.21 1Musa 22.1-14 [✠] 2:23 2.23 1Musa 15.6; Yesayya 41.8 [✠] 2:25 2.25 Josu'e 2.1-21

kà adàmətsay. Madiŋ gəl à Zəzagəla à vok babay kà kiya uwaga. Baŋa sləray delga la tsəh aw, kà uwaga kà tatak uwana akəs vok aw, deyday pəra.

3

Nəhəwla aləh aŋkul lela!

¹ Azladedə gulo. Məsəl kà azlauwana tatapla azladedə anik tadəbəza seriya dafuwa aŋa azladza anik. Gay gə la uwaga kà, kawoyaw mapakahay azlaməna matapla azladza mənŋa aw. ² Anu mədahəh mawisiga aŋuvaw. Baŋa dza adəh mawisiga la mabadma la abə aw kà, masla kà dza dziriga, masla kà asləha vok à vok aŋha lela. ³ Dzùgwàw lakəl aŋa pəlis tsi, uwana mədahəh zagoma à pəlis à gay kà, kà masla aŋa makəs gay gami, ŋgaha kà manəf tetəvi uwana asa à anu. ⁴ Dzùgwàw babay lakəl aŋa mən kəslah iyaw. Keslah iyaw uwaga kà mənŋa gə, ama bəzi tatak ŋuvga la ahən à uwana adala, amiyaka bə afad awul atə à adi babay, kəslah iyaw kà aday à slaka uwana asa à masla madalla. ⁵ Aləh aŋa azladza bay kà kiya uwaga. Adagay bəziga babay kà, atsa zlapay hazlak hazlak. Kasəlaw kà, kà bəzi akəl kà, ababəh mələm mənŋa à gay gesina, bəhbəbəh. ⁶ La aləh aŋa dza babay kà kiya akəl. Mawisiga aŋa gudən à vok uwanay kà, aga la abə, la vok gami la abə. Awis dza ala gesina, masla la uwana tatak maz sifa aŋa dza ala. Akəl uwaga la gəl aŋha, mavats vok gə la gudəh akəl la abə, uwana azəh dza ala tetuw tetuw. ⁷ Azladza takor azlatatak gesina, takor azlatatak asik, la azlatatak mahoyay la zagəla, la azlatatak maday la huf, la azlatatak uwana la iyaw la abə. ⁸ Ama azladza taslala vok aŋa makor aləh aŋatə aw, uwaga kà bəzi tatak mawisiga, uwana dza aslala vok aŋa madəfəl gay à ahən aw. Ahən ala la magur uwana akəd dza. ⁹ Məsəkaw Sufəl Zəzagəla Baba gami la aləh uwanay, ŋgaha mətəfla azladza bə la aləh uwaga aya gotənaŋ. ¹⁰ Gay mazləbəy la gay matsafay tatsa à wan bə la gay uwaga la awtəy. Azladedə azlawla kà vok kà madəhən kiya uwanay aw. ¹¹ Iyaw matsidəyga, la iyaw zazəmzəmga atsa à uda la suwa tekula la abə aw. ¹² Azladedə, gudəv ayyi kuvu aw, matavəruk ayyi gudəv babay aw. Bay aya kà, iyaw matsidəyga atsa à uda la iyaw zazəmzəmga la abə aw.

Matsihila uwana atsə à ahən la slaka Zəzagəla

¹³ Aga la ahən dza matsihila gə la tataka aŋkul la abə ay? A uwana atsənə azlatatak ay? Adəhə azlatatak delga, ŋgaha azə gəl à vədah babay aya, uwaga apəhla ala kà, aga la matsihila. ¹⁴ Ama baŋa kadəhaw maŋor à azladza anik à vok, ŋgaha akul la ləv səla, ŋgaha kadzugwaw kà lakəl aŋkul pəra, kiya uwaga kà, katsaw zlapay deyday aw, ŋgaha kapəhaw mawisiga à dziriga à gəl bay aw. ¹⁵ Tsəhay haŋkəli uwaga kà, atsə à ahən kà la slaka Zəzagəla aw, atsə à uda kà la gudən à vok uwanay la abə. Matsihila aŋa Zəzagəla aga la abə aw, uwaga asa à uda kà la ahəl aŋa seteni. ¹⁶ La slaka uwana azladza maŋor gə la ahən kà, tadzugway kà à gəl aŋatə pəra, azlatatak tada à vok la tetəvi aya aw, ŋgaha azlatatak mawisiga gesina tadəyyi à tsəh lakəl aŋa uwaga. ¹⁷ Ama matsihila uwana atsə à ahən la afik kà gərgər. Dza tsəhay matsihila uwaga kà sətaka, masla kà tələmma, adzadzəna gəl ala aw, masla vok mahamay, koksikoksi masla kà adəhən kà azlatatak delga gə pəra. ¹⁸ Azladza uwana atə la ləv tekula, la uwana tavə lapiya à azladza anik, sləray uwana tadəhən kà, adəvə mayyay delga gə, adəkəsa vok. Uwaga kà bokuba uwana taslək tatak à guf à abə ŋgaha tatsəd uwana tasləka. Atə kà, azladziriga la yewdi aŋa Zəzagəla.

4

Azlaməna mawoy tatak aŋa gudən à vok

¹ Kà mana kapahaw gay la magazlay koksikoksi ma? Hadfay aw ay? Kagazlahaw kà, kà uwana madzugway mawisiga ankul apa slagëla la lëv ankul la tsëh. ² Kakëdfaw yewdi à azlatatak à abà, ama kabëzawwal aw, gay gà la uwaga à uwana akul kakëdfaw dza. Kakëdfaw yewdi à azlatatak à abà, ama kaslawwalla vok mabëzal aw. Gay gà la uwaga à uwana, kagazlahahaw la map slagëla. Kabëzawwal tatak uwana asa à akul bay aw kà, kà uwana kanavaw kà à Zëzagëla kà masla anja mav à akul aw. ³ Amiyaka banja kadëvaw kudfa à Zëzagëla kà, masla mav akul kà kabëzawwal aw, kà uwana kadëvaw kudfa la tetëvi anja aw. Kanavaw kà azlatatak uwana akëdf akul à adi përa. ⁴ Ndzer, akul kagagahaw bokuba azlamis mëna mazaþ zil gà, uwana tadza à ahëj la slaka la abà titi aw. Bà la hadfay kà, kasëlaw kà, banja dza awoya tatak anja gudëj à vok kà, masla kà masla mëzam anja Zëzagëla. Dza uwana akës, anëfa azlatatak anja gudëj à vok kà, apaka masla mëzam anja Zëzagëla. ⁵ Kadzugwaw kà gay uwana tatsetsër à wakità Zëzagëla à abà kà akës vok aw, kagodfaw aw. Tagòdf:

'Kà Zëzagëla kà manor anja Masasëfok, uwana avà à anu.'

⁶ Daduwa à gay uwaga aya kà apis anu gay à vok, tatsetsër à wakità Zëzagëla abà: 'Zëzagëla akweska azlamëna zlapay, ama apis gay à azlauwana à vok atà tëlëmna.'^{*}

⁷ Gay gà la uwaga hòyàw yewdi anja Zëzagëla koksikoksi. Kwesàwkà seteni, ngaha adàhoy akul à ahàl. ⁸ Sàw à wan, zàw vok à slaka Zëzagëla, ngaha masla adàza vok à slaka ankul babay. Akul, uwana akul azlamëna tsakana, sàwla ahàl ankul à uda la tsakana la abà. Akul azladza uwana la lëv sëla, dëdfàw mawisiga ankul la lëv ala tetuwa. ⁹ Zàwàwla gël kà tsakana ankul, fëkàw ahàl à kudfa, ngaha tsàhàw hulolo. Kakëdaslaw aw, ama tawaw. Karabaw aya aw, ama zawawla gël. ¹⁰ Wulàwla gël à wëfah la huma Zëzagëla, kà masla anja makës akul à afik.

Katsëdfaw vok gay à tsëh kà akul à akul aw

¹¹ Azladedà, kapëhaw mawisiga à azladza anik à vok aw, dza uwana apëh mawisiga lakël anja masla magay anja, ngaha atsëdfal gay à tsëh, kiya uwaga kà, apëh mawisiga lakël anja mapëhay anja Zëzagëla. Masla kà, atsëdf gay à mapëhay à tsëh babay. Kayyà, banja katsëdf gay à mapëhay à tsëh, kak kanëfa masla aw, katsëdfal gay à tsëh përa. ¹² Dza tekula la uwana avà mapëhay à azladza, uwaga kà Zëzagëla, masla kà masla seriya. Masla kokudfa gël anja la uwana aslala vok kà mabël azladza, ngaha masla kokudfa gël anja la uwana akëdfay aya. Kà anjak ma: "Gi uwa?", kagodf, à uwana katsëdf gay à masla magay anjak à tsëh uwa?

Kagaw azlamëna zlapay aw

¹³ Tsëbàw gi slëm, akul azladza uwana kagodfaw: Lakana banjaw lebëj, mëdàda à gudëj anik mëdàdza à ahëj la abatà mavay tekula, kà mëdàbëza sili. ¹⁴ Akul azladza uwana kapëhaw kiya uwaga kà, kasëlaw uwana adàpaka vok lebëj aw. Sifa ankul kà kalkal la kësëk uwana akësalla, apëhla vok ala, ngaha la lig la ahëj kà, adàsahla aya.^{*} ¹⁵ Uwana naka kapëhaw kà: Banja asa à Zëzagëla madàdza à ahëj la sifa, mëdàdfëhëj tatak uwanay banjaw tatak uwahà. ¹⁶ Ama banja kiya uwaga aw kà, akul azlazlapay, gay uwana kapëhaw kà, say gay zlapay. Madfëhëj kiya uwaga kà delga aw, mawisiga. ¹⁷ Kità kà, awul akul à gël, banja dza asël madfàh delga, ngaha adahan aw, kiya uwaga kà masla adadfah tsakana.

5

Akul azlamëna gorobu dfahàw hanjëli

¹ Akul azlamëna gorobu tsëbàw gi slëm, kà uwana naka akul katawaw la matsàh hulolo, kà azlanjërpä uwana kadàsahaw. ² Kà uwana lëmna ankul adàzinla, ngaha

^{*} 4:6 4.6 Hanjëli 3.34 ^{*} 4:14 4.14 Hanjëli 27.1

maməŋ adàzaw lukut aŋkul à gay. ³ Luwàluwà aŋkul la gursu aŋkul kà, marzaw adàkasay, ŋgaha marzaw adàgay bokuba sayda lakəl aŋkul, ŋgaha adàpaday vok aŋkul à gay, bokuba akəl. Kahamaw ləmana à ahəŋ kà la makəf gəl à ahəŋ gudəŋ à vok. ⁴ Uwanay la uwana masik aŋa azlaməna sləray, uwana tapəs guf aŋkul, ŋgaha mapuw gudzi aŋa dziriga aŋa azlaməna sləray adaday à huma Zəzagəla uwana la zagəla la afik, ŋgaha masla uwana akoray lakəl aŋa tatak gesina adatsən atà.✧
⁵ Kadzàw à ahəŋ la matsiday la abà la gudəŋ à vok, kadahaw tatak uwana asà à akul. Kazùwàw lela, kagagəsèhàw dadaftakorra bokuba azlasla uwana tagagəsèh atà aŋa makəfay. ⁶ Kakadàvaw seriya à azladza uwana à gəl tadfahəŋ mawisiga aw, kakəfaw atà babay, atà kà takweskà akul aw.

Basàwwàŋ ŋgaha dèvàw kuɖa

⁷ Azladedə, kà uwaga gəgodf à akul, basàwwàŋ tsərəh à kaslā uwana Sufəl gami awul à ahəŋ. Dzùgwàw lakəl aŋa masla mapəs guf, akud matsəf tatak aŋha la mabasiŋ. Akud iyaw madzəba iyaw tsərəh à madiy aŋha aŋa iyaw. ⁸ Akul babay basàwwàŋ kiya uwaga, wàdàw ləv ala, kà uwana mavakay uwana Sufəl gami adàwula à waŋ kà nekwa. ⁹ Azladedə gulo katsetseslaw vok gay à vok kà akul à akul aw, ŋgaha kà Zəzagəla aŋa makəs akul la seriya aw. Tsəbàwwal sləm, masla seriya kà atsa à waŋ, aga la gay gamagà. ¹⁰ Azladedə gulo, dzùgwàw à azlaməna mapəh à atà gay à ahəl uwana uwarà, tapàhàh sləm aŋa Zəzagəla. Tapàwla azlatatak la atà la afik, bokuba uwana tasàh ŋgərpa, ŋgaha tadzà à ahəŋ la mabasiŋ la abà. ¹¹ Məgodf kà, azladza uwaga tasà à afik la ahəl, kà uwana tabasàŋ. Katsənàwwàŋ lakəl aŋa Job. Kakay abasàŋ azlatatak uwaga la mok uwana asà ŋgərpa ma? Akul kasəlaw babay kà Zəzagəla adfahàlla delga la lig aŋa mas ŋgərpa aŋha la ahəŋ. Haday, vok ahamà à Zəzagəla kà azladza uwatà, adfahà à atà delga.✧

¹² Azladedə gulo, gay kaykayga kà aganay: Baŋa kapəhaw gay anik kà, kazuwaw mawafay aw, kazuwaw mawafay la zagəla aw, kazuwaw mawafay la gudəŋ à vok aw kazuwaw mawafay la tatak anik aw. Baŋa kagədfawwan à afik gòdàw: “Iyay”, pəra. Baŋa kagədfawwan à afik aw: “Awan”, gòdàw pəra. Pəhàw kà kiya uwanay pəra, kà seriya aŋa Zəzagəla aŋa matəf à akul à gəl aw.

¹³ Dza la ahəŋ la tataka aŋkul la abà as ŋgərpa ay? Adəv kuɖa à Zəzagəla. Dza la ahəŋ la tataka aŋkul la abà la marabay ay? Masla azləba Zəzagəla la mahabay. ¹⁴ Dza la ahəŋ la tataka aŋkul la abà la dufvats ay? Masla azala azlamasiga aŋa gay Zəzagəla, kà atà aŋa madfahalla aməl à gəl, la sləm aŋa Sufəl gami Yesu. ŋgaha tadəv kuɖa à Zəzagəla kà masla. ¹⁵ Baŋa tadiŋal gəl à vok kà, madəv kuɖa aŋatà uwana tatsizilla à afik kà, adàbəl masla dufvats, ŋgaha Zəzagəla adàtsizlləŋ ala aya. Baŋa adadàh tsakana kà, Zəzagəla adàmatsalaŋ ala babay. ¹⁶ Kà madegolay uwaga gəgodf à akul: Pəhàw gay ləv ala kà akul à akul, ŋgaha kadəvaw kuɖa à Zəzagəla kà mawurla. Madəv kuɖa aŋa dza dziriga la huma Zəzagəla aga la ndzəfa lakəl aŋa azlatatak gesina. ¹⁷ Dzùgwàw à Eliya uwana uwarà tsi. Eliya kà dza bokuba anu babay, kiya uwaga dagay kaslā uwatà adəv kuɖa à Zəzagəla tsərəh mavay makər la tenma, iyaw asùw à makoray uwatà à abà aw. ¹⁸ La lig aŋa uwaga la ahəŋ, adzəkà madəv kuɖa aya, kà iyaw aŋa masuway aya, kiya uwaga Zəzagəla avà iyaw aya, ŋgaha azlatatak tadzəkà mas à uda aya.✧

¹⁹ Azladedə, baŋa dza la ahəŋ la tataka aŋkul la abà az à tetəvi dziriga aŋa Zəzagəla la tsəh ala dogdogogga, ŋgaha dza anik awùlla à tetəvi à tsəh, ²⁰ səlàw kà, dza uwana awùlla masla tsakana à tetəvi à tsəh kà, masla aŋa mas à uda la tsakana la abà

kà adàbiyən à mamətsay la gay ala. Baməraka tsakana aṅha mənḡa, kà Zəzagəla adàmatsalaṅ ala, haɗay.✧

MATERA ANA WAKITÀ UWANA PIYER ATSETSÈR Première Lettre de Pierre

Ayyi

¹ Gi Piyer, uwana gi masla matapla la slaka Yesu Kristu, gi gètsetser à akul wakità uwanay, akul uwana Zəzagəla atsatsàmàni akul, kà anja magay azlatsəhay anja. Gètsetser à akul, akul uwana kaslèhàw gəl à ahəj, la azlakutso uwana la abà sləm anjata: Pontiya, Galatiya, Kapadotsəya, Asəya ngaha Bitiniya. Kadzaw à ahəj la abata bokuba akul azlaməlok gə. ² Iyay, dagay uwana Zəzagəla, Baba gami, apèh à ahəj kà kadəgaw tsəhay anja la Masasəfok anja, apakakulla kà azlatsehay anja, kà akul anja matsəb sləm à Yesu Kristu, ngaha kà makotsekwàh akul aniz anja, kà akul mapak sətaka la huma Zəzagəla, kà Zəzagəla anja mapisakulla gay à vok, la vok mahamay anja, la lapiya anja, la madz à ahəj la wurwur kaykay.

Məzləba Zəzagəla uwana abəl anu

³ Məzləba Zəzagəla Baba anja Yesu Kristu gami, kà uwana vok ahamà à Yesu kà anu. 'Ayyà', agəf à anu, kà mav à anu sifa mawga la ahəl anja Yesu Kristu. Kà uwana Zəzagəla awùlla Yesu à uda la mamətsay. Kà mawul à uda uwaga, məfa manewəj gami à ahəj, lakəl anja, mədəwulla à uda la sifa aya. ⁴ Ndzer, məsəl babay kà, kadəkoraw tatak delga, uwana Zəzagəla adəfehəj à ahəj kà anjul la zagəla, akul tsəhay anja, uwana abəfəla vok aw, awis ala aw, atatuway aw. ⁵ Akul uwana kadijawwal gəl à vok kà akul la maslay anja ndzəfa anja, kà azladza gesina anja masəlay kà adabəl akul la paraka, la kaslè uwana gudəj à vok adədəv à gay.

⁶ Iyay zlə, kà azlatatak uwana Zəzagəla adahəj kà akul katsekaw, baməraka lagonay kasaw azlanjərpa anik anik kà anja kaslè njuv pəra. ⁷ Kasəlaw kà azlamaguray, la azlanjərpa uwana kasaw, kà akul anja masəlay kà ləv uwana kavàw à Zəzagəla kà akəs vok ndzer. Azladza taguray madzərəfay anja luwəluwə la akəl la abà, tekefika madzərəfay anja adəv à gay. Kiya uwanay la madijal gəl à vok gami babay zlə, uwana aduwa luwəluwə la kaykay. Tsəhay madijal gəl à vok magurayga uwanay, adàvə à akul mazləbay, la masik, la masləkaway la vuɸ uwana Yesu adəsa à ahəj. ⁸ Baməraka kanəjaw masla dadəj aw kà kawoyawwanj. Kadijaw gəl à masla à vok kà uwaga à uwana katsekaw kaykay, matsəkay uwana aduwanj uwana tapəhay la panaw. ⁹ Kà uwana kà, gəɸawwanj à afik ndzer kà, kadabəlaw.

¹⁰ Azladza uwana uwarə, Zəzagəla apəh à atə gay ahəl kà mapəh à azladza, tayəhəh la manərəzay lela kà matsənəj godega anja, uwana anaka Zəzagəla abəla à azladza. Tapəh à azladza à vok à abə dagay uwarə, lakəl anja tatak matsifayga, uwana Zəzagəla adahəj à ahəj kà anjul. ¹¹ Bokuba uwana Masasəfok Kristu agə la atə la abə, apəh à atə à vok à abə kà, Kristu adəsa ngərpa, la uwana masla anja mabəzal mazləbay. Azlaməna mapəh à atə gay ahəl uwaga tayəh masəlay la mələ, ma uwala à uwana naka azlatatak uwanay tapaka vok, ngaha la magay la ahəj anja zlə. ¹² Zəzagəla apəhatəla azlatatak uwana naka tapaka à vok la mələ anjata aw, ama uwaga kà anjul. Lagonay, azlauwana tazəj gay matsifayga tapəh à akul azlatatak uwaga. Uwaga kà Masasəfok uwana Zəzagəla asləl à wanj, la uwana atsə à wanj la gay anjata. Amiyaka azlamalika tayəhəh kà masəlay godega anja azlatatak uwaga babay.

Madz à ahəj sətaka uwana ahəf à Zəzagəla à adi

¹³ Kà uwaga wàdàw madzugway ankul ala, kà akul anja manəf masla la dziriga, fàhàw akur à vok ankul à lig, fàw manewəŋ ankul kà à mabasiŋ à afik, uwana adàvə akul la kaslà uwana Yesu Kristu adàwula à waŋ. ¹⁴ Kəsàw koksikoksi gay anja Baba ankul uwana la zagəla la afik. Uwarà, mok uwana kasələw gay matsidayga aw, kanəfaw mabila anja vok ankul gesina, ama lagonay kà, kanəfaw aya aw. ¹⁵ Kiya uwaga: Dzàw à ahəŋ la sətaka la abà, kà uwana Zəzagəla azalà akul, kà akul anja magay azlatsəhay anja, kà uwana masla kà tsikasla la tatak gesina la abà. ¹⁶ Dagay uwarà tatsətsər à wakità Zəzagəla à abà kà:

'Gàw sətaka, kà uwana gi babay kà, gi kiya uwaga.'[☆]

¹⁷ Baŋa kadəvaw kudà à Zəzagəla kà kagodəhawwal: “Baba, Baba”. Tsa baŋa kiya uwaga kà, say kahoyaw ziruwì anja, la mahənay, uwana akul la gudəŋ la vok anja dəŋŋa. Nəŋàwla vok lela, kà uwana masla adəh seriya à dza kokudà mahoy à adi, say la kəla sləray anjətà, uwana tadəhəhəŋ pəra. ¹⁸ Sələw kà Yesu Kristu apəlanula gəl à ahəŋ la tsakalay məŋga aw takay! Kà akul anja masak manəfay anja azlababa ankul deydayga, uwana tatəpakulla. Kà magur la azlanjərpa uwana kasaw kà, kà akul anja masəlay kà ləv uwana kavàw à Zəzagəla kà, akəsà vok ndzer, baməraka azladza tagur luwəluwə uwana adədəv à gay vərđi anik, kà maguray à baŋa delga. Kiya uwanay la madinjal gəl à vok ankul babay zlà, uwana aduwa luwəluwə la ndzəda, la uwana apəlanula gəl à ahəŋ. ¹⁹ Ama tsa tekedika, apəlla akul gəl à ahəŋ la aniz gəl anja, uwana la ndzəda məŋga məŋga. Masla Kristu apakà bokuba magadzaw uwana kokudà mawisiga, sətaka. ²⁰ La kaslà uwana aləg madəh gudəŋ à vok, Zəzagəla akəsàni masla, ŋgaha lagonay la kaslà uwana gudəŋ à vok adəv à gay, Zəzagəla adəfətalla à ama ala, la dazuwaya, kà masla anja mabəl akul. ²¹ Kà madegolay Yesu la uwana kafawla kà gəl à ahəŋ la Zəzagəla la ləv ankul. Zəzagəla awulla à uda la mamətsay, ŋgaha avəl mazləbəy. La kità kà, gədàw madinjal gəl à vok ankul à Zəzagəla à afik, ŋgaha fàw manewəŋ kà à masla à afik.

²² Kiya uwaga, akul kagaw sətaka, kà uwana kakəsàw gay Zəzagəla, ŋgaha wòyàw azladedə ankul məna manəfay. Kiya uwaga gəgod' à akul: “Wòyàhàw vok kà akul à akul la ləv tekula.” ²³ Akul kasələw kà kadəyyaw vok mawga, la gay Zəzagəla uwana avà sifa, uwana asafay, akəd' gəl à ahəŋ aw. La abatà kà, kapakàw azlabəza anja dza, uwana amətsay tetuwa aw, kà uwana sifa uwaga kabəzàwwal kà, la slaka dza uwana amətsay aw. ²⁴ Tatsətsər à wakità Zəzagəla à abà:

'Azladza gesina kà atà bokuba azlakəsaf, marabay anjətà gesina kà bokuba azlamawuratatay anja kəsaf; kəsaf agulla ala, mawuratetay anja asakway.

²⁵ Ama gay anja Sufəl Zəzagəla masla adəv à gay aw.'[☆]

Gay uwanay kà, gay marabəŋ gə uwana katsənanwəŋ.

2

Zəzagəla atsatsəmàni akul, kà akul anja magay azlaanja

¹ Tsa ndzer Zəzagəla adəvə à akul sifa mawga uwanay kà, wùtsàw mawisiga ala gesina, katsədafay gay aya aw, kagaw azlaməna magolla dza aya aw, kadəhaw à adi aya aw, kazuwaw vok anja dza aya aw. ² Pakàw bokuba azlabəza vərna, uwana tawoya awà koksikoksi la slaka azlaiyà anjətà, uwaga akul babay, kà akul anja mazigənay. Kawoyaw gay Zəzagəla koksikoksi tsəràh à kaslà uwana Zəzagəla adəfətala à ama ala, kà masla adəbəl akul ndzer. ³ Akul say kayəhaw mad à huma à gay la mawoyəŋ, kà uwana kasələw kà Zəzagəla kà atsif.[☆]

⁴ Zàw vok à slaka Sufəl Yesu Kristu, kà uwana av sifa à azladza, masla kà akur uwana azladza tapəsəw, tekedika masla la uwana Zəzagəla adəfal à ahəl, kà masla la

uwana akur mawad gày gesina. ⁵ Akul babay, akul la sifa, gaw bokuba akur uwanay, kà Zəzagəla aña makəs akul kà aña mañalla akul gày, kà Masasəđok aña aña madz à ahəñ la aku. La gày uwatà la aku, kadəgaw azlaməna mav tatak à Zəzagəla, kà akul aña madəhalla sləray la ləv tekula, à uwana ahəđal à adi, kà madegolay Yesu Kristu. ⁶ Kiya uwanay tatsetsər à wakità Zəzagəla à abà:

'Nəñàwwàñ, gəfa akur tekula à gudəñ uwana sləm aña Siyon, kà aña mañal gày gulo, azlaakur anik tadədal à gəl. Gəyàhàni kà uwana dzəba aña səla aw, kəla dza uwana adiñ gəl à masla à vok ziruwi, adəkəsay tetuwa aw.'

⁷ Kà akul uwana kadiñaw gəl à masla à vok kà, masla dzəba aña səla aw, ama kà aña azladza uwana tadiñal gəl à vok aw kà, kiya uwanay tatsetsər à wakità Zəzagəla à abà, Zəzagəla agəđ:

'Akur uwana azlaməna mañal gày tapəsəw kà, adapakay akur mawad gày gesina.'

⁸ Ngaha agəđ aya:

'Akur uwanay la uwana atsahla matekwid' à azladza, à uwana tatəđ à ahəñ. ^{*}

Matekwid' atsàhla atà kà la masla, kà uwana tadiñ gəl à gay Zəzagəla à vok aw, uwana dagay uwarà Zəzagəla apàhàh kà, say apakà vok kiya uwanay. ⁹ Tekedika, kà añkul azlatsəhay uwana Zəzagəla akəsàni akul, akul maham à ahəñ məna mav tatak à Zəzagəla, akul tsəhay tsikasлага aña. Masla atsatsàmàni à akul, kà akul aña mazin à azladza aña azlatatak mənga, uwana la abà adəhàhàñ. Masla la uwana ahəl akul à uda la mələs la abà, ngaha abək akul à udaka aña à abà, uwana apəhla à akul ala, kà akul dzəba aña səla aw gə. ^{*} ¹⁰ Dagay uwarà kà, akul tsəhay aña Zəzagəla aw, ama lagonay kà kadapakaw azlaaña, dagay uwarà kasələw vok mahamay aña Zəzagəla aw, ama lagonay kà, adagay mav à akul gə. ^{*}

Madz à ahəñ bokuba azlaməna sləray aña Zəzagəla

¹¹ Azlamanalay, sələw kà akul azlaməlok la gudəñ la vok, kà uwaga gədəv à akul kudə: Kamkam katapaw ahàl à azlatatak mawisiga à vok, ngaha kà adiya aña makəs akul aw, kà uwana azlatatak uwaga adəđəđ à akul gay à ahəñ aña madəhəñ uwana ahəđ à Zəzagəla à adi. ¹² Lagonay, akul la tataka azladza uwana la abà tasəl Zəzagəla aw, tsizlləw à ahəñ lela la maday añkul la abà, amiyaka tatsəđ akul gay à tsəh, baña tanəña madəhəñ añkul lela, tadəzləb Zəzagəla la kaslə uwana adəwula à wañ.

¹³ Kiya uwaga kanəfaw Sufəl gami Yesu Kristu, tsəbàw sləm à pañaw aña azladza, uwana tanəñla akul la gudəñ la vok, uwana atà la ndzəfa. Hòyàw yewdi aña azlaməñ sufəl uwana takoray lakəl aña tatak gesina. ¹⁴ Hòyàw yewdi aña azlaməna manəñla akul, uwana məñ sufəl abək atà à ahəñ kà madəh seriya à azlaməna madəh mawisiga, ngaha aña mazləb azlaməna madəh delga. ¹⁵ Asa à Zəzagəla kà kadaw lela, kà azladza kà masəl akul, ngaha tadza à ahəñ titi kà matsəđ à akul gay à tsəh. ¹⁶ Gəw bokuba azladza makor gəl gə, ama kagodaw kà akul la makor gəl la abà, kà kadəhawwañ mawisiga la masal añkul aw. La kità, gəw azlamagamza aña Zəzagəla. ¹⁷ Kəsàw azladza gesina, wòyàw azladedə añkul məna manəf gay Zəzagəla, guba akəs akul kà Zəzagəla, kəsàw gay aña məñ sufəl babay. Nəfàw slaka asik aña Yesu uwana anəfà.

Kristu apəlla à anu ala, kà anu mas ngərpa

¹⁸ Gəpəhay kà akul azlamagamza, uwana kadəhaw azlasləray, kəsàw gəl à ahəñ la huma azlamənga añkul, hòyàw guba kà añaatà. Kasləkawaw azlauwana tasəl akul pəra aw, ama sləkàwàw azlauwana tadəhakulla mawisiga à vok bay. ¹⁹ Baña dza anik abas ngərpa kà madegolay Zəzagəla, amiyaka ngərpa uwatà kà lakəl aña deyday kà, uwaga la uwana tatak uwana ahəđ à Zəzagəla à adi. ²⁰ Iyay, baña kadəhaw

^{*} **2:8** 2.8 Mahabay 118.22; Yesayya 8.14-15; 28.16 ^{*} **2:9** 2.9 2Musa 19.5-6; Yesayya 43.20-21 ^{*} **2:10** 2.10 Hosəya 2.23

mawisiga, ngaha tazlabàh akul, ngaha kabasawwan ma, uwa adàzləb akul uwa? Ama baŋa kaɗahaw delga, ngaha tasa à akul ngərpa, lakəl aŋa uwaga kabasawwan kà, uwaga tatak uwana ahəɗ à Zəzagəla à adi. ²¹ Kà aŋa kiya uwaga à uwana Zəzagəla azàlla akul. Yesu uwana mafal dzakwa à gəl gà, kà masla la gəl aŋha, kà aɗahəŋ kiya uwanay kà maɓəl akul. Apəhəkulla tetəvi, kà akul aŋa manəf slaka asik aŋha. ²² Masla aɗahəhà mawisiga tetuwa aw, avavàrà dza dikiɗiki aw. ²³ Iyay, amiyaka tatsàkal magoɗahay à gəl babay kà, masla awulatàla azlamagoɗahay aw. Amiyaka tasəl ngərpa, masla adzùgw maɗàh mawisiga à azladza uwatà à vok aw. Ama masla kà avà vok aŋha kà à Zəzagəla uwana à afik, aɗàh seriya la mahoy adi aw. ²⁴ Yesu Kristu la gəl aŋha, masla azəb tsakana gami à gəl aŋha, à mok uwana tatatàsl à ahəf à adi, kà anu aŋa magay bokuba azladza uwana tamàts kà ahəl tsakana, ama kà anu aŋa madz à ahəŋ la sifa, kà madegolay dziriga. Kawùràw ala, kà uwana taslàhəŋla. ²⁵ Dagay uwarà kagàw bokuba azlatuwan uwana tetəvi adazah atà à adi, ama lagonay kà, kadaɓəzaw vok aya, nəfàw masla manəŋla akul, uwana afa à akul sləm, masla asal kà mawisiga aɗəbani akul babay aw.*

3

Madz à ahəŋ aŋa azlazil la azlamis

¹ Akul azlamis, hòyàw yewdi aŋa azlazil aŋkul. Baŋa kaɗahawwan kiya uwanay, azlazil aŋkul uwana tasəl gay Zəzagəla aw, tadàbədla madz à ahəŋ, tadàdiŋ gəl à Zəzagəla à vok kà madz à ahəŋ delga aŋa azlamis aŋatà. ² Tadànəŋəŋ maday aŋkul sətaka, ngaha bay, la mawoy atà aŋkul. ³ Kayahaw bəɗà aŋa vok aŋkul aw, bokuba magoɗay mats gəl anik anik, kà mapəhla vok ala, ngaha bay, kakay maɓək tatak bəɗà luwàluwàga à vok mi, ngaha aya kakay à maduw dzersay à vok mi. ⁴ Ama delga kà, uwaga aguwa à uda kà la ləv aŋkul la tsəh, delga kà ləv aŋkul agay mabasiŋ gə, ngaha tələmmaga, kà uwana tsəhay bəɗà uwana aguwa à uda la ləv, awis ala dikiɗiki aw, uwaga la uwana tatak uwana ahəɗ à Zəzagəla à adi, aɗuwa azlaanik gesina. ⁵ Azlamis uwana uwarà tanəfàh Zəzagəla tagàh kiya uwanay, tahòyàh yewdi aŋa azlazil aŋatà ⁶ Kiya uwaga nərəzàw Sara, akəs gay aŋa zil aŋha Abəraham, azalàlla kà Baba, baŋa ziruwi akəs akul aw kaɗahaw uwana delga gə, akul babay kapakaw bokuba masla suwan.* ⁷ Akul azlazil bay, say kadzaw à ahəŋ la matsən vok gay la abà la azlamis aŋkul. Atà kiya akul aw, kà uwana atà kà azlaguɓguɓ. Nəŋàw atà à adi bokuba uwana kanəŋaw à vok aŋkul à adi, sifa uwaga Zəzagəla avà à akul kà deyday, ngaha avà à akul, ngaha avà atà babay la slaka gə. Baŋa kaɗahawwan kiya uwanay, Zəzagəla adàtsəb sləm à madəv kuɗa aŋkul, tatak la ahəŋ adàɗedəfəl gay à ahəŋ aw.

Amiyaka kaɗahawwan delga kà à azlaməna maɗiŋal gəl à vok

tadasa ngərpa.

⁸ Iyay zlà, aganay gay madəvla à gay: Akul gesina dzàw à ahəŋ la ləv tekula. Vok mahamay agay la akul gesina. Wòyàw vok kà akul à akul la tetəvi aŋa Zəzagəla la ama, gəw tələmna, wòyàw vok. ⁹ Baŋa dza aɗahakulla mawisiga à vok kà kawulawla aw. Baŋa dza agòɗàh à akul, kagoɗahawwal aw. La abatà kà: Pisàwla gay à vok, kà uwana la kaslà uwana Zəzagəla azalà akul kà magay tsəhay aŋha kà, apəh à akul à ahəŋ kà adapisakulla gay à vok. ¹⁰ La wakità aŋa Zəzagəla la abà tatsetsèr kà: 'Dza uwana asal kà aŋa madz à ahəŋ la matsiɗay la abà kà, say asakiya mawisiga la fida, uwana atsa à uda la ləv aŋha.

* 2:25 2.25 Yesayya 53.5-9 * 3:6 3.6 1Musa 18.2

11 Delga kà, azəb ahəl aŋha à uda la mawisiga la abà, ŋgaha adfàh delga la mayàh tetəvi matsən vok gay la Zəzagəla, ŋgaha la azladza anik pəra.

12 Sufəl anəŋla azlauwana tadfàh delga, afa à atà sləm la matsən madəv kudfa aŋatà. Ama kà aŋa azlauwana tadfàh mawisiga kà, atsəb à atà sləm tetuwa aw',[☆] Zəzagəla agòf. 13 Baŋa kayahaw madfàh delga la ləv aŋkul la tsəh gesina, uwa à dza uwana adəfahakulla mawisiga uwa? 14 Amiyaka kasaw ŋgərpa lakəl aŋa azlatatak delga uwana kadahawwəŋ lakəl aŋa uwaga kà Zəzagəla adapisakulla gay à vok, kiya uwaga ləv aval akul à gay, kà azladza uwana tadəhakulla mawisiga à vok aw. 15 La kità kà sləkàwàw Kristu la ləv tekula, masla apakà madzahaga aŋkul. Gəw nekwa koksikoksi kà akul aŋa mawulla ala lakəl aŋa à uwana anava akul gesina lakəl aŋa uwana kafəw manewəŋ aŋkul kà à masla à afik. 16 Baŋa kawulawatàla, dfahəwwəŋ kà la ləv tələmmaga, sləkàwàw atà babay, kadəhaw mawisiga diki diki aw kà uwana baŋa azladza tatugw mawisiga lakəl aŋkul kà ziruwi, kà uwana tatsək magodəhay à delga aŋkul uwana à gəl la tetəvi aŋa Kristu la tsəh. 17 Nuləm kasaw ŋgərpa kà madfàh delga, kiya uwaga la uwana Zəzagəla awoyaŋ; uwaga la uwana aduwa à vok, kà akul kasaw ŋgərpa, à kà madfàh mawisiga. 18 Yesu Kristu la gəl aŋha aməts asik tekula kà madəgolay tsakana aŋkul, adəvə sləray aŋha à gay la mamətsay aŋha. Masla, uwana dza dziriga, aməts kà aŋa azladza uwana azladziriga aw, kà masla aŋa madla anu à slaka Zəzagəla. Atà takəf masla, ama Zəzagəla awùlla à uda la sifa la Masasəfok aŋha. 19 Mok uwana Zəzagəla adəhəŋ, uwanay ahəd, azəŋ à azladza uwana atà la daŋay mamətsay la abà, la mezewi. 20 Uwaga kà azladza uwana uwarə takweska mapəhay aŋa sufəl Zəzagəla, Zəzagəla akudà atà la mabasiŋ mok uwana Nuhu adəhə kəslah iyaw, ama takweska. Azladza uwana tahəd à kəslah iyaw à abà kà atà dəŋ aw, atà mtəgis pəra à uwana Zəzagəla atəfà atà kà iyaw.[☆] 21 Iyaw uwatà apakà magagazləla la batem uwana abəl akul la tsakana aŋkul la abà. Batem uwaga kà mapal vok pəra aw. Ama uwana adala anu à maham gay à vok à abà la Zəzagəla la ləv tekula, kà uwaga à uwana Sufəl Yesu Kristu awulà à uda la mamətsay. 22 Ŋgaha awulà à zagəla, adadza madzay la ahəl kaf aŋa Zəzagəla. Masla akoray lakəl aŋa azlamalika, ŋgaha la azlatatak anik gesina uwana atà la ndzəfə la abatà.

4

Zəzagəla akoray lakəl aŋkul

1 Nəŋəwwəŋ kà Yesu Kristu asa ŋgərpa la vok aŋha, kà uwaga à akul babay: Gəw nekwa aŋa masay ŋgərpa bokuba aŋha bay, kà uwana dza uwana as ŋgərpa la vok aŋha, adfàh tsakana aya aw. 2 Lagonay mədzəka la madla à huma à gay la kəla kaslə uwana kadzaw à ahəŋ la gudəŋ uwanay la vok kaslawwalla vok aŋa madfàh uwana ahəf à Zəzagəla à adi, awkà azlatatak mawisiga uwana asa à ləv aŋkul aw. 3 Kaslə uwana kadazawwəŋla adagay diga. Azlatatak uwana kadəhəwwəŋ kà, aganay azlatatak uwana kadəhəwwəŋ uwarə, kadəhəwwəŋ kà uwana asa à vok aŋkul pəra: Kagəhəw azlaməna guzu, kahabəhəw azlamadəvaday kəla mavakay, kahaməhəw gay à vok kà mas guzu, kasləkəwəhəw azlamazlazlay atà uwana tawis mapəhay aŋa Zəzagəla ala ndzer. 4 Ama lagonay kà, kagagəməwla vok à ahəl la azladza uwana tasəl Zəzagəla aw, aw. Kà uwaga ləv adaval atà à gay, ŋgaha tatsəka à akul magodəhay à gəl. 5 Ama vudf tekula tadətsizilla à huma aŋa Zəzagəla kà aŋa seriya. A masla kà nekwa aŋa madfàh seriya à azladza uwana à gəl atà la sifa, ŋgaha azlauwana à gəl tamatsay babay. 6 Makəs vok aŋa uwana Kristu azəŋ gay marabəŋ kà, azlauwana la mezewi bay kà atà aŋa madz à ahəŋ la sifa bokuba Zəzagəla uwana la sifa. Kay kà,

☆ 3:12 3.12 Mahabay 34.12-16 ☆ 3:20 3.20 1Musa 6.1-7.24

Zəzagəla adfahà à atà seriya à gəl bokuba uwana adfehəŋ à azladza la gudəŋ la vok gesina nəma.

Maday aŋa azlaməna madiŋal gəl à vok

⁷ Gudəŋ à vok kà nekwa adəv à gay. Gay gà la uwaga kəsàw gəl aŋkul, ŋgaha gàw nekwa kà akul aŋa madəv kudfa à Zəzagəla. ⁸ Iyay, tatak mənŋa gà kà, say kawoyaw vok kà akul à akul la ləv aŋkul gesina, kà masal kà, aslaslad maham à ahəŋ tsakana ala.* ⁹ Kiya uwaga kəsàw azladza la ahəl səla kokudfa maŋoŋuzay. ¹⁰ Zəzagəla adà-dahakulla delga la azladabaray anik anik. Avà maslay à kəla uwabeyuwi aŋkul, kà madàh azlatatak anik anik, say kəla uwabeyuwi adàh dziriga, masla azəb maslay aŋa Zəzagəla uwana avəl kà masla mazlakla azladza anik. ¹¹ Dza uwana la maslay kà mapəh gay anik apah azlagay uwaga à uwana asà à waŋ la slaka Zəzagəla, dza uwana la maslay kà mazlak azladza anik, azlaka atà la ndzədfa uwana Zəzagəla avəl. Dahàwwàŋ kiya uwanay kà azladza aŋa mazləbay Zəzagəla la tatak gesina la abà, kà madegolay Yesu Kristu, masla uwana la maslay la mazləbay aŋa koksikoksi! Amen.

Marabay la masla madiŋal gəl à vok uwana as ŋgərpa

¹² Azladedə gulo, ləv avalla akul à gay, kà manəŋ azlamətərbəy anik anik aw. Azlatatak uwaga abəzà à akul kà aŋa maguray madiŋal gəl à vok aŋkul, kadzugwaw kà azlatatak uwaga kà azlatatak mavalakulla à ləv à gay aw. ¹³ Kahamaw à ŋgərpa uwana à abà Kristu asà, kà uwaga kà, vələhàw à zagəla la kaslà uwana azladza tadənəŋəŋ kà masla mənŋa la yewdi anatà, akul kadàvalahaw à zagəla la ləv aŋkul gesina. ¹⁴ Baŋa azladza tatsəka akul magodəhay à gəl kà, kà uwana akul azlaaŋa Kristu, Zəzagəla adapisakulla gay à vok kà uwaga, kà uwana Masasədok aŋa Zəzagəla uwana ndzədfa, ŋgaha aduwaŋ gesina adza à ahəŋ la akul. ¹⁵ Baŋa dza la ahəŋ la tataka aŋkul la abà asa ŋgərpa, kà uwana adfahà mawisiga baŋaw akədf dza, baŋaw adà à gəl aŋa azlatatak anik, baŋaw kamavələh à gay aŋa azladza anik à abà bokuba mavdzagogor kà, dza azləbà kà uwaga aw, apakà vok kiya uwaga la akul aw. ¹⁶ Ama baŋa dza asa ŋgərpa, kà uwana masla aŋa Kristu, ziruwi akəs kà uwaga aw. Kiya uwaga kà, 'Kikay', agod à Zəzagəla, kà uwana azladza tazalla ala kà masla dza aŋa Kristu.

¹⁷ Kaslà kà adaslay à uwana Zəzagəla adfah seriya à azladza à gəl. Adədfah seriya kà azlaaŋha à gəl dadəŋ. Kayyà, baŋa adədfəhəŋ kà azladza aŋha à gəl dadəŋ, ma kakay adəpaka vok la azladza uwana tatsəb sləm à gay marabəŋ aw ma? ¹⁸ Bokuba uwana tatsətsər à wakità Zəzagəla à abà:

'Baŋa Zəzagəla adakəsəy azlaaŋha la seriya, atà uwana azladziriga, mana adəpaka vok la azladza mawisiga uwana tasəl Zəzagəla aw ma?'

¹⁹ Kà humà à gay uwaga, azlauwana tasa ŋgərpa kà uwana Zəzagəla awoyəŋ, kiya uwaga kà tada à huma à gay la madàh delga, ŋgaha tavà vok aŋatà gesina à Zəzagəla à ahəl, masla uwana adfahà à atà, ŋgaha masla uwana dziriga.

5

Azlamasiga aŋa azlatuwaŋ aŋa Zəzagəla

¹ Lagonay gəpəhay kà à akul azlamasiga uwana la tataka aŋkul la abà. Gi babay kà, gi masiga bokuba akul: Mok uwana tasà ŋgərpa à Kristu kà, gənəŋəŋ, gətəp gay gəl à ahəl à abà, məkaləŋ mazləbay aŋa Kristu uwana Zəzagəla apəhanula, kà uwaga à uwana 'Kamkam', gəgod akul: ² Fəw sləm à azladza aŋa Zəzagəla, uwana abək à akul atà à ahəl: Dahàwwàŋ kiya uwana masla manəŋla azlatuwaŋ af sləm à azlatuwaŋ aŋha; fəw à atà sləm la ləv tekula, bokuba uwana asa à Zəzagəla. Kadfahàwwàŋ la ləv səla aw, kadfahaw sləray kà məbəzal sili pəra aw. Dahàw sləray uwaga la ləv

* 4:8 4.8 Haŋkəli 10.12 * 4:18 4.18 Haŋkəli 11.31

aŋkul gesina. ³ Kakoraw la ndzɔfa lakɛl aŋa azladza uwana Zɛzagɛla abɛk à akul atà à ahàl aŋkul aw, fàw à atà slɛm. Ama kà nɛfàw maday delga kà mapɛhatàla maday delga. ⁴ Baŋa kadahawwan kiya uwanay kà, la kaslà uwana mɛŋ Sufɛl aŋa azlamɛna manɛŋla azlatuwan adàsa à wan, akul, azladza uwana kaduwaw atà kadàbɛzawwal la ahàl aŋha masik mɛŋga gà, uwana aduwa azlatatak anik gesina, uwana akàl atsal à adi ala aw, adàdza à ahɛŋ aŋa koksikoksi. ⁵ Gɛgod à akul azladza medɛga: Hòyàw yewdi aŋa azlamasiga aŋkul, kapakaw azlamɛna zlapay aw, dɛhàw vok slɛray kà akul à akul, uwaga kà bokuba uwana tatsɛsɛr à wakità Zɛzagɛla à abà:

'Zɛzagɛla kà apɛsɛw azlamɛna zlapay, ama adàh delga à azladza tɛlɛmmaga.'^{*}

⁶ Kà uwaga à uwana gɛgod à akul: Wulàwla gɛl à vɛdàh la huma aŋa Zɛzagɛla, uwana akoray lakɛl aŋa tatak gesina, baŋa kadahawwan kiya uwaga kà, la mok uwana kaslà adàsa à wan, masla adàzigɛn akul. ⁷ Azlatatak gesina uwana azlazlazlafa kà aŋkul kà, bɛkàw atà à ahàl aŋa Zɛzagɛla, kà uwana masla afa à akul slɛm.

⁸ Dzàw à ahɛŋ mazil à zil, kadzewhal aw. Masla mɛzam aŋkul, seteni kà, masla la uwaga auguzahay, ayàh dza kà makɛsay bokuba sikalaveri uwana awiyay, ayàh tatak may. ⁹ Kiya uwaga kavàwwal tetɛvi aw, dàw à huma à gay la mav lɛv aŋkul à Zɛzagɛla. Sɛlàw, kà azladedà aŋkul uwana la tetɛvi aŋa Zɛzagɛla la tsɛh la gudɛŋ la vok gesina tasa ŋɛrpa babay bokuba aŋkul. ¹⁰ Baŋa kasaw ŋɛrpa kà aŋa kaslà ŋuv kiya uwaga, Zɛzagɛla uwana adàhaha delga koksikoksi, masla, la gɛl aŋha adàdàhaha akul à ahɛŋ, adàvà à akul ndzɔfa kà akul aŋa masakiya à tetɛvi la tsɛh ala aw. Azalà akul, aŋa maday à mazlɛbay aŋha à abà, uwana adɛv à gay aw, la ahàl aŋa Kristu.

¹¹ Masla la uwana la maslay aŋa tsɛràh à awtày. Amen.

Gay makɛd gɛl à ahɛŋ

¹² Silas azlakà gi matsetser bɛzi wakità uwanay. Gɛsɛl kà masla dza dziriga la tetɛvi aŋa Zɛzagɛla la ama. Gɛtsɛsɛr à akul kà gɛdzɛrɛdàh akul à uda, ŋgaha bay aya, gɛgod à akul la paraka ndzer, mazlɛbay aŋa Zɛzagɛla kà bokuba uwana gɛpɛh à akul. Wàdàw lɛv ala la azlatatak uwaga la abà gesina. ¹³ Maham à ahɛŋ mɛna gay Zɛzagɛla la abanay la Babila, uwana Zɛzagɛla atsatsàmànì atà, bokuba uwana atsatsàmànì akul babay, 'Ayyi', tagod à akul. Mark uwana Kona gulo, avà à akul 'Ayyi' aŋha babay suwan. ¹⁴ Dàhàw vok 'Ayyi', kà akul à akul, la mawoy vok la abà.

Zɛzagɛla avà à akul lapiya, à akul gesina, uwana akul la ahàl aŋa Kristu.

^{*} 5:5 5.5 Haŋkɛli 3.34

MASƏLA AŇA WAKITÀ UWANA PIYER ATSETSÈR Deuxième Lettre de Pierre

Ayyi

¹ Gi Səmon Piyer, gi uwana gi mayà aŇa Yesu Kristu, gi masla matapla la slaka aŇha bay, à uwana gətsetser à akul wakità uwanay, akul uwana kadiŇaw gəl à Yesu à vok kalkal bokuba uwana mədiŇal gəl à vok babay, anu gesina məbəzà à tatak uwaga la slaka gə. Yesu Kristu adahà uwaga kà aŇami gesina, kà uwana masla kà dziriga. Masla kà Zəzagəla la gəl aŇha, Ňgaha masla məbəl anu babay. ² AwoyàŇ kà mapis gay à vok aŇa Zəzagəla agay la akul kaykay, la lapiya, kà akul aŇa masəlay kaykay Zəzagəla la Yesu, Sufəl gami.

Maday aŇa azlaməna mədiŇal gəl à vok

³ Yesu Kristu apəhanula Zəzagəla uwana azəlla anu, kà anu aŇa maham à mazləbay aŇha à abà, Ňgaha kà anu aŇa manəf maday aŇha, uwana aduwa gesina, kiya uwaga masla avà à anu ndzəda aŇa maslay aŇha, azlatatak gesina uwana anu mənəkudə aŇha, kà anu aŇa məbəzal sifa mawga, Ňgaha kà anu aŇa manəf maday uwana ahəf à Zəzagəla à adi. ⁴ La azlatsəhay tetəvi uwanay à uwana avà à anu azlatatak uwanay, uwana apəh à ahəŇ uwarà kà aŇa mav à anu azlatatak uwana dzəba aŇha səla aw kà aŇami. AdahəŇ kiya uwanay kà, kà madegolay azlatatak uwanay, kà azlatatak mawisiga aŇa gudəŇ à vok uwana akəf à adi aŇa mabiy akul aw, kà akul aŇa maf gəl à azlamadzugway aŇa Zəzagəla. ⁵ Lakəl aŇa azlatatak uwanay, gəgod akul kà: WədaŇ wok à uda! DiŇaw gəl à Yesu Kristu à vok lagonay, kanəfaw maday delga! Dəw à huma la maday delga! Yəhəw kà masəl azlatatak babay! ⁶ Kà uwana kasəlaw azlatatak uwanay, dzəw à ahəŇ titi babay, kà uwana kadafahaw akur à vok aŇkul à lig, tsizləw à ahəŇ la ndzəda la azlamətəbəy la abà la mawadəh wok à uda. Nəfəw bokuba uwana ahəf à Zəzagəla à adi. ⁷ Kà madla wok kà akul à akul bokuba uwana ahəf à Zəzagəla à adi. La madz à ahəŇ uwana bokuba akul la azladedə, wəyəw azladza gesina babay. ⁸ BaŇa kadafahaw azlatatak uwanay koksikoksi kà, masəl Yesu Kristu aŇkul adakəsakulla wok, Ňgaha maday aŇkul adavə mayyay lela. ⁹ Ama kà aŇa azladza uwana tadəh uwaga aw kà, tapakahay bokuba azlaguləf. Adavika atə à tsakana uwana tadəhəhəŇ uwarə, Zəzagəla amətsatəŇ ala. ¹⁰ Azladedə, tsa baŇa kiya uwanay kà, wəfəhəw wok à uda, kà uwana Zəzagəla azalə akul, Ňgaha atsatsəmənə akul kà madəhəŇ kiya uwanay. BaŇa kadafahawəŇ kiya uwanay, tetuwa tetəvi aŇa Zəzagəla adəvika akul aw. ¹¹ Kiya uwanay la kokudə matsigay, Zəzagəla adəpəzlla akul gamagəy, kà akul aŇa mad ə makoray aŇa Sufəl gami Yesu Kristu à abà, uwana abəl anu. Makoray uwatə adədzehəŇ aŇa koksikoksi. ¹² Kà uwaga kà, gədəwulakulla à gəl koksikoksi, tekefika kà, sələw nəma kà akul aŇa matsizl à ahəŇ la ndzəda la azlagay dziriga uwanay la abà, katapawla. ¹³ La mok uwana gi la ahəŇ la sifa dadəŇ la gudəŇ la wok, gəsəl kà dzəba aŇha səla aw kà gi aŇa mawulakulla tatak uwanay à gəl, kà akul aŇa madz à ahəŇ la adi. ¹⁴ Gəzləmətsay à dagay, bokuba uwana Sufəl Yesu Kristu apəh à gi à vok à abà. ¹⁵ Uwana gəwad wok à uda lagwa, kà baŇa gədamətsay kà, kadəbəzaw à tetəvi aŇa mawul akul à gəl aŇa azlagay uwanay.

Azlawana tanəŇə mazləbay aŇa Kristu

¹⁶ Dagay uwarə məpəh à akul mas ə wəŇ aŇa Yesu Kristu la maslay aŇha à gudəŇ à wok. La məpəh à akul kiya uwanay, məpəh à akul azlagay maviyaga, uwana asəhəh

à uda la madzugway aña azladza la abà aw. Ama mənənəŋ ndzəda aña mazləbay aŋha, la yewdi gami. ¹⁷ La kaslà uwana abəzà à masləkaway ŋgaha la mazləbay la ahàl aña Zəzagəla, məgà la abatà, mətsənəŋ kà Zəzagəla uwana aduwanj gesina la mazləbay, apəh gay uwanay:

'Uwaga kà bəzi gay ləv gulo, uwana gəwoyanj kaykay',
Zəzagəla agòd. ¹⁸ La mok uwana məgà la gudəŋ tsikaslaga la afik, la Sufəl gami Yesu Kristu, à uwana mətsənà azlagay uwanay, atsən à ahəŋ la zagəla

¹⁹ Uwana azlaməna mapəh à atà gay à ahàl aña Zəzagəla tapàh kà, apakà vok la huma yewdi gami babay, kà uwaga mədiŋ gəl à mapəhay aŋatà à vok. Delga kà kadahaw haŋkəli la mapəhay aŋatà, kà uwana sayda aŋatà kà, aga bokuba fənəs, uwana aurfay la mələs la abà. Dàw à huma à gay la matsəbal sləm, tsərəh à kaslà mavakay uwana adəpəhla vok ala la paraka. La mavakay uwatà kà, ŋuzla bebəŋ, uwana Kristu, adəpəhla vok ala, ŋgaha kadənəŋaw azlatatak gesina la paraka.

²⁰ Azlatatak uwana aduwa vok gesina, à uwana gəpəh à akul, kà gay aña azlaməna mapəh à atà gay à ahàl uwarà tapàh, ŋgaha tatsətsèr à wakità Zəzagəla à abà babay, gay uwaga kà matsihila aña azladza aw. ²¹ Gay aña azlaməna mapəh à atà gay à ahàl uwaga kà matsihila aña azladza aw, Masasəfok tsikaslaga la uwana avà à atà maslay, kà atà aña mapəh paŋaw aña Zəzagəla, uwana apəh à atà.

2

Gay lakəl aña azlaməna matapla fida à azladza (Yahuda 4-13)

¹ Kiya uwaga à uwana azlaməna mapəh à atà gay ahàl fida gə tasa à uda la tataka aña azla Isərayel la abà. Kiya uwaga babay, azlamatapla fida gə tadəsah à uda la tataka aŋkul la abà bay. Tadətapla à azladza gay mazəhatàla, tadədzedzin Sufəl masla maβəl atà tetuwa. La madəhəŋ kiya uwanay kà, magol seriya adətəf à atà à gəl katskats. ² Azladza aŋuvaw tadənəf madəh mawisiga aŋatà. Kà uwaga à uwana azladza tadəpah mawisiga lakəl aña dziriga aña Zəzagəla. ³ Azlaməna matapla fida à azladza uwaga, tadəkəf yewdi à tatak aña azladza anik à abà, tadəpah fida kà mava-varla akul, kà aña maβəz tatak. Dagay uwarà Zəzagəla apəh à ahəŋ kà madəfa à atà seriya à gəl. Masla seriya adəzahatàla gesina, adzəhal aw! ⁴ Amiyaka azlamalika uwana tadəhà tsakana uwarà. Tsakana aŋatà avikà Zəzagəla aw. Adawadəfah atà à mələs à abà la mazakazak, kà madawits atà à akəl à abà la vuƒ seriya. Tadədzà à ahəŋ la mələs taβadəfammaga la abà tsərəh à vuƒ uwana Zəzagəla adəfah seriya à azladza gesina à gəl. ⁵ La kità la azladza aña uwarà babay. Zəzagəla asək atà kiya uwanay aw, adəhà à atà seriya à gəl la iyaw. Iyaw ahəl azladza à gay, la gudəŋ la vok gesina. Abələŋ kà Nuhu, uwana apəh dziriga aña Zəzagəla à azladza, ŋgaha la azladza məfəf uwana la huƒ gəy aŋha pəra.* ⁶ Gudəŋ, uwana tazalalla Sodom la Gomor kà, Zəzagəla akəs azladza uwana tadzà à ahəŋ la huƒ aŋha la seriya, ababəh atà à gay la akəl, agəf à ahəŋ kà say masək à akəl akəl pəra. Kiya uwaga apəhla ala kà azladza uwana takəs gay aŋha aw kà, adədukw atà seriya à gəl kiya uwaga babay suwanj. ⁷ Lot kà, agə dza delga, ŋgaha Zəzagəla asəlla à uda la gudəŋ Sodom la abà. Ləv azəŋ kà tatak aña azladza uwaga tadəhəhəŋ.* ⁸ Dza delga uwatà adzà à ahəŋ la tataka aña azladza mawisiga uwaga la abà, kəla mahənay anəŋəhà azlatatak mawisiga uwana tadəhəhəŋ, atsənəhə gay mawisiga uwana tapəh, ŋgaha azəhəŋ la ləv la tsəh məŋga, kà uwana masla kà, agə dza dziriga. ⁹ Iyay la dziriga, Sufəl Zəzagəla asəl tetəvi uwana abəlla azladza uwana tanəfà masla, la magoray uwana la abà atərəβ atà, ŋgaha asəl tetəvi aña manəŋla azladza mawisiga uwana adəfaha à

* 2:5 2.5 1Musa 6.1-7.24; 19.24 * 2:7 2.7 1Musa 19.1-16

atà seriya à gəl la vud makəf gəl à ahəŋ. ¹⁰ Haday, gəpəh à akul kà, ɲgərpa uwaga kà, Zəzagəla adàvə à azladza uwana tādahàh mawisiga à vok aŋatà, ɲgaha kà uwana takəs mapəhay aŋa Zəzagəla aw.

Azlaməna matapla fida à azladza uwaga kà, gəpəh à akul, kà kurit yewdi agof à atà aw, ɲgaha tafa à gəl azladza babay aw, tahoy yewdi aŋa azlamalika uwana atà la mazləbay aw, kiya uwaga takədasl à atà. ¹¹ Baməraka azlamalika uwana taduwa azlaməna matapla fida à azladza la tetuwa bay kà, tapəh à atà gay à vok la huma aŋa Zəzagəla aw. ¹² Azladza uwaga tadàh tatak deydayga, kà madz à ahəŋ aŋatà kà bokuba azlatatak fəta, uwana takəs atà kà makaf atà. Atà tapəh gay à azlatatak deydayga uwana à vok tatsənà sləm aw. Ndzer, Zəzagəla adàzahatàla bokuba azlatatak fəta. ¹³ Zəzagəla adàvə à atà matərəbay, bokuba uwana tatərəba azladza anik suwaŋ. Asa à atà kà aŋa mazuw gudəŋ pəra, tadàh uwaga gesina la dazuwaya, amiyaka la afats. Baŋa tadza à ahəŋ la akul, ɲgaha kazuwaw kà, ziruiw kà aŋkul, ɲgaha tarabay à baŋa tavavara akul. ¹⁴ Madzugway aŋatà kà say lakəl aŋa azlaməna madaw gaw ala pəra, tayi vok kà madàh tsakana d̄ikid̄iki aw. Baŋa tanəŋa azladza uwana azlagub̄gub̄ga la tetəvi aŋa Zəzagəla la tsəh kà, tavavar atà, ɲgaha tadukw atà à tsakana à abà. Koksikoksi takaf yewdi à tatak aŋa azladza à vok. Zəzagəla adàtsafla atà, la makəs atà la seriya. ¹⁵ Tasakiya à tetəvi aŋa Zəzagəla la tsəh ala, tanəfay kà aŋa gəl aŋatà, tadfehəŋ kà uwana Balam kona aŋa Bosor adahəŋ, uwana awoyà madàh mawisiga, kà azladza aŋa mavəl sili. ¹⁶ Haday, vərđi anik Zəzagəla abəzal à tsəh la tsakana aŋha la abà. La kaslā uwatà ziwŋŋu uwana adabadma à dza didi aw, abadma bokuba dza. A masla mapəhal gay ahəl aŋa Zəzagəla uwatà, kà masla aŋa manəf azlatatak deydayga uwaga aw.* ¹⁷ Lakəl aŋa azlaməna matapla fida uwaga à azladza kà, atà kà tagay bokuba azlamukwà uwana takakəzehay aya aw, tagahay bokuba azlahabaga uwana afaf adadasinla. Zəzagəla adàd̄ah slaka à ahəŋ kà aŋatà la mələs tabadammaga la abà. ¹⁸ Tats zlapay la ndzəda la azlagay deydayga. La kità babay, tabəza azladza uwana à tsəh la uwana la abà, tasəl tetəvi aŋa Zəzagəla dadəŋ aw, azlaməna matapla fida uwaga à azladza, asa à atà kà azladza tadiya à madàh mawisiga à abà, bokuba uwana atà tadfehəŋ suwaŋ. ¹⁹ Tapah à azladza à vok à abà, kà atà tadəbəz makor gəl, tekefika atà la gəl aŋatà kà azlamayà aŋa tsakana, kà uwana kəla tatak uwana akor dza, uwaga kà mayà aŋa tatak uwana akoray. ²⁰ Baŋa dza asəl kà Sufəl Yesu Kristu kà masla mabəl anu, ɲgahaa asak à azlatatak mawisiga aŋa gudəŋ à vok uwanay à tsəh ala awis dza ala, ɲgaha takor masla ayà. Haday, kà aŋatà kà, kaslā uwaga adəgay zlalzadfa kà aŋatà, d̄afuwa à gay uwana uwarà. ²¹ Baŋa kiya uwaga kà, agayŋa tadza à ahəŋ aŋa masəl tetəvi delga kà ɲuləm, à kà uwana tasəl tetəvi lela ɲgaha tawullal à tsəh ala ayà, takəs mapəhay aŋa Zəzagəla ayà aw. ²² Tatak uwana adəbəz à azladza uwaga kà, apəhànula kà gay la gay la abà uwana tagof kà:

'Kəda avələh tatak may uwana à uda, azuw, ɲgaha awulləl à tsəh à mavələhay aŋha aya.'

Tagof aya kà:

'Tapal namzi kà masla magay kuzekaka, ama awulla à dzabay à abà.'*

3

Yesu Kristu adawul à waŋ

¹ Azlaməna gay ləv gulo, aganay wakitə masəla uwana gətsetser à akul. La wakitə səla uwaga la abà, gətsetsər à akul kà, gəwulla à akul à tsəh kà azlatatak uwana kasəlaw adagay kà aŋa mawulla à akul à gəl aŋa azlatatak uwaga la dziriga. ² Iyay,

* 2:16 2.16 4Musa 22.4-35 * 2:22 2.22 Haŋkəli 26.11

asa à gi kà gay uwana azlaməna mapəhàh azlagay uwana Zəzagəla apəhatàla mapəh à akul kà avika akul aw, ngaha bay, la mapəhay uwana Sufəl Yesu Kristu uwana abəl anu, apəh à azlaməna matapla la slaka anha à ahàl, anja azlaməna matapla uwana asləl atà à waŋ. ³ Tatak uwana asa à gi anja mapəh à akul kaykay kà: La kaslà uwana gudəŋ à vok adədəv à gay kà, azladza tadəpəhahla vok ala uwana tadəfah dèwdèw mawisiga, uwana asa à atà gesina. Azladza uwaga tadəkədfaslah akul. ⁴ Hahayyà kà, kà mana Yesu Kristu kà atsa à waŋ, bokuba uwana tapəh aw mi, tadəgodfay? Azla-baba gami madzidziga tamàts à gay, azlatatak uwana la gudəŋ la vok kà bawtawta bokuba uwana Zəzagəla anjal pəra. ⁵ Azladza tadəpəhay kiya uwanay, asa à atà kà matsənəŋ kà dagay uwarà Zəzagəla apəh à ahəŋ, ngaha kiya uwana anjal zagəla ngaha kutso. Kutso aguwà à uda kà la iyaw la abà, ngaha avaha à atà ala. Zəzagəla adəhà uwaga gesina la afad gay anha.* ⁶ Ama vərđi anik, la tsəhay afad gay anja Zəzagəla uwaga, madz à ahəŋ anja uwarà kà akalah à ahəŋ, iyaw azà gudəŋ à vok ala gesina.* ⁷ Zəzagəla agòđ aya babay kà, zagəla la kutso uwana mənəŋ atà lakana kà, tadza à ahəŋ tsəràh à mavakay uwana akàl adəpadəh à gay, la mavakay anja seriya uwatà aya kà, adəkəđ azladza uwana takəs gay anha aw bay.

⁸ Azlaməna gay ləv gulo, tatak uwanay gəpəh à akul kà avika akul aw! Kà uwana la huma Zəzagəla kà mavay dəbow kà kalkal la mavakay tekula la yewđi anha.* ⁹ Azladza anjuvaw uwana tagodfay kà: “Zəzagəla kà aduw à tsəh kà kaykay, kà mas à waŋ anja madəh tatak uwana apəh à ahəŋ!”, tagodf. Ama kiya uwaga aw. Kà uwana masla kà abasakullanj la makud à akul la abà pəra. Asa à Zəzagəla kà kabəzaw tetəvi kà akul anja mapəh gay la ləv ala, kà uwana asal kà, dza azila bə tekula aw. Hərəz kà anja asal, kà azladza gesina tabəđla vok.

¹⁰ Tekedik baŋa kaslà adəslay kà, Sufəl gami Yesu Kristu adəsa à waŋ, ndzer, ama dza la ahəŋ asəl mavakay uwana adəsa à waŋ aw. Adəsa à waŋ kà bokuba masla à gəl uwana agurəh dza gurəh. La mavakay uwatà, azladza tadətsən magol kuda mənəga bərəm, ngaha zagəla adəzila tuwiz. Akàl adəbabəh tatak uwana à gay, la zagəla la afik gesina. Adəpaka masək à akàl akàl, kutso la tatak uwana la hudf anja gesina adədəv à gay. ¹¹ Tsa baŋa azlatatak uwanay gesina adədəv à gay gesina la kiya uwanay zlə kà, akul kà, dəw à huma à gay la maday delga la abà, dəw bokuba uwana akəs à Zəzagəla à gel la azlatatak gesina la abà. ¹² Fəw madzugway ankul kà à mavakay uwana à afik. Zəzagəla adəwulla à waŋ, ngaha dəhəw uwana kaslawwalla vok babay, kà mas à waŋ anja mavakay uwaga la katskats. La mavakay uwatà, akàl adəbabəh zagəla à gay, la azlatatak uwana la afik gesina. ¹³ Ama Zəzagəla apəh à anu à ahəŋ kà adəŋal zagəla mawga, ngaha la kutso mawga aya. La abatà kà, azlatatak dziriga la uwana tadədzà à ahəŋ la abà. Uwaga kà tatak uwana məkuday lagwa pəra.*

¹⁴ Azlaməna gay ləv gulo, kà uwaga à uwana gəgodf à akul bokuba uwana kakudaw mas à waŋ anja Sufəl kà, wəđəw vok à uda kà akul anja maday la lela la abà, kà uwana baŋa adəsa à waŋ kà, kadəgaw la tataka la abà kokudə mawisiga, ngaha ləv anja madz à ahəŋ la titi la abà la huma Zəzagəla. ¹⁵ Awulla à akul à gəl kà mana mi kagodəw ay? Uwana Sufəl Yesu Kristu atsa à waŋ katskats aw kà! Kà uwana asal kà akul kabəzaw tetəvi kà anja mabəlay dadəŋ. Tatak uwana Pol, uwana akəs ləv gami, atsetsər à akul, atapəkulla kiya uwanay babay. Atsetsər kà la matsihila, uwana Zəzagəla avəl, ¹⁶ la azlawakitə anha la abà gesina, baŋa atsetsər kà lakəl anja azlatatak uwanay, kiya uwanay à uwana apəh. Azlatatak anik la ahəŋ la wakitə uwanay la abà, uwana zlazladə kà matsənəŋ. Azladza uwana la matsihila aw, azlauwana tawəđ ləv ala aw, uwana gay uwanay asal mapəhay kà tagola à tetəvi anik à tsəh, bokuba

* 3:5 3.5 1Musa 1.6-9 * 3:6 3.6 1Musa 7.11 * 3:8 3.8 Mahabay 90.4 * 3:13 3.13 Yesayya 65.17; 66.22

tabədlə azlagay anik anik la wakitə Zəzagəla la abə babay. La madfehəŋ kiya uwaga kà, tabiy seriya aŋa Zəzagəla à gəl aŋatà.

¹⁷ Azlaməna gay ləv gulo, tatak uwanay kà kasəlaw adagay. Kà uwaga à uwana gəgodf à akul kà: Dahàw haŋkəli, kà azladza uwaga takəs gay aŋa Zəzagəla aw, aŋa madukw akul, ŋgaha aŋa mazəbəkulla la slaka uwana katsizləw à afik aw. ¹⁸ Kà aŋa uwaga kà: Dàw à huma la manəf Sufəl gami Yesu Kristu, masla məbəl anu, ŋgaha masla aŋa mapisakulla gay à vok kaykay, ŋgaha aya, kà akul aŋa masəl masla kaykay aya suwaŋ. Delga kà, azladza tazləb masla lagonay, ŋgaha aŋa tsərəh à awtəy. Amen.

MATERA ANA WAKITÀ UWANA YUHANA ATSETSÈR Première Lettre de Jean

Gay anja sifa

¹ Mëtsetser à akul lakèl anja gay anja sifa, uwana agà la ahèj dagay la madzèka gudèj à vok. Mëtсэнàң, mənənàң la yewdi gami, ngaha mëtsekàl yewdi à gay, ngaha bay mədəbani la ahàl gami aya. ² La mok uwana sifa uwaga adasa à wan à gudèj à vok, mənənàң, gay gà la uwaga məpəh à akul lakèl anja, ngaha mətəkulla sifa uwana adəv à gay aw, nekwa la slaka Zəzagəla, Baba gami, sifa uwatà apəhanula vok la paraka. ³ Tatak uwana mənənàң, ngaha la uwana mëtсэнàң, mətəpakulla, kà akul anja magay tekula la maham gay à vok la abà, la Baba, ngaha la Kona anja Yesu Kristu. ⁴ Mëtsetser à akul tatak uwanay kà anu anja mavalàh à zagəla la marabay.

Zəzagəla kà masla ufaka

⁵ Aganay uwana Yesu atəpanula, ngaha uwaga la uwana mətəpakulla babay, Zəzagəla kà ufaka, tetuwa mələs la ahèj la masla la abà aw. ⁶ Baņa məgodfay kà mədahama gay à vok la masla, ama məda à huma à gay la madz à ahèj la mələs la abà kà, mədəfah fida la gay la abà, ngaha la sləray la abà. ⁷ Ama baņa mədza à ahèj la ufaka la abà, bokuba uwana Sufəl gami adza à ahèj la ufaka la abà, anu la maham gay à vok la azladza anik, kiya uwaga kà, aniz anja Yesu, Kona anja, apalla tsakana gami gesina.

⁸ Baņa: 'Anu azlaməna tsakana aw', məgodf kà, mədəvavar gəl gami, ngaha kà dziriga la ahèj la anu la abà aya aw. ⁹ Ama baņa məpəhla tsakana gami à Zəzagəla, məslala vok, məfa gəl à masla à afik. Kà uwana adəhà sləray kà la tetəvi anja. Dziriga, adəmats tsakana gami ala, ngaha adəpalanula mawisiga gami ala gesina. ¹⁰ Baņa: 'Anu azlaməna tsakana aw', mədəpaka Zəzagəla ala bokuba masla fida, gay anja azlak anu aya aw.

2

Kristu kà masla mazlak anu

¹ Azlabəza gay ləv gulo, gətsetser à akul uwanay, kà akul anja madəh tsakana aya aw. Baņa dza anik adəh tsakana, anu la masla mazlak anu anik, uwana nekwa la slaka Baba, Yesu Kristu, masla uwana dziriga, ² azlaka anu. Takədf masla kà made-golay tsakana gami. Adəhà uwaga kà anami pəra aw, kà anja azladza gudèj à vok gesina, kà tsakana anətà anja mamats ala.

³ Kiya uwaga, baņa məkəs mapəhay anja, kiya uwaga məsəl masla la dziriga. ⁴ Dza uwana: 'Gəsəl Zəzagəla', agodf, ngaha akəs mapəhay anja aw, dza uwaga kà, masla fida, dziriga la ahèj la masla la abà aw. ⁵ Ama dza uwana afa mapəhay anja à ahèj la ləv, masla kà dza uwana la masal dziriga. Aganay masəlay uwana apəhanula maham gay à vok gami la Zəzagəla. ⁶ Dza uwana agodfay la dazuwaya: 'Gi la maham gay à vok la Zəzagəla la abà', say adza à ahèj bokuba madz à ahèj anja Yesu.

Mapəhay mawga

⁷ Azlaməna gay ləv gulo, gətsetser à akul mapəhay mawga aw, kà uwana uwanay gətsetser à akul kà mapəhay maviyaga, kabəzəwwal uwaga dagay la madzèka. Mapəhay maviyaga uwaga kà gay Zəzagəla uwana katsanəwwàң. ⁸ La azlaskala anik

gøtsetsèr à akul, bokuba azlamapøhay mawga dziriga aᅇha. Apøhla ala la Kristu la abà, ᅇgaha apøhla vok ala la akul la abà babay. La haᅇfay, møløs aᅇa madiy aᅇha, ᅇgaha uᅇfaka dziriga aᅇa maufay adagay.

⁹ Dza uwana: ‘Gi la uᅇfaka la abà’ agod, ama adzedzin deda aᅇha bà gotønaᅇ kà, dza uwaga kà aga la møløs la abà aya. ¹⁰ Dza uwana awoya deda aᅇha, adza à ahøᅇ la uᅇfaka la abà, masla aga la zlamtsa kà madukw dza anik à tsakana à abà aw. ¹¹ Ama dza uwana apøsew deda aᅇha, adza à ahøᅇ la møløs tabaᅇammaga la abà, ᅇgaha asøl slaka uwana aday aw, adapaka guløf.

¹² Azlabøza, gøtsetser à akul uwanay kà, kà uwana tsakana aᅇkul adàmatsila. Zøzagøla adàmatsakullaᅇ ala kà uwana Yesu avà gøl aᅇha kà aᅇkul. ¹³ Azlababa gøtsetser à akul, kà uwana kasølaw masla agà la ahøᅇ dagay madzøka. Azlabøza kohana, gøtsetser à akul kà uwana kaᅇuᅇwàw seteni.

¹⁴ Azlabøza gøtsetser à akul kà uwana kasølaw Baba. Azlababa, gøtsetser à akul kà uwana kasølaw masla agà dagay la madzøka. Azlabøza kohana, gøtsetser à akul kà uwana akul azlandzøᅇa ndzøᅇa, ᅇgaha gay Zøzagøla aga la akul la ahàl, ᅇgaha babay kà uwana kaᅇuᅇwàw seteni.

¹⁵ Kawoyaw gudøᅇ à vok aw, kawoyaw azlatatak uwana la gudøᅇ à vok la abà babay aw. Masal aᅇa Baba Zøzagøla aga la løv aᅇa dza uwana la tsøh, awoya gudøᅇ à vok aw. ¹⁶ Køla tatak uwana aᅇa gudøᅇ à vok, kà madzugway mawisiga aᅇa sløᅇ vok, makøᅇ yewdi à uwana à vok mønøᅇnaᅇ kà maᅇøzal, magay zlapay lakøl aᅇa uwana møkoray, azlatatak uwaga gesina kà, tatsa à waᅇ kà la slaka Baba Zøzagøla aw, ama tatsa à waᅇ kà la gudøᅇ la vok pøra. ¹⁷ Gudøᅇ à vok uwanay kà, masla la uwaga adøv à gay. ᅇgaha køla tatak uwana dza adzugway la gudøᅇ la vok, adàdøv à gay babay suwaᅇ. Ama dza uwana aᅇàh uwana akøs à Zøzagøla à gøl kà, adàdza à ahøᅇ aᅇa koksikoksi.

Masla møzam aᅇa Kristu

¹⁸ Azlamøna gay løv gulo, makøᅇ gøl à ahøᅇ kà adàgay nekwa nekwa. Katsønàw uwana tapàh kà: Leri masla møzam aᅇa Kristu atsa à waᅇ. Ama lagonay, aᅇuvaw azlamøna møzam aᅇa Kristu tasàhàh à waᅇ, haᅇfay. Uwana apøhanula kà, makøᅇ gøl à ahøᅇ kà nekwa nekwa. ¹⁹ Tetuw tetuw, azladza uwaga taga la akul la dziriga aw. Kà uwaga à uwana, tasak anu vok ala. Haᅇfay ndzer, agayᅇa tagay la anu kà, naka tadza à ahøᅇ la anu. Ama taga azlaaᅇami kà aᅇa gay gà pøra, gay gà la uwaga tasaka anu à ahøᅇ kà uwaga aᅇa madzøᅇla kà bamøraka tekula aᅇatà kà, adøᅇ à anu à vok aw.

²⁰ Kà aᅇkul kà, kaᅇøzàw Masasøᅇok Zøzagøla. Kristu adzadzàᅇ akul à gøl, kà uwaga à uwana kasølaw dziriga gesina. ²¹ Baᅇa gøtsetser à akul kà, kà uwana kasølaw dziriga, awkà kà uwana kasølaw dziriga aw aw, ama gøtsetser à akul kità kà, kà uwana kasølaw babay, fida atsa à waᅇ la dziriga la abà, tetuwa aw.

²² Uwa à masla fida uwa? Dza uwana agoday la paraka kà: Yesu kà Kristu aw. Dza uwaga la uwana, masla møzam aᅇa Kristu, masla akweska atà søla nna, Baba Zøzagøla atà la Kona aᅇha. ²³ Haᅇfay, kà dza uwana akweska Kona, kà akweska Baba babay aya. Kà aᅇa dza uwana asøl Kona kà, aga la Baba babay suwaᅇ.

²⁴ Ama akul katsønaw uwaga dagay madzøka, tatak uwanay kasàkàwwal adza à ahøᅇ la akul la abà. Baᅇa tatak uwana katsønàwwàᅇ dagay madzøka adza à ahøᅇ la akul la abà, kà akul babay kadzaw à ahøᅇ la Kona la abà, ᅇgaha la Baba la abà babay suwaᅇ. ²⁵ Aganay tatak uwana Kristu apøh à anu à ahøᅇ, kà mav à anu sifa uwana adøv à gay aw.

²⁶ Gøtsetser à akul tatak uwanay, kà lakøl aᅇa azladza uwana tayàh mavavar akul.

²⁷ Baᅇa kà aᅇkul kà, Kristu adadzàᅇ à akul Masasøᅇok tsikaslaᅇa aᅇha à gøl, kà

Masasəfok uwaga aña madz à ahəŋ la akul la abà, akul kà manəkudà aña mata-pakulla tatak aña dza aw. Haday ndzer, Masasəfok Zəzagəla atapakulla azlatatak gesina. Uwana Masasəfok apahla ala kà dziriga, awkà fida aw. Gay gà la uwaga, məkəs uwana Masasəfok atapànula, uwaga asal magodəy: Dzàw à ahəŋ tekula la Kristu.

²⁸ Iyay, azlabəza gay ləv gulo, dzàw à ahəŋ la Kristu la abà, kà aŋami kà mөгəđəŋ à afik, ndzer baŋa adàwul à waŋ, kà ləv gami aña mahənla la ziruwı, la huma aŋha, la mavakay uwana adàwul à waŋ aw. ²⁹ Kasəlaw kà Kristu kà dziriga, kità babay kà, kəla dza uwana akəs, uwana akəs dziriga kà, masla kà dziriga babay suwaŋ, dza uwaga kà, masla dza aña Zəzagəla.

3

Azlabəza aña Zəzagəla

¹ Nəŋàw mawoy anu aña Baba tsi, mawoyəŋ aŋha aga la ahəŋ kayak, azaləkulla azlabəza aŋha, ŋgaha uwaga kà dziriga, anu azlabəza aña Zəzagəla. Baŋa gudəŋ à vok awoya akul aw kà, kà uwana asəl Zəzagəla babay aw. ² Azlaməna gay ləv gulo, lagonay kà, anu azlabəza aña Zəzagəla adagay. Ama Zəzagəla adapəhla ala la dazuwaya dadəŋ à uwana mədàbəzal vərđi anik, aw. Ama mədàbəza uwaga la kasla uwana Kristu adapəhla gəl aŋha ala la paraka, mədəgay kiya masla, kà uwana anu mədənəŋəŋ huf adi aŋha la yewđi gami. ³ Kəla dza uwana asal manəŋ Kristu, say ađehəŋ haŋkəli, kà masla aña madəbani tsakana aw, kiya uwaga kagaw sətaka, bokuba Kristu uwana sətaka babay.

⁴ Kəla dza uwana ađehəŋ kà tatak mawisiga pəra, uwala adəh mapəhay aña Zəzagəla aw, akweska mapəhay aña Zəzagəla, kà masla aña madəh tsakana. ⁵ Ama kasəlaw kà, Yesu, Sufəl gami asà à waŋ à gudəŋ à vok, kà mazəb tsakana à azladza la kəl ala. La masla la abà kà, tsakana la ahəŋ aw. ⁶ Kəla dza uwana adza à ahəŋ kà la masla la abà kà, adəh azlatatak mawisiga aya aw, ŋgaha dza uwana ada à huma à gay la madəh azlatatak mawisiga kà, adanəŋ Kristu la tetuw tetuw aw. Asəl masla dikiđiki aw.

⁷ Azlabəza gulo kavàw vok aŋkul à azladza tapapat akul aw! Dza uwana adəh dziriga, masla kà dziriga babay suwaŋ, bokuba Kristu uwana dziriga. ⁸ Dza uwana ada à huma à gay la madəh azlatatak mawisiga, masla kà aga la ahəl aña seteni; seteni kà akweska Zəzagəla dagay madzəka, Kona aña Zəzagəla asà à waŋ, kà masla makalàh tatak uwana à ahəŋ, seteni adəhəŋ.

⁹ Dza agay bəzi aña Zəzagəla la mayyi vok mawga, dza uwaga aslala vok aña madəh azlatatak mawisiga aya aw, kà uwana ndzəđa aña Zəzagəla, uwana ayyà vok mawga, adza à ahəŋ la masla la abà, aslala vok kà madəhəh azlatatak mawisiga aya aw, kà uwana adapaka kona aña Zəzagəla. ¹⁰ Dza uwana adəh tatak uwana dziriga aw, ŋgaha awoya deda aŋha aw, dza uwaga kà kona aña Zəzagəla aw, aña seteni. Azlasləray aŋatà tapəhanula la paraka, kà uwana tavəhla la Kona aña Zəzagəla, kà atà azlaaŋa seteni.

Wòyàw vok kà akul à akul

¹¹ Haday dziriga, uwana katəpawla teraŋa kà: Wòyàw vok kà akul à akul, tatak uwaga kà kadatapawla dagay madzəka. ¹² Kità kà, dza anəfa tsəhay gà aña Kaynu aw, kà uwana masla kà agà kona aña seteni, akəđ deda aŋha. Kà mana akəđ deda aŋha ma? Kà uwana Kaynu adəhəhəh azlatatak mawisiga. Ama tatak uwana deda aŋha adəhəhəh agəhəh dziriga.✧

¹³ Azladede, lèw aval akul à gay à baña azlamèna gudèj à vok uwanay tapèsew akul aw. ¹⁴ Ama mèsèl kà mèdasa à uda la mamètsay la abà, ngaha mèdada à sifa à abà. Gay gè la uwaga à uwana mèslala vok kà mawoy azladede gami. Dza uwana awoya deda anha aw kà, aga la ahàl anja seteni. ¹⁵ Kà anja dza uwana awoya deda anha aw kà, masla makèd dza haday, adàbèza sifa adèw à gay aw, tetuw tetuw aw. ¹⁶ Yesu Kristu kà, avà sifa anha kà anjami, uwana adahàn kà, masla mapèhanula mawoyèj dziriga. Kità kà, anu babay mèvà sifa gami kà anja azladede gami suwan zlà. ¹⁷ Baña dza gorobu anèja deda anha la kudà la abà, ama asal mazlakay aw, kakay dza uwaga agoday kà: ‘Gèwoya Zèzagèla la lèw gulo’, agoday ma? ¹⁸ Azlabèza gulo, asla kà magoday ‘Gèwoyan’, pèra aw, kapahaw azlagay namnamga pèra aw, masal dziriga kà apèhla vok ala kà la uwana la abà mèdehèj.

Guba akès anu aw

¹⁹ Aganay à tatak uwana apèhanula kà manèf tetèvi anja dziriga. Ngaha aganay tatak uwana apèhanula kà guba anja makès anu, kà mad à huma Zèzagèla aw. ²⁰ Haday, baña lèw gami apuwa à anu gudzi à gèl, mèsèl kà Zèzagèla gami kà aduwà lèw gami, ngaha mèsèl babay kà, masla gami asèl tatak gesina. ²¹ Kità kà, azlamèna gay lèw gulo, baña lèw gami apuw à anu gudzi à gèl aw, guba akès anu kà mad à huma Zèzagèla aw. ²² Zèzagèla kà adavà à anu tatak uwana mènaway gesina, kà uwana mèdeh tatak uwana: ‘Dahàwwàn’, masla agòd, la uwana akèsal à gèl. ²³ Aganay tatak uwana: ‘Dahàwwàn’, agòd: Fàw madzugway ankul à Kona anja Yesu Kristu à afik, ngaha wòyàw vok akul à akul, bokuba uwana Kristu apèh à anu. ²⁴ Dza uwana akès mapèhay anja Zèzagèla, ngaha adàdah slaka madz à ahèj anha à ahèj la lèw anha la tsèh, masla adàdza à ahèj la masla la abà. Uwaga kà Masasèdòk uwana Zèzagèla avà à anu à uwana apèh à anu, Masasèdòk uwaga aga la lèw gami la tsèh.

4

Azlamèna matapla mawisiga à azladza

¹ Azlamèna gay lèw gulo, kafaw madzugway ankul à azladza uwana à afik gesina: ‘Anu la Masasèdòk uwana atsà à wan la slaka Zèzagèla’, tagod aw. Ama nèrèzàw atà dadàn, kà akul anja masèl: atà la Masasèdòk anja Zèzagèla ndzer. Haday ndzer, azlamèna mapèh à atà gay ahàl fidaga la ahèj, uwana tadàsa à wan à gudèj à vok, taslèh gèl à ahèj gesina. ² Aganay tetèvi uwana kasèlawla à baña dza uwaga la Masasèdòk anja Zèzagèla ndzer. Kèla dza uwana agoday kà: ‘Yesu kà Kona anja Zèzagèla, asà à gudèj à vok, apakà dza bokuba anu’, dza uwaga kà, akor kà Masasèdòk, uwana atsà à ahèj la slaka Zèzagèla. ³ Ama kèla dza uwana agoday kà: ‘Yesu kà Kona anja Zèzagèla aw, ngaha ndzer apakà dza bokuba anu aw’, dza uwaga aga la Masasèdòk uwana asà à ahèj la slaka Zèzagèla aw. Ama dza uwatà kà la masasèdòk anja masla mèzam anja Kristu. Haday, katsènwàn kà masla adàsa à wan. Lagonay kà, mèdanèjèj la gudèj la vok adagay zlà.

⁴ Ama kà ankul azlabèza gay lèw gulo, akul azlaanja Zèzagèla, ngaha kadùwàw azlamèna mapèh à atà gay à ahàl fidaga uwaga. Masasèdòk Zèzagèla uwana aga la akul la abà aduwa masasèdòk anja azladza uwaga tetuw tetuw, kà uwana anjatà kà anja gudèj à vok uwanay. ⁵ Azladza uwaga tapèhay kalkal la gudèj à vok uwanay, kà uwaga tapèhay lakèl anja gudèj à vok uwanay, ngaha gudèj à vok akès gay anjatà. ⁶ Ama anu, anu azlaanja Zèzagèla, kèla dza uwana asèl Zèzagèla, atsèb à anu slèm, ama kà anja azlauwana azlaanja anha aw, tatsèb à anu slèm aw. Kiya uwaga à tetèvi kà masèlay Masasèdòk dziriga anja Zèzagèla, ngaha masasèdòk mazila, kà kità ndzer.

Zèzagèla masla mawoyèj

⁷ Azlaməna gay ləv gulo, məwoya vok kà anu à anu. Kà uwana masal kà atsà à ahəj kà la slaka Zəzagəla, ngaha kəla dza uwana awoyaŋ deda aŋha kà, masla kona aŋa Zəzagəla, ngaha asəl Zəzagəla. ⁸ Dza uwana awoyaŋ Zəzagəla aw, masla asəl Zəzagəla aw, tekedika Zəzagəla masla mawoyəj. ⁹ Kiya uwaga à uwana, Zəzagəla apəhanula masal aŋha: Asləl Kona aŋha tekula gə uwatà à waŋ à gudəj à vok, kà masla aŋa mav à anu sifa adəv à gay aw. ¹⁰ Godega aŋa mawoyəj uwanay kà, Zəzagəla awoya anu, asləl à anu Kona aŋha à waŋ, kà aŋa mapis à anu gay à vok, ngaha amatsən tsakana gami ala. Anu la uwana məwoyaŋ Zəzagəla teraŋa aw, ama masla la uwana atsà à vok à mawoy anu dadəj.

¹¹ Azlaməna gay ləv gulo, bokuba uwana Zəzagəla awoya anu kaykay kà, say məwoya vok kà anu à anu babay suwaŋ. ¹² Dza la ahəj adanəj Zəzagəla didi aw, ama baŋa məwoy vok kà anu à anu, Zəzagəla adza à ahəj la anu, ngaha azladza tanəjəj la paraka masal aŋa Zəzagəla, uwana la anu la abà.

¹³ Kiya uwanay la uwana, anu la maham gay à vok la Zəzagəla, masla adza à ahəj la anu la abà, masla avà à anu Masasədok aŋha. ¹⁴ Mənəjəj, ngaha məpəh uwaga la kuda zləkkà: Baba asləl Kona aŋha à waŋ à gudəj à vok, kà masla aŋa maβəl anu. ¹⁵ Kəla dza uwana apəhay la paraka kà Yesu kà: Kona aŋa Zəzagəla kà, masla adza à ahəj la Zəzagəla la abà. ¹⁶ Anu məsəl masal uwana Zəzagəla awoya anu, ngaha mədakəs masal uwaga.

Zəzagəla masla masal. Dza uwana aga la masal uwaga la abà, masla la maham gay à vok gə la Zəzagəla, ngaha Zəzagəla la masla la abà bay. ¹⁷ Aganay tatak uwana apəhanula kà masal aŋa Zəzagəla mahənlaga la anu la abà, guba akəs anu, kà kaslà aŋa seriya aw, kà uwana sifa gami adagay magagazləlaga la aŋa Yesu Kristu. ¹⁸ Dza uwana adakəs masal ndzer, dza uwaga, guba azəj diki diki aw, masal dziriga ahəlal guba la vok ala. Ama dza uwana guba azəj kà mahənlaga la masal aw, kà uwana guba kà tatak tekula la seriya. ¹⁹ Ama anu kà, məwoya Zəzagəla, kà uwana Zəzagəla atsà à vok à mawoy anu teraŋa. ²⁰ Dza uwana agodəj: ‘Gəwoya Zəzagəla’, awoya deda aŋha aw, dza uwaga kà: Masla fida. Kayyà, kakay awoya Zəzagəla à masla uwana anəjəj aw ma, ngaha kà awoya deda aŋha uwana anəjəj la yewdi aw ma? ²¹ Uwanay kà mapəhay uwana Yesu apəh à akul: Dza uwana awoya Zəzagəla, say awoya deda aŋha babay suwaŋ.

5

Madiŋal gəl à vok gami aduwa gudəj à vok

¹ Kəla dza uwana adiŋal gəl à vok, kà Yesu kà dza, uwana Zəzagəla afəl dzakwa à gəl, agodəj kà, masla kà mayyay aŋa Zəzagəla. Ngaha kəla dza uwana awoya Baba, awoya mayyay aŋha babay suwaŋ. ² Kakay məsəlay kà masal gami la ahəj, anu azlabəza aŋa Zəzagəla la dziriga ma? Baŋa məwoya Zəzagəla la gəl aŋha, ngaha à baŋa mədàh uwana masla apəhanula. ³ Ndzer, dza uwana awoya Zəzagəla, masla kà adah tatak uwana masla apəhla ala babay. Uwana Zəzagəla apəh à akul kà, zlazladfa aw. ⁴ Hadəj, kà uwana dza uwana mayyay aŋa Zəzagəla aslala vok kà madu w gudəj à vok. Tetəvi uwana adu wla gudəj à vok kà, uwaga kà madiŋ gəl à Yesu Kristu gami à vok. ⁵ Uwa aslala vok aŋa madu w gudəj à vok uwa? Say dza uwana akəs Yesu Kona aŋa Zəzagəla.

Sayda lakəl aŋa Yesu Kristu

⁶ Yesu Kristu kà masla uwana asà à waŋ. Asà à waŋ la iyaw aŋa batem aŋha, ngaha la aŋiz aŋa mamətsay aŋha bay. Agà madahalla batem gə la iyaw pəra aw, ama la aŋiz aŋa mamətsay aŋha bay. Masasədok tsikasla aza sayda lakəl aŋha kà uwaga dziriga, kà uwana Masasədok aŋa Zəzagəla kà masla fida aw. ⁷ Kità kà, tatak

makər la ahəŋ à uwana taza sayda aŋha. ⁸ Masasəfok tsikasla, la iyaw ŋgaha aŋiz aya. Azlatatak makər uwaga kà tapəhanula lakəl aŋa tatak dziriga tekula: Yesu kà, masla Kristu, Kona aŋa Zəzagəla. Masla uwana apakà dza. ⁹ Məkəs uwana azladza taziŋ, ama uwana Zəzagəla apəh kà, aduwa gay aŋa azladza uwana tapəh. Aganay uwana Zəzagəla apəh lakəl aŋa Kona aŋha Yesu: ¹⁰ ‘Dza uwana adiŋ gəl à Kona aŋa Zəzagəla à vok, abəza sayda uwaga la ləv aŋha la tsəh. Ama dza uwana adiŋ gəl à Zəzagəla à vok aw, apaka Zəzagəla ala kà masla fida. Kà uwana akəs sayda aŋa Zəzagəla uwana masla afà à gəl aŋa Kona aŋha aw.’ ¹¹ Mana gay uwaga agod à anu ma? Zəzagəla avà à anu sifa adəv à gay aw, sifa uwaga kà avà à anu, kà la Kona aŋha la abà. ¹² Dza uwana la Kona, masla la sifa uwaga, ama dza uwana la Kona aŋa Zəzagəla aw kà, masla la sifa mawga aw.

Sifa uwana adəv à gay aw

¹³ Gətsetser à akul, kà akul aŋa masəlay kà, akul kà, akul la sifa uwana adəv à gay aw, ndzer, kà uwana kadiŋaw gəl à sləm aŋa Kona aŋa Zəzagəla à vok. ¹⁴ Aganay makəs vok aŋa uwana məslala vok aŋa maz à vok à slaka Zəzagəla. Guba akəs anu aw, kà uwana məsəl kà, baŋa mənava tatak à masla la tetəvi aŋha, kà masla: ‘Ayyà’, agod à anu. ¹⁵ Kà uwana məsəl kà atsəb sləm à baŋa mənava tatak la matsizl à afik ndzer, uwana mənava kà, adàv à anu, ndzer.

¹⁶ Baŋa dza anəŋa deda aŋha anik adəh tsakana, uwaga adala à mamətsay aw, dza uwaga adəv kuɖa kà aŋa deda aŋha uwaga, ŋgaha Zəzagəla adəbasallaŋ la maval sifa. Tatak uwaga kà ndzer, kà aŋa tsakana uwana adala dza à mamətsay aw pəra. Tsakana uwana adala dza à mamətsay la ahəŋ. Gəna va akul, kà akul aŋa madəv kuɖa lakəl aŋa tsəhay tsakana uwaga aw. ¹⁷ Dəwdəw tatak uwana kadəhawwaŋ la tetəvi uwana Zəzagəla apəh aw, uwaga gesina kà tsakana. Ama azlatsakana la ahəŋ, uwana tadala dza à mamətsay aw.

¹⁸ Məsəl kà mayyay aŋa Zəzagəla kà, adəh tsakana aya aw, kà uwana Kona aŋa Zəzagəla anəŋla, ŋgaha ndzəɖa aŋa seteni la ahəŋ lakəl aŋha aya aw.

¹⁹ Amiyaka gudəŋ à vok gesina la ahəl aŋa seteni kà, ama anu kà, anu azlaməna huɖ gay aŋa Zəzagəla.

²⁰ Məsəl babay kà Kona aŋa Zəzagəla asà à waŋ à gudəŋ à vok. Masla avà à anu matsihila, kà anu aŋa məsəl Zəzagəla la dziriga. Anu mədahama gay à vok la Zəzagəla la abà la dziriga, kà madəgolay Kona aŋha Yesu Kristu. Yesu Kristu kà masla Zəzagəla la gəl aŋha, masla bay sifa, uwana adəv à gay aw.

²¹ Azlabəza gay ləv gulo, ɖahəw haŋkəli kà azlamazlazlay fidaga.

MASƏLA AŇA WAKITÀ UWANA YUHANA ATSETSÈR Deuxième Lettre de Jean

Ayyi

¹ Gi masiga, gətsetser à kak iyà aŇa azlabəza, uwana Zəzagəla akəsàni, ŋgaha à azlabəza aŇha, uwana gəwoya atà kaykay. Gi kokudà gəl gulo pəra à uwana gəwoya akul aw, ama la azlauwana tasəl dziriga gesina babay. ² Məwoya akul kà, kà uwana dziriga la ahəŋ la anu la abà, ŋgaha adagay la anu la tsəràh à awtày.

³ Zəzagəla Baba la Yesu Kristu, Kona aŇha, uwana mədahama gay à vok la dziriga, ŋgaha la masal, tavà à anu vok mahamay la dzəba aŇha səla aw, uwana amatsànuŋla tsakana, ŋgaha la mav à anu lapiya la ləv la tsəh. Kà akul aŇa maβəzal tatak makər uwaga la dziriga la abà, ŋgaha la masal aŇha la abà bay.

Dziriga ŋgaha masal

⁴ Gərab mənğa, kà magagamay la azlabəza aŇak anik, ŋgaha la manəŋ atà uwana tadza à ahəŋ la dziriga la abà, ndzer, atà tadza à ahəŋ bokuba uwana: ‘Dzàw à ahəŋ’, Zəzagəla Baba gami agòɸ. ⁵ Lagonay kà: Gənav à ka, kak iyà aŇa azlabəza uwana Sufəl akəsàni kà, məwoya à vok kà anu à anu, mapəhay uwana gətsetser à kak kà mapəhay mawga aw, ama mapəhay aŇa Zəzagəla, uwana məkəs dagay la madzəka. ⁶ Madfàh uwana Zəzagəla apəh kà uwaga masal. Aganay uwana: ‘Dahàwwàŋ’, Zəzagəla agòɸ dagay madzəka, kà akul aŇa manəf tetəvi aŇha, ŋgaha kà kadzaw à ahəŋ la masal la abà.

⁷ Aŋuvaw azlaməna fida tasà à waŋ à gudəŋ à vok, taslèh gəl à gudəŋ à abà gesina. Takəs kà Yesu Kristu masla adapaka dza ndzer aw. Dza uwana apəhay kiya uwanay kà: masla fida, masla kà, masla məzam aŇa Kristu. ⁸ Dahàw haŋkəli, tsizllàw à ahəŋ lela kà gəl aŋkul, kà akul aŇa maz masik aŋkul ala aw, uwaga kà mayyay aŇa sləray aŋkul uwana kadfahàwwàŋ, kà akul aŇa maβəz masik aŋkul mahənlaga, pawasla.

⁹ Kəla dza uwana adah uwana Kristu apəhakulla aw, ama azalà azlatatak anik anik à gəl aya, dza uwaga kà, maham gay à vok gə la Zəzagəla aw. Ama dza uwana anəfa tatak uwana Kristu apəhla, masla la maham gay à vok la Baba, ŋgaha la Kona babay. ¹⁰ Kəla dza uwana atsà à waŋ à slaka aŋkul, ama atapakulla kiya uwanay aw, ‘Ayyà’, kagodəwwal kà madz à ahəŋ aw. Təfà, kagodəwwal kà mapisla gay à vok la mapis gay à vok aŇa Zəzagəla aw. Baməraka ‘Ayyi’ bay kà, kagodəwwal, la ‘Ayyi’ aŇa maham gay à vok la azladedə aw, ¹¹ kà uwana dza uwana ‘Ayyi’, agoday à tsəhay dza uwaga, apisla gay à vok kà, tahamà gay à vok la slaka gə la sləray mawisiga uwaga la abà, uwana dza uwanay adfahàŋ.

Ayyi makəɸ gəl à ahəŋ

¹² Gay aga la gi lakəl aŋuvaw, nəma kà mapəh à akul. Ama asa à gi gətsetser à akul matsetseray aya aw, gədàda à awtày à slaka aŋkul la gəl gulo, ŋgaha gədəpəh à akul kà ləv gami aŇa mahənlə la marabay.

¹³ Azlabəza aŇa dedə aŇak misga tafaha ka: ‘Ayyi’, atà uwana Zəzagəla atsatsà-màni atà babay.

MAMAKƏR ANA WAKITÀ UWANA YUHANA ATSETSÈR Troisième Lettre de Jean

Ayyi

¹ Gi masiga, gətsetser à kak Gayyus. Kak slawda gulo, uwana gəwoya kak kaykay.

² Slawda gay ləv gulo, asa à gi kà dèwdèw tatak ada à vok lela la slaka anjak. Ngaha kà kak anja magay wurwur, ngaha madiṅal gəl à vok anjak maṅazila koksikoksi. ³ Mok uwana azladede tasà à waṅ à slaka gulo kà, tapèh à gi dziriga anjak gesina, bokuba magodəy, kà kanəfàh dziriga la lela kà madegolay uwaga à uwana, ləv gulo arəb kaykay. ⁴ Mok uwana gətsənəṅ kà azlabəza gulo kà taday la dziriga la abà kà, ləv gulo arəb. Tatak anik la ahəṅ azigən marabay gulo kiya uwaga aw.

Gayyus kà dziriga

⁵ Slawda gulo, gəwoya ka kà kaykay, kadah sləray lela gesina kà anja azladede gami, amiyaka kà anja azlaməlok gə bay. ⁶ La dazuwaya, azladza uwaga tapèh la huma à azlaməna madiṅal gəl à vok à mawoy atà anjak. Lagonay: Kamkam zlakà atà kà mad à huma à gay, kà tsəhay mauguzahay anjatà, uwaga anja magay makəs vok gə à Zəzagəla. ⁷ Azladza uwaga taday zlà, asa à atà mapəhla Sufəl Yesu Kristu ala. Ama asà à atà mazlak atà anja azladza uwana tasəl Zəzagəla aw aw. ⁸ Uwaga kà sləray gami, anu azlaməna gay Zəzagəla, say məkəs mazlak à tsəhay azladza uwaga gesina, kà madəh sləray la slaka gə, kà maz gay dziriga la slaka gə.

Diyotəref atà la Demetəriyus

⁹ Gətsetser bəzi wakità à azlaməna madiṅal gəl à vok, ama Diyoṭəref atsəb sləm à mapəhay gulo aw, asal magay sufəl lakəl anja azlaməna madiṅal gəl à vok uwaga. ¹⁰ Gay gə la uwaga, gədəpəhay la paraka azlatatak mawisiga gesina uwana adahəṅ à azladede gami à vok, à mok uwana gədəgay la tataka ankul la abà. Masla apəh à anu azlagay maksafər à vok, azlafida gesina uwana apəhay lakəl gami. Ama bə uwaga pəra aw. Kaykay aya kà, akəs azladede gami uwana tadà à awtəy aw, ngaha adəf gay à azladza à ahəṅ, kà makas atà aya, la tataka azlaməna gay Zəzagəla la abà, ngaha akəs atà à uda la gəy Zəzagəla la abà.

¹¹ Slawda gulo, gəwoya ka kaykay, kamkam, kanəfa tetəvi uwaga aw, ama dəhəṅ kà uwana delga, akəsa vok pəra. Dza uwana adəh uwana delga kà, masla kà dza anja Zəzagəla. Ama dza uwana adəh azlatatak mawisiga kà, adanəṅ Zəzagəla dikiṅiki aw.

¹² Azladede gesina tapəhay lakəl anja sləray delga anja Demetərius, ngaha uwana tapəhay kà dziriga. Anu babay kà, məpəhay kà lakəl anja azlatatak delga babay. Kak, Gayyus, kasəl uwana məpəhay kà uwaga dziriga gesina pəra.

Ayyi makəd gəl à ahəṅ

¹³ Gay aga la gi lakəl anjəwaw, kà anja mapəh à ka, ama asa à gi anja matsetser à ka matsetseray aw. ¹⁴ Nekwa gədà à awtəy kà mabadəma la slaka gə lakəl anja, kà anu anja mapəh vok à adi la yewdi la yewdi. ¹⁵ Zəzagəla avà à ka lapiya. Azlaslawda anjak uwana la abanay kà: ‘Ayyi’, tagod à ka babay. ‘Ayyi’, gəd à azlaslawda la tekula tekula gesina.

WAKITÀ UWANA YAHUDA ATSETSÈR Lettre de Jude

Ayyi

¹ Gi, Yahuda la uwana gətsetser wakità uwanay, gi mayà aña Yesu Kristu, gi mabəziga bəzi gə aña Yakuba uwana Baba gami tekula la iyà tekula.

‘Ayyi’, gəgod à akul, akul azlaaña Zəzagəla Baba, uwana awoya akul la ləv tekula. Atsatsàmàni akul kà magay azladza aña, anəŋla akul la Yesu Kristu.

² Zəzagəla avà à akul mamatsila, lapiya la masal aña kaykay.

Seriya aña azlaməna matapla fida (2 Piyer 2.1-17)

³ Azlaməna gay ləv gulo, gədawad vok à uda kà matsetser akul gay aña mabəlay uwanay, mədahamay à masla à abà. Lagwa kà, gətsetser à akul kà madzərədàh akul à uda, kà akul aña mapay la madiŋal gəl à vok, kà azlatatak uwana kadiŋawwal gəl à vok uwana la abà, Zəzagəla avà à azladza aña aña koksikoksi. ⁴ Gəpəh uwanay kà, kà uwana azladza uwana tasəl Zəzagəla aw, taguɓ akul à tsəh la maham gay à vok aŋkul la abà. Atà tagor mawis gay ala lakəl aña tatak uwana Zəzagəla avà deyday, la magodfay kà Zəzagəla avà à tetəvi kà madàh mawisiga uwana asà à anu gesina, tagod. La madehəŋ kiya uwaga kà, takweska Yesu, uwana madzahaga, ŋgaha Sufəl gami. Dagay uwarà la wakità Zəzagəla la abà tatsetsèr kà: Zəzagəla adàdukw seriya à azlatsəhay dza uwaga à gəl.

⁵ Iyay, amiyaka kadasəlaw tatak uwana gəpəh à akul kà, ama bə gotənaŋ kà, gəpəh à akul aya. Kiya uwaga, la zamana uwarà Sufəl abəlla azlatsəhay aña, asəlla atà à uda la gudəŋ Misəra. ŋgaha akəf azladza uwana à gay la tataka aŋatà, uwana tadiŋal gəl à vok aw.* ⁶ Azlamalika babay, uwana tazigəna gəl la kokudfa mav à atà aña Zəzagəla, atà tazà vok la slaka uwana Zəzagəla abək atà à abà, kà Zəzagəla ahəl atà, awadàh atà, ŋgaha abək atà à mələs tabadammaga à abà aña koksikoksi, tsərah à kasla uwana Kristu adàsa à waŋ kà madàh seriya à azladza gesina à gəl. ⁷ ŋgaha aya kà, dzùgwàw lakəl aña gudəŋ Sodom atà la Gomor babay, ŋgaha la azlagudəŋ anik la azlakutso uwatà la abà. Azladza aña azlagudəŋ uwatà tadahàhà azlamabila babay, tadahàhà azlatsəhay tatak anik mawisiga, uwana naka dza la sləb vok adəhəŋ aw. Zəzagəla afà à atà à gəl kà akəl uwana adàmatsala didi aw. Uwanay apəhanula, kà kiya uwanay la uwana Zəzagəla adəfehəŋ à azlatsəhay dza uwaga à gəl.*

⁸ Azladza uwana tasà à waŋ à tataka aŋkul à abà, tadəhəŋ kiya uwanay babay. Baməraka masesiŋay uwana asesiŋla atà kà, tadəh mabila, asa à atà kà Zəzagəla akor atà aw, ŋgaha tatsəd gay mawisiga à azlamalika uwana à tsəh, atà la mazləbay.

⁹ Amiyaka Misel, uwana məŋga aña malika anik gesina kà, agòdàh à seteni aw, mok uwana tabayà vok gay la seteni lakəl aña Musa kà, adahà zlapay lakəl aña sləb vok aña aw, ama afà kà à ahəl aña Zəzagəla pəra. Agòdal pəra kà: ‘Say Zəzagəla la uwana adahà à ka seriya à gəl!’, agòdal.* ¹⁰ Ama kà aña azladza uwana tatsək magodahay à azlatatak uwaga à gəl kà, tasəl godega aña aw. Tadəhəŋ kà say tatak uwana asa aresl aŋatà pəra, bokuba azlatatak fəta, azlatatak uwaga la uwana awisatàla.

¹¹ Uwaga kà ŋgərpa uwana anəfa tetəvi aña Kaynu, ŋgaha babay tadəh mawisiga kà mabəz sili bokuba aña Balam uwana adahəŋ uwarà. Taməts à gay kà uwana tadzadzàŋ gəl aŋatà ala lakəl aña Zəzagəla, bokuba uwana Kora adahəŋ.* ¹² Digiya

* **1:5** 1.5 2Musa 12.51; 4Musa 14.29-30 * **1:7** 1.7 1Musa 19.1-24 * **1:9** 1.9 5Musa 34.6; Daniyel 10.13,21; 12.1; Zakari 3.2 * **1:11** 1.11 1Musa 4.3-8; 4Musa 22.1-35

baŋa kadzaw madzay kà mazuw tatak may akul nna kà, ziruwi kà aŋkul, tahabàh madəvaday, tafa à gəl kà à vok aŋatà pəra, ziruwi bay aza à atà, tapakahay kà bokuba habaga uwana asal masa à afik, ama afad' adadasiŋla, tapakahay kà bokuba azlaahàf uwana amiyaka kaslā mayyay aŋatà babay kà tayyay aw, tagahay kà bokuba azlaahàf mabaf' à ahəŋ gà. ¹³ Tagahay kà bokuba azlaiyaw uwana tagaŋtsay la dərəv la afik, atà la titi aw. Falfafal, tagod'ay bokuba iyaw uwana la dərəv la afik, tsakana aŋatà kà apəhla à vok ala, la ufaka la abà, bokuba mahərapapay aŋa iyaw, uwana amətsal à tsəh ala. Tagahay bokuba azlatsetsiliŋ uwana tabaf' vok. Zəzagəla adafahatəŋ slaka mələs gà à ahəŋ tabaf'amma. La abatà la uwana tadadz à ahəŋ aŋa tsərəh à awtəy.✧

¹⁴ Ngaha aga la ahəŋ dagay uwarà Enok, uwana mayyi à tsəh ala mamukwa la lig aŋa Adama la ahəŋ, apəh à ahəŋ uwarà lakəl aŋa azladza uwanay: 'Tsəbàwwal sləm', agòd, 'Sufəl atsa à waŋ, la azlamalika aŋha aŋuvaw, ¹⁵ ama azlatsa à waŋ kà madàh seriya à azladza gudəŋ à vok à gəl, adadukw seriya à azladza uwana à gəl, takəs gay aŋha aw gesina, kà tatak mawisiga uwana tafahàhəŋ à vok gesina, ngaha la azlagay mawisiga uwana tatagòl à vok', Enok agòd. ¹⁶ Azladza uwanay taŋoŋuzay à tsəh ala kiya uwanay koksikoksi. Tarabay didi aw, tafəhəŋ kà say tatak uwana asa à ləv aŋatà, tapəhay kà bəlaslaslaga, ngaha tapapàt azladza, tavavàràh azladza, kà azladza aŋa makəs gay aŋatà.

Yahuda adzərəd'ah azlaməna madiŋal gəl à vok ala

¹⁷ Akul, azlaməna gay ləv gulo, avika akul gay uwana azlaməna matapla aŋa Sufəl gami Yesu Kristu tapəh à akul à vok à abà dagay uwarà aw. ¹⁸ Tagòd'ahà à akul kà la madəv à gay gudəŋ à vok kà, adəgahay la ahəŋ azladza uwana tadəkədfaslah azladza uwana tanəfa Zəzagəla. Atà kà, tasəl masla aw, tafəhəŋ kà azlatatak mawisiga uwana asa à ləv aŋatà pəra. ¹⁹ Ngaha aya kà atà la uwana tatsala mavàhla à waŋ. Atà kà azladza uwana takor gəl aŋatà, atà la Masasədfok Zəzagəla aw. ²⁰ Ama akul kà, akul azlaməna gay ləv gulo kà, wədfaw vok à uda la ndzəfa, zlakàw vok kà akul à akul, akul gesina vaw ləv aŋkul kaykay à gay marabəŋ uwana katsənəwwəŋ. Zəzagəla la gəl aŋha apəhakulla, dāvahàw kuɖa à ndzəfa aŋa Masasədfok Zəzagəla. ²¹ Dzàw à ahəŋ la dziriga la abà, ngaha səlāw kà Zəzagəla awoya akul, faw madzugway aŋkul kà à kaslā uwana afik, Sufəl Yesu adəpəhla ala, vok ahamàl aŋha uwana ala kà anu, ngaha avà à anu sifa uwana adəv à gay aw.

²² Gəw la vok mahamay kà azladza uwana ləv aŋatà matasləla gə aw. ²³ Bəyàw azladza anik à akəl la gay ala. Kà aŋa azladza anik aya kà, gəw la vok mahamay. Hòyàw atà à ahəl kà tsakana aŋatà, amiyaka bə lukut aŋatà uwana tadaw à vok kà madahla tsakana la vok kà, kadəbawni aw.

Məzləba Zəzagəla

²⁴ Məzləba Zəzagəla, uwana masla la maslay kà manəŋla akul kà tetəvi aŋa maz à akul à adi aw. Adazəb akul à kəl ala tsakana, uwana kadəhəwwəŋ gesina, ngaha adətsizl akul à huma aŋha, kadənəŋaw mazləbay aŋha, kadəhənawla la marabay. ²⁵ Məzləbà Zəzagəla la gəl aŋha, asləl à waŋ Sufəl gami Yesu Kristu kà masla aŋa mabəl anu. Mazləbay agay la masla, azladza gesina tatataslla ahəl. Masla la uwana məŋ Sufəl gami, maslay aŋha adza à ahəŋ aŋa tsərəh à awtəy. Kiya uwaga dagay madzəka ngaha tsərəh à lakana, ngaha aŋa tsərəh à awtəy bay. Amen.

WAKITÀ ANJA AZLATATAK UWANA YESU AFƏTÀLA À YUHANA À AMA ALA Apocalypse

Azlatatak uwana Yesu afətala à Yuhana à ama ala

¹ Aganay uwana Yesu Kristu afətàla à azlamayà anja Zəzagəla la kəl ala. “Iyay, fətàlla ama ala Zəzagəla”, agòdal, kà atà anja masəlay uwana adàpaka vok la huma la gay. Kà uwaga Yesu Kristu aslèl à wañ malika anja à slaka mayà anja Yuhana, kà mapəhalla azlatatak uwaga. ² Kiya uwaga Yuhana azàñ la huma azladza gesina uwana anəñan, agòd la magədən à afik, ndzer uwaga kà gay anja Zəzagəla, ñgaha babay kà baməraka Yesu kà agədən à afik, kà uwaga kà dziriga. ³ Mapis gay à vok agay la azladza, uwana tadzeñ wakità uwanay la huma azladza la kuda zləkkà, azlagay uwanay kà atsa à wañ kà la pañaw anja Zəzagəla la awtày, kà anja azladza uwana tatsəb sləm à azlagay uwanay, ñgaha takəs kà, Zəzagəla adàpis à atà gay à vok. Haday kà, kaslà uwana azlatatak uwanay adàpaka vok kà, adàgay nekwa nekwa.

Madàh ‘Ayyi’ anja Yuhana,

uwana adahàn à azlaməna gay Zəzagəla slaslaka mədəf

⁴ Gi Yuhana, la uwana gətsetser à akul wakità, ‘Ayyi’ gəgod à akul, akul maham à ahəñ mənə gay Zəzagəla slaslaka mədəf, uwaga la kutso anja Asəya la abà.

Zəzagəla apisakulla gay à vok, ñgaha adzala akul à ahəñ la lapiya la abà. Masla uwana agà la sifa dagay uwarà, mok uwana gudəñ à vok gesina la ahəñ dadən aw, ñgaha lakana aga la ahəñ la sifa aya, ñgaha adàsa à wañ à gudəñ à vok. Azlamasəsədok mədəf tapis à akul gay à vok, ñgaha tadzala akul à ahəñ la lapiya la abà. Azlamasəsədok mədəf uwaga tadza à ahəñ la huma kursi anja Zəzagəla, tapis à akul gay à vok. ⁵ Yesu Kristu masla sayda dziriga, apis à akul gay à vok la mav à akul lapiya. Masla la uwana teraņa anja mawul à uda la tataka azlamazimnekid la abà, ñgaha masla Sufəl anja azlasufəl anja gudəñ à vok gesina.

Yesu uwaga awoya anu, aməts kà anami, kikay kà aniz anja, ndzəda anja tsakana lakəl gami aya aw, atəfà anu.* ⁶ Masla mapakanula kà tsəhay anja, kà uwana masla Sufəl gà gà. Masla adahàn kiya uwanay, kà anu anja magay azlaməna makad tatak babay, kà mazlak Zəzagəla Baba anja, dza atəm à ahəñ anja mazləbay aw, zləbàw masla gesina. Maslay atsa à wañ kà la slaka anja koksikoksi. Amen.*

⁷ Nəñàwwàn aganay atsa à ahəñ la habaga la abà. Yewdi anja azladza gesina adà-nəñəñ baməraka azlauwana tatsàh la atsəkəf babay. Azladza gesina tadàtsah hulolo, kà uwana guba adàza atà, kà uwana taweskà masla. Ndzer. Amen.*

⁸ Sufəl Zəzagəla agòd:

'Gi la uwana Alfa, ñgaha gi la uwana Omega.* (Uwana asal magəday kà: Gi la uwana gi matera anja tatak gesina, ñgaha gi la uwana makəf gəl à ahəñ anja tatak gesina aya)

Masla la maslay gesina la ahəl. Aga la sifa dagay uwarà, mok uwana gudəñ à vok la ahəñ dadən aw, lakana aga la ahəñ la sifa, ñgaha adàsa à wañ à gudəñ à vok haday.

* 1:5 1.5 Mahabay 89.27; Yesayya 55.4 * 1:6 1.6 2Musa 19.6 * 1:7 1.7 Daniyel 7.13; Mata 24.30 * 1:8 1.8 2Musa 3.14

Kristu apəhla vok à Yuhana

⁹ Gi Yuhana, deda ankul la uwana gətsetser wakità uwanay. Anina gesina gami mədahama gay à vok la Yesu la abà. Kiya uwaga məhama à ngərpa uwaga à abà, ngaha à makoray anha, uwana à abà məbasan gami. Kà anja gulo tekedika tadùw à matəkukurùh uwana à afik, la tataka dərəv la abà, uwana sləm anha Patmos, kà uwana gəpəh gay Zəzagəla la magədfəŋ à afik kà Yesu la uwana dziriga, gəgòd. ¹⁰ La vud ladu anik Masasədok Zəzagəla akəs gi, ngaha gətsənəŋ kuda la lig gulo la ndzəfa, bokuba matsənay anja mazlazliŋ. ¹¹ Uwana agòd: “Uwana kanəŋəŋ la uwana katsetser à wakità à abà, sləl à slaka maham à ahəŋ mənə gay Zəzagəla slaslaka mədfəf uwana la Efesus, la Səmirna, la Pergam, la Tiyatir, la Sardəs, la Filadelfiya, ngaha la Lawodikiya”, agòd à gi. ¹² Mok uwana gətsənəŋ, kiya uwaga gəgolà vok kà manəŋəŋ dza uwana avàts à gi gay uwaga, ngaha gənəŋəŋ fənəs slaslaka mədfəf uwana madəhəhəŋga la luwàluwà. ¹³ La tataka anətà la abà gənəŋəŋ maftsa à vok anja dza babay. Masla la lukut zinziŋga la vok, tsərəh à dgaɗaga, mawaf vok ala gə la gay ləv la gabaga luwàluwà. ¹⁴ Anjiz anha kà, medəkuga sayya, bokuba slewzi. Yewdi anha awutsəfay bokuba aləh akəl. ¹⁵ Asik anha wutswawuts bokuba ada vəzeganiŋa, uwana taf akəl à abà, kuda anha kalkal la mahohumay anja iyaw uwana la mukwà la afik. ¹⁶ Tsetsiliŋ mədfəf la ahəl kaf anha, katsakar mazuwayga gay səla nna, asà à waŋ la gay anha la awtəy. Hud adi anha nərəzl à adi bokuba afats anja tataka afats. ¹⁷ Kay, mok uwana gənəŋəŋ, gətəf à makəla asik anha bokuba gi mamətsay gə. Ama la lig la ahəŋ abək gi ahəl kaf anha à gəl, agòd à gi: “Guba akəs ka aw. Gi uwana gəga la ahəŋ dagay uwarà, ngaha gi uwana gədəgay la ahəŋ aya. ¹⁸ Gi, gi uwana la sifa. Gəmèts ama gəzda à ahəŋ la sifa anja tsərəh à awtəy. Gi la ndzəfa lakəl anja mamətsay, ngaha gi la tsəkurəm anja slaka uwana azlamazimnekid tadza à ahəŋ aya. ¹⁹ Kiya uwaga kà uwana kanəŋəŋ lagonay la uwana adəpaka vok bawbaw gesina kà: Tsetsèr! ²⁰ Ngaha lakəl anja azlatsetsiliŋ mədfəf uwana kanəŋəŋ la ahəl kaf gulo, ngaha la azlafənəs mədfəf uwana madəhəŋ gə la luwàluwà kà, gəpəhakalla godega anja azlatatak uwaga. Godega anja azlatsetsiliŋ mədfəf kà apəhla ala azlamalika mədfəf uwana Zəzagəla abək atà à azlaskala mədfəf anja maham à ahəŋ mənə gay Zəzagəla. Azlafənəs mədfəf uwanay apəhla ala azlamaham à ahəŋ mənə gay Zəzagəla uwatà aya pəra”, masla agòd.

2

Wakità uwana Yesu atsetsèr à azla Efesus

¹ Yesu agòd: “Tsetsèr gay uwanay à malika, uwana anəŋla mənə madiŋal gəl à vok la Efesus. Aganay gay anja dza uwana la tsetsiliŋ mədfəf la ahəl kaf anha, akəsiniŋ, ngaha uwana auguzahay la tataka anja azlafənəs mədfəf uwaga la abà. ² Gəsəl sləray anjak uwana kadahəŋ gesina, kabasəŋ ngərpa uwaga. Kavà tetəvi à azlaməna makəsafər anja matapakala azlatatak aw. Azladza uwana tagoday: ‘Anu azlaməna masləl anu à waŋ gə anja Yesu’, tagòd, tekedika azlaanulo aw, gür atà, kabəza atà à tsəh kà azlaməna fida. ³ Kà gi à uwana kabasəŋ ngərpa, ngaha kasakawal à tsəh ala aw. ⁴ Ama gi la gay lakəl anjak, kà uwana kawoya gi bokuba uwana uwarà aya aw. ⁵ Dzùgw slaka uwana katəf à ahəŋ, pəh gay la ləv ala, dzà à ahəŋ aya bokuba madz à ahəŋ anjak uwana uwarà, tsa banja kiya uwaga aw, kà gədàda à awtəy, ngaha gədawula fənəs anjak à tsəh. ⁶ Ama la ahəl anik kadahə delga, kà uwana kakweska uwana azla Nikolayya tadəhəŋ bokuba uwana gəkweska suwaŋ. ⁷ Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ mənə gay Zəzagəla. Azlauwana taguwà à uda la abà la makəfaslay kiya uwanay, gədàvə à

atà tetəvi kà mazuw mayyay aña ahàf uwana la gày alàl aña Zəzagəla la abà uwana avà sifa à azladza”, Yesu agòd.✠

Wakità uwana Yesu atsetser à azla Səmirna

⁸ Yesu agòd aya: “Bà gotənanj tsetsər gay uwanay à malika uwana anəŋla azlaməna madiŋal gəl à vok la Səmirna. Aganay gay aña dza uwana agà la ahəŋ dagay uwarà, ŋgaha masla adàgay la ahəŋ aya. Aməts, ŋgaha awulà à uda la mamətsay.✠ ⁹ Gəsəl matərəbay uwana katərəbay, gəsəl kà kak masla kudfa aña gudəŋ à vok. Ama la slaka gulo kà kak gorobu. Gəsəl mawisiga uwana azladza tapəh à kak à vok babay. Məna mapəh à ka uwaga à vok kà: ‘Anu azla Yahudiya’, tagod. Ama tsa, azla Yahudiya kà aña gay gə pəra, maham à ahəŋ aŋatà kà aña seteni. ¹⁰ Guba akəs ka, kà ŋgərpa uwana kadəsay la huma aw. Səl kà, seteni adàdaw azlaanik aŋkul à daŋay la tataka aŋkul la abà kà magur akul, ŋgərpa uwaga kà kadəsaw aña mahəŋay kulo. Baməraka tafa akul makits à kuda babay, kabasawwanj pəra. Kiya uwaga gədàvə à akul sifa adəv à gay aw, bokuba masik aŋkul. ¹¹ Kəla dza uwana la sləm lakəl, atsəb sləm à uwana Masasədok Zəzagəla apəhay à maham à ahəŋ məna gay Zəzagləa, azlauwana taguwà à uda la abà, la makədaslay, kiya uwanay mamətsay masəla adətəd atà à gəl aya aw”, Kristu agòd.

Wakità uwana Yesu atsetsər à azla Pergam

¹² Yesu agòd aya: “Bà gotənanj tsetsər gay uwanay à malika uwana anəŋla azlaməna madiŋal gəl à vok la Pergam. Aganay gay aña dza uwana akor katsakar mazuwayga, gay səla nna. ¹³ Gəsəl gudəŋ uwana kadza à ahəŋ la abà, uwaga makoray aña seteni. Ama la kaslā uwana azladza takəd magamza gulo dziriga gə Antipas kà, kabədfəla gay aw, kawaslahà gi à ahəŋ la madiŋal gəl à vok la abà, takəd masla à gudəŋ aŋkul à abà, kay kà, kak kadəh sayda gulo la dazuwaya, kà gi Sufəl aŋak. ¹⁴ Gəfahà à ka akur à lig babay. Ama azlatatak anik la ahəŋ la tataka aŋak la abà uwana asà à atà manəf matapla aña Balam, uwana atapla à Balak uwana apapàtla azla Isərayel, kà mapad azlasləb matulay, ŋgaha kà atà aña madəh mabila aya babay. ¹⁵ Kiya uwaga babay azlaanik la tataka aŋak la abà, tadfehəhəŋ bokuba azlauwana tanəfa matapla aña azla Nikolayya. ¹⁶ Tsa baŋa kità kà, pəh gay la ləv ala. Awkà, gədà à awtày à slaka aŋak, gəp guvəl la azladza uwaga la katsakar uwana atsa à wanj la gay gulo la awtày. ¹⁷ Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ məna gay Zəzagəla. La azlauwana taguwà à uda la abà la makədaslay, kiya uwaga gədətsəkla kaf, uwana asà à ahəŋ la zagəla uwana azladza tasəl aw. Gədàvəha à atà babay akur medfekuga uwana matsetseral sləm mawga à vok gə. Dza la ahəŋ asəl sləm uwatà aw, say dza uwana abəzal uwaga pəra”, Yesu agòd.✠

Wakità uwana Yesu atsetsər à azla Tiyatir

¹⁸ Yesu agòd aya: “Bà gotənanj tsetsər gay uwanay à malika uwana anəŋla azlaməna madiŋal gəl à vok la Tiyatir. Aganay gay aña Kona aña Zəzagəla. Yewdi aŋha kà awutsəday bokuba aləh akəl, azlaasik aŋha tawutsəday wutswawuts bokuba ada vərəzaniga. ¹⁹ Gəsəl uwana kadfehəŋ. Gəsəl kà kawoya azladedə aŋak, ŋgaha la mad à huma à gay, uwana kadiŋ gi gəl à vok, ŋgaha la mabasiŋ aŋak la sləray la abà, ŋgaha la masal aŋak aya. Gəsəl kà uwana kadfehəŋ la uwaga kà, dafuwa la uwana kadəhəŋ uwarà. ²⁰ Ama gi la gay lakəl aŋak: Mis uwaga la tataka aŋkul, sləm aŋha Yezabel kà, avavara ka aw. Masla agodəh kà: ‘Gi masla mapəhal gay ahəl aña Zəzagəla’, agod, ŋgaha kavəl tetəvi kà madz à ahəŋ la slaka aŋak aw. Masla la uwaga atapla fida à azlamayà gulo, kà atà aña masokw à mabila à abà, la mapadəh

sləb matulay. ²¹ Gədəkədfəval kaslā à ahəŋ, kà masla aŋa mapəh gay la ləv ala; ama adà à huma à gay kà la madfàh mabila aŋha pəra. ²² Kiya uwaga kà, gədəmələl gəl à kəslah à afik la dufats, adàsa ŋgərpa. Azlaməna matsatsələh vok atà nna tadàsa ŋgərpa babay, say baŋa atà tapəh gay la ləv ala, ŋgaha la masakal à tsəh ala sləray aŋa mis uwaga gesina bay aya. ²³ Ŋgaha aya bay kà, kəla dza uwana abəzal masak aŋa sləray aŋha, uwana adahəŋ. Gədəkad azlabəza aŋha, kà maham à ahəŋ məna gay Zəzagəla aŋa masəlay, kà gi la uwana gənərəz madzugway aresl aŋa azladza, ŋgaha la uwana tatuwal à tsəh gesina. ²⁴ Lakəl aŋa azlauwana la gudəŋ Tiyatir uwana tanəfà matapla aŋa mis uwanay aw, tasəl uwana azladza tazalalla godega nasiri aŋa seteni aw. Gay la ahəŋ lakəl aŋatà aw. ²⁵ Ama gədfawan à afik kà, say uwana gətəpakulla pəra, tsərəh à kaslā uwana gədəwul à wan. ²⁶ Azlauwana taguwà à uda la abà la makəfaslay, ŋgaha uwana takəs gay gulo tsərəh à makəf gəl à ahəŋ, kiya uwaga gədəpakatàla kà azlasufəl lakəl aŋa azlatsəhay gesina uwana tasəl gi aw. ²⁷ Maslay uwana gədəvə à atà kà, uwana Baba gulo avà à gi babay. Tadəgahay azlasufəl dzaŋdzaŋga, azlaməna madfàh mawisiga kà tadədzamahatàla bokuba dza uwana adəf masak à gəl dohdoh.☆ ²⁸ A azladza uwaga gədəvə à atà aya ŋuzla bebəŋ. ²⁹ Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ məna gay Zəzagəla”, Sufəl gami agòd.

3

Wakità uwana Yesu atsetsèr à azla Sardəs

¹ Yesu agòd aya: “Aya gotənaŋ tsetsèr gay uwanay à malika uwana anəŋla məna madina gəl à vok la Sardəs. Aganay gay aŋa dza uwana la Masasədok Zəzagəla mədfə, ŋgaha la tsetsilin mədfə la ahəl bay. Gəsəl madəhəŋ aŋak, ŋgaha azladza tadzugway kà: ‘Kak la sifa’, tagòd, tsa kak mamətsayga. ² Tsənàla, wədf vok à uda, tsa baŋa kiya uwaga aw, kadəmətsay tsokwfasl, kà uwana gənəŋəŋ sləray aŋak kà adəhenla la yewdi aŋa Zəzagəla dadəŋ aw. ³ Iyay awula à kak à gəl, uwana katəpla uwarà, la uwana kadà à abà, kapəh gay la ləv ala, ŋgaha kakəs gay gulo. Baŋa katsənla aw kà, gədəda à awtəy la gurəh, la kokudə masəlay aŋak bokuba masla à gəl. ⁴ Ama tekedika azlaanik la ahəŋ la slaka aŋkul la Sardəs, uwana tadfàh àläh à lukut aŋatà à vok aw, bokuba magòdfay azlasətaka la ləv aŋatà la tsəh. Atà azladza uwaga kà, tadəduw à vok lukut medəkuga, anina mədəday la slaka gə, kà uwana azlayla atà. ⁵ Azlauwana taguwà à uda la abà la makəfaslay kiya uwanay, gədətsokwah atà à lukut medəkuga à abà, gədəwis sləm aŋatà ala la wakità aŋa sifa la abà tetuw aw, la mok uwana gədəgay la huma aŋa Baba gulo la azlamalika aŋha. La dazuwaya gədəpəhay kà, azladza uwanay kà gədəgòdfay ndzer kà: Azlaanulo.☆ ⁶ Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ məna gay Zəzagəla”, Yesu agòd.

Wakità uwana Yesu atsetsèr à azla Filadelfiya

⁷ Yesu agòd aya: “Aya bə gotənaŋ tsetsèr gay uwanay à malika uwana anəŋla məna madina gəl à vok la Filadelfiya. Aganay gay aŋa dza uwana asa à wan la slaka Zəzagəla, ŋgaha masla dziriga. Tsəkurəm aŋa madla à makoray aŋa sufəl David la ahəl aŋha. Baŋa gi gədəpəzl gamagəy, dza aslala vok aŋa matsakalla à ama aya aw, ŋgaha aya, baŋa gi gədətsak à gamagəy à ama dza aslala vok aŋa mapəzllay aya aw.☆ ⁸ Gəsəl madəhəŋ aŋak. Gəsəl kà kak la ahəŋ la ndzəfa aw. Tekedika kakəs gi gay la ahəl ala la dazuwaya, kà kak aŋulo. Nəŋəŋ gədəpəzl gamagəy kà kak, dza la ahəŋ aslala vok kà matsakal à ama aw. ⁹ Tsəbal sləm aganay uwana gədədfəhəŋ la maham à ahəŋ dza aŋa seteni: ‘Anu azla Yahudiya’, tagòd, tsa azla Yahudiya kà aŋa gay gə

☆ 2:27 2.27 Mahabay 2.8-9 ☆ 3:5 3.5 2Musa 32.32-35; Mahabay 69.28 ☆ 3:7 3.7 Yesayya 22.22

përa. Gëdàbay atà à wan, kà atà makëded à ka à ahëj. Kiya uwaga tadàsëlay kà gëwoya ka.✠ ¹⁰ Kak kafà slëm à gay gulo! Kabasan, kà uwaga gi babay gëdàfa à ka slëm, kà kak aña madàdiya à matërëbay uwana à abà, adàsiya azladza gudëj à vok à gël gesina aw. ¹¹ La katskats gëdàwula à wan. Tsizllàw à afik la makësëj uwana kabëzal, kà dza aña mazëb masik aña maduwiñ anjak aw. ¹² Azlauwana taguwà à uda la abà la makëdaslay kiya uwanay kà, gëdàbëk atà à ahëj, bokuba azlamanjulëv la gày aña Zëzagëla gulo la aku. Tatak la ahëj adàkudëk atà la uda aya aw. Gi, gëdätsetser à atà slëm aña Zëzagëla gulo à vok, la slëm aña gudëj aña Zëzagëla gulo, gudëj uwaga kà Urusalima mawga, uwana Zëzagëla adàslël à ahëj la zagëla. Gi la gël gulo gëdätsetser slëm gulo mawga à azladza uwaga à vok babay. ¹³ Këla dza uwana slëm la kël, atsëb slëm à uwana Masasëdök Zëzagëla apëhay à maham à ahëj mëna gay Zëzagëla”, agòd.

Wakità uwana Yesu atsetsër à azla Lawodikiya

¹⁴ Yesu agòd aya: “Bà gotënan aya, tsetsër gay uwanay à malika uwana anëjla mëna madinjal gël à vok la Lawodikiya. Aganay gay aña dza uwana slëm aña: Amen. Masla sayda dziriga, fida atsa à wan la gay aña aw. La ahàl aña la uwana Zëzagëla adàhà tatak gesina.✠ ¹⁵ Gësël slëray anjak: Uwala kak iyaw akàl akàl magay aw, uwala kak iyaw matesl gà aw. Nulëm kaga tekula anjata. ¹⁶ Ama bokuba uwana kak la tataka gà la abà kiya uwanay kà, gi gëdàkësl ka à vëdàh, puway. ¹⁷ ‘Gi gorobu, gëkor tatak, gëdahama gay à gorobu gulo à vok, gënëkudà aña tatak aya aw!’, kagòd. Tsa tekedika, kak masla kudfa uwana vok ahamay, kak la diga, kokudfa lukut, kak gulëf bay. ¹⁸ Dëv gi kudfa, kà gi aña matab à ka gay à ahëj, sùkw luwàluwà mawutsëdayga la slaka gulo, kà kak aña magay gorobu. Sùkw babay lukut medekuga, kà kak aña matsokw à abà, ngaha kà kak aña mahadla ziruwi anjak à ahëj. Bà gotënan sùkw aya yohof yewdi la slaka gulo, kadëb à adi, kà kak aña manëjla lela. ¹⁹ Hadfay ndzer kà, baña gëwoya dza kà, bà masla la uwana gëslahala vok, ngaha gëtsetsehëjla. Tsa baña kiya uwanay kà, pëh gay la lëv ala, kapaka bokuba iyaw matesl gà aw.✠ ²⁰ Tsëbal slëm, gi la uwaga gëdatsizl à gay gamagày gëzalahay. Dza uwana atsëna mazalahay gulo, apëzl gi gamagày, gëdàda à gày à slaka aña, ngaha mëdàzuw tatak may anu sëla. ²¹ Azlauwana tadàguwa à uda la abà la makëdaslay, kiya uwanay gëdàv à atà tetëvi kà mas à wan aña madàdzah madzay la kursi gulo la afik, bokuba uwana gëguwa à uda la abà la makëdaslay, ngaha gëdamadzay la Baba gulo la kursi aña la afik. ²² Këla dza uwana slëm lakël, atsëb slëm à uwana Masasëdök Zëzagëla apëhay à maham à ahëj mëna gay Zëzagëla”, Sufël Yesu agòd.

4

Kursi aña Sufël Zëzagëla

¹ Mok uwana gay uwanay akëd gël à ahëj, la lig la ahëj, gënënan aya gamagày mapëzl vok gà la zagëla. Gëtsëna kuda aña dza uwana avàts à gi gay uwarà aya, kuda uwaga la uwana atsën bokuba matsënanay aña mazlazliñ. Dza uwatà agòd à gi: “Sà à afik à abanay, kà gi aña mapëhakala uwana adàsa à wan la huma la gay.” ² Katskats Masasëdök Zëzagëla akës gi, ngaha gënëjà kursi Sufël la zagëla la afik, dza ndzëdaffa la afik. ³ Mahëday aya aña dza uwatà la afik aw. Hudf adi aña kà awutsëday, bokuba akur kuyah kuyahga, uwana tazalalla yaspe atà la saruwan, kursi uwatà makësäl gay à adi gà la agëla makozakoz dikëts, azlaagëla makozakoz uwatà tawutsëday bokuba azlaakur uwaga babay.✠ ⁴ Kursi anik dzik sëla gël aña ufad uwatà la afik azlamadzahaga tadzàh madzay la afik dikëts tatsëkwàh kà azlalukut

✠ 3:9 3.9 Yesayya 49.23; 60.14 ✠ 3:14 3.14 Hanjëli 8.22 ✠ 3:19 3.19 Hanjëli 3.12 ✠ 4:3 4.3 Hezëkiyel 1.26-28; 10.1

medekuga à abà, garamusa aga atà lakəl, azlagaramusa uwatà kà madfehəŋ ga la luwàluwà. ⁵ La kursi sufəl uwatà la afik la tataka la abà kà, mawutsəday la masläh məlo aŋa habaga asà à uda la abà aya. Aga la ahəŋ la abatà babay azlaakəl mavats à ahəŋ gà mədəf tauday la huma kursi. Azlaakəl mavats à ahəŋ gà mədəf uwaga kà, apəhla ala kà azla Masasədok mədəf uwana tadza à ahəŋ la huma Zəzagəla. ⁶ Tatak anik la ahəŋ la huma kursi aya, masla aga bokuba takenedeka uwana dzəraŋ dzadzəraŋ.

Aga la ahəŋ azlatatak ufaɖ uwana taduw kursi à tataka à abà. Atà la sifa, huma la lig aŋatà kà bà yewdi, yewdi gesina. ⁷ Maftsa vok aŋa matera kà bokuba sikalaveri, masəla kà bokuba kokur kaslaga, mamakər kà, huɖ adi aŋha kà bokuba dza, ŋgaha maufaɖ, kà zulo uwana ahoyay kagoday. ⁸ Atà ufaɖ nna kà, atà la gogozläh mukwa mukwa. Vok gesina kà, bà yewdi, yewdi tsatsabasla huɖga la uda gà, takəs gay kà mahabay aw. Vəd la afats bà mahamay tahabay. Tagòɖ:

'Kak Sufəl Zəzagəla, kak la maslay gesina tsikasla, kak tekula.

Kak la ahəŋ la sifa à mok uwana gudəŋ à vok la ahəŋ dadəŋ aw. Lakana kak la ahəŋ la sifa aya, ŋgaha kadàsa à waŋ à gudəŋ à vok.'

⁹ Kiya uwaga azlatatak ufaɖ uwaga la sifa tahaba à dza madza madzayga uwaga la kursi Sufəl la afik, masla uwana adzà à ahəŋ aŋa tsərah à awtəy, mazləbay, la maslay, la kikay agay la masla. ¹⁰ Bà kəla uwana tadfehəŋ kiya uwaga kà, azlamadzahaga dzik səla gəl aŋha ufaɖ uwaga kà, takədəɖ à ahəŋ la huma Zəzagəla, uwana madza madzayga la kursi Sufəl la afik, ŋgaha masla uwana la sifa aŋa koksikoksi, atà tazləba masla, tahaläh garamusa lakəl ala, tabakàh à vədah la huma aŋha. ¹¹ Tagòɖ: 'Haday, kak Sufəl Zəzagəla gami. Kak uwana kadahà tatak gesina, kà uwana asà à ka, à uwana kadahà à atà, ŋgaha atà la ahəŋ lagwa. Ka uwaga à uwana, kaslà kà, kəla uwabeyuwi aŋa mazləb ka, la masləkaw ka, ŋgaha la makəs mapəhay aŋak babay.'

5

Gay aŋa wakità la magadzaw

¹ Ŋgaha gənəŋə wakità makəlbaga la ahəl aŋa dza uwatà la kursi Sufəl la afik. Masla adakəsay la ahəl kaf. Wakità uwatà matsetseray gə gay səla nna. Madahalla masəlay à vok gə slaslaka mədəf, kà dza aŋa mapəzlay aw. ² La lig la ahəŋ gənəŋə məŋ malika uwana anavà la kuda zləkkà: "Uwa à uwana azlayla kà mafətal masəlay uwanay la vok ala uwa? Ŋgaha mapəzlay wakità uwanay uwa?", agòɖ. ³ Dza la ahəŋ azlayla aw, adəgay dza uwana la vədah adəgay la zagəla, adəgay la tsəh iyaw, adəguwaŋ mali bay kà, taslala vok aŋa mapəzl wakità uwanay, ŋgaha aŋa manərəz huɖ aŋha aw. ⁴ Kà uwana dza la ahəŋ azlayla aŋa mapəzlay, à kà manərəz huɖ gə gə aw, gətùw mənəga, kà uwatà. ⁵ Kiya uwaga tekula la tataka azlamadzahaga uwaga la abà agòɖ à gi: "Katuw aw, aganay dza uwana bokuba sikalaveri, uwana asa à uda la tsəhay aŋa Yəhuda la abà, masla mayyi à tsəh ala aŋa sufəl David, masla akədàslla tatak gesina la maɖuwəŋ. Masla adəfətalla vok ala masəlay uwaga, ŋgaha adəpəlz wakità uwaga", agòɖ à gi.

⁶ La mapəh uwaga la gay ala kà, gənəŋə dza la slaka matsizlla ala dzawwa la tataka azlakursi la abà. Azlamadzahaga la azlatatak ufaɖ uwaga la sifa, takəsalla gay à adi. Maftsa à vok aŋha kà bokuba magadzaw, la yewdi gulo kà bokuba takəday uwarà. Dzadzukwa dərəw mədəf lakəl, ŋgaha yewdi mədəf la vok babay. Azlayewdi uwaga kà azla Masasədok mədəf uwana tadza à ahəŋ la huma Zəzagəla, uwana Zəzagəla aslala atà gesina à gudəŋ à vok. ⁷ Kiya uwaga magadzaw uwaga azà à vok à awtəy, azəb wakità la ahəl kaf aŋa masla madza madzayga uwaga, la kursi Sufəl la afik. ⁸ Mok uwana adazəbay kà, azlatatak ufaɖ uwaga la sifa, ŋgaha la azlamadzahaga dzik səla gəl aŋha ufaɖ uwaga takədəɖ à ahəŋ gesina aŋatà, ŋizij agà atà la ahəl

gesina, kəla uwabeyuwi aṇatà azlatasà dewni la ahəl aṇatà, mahənlaga la kidzidzi. Uwaga apəhla ala kà madəv kufa aṇa azlaməna gay Zəzagəla. ✧ ⁹ Atà tahàb mahabay mawga. Tagòd:

'Kak azlayla kà aṇa mazəb wakità uwanay aṇa mapəzlay,
kà uwana takədf ka, ṅgaha kapəzl gəl à azladza à ahəṅ.

La aṇiz gəl aṇak kà awùlla atà à slaka Zəzagəla.

Azladza uwaga tasà à uda la azlatsəhay la azlagay anik anik gesina.

ṅgaha tasà à waṇ la makədf gəl à ahəṅ gudəṅ à vok gesina.

¹⁰ Kak kapàkatàla, kà azlatsəhay aṇak, kà uwana kak, Sufəl gà gà.

Kafahəṅ kiya uwanay, kà mapakatàla kà azlaməna makədf tatak à Zəzagəla gami.

Atà tadəgay azlasufəl, lakəl aṇa azladza gudəṅ à vok. ✧

¹¹ La lig la ahəṅ gənəṅà azlamalika aṇuvaw, uwana dza aslala vok aṇa matugway aw. Tanudà kursi à abà la azlatatak ufaḍ uwaga, ṅgaha la azlamadzahaga uwaga gesina dikəts. Kiya uwaga gətsənà mahabay aṇatà. ¹² Tahàb la kuda zləkkà à magadzaw uwana takədf kà aṇa matulay:

'Ndzer, masla azlayla kà mazəbay la slaka azladza maslay,

La gorobu, la matsihila, la ndzəfa,

La mazləbay, la masləkəway, ṅgaha la kikay gesina la ahəl aṇha.

Kay nənəwwəṅ mənṅa aṇha tsi!'

tagòd. ¹³ La lig la ahəṅ aya gotənaṅ dèwdèw tatak uwana Zəzagəla adfahəṅ kà, tahàb mahabay azlauwana la zagəla, azlauwana la gudəṅ la vok, azlauwana la tsəh iyaw, ṅgaha la azlauwana la iyaw la abà, gesina aṇatà tahàb mahabay tekula:

'Məzləba dza uwana la kursi la afik, ṅgaha la uwana maftsa à vok aṇa magadzaw uwana tadəhla matulay məsləkaw atà.

Masley gesina atsa à waṇ kà la atà la ahəl. Mətatast atà à ahəl aṇa koksikoksi.'

¹⁴ Mok uwana tahabay kiya uwanay azlatatak ufaḍ uwaga tagòd: "Amen", ṅgaha azlamadzahaga uwaga takədèd à azlauwana à ahəṅ la kursi la afik, ṅgaha tasləkəw atà aya.

6

Magadzaw ahəl wakità aṇa mapəzlay

¹ Mok uwana magadzaw azəb wakità masəlay mədfəf uwaga à ahəl, kiya uwaga gənəṅà adzəkà mapəzl masəlay matera. Mok uwana adafətalla à ama ala, matera aṇa azlatatak ufaḍ uwaga la sifa agòd: "Sà à waṇ", matsənaṅ aṇa kuda aṇha bokuba habaga. ² Kiya uwaga gənəṅà pəlis medekuga asà à uda. La pəlis uwatà la afik kà, dza la afik alək la ahəl, tavəl garamusa. Ahəd la makədfaslay kà mats à atà à ahəṅ. ✧

³ Magadzaw afətà à masəlay masəla la ama ala. Gətsənà masəla aṇa azlatatak ufaḍ uwaga la sifa agòd aya: "Sà à waṇ." ⁴ ṅgaha pəlis anik asà à uda aya mativga vikuza. Dza uwana la afik aya kà, masla masəlla guvəl à gudəṅ à vok, kà azladza aṇa makədf vok kà à atà kà atà. Tavəl magol katsakar à ahəl.

⁵ ṅgaha aya magadzaw afətà masəlay mamakər la ama ala, ṅgaha gətsənà mamakər aṇa azlatatak ufaḍ uwaga la sifa agòd: "Sà à waṇ." Gənərèz, ṅgaha gənəṅà pəlis marsiga, dza uwana la afik kà daram la ahəl. ⁶ Gətsənəṅ tatak anik atsən la tataka azlatatak ufaḍ uwaga la abà la sifa, bokuba kuda aṇa dza. Masla agòd: "Sili aṇa sləray mavakay tekula aṇa dza kà asukway pəra kà hi tsergi nagoda tekula pəra, ama mərəkala kà, nagoda makər." Agòd à dza aṇa pəlis aya: "Kà aṇa aməl la iyaw aṇa matavərək maməsliga kà, tadza à ahəṅ kiya uwanay", agòfal.

✧ 5:8 5.8 Mahabay 141.2 ✧ 5:10 5.10 2Musa 19.6; Mahabay 33.3; 98.1; Yesayya 42.10 ✧ 6:2 6.2 Zakari 1.8; 6.3,6

⁷ Ngaha magadzaw afetà masəlay maufad la ama ala, ngaha gətsənəŋ maufad aŋa azlatatak uwaga la abà la sifa, agòd: “Sà à waŋ.” ⁸ Gənərèz à awtày, ngaha gənəŋəŋə pəlis uwana kuforuh ruhga. Dza uwana la afik kà, sləm aŋha kà: Mamətsay, ngaha mezewi anəfay la tsəh. Tavà à atà ndzəda kà aŋa makad à gay tekula aŋa maufad, aŋa gudəŋ à vok à gay. Tadəkadh atà la katsakar, la may, azladza anik tadəmətsah à dufvats à abà ngaha azlatatak fəta tadəkadh azladza anik aya.

⁹ Kiya uwaga magadzaw afetà à masəlay mazlo la ama ala. Ngaha gənəŋə azlamasəfok aŋa azlamamatsay la slaka uwana takadh tatak à Zəzagəla. Takadh azladza uwaga, kà uwana tazə gay Zəzagəla, ngaha kà uwana tagəd à gay aŋa Yesu à afik.

¹⁰ Mok uwana gənəŋə atà tawiyà la kuda zləkkà, tagòd: “Sufəl, kak tsikasla, kak dziriga. Azladza uwaga la vədah, la gudəŋ la vok takadh anu, ma mana kadəhəŋ aŋa madəh à atà seriya à gəl ma, ngaha kà seriya aŋa matəd atà à gel suwaŋ ma?”

¹¹ Ngaha tatsòkwəh atà à lukut medəkuga à abà, tagòd à atà: “Basəwwəŋ ŋuv aya, say takadh azladedə aŋkul, uwana tanəfa Zəzagəla, bokuba uwana takadh akul dadəŋ. Baŋa takadh atà bokuba uwana Zəzagəla agòd kà pəra, seriya adəgay la ahəŋ.”

¹² Ngaha aya magadzaw afetà masəlay maməkwa uwatà la ama ala. Gənəŋə kutso abəlakà à vok, afats apakà marsiga. Ama təla kà apakà mativga vikuza bokuba aŋiz.

¹³ Azlatsetsilinj tasòkw à ahəŋ la zagəla bokuba mayyay ahəf ŋuwazlaga, uwana magol kular asakwəŋ à ahəŋ. ¹⁴ Zagəla azalà tuwiz, bokuba uwana takəl tatak à abà. Azlagudəŋ uwana iyaw akəs atà à gay à adi tazəhla. Azlagudəŋ gesina tabədhəhə vok la slaka aŋatà la abà. ¹⁵ Kiya uwaga azladza gudəŋ à vok gesina tahədhəhə vok à gudəŋ à afik, ngaha tahədhəhə vok à azlatsakur uwana à agu la tataka azladzəgəla la abà. Azlamayà la azlauwana azlamayà aw gesina tahəy kà mahadhəhə vok à ahəŋ. Amiyaka azlasufəl, la azlamadzahaga, la azlaməŋga aŋa azlaslodzi, la azlagorobu, la azlauwana sləm aŋatà atsən ala, gesina aŋatà tahəd kà mahadhəhə vok à ahəŋ. ¹⁶ Atà tadəvə kudə à azlagudəŋ la azladzəgəla: “Fətəkəw anu à gəl, kamkam, tsakəw anu à ama, kà dza uwana la kursi la afik aŋa manəŋ anu aw, ngaha kà magadzaw aŋa madukw à anu seriya à gəl aw! ¹⁷ Iyay, mavakay aŋa mənəŋ mapak ləv aŋha kà adaslay. Uwa à uwana aslay aŋa matəfal à gay ala uwa? Dza la ahəŋ aslay aw”, tagòd.

7

Malika adəh masəlay à azladza aŋa Zəzagəla à vok

¹ Kiya uwaga la lig aŋa uwaga la ahəŋ aya, gənəŋə azlamalika ufad tatsizlla ala la gay tər gudəŋ ufad kà makəs azlakular ufad aŋatà à ahəŋ, uwana tadəfay, kà atà aŋa madəfay à gudəŋ à abà aw kà mawis kutso amiyaka iyaw ngaha la azlaahəf ala aw. ² Gənəŋə malika anik uwana asà à waŋ la mas à afik afats, tatak madəh masəlay à azladza à madəgay aŋa Zəzagəla, uwana la sifa, la ahəl. Azalà azlamalika ufad uwaga à tsəh azlauwana Zəzagəla, avà à atà ndzəda kà mawis gudəŋ à vok ala, ngaha la iyaw ala. ³ Agòd à atà: “Kawisaw kutso, iyaw, ngaha la azlaahəf ala dadəŋ aw. Kùdəw tsərəh à uwana anu mənəh masəlay aŋa Zəzagəla à madəgay aŋa azladza aŋha dadəŋ.”* ⁴ Kiya uwaga la lig la ahəŋ atà tapəh à gi matugway aŋa azladza uwana tanahà à atà masəlay uwaga à madəgay. Tagə dəbow dzim bəzi aŋha dzik ufad, gəl aŋha ufad. Azladza uwanay kà mayyi à tsəh ala aŋa azlatsəhay Isərayel gesina. ⁵ Aga la ahəŋ dəbow kulo gəl aŋha səla mayyi à tsəh ala aŋa Yahuda, dəbow kulo gəl aŋha səla la mayyi à tsəh ala aŋa Ruben, dəbow kulo gəl aŋha səla la mayyi à tsəh ala aŋa Gad. ⁶ Dəbow kulo gəl aŋha səla la mayyi à tsəh ala aŋa Asər, dəbow kulo gel aŋha səla la mayyi à tsəh ala aŋa Neftali, dəbow kulo gəl aŋha səla la mayyi à tsəh ala aŋa Manase. ⁷ Dəbow kulo gəl aŋha səla la mayyi à tsəh ala aŋa

* 7:3 7.3 Hezəkiyel 9.4,6

Səmeyyon, dəbow kulo gəl anha səla la mayyi à tsəh ala anja Levi, dəbow kulo gəl anha səla la mayyi à tsəh ala anja Isakar. ⁸ Dəbow kulo gəl anha səla la mayyi à tsəh ala anja Zabulon, dəbow kulo gəl anha səla la mayyi à tsəh ala anja Yusufu, ngaha dəbow kulo gəl anha səla la mayyi à tsəh ala anja Benyamin bay. Azladza uwaga gesina taga la masəlay anja Zəzagəla la vok anətà.

Maham à ahəŋ dza dagay gudəŋ à vok gesina

⁹ La lig anja uwaga la ahəŋ, gənəŋà maham à ahəŋ dza anjuvaw, dza aslala vok anja matugway aw. Azladza uwaga tasà à uda la azlatsəhay, la azlagay, ngaha tasà à waŋ la makəf gəl à ahəŋ gudəŋ à vok gesina. Tatsizilla à ahəŋ la huma kursi, ngaha la huma anja magadzaw, tatsòkwàh lukut medekuga à abà, ngaha la azlababasl la ahəl anətà kà mazləbła. ¹⁰ Tawiyà la kuda zlèkkà: “Zəzagəla uwanay la kursi la afik atà la magadzaw la uwana tatəfà anu”, tagòf. ¹¹ Azlamalika gesina tatsàzl à makəla kursi, ngaha à makəla anja azlamadzahaga, ngaha à azlatatak ufađ uwatà la sifa. Atà takədédàh à huma kursi, la makas gəl à vədah, ngaha tasləkàw Zəzagəla, ¹² la magođay: “Hađay gà, mazləbay, la matsihila, la kikay gami, la masləkaway, la ndzəđa, la makoray gesina taga la ahəl anha. Azlauwaga kà Zəzagəla gami akoray anja tsərəh à awtəy. Amen!” ¹³ Tekula anja azlamadzahaga dzik səla gəl anha ufađ uwaga agòf à gi: “Kasəl azladza uwaga tatsòkwàh lukut medekuga à abà ay? Tasà à waŋ à ama la?” ¹⁴ Gəgòđal: “Kak, la uwana kasəl mənğa, gi kà, gəsəl aw.” Agòf à gi: “Azlauwanay kà, azlauwana tasà ngərpa mənğa, uwana aduwa ndzəđa anətà la makəf gəl à ahəŋ. Tadza à ahəŋ la dziriga la abà. Atà tapalàh lukut anətà kuzekaka la aniz anja magadzaw la abà. ¹⁵ Kà uwaga à uwana tatsizilla à huma kursi anja Zəzagəla, tazləb masla la mən gəy anha la aku, mavakay la mahənay, dza uwaga la kursi la afik adàhuđ atà à gəl. ¹⁶ Kà may anja maz atà à aya aw, nəlay anja makəs à atà babay aya aw. Marabak anja maslərnàhatàla aya aw, tatak anik la ahəŋ adàvəd à atà la maz à atà aya aw. Kà mana ma? ¹⁷ Kà uwana magadzaw, uwana la tataka anətà la kursi la afik adəgay masla manəŋla atà. Adàdahla atà à gay anja iyaw anja sifa uwana akəlay. La kità aya, Zəzagəla adàslasladàh atà iyaw tugwi la adi ala.”✠

8

Magadzaw afətə masəlay maməđəf à wakità la vok ala

¹ Bə gotənəŋ magadzaw afətə masəlay maməđəf la ama ala, uwana agà makəf gəl à ahəŋ. Mok uwana adafətəla la ama ala, tatak gesina la zagəla ‘Məslək’, tagòf aw, tadzà à ahəŋ titi tsərəh à tenma anja sa. ² Ngaha la lig anja madz à ahəŋ titi la ahəŋ, gənəŋà azlamalika məđəf uwana tatsàzl à ahəŋ la huma Zəzagəla, tabəzəl mazlazliŋ məđəf la slaka anha.

³ La abatà aya, malika anik asà à waŋ la slaka makəf tatak la abà, la ahəl anha daram madehəŋ gə la luwəluwə, tavəl kidzidzi anjuvaw, kà masla anja maβəkay, la slaka makəf tatak luwəluwə gə uwatà la afik, la huma Zəzagəla, ngaha la mavəy la slaka gə azlamadəv kuđa anja mənə mađiŋal gəl à vok. ⁴ Kəsək anja kidzidzi uwana aduwal à akəl à tsəh, asà à malika uwatà la ahəl ala dzedzika la huma Zəzagəla, ngaha la madəv kuđa anja azladza anha, uwaga adəl à sləm à agu aya. ⁵ Mok uwana malika adəfehəŋ kiya uwanay, azəb daram uwaga ahənəŋ ala la slaslay akəl la slaka makəf tatak la abà, ngaha aduə à vədah. Uwaga masləh məlo anja habaga atsən azlamawutsəđay tawutsəđàh, ngaha kiya uwaga kutso abəlakà vok.

Azlamazlazliŋ məđəf✠

✠ **7:17** 7.17 Mahabay 23.1; Yesayya 49.10; Hezəkiyel 34.23; Daniyel 12.1 ✠ **8:5** 8.5 2Musa 7.14-12.51

⁶ La lig la ahəj, azlamalika mədəf uwana mazlazliŋ aġàhà à atà la ahəl tadfahà vok à ahəj kà aŋa matsay.

⁷ Malika matera atsà mazlazliŋ aŋha, matsatsay iyaw, la akəl mahohodfelaga la aŋiz asùw à vədah. Kiya uwaga tekula aŋa mamakər aŋa gudəj à vok ababəh à gay, la azlaahàf la azlakəsaf aŋha gesina, dənna.

⁸ Malika masəla atsa mazlazliŋ aŋha aya. Azəb məj tatak anik, bokuba məj gudəj dzəgərha, akəl ababəhay la afik. Atsəl gəl à magol dərəv à abà, ŋgaha tekula aŋa mamakər aŋa iyaw apakà aŋiz. ⁹ Azlatatak uwana la iyaw uwaga la abà gesina, taməts à gay hənəts; azlakəslah iyaw tawis ala gesina babay.

¹⁰ Kiya uwaga aya, malika mamakər atsà mazlazliŋ aŋha. Magol tsetsiliŋ məjga abəd à vok la zagəla, uwana ababəhay bokuba akəl atəd à azlamukwà à tsəh la azlazləlok. ¹¹ Tsetsiliŋ uwatà kà sləm aŋha kà vəzlmadiya. Tekula aŋa mamakər aŋa iyaw uwatà, apakà dəhakak, mok uwana azladza tas iyaw uwatà, aŋuvaw la tataka aŋatà la abà taməts, kà iyaw uwatà.

¹² Bə gotənaŋ aya, malika maufad atsà mazlazliŋ aŋha. Mok uwana adatsay, tekula aŋa mamakər aŋa afats, ŋgaha la təla apakà marsiga tsiktsetsik. ŋgaha tekula aŋa mamakər aŋa azlatsetsiliŋ apakà marsiga babay. Kiya uwaga taud aya aw. Tekula aŋa mamakər aŋa mavakay aŋa afats atəd à zagəla, ŋgaha tekula aŋa mamakər mahənay vəd aŋa təla atəd à zagəla bay.

¹³ La kità aya, gənəjə zulo uwana ahoyay la ləv zagəla la abà la magodfay: “Kayyà, kayyà, ŋgərpa adəgay la azladza uwana la vədah. A baŋa mazlazliŋ aŋa azlamalika makər uwanay adətsənay, ndzer”, agəd.

9

¹ Kiya uwaga aya gotənaŋ malika mazlo atsà mazlazliŋ aŋha aya, gənəjə tsetsiliŋ uwana atəd à ahəj la zagəla. Tavəl tsəkurəm kà mapəzlla afək zəjzəjga kà mələs tuwisl la abà. ² Mok uwana tsetsiliŋ uwaga apəzl afək uwaga, dəhut, kəsək asà à uda la abà bokuba kəsək aŋa matəl tatak. Kəsək uwatà atsək afats à ama tabadamma akəl mələs. ³ Dəmdadəm dawanagay asà à uda la kəsək uwaga la abà, tasləhà gəl à gudəj à vok. Tavà à atà ndzəda kalkal la aŋa aliz. ⁴ ŋgaha tagəd à atà kà: “Pədaŋ azlakəsaf, la azlaahàf uwana atsà à uda la kutso la abà aw, ama dəw kà mawisəjla kà azladza gudəj à vok ala pəra, azlauwana kokudə masəlay aŋa Zəzagəla la madəgay aŋatà”, tagəd à atà. ⁵ Tavà à atà tetəvi kà aŋa makad azladza aw, ama pəra kà: “Katərebaw atà”, tagəd atà, tatəreb atà kà aŋa təla zlo, azlamazay uwaga kalkal la mazay aŋa aliz. ⁶ La təla zlo uwatà, azladza tayəh mamətsay ama tabəzəl aw. “Sà à waŋ, sà à waŋ”, tagəd à mamətsay, ama mamətsay ahəy atà à ahəl.

⁷ Nəjəw azladawnagay gə uwana tadəbàni à vok la azlapəlis aŋa guvəl, tapakà tatagà à gəl, bokuba garamusa aŋa luwəluwə. Hud adi aŋatà kà kalkal la hud adi aŋa azladza. ⁸ ŋgaha aŋidz aŋatà kà bokuba aŋidz aŋa azlamis, slid aŋatà kà kiya aŋa sikalaveri. ⁹ Tawədaŋ slarapay aŋa ada à makəla aŋatà, ŋgaha mahohumay aŋa azlagogozlāh aŋatà kà, kalkal la mahohumay aŋa azladərkwa uwana azlapəlis tabiyəj, kà mad à guvəl aya. ¹⁰ Gudaz aŋatà godam la gay, bokuba aŋa azlaaliz, gudaz aŋatà uwaga la uwana avà à atà ndzəda kà mamalla azladza tsərah à təla zlo. ¹¹ Məjga aŋatà kà masla la uwana akoray lakəl aŋa afək zəjzəjga uwaga, sləm aŋha la gay ibəranənkowen kà *Abaddon*, ŋgaha la gay gərək kà *Apollyon* (Uwana asal magodfay: masla makalāh tatak à ahəj)

¹² Kiya uwanay à uwana, ŋgərpa matera adà à lig. Aganay azlaŋgərpa səla tazla-ŋalay aya zlə.

¹³ Kiya uwaga malika maməkwa atsà mazlazliŋ aŋha, gətsənəj kuda, atsən la gay ndzika ufad aŋa slaka makad tatak, uwana madəhəj gə la luwəluwə la huma

Zəzagəla. ¹⁴ Kuda uwaga agòd à masla mats mazlazliṅ uwaga la ahàl à ahàl: “Pàlla azlamalika ufad uwaga ala, uwana tawàdàh atà à ahəṅ la gay məṅ mukwà uwana tazalalla Efərat.” ¹⁵ La abatà kà, tapèlla atà ala. Zəzagəla adfahà atà à ahəṅ la mavay uwanay la abà, la təla uwanay la tsəh, la mavakay uwanay, ṅgaha la sa uwanay, kà takad tekula aṅa mamakər aṅa azladza gesina. Kà aṅa uwaga à uwana: “Pàlla atà ala”, kuda agòd à malika uwaga. ¹⁶ La abatà aya tapəhgəla maham à ahəṅ aṅa azladza uwana tahàd à pəlis guvəl à afik, “Million dadərmokw səla”, tagòd à gi. ¹⁷ Kiya uwaga à uwana gənəṅà la mafətal la ama ala uwaga la abà. Gənəṅà azlapəlis uwaga, ṅgaha azlaməna madàh à afik. Tawàdàh vok ala la azlaslarapay aṅa guvəl mativga bokuba akàl, azlaanik makur zagəla kurzagəla, azlaanik mazaybəzi zaybəzi. Akàl kəsək ṅgaha huleli tasà à afik la maṅula aṅatà dzedzika. Gəl aṅa azlapəlis aṅatà kà, bokuba gəl aṅa azlasikalaveri. ¹⁸ Akàl, kəsək ṅgaha huleli la uwana tagà azlaṅərpa makər uwana tasà à uda la maṅula aṅa azlatatak mapəlis pəlis gə uwaga, takad tekula aṅa mamakər aṅa azladza à gay. ¹⁹ Kiya uwaga la maṅula kuda aṅatà la ahəṅ, la uwana ndzəda atsà à afik, ṅgaha aya gudaz aṅatà kà bokuba gəl bebi, kà matsàhla azladza.

²⁰ Ama kà matəm à ahəṅ aṅa azladza uwana tamatsàh à ṅgərpa uwaga ahàl aw, tasakà à madəhəṅ aṅatà la tsəh ala aw, tadà à huma à gay la makədəfahay à azlamasəsədok à ahəṅ, ṅgaha la masləkawàh à azlafəla, uwana tafahàhəṅ la luwàluwà, la gursu, la ada vərzeganiḡa, la azlaakur, ṅgaha la azlaahàf. Tekedika azlafəla uwaga kà, tatak la ahəṅ tafəhəṅ aw, taslala vok kà aṅa manəṅla aw, tatsən sləm aw, ṅgaha taday bay aw. ²¹ Azladza uwaga tadà à huma à gay la makad dza babay, tasakàl à tsəh ala aw. Tayàhàh azlaahàf anik anik, ṅgaha tafahàhà mabila la mad à gəl gesina. Tetuw, tetuw ləv avàl à atà à gay kà mawul à lig aw.

10

Malika uwana la bəzi wakità la ahàl

¹ Kiya uwaga la lig la ahəṅ, gənəṅəṅ magol malika anik, atsà à ahəṅ la zagəla, lukut aṅha uwana la vok kà habaga, mafafad gəl à uda gə la gəla makoz akoz, huf adi aṅha kà awutsəday bokuba afats. Asik aṅha kà bokuba alàh aṅa akàl. ² La ahàl aṅa malika uwaga, bəzi wakità mapəzlay gə la ahàl. Adùw asik ahàl kaf aṅha à dərəv à gəl, asik ahàl gudzay kà afa à kutso à abà. ³ Abadmə la kuda zləkkà, bokuba mawiyay aṅa sikalaveri uwana atawahay. Mok uwana abadmə, gətsənà masləh məlo mədəf aṅa habaga awulàlla. ⁴ Ama mok uwana habaga aslèh məlo mədəf, gəwoyà matsetser uwana tapəh, ama gətsənà kuda anik asà à ahəṅ la zagəla agòd à gi: “Kəsəṅ kà aṅak pəra, à uwana habaga apəh, awkà katssetser aw”, agòd à gi.

⁵ Kiya uwaga malika uwana afà asik anik à dərəv à gəl, ṅgaha anik à kutso à abà, adzilà ahàl kaf aṅha à zagəla. ⁶ Masla azùw mawadəy la sləm aṅa Zəzagəla uwana adəv à gay aw, à masla uwana adfahà zagəla, ṅgaha la azlatatak uwana la afik gesina, adfahà kutso la azlatatak uwana la abà gesina, ṅgaha adfahà iyaw aya la azlatatak uwana la iyaw la abà gesina aya gotənaṅ. ⁷ Agòd aya: “Baṅa mazlazliṅ aṅa malika mamədəf adətsənay, Zəzagəla adəhəṅəṅ ala madzugway aṅa nasiri aṅha, say tatak uwaga gesina kà apakà vok la katskats, bokuba uwaga Zəzagəla apəh à azlaməna mapəh à atà gay à ahàl kà mapəh à azladza.”

⁸ ṅgaha kuda uwana gətsənəṅ dagay la zagəla, agòd à gi aya: “Hàd, zəb wakità mapəzlay gə uwaga la ahàl aṅa malika, uwaga asik tekula la dərəv lakəl, ṅgaha asik anik la kutso la abà”, agòd à gi. ⁹ Kiya uwaga, gəhàd à slaka malika, gəgòdàl: “Và à gi bəzi wakità uwanay.” Masla agòd à gi: “Pàd, adəgay namnam la gay aṅak, bokuba zuway mazuway, ama baṅa kadədugw à gay ala kà, adəgay dəhakak la huf aṅak”, agòd à gi. ¹⁰ ṅgaha gəzəb wakità uwaga la ahàl aṅha, gəpàd. Ndzer, agà namnam la

gay gulo bokuba zuway mazuway haday. Ama mok uwana gëdadugw à gay ala kà, dehakak, haday.

¹¹ Tagòd à gi aya kà: “Say kaz paṅaw aṅa Zəzagəla uwana apəh lakəl aṅa azladza uwana tasà à uda la azlatsəhay la azlagay anik anik gesina, uwana tasà à waṅ la makəf gəl à ahəṅ gudəṅ à vok gesina, ṅgaha la azlasufəl aṅatà”, tagòd à gi.

11

Azlaməna sayda səla

¹ Kiya uwaga aya, tavà à gi golakay, bokuba azəva magurla tatak, tagòd à gi: “Hàd, gùr gày Zəzagəla, ṅgaha slaka makəf tatak aya. Tùgw azladza uwana tadəv kuḍa à Zəzagəla la aku babay aya”, agòd à gi. ² “Ama kagur lig gà aw, sàkal kità”, agòd à gi. “Kà uwana masla kà gəvə à azladza uwana azla Yahudiya aw. Atà tadàhaba à ahəṅ ala gudəṅ aṅa Zəzagəla tsikasлага, tsərəh à təla dzik ufaḍ gəl aṅha səla. ³ La lig la ahəṅ gədasləl azlaməna sayda gulo səla à awtày”, agòd. “Uwana tadətsokwah à lukut kuḍa à abà, ṅgaha atà tadàza gay gulo à azladza la kaslā uwatà tsərəh à mavakay dəbow la dadərmokw səla bəzi aṅha dzik mukwà”, kiya uwaga agòd à gi.

⁴ Azlaməna sayda səla uwaga kà atà səla nna, tatsizlla à ahəṅ la huma Sufəl Zəzagəla uwana akor gudəṅ à vok. Atà azlaahàf səla uwana tazala atà ala kuvu. Gotənaṅ azlafənəs səla aya babay. ⁵ Baṅa dza asal maḍàh à atà mawisiga à vok kà, akəl atsa à waṅ la gay aṅatà la awtày, ṅgaha ababəh atà à gay. Kiya uwaga tadəkəf atà azlauwana tayàh maḍàh à atà mawisiga à vok. ⁶ La kità, la mok uwana tadəzah sayda kà, atà la maslay kà matsakay à zagəla à ama, kà iyaw aṅa manəf à ahəṅ aw. Gotənaṅ, atà la maslay aṅa mapak iyaw ala kà aṅiz, ṅgaha atà la maslay kà aṅa mav azlanḡərpa anik anik à azladza gudəṅ à vok, bokuba uwana asa atà bay.

⁷ ṅgaha mok uwana tadədəv maz gay aṅatà à gay, tatak fəta asa à uda la afək zəṅzəṅga la abà, akəs atà la guvəl, aḍuwa atà, ṅgaha akad atà. ⁸ Kiya uwaga azlavok aṅatà kà, tadədzà à ahəṅ la tetəvi aṅa məṅ huḍ gudəṅ la slaka uwana tatəsl Sufəl aṅatà à ahàf à adi uwarà. Gudəṅ uwatà tazalalla la gay zil kà Sodom baṅaw Misəra, kà uwana azlagudəṅ uwaga taḍahàhà mabila, takəs gay aṅa Zəzagəla aw. ⁹ Haday, azladza uwaga tasà à uda la azlatsəhay aṅa azlagay, ṅgaha tasà à waṅ la makəf gəl à ahəṅ gudəṅ à vok gesina. Atà tadənərəz mazimnekid, mavakay makər la tenma, tadəvə tetəvi kà mal atà aw. Kà uwana tagòd kà: “Atà səla nna, tawisà gudəṅ à vok ala”, tagòd. ¹⁰ Kiya uwaga azladza gudəṅ à vok tadəbak agər à abà, kà uwana takəf azladza səla uwaga. Atà tadəhabahah azlamədevaday la mavəhay azlatatak deyday babay. Kà uwana azladza səla uwaga tasàh zladfa à azladza gudəṅ. (La maz gay Zəzagəla uwana tazàhàṅ) ¹¹ Iyay, mok uwana mavakay makər uwaga la tenma adada à lig, Zəzagəla afəta atà afad à gəl kà mawulla atà ala sifa, ṅgaha hahadzàk, tatsazlla ala. Azladza uwaga la abatà gesina guba akəs à atà. ¹² Mok uwana tatsizlla, tatsəna kuda atsəna à ahəṅ la zagəla, agòd à atà: “Sàw à afik à abanay!” Kiya uwaga tada à afik la habaga la abà, la yewdi aṅa azlaməna məzam aṅatà. ¹³ La mok uwatà kutso abəlaka vok mənḡa, tsərəh à uwana tenma aṅa makulo aṅa gudəṅ uwatà azala tetuwa. Mabəlaka vok aṅa kutso uwaga kà, azaṅ ala dza dəbow məḍəf, matəm à ahəṅ aṅa azladza uwaga kà, guba akəs atà mənḡa. La vud uwaga tanəṅa mənḡa aṅa Zəzagəla, tasləkaw.

¹⁴ Kiya uwanay à uwana ṅgərpa masəla uwanay ada à lig. Ama hanḡəli, aganay mamakər uwana azlanḡalay aya gotənaṅ zlà.

Mazlazliṅ makəfal gəl aṅa malika

✧ 11:1 11.1 Hezəkiyel 40.3; Zakari 2.1-2

¹⁵ Kiya uwaga malika mamədfəf atsà mazlazliŋ, azlakuda tatsənà à ahəŋ la zagəla, ŋgaha tagòd: “Sufəl Zəzagəla gami la masla uwana mafal dzakwa à gəl gə kà: Gudəŋ à vok adagay la ahəl aŋatà kà makoray. Makoray aŋatà adànats à gay ala aw.” ¹⁶ Mok uwana takədf gəl à uwaga, azlamadzahaga dzik səla gəl aŋha ufađ uwana tadzàhà madzay la kursi la afik, la huma Zəzagəla takàsà gəl à ahəŋ la huma aŋha, tazləbà, ¹⁷ tagòd:

“Hađfay, Sufəl, kak uwana kaga la ahəŋ la sifa dagay uwarà. Ŋgaha kak la ahəŋ la sifa lakana aya. Kikay məgodf à ka, kà uwana tatak gesina adada à ka à ahəl, kagay la kəl gə gesina.

¹⁸ Kiya uwaga azladza uwana tasəl kak aw, atà tapakà ləv lakəl aŋak. Ama la uwaga kà, sà aŋak adaslay kà kak aŋa mapak ləv lakəl aŋatà suwaŋ. Kaslà adaslay à uwana kadàh seriya à azlamamatsay à gəl. Ŋgaha aya kaslà adaslay à uwana kavà masik à azlamayà aŋak, uwana kapəh à atà gay à ahəl aŋa mapàh à azladza. Kak kadàvə masik à azlatsəhay aŋak gesina, azlaməŋga, bə amiyaka bə la azlabəza gə bay. Azlauwana takəs gay aŋak gesina, kadavà à atà masik. Ama kà aŋa azlauwana tawis gudəŋ ala kà, kaslà adaslay à uwana kak aŋa madàzahatàla suwaŋ!”,✧

tagòd.

¹⁹ Mok uwana tadəv uwaga à gay gesina, gəy aŋa Zəzagəla apəzlla vok la zagəla, tsərəh à uwana azladza tanəŋà sahar makəs vok slawda apokwà vok la paraka. Azlamawutsəđfay tawutsəđfàh bəzlbəbəzl, habaga aslèh məlo, kutso abəlakà vok, ŋgaha matsatsay iyaw anis à ahəŋ aŋuvaw.

12

Slagəla la zagəla

¹ Kiya uwaga məŋ nadzipo apəhla vok ala la zagəla. Aganay nadzipo uwaga: Mis tekula uwana adatsokw afats à abà bokuba lukut, abək asik aŋha kà à təla à afik, nalbət aŋha babay kà, taga kà azlatsetsiliŋ kulo gəl aŋha səla, bokuba garamusa aŋa sufəl. ² Mis uwaga aga la bəzi la huđ, azlāsokw à ahəŋ, ŋgaha aga la mabas vok la abà, awiyay kà mazəŋ aŋha.

³ Ama nadzipo anik apəhla vok ala la zagəla aya. Tatagà məŋga gə bokuba kudu, ŋgaha mativga, uwana akor gəl mədfəf, ŋgaha dərəw kulo kulo la kəla gəl gesina la garamusa. ⁴ Tatagà uwaga kà la gudaz. Gudaz aŋha kà abədf tsetsiliŋ tenma aŋa mamakər aŋa zagəla à ahəŋ, ŋgaha awits atà à vəđah. Tatagà uwatà atsizlla à ahəŋ la huma aŋa mis uwaga, asəl masokw à ahəŋ, kà masla aŋa mapila à gay, à baŋa adasokw à ahəŋ. ⁵ Mis ayyà bəzi zilga, uwana adənəŋla tsəhay gesina la agəla ada. Mok uwana adayyay, tazəb bəzi uwaga katskats, tadàlla à slaka Zəzagəla uwana la kursi la afik. ⁶ Ama mis kà ahòy à kəsaf à abà, la slaka uwana Zəzagəla ađahàlləŋ à ahəŋ. Masla adzadzaray la abatà tsərəh à mavakay dəbow la dadərmokw səla bəzi aŋha dzik mukwa.

⁷ La lig la ahəŋ gənəŋà à zagəla kà guvəl adadzəka à vok. Misel ŋgaha la azlaməna aŋha tapa guvəl la tatagà uwaga la azlamalika aŋha.✧ ⁸ La abatà Misel la azlamalika aŋha tađuwà atà, kiya uwaga slaka abəzà à vok kà tatagà la azlaaŋha aŋa madz à ahəŋ la zagəla aya aw, ⁹ aga maduw à vəđah gə. Tatagà məŋga uwaga, la uwana maviya bebi, masla uwana azahà azladza gudəŋ à vok gesina ala, sləm aŋha kà, baba aŋa mawisiga, sləm aŋha anik aya kà seteni. Tadùw à vəđah, masla la azlamalika aŋha gesina.

✧ **11:18** 11.18 Mahabay 2.5; 110.5; 115.13 ✧ **12:7** 12.7 Daniyel 10.13,21; 12.1; Yahuda 9

¹⁰ Ngaha la lig la ahəŋ, gətsənà kuda atsən à ahəŋ la zagəla agòd: “Lagonay kà mazləbay aŋa Zəzagəla kà, adapaka vok, lagonay kà, Zəzagəla adapəhla makoray aŋha ala. Lagwa Kristu adapəhla maslay aŋa ndzəda aŋha ala, kà uwana masla məzam gami, uwana atsəzlàh à huma Zəzagəla, uwana apapàtəh azladedə gami, kà matàh à atà kaf à gəl mavakay la mahənay gesina kà, taməl à uda la zagəla. ¹¹ Azladedə gami tatsà à ahəŋ. Kikay kà aŋiz aŋa magadzaw, ngaha kikay kà gay dziriga uwana tazàtəŋ, atà takəs mav sifa aŋatà. ¹² Kà uwaga à uwana, takudək seteni à ahəŋ la zagəla. Ngaha akul, azladza uwana la afik, rabàw! Ama kà aŋkul gudəŋ à vok la azladərəv aya, ngərpa la akul, kà uwana seteni kà tadaməl à slaka aŋkul la vədah. Apakà ləv, kà uwana asəl kà kaslà aŋha kà atəm à ahəŋ kà ŋuv pəra.”

¹³ Mok uwana tatagà uwaga asəl kà taməl à vədah kà, adzəkà manəf mis uwaga la tsəh, ayyà bəzi zilga. ¹⁴ Atà tavà gogozläh à mis, kalkal la aŋa zulo mənğa gə, kà aŋa mahoyay à huma ala katskats la uwaga, à slaka aŋha uwana à abà Zəzagəla adədzadzarayla à abatà. Mavay makər la tenma adədzə à ahəŋ la abatà, kà bebi uwaga aŋa makəsəy aw. ¹⁵ La kiya uwaga, bebi adəhəŋ dabaray la mavəläh iyaw à vədah kà iyaw aŋa manəf mis la tsəh aŋa mazəb mis. ¹⁶ Ama kutso azlək mis, apəslək ala, asà iyaw uwana à gay, asà à uda la huđ aŋa tatagà uwaga. ¹⁷ Kiya uwaga tatagà uwaga abəzà à mis à tsəh aw, vədzəgəläh agolà vok aŋa maday aŋa map guvəl la azlamayyi à tsəh ala aŋa mis uwaga. Azlamayyi à tsəh ala aŋha uwaga kà, azlauwana takəs gay Zəzagəla, ngaha atà uwana tanəfà dziriga aŋa Yesu, uwana apəhatàla. ¹⁸ Kiya uwaga tatagà uwaga ahəd, atsizl à gay dərəv.

13

Tatagà uwana azal azlatatagà anik səla

¹ Kiya uwaga gənəŋà tatagà anik asà à uda la dərəv la abà, uwana agà la azlagəl dzadzukwa mədəf, ngaha la kəla gəl aŋha kà, dərəw kulo kulo la kəl. Kəla dərəw aŋha kà garamusa aŋa sufəl la tsəh. La kəla gəl aŋha la vok babay kà, sləm mawisiga aŋa magodəhay à Zəzagəla la vok. ² Tatagà uwatà kà, gənərəz kà, maftsa vok aŋha kà bokuba zimnəli, azlaasik aŋha kà bokuba azlaasik aŋa balagodəy. Ngaha gay aŋha kà bokuba gay aŋa sikalaveri. Abəđla tatagà uwaga à slaka aŋha à abà. Tatagà uwana adzà madzay la kursi aŋa kudu la afik, abəzà ndzəda aŋha babay. ³ Ama gənəŋəŋ kà tekula la tataka azlagəl aŋha la abà kà, bokuba makədəy gə uwarà, ngaha amik aŋha awür ala, akəs nadzipo à azladza gudəŋ à vok gesina, ngaha abiyà atà la uwaga, tanəfà masla. ⁴ Kiya uwaga, azladza gesina tasləkàw tatagà uwana avà ndzəda aŋha à tatagà uwaga. Tasləkàw tatagà uwaga babay, la magodəy: “Uwa à uwana mənğa bokuba tatagà uwanay uwa?”, tagòd.

⁵ Kiya uwaga tatagà uwaga abəzà à tetəvi aŋa mapəh mawisiga à Zəzagəla à vok, abəzà maslay aŋa madəhəŋ kiya uwanay kà, kà aŋa təla dzik ufađ gəl aŋha səla pəra. ⁶ Tatagà uwaga adzəkà mapəsew slaka aŋha la zagəla, la azlauwana tadzà à ahəŋ la afik, la sləm aŋha, ngaha baməraka Zəzagəla la gəl aŋha, apəsəw masla babay. ⁷ Masla abəzəl tetəvi aya aŋa map guvəl la azladza aŋa Zəzagəla, ngaha la makədəsl atà la gudəŋ la vok. Avəl ndzəda aya lakəl aŋa azladza uwana tasà à uda la azlatsəhay la azlagay la abà, ngaha tasà à waŋ la makəd gəl à ahəŋ gudəŋ à vok gesina la ahəl aŋha aya. ⁸ Azladza gudəŋ à vok gesina tasləkəw tatagà uwaga, bokuba magodəy, azladza uwana sləm aŋatà la ahəŋ la wakità aŋa sifa la abà dagay madzəka aw. Say magadzaw uwana takəđla, la uwana akor wakità uwaga pəra.

⁹ Agòd: “Kanekaw à sləm à ama aw, tsənàw gay uwanay gəpəhay!” ¹⁰ Kiya uwaga agòd: “Dza uwana mokfak aŋa makəs à daŋay la vok, ndzer kà tadəkəs à daŋay,

tadàkəfay la katsakar aya dza uwana la mokfak aña katsakar la vok. Kay, tsa baña kiya uwanay kà, ñuləm azladza aña Zəzagəla tabasəñ la maday à huma à gay la madin gəl à Zəzagəla à vok, kà atà aña madz à ahəñ la adi.”

¹¹ Kiya uwaga gənəñà tatagà anik asà à lag la kutso la aku. Masla la dərew səla lakəl, bokuba magadzaw, apəhay kà la kuda uwana agagazläh azladza ala. ¹² Masla adàhla sləray la ndzəfa aña matera, ñgaha la masəlay aña matera bay. Tatagà masəla uwaga afà leri à azladza gudəñ à vok à gəl, kà atà aña masləkaw matera gə uwaga, à masla uwana la amik mamətsay la vok, awür ala. ¹³ Masəla gə uwaga adahàhà azlatatak nadzipo mənğa, azalà akəl à ahəñ la zagəla la yewdi aña azladza gesina. ¹⁴ Masla abəzəl tetəvi kà madàh azlanadzipo la huma aña tatagà matera gə uwatà, avavàràhà azladza gudəñ à vok à bada à abà la magod à atà: “Ñjàláv mazlazlay la maftsa vok aña tatagà uwaga awurà ala la amik aña katsakar la abà, aña masləkaw masla.” ¹⁵ Kiya uwaga tatagà uwanay apəh, kiya uwaga kà masla mabəzal ndzəfa kà mafətay afad sifa à mazlazlay, atà aña madzəka mabadma, atà akad azladza gudəñ à vok à gay gesina, azlauwana takweska gay aña. ¹⁶ Tatagà uwaga afà leri à azladza à gəl gesina, azlabəzaga la azlamənğa, azlagalepi la azlaməna kuda, azlamayàga ñgaha la azlauwana takor gəl, kà atà mabəz masəlay la ahəl kaf, bañaw la madəgay. ¹⁷ Uwaga aña mapəhla ala kà: Dza uwana la masəlay uwaga aw, tetəvi la ahəñ kà aña aña masukw tatak, amiyaka bə maduw tatak ala aw. Masəlay uwaga kà sləm aña tatagà uwaga. Sləm aña bay kà kəzłakula.

¹⁸ Lagonay la uwana anu mədàh matsihila, dza uwana la hanjəli kà aslala vok aña masəl godega aña gay uwanay tapəh, la matugway aña tatagà uwanay la abà, kà uwana matugway uwaga kà, magazləla gə la sləm aña dza, matugway uwaga aga kà dadərmokw mukwa, la dzik mukwa gəl aña mukwa.

14

Azladza aña Zəzagəla tahab mahabay mawga la zagəla

¹ Mok uwana uwaga adada à lig, gənəñà tatak anik aya. Gənəñà magadzaw uwana adatsizlla à ahəñ la gudəñ uwana la afik, tazalalla Siyon. Masla la azladza uwana masəlay aña sləm aña Zəzagəla Baba, la aña magadzaw aga la atà la madəgay añaatà. Matugway aña azladza uwatà kà taga dəbow dzim bəzi aña dzik ufađ gəl aña ufađ. ² Ñgaha aya gətsənà mahohumay la zagəla, uwana adabani vok la mahohumay aña iyaw. Mahohumay aña babay kà bokuba mahohumay aña habaga, ñgaha bokuba mahohumay aña madəfəñ niziñ. ³ Kiya uwaga azladza dən uwaga tatsàzl à huma kursi aña Zəzagəla la huma aña azlatatak ufađ uwana la sifa, ñgaha la huma azlamadzahaga uwatà. Tahàb mahabay mawga. Tetuwa masla masəl mahab mahabay uwatà la ahəñ aw. Say atà uwatà Zəzagəla abəl atà pəra. ⁴ Azladza uwaga tanəñla gəl añaatà la tsikasla la abà, kà uwana tagagamàh la azlamis aw. Atà tanəfà magadzaw la tsəh à kəla slaka uwana adà à abà gesina. Atà uwana mabək atà gə à fəta à awtəy la tataka azladza anik la abà kà aña Zəzagəla la magadzaw. ⁵ Fida asà à wan la gay añaatà aw, atà sətaka. ^{*}

Aganay gay lakəl aña azlamalika makər

⁶ Kiya uwaga gənəñà malika tekula uwana ahoyay la ləv zagəla la abà. Asà à wan kà maz gay marabəñ gə, uwana adàdza à ahəñ aña koksikoksi, adàziñ à azladza uwaga tasà à uda la azlatsəhay, la azlagay, ñgaha tasà à wan la makad gəl à ahəñ gudəñ à vok gesina. ⁷ Malika uwaga abadfatàmà la kuda zləkkà, agod à atà: “Hòyàw yewdi kà aña Zəzagəla, zləbàw masla kà uwana kasl à uwana adəfah seriya à azladza

^{*} **14:1** 14.1 Hezəkiyel 9.4 ^{*} **14:5** 14.5 Zakari 3.13

à gəl kà adaslay. Sləkàwàw masla! A masla uwana adfahàn zagəla, la kutso la mukwà, ngaha la azlamakakəzay anha gesina.”

⁸ Kiya uwaga aya, malika anik anəfà à tsəh à uwaga à uda la magodfay: “Babila, mən hud gudəŋ adabəzlba, adabəzlba bərəf, tsewwa! Masla atəpla azladza kà madəh mabila anha, kiya uwaga azladza gesina uwaga tabiy mapak ləv anja Zəzagəla à gəl anjatà gesina.”

⁹ Kiya uwaga malika mamakər adəvla à tsəh à uda. Uwatà agòd la kuda zləkkà: “Kəla azlauwana tasləkàw tatagà uwatà asà à uda la iyaw la abà, ngaha la maftsa vok anja tatagà uwatà, atà la masəlay anja tatagà la madəgay, banaw la ahəl anjatà, ¹⁰ atà tadàsa ngərpa la ahəl anja Zəzagəla. Tetuwa namnamga adəgay la abà diki-diki aw. Azladza uwana tadəday à akəl à abà uwana makodfa à ahəŋ gə la huleli, kiya uwanay à uwana tadàsa ngərpa la huma azlamalika anja Zəzagəla, ngaha la huma anja magadzaw. ¹¹ Tetuwa kəsək anja akəl, uwana adəbabəh azladza uwaga kà, adəkəf gəl aw, kà uwana tasləkàw mazlazlay la azlatatagà uwaga, ngaha atà la masəlay anha la vok anjatà. Kiya uwaga atà tadəbəza maduw ləv aw, tadəs ngərpa kiya uwanay mavakay la mahənay gesina.”

¹² Kà uwaga akul, uwana kakəsaw gay anja Zəzagəla, diŋaw gəl à Yesu à vok, akul uwana kabasəwwən à vok kà uwana akul, akul azladza anja Zəzagəla.

¹³ La lig anha, gətsənà kuda atsən la zagəla, kuda uwaga agòd à gi: “Tsetsər uwanay: lakana ngaha tsərəh à huma à gay, azlauwana tadin gəl à Sufəl Yesu à vok, ngaha tamats à abà, atà la uwana Zəzagəla adəpis à atà gay à vok.” “Iyay, kiya uwanay”, Masasəfok tsikasla awulà à uda: “Sləray anjatà kà adadəv à gay, taslala vok anja maduw ləv adagay, kà uwana mats à gəl anja sləray anjatà kà adəpəhla vok ala la dazuwaya.”

¹⁴ La abatà gənəŋà tatak anik aya. Gənəŋà habaga medekuga. Tatak anik la habaga uwatà la afik. Agə bokuba maftsa vok anja dza, lakəl anha garamusa anja sufəl lakəl, uwana madəhəŋ gə la luwəluwə. Mavaw mazuwayga la ahəl anha aya. ¹⁵ Kiya uwaga malika anik asà à lag la mən gəy Zəzagəla la aku, azalà la ndzəfa à dza uwana adzà madzay la habaga la afik: “Dahà sləray la mavaw anək, tsəf tatak, kà uwana sartà anja matsəf tatak kà adaslay, tatak vəfah adahənay kà matsəfay.” ¹⁶ Ngaha dza uwana agə la habaga la afik azəb mavaw, atsəf tatak uwana la vəfah, atsəf gesina.

¹⁷ Ngaha la abatà gənəŋà malika anik aya, asà à uda la gəy Zəzagəla la aku. Masla babay agə la mavaw mazuwayga la ahəl aya.

¹⁸ Malika anik aya asà à wən kà la slaka makəf tatak. Masla kà mənğa anja akəl, asà à wən anja mazalay à malika anik uwana mavaw mazuwayga la ahəl, agòdɬal: “Zəb mavaw anək, ngaha həd, fətsəf mayyay tatak la abatà, kà uwana tahənay.” (Gudəŋ à vok kà guf) ¹⁹ Kiya uwaga malika azəb mavaw anha, ahəd kà matsəf tatak uwaga la guf la abà, ahəd à slaka uwana takuditsəh, afətükw à abà la abatà. Uwaga gesina apəhla ala kà Zəzagəla adapaka ləv mənğa. ²⁰ Slaka makuditsay kà la lag gudəŋ la uda. Mok uwana adakuditsay iyaw gə à uda la abà, iyaw gə uwaga kà aniz, la uwana asà à uda, uwaga akəl bokuba mukwà kərkər, ngaha makəlay anha kà bokuba magur mahodfay pəlis dzim bəzi anha dzik zlo, ngaha zəŋzəŋ anha kà təzləm dza. Kiya uwaga à uwana Zəzagəla adəkəs azladza makəsafərga uwaga la mapak ləv anha. Tetuwa adəpaka atà ləv à gəl.

15

Aganay ngərpa mədfə uwana azlamalika tadədala

¹ La lig anja uwaga la ahəŋ, gənəŋəŋ aya magol nadzipo, maval ləv à dza à gay gə la zagəla. Agə la ahəŋ malika mədfə la ngərpa la ahəl anjatà. Uwanay kà madəvla à

tsəh aña ɲɔrpa, kà uwana uwanay bay kà madəvla à tsəh mapak ləv aña Zəzagəla uwana adazinal à gəl.

² Kiya uwaga aya gənəɲà tatak anik, uwana bokuba dərəv, uwana awutsəfay bokuba kutərum, uwana la akəl la abà babay. Aya gənəɲà azladza uwana takəfəsl à tatagà uwatà, atà la mazlazlay uwana tafətəl afaɖ à vok. Atà takweskà masəlay aña sləm aɲha. Atà tatsàzlla à ahəɲ la gay dərəv uwaga la ɲiziɲ la ahəl, uwana Zəzagəla avà à atà. ³ Tahàb mahabay uwana Musa magamza aña Zəzagəla uwana ahabàh uwarà, uwaga kà mahabay aña magadzaw. Tahàb la magofay:

'Kak Sufəl Zəzagəla gami uwana kakoray lakəl aña tatak gesina,

Sləray aɲak uwana kadəhəɲ kà mənɲa, dzəbà aɲha səla aw, aduwan gesina.

Kak la uwana Sufəl aña gudəɲ à vok gesina,

Koksikoksi kadəhəɲ kà dziriga, kak dziriga gà.

⁴ Haday Sufəl, uwana adəhoy yewdi aɲak aw kagod uwa?

Uwa à uwana gəzləb kà aw adəgoday uwa?

Dza tsikasla, kà kak tekula pəra.

Azladza gudəɲ à vok gesina tadàsa à wan à huma aɲak,

Kà mazləb ka, kà uwana azladza gesina tanəɲa uwana kadəhəɲ, kà la tetəvi aɲha.'*

⁵ La lig aña uwaga la ahəɲ kà, gənəɲà magol gày Zəzagəla la zagəla mapəzlla à ama ala gà. Gày uwatà madəhəɲ gà la lukut, la slaka uwana Zəzagəla agagamahay la azladza. ⁶ Gənəɲà azlamalika mədəf uwaga, ɲɔrpa agà à atà la ahəl, tasà à lag kà la gày Zəzagəla la aku, tatsòkwàh lukut medəkuga à abà kuzlatta, tawəfàh vok ala la slarapay aña luwəluwà. ⁷ Kiya uwaga tekula la tataka aña azladza ufaɖ uwaga la abà la sifa, avàh à azlamalika mədəf uwaga tasà luwəluwà mədəf. La azlatasà uwatà la abà mapak ləv aña Zəzagəla adahən à abà. Zəzagəla gami uwana aga la ahəɲ aña koksikoksi, masla la mapak ləv gà lakəl aña azladza. ⁸ Kəsək atatùkw, ahənà gày ala. Asà à uda la mazləbay aɲha la abà ɲgaha la maslay aɲha la abà. Dza aslalà vok aña mad à gày uwatà à agu aw, say ɲɔrpa mədəf uwaga la ahəl aña azlamalika adəv à gay dàɲ.

16

Mapak ləv aña Zəzagəla

¹ La lig aña uwaga la ahəɲ, gətsənà kuda atsən à lag la gày Zəzagəla la aku. Dza uwatà agòɖ à azlamalika mədəf uwaga: “Dàw kadəsokwahaw mapak ləv aña Zəzagəla uwana la azlatasà la abà à vədəh. Sòkwàhàw à vədəh mədəf nna!”

² Kiya uwaga malika matera ahəd, asòkw aɲha à vədəh. Azlamagol gorodzu uwana azay tapàhla vok ala, la vok aña azladza uwana masəlay aña tatagà uwatà aga à atà la vok, atà uwana tasləkàw mazlazlay.

³ ɲgaha aya malika masəla ahəd, asòkw aɲha à dərəv mənɲa à abà. Kiya uwaga mukwà uwaga abədla vok à aɲiz, bokuba uwana atsà à mazimnekid la vok ala. Azlatatak gesina la iyaw uwaga la abà taməts à gay, hənats.

⁴ Malika mamakər ahəd, asòkw aɲha à azlamukwà uwana à tsəh takəlay, ɲgaha la azlauwana takakiz à uda la kutso la abà; ɲgaha atà babay tapakàh kiya aɲiz. ⁵ Kiya uwaga gətsənà malika uwana masla mənɲa aña iyaw agòɖ: “Kak, uwana kak tsiklasla dagay uwarà, ɲgaha kak la ahəɲ la sifa lakana aya. Kak uwana kak la ahəɲ la sifa, kak masla manats seriya ala la tetəvi aɲha, ⁶ kà uwana azladza uwanay kà tatsàh aɲiz aña azladza aɲak à vədəh, la aña azlaməna mapəh à atà gay à ahəl aɲak, lakana kavà à atà aɲiz kà atà aña masay, tabəzà uwana azlayla atà abəzal, suwan.” ⁷ ɲgaha

* 15:4 15.4 Mahabay 86.9; Yeremiya 10.7

gətsənà kuda atsèn la slaka makad tatak, agòd: “Iyay, kak la uwana kak Sufəl anja gudəŋ à vok gesina, kadah seriya à azladza kà la tetəvi anja, ndzer.”

⁸ Kiya uwaga malika maufad asòkw anja à afats à adi. Afats adzəkà mavəday bokuba akàl, kà uwana abəzà tetəvi la slaka Zəzagəla kà mavəday, kà maslèrnàh azladza ala. ⁹ Uwana tanəŋəŋ aslèrnàhatàla kà, tatsək magodahay à Zəzagəla à gəl, kà uwana masla la uwana ŋərpa uwaga la ahàl. Bà la kità bay, takweska mapəh gay la ləv ala, tamàts à mawisiga anjatà à abà. Atà tazləbà sləm anja Zəzagəla aw.

¹⁰ Kiya uwaga aya malika mazlo asòkw anja à kursi anja tatagà uwaga à afik. Ŋgaha mələs apakà vok la makoray anja. Azladza tadzəkà mapadàh slid, kà maz atà anja.

¹¹ Ama atà tapəh gay la ləv ala aw, tadà à huma à gay la madàh mawisiga anjatà, tatsək magodahay à Zəzagəla à gəl, kà uwana tasa ŋərpa mənğa la gorodzu anjatà la abà.

¹² Kiya uwaga malika maməkwa asòkw anja à mukwà mənğa gà à abà, uwana sləm anja Efərat. Mukwà agòl ala, kà azlasufəl uwana tasà à afik la mas à afik afats anja maguwa à uda la abà la abatà. ¹³ La lig anja uwaga la ahəŋ, gənəŋà azlamasasədok mawisiga makər, maftsa vok anjatà kà bokuba azlagoftok. Tekula asà à uda la huf anja kudu, anik aya la huf anja tatagà uwatà, ŋgaha mamakər asà à uda la huf anja tatagà masla mapəhal gay à ahàl fidaga uwatà. ¹⁴ Gesina anjatà azlamasasədok mawisiga uwaga, taguwà à uda kà la seteni la abà, masla uwana avà à atà ndzəda kà madàh nadzipo anik anik. Tadàh à slaka azlasufəl gudəŋ à vok gesina, kà maham à atà gay à vok, kà atà anja mas à waŋ anja map guvəl la Zəzagəla, uwana aduwa gesina, la vud uwana adàfəta à maslay anja la ama ala.

¹⁵ “Tsəbàwwal sləm”, Yesu agòd à atà, “Gi la uwaga gədàda à awtày bokuba masla à gəl! Mapis gay à vok agay la dza uwana adza à ahəŋ la adi, la maf sləm à lukut anja, kà masla maday la godega deyday la vud mas à waŋ gulo, kà ziruwi anja makəsay la huma azladza aw.” ¹⁶ Mok uwana azlamasasədok uwaga taday, tahama gay azlasufəl à vok, tahamà à atà gay à vok la slaka uwana tazalalla la gay ibəranəŋkowen: *Harmagedon*.

¹⁷ Ŋgaha la makədal gəl, malika mamədəf asòkw anja à afad à abà, ŋgaha kuda atsèn la huma kursi anja Zəzagəla la magol gày Zəzagəla la aku, agòd: “Diga, tsewwa.” ¹⁸ Kiya uwaga azlamawutsəday tawutsəd, azlahabaga tasläh mələ babay. Kutso abəlakà vok mənğa. Didi didi, dagay uwana Zəzagəla adahà gudəŋ à vok kà, kutso adabəlaka vok kiya uwanay didi aw. ¹⁹ Kiya uwaga mən huf gudəŋ apəslakàhla makər, ŋgaha azlahud gudəŋ, uwana la gudəŋ la vok gesina, tawəslla babay. Katskats awulà à Zəzagəla à gəl, à mawisiga anja gudəŋ Babila. Apakà ləv mənğa lakəl anja, la mapak ləv anja la abà kà, asà à atà azlamagol ŋərpa, la magoday: “Sàw à gay.” ²⁰ Kiya uwaga dèwdèw bəza gudəŋ uwana iyaw anudàhà atà à gay à adi, ŋgaha la azlagudəŋ gesina tazàhàlla tuwiya. ²¹ Matsatsa iyaw asòkw à ahəŋ kà mənğa mənğa, mahanay anja kà bokuba nəvol. (Kilo anja aslay 40, asal magoday tasà hi 20) Atà atəd à azladza à gəl. Bà gotənan kà, azladza tapakà ləv lakəl anja Zəzagəla, tatsək magodahay à gəl kà uwana tatəwəb la matsatsa iyaw uwaga la abà. Ŋərpa uwanay kà aduwà azlaŋərpa anik uwana adada à lig gesina la kaykay.

17

Aganay gay lakəl anja mis masla mazab zil gà

¹ La lig anja uwaga la ahəŋ, malika tekula la tataka azlamalika mədəf uwaga la abà, tasà mədəf la ahàl, asà à waŋ, agòd à gi: “Sà à waŋ, gəpəhakalla kakay à uwana mis masla mazab zilga uwaga adàsa ŋərpa mi, mis uwaga kà asal magoday kà: Huf gudəŋ uwana tanjàl à gay mukwà dən. ² Kiya uwaga azlasufəl anja gudəŋ à

vok tadahàhà mabila la masla, ñgaha atàpla madàh mabila aña à azladza la mabiy azladza gudəñ à vok, ñgaha tadà à madàh uwaga à abà babay.”

³ Kiya uwaga Masasəđok Zəzagəla asà à gəl gulo, ñgaha malika uwatà adàla gi à fəta à abà. Mok uwana gi la fəta la abà, gənəñà mis tekula adadza à tatagà à lig. Tatagà uwatà kà mativga, gəl mədəf la vok, ñgaha la dərəw kulo lakəl. Vok aña kà tsatsabasla matsetser à ahəl sləm matsəkla magodəhay à Zəzagəla à gəl ala à vok.

⁴ Ama kà aña mis uwatà kà, masla atsəkwa azlalukut seda mativga vikuzaga à abà. Masla abək tatak bədà à vok, azlaadaga la azlaluwàluwàga, ñgaha la azlaakur uwana sləm añaatà la ahəñ, tasà luwàluwà gà la ahəl. Tasà uwatà adahenla la azlatatak vanvanğa, bokuba magodəy kà mabila uwana adahàhəñ. ⁵ La madəgay aña mis uwaga kà sləm anik la ahəñ. Uwaga kà sləm uwana mahad vok à ahəñ gà. Sləm uwaga tatsetser kà aga: MƏŃ HUD GUDƏŃ BABILA, IYÀ AÑA AZLAMƏNA MAZAB ZIL, NGAHA IYÀ AÑA AZLATATAK VANVANĞA MAWISIGA, VANVANĞA UWANA LA GUDƏŃ LA VOK GESINA. ⁶ Gənəñà mis uwatà kà, aña aña azlaməna gay Zəzagəla adawisla gəl à vok. Kà mana takəd atà mi kagodəw ay? Kà uwana tazà gay marabəñ aña Yesu.

Uwana gənəñà uwaga kà, ləv avəl à gi à gay. ⁷ Malika uwatà agəd à gi: “Kà mana ləv avəl à ka gay ma?” Agəd à gi: “Tsənəñ, gəpəhakala godega aña gay mahad vok à ahəñ gà uwaga, lakəl aña mis uwanay kà, ñgaha lakəl aña tatagà uwana mis aga la lig kà, uwaga kà tatagà uwana gəl aña mədəf ñgaha dərəw kulo lakəl kà uwaga. ⁸ Tatagà uwaga kanəñəñ kà, agà la sifa uwarà, ama lagwa kà la sifa aya aw. Zewk kà, adawula à uda la afək zəñzəñga uwatà la abà aya. Baña adasa à uda kà, Zəzagəla adəkədəy tsokwfasl. La mok uwana Zəzagəla adzəkà mañal gudəñ à vok, atsetsər sləm aña azladza uwana tadəbəza sifa à wakità aña sifa à abà, ama azladza anik la ahəñ kà, sləm añaatà la wakità aña sifa la abà aw. La kaslà uwana tadəñəñ tatagà uwaga kà, ləv adəval atà à gay, kà uwana agà la sifa uwarà. Ama lagwa kà la sifa aya aw, ama zewk kà adawula à uda.”

⁹ Kiya uwaga agəd à gi aya: “Kà matsən uwaga kà, say azladza tagay azlamatsihilaga, la hanəkəli. Azlagəl mədəf uwaga kà, apəhla ala kà azladadəgwal mədəf, uwana mis adza à afik. Uwaga apəhla ala kà azlasufəl mədəf babay. ¹⁰ Kiya uwaga azlasufəl mədəf: Azlasufəl zlo kà makoray añaatà kà adada à lig tsewwa. Maməkwwaga aga la sufəl la afik. Ama mamədəf kà, kaslà aña adasa à wañ dadəñ aw. Baña kaslà uwaga adəslay kà, adəzuw sufəl kà, kà aña kaslà ñuv pəra. ¹¹ Tatagà uwaga la aslasl gəl aña, uwana agà la sifa uwarà, ñgaha masla la sifa aya aw. Masla tekula la tataka aña azlasufəl mədəf bay, masla adəpakay sufəl mamtəgis. Baña adəzlanəzlay kà, Zəzagəla adəkədəy aña tetuwa.”

¹² “Kà aña azladərew kulo aña tatagà uwaga kà, kanəñəñ kà, masla apəhla ala kà lakəl aña azlasufəl kulo, uwana tadəzlanəlay, ama tazəw sufəl dadəñ aw. Ama mok uwana tadəzlanəlay kà, tadəbəza maslay kà aña kaslà ñuv. ¹³ Azlasufəl uwaga gesina tadətsən vok gay. Atà tadəvə ndzəda la maslay añaatà kà madàh sləray à tatagà uwaga, ¹⁴ tadəpa guvəl la magadzaw. Masla kà, adəwa atà, kà uwana masla kà Sufəl aña azlasufəl. Masla la uwana adəwa azlasufəl gudəñ à vok gesina, azlaaña tanəfay la ləv tekula. Kà uwana masla la uwana atsatsəmənì atà ñgaha azalà atà kà manəfay, kiya uwaga kà tadəduw atà gesina.”

¹⁵ Bə gotənañ, malika uwaga agəd à gi: “Dərəw uwanay kanəñəñ, à uwana mis masla mazaḅ zilga uwaga adza à afik kà, apəhla ala kà azladza tsəhay gay gesina, ñgaha azlauwana tasà à wañ la makəd gəl à ahəñ gudəñ à vok gesina. ¹⁶ Azladərew kulo uwaga kanəñəñ atà, ñgaha la tatagà uwaga la aslasl gəl aña la uwana tadəzin vok à mis masla mazaḅ zilga uwaga ala. Tadəhəl tatak à mis uwaga ala, tadəməl à ahəñ la godega deyday. Matəm à ahəñ aña kà tadətəl à gay. ¹⁷ Uwaga kà, kà uwana

Zəzagəla aguwà la ləv aña azlasufəl kulo uwaga la tsəh, kà madfehəŋ uwana asal. Kiya uwaga kà, tatsənà vok gay, kà madəh sləray la ndzəfa aŋatà gesina kà aña tatagà uwaga. Tatagà uwaga adàkoray tsərəh à uwana à gay aña Zəzagəla adàgəf à afik.”

¹⁸ “Ŋgaha mis uwana kanəŋəŋ kà uwaga kà mən gudəŋ, uwana la maslay lakəl aña azlasufəl gudəŋ à vok gesina.”

18

Zəzagəla adukwa seriya à gudəŋ Babila à gəl

¹ La lig aña uwaga la ahəŋ, gənəŋà malika anik atsà à ahəŋ la zagəla. Masla agà la maslay mənğa, azladza gudəŋ à vok gesina tanəŋà udfaka la mazləbay aŋha. ² Masla awiyà la ndzəfa, agòf: “Babila, Babila mabəzl gəl à abà gà, mabəzl gəl à abà gà, bədfəftal, adəpaka slaka mahad vok à ahəŋ aña azlamasəsəfok mawisiga, ŋgaha azlatatak mahoyay tadàdza à ahəŋ la abatà. ³ Babila, ma kà mana abəzl à abà à mi kagodaw takay? Kà uwana avà à vok aŋha à mabila la matapla mabila aŋha à azladza. Azlasufəl la gudəŋ la vok tadəhàhà mabila la masla. Azlaməna tsakalay tagəh gorobu kà azlatatak dzəba aŋha səla aw gà, uwana la gudəŋ uwaga la abà.”

⁴ Ŋgaha gətsənà kuda anik atsən à ahəŋ la zagəla, agòf: “Azladza gulo, sàw à uda. Baŋa kahamaw gay à vok la mawisiga aŋha la abà, akul babay, kadəzłakaw atà à tsəh! ⁵ Kà uwana tsakana aŋha adəŋazla tsərəh à zagəla. Ŋgaha babay kà sləray mawisiga aŋha avika Zəzagəla aw. ⁶ Dahəwwaləŋ à vok bokuba uwana adəhəkulləŋ à vok suwaŋ. Baŋa agòr à akul mawisiga tasà tekula gòràwwal à afik tasà səla. ⁷ Səgəw ŋgərpa aŋha ala kà ləv aŋha mazəŋ; bokuba uwana agà la maslay kà madz à ahəŋ la matsidəy la abà. Masla agòf la gəl aŋha kà: ‘Gi nuha sufəl; awkà: gi mis kuda aw, gi gəsəl mamətsay à gi aw’, agòf. ⁸ Gay gà la uwaga matəərbəy aŋha adəsakanəŋ à waŋ, kà vud tekula pəra. Duvats, mamətsay ŋgaha may, akəl adəbabəh à gay, kà uwana Sufəl Zəzagəla kà, masla la uwana Sufəl aña tatak gesina, masla la uwana adəfəhalla seriya à gəl.”*

⁹ Kiya uwaga azlasufəl aña gudəŋ à vok uwana tadəhà mabila la gudəŋ uwaga, mok uwana tadənəŋ kəsək aña akəl uwana ababəhay kà, tadətaway la mabək ahəl à kuda, kà uwana tadzà à ahəŋ la matsidəy la abà. ¹⁰ Kiya uwaga ŋgərpa aña gudəŋ adàvə à atà guba. Kà uwaga tatsəzl à fəta à awtəy la mabək ahəl à gəl la mataway gəf gəf: “Mən gudəŋ Babila, kakay la kirim yewdi, seriya adatəf à ka à gəl ma!”

¹¹ Kiya uwaga aga la azlaməna matsakalay la gudəŋ la vok gesina, tataway la mabəkəh ahəl à gəl babay, kà uwana akələdababəh gudəŋ à gay, ŋgaha masukw tatak la ahəŋ aya aw. ¹² Aganay azlatatak madaw ala aŋha: Luwəluwà, gursu, azlaakur uwana sləm aŋatà la ahəŋ, kà aña madəhla tatak bədfə, azlaturmi lukut zlazləfaga, azlaseda mativga, ŋgaha la azlatsəhay lukut mahəfəyga. Ŋgaha aya azlatatak uwana azlaməna tsakalay tadəwəh ala, taga azlatsəhay ahəf anik uwana azinay lela, ŋgaha la azlatatak uwana tadəhàhəŋ la azlaslid gawwan, azlatatak anik bay la azlaahəf mapəfəy gə delga, azlatatak anik tadəhàhəŋ la azlaada vərzeganiya, ŋgaha la azlaakur mikoslaga. ¹³ Azladza uwaga tadəwəh azlatsəhay matərsin anik anik ala, ŋgaha azlababasl uwana azinay lela. Tadəwəh ala aya iyaw matavəruk, la azlaaməl, nalkama, la azlapəhaw nalkama, ŋgaha la azlasla, la azlatuwaŋ, la azlapəlis, la azladərkwa uwana azlapəlis tabiyəŋ, ŋgaha la azlamayà tadəwah ala; ama masla masukway la ahəŋ aya aw. Kiya uwaga tataw la magəfəy à gudəŋ uwatà. Azlaməna matsakalay tagəf à mən hudf gudəŋ uwaga: ¹⁴ “Azlatatak uwana kaval à ləv aŋək, akəl adababəh à gay lidəfa. Gorobu aŋək, la matsidəy aŋək gesina adazila,

* 18:8 18.8 Yesayya 47.7-9; 48.20; Yeremiya 50.8,29; 51.9

kadàbèzal aya aw.” ¹⁵ Kiya uwaga azlamèna matsakalay, uwana tagahay gorobu kà masla, ngərpa aña gudəŋ uwaga adavà à atà guba. Kà uwaga tadatsazl à fəta à awtày la mabak ahàl à gəl la mataway. ¹⁶ Tadawits hulolo gay gədgəgəđ: “Məŋ gudəŋ adabəzl à abà. Masla agà bokuba mis uwana atsòkwàh azlaturmi mativga à abà, ngaha la azlaseda zlazladfaga, ngaha la azlatsəhay anik mahadəy gà, masla abàk tatak bəđà à vok mənğa, azlaanik tadahahanə la luwàluwà, azlaanik la azlaakur uwana sləm aňha la ahəŋ. ¹⁷ Kay, kakay awma ababəh à gay la gorobu aňha la kirim yewdi kiya uwanay ma?”

Azladza uwana tabelàk kəslah iyaw la azlamənğa aňatà, ngaha la azlamèna matsakalay uwana tauguzahahay la kəslah iyaw, ngaha kəla dza uwana la kəslah iyaw la afik, tatsàzl à fəta à awtày kərkər gesina. ¹⁸ Atà tanərèz mok uwana tanəŋà kəsək akàl, uwana ababəh gudəŋ, tawiyà la ndzəđa: “Tekedik kà gudəŋ anik la ahəŋ, kà aňa magagazla la masla aw!” ¹⁹ Kiya uwaga atà tatàw la mabak ahàl à gəl, tatabà-bàläh la kutso la abà, tawiyà gəđđa, tagòđ: “Aganay məŋ gudəŋ uwanay, adabəzl à abà à uwana, azladza uwana takòràh kəslah iyaw gesina tagàh gorobu la ahàl aňha. Uwaga adabəzl à abà kà la kirim yewdi!”

²⁰ Kay, akul azladza uwana la zagəla la afik, rabàw aňkul. Akàl adababəh à gay Babila. Akul azladza aňa Zəzagəla, akul azlamèna matapla, ngaha akul uwana tapəh à akul gay à ahàl kà mapàh à azladza, rabàw, kà uwana Zəzagəla adadəhalla seriya à gəl kà tatak uwana adəhəkulləŋ à vok!

²¹ Uwana uwaga adada à lig, məŋ malika anik azəb akur mənğa bokuba vəl, adùw à dərəv à abà la magodəy: “Kiya uwanay à uwana tadəđuw məŋ gudəŋ Babila ala la ndzəđa, adàzila tuwiz, dza adənəŋəŋ aya đikidiki aw. ²² Mahohumay aňa azla-nəziŋla dəs, la azlamèna mats talakway, la azlamazlazliŋ adàtsanay la abà aya aw. Tadəbəza azlamèna madəh azlatatak anik anik la abà aya aw. Baməraka matsənay aňa madzam tatak, babay adəmətsah à gay gesina hənats. ²³ La abatà ufaka aňa azlafənəs adəgahay la abà aya aw. Mawiyay mazađ mis la madəh zil adàtsanay la abà aya aw. ‘Gi, zlá’, kagòđ, la madəw azlagudəŋ à vok gesina la matsakalay, ngaha kà vavaraha azladza à bada à abà la məzla aňak. Kà uwaga à uwana seriya adəkəs ka!”

²⁴ “Zəzagəla anəŋà aňiz aňa azlamèna mapəh à atà gay à ahàl aňha, ngaha la aňa azlamèna madinjal gəl à vok, uwana takəđəh atà la gudəŋ la vok gesina, agà la kuda aňha. Kiya uwaga à uwana Zəzagəla adadukwla seriya à gəl suwan”, malika agòđ.

19

¹ La lig aňa uwaga la ahəŋ, gətsənà kuda atsən à ahəŋ la zagəla bokuba kuda aňa maham à ahəŋ dza, tagodəy: “Məzləba Zəzagəla! Mətataslla ahàl à Zəzagəla gami, masla la uwana atəfà azladza. Mazləbay la maslay gesina kà la ahàl aňha. ² Iyay, masla la uwana, masla seriya dziriga gà, adəh seriya à azladza la asik aňha. Adukw seriya à masla mazađ zil uwaga à gəl, masla uwana awisà azladza gudəŋ à vok ala la sləray mawisiga aňha. Zəzagəla adavàl ngərpa, kà uwana akəđal azlamayà aňha.”

³ Ngaha tagòđ aya: “Məzləba Zəzagəla! Kəsək aňha adəv à gay tsəràh à awtày aw!”

⁴ Kiya uwaga azlamadzahaga dzik səla gəl aňha ufad uwatà, ngaha la azlatatak ufad uwatà la sifa, takəđəđ à ahəŋ la huma Zəzagəla uwana aga la kursi la afik, tasləkəw Zəzagəla tagòđ: “Məzləba Zəzagəla! Amen!”

Madəvadəy mazəb mis aňa magadzaw aňa Zəzagəla

⁵ Kiya uwaga kuda atsən à uda la kursi Sufəl la abà agòđ: “Zləbàw Zəzagəla gami, akul azlamayà aňha; azlamənğa gà, ngaha la azlabəzaga gesina, akul uwana kahoyaw yewdi aňha!” ⁶ Ngaha kiya uwaga gətsənà kuda atsən bokuba mavats gay aňa maham à ahəŋ dza. Atsən babay bokuba mahohumay aňa iyaw mukwà. Ngaha

aya bokuba mahohumay anja habaga uwana asläh mèlo à uwana gətsənəŋ. Matsənay anja kuda gə uwana kà, agòd kà: “Məzləbà Zəzagəla, kà uwana Sufəl Zəzagəla gami kà, adazuw Sufəl ala anja tetuwa. ⁷ Məràb la marabay, kà uwana kaslā anja mazəb mis anja magadzaw kà adaslay, ŋgaha mawda anja adadāh vok. ⁸ Tavà tetəvi à mis kà matsokw à lukut tsidāŋaga à abà, uwana awutsəday wuzlwawuzl.” (Lukut delga uwaga kà, asal mapəhla ala kà, magay sətaka anja azlauwana tafà gəl anjətà à Yesu à afik)

⁹ Kiya uwaga malika anik agòd à gi: “Tsetsèr à wakità à abà: Marabay agay la dza uwana Zəzagəla azalāl à madəvaday anja mazəb mis anja magadzaw à abà.” Bə gotənaŋ malika uwaga agòd à gi aya: “Azlagay uwanay kà, taga dziriga, kà uwana tasa à waŋ kà la paŋaw anja Zəzagəla.” ¹⁰ Kiya uwaga mok uwana gətsənà uwaga, gətəd à makəla asik anja, kà masləkaway, ama agòd à gi: “Kadāhəŋ kiya uwaga aw, gi bay kà, gi mayà anja Zəzagəla bokuba kak la azladedā anjak uwana tadin gəl à gay uwana à vok, Yesu afətətàla à adi ala. Kà anja uwaga kà, kazləba gi aw, zləbà kà Zəzagəla!”

Azlaməna mapəh à atà gay à ahəl tapəh slilih anja gay uwana Yesu afətətàla à adi ala bay, kà uwaga la uwana avəh à atà ndzəda.

Masla mad à pəlis medəkuga à afik

¹¹ Kiya uwaga gənəŋə zagəla, kà zagəla mapəzlla à ama ala gə, ŋgaha pəlis medəkuga azlaŋəl. Dza uwana la afik kà sləm anja kà Dziriga, kà uwana adəhahəŋ kà say dziriga. Apa guvəl la tetəvi anja.✧ ¹² Yewdi anja kà awutsəday bokuba aləh akəl, garamusa kà dəŋ la gəl la kəl. Matsetser à ahəl sləm à vok gə, dza la ahəŋ asəl sləm uwatà aw, say masla pəra. ¹³ Atsòkw à lukut uwana à vok aniz aniz gə. Sləm anja kà: Gay anja Zəzagəla. ¹⁴ Azlamalika anja guvəl anjuvaw tanəfà masla, gesina anjətà la pəlis medəkuga la afik, tatsòkwəh azlalukut medəkuga à abà koha babay. ¹⁵ Katsakar mazuwayga asà à waŋ la gay anja la awtəy. Adəkadla azladza uwana tavələhà atà à ahəŋ lakəl à adi. Adakor atà la agəla ada. Adəhabahatàla bokuba mayyay ahəf uwana takudits iyaw à uda la abà. Kiya uwaga à uwana adəpəhla à atà ala, kà Zəzagəla la mapak ləv mənŋga. ¹⁶ La lukut anja lavok, ŋgaha la matataba anja kà tatsətsèr sləm anja à abatà: ‘Kà Sufəl anja azlasufəl, Mənŋga uwana aduwa azlamənŋa anik gesina aya.’

¹⁷ ŋgaha aya gətsənà malika anik uwana atsizlla à afats à afik azalahay la kuda zləkkà, agòd: “Azlakolan, azlakolan uwana tahoyay la ləv zagəla la abà, sàw à waŋ gesina kazuwaw madəvaday mənŋga uwanay Zəzagəla adadāhakulan à ahəŋ. ¹⁸ Sàw à waŋ, kazuwaw sləb vok anja azlasufəl, zùwəw babay anja azlaməna guvəl la azlamənŋa anjətà, zùwəw anja azlapəlis la azlaməna madəh à afik, ŋgaha la anja azladza gesina, azlamayà la azlauwana takor gəl, baməraaka azlamagolga la azlabəzaga, zùwəw à gay gesina!”, agòd à atà.

¹⁹ Kiya uwaga gənəŋə tatagə uwatà la mokfak mawurlaga la vok, ŋgaha la azlasufəl gudəŋ à vok, tahamə gay à vok kà map guvəl la masla mad à pəlis medəkuga uwatà à afik, ŋgaha la azlaməna guvəl anja. ²⁰ La lig la ahəŋ, katskats, takəs tatagə uwaga, ŋgaha la tatagə masəla fidaga, uwana adəhəhəhə azlanadzipo la masəlay anja tatagə matera. Apapət atà anja mabəz masəlay la vok anjətà uwana tasləkaw la mazlazlay, uwana la maftsa vok anja matera. Kiya uwaga, mok uwana takəs tatagə uwaga la masla fida uwaga, tawits atà à gudəh akəl, uwana à abà madəhəŋ à abà gə la huleli la adi. ²¹ Ama azlaməna guvəl anja, uwana la pəlis la afik kà, akəd à gay la katsakar uwana asà à waŋ la gay anja. Azlakolan gesina tadəv à waŋ, tazùw.

✧ 19:11 19.11 Mahabay 96.13; Yesayya 11.4; Hezəkiyel 1.1

20

Gay aña mavay dëbow

¹ Kiya uwaga gënëña aya malika anik atsà à ahëj la zagëla la tsëkurëm aña afëk zënjzënga, la magol mazakazak tadzëbërra la ahàl. ² Ahàd, akës kudu, uwana uwarà kà bebi uwana arahëlla azladza à uda. Masla la uwana baba aña masasëdök mawisiga, ngaha slëm aña anik aya kà seteni. Malika uwaga akës atsërkwàñ aña mavay dëbow. ³ Uwana malika adatsërkwëñ, adüw masla à afëk zënjzënga à abà, atsàkalla à ama la tsëkurëm, ngaha aslërabal à tsëh tsëräh à mavay dëbow, kà masla aña marähla azladza gudëñ à vok à uda aya aw. Say baña mavay uwaga tafàl à ahëj, adädëv à gay. La abatà tadäpëlëñ ala aña kaslà ñuv aya.

⁴ La lig aña uwaga la ahëj, gënëña azlakursi sufël. Azladza uwana tadzäh madzay la afik, tabëzà maslay la slaka Zëzagëla kà madäh seriya. Gënëña babay sifa aña azladza uwana tanätsäh à atà gël la vok ala uwarà, kà gay dziriga aña Yesu uwana tagadän à afik, ngaha la uwana tazän gay Zëzagëla aya. Atà taslëkàw tatagà uwaga amiyaka bà la maftsa vok aña bay aw, ngaha atà takës masëlay aña tatagà kà manäh à madëgay bañaw ahàl aña atà aw. Tadz à ahëj la Yesu lagwa takoray la slaka gà la masla tsëräh à mavay dëbow. ⁵ Aganay azladza teraña uwana tawul à uda la mamëtsay. (Ama azlaanik uwanay kà tadawul à uda dadän aw, say baña mavay dëbow uwanay adaslay) ⁶ Gay gà la uwaga marabay agay la azladza uwana tawula à uda teraña. Atà Zëzagëla adapis à atà gay à vok kaykay. Ndzëdä aña mamëtsay masëla la ahëj lakël aña atà aya aw, atà tadàgah azlamëna mav tatak la huma Zëzagëla la Yesu. Tadàkoray la Kristu mavay dëbow.

Zëzagëla adüwan seteni

⁷ La mavay dëbow uwaga la abà, seteni kà matsërkwënga la mazakazak. Baña uwaga adàda à lig kà tadäpëlëñ ala aya. ⁸ Adada à marähla azladza anik anik à uda la gudëñ la vok gesina. Slëm aña azlagudëñ uwaga kà Gog atà la Magog. Masla adähama à atà gay à vok kà map guvël la Zëzagëla tadägay kà aña uvaw bokuba wuyyan uwana la mukwà la tsëh. ⁹ Aganay tazlanalay taslëh gël à ahëj, tadäh à slaka gesina, takas gay à slaka maham à ahëj aña azlamëna gay Zëzagëla à adi, ngaha la hud gudëñ uwana Zëzagëla awoyan bay. Mok uwana takës atà gay à adi, akàl asa à ahëj la zagëla, ababëh atà à gay. ¹⁰ Seteni uwana azähätàla kà, takës, taduw à gudüh à abà la masla mapëhal gay à ahàl fidaga uwatà. Tadàsa ngërpa mavakay la mahëny la abà la abatà aña tsëräh à awtày.

Seriya makëd gël à ahëj

¹¹ Ngaha aya gënëña kursi sufël medëkuga, dza la afik, dzëgova. Gudëñ à vok la zagëla tazàlla à huma ala tuwiz, manëñ atà la ahëj aya aw tetuwa. ¹² Ngaha aya kà, gënëña azlauwana tamätsäh gesina, azlamagolga la azlabëzaga, atà tatsàzl à huma kursi aña Zëzagëla. La abatà azlawakità mapazl vok gà la ahëj, la azlawakità uwatà la abà, à uwana tatsëtsëräh madëhëñ aña azladza à abà tadza à ahëj la sifa aña tsëräh. Mok uwana tapëzlay wakità, Zëzagëla adähà seriya à azladza uwana à gël tamätsäh uwarà. Adähà atà seriya la tetëvi aña, kalkal bokuba uwana tadähähän à uwana tatsëtsër à wakità uwaga à abà. ¹³ Bamëraka azlauwana tazäh à iyaw à abà la azlatsëhay anik anik kà Zëzagëla adàwulla atà à uda gesina, kà madäh à atà seriya kalkal la uwana tadähähän suwan. ¹⁴ Ndzëdä aña mamëtsay la mezewi adagay la ahëj aya aw, kà uwana taga la gudüh akàl la abà. Uwaga slaka mamëtsay masëla. ¹⁵ Baña dza uwana slëm aña matsetserayga la wakità aña sifa la afik aw kà, tadäduw à gudüh akàl à abà, aña tetuwa bay.

21

Zagəla mawga la gudəŋ à vok mawga

¹ Kiya uwaga la lig la ahəŋ, gənəŋà zagəla mawga la gudəŋ à vok mawga. Zagəla maviyaga la gudəŋ à vok maviyaga adada à lig, ŋgaha azladərev la ahəŋ aya aw. ² Ŋgaha gənəŋà huɖ gudəŋ tsikaslaga, huɖ gudəŋ uwatà kà maw Urusalima, uwana atsà à ahəŋ la zagəla la slaka Zəzagəla, atsà à vədah. Zəzagəla adadəhalla vok à uda bokuba dugu uwana adəh vok kà mad à zil. ³ Ŋgaha aya gətsənà kuda atsən la ndzəɖa la kursi sufəl la abà, agòɖ: “Nəŋəŋ Zəzagəla adəŋal gày aŋha à tataka azladza à abà, adàdza à ahəŋ la tataka aŋatà la abà, tadəgay azladza aŋha. Zəzagəla la gəl aŋha adəgay la atà. ⁴ Masla adəɖahah à atà iyaw tugwi la adi ala gesina. Mamətsay adəgay la ahəŋ aya aw, matuway la mabak ahəl à kufa adəgay la ahəŋ aya aw, mazay adəgay la ahəŋ aya aw, matərebay adəgay la ahəŋ aya aw, gesina kà tsewwa adəgay, kà uwana azlatatak maviyaga kà adada à lig!”

⁵ Dza uwaga la kursi la afik agòɖ: “Nəŋəŋ, gəpakà azlatatak gesina ala kà mawga!” Ŋgaha agòɖ à gi: “Tsetsèr uwanay gəpəh à ka, kà uwana azlagay uwanay kà dziriga, fida la tsəh aw.” ⁶ Agòɖ à gi aya: “Tsewwa adəgay. Gi la uwana gi matera aŋa tatak gesina, ŋgaha gi la uwana gi makəɖ gəl à ahəŋ aŋa tatak gesina aya. Gi uwana gədzəkà tatak, ŋgaha gi uwana gədəkəɖ gəl à tatak gesina. Azladza uwana nəlay aza à atà, gədətəɖ à atà iyaw deyday. Iyaw uwaga kà iyaw uwana avà sifa.* ⁷ Aganay azlatatak uwana gədavà azladza uwana takəɖasl à mawisiga, gədəgay Zəzagəla aŋatà, ŋgaha atà tadəgay azladza gulo. ⁸ Ama azladza uwana tasakal à tsəh ala, la azladza uwana tadin gəl à Yesu à vok aw, la azlaməna ləv mawisiga, la azlaməna makəɖ dza, la azlaməna mabila, la azlaməna madəh məzla, la azlaməna manəf mazlazlay, la azlaməna fida kà, tadəwits atà à gudəh akəl uwana à abà madəhəŋ à abà gə la huleli. Uwaga la uwana agay mamətsay masəla.”

*Urusalima mawga aŋa Zəzagəla**

⁹ Kiya uwaga malika anik asà à slaka gulo. Agà tekula la tataka azlamalika məɖəf uwana la abà la tasà la ahəl uwana azlanjərpa makəɖ gəl à ahəŋ agəh la abà. Mok uwana adasa à wan agòɖ à gi: “Sà à wan, gəpəhakala dahalay uwana magadzaw adazəbay tsi.” ¹⁰ La kirim yewdi, Masasəɖok Zəzagəla asà à ahəŋ à gəl gulo, ŋgaha malika uwaga adàla à gi à mən gudəŋ matsəkakəɖayga à afik. Apəhgəla Urusalima huɖ gudəŋ tsikaslaga aŋa Zəzagəla la zagəla la slaka Zəzagəla. ¹¹ Gudəŋ uwatà awutsəɖay wuzlwawuzl bokuba akur uwana sləm aŋha yaspe, sləm aŋha la ahəŋ kà mənğa gə. Awutsəɖay bokuba takenəɖeka. Uwaga kà mazləbay aŋa Zəzagəla la uwana awutsəɖay kiya uwaga. ¹² Gudəŋ uwaga zlagam mənğa, zinziŋga anuɖa ala gay à adi dəkəts, gamagày kulo gəl aŋha səla la vok. La kəla gamagày kulo gəl aŋha səla uwaga kà tatsətsèràh sləm aŋa tsəhay kulo gəl aŋha səla aŋa azla Isərayel à adi. ¹³ Kəla makəla tekula kà, gamagày makər makər la vok. Makər la mas à afik afats, makər la matəɖ à ahəŋ afats, makər la gəl la aku, ŋgaha makər la tsəh la ahəŋ, bokuba magəɖay magadzaw. ¹⁴ Tafà zlagam uwaga kà à azlaakur matatukw gày kulo gəl aŋha səla à afik. La kəla akur la adi tatsətsèràh sləm aŋa azlaməna matapla la slaka aŋa Yesu à adi.

¹⁵ Malika uwana atəgw à gi gay uwaga kà, agà la agəla luwəluwə la ahəl, uwaga kà agəla kà magorla tatak. Ahəd kà magor gudəŋ, la azlagamagày, ŋgaha la zlagam aŋha. ¹⁶ Huɖ gudəŋ uwaga kà, agà banuga kiya uwaga gay ufaɖ nna kà kalkal gesina. Malika agər gudəŋ uwaga la agəla aŋha: Zinziŋ aŋha kà, agà zuwid slewzi dəbow la dadərmokw səla, kəla gay tekula, kiya uwaga gay ufaɖ nna à zinziŋ aŋha bay. ¹⁷ La lig la ahəŋ malika agər zlagam aŋha mawalay dzim la dzik ufaɖ gəl aŋha ufaɖ.

* 21:6 21.6 Yesayya 55.1 * 21:8 21.8 Dzəŋ Hezəkiyel 40

Magur anha kà bokuba uwana anu azladza mægur tatak. ¹⁸ Zlagam gà, uwana kà tahàzl la tsəhay akur uwana tazalalla yaspe. Ama kà anja hud gudəŋ kà taŋəl kà la luwàluwà dzəraŋ dzadzəraŋ bokuba takenedeka medekuga. ¹⁹ Azlaakur matatukw zlagam kà la luwàluwà tadahàhàŋ, kà la azlaakur anik anik mahadəyga. Akur teraŋa uwana taŋəlal zlagam à gəl kà tazalalla kà yaspe, masəla kà safir, maməkər kà agat, maufad kà emerod, ²⁰ mazlo kà sardonikəs, maməkwa kà saruwan, mamədəf kà kərisolit, mamtəgis kà beril, maladəga kà topas, makulo kà kərisopəras, makulo gəl anha tekula kà tiwrkəs, ŋgaha makulo gəl anha səla kà amətəs. ²¹ Kà anja gamagày kulo gəl anha səla uwaga kà, kəla gamagày kà, tadahàŋ kà la Perle, uwaga kà bokuba kololo, tetəvi anja hud gudəŋ kà tadəl kà luwàluwà dzəraŋ dzadzəraŋga bokuba takenedeka medekuga.

²² La hud gudəŋ uwaga kà gày Zəzagəla la ahəŋ aw, kà uwana Zəzagəla la gəl anha abəd à abà, atà la magadzaw. ²³ Kiya uwaga gənəŋà afats atà la təla tawudəy aya aw, kà uwana azlaka dza aya aw. Kà uwana la abatà kà, mazləbay anja Zəzagəla awudəy ŋgaha magadzaw avədəy kiya fənəs la hud gudəŋ la abà. ²⁴ Azladza gudəŋ à vok gesina tadəuguzahəy la udaka anha la abà. Kikay kà udaka uwaga, azlasufəl anja gudəŋ à vok tadàda à abà kà mav maslay aŋatà gesina à Zəzagəla. ²⁵ Azlagamagày anja hud gudəŋ tadàdza à ahəŋ mapəzl vok gà kəla mavakay gesina. Matsakalla à ama la ahəŋ aw tsərəh à awtày, kà uwana vəd adəgay la ahəŋ aya aw. ²⁶ Kiya uwaga tadəsahla maslay aŋatà à waŋ azlatatak zəbzəbga, zəbzəbga uwana la gudəŋ la vok. Tadədalla uwaga à slaka Zəzagəla kà mavəl. ²⁷ Ama kà anja tatak mawisiga kà, adàda à gudəŋ uwaga à abà aw. Azladza uwana àläh àlähga, la azlaməna fida tadàda à abà aw. Say azladza uwana tatsetsər sləm aŋatà à wakità anja magadzaw à afik pəra, la uwana tadàdza à ahəŋ la sifa anja tsərəh à awtày.

22

¹ Malika apəhgəla mukwà iyaw uwana avà sifa à azladza aya. Awudəy dzəraŋa tsərəh à godega bokuba tekenedeka medekuga, akəl à uda la kursi anja Zəzagəla la abà, la anja magadzaw. ² Masla akəlay la ləv barama anja hud gudəŋ uwaga la ama. Ama ahəf uwana avà sifa à azladza dzərra la gay mokmak nna, avà mayyay kəla təla asik tekula, bokuba magodəy asik kulo gəl anha səla la mavay la tsəh. Amiyaka babasl anha bay kà, yohof kà mawar azladza gudəŋ à vok ala gesina. ³ Ama uwana Zəzagəla adətsafla gesina kà adəbəza vok la abà aw.

Say kursi anja Zəzagəla la anja magadzaw pəra uwana tadəgay la hud gudəŋ uwaga la abà, la azlaməna sləray aŋatà kà masləkaway. ⁴ Tadənəŋ hud adi anha, tadətsetserah sləm anha à madəgay aŋatà. ⁵ Kiya uwaga vəd adəgay la ahəŋ aya aw, azlafənəs, la afats adəzlaka azladza aya aw. Kà uwana Sufəl Zəzagəla la gəl anha adəv udaka. Atà tadəkoray anja tsərəh à awtày.

Mas à waŋ anja Yesu

⁶ Kiya uwaga malika agod à gi: “Gay uwanay kà dziriga, fida la abà aw. Sufəl Zəzagəla uwana avà Masasədok anha à azlaməna mapəh à atà gay à ahəl kà mapəh à azladza, asləl malika anha à ahəŋ kà mapəhla ala uwana adəpaka vok la huma à gay à azlamagamza anha.”

⁷ Yesu agod: “Nekwa, gəwula à waŋ. Marabay agay la azladza uwana takəs gay uwana la wakità uwanay la abà, kà uwana Zəzagəla la uwana afətalla à ama ala la Masasədok anha!”

⁸ Gi Yuhana gətsənà azlatatak uwaga la sləm gulo, ŋgaha gənəŋəŋ uwaga gesina la yewdi gulo. Mok uwana gədatsən uwaga gesina la manəŋəŋ, gəkədəd à makəla asik anja malika, uwana apəhgəla uwaga gesina, kà masləkaway. ⁹ Ama agod à gi: “Kadahan kiya uwanay aw. Gi bay, gi magamza anja Zəzagəla, bokuba kak, ŋgaha

la azladza anjak uwana Zəzagəla apəh à atà gay ahəl la azlauwana tanəfa gay anja wakità uwanay. Kà anja uwaga kà, kazləba gi aw, zləbà kà Zəzagəla!”¹⁰ Kiya uwaga agòf à gi aya: “Zəzagəla afətàka à ama ala à uwana tatsèsèr à wakità uwanay à abà. Kakəsa gay uwanay la ləv anjak pəra aw, kà uwana kaslà anja azlatatak uwanay kà nekwa.¹¹ Gəgodf à azlaməna madàh mawisiga, gəgodf à azlaməna ləv mawisiga kà baña asa à akul magay kiya uwaga kà: ‘Dàw à huma à gay la ləv mawisiga pəra zlà.’ Kà anja dza dziriga bay kà, ada à huma à gay la madàh dziriga anha, dza uwana sətaka, ada à huma la sətaka anha gesina.”

¹² Kiya uwaga Yesu agòf: “Digiya tsənàwàñ, nekwa gəwul à wañ. Gi gədàsəlla azlatatak à wañ la ahəl, kà gi anja mapəl masik anha à dza.¹³ Gi uwana gi la ahəñ dagay uwarà, ngaha gi uwana gədàgay la ahəñ aya. Gi uwana gədzəkà tatak, ngaha gi uwana gədàkədf gəl à tatak gesina.”✧

¹⁴ Marabay agay la azladza uwana tapalàh lukut anatà, atà la uwana la tetəvi anja maday à hudf gudəñ à abà. Atà la uwana azlawla atà, kà mazuw mayyay ahəf, uwana avà sifa à azladza.¹⁵ Ama azlaməna falay, la azlaməzla, la azlaməna madàh mabila kà, tadàgədf à uda. Azlaməna makədf dza babay, la azlauwana tasləkaw mazlazlay, la azlaməna manəf fida kà, tadàgədf à uda babay, tetuwa tadàbək asik à hudf gudəñ à abà aw!

¹⁶ Yesu agòf: “Gi, Yesu uwana gəsləl à akul malika gulo à wañ kà maz à akul tatak uwanay gesina la azlagəy maham à ahəñ mənə gay Zəzagəla la aku, gi kà, gi dza uwana kakudaw. Gi mayyi à tsəh ala anja David. Gi nuzla gəl bebəñ.”✧

¹⁷ Masasədfok Zəzagəla, la mawda anja magadzaw takəs la azlaahəl səla: “Sà à wañ zlà!” Akul uwana katsənaw gay uwanay babay: “Sà à wañ!”, kagodaw. Dza uwana nəlay azəñ kà, asa à wañ, abəzà iyaw sifa uwanay deyday.✧

Makədf gəl à ahəñ anja gay uwanay

¹⁸ Gi Yuhana gəsləhakulla sləm ala. Akul gesina uwana katsəbàw sləm à gay uwanay la wakità la abà, asà à wañ la slaka Zəzagəla. Gi gəpəh à akul kà, baña dza akədfəvànì gay à wakità uwanay à tsəh kà, Zəzagəla adàzala ngərpa à gəl suwañ, à uwana masla apəh la wakità uwanay la abà.¹⁹ Ngaha bay, baña dza atetuwa uwana Zəzagəla afətàla à ama ala la wakità uwanay la abà kà, Zəzagəla adàzəbal anja ala humà mayyay ahəf uwana avà sifa, ngaha la humà hudf gudəñ tsikasliga uwanay, wakità uwana adapəhla ala.

²⁰ Masla sayda dziriga anja gay uwana la wakità uwanay la abà, agòf: “Ndzer, gi nekwa, gəwula à wañ.”

'A tsa bà kità! Sà à wañ, Sufəl Yesu!

²¹ Sufəl Yesu apis à akul gay à vok kaykay gesina. Amen.